

001 太上老君說常清靜妙經

經名：太上老君說常清靜妙經。
撰人不詳，約出於隋唐。一卷。
底本出處：《正統道藏》洞神部
本文類。參校本：杜光庭等諸
家註解本。

太上老君說常清靜妙經

老君曰：大道無形，生育天地；大道無情，運行日月；大道無名，長養萬物。吾不知其名，強名曰道。夫道者，有清有濁，有動有靜。天清地濁，天動地靜，男清女濁，男動女靜。降本流末，而生萬物。清者濁之源，靜者動之基^①。人能常清靜，天地悉皆歸。夫人神好清而心擾之，人心好靜而慾牽之。常能遣其欲而心自靜，澄其心而

神自清，自然六欲不生，三毒消滅。所以不能者，爲心未澄、慾未遣也。能遣之者，內觀於心，心無其心；外觀於形，形無其形；遠觀於物，物無其物。三者既悟，唯見於空。觀空亦空^②，空無所空。所空既無，無無亦無。無無既無，湛然常寂。寂無所寂，慾豈能生？慾既不生，即是真靜。真靜應物，真常得性。常應常靜，常清靜矣。如此清靜，漸入真道。既入真道，名爲得道。雖名得道，實無所得。爲化衆生，名爲得道。能悟之者，可傳聖道。

老君曰：上士無爭，下士好爭；上德不德，下德執德。執著之者，不名道德。衆生所以不得真道者，爲有妄心。既有妄心，即驚其神。既驚其神，即著萬物。既著萬物，即生貪求。既生貪求，即是煩惱。煩惱妄想，憂苦身心，便遭濁辱，流浪生死，常沉苦海，永失真道。真常之道，悟者自得。得悟道者，常清靜矣。

太上老君說常清靜妙經

仙人葛仙翁曰：吾得真道，曾誦此經萬遍。此經是天人所習，不傳下士。吾昔受之於東華帝君，東華帝君受之於金闕帝君，金闕帝君受之於西王母，西王母皆口口相傳，不記文字。吾今於世，書而錄之。上士悟之，升為天官；中士得之，南宮列仙；下士修之，在世長年。遊行三界，昇入金門。

左玄真人曰：學道之士，持誦此經者，即得十天善神擁護其人，然後玉符保神，金液鍊形。形神俱妙，與道合真。

正一真人曰：人家有此經，悟解之者，災障不干，衆聖護門，神升上界，朝拜高尊。功滿德就，相感帝君。誦持不退，身騰紫雲。

① 此句原作「動者靜之基」，與下文義不符。茲據侯善淵、劉通微二注本及《清靜心經》改。
② 「亦」，原作「以」。茲據《清靜心經》及杜光庭、侯善淵、無名氏、李道純、劉通微等注本改。

（丁培仁點校）

002 太上老君說常清靜

經註

左右街弘教大師傳真天師
賜紫廣成先生杜光庭註

經名：太上老君說常清靜經註。
唐末五代道士杜光庭註。一卷。
底本出處：《正統道藏》洞神部
玉訣類。

太上老君

太者，大也。上者，尊也。高真莫先，衆聖共尊。故曰太上老君。老者，壽也，明老君修天修地，自然長壽，故曰老也。君者，尊號也，道清德極，故曰君也。以明老君為衆聖之祖，真神之宗，一切萬物莫不皆因老君所制，故為宗祖也。

說常清靜經

此明清靜之理。且常者，法也。常

能法則此經清靜也。清者，元也。靜者，氣也。經則法也，一則為聖人之徑路，二則為神仙之梯櫬。凡學道之人皆因經戒而成真聖。聖人未有不假經戒而立，不因元氣而成道者也。此一章之句分為三段，先明無形之道，次說運行之理，下明無名之法。第一明大道無形，第二明大道無情，第三明大道無名。第一明大道無形，能匠成天地，分判清濁。老君曰：大道無形，生育天地。

道者，開口動舌、發言之詞也。又云：道者，虛無之炁也，混沌之宗，乾坤之祖，能有能無，包羅天地。道本無形，莫之能名。無形之形，是謂真形；無象之象，是謂真象。先天地而不為長，後天地而不為老；無形而自彰，無象而自立，無為而自化。故曰大道。經云：視之不見。故曰無形。杳杳冥冥，其中有精；混混沌沌，分為陰陽，故為天地也。育者，養也。長養陰陽，故為生育也。陽者，清也，上騰為天。陰者，

濁也，下潛為地。天地者乃大道之子也。此一段明無情而運行，陰陽之用也。日月者，是陰陽之精氣也。大道無情，運行日月。

自無而生有，造化以成形。故天無精氣，無以制日月之明；地無精氣，無以制山嶽鎮焉；人無精氣，無以制身形之存焉。故曰日月稟陰陽之所運行。故知道之無情，隨機而所化。又云：天何言哉？四時行焉；地何言哉？萬物生焉。經云：用之不可既，無情而運行日月也。日月者，大道之用也。此一段明無名，而萬物自生，長養萬物。

大道無名，長養萬物。故元氣無形，不可名也。經云：道隱無名。乃生於天地。故曰：道生一，一生二，二生三，三生萬物。萬物者，五行之子孫也。三才者，萬物之父母也。道者，三才之祖宗也。故元氣清靜，不可常名也。凡學道之人且在觀宗察行，若能智性無礙，

可以登涉大道之徑，游於三才之外，常人無所能知也。前章明無形無名，故能運行於日月。此兩句乃是太上之自稱，無名之名，強名為道也。

吾不知其名，強名曰道。

吾者，我也。此明太上自言，吾不知其名，強名曰道。此故亦明上德不德，是以有德之義也。老君匠成天地，開闢乾坤，變化萬物，不言我為緣。道法自然，不能名號。一則從有入無，或從無入有，隱顯無方，存亡自在，豈有常名之稱焉。故經云：吾不知誰之子，象帝之先。又云：吾不知其名，字之曰道。前兩句明太上之所自稱，緣道無名。此後九句明大道尊卑之體，以元炁清靜，以天地男女為喻。就此章中，分為三段：第一明道分清濁動靜之喻；第二明天地男女動靜之機；第三明萬物本末之由。

夫道者，有清有濁，有動有靜。清者，天也，正陽之炁上騰為天。濁

者，地也，正陰之炁下結為地。夫者，發語之詞也。夫道能清能濁，能動能靜，以至大道無測，常名清濁動靜，皆為至道之用。凡曰學道之士，若能明動靜之炁，安其位，則至道自來歸之。動靜合宜，故為正色也。此四句與前三句俱明清濁、動靜之理。並後二句，共成一章，以契至道尊卑之位、本末之由。於三段之中，第二段明男女清濁之用、動靜之機。

天清地濁，天動地靜。男清女濁，男動女靜。

《列子》曰：天積炁爾，地積塊爾。天地相連，終不相離。自地以上皆是天也。有諸天諸地，其名不一。四面八天，上有三十二天、三十二帝，皆清炁也。下有九地，九地之下謂之風水。風水之下，冥冥不測。自九地之上，上至諸天，皆出混元之圖也。《上清經》云：諸方各有五億五萬五千五百五十重天，天地之數亦然。此乃以彰至道之尊，大無不包，細無不納也。男者，陽也；女

者，陰也。夫人在於母腹之中受胎之日，皆稟天地陰陽之炁，以成其形，稟天地純陽之炁者，以成其男。十月之中，常在母左腋下者，男也。稟天地純陰之炁者，以成其女。十月之中，常在母右腋下者，女也。女之水性，極陰之炁，故為靜也。男之火性，極陽之炁，故為動也。動者飛昇，上應於天。靜者濁滯，下應於地。故云天尊地卑，乾坤定矣；男尊女卑，陰陽分矣。故曰男動女靜。此二句明本末之由。與前七句合為一章，義分三別。

降本流末，而生萬物。

本者，元也；元者，道也。道本包於元炁，元炁分為二儀，二儀分為三才，三才分為五行，五行化為萬物。萬物者，末也。人能抱元守一，歸於至道，復於根元，非返於末。末者，化也；本者，生也。人能歸於根本，是謂調復性命之道者也。《南華真經》云：生者，神凝也；死者，物化也。人能歸真神，歸真神是謂返本

還源，不可逐物也。此一段四句明清濁之源、動靜之基，人能有道，道自然皆歸。

清者濁之源，動者靜之基^①。人能常清靜，天地悉皆歸。

清者，天之炁也；濁者，地之炁也。皆因清濁之炁生育萬物。世人若求長生之道，鍊陰為陽，鍊凡成聖，皆因清自濁之所生，動因靜之所起。清濁者，道之別名也。學仙之人能堅守於至道，一切萬物自然歸之。故《西昇經》云：「江河淮海，非欲於魚鼈、蛟龍，魚鼈蛟龍自來歸之。人能清虛，寡欲無為，非欲於至道，至道自來歸之於人。但能守太和元炁，體道合真，萬物悉皆歸耳。此四句明心神本來清靜，皆因世欲之所牽也。」

夫人神好清而心擾之，人心好靜而欲牽之。

神者，妙而不測謂之神。心者，神也；神者，心也。心擾則神動，神動則心浮，心浮則欲生，欲生則傷神，

傷神則失道。人能調伏其心，內安其神，外除其欲，則自然清靜。謂下文也。此一段四句，明修行之功，遣欲澄心，自然清靜也。

常能遣其欲而心自靜，澄其心而神自清。

遣者，去除之喻也。人能去其情欲，內守元和，自然心神安靜。心既安靜，世欲豈能生焉？故引《西昇經》之言，所謂教人修道，即修心也；教人修心，即修道也。故以令人絕利一源，修真養性，次保心神安樂。故聖人云：「修真養性，載神扶命，則離苦昇樂，福慶延流，而成真道矣。此兩句為一段，明修真至神，六欲、三毒自然消滅。」

自然六欲不生，三毒消滅。

六欲者，六根也。六根者，是眼、耳、口、鼻、心、意也。欲者，染著之貌、情愛之喻。觀境而染謂之欲，故眼見耳聞，意知心覺。世人若能斷其情，去其欲，澄其心，忘其慮而安其神，則六欲自然消滅，豈能生乎？內

神不出，六識不動，則六根自然清靜，故不生也。三毒消滅。三毒者，三塗之根、三業之祖也。三者，身、心、口也。人有身時，身有妄動之業，心有妄思之業，口有妄語之業。此三業又為三毒。又云，三毒者，乃三尸也，彭瑯、彭瓚、彭矯。上尸好華飾，中尸好滋味，下尸好淫欲。人若能斷得其華飾，遠其滋味，絕其淫欲，去此三事，謂之曰三毒消滅。三毒既滅，則神和、炁暢、精固，三元安靜，三業不生，自然清靜。三元者，上元、中元、下元也。上為三境，生於萬物，天下三元掌人性命。且上元主泥丸腦宮，為上丹田；中元主心府絳宮，則為中丹田；下元主炁海，屬腎宮，為下丹田。此之三元，上主於神，中主於炁，下主於精，故乃掌人之性命也。人若能絕其三業，保此三宮，更辯四時之炁，運轉精華，往來無窮，則三丹田固實，萬和柔順。心若太虛，內外貞白，皆因三尸消滅，除假留真，乃為清靜之道。

矣。前明修真至神，六欲三毒自然消滅。此明迷惑未斷，而心有所染著，故未能窮於妙用。

所以不能者，爲心未澄、欲未遣也。

人若能去前三業，則三尸滅，三尸滅則保其三丹田，三丹田固實則炁通暢，往來無窮，即無世欲牽心，故爲清靜之道。若未能專勤志意，澄心絕慮，則心不能內修至道，難窮妙用之理，則無所制伏於心猿，即漸失精神。精神既失，則六根妄起，世欲牽纏。此謂自不能解於生死之羅，難出輪迴之網者也。前章明能與不能修習。此章獨明能修而不著，破執而成真。九句正經，義分三別，合爲一段。

能遣之者，內觀其心，心無其心；

人能斷情，絕貪去欲，即無三業之罪。不以專志，修於內行，守於絳宮，自內觀己心。心者，火也。故引《內觀經》之言，心者，火也，南方太陽之精，主於火也。上應熒惑，下應心也。心爲絳宮者，神也，妙用不

測，變化無定，神明依泊，三葉如蓮花。又云，制之則正，放之則狂，清靜則生，濁躁則亡。明照八表，暗迷一方。故使學人可以觀之者，心處於形內，不以形觀心。既使形觀，則爲二義。形者舍也，心者主也，舍不能觀主，故不可觀也。可使神觀心。神者炁之子，炁者神之母。但心意引炁，存神而觀之，自然感應。何以知之？古德云：爲使炁神，神之與心，炁之與道，不相遠離。故聖人設法教人，修道即修心也，修心即修道也。心無所著，即無心可觀；既無心可觀，則無所用、無所修，即凝然合道。故心無其心，乃爲清靜之道矣。

外觀其形，形無其形；

心者形之主，形者心之舍。形無主則不安，心無舍則不立。心處於內，形見於外。內外相承，不可相離。心形俱用，不可觀執。凝然混沌，有若無形，亦非無也。若非無心，豈能忘於形體乎？心忘形體，故曰無心。

本經云：吾有大患，爲吾有身。及吾無身，吾有何患？心之與形，動無所染，靜而無著，此謂形無其形也。遠觀其物，物無其物。

五行造化謂之物。又云，塊然有凝謂之形。凡有形質者，俱謂之物也。物無其物者，謂之真，真空也。本經云：恍兮惚兮，其中有物。物者，道之妙用也，非世之常物。

三者既悟，唯見於空。

三者，心、形、物也。內外中間，俱無所著，是名無爲。既入無爲，是名空法。空者，道之用也。有用有著，不名於道矣。前一段分三事。此一段獨明無空寂，雖名空寂之理，則俱無所著，即爲真道也。此一章六句，合爲一段。

觀空亦空，空無所空。

空者，真空也。空法之相，乃有二種：有大空，有小空。大空者，無爲不爲之理。小空者，破有歸無，以無爲爲無，是名小空。此二空俱無，即自然不染正性，乃成真道也。空無

大小，亦無所去，有著即顯，無著即隱。空法之相，即隨影而見形，若言無見即斷滅。其法長存，如水似鏡，在人之身，掌人之性命。凡居有質，皆藉道以成形。一切物類，無不從道而生。大道坦然，常存於物，非為斷滅者也。

所空既無，無無亦無。

空者，亦非大非小，喻如道性，本無長短；亦無塵垢；悟即謂之真空，不悟謂之假相，非為至道。《上清經》云：空假之相，還復成假，亦非為假。道法自然，本無空假。天尊慈悲，乃立空假之相，善巧方便，隨機應化，教導人天，皆歸至道。所說空相，亦非空相。空相是道之妙用，應道用即有，不用即無。非無非有，非名為道。道本無形之形，真之能名；德本無象之象，是謂真象。杳杳冥冥，其中有精，其精甚真，非無為也。萬法俱無，是為空無。空無之道，亦非自然。破此空無，還歸於無也。

無無既無，湛然常寂。

無無者，無執也。雖無執見，歸於寂法。寂法亦無，非為寂也，亦非空也，亦非無也。非空為空，謂之真空。非無為無，是無中之法。法亦俱無，歸於真寂。真寂亦無，非為無法，不有不無，非空非色。假名稱見，化導衆生。種種分別，皆為執見。執見既無，名曰自然。清靜非為空寂之法，空寂既無，則湛然常存，豁然無礙，即謂之真常之道也。前六句明空寂之理。此一段四句，明空寂俱無，自然無欲，即成真道也。

寂無所寂，欲豈能生？

此明法相皆歸寂滅，真道自然，長存不去，無著無欲，自然成道也。

欲既不生，即是真靜。

真靜者，自然無欲也。有欲則患生，無欲則道生。本經云：吾有大患，謂吾有身。及吾無身，吾有何患？無身者，無欲也，無欲謂之真身。真身者，道身也。前四句明無欲無寂。

此四句明真性之道，隨機應物，無所不應，自然清靜。

真常應物，

真者，體無增減，謂之真。常者，法也。常能法則，謂之真常之法也。法則真常，應物隨機，而化導衆生，無所不應於物，道之物也。常者，道之法也。應者，道之用也。法用無有，皆為常道，常道之中，自有真應之道。故云真常應物，道之妙用也。真常得性。

凡欲得成真性，須修常性。而為道性得者，動也。動其本性，謂其得性也。

常應常靜，常清靜矣。

既在道性，本求清靜，自然應物，常用於世，無染無著，無垢無塵，隨機而化。本經云：上善若水。水善利萬物。又云：和其光，同其塵，湛兮似或存。存者，道也。本清靜常應，而無所不應，隨方而無所不靜。故云常清靜矣。此一段六句，標前清靜之性，道性既清靜，乃得真性；既

得真性，返歸於無得之理也。如此清靜，漸入真道。

此言清靜之性，名為真道。經中不言，令人須假性修，漸進而成真也。真者，能長能久，不增不減，與天地齊壽，故為真道也。

既入真道，名為得道。

既入真道，名悟修真。鍊凡成真，鍊真成神，神真者，道也。故與天地同壽，日月齊明，造化萬物，故名為得道也。

雖名得道，實無所得。

道者，無得無失，亦無常形。本經云：道本無形，莫之能名。故云雖名得道，實無所得也。大道常存，亦無去住。又云：上德不德，是以有德。前明真性之道返歸無得之理。此明大聖立教，以無名之名，強名為道，教導人天，應接羣品，雖無正形，悟者必得。

為化衆生，名為得道。

化者，返以守真謂之化。化者是遷變之義，逐換應見之名。化別種種，

應見容儀，有無莫測，誘化時人。誘

化者，指事為喻，恒勸開悟教道之名。普令後學之人捨惡從善，惜身保命。故要歸於聖教，只如太上西化流沙八十一國，亦法視相；或見大人，身長千丈，或見小人，身長丈八，變見無方，易形改號。或為金仙，或曰梵仙，隨方設化，同體異名。教人修道，去妄成真，乃立清靜之教，皆為化也。應見降生於太清，渦水之右，真源之左，九井長存，雙檜猶在，見其道相，以化人天。又《聖紀經》云：老君自上古混沌初分，或以未分，開闢天地，安置日月星辰，分配五行，造化萬物，代代不休。為天王之師，時人莫能知之，非獨為西國演化。所言道本自然，無所不入，十方諸天，莫不皆弘至道。普天之內，皆為造化。蠢動含生，皆有道性。若能明解，即名為得道者也。

能悟之者，可傳聖道。

悟者，覺也，猶通也。通者，達也。凡學仙之士，若悟真理，則不以西

竺、東土為名，分別六合之內，天上

地下，道化一也。若悟解之者，亦不以至道為尊，亦不以象教為異，亦不以儒宗為別也。三教聖人，所說各異，其理一也。本經云：同出而異名。又云：道生一，一生二，二生三，三生萬物。能悟本性，非分別所得也。但能體似虛無，常得至道歸身，內修清靜，則順天從正，外合人事，可以救苦拔衰。以此修持，自然清靜。傳者，付度之名也。人能清靜，至道自來，不求而得，不學而成。本經云：天道無親，常與善人。清靜自然，聖道歸身。所以言可傳聖道也。凡此一段，前獨標無爭無德。後學衆生皆執偏見，妄情所起，失道迷源。老君又徹其前意，以上下有殊，乃破執性。

老君曰：上士無爭，下士好爭。

爭，求靜也。所言上士好爭處而求安，靜本性而自靜。爭者，執有也。上士不執有見，非為喧爭也。緣下士求達本性，故好爭而求靜，以其執

見而求之者也。是名能體道合真者，不著於耳、目、鼻、口、身、意之病，亦不著於鹹、苦、辛、甜之味，亦不著於宮、商、角、徵、羽之音。此之執見皆非本性。此者下士好爭之理，諸見無心，豈有爭乎？人若無爭，為清靜也。

上德不德，下德執德。

德者，貴也，有名稱也。上德者，明上古之君本無名號，亦無所稱，故言不德。本經云，上德無為者，道德所稱也。又云，有若無，實若虛。道者若執有見、有名，即非上德也。本有不無，不虛不實，應用即有，味用即無。故云：知者不言，言者不知。知而不言者，隱也。又知可如不知，知不知上，不知知病，故云知者不可言也。故云上德不德，下德執德也。下德執德者，有名跡功業，以成稱名自見。凡諸有見，皆生分別。又本經云：迎之不見其首，隨之不見其後。何以分別？既有分別，即為執德。若能除兩件之心，乃名為自然

之道。兩件者，有為、無為之法。或立無為為是，破有為為非；或執有為為是，乃破無為為非。此是兩件之心。至道自然，亦非有為，亦非無為。故至道自然，湛寂清靜，混而不染，和而不同，非有非無。凡學仙之士無以執非，但俱無執見，則自達真道，超越三乘，悉歸一乘。道不為下，故執德者不名為道矣。

執著之者，不名道德。

前說執德以為下德，故執諸相，行流涉于有為，不名道德也。道德者，通變無方，存亡自在，應用即見，能尊能貴，悉皆自然，非執見之人。若執見之人，豈能知之乎？此一段明衆生所以不得真道，至常清靜矣。

衆生所以不得真道者，為有妄心。

妄者，動也。情浮意動，心生所妄，動者思之，因妄者，亂之本也。一切衆生不得真道者，皆為情染意動，妄有所思，思有所感，感者感其情而妄動於意，意動其思而妄生於心。人若妄心不生，自然清靜。又云，妄動

者，亡也。皆亡失其道性，故逐境而感情，妄動其心，故不得真道。

既有安心，即驚其神。

驚者，心之極畏，名曰驚也。非祇指於心驚也。驚有二說：一則內修清靜，乃忘於形而驚其神。二則外習事業，乃勞於心，而驚其形；外既驚其形體，內誘則驚於其神。若得心神安靜，則外欲不生，欲既不生，自然清靜也。

既驚其神，即著萬物。

凡人若驚其神，則外有所著於境，內則失於正性。萬物者，衆多之名也。緣道貴守一，不可著於萬物而驚其神也。夫人得生於世，故稟地、水、火、風四大之中，和炁而生，按三才而所育，貴亦難勝。若能安然不動，內守元和，則思慮不惑，自然清靜也。

既著萬物，即生貪求。

貪者，是愛著之貌。雖名愛著，亦有二種分別之義：一者貪於世事，外求華飾，欲樂其情，則為陰咎，不合

於陽教。既屬於陰，即不能清靜，乃為濁滯也。二者貪於進修，窮尋真教，堅求至道。此為內貪。名為貪，其理合於陽教，即輕清而為正，陰即濁滯而歸邪。若能體道合真，自然清靜也。

既生貪求，即是煩惱。

然貪外事，漸漸斷除；貪求內事，勤勤修進。雖即內求至道，不可堅執之，亦乃生煩惱。凡言煩惱，亦有二種，分別輕重：一者輕煩惱，二者重煩惱。一輕則是貪求至道，執之亦生煩惱。二則是外求世法，名重煩惱。輕即合陽，是名為清；重即合陰，是名為濁。雖分輕重，則不可執之。執猶著也。既貪著即生迷惑。但以捨重棄輕，內守元和，湛然不動，故謂之懷道抱德，自然淳朴。夫長生之道全在養神，若守元和不失，神即居之，神若居則心大安，忻忻而若喜，自然清靜，豈有煩惱生乎？煩惱妄想，憂苦身心，便遭濁辱，流浪生死，常沉苦海，永失真道。

身心耽著外境，憂苦自生於內。濁者，染也；辱者，污也。身心染污，自歸流浪者，返復也。返復生死，不離輪迴，流浪於苦海之中。苦海者，憂苦之海也。海者，大也，憂苦事不能免也。非干至道不慈，自為人心造作。夫學道之士，但內守其一，外除其想。一者，身也。聖人皆云存三守一。三者，精炁神也。但守其身，必存於三也。故《西昇經》云：守身不失，常存也。專守其一，不生妄想，即免於苦海沉淪，憂苦不著於身心，自然解脫，合於清靜。故聖人遺其經文，以正其義，施大法橋，開其徑路，教化未悟，令入妙門。此明人皆自失真元，故非為至道不慈者也。

真常之道，悟者自得。得悟道者，常清靜矣。

真道者常存，非古非今，非生非滅，外包天地，內入毫芒，法則萬物，常用於世。人能悟解，雖已自得，非為化物也。夫太上所言，人能覺悟，悟

則本性，謂之得道也。亦非至道難求，亦非易得也。本經云：天道無親，常與善人。又云：道本無形，莫之能名。得悟之者，唯己自知。善人常能守於清靜，即皆為得其真道者也。

此一章至書而錄之，總為一段。先明仙翁誦持此法，次明傳授帝君，天宮洞府，悉皆祕隱，非為常輕者也。仙人葛玄曰：吾得真道，曾誦此經萬遍。

仙人姓葛諱玄，字孝先。初學道之時，常誦此經，後得神仙之道，今位登左仙翁者是也。仙翁有孫，名洪字稚川，今之世人皆只呼抱朴子。祖代求仙，皆成真人矣。仙翁初入道之時，居長白山，或居東嶽。自後遍歷名山，慇懃求道。成道之後，隱跡潛形，唯留經教於世，勸悟後學之徒。凡言誦經萬遍者，萬遍即萬行圓備也。又《靈寶經》云，萬範開張者，乃明諸天梵炁彌羅，無不周遍也。範者，法也。萬法皆同，內外俱

應。分即為萬象之形，聚為萬神之體，此乃為圓滿之義也。又云，萬遍道備，飛昇太空，萬神之備。萬遍既周，乃成清靜之道，非祇為誦持經文，何必苦於形而勞其神者也。

此經是天人所習，不傳下士。

天人者，極陽之仙也。天仙者，碧落飛騰，遊行自在，兩腋有毛羽，亦名羽客也。凡是天仙羽客，住於三清之上，常行於經法，亦非輕傳下士。世人若修天人之行，即謂天上人也。凡欲修學之士，何不誦習此經，日有進修之業，若無退慢之心，是謂有進無退之士也。亦不令輕傳下士。又聖人云，經法流行於世，學人若遇，須當寶而貴之，不可輕泄。如逢賢士，有心即授，有善即傳。此蓋流通救度，要其悟解者也。可傳可授，弘在人矣。

吾昔受之於東華帝君。

吾者，仙翁自稱也。東華者，按《上清經》云：東方有飄雲世界碧霞之國，翠羽城中蒼龍宮，其中宮闕，並

是龍鳳寶珠合就，上有五色蒼雲覆蓋其上，故號蒼龍宮也。乃是東華小童君所居之處。此明仙翁自云吾逢彼帝君，即傳受此經，且非輕傳於下士也。

東華帝君受之於金闕帝君，

金闕者，西方有琅玕世界瓊瑤之國，瑤璃宮內，其中宮闕，並是琅玕寶珍瑤璃合就，故號曰瑤璃宮也。有一帝君於宮內亦寶祕此經。又云金闕帝君者也。應其名號，或太上分形化體，名號有殊。《上清經》云：後聖金闕玄元黃帝老君，太上是也。又《尹氏玄中記》曰：太上老君常居紫微宮，或號天皇大帝，或曰太一救苦天尊，或號金闕聖君。故知太上隨方設化，應號無窮。即知先聖金闕西方瓊瑤國主帝君是也。上聖帝君盡皆寶祕此經，何況後學傳受，修持諷誦，豈不欽崇，重而行之者乎？

金闕帝君受之於西王母。

王母者，諸天神王帝主之母，居於崑崙。按《天地論》曰：王母居崑崙西

側黃河出水之處。王母者，是天地之母。又云，天公、地母主統衆真，總攝三界，天上天下，是王母為至尊之母也。昔於金闕帝君受得此經，其帝君受此經於西王母之時，亦非輕傳於下士也。

西王母皆口口相傳，不記文字。吾今於世書而錄之。

口口相傳者，古聖人傳受經法，皆以內藏心腹祕受經文，流通行化，教導人天，並不記文字，即不以今世所見也。自仙翁後來，故書此經，傳於下世，普遍流行，即要拔度後學之徒者也。前明先聖傳受，次明後學尊卑，若能悟解真道，則隨功而獲果矣。上士悟之，昇為天官。

上士者，外鍊形質，內養精神，外和其光而同其塵，內修功而保其元也。元者，元炁也。元炁是神之母。人能常存於元炁，下保於丹田，上固於泥丸，中守於絳宮，如此愛重，保於三元，是謂內養於神。神者，炁之子；形者，神之舍。神是身之主，身

無主則不安；形無神而不立。上達之士常服日精，保於下丹田，飲於月華，保於腦戶。腦戶者，泥丸上丹田也，屬陽，故使太陰精炁保之。下丹田腎宮氣海屬陰，故使太陽精炁保之。又《易》曰：一陰一陽之謂道也。且能待日月二景扶身形而行之，必昇為天官也。是五雲五炁者，是五行之正炁也。凡上道之人，五臟既真，五臟炁自生，五行真炁化成五雲，扶其形質，上游三界。三界者，欲界、色界、無色界也。下游十方。十方者，四維上下是也。三界十方俱無滯礙，然後昇入上清，得位為天官之號也。

中士悟之，南宮列仙。

金者，肺也。玉者，骨也。凡學道之士先須鍊骨，謂之寶玉；鍊肺保津，謂之炁金。石者，腎也；丹者，心也。安心息炁，保於腎臟，乃得延年，非為世間金石寶玉也。此之金石能保其命。又圖南子云：外寶如何內寶存。此之謂也。若能內保於

性命，然上參於上清聖文。聖文者，皆上清祕寶之書。下達玄微者，下元腎也。又《上清經》云：南方有丹靈天，內有藥珠宮，內有一真君號曰靈天君。又云，朱陽宮或云朱陵宮，其天中內有炎炎火鍊池，池有七寶宮殿，亦號曰紫陽宮。若有下達之士學道成功者，乃同司命真君錄其姓名，奏上南宮，得為仙官之號也。下士得之，在世長年，

下士者，未能絕利一源，皆求資身益命之道；或服靈藥，或餌丹砂，或休名棄位，或淡靜安神，或依倚林泉，或藏跡於朝市，內修至道，外合五常。或隱或見，體道合真。如斯不退，尚保延年，何況高士英賢隱於巖谷，學神仙餐藥，而得白日昇天。何故後人不能專至？即今西嶽華山山居隱士丁、陳二人在世延年，注名以入仙位，況後人不能相效。故舉此數喻，乃明至道無偏，求者必達。故本經云：天道無親，常與善人也。又參同歸一。

游行三界，昇入金門。

《靈寶經》云：三十二天三十二帝，第六名上明七曜摩夷天帝，名恬愴延，此是欲界也。雖有此說，凡學道但去其欲，即名真人。又色界在二十四重天，無極曇誓天為色界，其帝君號名飄弩穹隆。又太素秀樂禁上天為無色界帝君，名龍羅覺長。此名三界，乃指天地而言，此為外，約大綱之說也。若喻人身而言之，三界即三丹田也。下丹田為欲界，中丹田為色界，上丹田為無色界。人若保守於三丹田，則精氣神存上中下三丹田之境，真人游於三界也。若得三丹田神俱足，則自然昇天矣。故經云，形神俱妙，與道合真，此之謂也。《上清經》云：大羅天在三十二天之上。又《靈寶經》云：三界之上，渺渺大羅。大羅之境唯有三清宮闕，莫不上聖高尊游於其上。又云，有五億五萬五千五百五十重天。此不具載。又唐賢樂朋龜云：原夫八十一天，比太上之半壽。此者大

約而言也。學道人若先修內行，保固守於三元神，三元神俱備，自得昇天，游於三清之境，出入金闕之前，朝拜太上，得為真人。故曰昇入金門也。前仙翁書錄乃標至學尊卑。此明真人所說，導引羣生，普令誦持真經，得善神擁護其身，漸入仙真之階。

左玄真人曰：

左者，陽也。玄者，一也。道君號得一，真人乃立其左右，陰陽一是也。故言左玄真人。左玄真人者號法解。為此真人大慈，仁者多請問因緣，下游五濁，救拔一切；復歸三境，侍從尊慈，太上保之，稱其名號。學仙之士但能存一，守於陰陽二炁，則為真人。何為守一？一者，道之本性。一為大也。又云身也。故引《西昇經》云：愛人不如愛身，愛身不如愛神，愛神不如舍神，舍神不如守身，守身長久，長存也。學人未悟玄微，但且護形愛炁，輕物賤名，思慮不惑，則血氣和平，如此即其一可

存也。陰陽二炁即坎離之用也。故謂為真人之身。然後朝於太上，皆得為道之臣也。上則參於三境，下則游於十方，開導衆生，教化未悟，引接群生，普令得其道，此即為真人之所作也。

學道之士，持誦此經，

持誦者，依本日讀，離本日誦。學道之士，若能心正，道念不退，依法奉修，如對太上，行住坐立，常持專一，是謂誦持者也。

即得十天善神擁護其人。

此明學士心常念道，持誦真經，即得善神擁護。十天者，八方上下是也。《因緣經》云：每月十直齋，各有善神直日，亦為善神也。且人有三業、六根身形之業，故有十惡。十惡者，淫、殺、盜、嫉、妬、恚、惡口、兩舌、妄言、綺語，此為十惡。十善者，身不妄行，心不妄動，意不妄思，性不妄亂，耳不妄聽邪聲，口不妄言綺語，目不妄視邪色，鼻不妄受邪穢，舌不妄貪邪味，識不妄受於驚怖，即名十

善。十善既生，十惡自滅，乃得真聖相護。十行既周，自然清靜。既生清靜，則無煩惱。煩惱既無，乃成真道。

然後玉符寶神，金液鍊形，形神俱妙，與道合真。

玉符者，玉皇之符也。令人學道功圓行滿，昇入仙階者。先得玉皇符命，然後昇仙也。玉符於身而論之，可明中元之事。中元者，心也。學人之心若能安靜，自然無染於塵垢，清靜而保固形神。若上等之人悟鍊金液之道，以固形質。中士未悟，身外求藥，合和修鍊，以佇性命。若論出入之道，亦先固形體，然後養於神識而形體固，形瘦力倦，神者為彼之主，主安則外固。假如世之屋宅無人，則不能全矣。內外之事如此也。故引《西昇經》之言：我身乃神之車，神之舍，神之主，主人安靜，神既居之；躁動，神即去之。又云：神生形，形成神。形不得神，不能自生；神不得形，不能自成。形神合

同，更相生，更相成。此事表裏相應之道。又云，神常愛人，人不愛神。神常愛人者，願其人生。人不愛神者，為心所擾也。心亦神也，其神名曰靈童，能惡能善，能昧能明，能喜能怒，能正能邪。使意馬如風驅，心猿如箭疾，巧生千種，機出萬端，皆在此神。又《內觀經》云：心者神也，非青非白，非赤非黃，非大非小，非短非長，非曲非直，非柔非剛，非厚非薄，非圓非方，變化莫測，混合陰陽。大包天地，細入毫芒。制之則止，放之則狂。清靜則生，濁躁則亡。人能清靜，內修至道，制伏其心，心既安靜，其神則生，神生則形固，形固成神。神藉形而成，形藉神而生，形神相藉，安靜修功，形固神全。故云形神俱妙，內外相應，自然與道合真也。前明誦持威力，修鍊成真。此明真經道德貴重，世人悟解玄微，即得身超三界也。

正一真人曰：正者，真也；一者，大也，亦為心也。

心者，南方太陽之象，元處北方。因何太陽處於北方？為坎離中有一畫，故為一陽，是謂心也。一是陰中陽位，二是陽中陰位。此是五行返復之理，陰陽變化之用，是謂正一也。正一真人者，漢天師也，姓張諱道陵也。今為三天大法師，位任正一真人。又為三清度師。其真人今居聖真之位，亦曾鍊五行，修功為國，扶衰救苦，除害興物，利濟庶民，功圓行滿，超凡成聖，位居高上正一真人。人若能修鍊其心，自然關府通泰，神和氣暢，皆由正一之事。今有天師所行正一斬邪三五飛步之道、銅符鐵券、金丹寶經、祕訣靈章、二十四階品籙，此不一一載也。

人家有此經，悟解之者，灾障不干，眾聖護門，

家者，身也。經者，心也。外學喻則家宅也。真人曰：家有此經，若能悟解玄微，清靜身心，修行念道，持誦不退，即得眾聖神人護衛其門。既得神人護門，則灾障不干於家庭，

邪魔無犯於住止。皆因主人清靜，故得神明護門。內舉此喻，則家猶身也。心則經也。人能清靜，行其至道於心，則謂之有此經也。悟者，覺也；達者，解也；通者，了也。覺了則謂心有經也。無經則未悟解，故有灾障，煩惱所生。若心了達，則無煩惱。煩惱既無，自然清靜，灾障不生，故不干也。眾聖護門者，人身中有三萬六千神，左三魂，右七魄。身有一萬二千形影，體有二萬四千精光，五臟六腑二十四神，耳、眼、口、鼻皆有也。一一各有官闕所居。人若清靜，眾神歸身，各居官闕，故云眾聖護門。又三萬六千神各居瓊宮，即知烟蘿先生語不虛也。

神昇上界，朝拜高尊。

神者，心也。道典云：聰明正直謂之神，陰陽不測謂之聖。故云心靈則道降，道降則神靈，神靈則聖也。神明既聖，即可昇也。昇者，登也，昇登於上界。上界者，則三界之上三清之境大羅天也。人能保精、養

炁、愛神，調和於元炁，填補於腦，烹鍊神水，變化精神，神炁若全，即得上昇三界，朝禮太上高尊。凡學仙之士，所說朝元，即有二種：一論天地，二論人身。即明三丹田、且三界朝元者，即上中下是三元也。上元者，上應玉清，始炁所化，號天寶君，理玉清聖境清微天，總一十二部聖行之經，為洞真教主，下於人身中為上丹田腦宮，亦號泥丸宮帝君，以主於炁；中元者，上應上清，元炁所化，號靈寶君，理上清境禹餘天，總一十二部真行之經，為洞玄教主，下於人身中為中丹田心府絳宮帝君，主於神；下元者，上應太清，玄炁所化，號神寶君，理太清仙境大赤天，總一十二部仙行之經，為洞神教主，下於人身中為下丹田炁海腎宮帝君，主於命。此三元三宮三寶者，天地得之以成，失之以傾，人身得之以生，失之以死。故《黃庭經》云：一身精神慎勿失。故要保愛也。又云：仙人道士非有神，積精累炁以

成真。凡學道之人，若能運用精華，存想神炁，朝拜三元，修功不退，久而行之，自得真道。故聖人云：心為使炁神，若知行炁主，便是得仙人。此明存想之道，皆以心而使之也。

功滿德就，相感帝君。誦持不退，身騰紫雲。

此明修道得果也。功滿八百，行滿三千。功行者，乃是修鍊之功行也。學人若能行胎息之道者，日行八百，即可以昇天，功行感應，自然昇舉也。古德云：功圓行滿，昇為金闕之臣，獨步玉京之上道也。學人若能專守三宮，朝拜真元，百節關府自然通泰，萬神和暢。相感帝君者，既存守三元，三元各有帝君也。誦持不退，則心念正道。謂誦持也。身騰紫雲者，內觀之道乃有正說。人有五臟屬於五行，人若修鍊五行，真炁傳於五臟，故為實腹。五臟真炁既成，自然尸解，出有入無，變化自在，存亡恍惚，此為得道之中也。紫

雲者，五行真炁結成紫雲，乃是上天之誥命之炁。故凡得道之人皆乘紫雲而去，上昇三境，朝拜太上高尊，以表得道人證於尊貴之貌也。

太上老君說常清靜經註

① 此句與下文義不符，侯善淵、劉通微本為「靜者動之基」。

（丁培仁點校）

003 太上老君說常清靜經註

無名氏註

經名：太上老君說常清靜經註。
原題無名氏註，約出於宋代。一卷。底本出處：《正統道藏》洞神部玉訣類。參校本：杜光庭等註本。

老君曰：大道無形，生育天地；大道無情，運行日月；大道無名，長養萬物。

老君論其大道三無之德：一者，大道一無形質，而生育天地；二者，大道二無情性，而運行日月；三者，大道三無名相，而長養萬物。如何是一無形質而能生育天地？言大道清而至靈，靜而至虛，靈虛杳邈，自然之炁，故無形質。雖無形質，而能生

育天地。此大道之德也。二無情性而能運行日月，言大道又無情性，自然之炁而運行日月，能照於萬象，此大道之二德也。三無名相而能長養萬物，言大道既無形質，亦無情性，而能生育天地，運行日月，又無名相之呼稱，一炁潛通而化生萬物。言此大道稟而行之。天地者，上至頂門泥丸宮，下至足底湧泉穴；日月者，上至左目、右目，下至腎；萬物者，身中萬神也。夫人之受身，皆從道之一炁所生，承天順地，合化陰陽，父母生育，結成形體。是故一月為胞天，二月為胎地，三月為三魂，四月為七魄，五月生五臟，六月化六腑，七月明七竅，八月八景降，九月神降一萬八千，內外相合三萬六千精光。神降形具，十月滿足而受生。故知大道無其形質，元炁而能變有形之炁。有形之炁者，元氣也，乃八百一十丈。保而愛之，愛則身不敗失，如大道無其形質而運其真精。養其腎精不敗，而目自明。又知大

道無其名字，而得真精之炁為其形。形為受炁之本，炁是有形之根。有其氣而有其精，有其精而有其神。故知氣者神之母，神者炁之子，子母不離，謂之得道。故曰大道無形，生育天地；大道無情，運行日月；大道無名，長養萬物。人能愛形則養炁保神，則達真常清靜之道。文中子曰：靜以思道，清以修身。如此者，能清靜矣。

吾不知其名，強名曰道。

吾者，太上自稱也，亦是我也。太上言此大道，雖有三無之德，一無形質而能自然生育天地，二無情性而能自然運行日月，三無名相，自然長養萬物，而我不知其的實之名，謂上無復祖，唯道乃獨尊，故且強呼為道。故曰吾不知其名，強名曰道。言物在杳杳漠漠之際而不知名，降而顯之則有焉。名者道之用也。聖人用無名之樸治天下。文中子曰：用無跡之物而自化。《易》曰：神而化之，使民宜之。昔唐太宗治天下，臣

服萬方，以無名之化，不用威刑，而斷死囚三百，天下無有犯於司獄；斗粟三文，道行千里，人不齎糧。此之道盛矣，而用其無名也。故太上云：吾不知其名，強名曰道。人之修行，初無其名，修之而有，其真人名也。

夫道者，有清有濁，有動有靜。

道者，顯其大道也。老君言，吾不知大道之名，且權稱之道。雖無形質，雖無情性，雖無名相，而能潛通一炁。一炁之中，有清而有濁，有動而有靜。修真之士，要體其道。體要清而返濁，神要靜而返動。清濁動靜得所，可謂道矣。故曰有清有濁，有動有靜。文中子曰：時清則清，時濁則濁，時行則行。此之謂和光同塵，守清淨之道也。昔唐慶元中，有獵者孫壽，居於海濱，以畋獵為生。有日，於大澤之中，忽野火所燒草木，連天煙焰，草木焚盡。唯有一叢草木茂盛，獨不焚燼。孫壽疑而往之，乃見草木之中有道庵一所。

孫壽推而入之，其裏面有一老叟，年可七旬，惟於案上展經一卷讀之。孫壽拜之而詢曰：先生讀者何也？老叟驚曰：何人至此？孫壽告曰：某乃一獵士，適來見炬火燒野皆盡，惟先生獨燎不延。先生曰：吾居此庵四百餘年，未常見水火之變也。壽曰：先生早來誦者何經？先生曰：是《太上老君說常清淨真經》。壽曰：何者名為《清淨經》？居，吾語汝。夫清靜者，道也、德也。故吾之宅清淨者，吾之素也。清淨而柔和者，吾之守也。清淨應化而無窮者，吾之變也。清淨而澹泊者，吾之德也。吾能守此清淨，而變化無窮，又何懼火災？時清則清，則濁則濁，時動則動，時靜則靜。吾能行此道，何懼火焉？孫壽聞道，乃棄弧矢而禮，授其經，悟其道，亦名於世。蓋大道者，有清則有濁，有動則有靜。天清地濁，天動地靜；

而下降，為地。故天為陽，陽好動；地為陰，陰好靜。動者，天之炁也；靜者，地之炁也。故曰天清地濁，天動地靜。文中子曰：天清而安，地濁而結。結者，可與立也。天動而變，地靜而寧。寧者，可與權也。此乃天清地濁，天動地靜。此經念者還有驗乎？答曰：昔唐時有白仁哲，為朱陽縣尉，因差運米於遼東，忽逢大風起，四望昏黑而盡，波濤湧沸。仁哲乃惶怖不已。而忽於空中有人言曰：公念得《太上老君清淨真經》，何不速誦？仁哲急念三十餘遍，只見金光從口而出，不久，風息浪靜，同舟濟者三百餘人，皆見金光從口中出。仁哲歸家，捨其一任俸作黃籙大醮，設無遮大會，鏤板印施真經三千部。仁哲壽年一百一十九歲，坐亡。是故《清淨真經》之驗也。

男清女濁，男動女靜。

男者，陽也；女者，陰也。男陽清而主動，女陰濁而主靜。此二品大底言陰陽，清而復濁，動而復靜，故云

男清女濁。此者乃太上再分大道，以混元一炁而包裹天地，蹙蹙陰陽，天主輕清則陽生，陽生則主動；地主重濁而陰生，陰生則主靜。如此陰陽，因動靜而交感，交感則元精降，元精降則萬物生。《易》曰：天地氤氳，萬物化淳。此之謂男清女濁，男動女靜。修真之士，若能運腎中真水為嬰兒，心中真火為姤女，使其真火下降，真水上昇，此萬神長守而不散。萬神不散，長生久視，此之謂男清女濁、男動女靜。文中子曰：天陽地陰，謂之陰陽，交而生萬物，動靜相合，此之謂男清女濁，男動女靜。若看此經，而有驗乎？昔唐高宗時麟德中有竇德玄為官，奉勅使揚州，渡淮。船已離岸數十步，見岸上有一人形容憔悴。其德玄謂篙師曰：此人孤寒，與渡過。篙師撐船，却至岸，令此人上船。渡之至中，見其人飢色，德玄令左右取其糧食與此人餐而飽矣。乃濟其岸，德玄上馬而去，其人緊逐之行數里餘。

德玄怪而問曰：汝乃何往？答曰：予非人也，某乃鄴都之鬼使。今往揚州，追竇德玄。德玄聞說大驚。而下馬拜曰：某乃德玄。遂涕泣請計，何能解之。其鬼使曰：君能誦某經否？德玄曰：平生長誦《太上老君說常清靜真經》。鬼使曰：我怪有道氣，慈心惟甚，有愍恤之德。謝公船中賜食之恩，且放公一月，其限罪我，即耽之一月之內，可誦經萬卷，必有聖降。道罷，忽然不見。德玄忘食忘寢，專心而誦之。前後誦經三十日，其數已足，便回至家庭焚香再誦其經。彼使者復見於前，使者曰：公乃經數已足，其壽蓋終。前者感君之飯恩，陰府怪責我違限之愆，背上決我三十。遂袒下衣。德玄看之，背上果有青赤之痕。德玄於是就枕乃卧，而絕其氣，惟其魂魄，遂使德玄回顧，其屍卧於榻上，魂乃隨使者出於北門。可行十餘里，見一大城。到城中，但見荆棘而已。又見一府衙公署甚嚴，門上牌

曰：此乃鄴都北府。其鬼使曰：我當先去，且等於門。候不多時，其使乃出。使曰：大帝因公降勅且喜言，次有紫袍官執笏言謝。竇德玄到，乃迎德玄至衙，見有寶殿，有王者執寒玉珪，使者甚肅，香案上有紫泥詔一道。王乃接之。德玄便拜。勅上金光奕奕，而起拜畢。公為上士，年至數十。常誦《太上老君清靜經》，今為天官。鄴都之獄，罪者各降一等，此陽間顯報之事，可延一紀之壽。令使者送歸。德玄拜王，王乃謝拜，令使送德玄至一寶殿。忽然而醒，德玄乃甦。開目起來，見家眷圍榻泣之。家眷曰：你今死三日。德玄云：有此聖事。遂捨其家，緣入景靈觀出家作道士，唯修清淨之教。後十二年，有紫雲從空而來。見碧衣童子引仙鶴一雙，降於庭前，而謂德玄曰：請上鶴背，跨而去。遂德玄躍鶴背上，冉冉而昇天。其異香一月不散。乃留詩一首云：人事紛紛百萬端，蠅名蝸利不堪看。

爭如悟此清中靜，功滿昇為天上官。論曰：動靜相磨，陰陽相感，而萬物相生。悟此道者昇為天官。竇德玄知之矣。

降本流末，而生萬物。

本者元炁。道生一，一者，元氣為本也。末者，萬物也。道生一，一生二，二生三，三生萬物。大道之本。此句太上再序清濁、動靜之理，言道生元炁，元炁降而本流，本流則萬物生，故為末。此為降本流末，而生萬物也。文中子曰：統元炁者天也，總元炁者地也。無形生養元炁，元炁無形，生養萬物。故曰降本流末而生萬物。元炁既降，流行為末。《易》曰，元炁降者，在天成象，在地成形，變化顯見矣。在天成象，為懸象，日月星辰也。在地成形，謂山川草木也。故曰降本流末而生萬物。莊子曰：至陽天也，至陰地也。而肅肅之炁，至於心火，乃水火既濟，而養萬神。故曰降本流末而生萬物。或曰：看此真經，還有驗乎？

答曰：看此真經，須要救物度生。昔有唐時防州宋知玄，為青州司士參軍。參軍到彼，人言參軍之宅大凶，有鬼怪妖異，住者十死六七。知玄自來好道，而心正直，兼少年好誦《太上老君清靜真經》，深達其義，又能體而行之。遂不信：吾安居，何信此事乎。堅住其宅，乃修《呂真人詩》一首：金丹一粒定長生，須得真鉛鍊甲庚。火取南方赤鳳髓，水求北海黑龜精。鼎追四季中央土，藥遣三元八卦行。齋戒與功成九轉，少持清靜鬼神驚。知玄乃危坐，行其火輪罩體，紅光滿室，默念《清淨》之經。至二更已來，忽見一婦人披髮，而血污滿面，立于前。知玄曰：爾乃何人也？婦人曰：我是啣冤之鬼也。其人拜而哭曰：與妾為力。今日遇有道之士，而得訴事。妾本十年前，乃劉司士之妻也。夫奉命為使外國而不歸，其弟乃逼妾私通。推而不從，因此被殺。以氈裹其屍于堂西北角，溷廁之中，不勝穢積。

人來多欲陳告，人人怯懼，無其道氣，見妾之形，心懼而死者多矣。公持此經，功德至大，仁慈。願為憫之。知玄曰：吾初官，新上任三日，當救汝。汝且滅。婦人遂滅。後三日滿，使人於溷廁掘之其尺，不及。知玄是夜依前危坐，焚香誦此經。未及二鼓，其婦人復現。知玄曰：我令人求汝之屍，未獲，何也？婦人曰：求之者，向北不及二尺，即妾屍也。明旦求之，以終其惠也。婦人乃滅。明旦使人于北求之，果獲舊氈一片，而裹白骨一副。知玄再為誦《清淨經》，以衣一襲，而選一吉地葬之。是夜，其婦潔衣淨面，而再拜燈下。知玄曰：汝身既為人殺之，何以不報？答曰：前人在江州為司錄之官，其人自小能誦《太上老君說常清靜經》，數年冥司陳告，終取不得。知玄曰：我與告彼官，使彼官修齋作醮，書篆黃籙白簡，汝可生天。肯解此冤乎？婦人再拜曰：深相感也。道罷，其婦人遂滅。知玄

來入假狀于官，因得其假。遂乃裹糧，便馬逕至江州，乃見劉司錄。既見，乃以其事告曰：汝為司錄，孰為此事？聞君唯持《太上老君清靜經》，是有道心也，而行此事。豈不明有官法處之，暗有鬼神沫之。若不改過，冤業如何？劉司錄聞之，大驚曰：謝公遠來，蒙為紛解，安敢違命。乃整其家財，作黃籙大醮七日七夜，請道一百餘人，及印《清靜經》一萬本散施。是日午時，有一婦人，年可三十，牽一寶馬，駝經萬卷，乃曰：吾乘此經醮力，奉太上老君勅，使我入朱陵宮煉其真神，當為南宮列仙。吾在世長年，宋參軍亦為列仙。道罷，冉冉昇空而去。知玄與劉司錄號為道友，求奉真教。知玄却回防州，至家，有青鸞下于庭。知玄乃焚香，遂青鸞冉冉而亦南去。留下一詩云：來生清淨悟真經，拔罪扶危出罪刑。今日乘斯功德力，朱陵宮裏煉神形。

功；識降本流末之義，知萬物化生之因；扶危拔困，救厄解冤。有此清淨，行此慈悲，豈不為南宮列仙也。南宮列仙之位，宋知玄得之。此者能悟降本流末而生萬物也。清者濁之源，動者靜之基^①。清者，一炁也；濁者，萬物也。動者，神也；靜者，形也。太上言道以一氣為萬物之祖，祖為源也。人神以一形為舍，故舍為基本也。形不得神不能動，神不得形不能存。神為主人，形為舍基。此二句大底言道炁為萬物之本，分其清靜。清者元氣，濁者萬物之形也。人能以神動保固其形，故為萬物之基源。故云清者濁之源，動者靜之基。白雲翁曰：不濁無以見其清，不清無以見其濁。無一炁而不能生萬物，無萬物不能分一氣。故曰清者濁之源，動者靜之基。文中子曰：至清則見濁，此清者濁之源；至動則思靜，此動者靜之基也。修真之士，以一氣養神，故清；以五味養腹，故

濁。則神要動而順，形以靜而安形，此乃清濁動靜之道也。此經還有驗也。答曰：昔唐人袁通，天水人。自幼年好道，專誦《太上老君清靜經》，日誦七七遍。年至二十，被祿山驅為軍戰，忽失陣而敗。袁通乃走，不知來路，遂於山叢之間不得食，其困不能興，唯誦此《清淨經》，無力可誦以待死。忽有一碧衣童子，持一盂飯來與食之。袁通食之，其香味不可名狀。食其滿足矣，其童子曰：真人以清氣養其清腹，凡人以外物養其濁腹；真人以氣運神而安其靜，凡人以亂神敗精而樂其形。汝自幼好道而能堅，至念《太上老君清靜之經》，已有道果，太上而使贈也，從茲以充餐，用神為道，更不食矣。乃今黑簿落名，朱陵排號，清淨之道更不虛矣。道罷，忽然不見。袁通從此不食，乃得六通之慧。至於宋哲宗之朝猶在。唐玄宗時事，五百年間，面若三十歲許。常遊洛汭之間，唯只念《清淨》之經，人不

見其飲食。人呼之清淨先生。若人有患，不唯遠近之疾，以手摩娑，人皆無有不愈者。後又被人呼摸著效。後至汴京門外，高聲曰：你待亂，我不亂；你待濁，我不濁。你東西，安能活？從得道，五百年，斬却邪魔神快樂。乘雲駕鶴背，朝玉帝天宮，永住逍遙閣。道畢，自有仙鶴從天而飛下。先生急上鶴背，冉冉乘雲而去。人皆俯仰而瞻之。從空墜下紙一張，其上寫曰：清淨道生。道生數十律。論曰：大道者，視之不見，聽之不聞，而天下莫能知，莫能行。雖不知不見，修之者實有道焉。太上曰：吾言甚易知，甚易行。故道降而為元氣，清而為濁之源；動而為靜之基。一清一濁，而通大道。故袁通能至誠，悟《太上清靜經》，終為上昇而列仙。宜乎哉。

人能常清靜，天地悉皆歸。

天地者，乃大道之子孫也；人物者，大道之苗裔也。太上言人能稟大道之祖氣，使身心之虛靈，神氣之清

靜，如此能體其大道也，與天地合德。故天地自然而從順，悉皆歸依也。故曰人能常清靜，天地悉皆歸。行清靜之教者。《易》云：與天地相似，故不違言。修真之士亦要清靜無為，體大道真常之教，窮萬物之性，能知鬼神。是以天地相似，所為所作，故不違於天地，悉皆歸順矣。故曰人能常清靜，天地悉皆歸。文中子曰：能清靜者，與太極同德，與天地同鄰，與神道並行。能為此者，天地盡皆歸也。如此者，有驗乎？答曰：昔唐慶曆中有韓侍郎坐運州，有女年二十六歲，適左司員外郎王珪。珪乃上官，其妻韓氏有妊娠，在父母家。至日早離夜至三鼓已來，於西北角有其聲。左右侍婢皆睡，唯小娘子韓氏不睡，見一將軍披戎衣，執金鏃，乃曰：吾晉朝韋將軍，於此居數百年，爾敢於此處作產居，血腥之氣觸吾。若三日不移，殺汝。其記之。韓氏曰：願移之。遂滅。達旦，令侍婢報知韓侍郎。侍

郎曰：婦人真氣虛弱，乃胡見之。安有此乎？不肯移之，唯添侍婢相伴。又至三更已來，其將軍復現，侍婢皆見之，驚而走。其將軍乃叱之曰：吾道與汝，何不移之？來日不移，必殺汝矣。韓氏曰：告將軍息怒，來日必移。其將軍不見。達旦，侍婢乃以小娘子之言哀告韓君，韓君曰：產婦未滿七日，安敢移動？婦人血氣虛而胡見亂言。答曰：侍婢亦見。韓君曰：婦人之輩皆信邪。堅不從之。至夜，其韋將軍又現曰：吾三次語汝，汝終不肯移。韓氏及侍婢曰：故訴於侍郎，侍郎執性不肯移其宅。將軍見不移，怒從心起，以其鏃于韓氏心上，其一鏃，韓氏只叫一聲，遂殞。其父執一劍而徑至。其父哀慟不已，父母甚慈，泣之，以飛書報其夫。夫聞之，大慟，而不顧差使，而歸至寺莊鎮西十里，見一婦人遙遠而來，其近，乃認是妻也。王珪忽然下馬問妻曰：何由到此也？其從皆見。妻曰：妾

為晉朝韋將軍所殺也。今日此屈無由申訴。爾為大丈夫，不能避一妻子乎？遂哭。珪乃大慟，欲近前行。妻曰：人鬼異路，不可近妾。我聞此鎮有田先生，自小念《太上老君清靜經》，行此之清靜無為者也。此能剪馘鬼神，有通天之德。故曰人能常清靜，天地悉皆歸。斯其以報妾之冤。其先生在此鎮。珪謁先生，具以前事實告，先生然：吾為汝上禱玄穹，下達后土，救汝之妻。遂引王珪至於別室中。田先生一鼓已來，披朝服，執玉珪，把香一爐，合目跪之，點燈七盞，念呪啓禱。忽然室中有一天丁力士曰：奉天之勅，入于幽府。會其力士放下勅，忽然不見。先生曰：我今奉天帝之勅，與汝同往地府，令捉韋將軍。先生取淨席一領，使王珪卧於席上，迷而不省。先生於傍坐出神，引王珪神，二神相引出門。乃行數里，見一大城。天色昏暗，左右鐵衣兵吏皆執戈戟，見先生，盡皆倒戈唱喏。既入其門，

有朱衣吏急通報，又數十人皆見先生，亦然仰啓，只聞言：田真人至。俄頃有綠衣童子，皆執旌節，迎一人，衣龍袞服，戴遠游冠，執寒玉珪，導之曰：乃酆都大帝。見田真人，相揖動問畢，使真人前行，讓禮如凡世。鬼使問王珪曰：爾乃何人也？珪曰：我乃田真人從侍也。鬼使更不問。既上其殿，真人與帝對坐，先生展勅現帝視之，王珪等一齊賀勅。王珪階下立不多時，碧衣童子傳曰：遊奕將速於陰司，提取晉朝陰鬼韋將軍去。有一人黃金鎖子甲，手執大劍，應喏，俄頃間報曰：捉到陰鬼韋將軍。王曰：擒來。見數人申衣兵吏，傳一人頭至階前曰：汝數年陰鬼。汝在世之時，殺害生靈太多，更害平人。韋將軍曰：某數次禱他不肯移之，某一時之怒殺之。念某晉朝勳官。帝曰：陰鬼尚敢殺害生靈，何言汝有功勳？可決鐵杖三百，配北陰山千年而放。左右縛付地，背上決鐵杖三百，號叫之

聲，不能忍之。決畢，有一吏曰：奉勅押至陰山。王問韓氏遊處。左右曰：如何在此，押過來于東廊下，乃韓氏，軟拜於王，王問左右：如何？左右曰：其舍以壞，可令借身托生。判官乃檢簿，韓氏合壽六十六歲。更有四十年壽。即日青州王官人女壽娘，合年二十六歲命終，可令韓氏投屍於壽娘還魂，遂准奉行。王請先生離，王珪亦隨之未〔離〕，忽然而覺。先生曰：官人將談此是祕。王珪重重拜之〔問〕，先生曰：何直遊至此也？先生曰：我能持誦《太上老君清靜真經》，能依此行之，所以與天地合其德。人能常清靜，天地悉皆歸。爾到家，速於青州王官人家認取汝妻。王珪辭先生而去。在路速到運州，其妻韓氏已殯矣。逕往青州王官人家，認其妻子。王官人女壽娘死經三日，再活，却言：我是韓侍郎女，現今我父為運州知州。說其所以，未罷，王珪至入王官人宅，見壽娘，便言：王郎來也。其聲

音全不似壽娘往日聲音也。王珪曰：壽娘只是韓氏聲音也。具說其辭因，王官人乃入運州，見其父母，與向日女之音無異。二人猛悟大道，而盡其家財，雕造印經十萬餘卷，散施四方，作羅天大醮而謝天地。畢，其王珪與妻再往寺莊鎮拜謝田先生。到彼謝畢，先生曰：汝可與妻同修。王珪依言，休官不任。王珪掛冠裳，作道士，居長安福德觀；韓氏作女冠，居玉京觀，各壽一百二十歲而殞。論曰：寂然不動，感而遂通，清淨無為。田先生遵太上之經，行天之法，上感穹蒼，下通后土，使天降勅北帝評冤，可謂人能常清靜，天地悉皆歸。

夫人神好清而心擾之，人心好靜而欲牽之。

夫人之生也，本乃神清心靜，及其長也，為情欲所牽如此者，欲生也。故欲字從谷，從欠，谷者無漏之稱，欠者不足之號。神有所愛為之情，心有所欲為之貪。亢倉子曰：水性本

清而不得清，為土渾之；人性本靜而不得靜，為事汨之。汨者，亂也。太上言此二品，夫人神本好清靜而不得清靜者，為心不能體清靜之道，心有愛戀之情，故擾亂之，心不能得清靜矣。夫人神好清而心擾之。心元本好清靜，而所以不得清靜者，為心中有好欲之貪而牽引之。故曰人心好靜而欲牽之。文中子曰：靡者常樂無求，貪者常憂不足。靡者常樂無求則神好清，心好靜；貪者常憂則不足，心擾之，欲牽之。白雲翁曰：欲者，貪愛之源，奢淫之本。若人能稟此清淨之道，神必清，神清則心不能擾之，心靜則欲不能牽之。或曰：看此經者還得神磨而心不擾，還得心靜而欲不牽，有驗乎？答曰：昔唐懿宗皇帝有女號曰同昌公主，娶韋駙馬。公主欲其宮嫌不自在，帝乃賜一宅，奇過王宮，金樓玉閣，賜內庫錢五百萬貫。公主心中不足，重奏曰：無寶貨也。皇帝罄內庫之寶以實其宅，至于房櫳戶牖，

無不差珍異寶飾之。又以金銀為欄藥白、食櫃、水槽、金鐺、金盆瓮，以銀絲為笊籬箕筐，以水晶、瑠璃、玳瑁為床榻，以金龜銀鰲。又琢五色為合盤，百寶為圖案。公主尚起欲心，又奏無米麥。皇帝開內庫，將到金麥銀米五十斛賜與公主。又奏曰：堂內無坐室幃幕。於是帝又賜公主連珍帳幔，綴珍珠為邊。又賜與公主寒溫藥一把，冬懸即暖，夏懸即涼。又賜公主九鸞寶釵一隻，每戴之頭上，有九色霞光。公主每出，乘之七寶車駕，四面綴五色玉，香囊貯辟寒香、辟邪香、辟塵香，皆別國之貢也。其輦上以雜寶龍腦，金屑刻鏤，水晶碼碯等盤為龍鳳瑞，四面纓絡、珍珠裝綴於輦上，周圍之頂用碧玉蓮花，上綴金珍一顆，珠上霞光高三尺，四面用金絲掛玉流蘇，其中自然有天樂之音聲。每一出遊，香風滿路，馥郁芬芳，奇香半載不息，珠光燦爛，熒熒照耀。往往看之者唯見其目，不見其端。公主富貴甚

極，尚有不足之心，意想皆不及蓬萊之境，因此而病。公主居於大內，自小常念《太上老君說常清靜經》甚謹。公主召醫官至，乃米宗為治之。至晚，與香臘燭二寸，使米宗歸之。其香氣酷烈異常，而散於四鄰。或有人登門而問之，米宗以實言之，是其燭香也。燭長二寸，被五色文，卷之而爇，至於天明，不盡香氣，三二百步聞之。其煙上結成華蓋樓臺之狀，仙花朵朵而奇異也。公主疾甚重，令左右取《太上老君清靜經》，於碧玉匣中取寶香名為通天之香，焚之，念此真經。未及一七遍，有朱衣使二人曰：府君請。公主曰：我乃帝王之女，安能坐邀我？令左右執之，左右弗應。其使曰：乃陰府之事，何管帝女。二使以手拽之起，公主叫左右，左右無救，被二使駢擁而行。似出長安北門，行數里，公主害脚痛，不能行。一使曰：我取馬一疋。須臾牽馬，引白馬一疋。陰暗之中行百餘里，前到一大城中，亦有

人煙。公主曰：我乃飢也。吏曰：此中食皆焦糜爛心，不可聞見之。須臾，風吹復初如故。公主掩目不敢睹之。又見數十男女，脫衣露體以火燒鐵錐通紅烙其身，流血滿地，皆成血泥。公主問吏曰：此人何罪，受其苦痛？吏曰：此人於陽間乃奢侈之罪也。公主驚曰：我還如何？吏曰：亦復如是。須臾之間，有鬼吏，頭生兩角，手提鐵槌曰：公主脫衣。公主曰：我乃帝王之女也。鬼曰：此間不管帝王女，脫衣。公主知不得已，而乃脫其冠服，默念《太上老君說常清靜真經》一卷。其鬼吏曰：疾脫衣。公主念經，又脫一件。其鬼吏遂以手攬其衣。公主身如熱油沃心而痛，又急念之，至三毒消滅之處，忽然見金光一道，其鬼吏盡皆乘空而禮拜，見一真人乘紫雲而下，乃太極真人也。太清宮中聞念《混元老君常清靜經》。自念經一卷，已達三清之境，太上老君使吾下降幽獄，赦宥罪人。公主至心禮

拜真人。公主曰：是弟子念經來，是當今懿宗皇帝女也。真人曰：犯何罪而至此？其鬼吏曰：犯貪欲之罪。須臾，衆鬼吏曰：乃酆都大帝。皆禮太極真人也。其太極真人身放光明，照耀幽獄。真人謂其帝女曰：不可有欲，罪莫大於欲。欲者，淫亂之本也。罪莫大於貪。貪者，僭妬之源也。謂重也。小則滅身，大則亡家。世間不悟道者，不達清淨之理，不知恬淡之機，唯知醴餽以充其口，富貴以榮其身，而顧其甘口之食，是傷命之斧，富貴奢華，惹怨之機。既有其怨，豈不入地獄，而何不虛無清淨、慈惠忠信、孝敬和順、謹儉柔弱、清潔則與道同也。無顧奢華守寂淡。奢華者，地獄之因；謹儉者，天堂之本。真人謂公主曰：吾救汝，陽間能改奢華之欲否？公主再拜曰：能改。真人曰：吾有五戒十善、六齋三會、五臘五忌，汝能行之？公主曰：能行。真人曰：能持則為天官，不能持則為

下鬼。真人曰：五戒者，一不殺生，二不嗜慾，三不口是心非，四不盜物，五不淫亂。十善者，一孝養父母，二忠奉君師，三忘心萬物，四忍怒防非，五止爭解惡，六損己救窮，七生養濟人，八道邊義井植樹，九為人興利除害，十讚三寶經，為人解說，常生善念。凡人常行此五戒十善，別有天人善神衛護，永免災殃，長臻福祐，唯在堅誠。而公主曰：何名六齋？每月初一日、初八日、十四日、十五日、二十九日。公主曰：何名十齋？每月初一日、初八日、十四日、十五日、十八日、二十三日、二十四日、二十八日、二十九日、三十日，此十日乃十方救苦天尊救度地獄三塗五苦應諸等衆罪魂。公主曰：何名三會？真人曰：正月七日遷舉上會，七月七日慶生中會，十月五日建生下會。公主曰：何名五臘？真人曰：正月一日天臘，五月五日地臘，七月七日道德臘，十月五日民歲臘，十二月王侯臘。公主

曰：何名五忌？真人曰：一忌甲子太一真君錄人罪犯，二忌庚申三尸言人罪犯，三忌本命星官計人功行，四忌八節八神計人善惡，五忌三元天地水三官錄人罪福。太極真人曰：遇逢此日，可設醮修齋，持經供養，以祈求景祐。公主再拜禮真人曰：一一遵依道旨。真人乃放光明，照其幽獄皆得生天矣。勅使碧衣童子，引公主速歸。真人乃昇天而去化。北陰酆都大帝、一切鬼神皆大歡喜。其碧衣童子引公主至一金門已，推而入，其公主忽然驚覺。公主身在碧牙床上，蓋其錦被。公主開目視之，見駙馬、官人在側，乃圍而泣之。公主擁被而坐。官人曰：公主睡多時，不敢驚動。公主曰：富貴乃若石中燧火，榮華如水上浮漚，時光有若南柯一夢。其病頓愈。公主乃入宮內奏帝，所有珍寶盡數還納於內庫，乞身歸道。帝曰：何也？公主具說陰府之事，一奏帝。帝乃歡喜，依公主所奏，以

崇仙坊金仙觀改為玉真觀。公主自入觀之後，而不出觀門，雖有貴戚、駙馬親等，公主令人監門，並不能得見公主，每日唯念《太上老君說常清靜真經》，不曾惰慢。至三年後，復見真人於紅光之中，乃謂公主曰：上昇至近，證為天仙，火急修為功果。道罷，不見。公主乃建黃籙大醮。至上元十五夜，鸞鶴自天而降，月華如晝，香風馥郁。其鶴至於庭前，公主乘鸞背，冉冉登空而去。遺留下《唐多令詞》一闕云：性命兩如何，奢華勿太過。守貞廉謹儉安和，以己方人無橫禍。歎緣分，少貪多，也囉。擊破是非窩，敲開名利鎖。澄心取性且蹉跎，暗想高低哀與樂。猛省悟，若南柯，也囉。人皆具說。人皆寫其詞，京師乃為供養。此者同昌公主悟此《清靜真經》乃為驗乎。故曰，夫人神好清而心擾之，人心好淨而欲牽之。論曰：能守清淨者，貪欲不能移，險阻不能危；不以祿位惑其志，不以

貧賤改其心，不以毀譽度其色，不以榮華亂其神。同昌入夢鄴都，感太極真人說戒，能受之，猛捨富貴而甘其寂淡，三戒行周備，可為仙人也。常能遣其欲而心自靜，澄其心而神自清。

欲者，流浪之相；澄者，定水之相。此二句是太上再言去愛捨欲之心。若能去愛，不生情慾，而不起貪心，則神自靜而心自清也。若能流浪之愛想而心息，又若更能澄心如水定之相，則皎潔不動；皎潔不動則神自然清靜。故云常能遣其欲，而心自靜，澄其心而神自清。文中子曰：捨其所爭不爭，乃遣其欲而心自靜。萬物所棄則無貪，無貪則心自澄矣。能澄心者，其神自清。如此者，亦修真之士不亦悟清靜之道也。白雲翁云：君子以清靜洗其心，小人以貪愛移其心。是以聖人常能遣其欲而心自靜，澄其心而神自清。劉子曰：神者，心之主，是故神靜而心和，心和而形全；神亂而

心蕩，心蕩則傷其形。先理其神。故以聖人以恬和養其神，和者，去嗜欲也。如此則以和養其神則安於內，清思棲心則不誘於外，神和心清，形無累矣。無累者，則因遣欲者也。故云遣其欲。問曰：自古人能遣其欲？答曰：有之。昔有南史時宋帝朝，有宰相元田夫有貪欲之心。國朝有事，不唯大小，須要財帛而後行其事。偶因街下二人，因醉而爭淫濫之事，而殺死一人。田夫語於殺人者：汝能出絹千疋，可令汝活。其人出絹八百疋。田夫曰：未能可免。被殺之家聞之某，願出絹一千疋，可使此人償命。殺人者怕死，出絹一千二百疋，被殺之家無絹可酬，乃斷判醉而有悞，可決六十而放之。百姓無處告論，民受其屈者多矣。徵斂無度，家中修樓閣庭臺，用其金碧千有餘間，制過王宅；美女盈庭，皆國色者；每一食，可費用錢百貫。朝歡暮樂，又好黃白之術，多取其利。忽有道人立於門前曰：能黃白

之術。田夫聞之，急令人召至宅。田夫見之，降階而揖之，問曰：有何術教予？先生曰：願求一醉。田夫曰：不見其術，先要我酒飲得，非欲乎。先生曰：想君回生作死，回死作生，率斂無度，屋宇千間，金玉滿庫，美女千人，淫欲至甚。又求黃白之術。汝孰欲過乎，而謂我欲也。田夫被先生責之，而怒曰：爾乃何處野人？焉放觸我。令左右執之。忽然不見。乃遺《點絳脣》詞一闋云：富貴榮華，高官一品功勳大。由自貪愛，待鐵打亭堂蓋。家計方成，隄備閻王怪。如何奈？怎生得解，難免諸人債。田夫見而悶悶不樂，歸小閣中。忽於睡夢，見一塊黃金，田夫喜而自取，身墮地下，冥冥而去。忽見甚明，田夫覩時，睹數百人戴其桎梏，或拚或昂，以大石壓身者。又見一牌上寫貪愛之獄。忽見一白衣人披髮而言曰：相公來何晚矣？等候相公多時。相公曰：爾乃何人也？其人曰：我乃被殺之人

也。相公受絹一千二百疋，不令償命。只要相公還我命。以誤殺數百餘人，叫相公將我金來，並珍寶等。田夫驚而走之，衆人拽住，為索其債。又數人抬一巨石，長三丈，厚五尺，但壓相公。然後左右拽倒相公，欲抬其石壓之。或有一人喝住：且休壓相公，其人壽數未盡，更有六年之壽。相公覷時，乃是獻黃白之術者。遂引田夫於獄中坐一大石。先生曰：吾太白星君也。相公官居一品，不積德行，唯有心貪意欲，是禍之本也。相公曰：今日深謝先生相救，粉骨難忘。先生曰：相公自來曾念甚經？答曰：曾念《太上老君清靜真經》。先生曰：怪然有道氣也。是經云力能過吾也。相公何不聞經內常能遣其欲而心自靜，澄其心而神自清？相公曰：居，吾語汝。夫耳目誘於聲色，鼻口之於香味，肌體之於安適，皆出於欲也。此欲若不遣之，則精神馳駭而不守，志氣糜散則耗五臟陷而不能安。嗜欲連綿

於心腑，蔓衍於荒淫之浪，留連於是非之境。如此者，而不以財德倡生，蓋以寡矣。是以聖人清目而不視，靜耳而不聽，閉口而不言，棄心而忘害，貴身而賤物。故尊勢而忘動，樂道而忘貪，故厚利而不能容身而處，適情而遊。一炁浩浩，蓋首於故養形而性自全，心不勞而道自至。先生曰：相公旦夕宜千萬省之。田夫辭先生。而有喚元相公，相公覷時，乃被殺人趕來，相公乃蹶倒及地。忽然驚覺，冷汗流體，心怖而已。是時田夫猛省曰：財者禍之源，貪者罪之本也。遂已解印休官，出寶庫之財賑濟貧窮，深閨之妓使嫁良人，施其宅舍盡作官觀，身脫羅衣而穿布素，口餐糲食，頓喫淡飯，每日唯念《太上老君清靜真經》。遵而行之十年之期，忽見本來夢見者先生。田夫見而禮之。先生曰：進道數年，甚有勞乎？今已釋冤債，但無可昇於仙路。真遣慾忘貪之人，乃澄心養神之侶。今已朱陵挂號，碧

落標名。還與神丹一粒，可吞之。先生曰：已不食矣。故《仙經內傳》云：飲食不止身不輕，聲色不止神不清，思慮不止心不寧，心不寧而神不靈，神不靈，功不成。其要道也，不在瞻星禮斗，苦己勞形，唯在方寸，湛然無所。神仙之道，永保長生。故道者，即修心者也。老君曰：道以心得，心以道明。心明則道降，道降者神明則在身也。如油火在卮，明從火起，火因油在；炷因油潤，油藉卮停。四者若廢，明何在焉？亦如明緣神照，神托心安，如形有心，道全一物，不足何依焉？所以為之神明。神明者，目見、耳聞，意知心覺，分明物理，玄微悉析。此為神明，切宜記之。朱陵官相候。忽然不見。田夫乃依龍虎相交，陰陽間隔，五行離合，水火既濟而修之，乃築環牆而修之，鍊更三年，通前一紀之數。至重陽日，田夫乘空而去之。後人推牆開門，看之而不見田夫，唯見《清靜經》一部，案上花牋一

幅詞，《寄唐多令》云：性命兩如何？根元牢閉鎖。守陽魂、陰魄盡消磨，運火周天烹大藥。向海底、看紅波。也囉。貴賤片時過，榮華一擲梭。待三千、功滿行成，合驂鸞鳳遊碧落。朝玉帝、應仙科。也囉。

論曰：杳杳冥冥，其中有精；恍恍惚惚，其中有物。自先生有元田夫，遣其欲而心自靜，澄其心而神自清，心靜神清而自至，此之謂道。至若無修之實有，今已身超碧落而拜玉帝，可謂得道矣。

自然六欲不生，三毒消滅。

六欲者，六賊也。何名六賊？六賊者、眼、耳、鼻、舌、身、意。三毒者，三尸。何名三尸？三尸者，上尸彭琚，管人之上丹田，使人好華飾之毒；中尸彭質，主人之中丹田，使人好貪欲、嗜滋味之毒；下尸彭矯，主人之下丹田，好淫欲疾妬之毒。上句言人稟道，常能遣流浪之相，而心自靜，澄其心，如水定之相，神自清也。太上言，若人能心靜神清，自然

六欲不生，三尸不為，三毒乃消滅。

故云六欲不生，三毒消滅。文中子曰：君子之學則進於道，進於道者，自然六欲不生，三毒消滅。小人之學則進於利，進於利者，則六欲乃生，三毒不滅。《易》曰：君子以恐懼修省。故六欲不生，三毒不起，則自消也。何人能六欲不生，更得三毒消滅？答曰：有之。昔唐貞觀年間，有一人名沈會，因有欲心，取受民財，事發配於竹蘭。日夕常念《太上老君清靜經》，罷面望泰山而禮拜，言曰：惟願得還鄉里。有東嶽泰山府君之子，乃炳靈公也，因遊西嶽赴會，回見沈會念《清靜經》，靈公乃於虛空之中言曰：其人不可得也。回東嶽語於府君，府君曰：善哉，令使取沈會於偏閣之中，坐時，天色正午。見朱衣吏曰：府君召汝足下。沈會曰：那府君？吏曰：乃東嶽府君。沈會大驚，急取章服，與吏同行，至於城外。其吏曰：即今脚下，至泰山三千餘里。沈會曰：

何能得到？其吏曰：此間借一疋

馬。沈會只於樹下等候，其吏入於廟中，須臾牽一疋青馬至，但小如驢。吏曰：乘馬可緊合目。沈會上馬，合目，急如猛風。吏曰：開目。乃見一城，遂入其城。近城只多荆棘。又至一府衙，左右皆鐵衣衛護。其吏乃牽住下馬，引沈會入于府衙。兵吏乃問曰：何人也？奉府君勅，故取之入於第三重門。吏曰：官人但於此候，容某先入報之。吏既入去，不多時，有一通引官出曰：府君召沈會官人來。沈會急隨而入之，乃至於一寶殿，四面皆珠簾絳幕，榜其殿曰朝曦之殿。其吏止沈會於殿下，左右皆金甲鬼兵侍衛。有二碧衣童子乃軸其簾，見一人正坐，戴遠遊冠，衣青色盤龍袞服，手執寒玉珪。傍立一人，是金蛾帽子，茜紅，繫藍靛玉帶，年可三十許。令碧衣童子請沈會上殿。沈會上其殿，戰兢兢，步不能移。碧衣童子策上殿，沈會拜之。府君約拜，令左右取

榻賜坐。府君曰：凡人為惡，不為人誅，必為鬼戮之。汝昨有至欲之罪，而得此報，故有責配之報。汝能念《太上老君清靜經》，一年之間，誦之萬卷之餘，其德甚重，至能拜禮於吾，奉天帝之勅，不令汝入於輪迴之路。汝念此經而能誦之，若通其義，依而行之，乃與人講論。若化一人歸道，其功以加焉，不為上仙而為神仙，不為神仙而為地仙，不為地仙而為鬼仙，安能入生死之路？語畢，有一鬼官著緋衣，乃鋪文字於案上，而指之曰：有慕仁軌執笏殿下，乃沈會之姑夫也。沈會回面而不敢顧。王曰：汝既為官，任東海郡牧，而不能清白治化於民，却生貪欲之心，殺平人阿趙。其慕仁軌曰：不敢。王喚取被殺阿趙來。遂於東廊下喚過阿趙，身著白衣，披髮，年約三十。阿趙曰：有阿婆年七十有餘，因老病而死，有小姑欲奪其家財而妬謀新婦。婆有郡主慕仁軌於小姑處，得金百兩，以憑小姑所告而受其情，

便將新婦斷處死。有此冤屈，望府君裁斷。其仁軌諱之曰：是此婦人實殺阿婆。王令左右將過業鏡照之，仁軌實受其金，枉斷阿趙。仁軌難諱。王曰：過莫大於欲，禍莫大於貪，罪莫大於殺人。汝三愆俱占，安可赦乎？令左右將來。見二鬼扶一鐵床放在殿前，令仁軌脫衣。未脫之間，其鬼以挑其腮，其腮火著，已燒半面，其身自脫，乃扶於鐵床之上，以鐵釘釘其身，有火焰於床下自著，苦毒之聲不可見聞。卧移時方罷，已見其體燒作焦炭。須臾，又有一鬼吏手執一扇，乃曰：慕仁軌。乃扇一扇，其體復故。以鐵枷枷之。沈會乃越席而起曰：此人乃某之姑夫也。還能救之。王曰：冤枉爭奪，損人性命，何由赦之？炳靈公曰：除此婦人肯罷則休，除陽間作大功德，祈萬聖，禱千真，除太上老君有此飛詔，先令含冤者上登雲路，即證天界，方可免。沈會曰：臣使慕仁軌改過前非，除其六欲，不生三

毒，啓建太上羅天大醮、天尊赦罪之科。趙氏生天，而免仁軌苦乎？王曰：如此者可。仁軌數未盡，更有五年壽。唯攝二魂歸陰府受罪，一魂在陽間守其形。形體亦有惡瘡，疼痛不已。受五年數足而死矣。今歸地府受罪畢，然後為猪、為羊，或為人道，遭其刑法而處死。沈會聞之，速念《清靜》之經，府君恐震地獄，乃曰：汝且可歸，無生貪欲之心，莫起三毒之意。謝禮念非有天恩赦之。汝歸鄉，即於仁軌處勸少生貪欲之心，乃可也。一吏曰：送歸沈會。沈會下殿，拜別府君而退。吏曰：緊隨我後而回。乃過一河。過其河，大作一聲。沈會大驚而覺之，冷汗流體，見家中人圍之，而皆哭泣。沈會舉身而起，家中人語曰：你今死三日，唯心頭微熱，遊氣不斷。沈會乃抬身瞻仰曰：有如此陰靈乎。謂衆曰：勿得起貪欲之心。依前謹念真經，後三日果有皇恩，大赦天下死刑、徒配邊流，得免

其罪，普得還鄉。是時沈會乃去東海郡，有姑夫慕仁軌果然卧疾，乃三月，遍身瘡癩，濃血滿床，疼痛不忍。時仁軌見沈會，大喜曰：我一月前夢見汝救我。乃說地府之事，一一合同，遂乃省其過，乃作黃籙大醮，命羽流三七員，而造《太上清靜經》一萬卷，散施十方道友。又結清靜之會。功德既畢，其日午時齋罷，於空中有婦人來謝曰：感君大醮功德之力，妾已生天，上昇雲路。乃留詩一首云：幾年冤業不曾伸，今日蒙君設醮筵。六欲三毒俱盡滅，却承功德上青天。沈會望天而禮謝。未半月，慕仁軌瘡疾盡安，形體如故。沈會以《滿庭芳》詞勸之云：六欲難消，三毒不滅，貪求狡行忙忙。一朝數盡，誰肯替無常？富貴堆金積玉，臨行後、一物難將。傷心處，從前惡業，自家當思量。何計，免艷都罪責，無由商量。恰如冬瓜，秋後著霜。奉勸吾人猛省悟，清靜快樂之鄉。功成就、朱陵宮裏，澄淨鍊真

陽。仁軌聞之，陰靈如此之驗，豈忍不避乎。乃留詩一首云：思量伶俐不如憨，六欲三毒莫強添。採得百花成蜜後，不知辛苦為誰甜？沈會云：流年如電掣，爭忍不修行？遂乃屈指而大哭泣。二人便乃棄家計，休官解印，同往天台山，折諸茅草，蓋庵而坐，日誦《太上老君清靜經》三百遍，修行年至九十餘，皆得道矣。

論曰：情慾之至，如水火也。煙生於火，水出於冰，煙微而火盛，冰泮而水通。真人云：人以欲愛養身，養者如愚人養魚鳥也，見天之寒，魚則以湯之中，鳥於火林之上，水火所以養魚鳥也，養之失理。必至於聲色所以悅人，悅之過理，還以害生。沈會、仁軌二人以愛欲在身，一為配者，一為死徒，乃猛悟，休官入山修行，行清靜之教。捨惡從善以得道，豈無驗乎？

所以不能者，為心未澄、欲未遣也。太上再復上句之義也。言人欲所以

不能遣者，為心未澄，欲不能遣也。文中子曰：言不忠節謹密，是未能澄心遣欲之人也。故云所以不能者，為心未澄、欲未遣也。白雲翁曰：人不能澄心遣欲者，是漂浪愛河、流吹慾海之人也。或曰：何人不能澄心遣欲而生妄想乎？昔有唐時劉懷珍，字道玉。太平二年，以功勳除授河間樂陵太守。至郡貪圖賄賂，徵索不已，有錢三二百萬，不生慈愍，常取索民錢物，不曾正決一件事。士民嗟怨：家貧家貧，取髓抽筋，寧逢南山白額虎，切莫撞著劉懷珍。其受如此苦。乃移鎮中山府，其民甚憂。有其妻乃謂懷珍曰：今日錢物，富貴稍足。官居一品，而作方面之侯。年可數旬，不修來世之福德。懷珍曰：此時如何？妻曰：我聞著紅騎馬累世修來，若今世不修，殃墮後世；若今世能修，後世必主富貴。懷珍曰：然。妻曰：我粧閣之中寶貨約賣百萬貫餘錢，不如休動民財，而修其寺觀，招二三十僧

道時復齋供，一乃自家作福，二乃獲後世富貴之緣，三乃國家知道，是為善之事，四乃不傷其民而得美善之名。此乃全身足世之果也。懷珍大喜，於是盡將夫人櫃中錢約百萬，而選日施工，聚料買地三十餘畝，前後下手，修之二年而成就。又建一座寶殿，三門經閣，法堂聖像，一切俱全。懷珍與夫人逐日燒香求福，二年之間，諸事乃畢。又買常住地五頃為常住，所用約費錢百萬餘貫。然而如此不動民錢一毫，而暗刷民肌膚膏脂，只是不能澄心遣欲。有日懷珍與妻曰：我今修起一座福地寶殿等，不動民財，而不知後世果因。夫人曰：此陰中之事怎得知？懷珍每日心常不滿曰：作如此功德，又如此虔心禮求靈報，何神明全無靈驗。一日午睡，夢見有一道人直入其屋，亦無禮貌，謂懷珍曰：相公貪而且欲，所修殿堂等，雖曰自己錢物，然平日常取民之脂膏，豈有福乎？今世為官一品，又望後世福田，

其貪欲之心不止，福乃為中山府南門張小婆婦得之。懷珍問曰：彼人何以得之？道人曰：此人賤時糶物，於貴時只依原價糶與人，不增價；別又常念《太上老君清靜經》，扶危救困，惜物護生，其功勝彼修寺觀之功。道人言畢，遂不見。懷珍不樂，遂使急脚子喚此張小公婆婦二人，問其因，與道人所說同。懷珍有悟，遂解印休官，於密室修清靜之道，澄心遣欲，與夫人對其寂淡而雙修，及延道侶而講談《莊》《老》。壽一百二十九歲而終。

論曰：道之大也，唯心感之。若不澄心遣欲，何以得之？劉懷珍取民財而修寺觀，望消業而求福緣，不亦難乎？若放心於無有之鄉，養神於逍遙之境，乃其悟也。澄心遣欲，散金玉以濟貧，以獲延年而正寢，豈不賢哉？宜為真人矣。

能遣之者，

言能遣六欲、三毒者，可以觀三元之妙道也。其三元，在下文說之。

內觀其心，心無其心；外觀其形，形無其形；遠觀其物，物無其物。

物無其物者，心澄而欲自滅。欲既俱喪而自亡，如此者，可以觀大道三元之相也。何名三元？答曰：一元者，內觀心識如虛無之境界，見一切無心。既無其心，六欲之賊何由生，三毒之尸自然滅也。故言內觀其心，心無其心，心無其心者，外觀其形，形無其形者，相不滯於形相者，漸入無為之境，不能誘動其心形，六欲何能而生，三毒自然消滅。故云遠觀其物，物無其物。白雲翁曰：內觀欲心而無欲心，外觀色心而無色心，遠觀外物而無外物。如此三無盡，可謂得其道矣。文中子曰：不執利，不執有利欲之心，故曰內觀其心，心無其心。不違害，不違害傷色身之狀，故曰外觀其形，形無其形。不強交，不與外物而強交易，是故無外物也，故曰遠觀其物，物無其物。或曰：內觀其心，心無其心，何人也？昔戰國時有文摯善醫，有龍

叔謂文摯曰：我聞子之妙矣。吾有疾，子能醫乎？文摯曰：唯命是聽。然先言子病，吾當察之。龍叔曰：吾之病有數般，鄉中譽我，我不以為榮；國中毀我，我不以為辱；此一病也。吾得之不喜，失之不憂，二病也。吾不親富貴，不傲貧窮，三病也。吾視人，如人視我，四病也。吾處吾之家，如道旅之舍，五病也。吾觀吾鄉，如蠻戎之國，六病也。七魔：一賞罰不能動，二刑罰不能滅，三盛衰利害不能已，四哀樂不能易，五不可視國名，六不親交友，七不能御妻子制僕。此七魔也。奚病哉？奚方能已之乎？文摯乃命龍叔皆面立，文摯自後向明而望之，既而曰：嘻，吾見子之心矣。方寸之地，虛虛也哉。聖人之心有七孔也。子之心有六孔，流通一孔，不達也。今聖智為疾，此之謂無其心也。故云內觀其心，心無其心。或曰：何人外觀其形，形無其形？昔吳季札入燕為使，至路，忽於道上見金一錠。季札

見而不思其意，前所步見一負薪者，告之：汝貧，此處有金一錠。季札引而指之曰：汝貧，將此金玉去。負薪者乃顰眉而責季札曰：觀君氣槩甚豪，而意甚下，顧我身何為嚮金之人？負薪者遂不顧而去。金乃物之最貴也，而不顧之，乃是遠觀其物，物無其物。

論曰：龍叔得內觀其心，心無其心；負薪者遠觀其物，物無其物。悟此三無，能通聖道矣。

三者既悟，惟見於空。

上句言六欲既不生，則三毒自然消滅。因此不生六欲，消滅三毒，則能內觀無欲心，外觀無色身，遠觀無物。此三者皆名為色空，應有形者，俱為幻化之境。《定觀經》云：定心之上，豁然無覆；定心之下，寂然無物。其能識者，可以內觀無心，外觀無形，遠觀無物。此三者觀之，無心、無形、無物，並同虛空。然後既悟，唯見真空寂境。故曰三者既悟，唯見於空。《易》曰：顯道神之德

行。言悟三空之理，明顯無為之道，而自神靈其德行之事，如太虛以萬物，惟見於空之境。文中子曰：聖人之德，為道之本。為道者無心、無形、無物，此三者既悟，唯見顯道之德行、神之德行者，太虛之至空也。故云三者既悟，唯見於空。或曰：何人能悟此三無而見於空、達道也？昔唐時柳子初於大曆年中會試於南宮，失利，不檢其身，恣遊放蕩，花街月夜，取一時之樂。非久行囊空虛，於人多厭之，糊口之用，及形容枯槁，日不聊生。或一日，出東門，徐步而進，欲覓自盡之計。柰死期難捨，遂坐於古柳之下，因默念《太上老君說常清靜經》三遍，神氣欲絕。忽有一道者，青巾白袍，皂條草履，携一竹籃，亦來坐於樹下，氣貌堂堂，乃謂子初曰：君有道氣，一何困也？子初開目，見而甚喜之，乃謝曰：僕一書生，當於壯歲，兩上春闈，而遭命蹇，因此失利，放蕩狂遊，囊空資盡，日不聊生。家鄉東海難

歸，西秦無住，體無完服，腹無所食。今日之困，陳厄之不若也。言語蹇澀，氣漸聲微，忽然而倒。其先生見之曰：何以如此？遂於籃中取棗二枚，與子初強起，接而頓食之，唯食一枚，但覺作食之味，乃拜先生。先生曰：觀君之氣，似有奇骨。子初言：僕乃心中不足。先生曰：汝乃得其甚足。子初曰：大丈夫心中足位高貴可也。先生曰：爾但瞑目。子初既合其目，便覺飄然而昏似睡，忽見一紫綬金章人乘其象笏，奉夫餘國王詔，徵足下子初。子初曰：僕乃東海下士，沂水儒生，兩失龍榜，今為孤迹之人，安辱國主相徵乎？道罷，子初喜而隨使者出東門，既出東門，有十餘人錦衣繡帽，玉帶紅靴，見子初盡皆拜，遂牽桃花之騎，玉鞍金鞵，寶轡龍駒，翠蓋圍鳳，紅旗映日，乃簇擁子初上馬。子初喜不自勝，乃攀鞍上馬，頭達叫唱甚嚴，從騎至多，駟牡追風，八百餘里，乃至一城。見人煙窈窕，地里風光，

數百朱紫之官列拜馬前，道引見一所，珠樓寶閣，玉殿森森，煙霞重霧。忽有一騎從衆中出，曰：且交駙馬解鞍於東華館。軒窗戶牖，皆水晶、玻璃為之也。是時紅粧繡閣，寶結花冠，數十妓人動其弦管。是夜，子初宿於東華館下，高閣鍾敲，曉月清風，一妓傳宣，請駙馬引見公主。子初大喜。忽一美人捧一寶箱，內有寶玉衣一襲，更夜牽一駿騎，遂請上馬。笙歌一隊，皆吳姬越絕，遂引乃入其內，見紫殿金階，玉庭森森，兵衛肅肅，朱紫班班，圭笏相亞，大立羣班，拜舞待之。須臾，鳳簾齊捲，鳴鼓一聲，山呼震動。夫餘國王昇其寶殿，見華冠龍袞，雉扇輕開，嬌娥窈窕，傳宣曰：令駙馬見帝。引子初拜舞畢，王曰：寡人愛女，小字淫芳，願絲蘿於卿，納聘在于今日。承其詔命，奏鈞天之鼓樂，列其御宴，卿富貴不可言也。是夕燈燭龍膏，香虬鳳髓，霞衣綵帔，不知其數。忽鳳閣擁一女子，年可一十六歲，其

貌其姿，西子、嫦娥之不若也。嫦娥古今無如此貌。子初見之，魂飛天外，魄散九霄。是夕鳳帳盤龍，以衾展雙鸞，太真為伴。至天明帝乃勅降，特進領三省駙馬都尉，贈武安侯，鎮武郡公主。至武安郡，道士、僧俗、屬郡官僚並皆接之。治此郡一十年，遂生二子。政聲大振。奉勅征南夫餘國大元帥，鎮兵數萬，一擊而勝，功勳成就。帝乃賜金山一座。五年二子封侯，其富貴不可言也。金玉如瓦礫所為，功蓋天下。有日樂極悲來，後三年其妻公主身殂。後二年，二子亦殂。子初不勝其悲。又有告變曰：南國王柳子初欲叛其地。夫餘國王遣使，命詔之。子初不敢抗命，遂至此國。其王曰：汝一微生，不能自料。寡人召汝為駙馬，一十五年，封王立土。朕於汝不輕，汝何叛也？子初曰：臣本一布衣，今日駙馬。謝王封第列土，非敢叛逆。王曰：告叛之由不虛，何更言之？令左右烹之。力士

解衣取刀，欲割其肉於鑊內，子初甚驚惶，乞復作一布衣，今不可得也。力士欲下刀，油鑊其滾，哀聲一叫，忽然而覺。先生曰：足下何乃昏然？子初既覺，汗流遍體，戰戰而已，乃具述之事。先生曰：汝念《清靜經》，經中有內觀其心，心無其心；外觀其形，形無其形；遠觀其物，物無其物。三者既悟，唯見於空。子初始乃孤貧，而有欲心。今子初作駙馬，此三者皆無實跡，如一虛夢間，是唯見於空也。子初又要身高貴，使子初封為南餘國王也。又不能遠觀其物，賜子初金山一座也。子初釋而悟曰：人生一世，虛幻自然，何可嘆美之？遂禮先生，先生曰：後三年於蓬萊相見。汝堅持此真經，道心勿退，是其願矣。道罷，乃乘雲而去。子初因食棗而已，不食。後尋勝地，乃茅庵，默然而坐，屏絕人事，堅持此經，三年不退。忽一日，有白鶴自空而下，子初乘鶴背，乃騰空而去。乃留一小頌三首，

一云：色是花豔而不久，莫厭虛花豔色紅。花光虛豔似浮雲，爭如悟取玄元理，心上無心道自通。二云：形似虛幻而不永，形是虛形莫強尊。耽家積業落於空，爭如悟取玄元理，形上無形道自通。三云：物是浮寄而不久，白玉黃金即是空。來時空手去時空，爭如悟取玄元理，物上無時道自通。

論曰：萬物自無而有，有極則歸於無。故人以幻化色境為實，豈不愚哉？柳子初因不第而有欲心，感得上仙來化，為夫餘國君之婿，以為色樂其心，故不知心無其心也。又外以封侯之貴樂其身，故不知形無其形也。又以金山之貴物樂其意，故不知物無其物也。此三者皆不實之相，乃色是虛花，形是虛幻，財是虛景，乃其禍也，而有悔悟。既乃悔之，身遊三島而上玉京，豈不良哉？《易》曰：無思也，無為定也，寂然不動，感而遂通。天下之政，非天下之至神，其孰能與於此哉。文中子

曰：山宜附地，人宜附靜，湛然寂者，道在其中矣。或曰：何人常寂而通其道？答曰：有之。昔者天寶年中，有進士李通，年五十餘，累舉不及第。日誦《太上老君清靜真經》，大得其理，寢膳不離其手，口不輟經。忽日，妻乃亡之。通嗟嘆而已。惟一子。後一年，子亦殂。通曰：吾脫其枷也。常日詩酒自娛，相知或有勸之曰：我聞妻者，齊也，同棺共葬，乃人之常情。子之不為，慟嗟而已。君之無情。其子死，一慟而已，忘遺體之慈，是失父子之道。君何為知書也？通曰：我聞莊子亡妻而鼓盆，東門喪子不哭，此真達理也。吾何憂哉，吾何憂哉？太上云：內觀其心，心無其心；外觀其形，形無其形；遠觀其物，物無其物。三者既悟，唯見於空也。觀空亦空，空無所空；所空既無，無無亦無；無無既無，湛然常寂。

常寂者，道也。道既常寂，吾何有焉？遂散家財與不足者，棄田土於

鄰里也。李通乃携《清静經》而入華山，拔茅累石作庵，誦《清静經》，默食藥苗而修堅志，三年如一日，道心不退，感太上使神人教之。其人化道者，入其庵中。道者遂問之曰：子於此學道深山安有乎？凡問七次，而不對之。道不在忘言而不達，不在論言而得馬駒牛犢，又何言哉，又何常得其道也？夫欲修道者，先能捨外事，外事都絕，無以與心逆，然後安坐內觀，心覺一念，起速須除滅而安靜。又若有浮游亂想，亦當盡滅。亦不知觀空亦空，空無所空，所空既無，無無亦無，無無既無，然後呼為湛然常寂。李通聞之，願然而拜曰：先生所命，願一教之。乃跪于前，而授其教。先生曰：學道者唯滅動心，不滅照心；但凝空心，不凝住心者，空心也。不可定中之急求慧，急則傷性，性傷則無慧。若定不求慧，而慧自至此，名真慧也。慧而不用詐，慧而貴，實智若愚。此乃益資定慧，此羨無極。若中念想，

多感衆邪，妖精百媚，隨心應見。又謂李通：汝若能定得心，湛然常寂，其道有成。李通曰：弟子能之。先生曰：來日我教汝，吾且去矣。先生遂出庵而不見，候來日辰巳時來，先生却來此庵前。通乃出庵，喜而迎之，而入其庵。李通乃禮：念弟子身為腐儒，不通大道，而守頓空，何異膠柱鼓瑟？先生曰：吾欲燒一爐丹，汝以鎮爐，唯以無語為湛然常寂。汝能之否？通曰：弟子能之。先生乃於庵中立一爐，于袋中取出一鍋子，放數粒丹藥其中，望太陽取氣一口，吹在爐上，其火乃然。仍戒李通曰：汝正南於爐而坐，此是觀空亦空，空無所空，所空既無，無無亦無，無無既無，如此者乃事湛然常寂之法也。若有千魔萬魅，感即是無，得而言，若爐中之丹則不成，汝道不就也。千萬記之。三日後，吾却來覲丹，丹必熟矣。與汝共服，可以羽化為天仙也。千萬記取。李通乃握固，而面於爐端坐。其先生乃

出庵而去。不多時，忽然四方雲起，雷電交空，疾風拔樹，霹靂摧山，驟雨猛水乃浸其庵。李通不動身而端坐，其水浸坐，乃至于頂，而心不動。雨水只有一寸，不入於爐，不至于口，須臾，水出既落，又有野火燒山，亘天火發，而至於庵，庵舍欲燒而著其李通，亦寂然不動，其心全無怨意。須臾火自滅。又有餓鬼而至，其鬼或藍面而赤髮，或黃體而面青，或眼紅而光出，牙若剛刀。吾等山鬼也，今日大飢，食而且度。汝若一言，吾不食汝；若無言，乃啗之。李通終無一言，其鬼自滅。又有數十餓虎而來欲食李通，李通乃不視，亦無怖心，其虎哮吼數遭，嗅而不食即退。又有毒蛇，遂遶其身而行，李通亦不動心，其蛇自去。又有一婦人，年貌二八，嬌姿無比，以其妖言豔語而惑李通。李通心並不動，婦人亦去。又有強徒三十餘人，皆鐵衣，手執戈弧矢。賊首曰：好食此人心肝。遂刀劈之，欲下手，有一人曰：

只語一聲，且免之。李通亦不言，其賊自去。然後有一王，峨冠大袖，朱履長裙，手執寒玉珪，引數人獐神惡鬼，是牛頭獄卒，手執鐵叉，大喝李通曰：閻羅大王至，何故不起？其鬼遂以鐵叉叉之，其王曰：且住。若其人一言則免之，若無言，以鐵叉叉之。李通終無恐懼，亦不動心。王曰：執取伊妻來。不多時，李通妻至，王曰：使爾夫一言，不令汝受苦。其妻曰：君與我為眷屬，恩重如丘山。今日我經地獄受苦。若你一言救我之苦，若不言，苦罪難受。李通終無一言。其王遂怒：此乃頑鄙之人，今鋸解其妻，使令看之。須臾，獄卒提到其妻，用板夾之便鋸解，血流滿地，悲聲不忍見聞。其夫亦不言。王曰：又呼其子。子果至，王曰：交汝身為萬段。子曰：父乃鐵心肝。我母因父不言，直至鋸解之苦。父今又若不言，我受剝身之苦。《孝經》云：念父子之道，乃天性也。父慈悲，乃一言，可免其

苦也。李通終無一言。王見此，大怒言：這漢頑執，攝其生魂離殼。李通但覺昏然，其魂於齊州王大郎家作女之身，生而且艷，絕其容貌世中無比，啞啞不言，年至一十八歲，人呼為啞女。父母出嫁與東村馬員外第三子，甚愛其貌美，乃不嫌啞而取之。凡三載，生一子。其夫因醉而歸，與其妻曰：爾生得一子，甚美，幼啞而無言，此乃大病也。雖此子，何為美也？遂把子脚倒提摔之，血濺其母滿面，啞女驚然，忽叫一聲：冤苦，可惜我嬌子。開目遂見其爐紅光亂撒，火星迸散，似如雷聲。其先生方至，曰：丹藥欲熟，為汝一聲而驚懷了，其丹砂是不能成。觀空亦空，空無所空，所空既無，無亦無，無無既無，此人而不能守湛然常寂之道也。先生以手捶胸，大哭曰：可惜一爐丹藥。更後六年，吾復再來。遂贈與李通詩一首：略修玄理問吾徒，丹熟真鉛悟色無。鶴性自閑衝碧落，道心因靜見工夫。

龍吟瑞彩籠金頂，虎嘯祥風射玉爐。更後六年功行足，湛然常靜入仙都。先生曰：六年之內，只守此經而修，因上玉京。勉之勉之！道罷，先生化白光而不見。因此李通覓一繩懸大石，可重千斤，墜於石室之中，於石下而坐，寂然不動。六年功成，其先生引鸞而復現，叫之，通乃見先生，大喜，禮拜畢，二人共話，乘其鸞冉冉騰空而去。至半空之中，乃遺下詩一首云：觀空空亦是真空，空既無時無亦通。無惠既無湛常寂，好乘鸞背到天宮。又有小詞一首，《寄減字木蘭花》：攻書學業，五十餘年頭似雪。金榜無名，始信儒冠多悞身。妻亡子夭，恩愛無時來入道。深謝師言，湛然常寂昇九天。論曰：大道者，至靈蘊妙，待感而靈，猶金石之響，待擊而鳴。李通乃悟觀空亦空，空無所空，所空既無，無亦無，無無既無，湛然常寂之道，千魔萬惑而不動，又設千斤之石，而修六年，果登天宮，豈不宜

乎？
寂無所寂，欲豈能生？欲既不生，即是真道。真常之道，悟者自得。得悟道者，常清靜矣。

欲者，六欲也，乃六賊也。眼是一賊，愛窺觀彩色妖艷，人不知妖艷是殺人性命之刀斧。耳是二賊，愛聽艷樂淫聲，而不知艷樂淫聲是害人之鼓樂。口是三賊，愛嗜美酒肥肉，而不知美酒肥肉是腑腸之毒藥。鼻是四賊，愛悅芳香邪氣，而不知芳香邪氣是害人之氣命。身是五賊，愛香車寶馬，而不知香車寶馬是招蹶之機。意是六賊，愛祿高位大，而不知祿高位大是害人之形命。故曰射神之天。此上句言能於常寂之中無所寂相者，是能了真空湛然之相空無，湛寂自滅，然後真空照了，見其真道矣。見其真道者，了達空無湛寂四事，但泯真照空也。如此者，六欲之毒害，又豈能於吾生也？故曰寂無所寂，欲豈能生。文中子曰：寂無所寂者，與太空同體，與太極同

德，與神道並行，不化而化。如此者，安能有欲乎？故曰寂無所寂，欲豈能生。或曰：何人能知寂無所寂，而不能生其欲也？昔宋時熙寧元年，儀州醫官聶處仁，其性沉靜，美而風彩。年三十餘歲。自小能持《太上老君清靜經》，大通其理。凡有患者，不問貴賤貧富，而一般下藥，無所問藥資。人皆以為救命真人。或有一黃官之家請看候其患，既至患人宅，其患之家妻年少，艷美容質，遂見處仁候脉，而便通其意。處仁避面而候脉，下瘋藥一服，畢，急辭而退。處仁乃真空照之，出而便行。其黃官之妻他日佯病，使人召之。其處仁托其他幹，不為下藥。其娘子再三使人，召三五次。其處仁不獲，更又叫曰：娘子急之。處仁推辭不及，至乃避面診之。處仁曰：娘子安常無病。娘子曰：我官人差出遠遊，今夜汝來，我當相待，每夜夢宿於君。處仁聞之大驚，深會其意，遂走出門。後及呼之，更不

復迴。至夜深，忽有人扣門而曰：有某急患，請郎中候脉。處仁不知端的，乃開門而出，娘子遂拽住處仁。娘子曰：君心從我，我與君富貴。若不從我，我是黃官之妻，為期於此。汝若不從，與君其死。處仁不得已，遂允之。乃引娘子至於短牆，而攝其手，越牆而走之，不入其家，遂遁入南山之中，依此誦《太上清靜之經》，修行悟此寂無所寂之道，而欲心豈能生之。是時，本州城隍土地正神以此聶處仁不起欲心，乃呈司命君遂賜一百二十歲，昇為天官。其婦人奪其壽，至五十終，將生魂攝於地獄，其形於陽間卧疾，腹常如刀攪，其心生魂被獄卒縛於鐵柱之上，以刀剖腹，洗除淫欲之心。受此苦楚，痛不可忍。其獄卒謂之此人曰：汝受苦七年矣，更有三年，三魂俱入地獄，縱得托生，入於別腹中，為之柰何？婦人曰：如何解救？鬼吏曰：汝於陽間設黃籙大醮，乃改惡從善，每日持念《太上老

君清靜真經》,可免此苦。娘子曰:的可免之?鬼吏曰:的免也。一發善言,千里福應。兼懺悔淫欲之罪,豈虛言哉?於是死魂至即目得假合其生魂。汝切記之,不虛言也。其人自省,謝罪改過,更不再犯。其夫官人憫之,遂命羽客一七設其黃籙大醮,又禮念《九幽拔罪懺文》千卷,兼印造《清靜經》萬卷,散施四方善友,令人持誦。於是九天上聖特赦其罪,娘子所患漸愈。其人思往日之淫欲,是有此報,在於地獄,不唯切之一身,外更有犯此者,不可稱數。娘子乃謂官人曰:唐則天在日,與僧人行姪,亦受毒蛇地獄。官人曰:如何受罪?娘子曰:一旦便脫衣服、冠冕,而入於毒蝎之中。其蝎攢身蟄之,受苦不已,罪畢,即著衣服冠冕去。官人曰:此罪何時受苦足?妻曰:限滿之日,須有百年,任為娼女也。妻乃勸夫曰:善事可作,惡事切莫重犯。果有報乎。夫聞之此語,亦改其心。二人乃雙修,

各依太上清靜之教,每日持此真經百遍。乃解印休官,築環墻於內,卓庵而坐,修道九年,同坐亡於壁間。乃留詩二首云: 鄴都地獄不堪觀,視者令人心膽寒。萬死千生重受苦,陽間岐路再遊難。自退欲情欲不生,好修清靜湛然明。寂無所寂天真境,只在人心改善行。

論曰:道以清虛寂靜為體,人以姪色為實,豈不知有經云,色即是空,空即是色。道廣則天堂之路,欲大則地獄之因。聶處仁稟寂無所寂而無欲心,乃增延壽筭,名書天曹。其妻滯於淫罪,以奪其壽,魂追北府,剖除姪心之垢。楚痛之疾,醮筵救愈。及其改過從善,休官同修清靜之教,日誦真經,絕其塵俗,方乃同坐亡,魂飛北落。上聖真經豈無驗乎?後之好道君子,切謹記之。

太上老君說常清靜經註

①「動者靜之基」,侯善淵、劉通微二注本及《清靜心經》並作「靜者動之基」。

(丁培仁點校)

004 太上老君說常清靜經

經註

經名：太上老君說常清靜經註。
金朝道士侯善淵註。一卷。底
本出處：《正統道藏》洞神部玉
訣類。

太上老君說常清靜經註序

源之未發，流無不清；風之未扇，物無不靜。及乎流以汨之，則清者濁矣；吹而散之，則靜者動矣。此理之常也。道之生物，自然之性，何嘗不湛然而清，寂然而靜，感而遂通。性以情遷，失其天真，逐而忘返，至于流浪生死，常沉苦海。顧不哀哉？太上以大慈悲、大方便，引接迷徒，將與復其本元，使得見道。謂道雖不可以言傳，而目擊道存之士，且幾何人？斯謂道雖

不可以象教，而得魚忘筌之喻，若有所待。故經之所以作也。是經諄諄明誨，始曰清者濁之源，靜者動之基，人能常清靜，天地悉皆歸；繼而曰人神好清而心擾之，人心好靜而欲牽之，常能遣其欲而心自靜，澄其心而神自清；又繼之曰，內觀其心，心無其心，外觀其形，形無其形，遠觀其物，物無其物，湛然常寂，寂無所寂，即是真靜，真靜應物，漸入真道。復曰，雖名得道，實無所得，為化衆生，名為得道。此真經之大旨歟？蓋自西王母授之，仙人葛玄等傳之，太玄真人贊之，世世遵奉。奈何愚者有終身不靈，惑者有終身不解，鮮克仰副太上慈悲方便之意。今驪山侯公先生，游方之外者也，念經之言，能悟之者，可傳聖道，乃即其說，為之訓解，辭簡而甚易明，理達而甚易行，神而明之。自遣欲而滅三毒，由觀心而識無空；屏執著之妄心，誠貪求之煩惱；祖述聖作，以開以明。其間有云，悟而無為者是，得而有作者非。有云，大道中無文字，文字中無大

道，天文玉訣，須憑師匠口耳相傳。有云，不執空為空，不著有為有。有云，抱出靈華潔，回還一體光。學者儻於是經誦持不退，當得造於目擊之玄，不有待於忘筌之後也。平水老人毛麾謹序。

太上老君說常清靜經註

姑射山太玄子侯善淵註

老君曰：大道無形，

無形者，陽淵渺邈，曠大無窮，頤心同體，微妙無方。故言大道無形矣。頌曰：大道本無形，無形亦假名。視之非有物，審聽絕音聲。覺性通幽靜，頤神透目清。太空無伴侶，孤月照蓬瀛。

生育天地；

天地有形象，皆因大道育養之，故曰生育天地矣。頌曰：一炁生天地，三光在彼中。四時分造化，萬物得和融。欲了無生法，知心物外窮。至真明不盡，常與道之通。

大道無情，

道無情者，湛然非象，虛極無心，萬物生成，無為自化。故曰大道無情矣。頌曰：無情通大道，育養本無情。掌握乾坤秀，包容天地明。上穿金闕界，下徹九幽冥。蕩蕩無窮

測，玄玄覆玉京。

運行日月；

日月者，道化玄明，人神之主，運行四通，普照而不昧也。頌曰：大道澄空廓，天邊日月長。運行周匝界，昇入遍他方。現出靈華潔，迴還一體光。達人知此意，咫尺是仙鄉。

大道無名，

無名者大道，通玄微妙，至理無窮，混元一炁，先天地而生，本無名也。頌曰：道化虛空體，權為假立名。有名非有相，無物亦無形。上徹三天瑩，橫擔四海明。闡開清靜眼，飛躍似流星。

長養萬物。

道大無形，湛然不動，皓皓純一，覆藏天地，運行日月，流轉江河，掌握山川，包含谿谷，滋溢園林，成熟五穀，結秀花果。一切萬物皆稟道炁而所生，本自無為，感時而自化。道本無形，育於有象。故曰長養萬物矣。頌曰：道化芸芸長，機生物自遷。煙嵐光萬頃，鬱秀照千山。淥

野連溪壑，清音對碧天。悟茲真福地，此處隱飛仙。

吾不知其名，

太上言，我不知道之名，為獨處無礙，太真玄妙之機，無生無滅，無增無減，隱顯無方。衆生不悟，太上垂慈，假立有名矣。頌曰：妙道迷難悟，心開慧自靈。元神生固蒂，虛谷證圓明。海藏凝珠璨，山頭混日精。滿天昕寶鑑，光照玉京城。

強名曰道。

道本無名。既以有名，著於物相；若以無心，死入落空。有無相生，杳冥相對。應物現形，日用不離。難分正教之法，強名曰道矣。頌曰：道本無言說，強名分辯別。心清秀炁凝，性靜靈雲結。海上起新風，天邊生古月。沖虛物我明，萬象齊俱攝。

夫道者，有清有濁，

有清者，清空曠大，神谷寂虛，一炁沖和，故名有清矣。有濁者，周羅萬物，無所不容，無所不入，貫穿世界，

細透毫毛，故曰有清有濁矣。頌曰：清濁定浮沉，陰陽運古今。天空垂玉象，地厚產瓊林。晴倚曹溪路，神凝法海深。但能明此理，方顯道人心。

有動有靜。

有靜者，大道寂然無心。有動者，神用感而通玄。一動一靜，可成真道矣。頌曰：動靜道弘張，神丹射太陽。天魂收坎位，地魄入離鄉。海底龍翻浪，山頭虎戰蒼。生擒歸昊境，性命得延長。

天清地濁，

天清者，混元一炁，拍塞沖虛，玄遠極深也。地濁者，生人發地，無所不種，無所不收，處萬民之污，故曰天清地濁矣。頌曰：地氣接空蒼，清天滿四方。中間埋古跡，上下越新光。達者歸真路，儵然入道場。玉嬰登寶殿，遠望汨羅江。

天動地靜。

動靜者，主天圓地方，則自然千變萬化，星移斗轉，運斡樞機也。地靜

者，風吹浪捲，蠢然不避污染而不爭。故名天動地靜矣。頌曰：地靜本無為，天樞斗柄隨。生成無造作，設化有靈機。極目秋蟾朗，凝睛瑩日輝。一陽收入鼎，進火養神龜。

男清女濁，

男者，陽也；女者，陰也。故曰是真陰真陽。此言非世中男女，見之不用，用之不見。故《德經》云：萬物無不負陰而抱陽。故外陽而內陰。外者，身也；內者，心性也。何以故？乃至修行之人身靜，豈不為男清，心性擾亂不寧，豈不為女濁矣。頌曰：物靜心非靜，身清性不清。迷真疑恍惚，意亂豈安寧？返照歸金鼎，迴光入寶瓶。分明開道眼，何慮不圓成？

男動女靜。

男動者，非是交媾之為主。動則不定，定則不動。故動者，陽道所生，如撥雲見日，磨鏡得明。故曰陰返歸陽，是名男動也。女靜者，謂陽道開自然，神化虛明，不姪不邪，不憎

不愛，不貪不嗔，不嫉不妬，不起不念，不妄不想，豈不為女靜矣。又曰：離中虛，坎中實，明取坎中實點化離中虛，是名陰陽顛倒、還返之法，可成純陽之道矣。頌曰：顛倒陰陽法，爐中採汞鉛。清光輝滿地，紅焰迸周天。白虎池中卧，青龍火裏眠。鍊成真玉貌，身外舞胎仙。降本流末而生萬物。

降本者，末所生也。道德其本，一炁沖虛，發自然之理也。萬物得其本，長養而不槁，枝葉榮旺，人得其本，神靈莫測，通現無方也。頌曰：降本沖和秀，隨機物自生。兩行紅霧起，一道素煙傾。虎飲金烏髓，龍吞玉兔精。兩般真至寶，悟者自神靈。清者濁之源，

水清而淵明鑒照，其形自顯，異於濁也。是清之泉源比喻於修行之人也。頌曰：心淵明徹底，道靜鑒元通。玉戶陽精益，金闕浩炁沖。合和收坎殿，匹配送離宮。始覺玄珠降，衝天耀日紅。

靜者動之基。

靜者道，太虛空也。神得其用，出入無間，杳冥同體。故曰動之基也。頌曰：默默空無物，神明道體同。天清沖浪碧，地靜湧波紅。四象攢爐口，五行入鼎中。鍊成丹赫赤，餌覺赴仙宮。

人能常清淨，

天常清淨，日月星皎白而虛明也。人常清淨，精炁神寧而不散。故曰人能常清淨矣。頌曰：色慾無情染，紅塵絕往還。性光飛皎日，心地泛寥天。一炁烹元象，雙關鍊小鮮。精神穿宇宙，燄燄遍三千。

天地悉皆歸。

人能清淨，神通妙理，昇入無為，周羅天地，細入微塵。故言天地悉皆歸也。頌曰：清靜處無為，無為達妙機。蟾宮奔玉兔，日殿走烏飛。閃出千光燦，衝開萬象輝。包羅諸色相，天地悉皆歸。

夫人神好清而情擾之，

人神者，天地秀炁，結聚靈明也。本

自清靜，隨物生情，占塵惹垢。故言情擾之也。頌曰：富貴遮心翳，榮華眯眼塵。雖然觀日月，不見本來真。寂湛頤元性，澄空鍊至神。靈童開碧嶂，仙子跨麒麟。

人心好靜而欲牽之。

心者，神明也。知內而為性，顯外而為神。神本清靜，隨風錯亂，物動而情牽之也。頌曰：開眼露天機，人心著處迷。戀情情慾擾，逐境境還隨。抱朴通精粹，還淳達細微。一真烹萬象，混合太淵齊。

常能遣其欲而心自靜，

人能遣其欲者，割愛離親，除情去欲，捐念忘機，自然性靜心寂矣。頌曰：常能守靜篤，方寸育神靈。閉戶眠金子，垂簾抱玉嬰。玄霜烹至寶，紫粉鍊真精。結就玄珠燦，收來獻上清。

澄其心而神自清，

澄心定意，湛寂淵明，返本還元，如水不動，故曰澄其心而神自清也。頌曰：欲要識靈源，知空在目前。

澄澄心月現，湛湛性光圓。炁秀通神聖，神風化羽仙。逍遙歸海島，三界獨綿綿。

自然六欲不生，

六欲者，眼、耳、鼻、舌、身、意是也。不生者，眼觀無色，神不邪視；耳聽無音，聲色不聞；鼻息沖和，不容香臭；舌餐無味，不甘酸甜；身守無相，不著有漏；意抱天真，不迷外境。故曰六欲歸真，自不生也。頌曰：歸真除六害，漏盡免三灾。識性通玄路，知心道眼開。木人遊昊景，石女翫仙階。日落清秋夜，天邊抱月來。

三毒消滅。

三毒者，身業、意業、口業。消滅者，善養精炁神，除盡貪嗔嫉。故曰三毒消滅也。頌曰：六欲成金藏，三灾化寶珠。七情無染著，十惡永消除。拂拭冰臺淨，光華不卷舒。抱將遊陸地，獨步入清虛。

所以不能者，

修道不能除情去欲也。心有所著

矣。頌曰：不能行此道，性返轉生疑。打坐勞心力，參禪柱用脾。住行安有分，坐卧鎮相隨。要見開清眼，神光滿室輝。

爲心未澄，

心性不寧，擾亂乃多。神遊外景，觀於微、著於物矣。頌曰：上善水心淵，澄清照碧天。世情多苦惱，人被業緣牽。逐浪迷真性，隨波昧本源。一靈歸苦海，萬劫不迴還。

欲未遣也。

終身不救，物轉於心矣。頌曰：修幻妄施功，於真事不同。有為如電影，執相若飄風。物假心非假，身空性不空。一靈知有主，萬法悉皆通。

能遣之者，

轉於萬物，心處無形，頤神居妙也。頌曰：頤心達聖機，無相等虛齊。激灑澄波靜，陽淵極渺瀰。流通周匝界，游歷大神威。月照乾坤瑩，清風相送歸。

內觀其心，心無其心；

返觀其心，默然而無心。其心者，開

目澄空，明見真心。真心者，湛寂無物，混日純一。故名其心也。頌曰：返照見天心，圓明湛碧深。無無真實相，有有覓難尋。山海無遮障，天灾禍不侵。真人誰作伴，風月是知音。

外觀其形，形無其形；

形者，是地、水、火、風也。此者是名有漏之身。非有漏之身，是故無相之真。無相之真，如仰水看月，似天空運轉純風，神凝烝聚，可成真道矣。頌曰：外觀有漏相，幻化即真形。去住何移跡，安然不暫停。中間藏恍惚，內外窈冥冥。渙若冰將釋，沉沉覺海清。

遠觀其物，物無其物。

內外皆無，即遠而何有？此者無物。無物之中，別有奇異之物。經云：恍恍惚惚，其中有物。故言物無其物也。頌曰：恍惚遍無涯，壺中景物嘉。爐門傾玉藥，鼎眼泛金花。虎遶明珠戲，龍噴萬里霞。撥開雲霧看，捧出夜明砂。

三者既悟，

此三者，說心、形、物，即於虛無也。悟者，了達也。頌曰：喻說分三體，知玄一也無。有無皆是幻，無慮道相扶。法眼為丹鼎，天門是藥鑪。鍊成朱汞結，傾入一冰壺。

唯見於空。

表裏中間，俱無所著，圓明坦蕩，心入無為。故曰唯見於空也。頌曰：觀空非色相，色相即真空。物我俱忘泯，方知太古同。周行行不盡，遍計計無窮。天網玄網大，夷羅覆載通。

觀空亦空，

觀空者，道弘無相，萬法無形。亦空者，神通妙化，一體歸真也。頌曰：炳耀滌晴空，神遊四海通。杳冥天地匝，恍惚太虛同。耿耿青霄月，飄飄碧落風。縱橫穿上下，南北與西東。

空無所空。

空者不執空，為空不著有。為有心同，太極之中聚於玄妙矣。頌曰：

落落遍無隅，冥冥運化虛。無形呼大道，離相號真如。一體無分別，三明有所居。廓然開妙法，萬道素光舒。

所空既無，無無亦無。

了心達本，識性歸宗，何執有無之教？有無之教，亦是假名。若無假名，真心何顯？故有即於無。無者非落空之法，無備於有，有者非以物類窮之。故曰有無自然也。頌曰：至訣清虛道，明知物外中。娟娟輝昊景，翦翦耀蒼空。鼎破心珠赫，鑪開慧日紅。澄凝丹汞結，運入廣寒宮。

無無既無，湛然常寂。

能知空是不空，執有而不有，故本性湛然常寂矣。頌曰：湛湛無瑕謫，通幽過目星。乾坤沖拍塞，天地曠然明。性覺虛心寂，神暝絕夢驚。豁然開古道，月照水晶城。

寂無所寂，欲豈能生？

不寂而所以寂，故曰天真滿目，妙道歸源。欲豈能生也？頌曰：寂靜物

皆捐，虚心養浩然。面容如朗月，碧眼似寒泉。皎皎歸真趣，昏昏法性蠲。一潭秋水瑩，萬派素波淵。

欲既不生，即是真靜。

欲既不生者，滌除繁慮，諸欲消亡，寂無所欲，欲豈能生？真靜者，神光虛煥，通顯靈明，返歸清淨矣。頌曰：清淨心通聖，無為化有功。珠凝金鼎內，寶結玉壺中。明似天空日，清如洞裏風。沖虛生瑞彩，光罩五明宮。

真常應物，真常得性。

得性者，為真常妙道，應物隨機，隨機見性，見性明空，自得其性矣。頌曰：真靜靜無疑，陽光照眼希。步虛通妙理，旋遠達玄機。物物皆相應，般般總不知。返觀煙浪碧，笑指洞天歸。

常應常靜，常清淨矣。

常應者，見物見心，見心離物，離物明空，故曰真常得性矣。頌曰：清淨本根元，於中性自然。二關精鬱鬱，一道炁綿綿。混合明真理，凝然

悟太玄。空中知有象，應化出先天。如此真靜，漸入真道。

如此勤行真清真靜之人，方達希夷妙理，物外天真。故言漸入真道矣。頌曰：大道泐空淵，昕光照滿天。一明分造化，二契養胎仙。性達忘憂苦，心通合自然。點開無色界，返本復歸元。

既入真道，名為得道。

道本無名，假名立道。認得無生無死之法，鍊凡為聖，鍊聖成神，神合其炁，炁通元首，名為得道者也。頌曰：得道幽深遠，仙風播世高。九天居自在，三海任逍遙。行滿金書詔，功成玉簿標。神遊登碧落，飛步越丹霄。

雖名得道，實無所得。

了達而不居，體用而無形，取有而無物，故曰實無所得也。頌曰：迷隔千山遠，悟來一物無。取無無所得，棄有有相扶。有有將何有，無無亦假呼。觀天明大道，露現一輪孤。為化衆生，名為得道。

假名立字，化於未悟之人，權為證果之教，故曰實無所得，實有所修也。頌曰：得者非為得，無修未是修。道弘包萬象，心不繫絲頭。地魄騰空躡，天魂海底收。此般真至寶，不悟一生休。

能悟之者，可傳聖道。

能悟真常之道者，攝群心而同歸一體，變化無窮，出入無礙，可明聖道矣。頌曰：神明天曠骨，月照洞淵深。剖出荆山玉，揮開滿藏金。自然通聖道，方顯本來心。變化無窮測，移神入大音。

老君曰：上士無爭，

太上言：上德之人處於無侶太空，天真妙道，寂然不動，無所爭訟也。頌曰：上士知天命，焉能有所爭？丹田瓊藥放，心地玉芝生。靜室居閑坐，清空任便行。靈童含寶月，神用得精宏。

下士好爭。

執於引教之術，動生人我，競起是非，發於爭訟矣。頌曰：下士好爭

強，功名自顯彰。何勞著有相，爭似貴韜光。閉目凝神室，開睛混太陽。自然知古道，心地得清涼。

上德不德，

上德者，注：太始無象，四極淵明，知心無心，故曰上德不德者也。頌曰：上德悟無德，無修解有修。道存圓覺海，神若載天舟。得岸離生滅，辭瀾不再遊。任從空外去，返性入瀛洲。

下德執德。

下德之人執著小乘之術，施為政事，德而落空，是名不德。如此之見，永離真道矣。頌曰：下德施功果，徒勞有相求。滯空沉妄想，執幻落陰囚。太始無名號，玄元有所修。迴陽如見日，神炁自和柔。

執著之者，不名道德。

道者，無為清淨，空寂湛然也。德者，神通萬變，體用居常也。道德混純，其理皆一也。執著者，執著種種有為之功也。頌曰：執礙法非通，虛勞謾費功。有為迷假相，無作契

真空。恍惚乾坤象，杳冥天地蹤。上清施大道，神用在其中。衆生所以不得真道者，為有妄心。

不得真道者，為人執著種種引教之術也。妄心者，為取小法，施為政事，常存於妄想之心也。真道者，通變無方，應用不離，至神至聖，其理自然，非為執見，不以妄心，是名清靜，斷除邪見也。頌曰：大道非空遠，都緣翳膜遮。離微翻聖智，逐物返妖邪。心靜俱無礙，神清豈有差。一輪炎日瑩，照破洞雲霞。

既有妄心，即驚其神。

既驚其神者，既有妄心，眼見心移，神不居妙。經云：常無欲以觀其妙，常有欲以觀其微。既觀其微，即驚其神也。頌曰：不悟本元神，何言身外身。妄緣生嫉妬，逐念起貪嗔。永失玄元道，常迷太古真。雖然明日月，滿眼是紅塵。

既驚其神，即著萬物。

不居其妙所，觀其物迷沉顛倒，滯於邊微矣。頌曰：生死因矜泰，輪迴

為有情。妄緣心失理，繫物道難成。離欲觀空瑩，歸真眼界明。周行無障礙，心上坦然平。

既著萬物，即生貪求。

萬法不明，萬物所拘，繫物生情，貪愛無休歇也。頌曰：即物轉貪求，迷情甚日休。利名心未罷，財色意中收。念念依他起，熙熙不自由。一生虛過了，爭覺悟清眸。

既生貪求，即是煩惱。

貪求不止，煩惱憂苦，返歸殃咎矣。頌曰：貪愛六根深，情迷入罪林。憂愁宜早撥，煩惱莫交侵。清淨修身命，無為鍊本心。定睛觀昊景，物外見清音。

煩惱妄想，憂苦身心，

身受有為，勞而無功，身苦心惱，性亂神散矣。頌曰：貪心馳劣馬，縱意任猿猴。妄想生顛倒，憂煎苦用求。神昏著物相，性昧逐淪流。背覺靈明體，迷沉萬劫休。

便遭濁辱，

身心憂苦，混濁於恥辱，稟於錯亂之

人也。頌曰：邪姪身受觸，濁濫味心情。睽目扶清粹，舒眉轉碧睛。張羅天地秀，豁落太淵清。混合乾坤象，陽精萬派明。

流浪生死，

心滯於物，返正歸邪，生死流浪。頌曰：生死何時了，輪迴甚日休。但依清靜理，好把自心修。遇夜開星月，終朝抱日頭。滿空昕寶鑑，遍照大神洲。

常沉苦海，

悟者為覺海，迷者為苦海。常沉者，迷昧真源，常沉苦海矣。頌曰：心欲情無底，身如破漏舟。水深難出離，岸闊怎生收？生死隨波浪，輪迴逐境流。迷沉歸苦海，性命一齊休。

永失真道。

不達至理，亂取施為，多能已勝，馳聘落空之法，永失真道矣。頌曰：不論真常道，剛尋有所為。性迷終不定，心亂轉生疑。上善如清水，靈源似渺瀰。金泉高泛漲，溢滿照天池。

真常之道，

真常者，日用而虛化，故言常道矣。頌曰：神用至真常，明知道德鄉。玉爐收白雪，金鼎聚紅霜。地裂明心印，天開睽性光。靈童歸海藏，獨卧水晶堂。

悟者自得。

自得者，不修而修，不為而為。悟者目隱玄機，明開妙道，通現真空矣。頌曰：斂意轉睛瞳，自然見法身。運天明日月，叩道照乾坤。翕耀龍珠燦，煌輝琥珀殷。玉嬰眠寶殿，瑩淨絕紅塵。

得悟道者，

得悟者，為明開道眼，了達無為也。頌曰：知玄通古道，得悟了真常。鬱秀繚空野，氤氳滿太蒼。日魂光雪瑩，月魄照銀霜。放出神光燦，圓明入故鄉。

常清靜矣。

天清垂象，地靜安寧。人能清靜，神契大道，守一居常矣。頌曰：意靜覺心清，風臨對月明。滿天珠露降，

大地水銀平。玉戶明金子，金門現玉嬰。撞開天斗柄，走上太陽星。

仙人葛玄曰：吾得真道，曾誦此經萬遍。此經是天人所習，不傳下士。吾昔受之於東華帝君，東華帝君受之於金闕帝君，金闕帝君受之於西王母，西王母皆口口相傳，不記文字。吾今於世書而錄之。上士悟之，昇為天官；中士悟之，南宮列仙；下士得之，在世長年，遊行三界，昇入金門。

左玄真人曰：學道之士持誦此經者，即得十天善神擁護其人，然後玉符保神，金液鍊形，形神俱妙，與道合真。

正一真人曰：人家有此經，悟解之者，災障不干，衆聖護門，神昇上界，朝拜高尊，功滿德就，相感帝君。誦持不退，身騰紫雲。

太上老君說常清靜經註

(丁培仁點校)

005 太上老君說常清靜

經頌註

神峰默然子著

經名：太上老君說常清靜經頌
註。神峰默然子（金朝道士劉通微）著。一卷。底本出處：《正統道藏》洞神部贊頌類。

太上老君說常清靜經頌序

夫源清流靜，湊法海之波澄；蒂固根深，抱純陽之炁運。盈虛消息，六合周流。原天地眈兆之由，探陰陽樞機之要。夫人者委形於天地，惟清靜自然之歸；混炁於陰陽，具變通真常之化。清者，撓之而不濁；靜者，安之而不動。天得一清，地得一寧，人得一靈者，一神也。若是靈源湛徹，聖道流通；寂然不動，應化無方。感而遂通，

生成何已。天地有斯常性，清靜無餘；男女無此常心，昏迷有屬。孰能濁以止，靜之徐清而已及矣。故我太上垂大慈悲，演常清靜，設教導俗，輔正扶宗，務化民以歸根，使含真而抱一。體洽玄元，煉神合道，羽化飛仙，不為乖謬。庶幾信受者體樞法要，皆可相應，人莫非清靜以為天下正，乃至千真萬聖，咸不出於此矣。

太上老君說常清靜經頌註

五太初為先，虛無道自然。混元權祖正，妙體契宗玄。演教明無上，知常假喻詮。因斯清靜德，闡化立經篇。

老君曰：大道無形，生育天地；

大道隱乎形，真精混窈冥。二儀分始兆，一氣運無停。覆載誠難測，生成育底寧。陶甄能匠物，蠢動盡含靈。

大道無情，運行日月；

日月運虛空，明明甚至公。得天能久照，麗物可咸通。有質蒙光煦，無情混象融。陰陽常體道，不息太無中。

大道無名，長養萬物。

妙道實難名，包含萬物生。運時充地脉，任信稟天清。吹煦真消息，沖和大化成。圓通歸一體，高下坦然平。

吾不知其名，強名曰道。

無相杳無蹤，離名混沌中。未萌天地日，安得雨雲風。鑿破胚腓兆，衝開物象蒙。因斯分造化，權立道無窮。

夫道者，有清有濁，有動有靜。

清濁陰陽氣，周流上下衝。自然成感化，終則契圓通。萬類含滋育，三元配合同。乾坤交泰定，都會一真空。

天清地濁，天動地靜；男清女濁，男動女靜。

肇判兩儀分，人靈至貴尊。三才安宇宙，二物定乾坤。種種含真炁，元元實相門。剛柔相濟用，體道孰能存。

降本流末，而生萬物。

降本通真體，還元見末因。春陽敷茂暢，秋候主凋淪。太極生形化，純和造物新。樞機推大運，掌握任功神。

清者濁之源，靜者動之基。

清靜理幽深，誰能究竟尋。觀空除萬境，絕相了諸心。慧月流丹漢，慈

雲覆翠岑。寂然神不動，應物顯知音。

人能常清靜，天地悉皆歸。

人悟常清靜，知源妙聖機。太初無染滯，全寂隱光輝。默默藏沙界，昏昏徹紫微。三元昇降後，天地悉皆歸。

夫人神好清而心擾之，人心好靜而欲牽之。

心者靈之府，神棲靜可安。貪嗔癡易作，戒定慧難觀。深要正中正，堅持閑內閑。常無生六欲，法界自然寬。

常能遣其欲而心自靜，澄其心而神自清。

若遣諸情欲，澄心妙洞觀。同真非物物，歸寂棄般般。水遠連天靜，山高戴月寒。圓融通智慧，壺內袞金丹。

自然六欲不生，三毒消滅。

正念無偏黨，沖虛合自然。六根塵頓息，三毒病須痊。妙道超空劫，全神達上天。些兒幽密處，玄牝自綿

綿。

所以不能者，為心未澄、欲未遣也。

迷路失家鄉，都緣昧已光。心浮誠易動，境熟為難忘。欲染何能遣，邪奸轉使荒。回頭堪悟處，返照見空王。

能遣之者，內觀其心，心無其心；

覺了諸塵漏，分明道眼開。色聲非有礙，知見定須埋。神靜千災滅，心虛萬慮灰。清風穿玉戶，自有好音來。

外觀其形，形無其形；

諸相觀非相，其形是種無。內含真法界，體合大空虛。雲靜蟾光露，潭澄練色鋪。此般明顯示，何在覓殊塗。

遠觀其物，物無其物。三者既悟，唯見於空。

寂照觀諸物，群靈豈有殊。同真非可見，絕迹莫能模。了了堂中老，休休法外无。玄玄玄也泯，八極任寬舒。

觀空亦空，空無所空。

廓達真空界，迴觀一物無。混融同太漠，湛寂體虛無。洞照音常寂，圓通性自如。中間并內外，不屬返元初。

所空既無，無無亦無。

達了心無物，無無實亦無。何勞除妄想，豈在辯精麤。緣靜虛施巧，歸真任不渝。這般消息密，孰敢強名模？

無無既無，湛然常寂。

萬法本來空，無無合聖功。湛然非內外，寂爾泯西東。心境雙忘處，方圓一槩同。杳冥超造化，無物悉皆通。

寂無所寂，欲豈能生？欲既不生，即是真靜。

假寂權為體，還當去欲因。妄緣如是息，真靜自然新。契合無生法，方知不夜春。獨超天地外，任意燕申申。

真常應物，真常得性。常應常靜，常清靜矣。

一定達真常，神光莫可量。照開三

毒室，射透五明堂。寶月晴空露，迷雲蘊迹亡。清風布消息，應物任舒張。

如此清靜，漸入真道。既入真道，名為得道。

曠劫鎮圓成，無暗亦無明。谷神常自寂，法海晏然清。正念投真路，澄心達妙程。永離生死繫，三界任寬行。

雖名得道，實無所得。

了寂沉聲迹，深通至理幽。真空寧有得，實相本無修。飲啄從他過，威儀任自由。豁然除擬議，安靜保全周。

為化衆生，名為得道。能悟之者，可傳聖道。

為證衆生化，俱忘種種求。頓超無漏果，寧許有根由。取捨安能動，因緣亦斷流。瞥然都放下，聖道可傳留。

老君曰：上士無爭，下士好爭；

上士何無爭，勤常抱志堅。棲真常淡泊，養素隱幽玄。俯仰觀天理，窮

通達道淵。堪嗟未明者，競法昧心田。

上德不德，下德執德。執着之者，不名道德。

德化非求報，恩寬肯自矜。韜光藏大器，明性瑩堅冰。默契高穹遠，深通至道弘。豈同愚士執，分別強談能。

衆生所以不得真道者，為有妄心。

衆生多背道，顛倒外邊求。妄想因斯有，真靈昧了休。本來無欠少，何假強持修。頓拂迷雲盡，銀蟾照玉樓。

既有妄心，即驚其神。既驚其神，即着萬物。既着萬物，即生貪求。既生貪求，即是煩惱。

謀事因生妄，乖真為動神。皆心存愛欲，着物起貪嗔。常蘊無明火，還添煩惱塵。從茲緣受報，六道轉沉淪。

煩惱妄想，憂苦身心，便遭濁辱。

為妄生嗔慾，貪癡作障緣。憂愁長繫絆，煩惱鎮纏綿。為此迷真道，從

斯就業愆。迴光能返照，自覺妙中玄。

流浪生死，常沉苦海，永失真道。

煩惱緣興念，何曾覺自心？茫茫遭苦辱，擾擾肯沉吟。浪死無休息，虛生直至今。因而真道失，夢想轉來侵。

真常之道，悟者自得。得悟道者，常清靜矣。

人若通天地，俱蒙道炁存。藏根深固蒂，滅魄返安魂。得悟長生路，須開久視門。全真神自化，無上法王尊。

太上老君說常清靜經頌註

（丁培仁點校）

006 太上老君說常清靜

經註

都梁參學清庵瑩蟾子李道純註

經名：太上老君說常清靜經註。
元代道士李道純註。一卷。底
本出處：《正統道藏》洞神部玉
訣類。參校本：杜光庭等諸家
注本。

老君曰：大道無形，生育天地；大道無情，運行日月；大道無名，長養萬物。吾不知其名，強名曰道。

纔言可道，即非常道。既不可道，何以名道？咦，只這道之一字，已道了也。視之不足見，聽之不足聞，搏之不可得，用之不可既。惟惚惟恍，不屬聲聞；曰希曰夷，無有定體。若作聲聞，會不足以成；若作定體，求不足以應變。道雖無形，因天地生

育，其形可見；道雖無情，推日月運行，其情可察；道雖無名，窮萬物長養，其名可立。《易繫》云：在天成象，在地成形，變化見矣。非道之形乎？又曰，鼓之以雷霆，潤之以風雨。日月運行，一寒一暑。非道之情乎？又曰，乾道成男，坤道成女。非道之名乎？道本無名，聖人強立名道者，通天下萬變，歸天下之殊途，坦平驀直、大路之謂也。

夫道者，有清有濁，有動有靜。天清地濁，天動地靜；男清女濁，男動女靜。降本流末，而生萬物。清者濁之源，動者靜之基。人能常清靜，天地悉皆歸。

鴻濛未判，動靜之理已存；清濁既分，動靜之機始發。清而昇者曰天，濁而降者曰地。天地一闔闢、一陰陽，互動互靜，機緘不已，四時成焉，百物生焉。天地之性，人為貴，人於物之最靈。男法天，女法地，男清女濁，即天地升降也；男動女靜，即天地闔闢也。天地細縕，萬物化生。降本流末，生生化化，而無有休息。

太上始言無形、無情、無名，天地之始，次言有動、有靜，謂有名萬物之母也。若復有人知此兩者同出異名，則知清濁本一，動靜不二；流雖濁而其源常清，用雖動而其體常靜。清靜久久，神與道俱，與天地為一。

夫人神好清而心擾之，人心好靜而慾牽之。常能遣其欲而心自靜，澄其心而神自清，自然六慾不生，三毒消滅。有道之士，常以道制慾，不以慾制道。以道制慾，神所以清，心所以靜，至道與神炁，混混淪淪，周乎三才、萬物，應變而無窮，至廣大，盡精微矣。苟以慾制道，失道者也。失道之士，欲心一萌，無所不至，權利牽於外，念慮煎於內，心為物轉，神為心役。心神既不清靜，道安在哉？常能制慾則歸心不動，歸心不動則自然澄澄湛湛，絕點翳純清，復其本然清靜之大矣，何慾之有？《易傳》云：山下有澤損，君子以懲忿窒慾，其斯之謂歟？

所以不能者，為心未澄、慾未遣也。能

遣之者，內觀其心，心無其心；外觀其形，形無其形；遠觀其物，物無其物。三者既悟，惟見於空。

太上云：清靜為天下正。所謂正者，至公無私也。惟天理之至公，為能勝人慾之至私。世人所以不能造道者，非不能也，為物慾之所眩也。絕欲之要，必先忘物我。忘物我者，內忘其心，外忘其形，遠忘其物。三者既忘，復全天理，是名大，即良止之義也。《易》云：艮其背，不獲其身；行其庭，不見其人。無咎。艮其背，即內觀其心，心無其心也。不獲其身，即外觀其形，形無其形也。行其庭，不見其人，即遠觀其物，物無其物也。無咎即無欲也。太上云，咎莫大於欲得，即此義也。至於物慾見空，則清靜之天復矣。

觀空亦空，空無所空。所空既無，無無亦無。無無既無，湛然常寂。寂無所寂，欲豈能生？欲既不生，即是真靜。真常應物，真常得性。常應常靜，常清靜矣。

攸攸萬事不是空，一以貫之，終歸元物。此遣慾之要也。以空遣慾，慾既不生，和空亦無。空既無矣，無亦無也。無無既無，湛然寂然。湛寂亦無，是名真靜。湛然常寂者，凝神入空寂也。寂無所寂者，融神出空寂也。所謂真靜，非不動也。若以不動為靜，則是有定體也。有定體，則不足以應變。所以真常應物，真常得性者，動而應物而真體不動也。作如是見者，常應常靜，常清靜矣。

如此清靜，漸入真道。既入真道，名為得道。雖名得道，實無所得。為化衆生，名為得道。能悟之者，可傳聖道。

寂然不動為體，感而遂通為用，是名真靜。至於體用一源，顯微無間，真常之道得矣。得之一字，亦是強名。若謂實有所得，則不足以為道。聖人惟恐世人不知有無相生之理，落斷常邪見，故以得道委曲成全，使其積漸而至頓成也。至於嘿而成之，不言而信，聖道可造也。所謂傳者，不傳之傳也。聖道者，聖而不可知

之之謂也。

老君曰：上士無爭，下士好爭；上德不德，下德執德。執著之者，不名道德。

遵儒書不爭之言，行釋經無爭之行。此一法出於無法，洞觀冥契，是名上士也。下士則不然：下士之心好勝，常自滿自見，是自矜伐，致爭之由也。纔有微善，執為己德，吾必謂之無也。上士返是：上士晦德以謙，自牧不自見，是不自矜伐。夫惟不爭，故天下莫能與之爭。太上所謂上德不德，是以有德，即此義也。執著之者，德尚不明，何以明道哉？衆生所以不得真道者，為有妄心。既有妄心，即驚其神。既驚其神，即著萬物。既著萬物，即生貪求。既生貪求，即是煩惱。煩惱妄想，憂苦身心，便遭濁辱，流浪生死，常沉苦海，永失真道。下士好爭執德，為有妄心，所以然也。古德云：常滅妄心，不滅照心。一切不止之心，皆妄心也；一切不動之心，皆照心也。妄想一萌邪正

分，樞機一發榮辱判。可不勉哉？妄心不止，生種種差別因緣，至於涉穢途、觸禍機、落陰趣，未有不始於妄心也。學道之士，固當謹始，始若不謹，焉得有終？妄念始萌，不自知覺，神為心役，心為物牽，縱三尺之熾盛，為六慾之擾攘，豈得不著物耶？著物之故，貪求心生。既生貪求，即是煩惱，妄想種種相緣無由解脫，至於憂苦身心，便遭濁辱，流浪生死，常沉苦海，永失真道。良可悲哉。所以妄想之心，輪迴之根本也。衆生所以不得真道者，為妄想心不滅，所以然也。

真常之道，悟者自得。得悟道者，常清靜矣。

見在此身，亦從妄想中來。身生而後有情緣，情緣而後有憂苦。妄增緣起，直入輪迴，前無始而後無終者，舉世皆然。惟悟道者照心常存，照破種種緣相皆是妄幻，勿令染著。照心既存，妄心無能為也。久久純熟，決定證清靜身。作是見者，真常

之道得矣。所謂照心者，即天心也；真常者，即無妄也。了悟此心，則有妄之心復矣，無妄之道成矣。無妄所以次復也。《易》曰：復其見天地之心乎。到這裏，纖芥幽微，悉皆先照。至於如如不動，了了常知，至覺至靈，常清常靜。真常之道，至是盡矣，聖人之能事畢矣。

太上老君說常清靜經註

①「真常應物」，杜光庭、侯善淵、劉通微等注本同，白文本作「真靜應物」。

（丁培仁點校）

007 太上老君說常清靜經註

經名：太上老君說常清靜經註。
南宋道士白玉蟾分章正誤，元終南山道士王元暉註。據後記稱，書成於皇慶元年（1312）。書前有序記及圖象數篇（原誤題《清靜經註》）。正文一卷。底本出處：《正統道藏》洞神部玉訣類。

清靜經註〔序〕

大道淵源老氏聖紀

《神霄經》云：妙無天帝出生三炁三寶天君，玄炁天寶君，元炁靈寶君，始炁神寶君，即三清也。玉帝為祖，在太空之元。又云：元始下化為玉宸大帝，居紫玉寶闕，號北極大帝。北極是元始第五

化身。赤明開圖之初，為上清神公；開皇之後，為北陰大帝。平定功成，居中天紫微之庭，望之不動，謂之辰極。或化在星，為天皇帝；在教，曰太上老君；在天，為諸天之主；降世為百王之師。


《混元圖》云：初三皇時化身，號萬法天師。一云通玄天師，又云玄中大法師。中三皇時化身，號盤古先生，亦曰有古大先生。後天皇伏羲時化身，號鬱華子。或曰，女媧氏時化身號鬱密子。地皇神農時化身，號大成子。人皇軒轅帝時化身，號廣成子。少皞時化，號隨應子。顓帝時，號赤精子。帝嚳時，號錄圖子。帝堯時，號務成子。帝舜時，號尹壽子。夏禹時化，號真行子。商湯時，號錫則子。老君雖累世化身，而未有誕生之迹。迨商第十八王陽甲時，分神化炁，寄胎於玄妙玉女，八十一年，暨第二十二王武丁庚辰歲二月十五日卯時，誕於楚之苦縣瀨鄉曲仁里，姓李名耳，字伯陽，謚曰聃。周武王時為守藏史，遷柱下史。至第五帝昭王二十

三年，過函谷關，度關令尹喜。以二十五年，降于蜀青羊肆，會尹喜，同度流沙。至穆王時，復還中夏。至靈王二十一年庚戌，孔子生。至二十七帝敬王十七年戊戌，孔子問禮於老君，退有猶龍之歎。敬王四十一年壬戌，孔子卒。至第三十五帝烈王二年丁未，過秦，秦獻公問以曆數，遂出散關。至顯王八年庚申東遷。至第三十八帝赧王九年乙卯，復出散關，飛昇崑崙。秦時降陝河之濱，號河上丈人，亦曰河上公，授道安期生。前漢文帝好老子之旨，遣使詔問之，公曰：道尊德貴，非可遙問。帝即駕從詣之。帝曰：普天之下，莫非王土；率土之濱，莫非王臣。域中有四大，王居一也。子雖有道，猶朕民也。不能屈，何乃高乎？朕足使貧賤富貴。須臾，公即撫掌坐躍，冉冉在虛空之中，如雲之升，去地百丈餘，而止於玄虛。良久俛而答曰：今上不至天，中不累人，下不居地，何民之有？陛下焉能令余富貴貧賤乎？帝乃悟之，知是神人矣。方下輦稽首禮

謝。授帝《道德》二經旨。成帝時，降曲陽泉，授于吉《太平真經》。漢章帝時，授于吉《一百八十大戒》。安帝時，降劉圖《罪福新科》。順帝時，降授天師三洞經錄。桓帝時，降天台，授葛孝先《上清》《靈寶》《大洞》諸經。魏明皇時，降嵩山，授天師寇謙之新科符錄。大唐高祖時，降羊角山，語吉善行唐公受命符。明皇天寶元年，降丹鳳門，帝親享之興慶宮。又降語田同秀，以函谷所藏《金匱靈符》。又降語王元翼《妙寶真符》。宋政和二年，降華陽洞天，授梁先生《加句天童護命經》。又云：老君無世不出，先塵劫而行化，後無極而常存，隱顯莫測，變化無窮，無為自然，永劫綿綿。陰翊皇度，玄之又玄。普度天人，不可具述矣。

崇真子云：論長生養性之旨，其要在於存三抱一。三者，精炁神也，是名三寶。象川翁曰：精能生炁，炁能生神，榮衛一身，莫大於此，實修真之本也。

混元三寶之圖



譚景昇云：存三抱一者，鍊精化炁，鍊炁化神，鍊神合道，洞妙自然。經云：天有三寶，日月星；人有三寶，精炁神。心之神發乎目，則謂之視；腎之精發乎耳，則謂之聽；脾之魂發乎鼻，則謂之嗅；膽之魄發乎口，則謂之言。動一神，萬神皆動；開一竅，九竅齊開。一關要鎖百關牢，轉身一路真容易。

初真內觀靜定之圖



金丹大道之圖



白玉蟾云：無心之心無有形，無中養就嬰兒靈。學仙學到嬰兒處，月在寒潭靜處明。

傳經證道品



仙人葛玄曰：吾得此道者，曾誦萬

遍。此經是天人所習，不傳下士。吾昔受之於東華帝君，東華帝君受之於金闕帝君，金闕帝君受之於西王母，西王母皆口口相傳，不記文字。吾今於世，書而錄之。上士悟之，昇為天官；中士悟之，南宮列仙；下士得之，在世長年，遊行三界，昇入金門。

左玄真人曰：學道之士持誦此經者，即得十天善神擁護其人，然後玉符保神，金液鍊形，形神俱妙，與道合真。

正一真人曰：人家有此經，悟解之者，災障不干，衆聖護門，神昇上界，朝拜至尊，功滿德就，相感帝君。誦持不退，身騰紫雲。

傳經

蘇上卿云：童子傳經問至人，無心對境永安身。侍經終有風雲日，他日乘鸞步玉宸。

開經

丘長春云：夫人出家，法語有云：上忠君王，下孝父母是也。上不拜

君王，下不拜父母，乃不忠孝也。是自高自貴的言語不合大道，難入仙宗，是自忘本矣。尹真人云：仙經萬卷，忠孝為先。天上人間，方便第一。

知覺

白玉蟾云：桑田成海海成田，一剎那間又百年。撥轉頂門關捩子，阿誰不是大羅仙？

明師

悟真子云：饒君聰慧過顏閔，不遇明師莫強猜。只為金丹無口訣，教君何處結靈胎？

口訣

了真子云：大藥三般精炁神，天然母子互相親。迴風混合歸真體，煅鍊工夫日日新。

行功

了真子云：無功功裏要勤功，功外無功合聖功。鍊得丹田成至寶，任他烏兔走西東。

成道

畢元樞云：一粒金丹何赫赤，大如

彈丸黃如橘。人人分上本圓成，夜夜靈光常滿室。

超凡

陳泥丸云：一載胎生一箇兒，子孫孫子又孫枝。千萬億化最妙處，豈可容易教人知。

入聖

呂洞賓云：獨上高山望八都，黑雲散盡月輪孤。茫茫宇宙人無數，幾個男兒是丈夫？

太上老君說常清靜經註

海南瓊瑄子白玉蟾分章正誤
終南隱微子王元暉註

○无極 大道

太者，無也；上者，極也；說者，開化也。常清靜者，虛無大道，自然生成，三才萬物，古猶今同也。經者，心也，玄之又玄，衆妙之門。

邵子云：天向一中分造化，人從心上起經綸。天人焉有兩般義，道不虛行只在人。

先天大道章第一

太上老君曰：老君註，見前《淵源》。今本無太上二字。

《道德經》云：道之出口，淡乎其無味。視之不足見，聽之不足聞，用之不可既。

羲皇上人云：但識琴中趣，何勞弦上聲？

大道無形，無之始也。生育天地。



待安排，自然而然。

《神霄經》云：空洞無形，神炁為真。神非恍惚，炁非氤氳。神生萬神，炁生萬炁。萬神歸一，萬炁合一。神為道機，炁為道樞，機變樞化，三界乃生。元始祖神，變生萬真；元始祖炁，化生諸天。

大道無情，有之始也。運行日月。



寶淨明，普照無窮。

《晉天文志》云：天圓如倚蓋，地方如棋局。天盤一半在地上，半在地下。日月本東行，天西旋。《漢渾天儀》云：周天三百六十五度四分度之一。天體圓如彈丸，北高南下，形如倚蓋。北極出地上三十六度，南極入地下三十六度。南極去北極直徑一百八十二度弱。其依天體隆曲，南極去北極一百八十二度強。正當天之中。南北二極中等之處，謂之赤道，去南北極各九十一度。春分日行赤道，夏至日行赤道之北二十度，去北極六十七度，去南極一百一十五度，謂之黑道。從夏至日

以後，日漸南至，秋分還行赤道，與春分同。冬至行赤道之南二十四度，去南極六十七度，去北極一百一十五度，謂之黃道。自冬至以後，日又漸北矣，又，月行之道與日道相近，交路而過。半在月道裏，半在日道表。其當交則兩道相合，交去極遠處，兩道相去六度。此其日月行道之大略也。《漢志》云：日行一度，月行十三度十九分度之七。日行遲而月行速也。日本陽也，月本陰也。月不能以自明，資日而後明，故交會於日，則為晦，為朔，其生明為有序焉。是以三日而載生明，因謂之朏。凡八日，月行八十度四分而生明已半，因謂之上弦。十有五而謂之望，蓋與日對望而明也。十有六日而生魄，是陰魄之生而明退之漸也。二十三日而生魄已半，因謂之下弦。二十七日有半，而月行三百六十五度，已及周天之次，而日之行已遠於二十七度。故月復行二日有半，而再會於次辰之朔也。

又云：謂地居中而天周焉。日在地上為晝，在地下為夜。此日月運行之道也。《神霄經》云：混沌既析，梵炁乃張，大為日月，細為星辰。雲房云：日月者，陰陽之精，生成萬物。東出西沒，以分晝夜；南北往來，以定寒暑。朱子云：崑崙大無外，磅礴下深廣。陰陽無停機，寒暑互來往。

大道無名，萬象始也。長養萬物。 二炁

氤氳，萬物化醇。

老子云：無名天地之始，有名萬物之母。《易》曰：地道含弘光大，萬物資生，鼓之以雷霆，潤之以風雨。朱子云：元亨播群品，利貞固靈根。非誠諒無有，五性實斯存。


吾不知其名，強名曰道。○

太極左仙公云：無極者，與大道而淪化，為天地而立根，布炁於十方，抱道德之至淳，浩浩蕩蕩，不可名也。故老子謂之道，《春秋》謂之元，《易》謂之太極。張子謂，由炁化，有道之名。又云，由炁化，有天道、地

道、人道之名。

陳子昂云：仲尼推太極，老子貴窈冥。西方金仙子，崇義乃無明。

造化自然章第二



夫道者，未見炁也有清、陽炁始也。有濁，陰炁始也。有動有靜。陽動陰靜而生三才。天

清地濁，清炁為天，濁炁為地。天動地靜；

○天圓而動，包乎地外。地靜而方，處乎天中。

男清女濁，男動女靜。○乾男坤女，配合相

生。降本流末，而生萬物。○三才生萬物。

《管子》云：虛而無形，謂之道。《漢

律歷志》云：太極元炁，函三為一。

即天地人也。《列子》云：元炁輕清者

為天，重濁者為地，沖和之炁為人。

朱子云：天地之炁合，所遇寒暑、燥

濕、風火勝復之變、之化。故人炁從

之，萬物化生，悉由三炁合散，生化

無窮。悟真子云：道自虛無生一

炁，便從一炁產陰陽。陰陽配合生

三體，三體重生萬物昌。

清者濁之源，○動者靜之基。○

邵子云：無極而太極，沖漠未分。陽動陰靜，只在太極裏。陽動陰靜，循環不窮。太極本體，只在陰陽裏。

釋氏云：水流元在海，月落不離天。

一本作靜者動之基。

人能常清靜，○天地悉皆歸。○

《大洞經》云：人生天形。李少微

云：我即天地，天地即我。劉天師

云：道非欲虛，虛自歸之。人能虛

心，道自歸之。玉谿子云：為甚此

心關大造，只因元自道中來。

全神合道章第三

夫人神好清而心擾之，道本無魔，人心自障。

玉谿子云：自道分為我之元神，我

之元神即大道也。王襄師云：心寧

神靈，心荒神狂。孔子問於老聃

曰：敢問至道？聃曰：疏淪於心，

澡雪於精神。西王母云：聲色不止

神不清，思慮不止心不寧，心不寧兮

神不靈，神不靈兮道不成。

人心好靜而欲牽之。道高一尺，魔高一丈。

天猷真君曰：日月雖明，浮雲蓋

之；江河雖清，沙石混之；人心雖靜，嗜欲牽之。梓潼帝君云：白雲本是無心物，風送悠然出岫中。

常能遣其欲而心自靜，意暢心寬，炁壯神安。

《了真經》云：寡欲心靜，忘情累輕。

老子云：其居也淵而靜，其惟人心乎。《水火真經》云：欲從心起，息

從心定。心息相依，息調心靜。

澄其心而神自清。泰宇生光，魔王束首。

煙蘿子云：澄其心也。心澄神靜，

亂想不出，邪妄不侵，憂患咸消。虛

室生白，惟在澄心也。呂洞賓云：

一日清閑一日仙，六神和合自安然。

丹田有寶休尋道，對境無心莫問禪。

自然六欲不生，三毒消滅。陰魄潛消，陽神

自現。

白玉蟾云：君不見虛無生自然，自

然生一炁。一炁結成物，炁足分天

地。天地本無心，二炁自然是。萬

物有榮枯，大數有終始。會得先天

本自然，便是性命真根蒂。《道德》

五千言，《陰符》三百字。形神與性

命，身心與神炁。交姤成大寶，即是

金丹理。世人多執著，權將有作歸無作。猛烈丈夫能令略，試把此言閑處嚼。若他往古聖賢心，立法化人俱不錯。況能躡直徑路行，一條直上三清閣。虛靖天師云：上士得之能保守，飛昇元是此工夫。所以不能者，財炁亂性，酒色感情。

稽康云：養生有五難：名利不滅，

喜怒不除，聲色不去，滋味不絕，神

慮消散。劉海蟾云：學仙甚易而人

自難，脫塵不難而人未易。

清虛真人云：三歲孩兒也說得，八

十老公行不得。

爲心未澄也，活潑潑、轉淥淥。

《度人經》云：人道者心，諒不由他。

王知遠云：急水上打毬子相似。韓

湘云：波渾性海，雲掩心天。昔馬

丹陽子隱終南山，一日劉處玄至，望

庵外牆而拜。時丹陽知劉心未灰，

隔牆謂之曰：可去河南府參劉仙

姑，去三年後却來。劉即往之。時

仙姑預知其來，盛粧以待之。劉一

見心動，仙姑謂之曰：特試子耳。

除了此心，汝事即了。劉即自悔，乃於洛陽花巷瓦子打坐，日化飯喫。暨三年心灰，覺有所得，遂再見丹陽。丹陽見之曰：可矣。乃授道。今全真派長生劉真人是也。華陽子云：一旦天無風，四溟波盡息。人心風不吹，波浪高百尺。

欲未遣也。耳隨聲走，眼被色瞞。

上元夫人謂武帝曰：汝好道乎？數

招方士，登山祠神，亦為勤矣。然汝

胎性暴，胎性淫，胎性奢，胎性酷，胎

性賊，五者常舍於榮衛之中、五藏之

內。若從今捨爾五性，反諸柔善，常

為陰德，救度死厄，不泄精液，當有

冀爾。曹先生云：二八佳人體似

酥，腰間仗劍斬愚夫。分明不見人

頭落，暗裏教賢骨髓枯。

能遣之者，萬事付之一笑。

魏元君云：休休休，蓋世功名不自

由。黃石公云：絕嗜禁欲，所以除

累；貶酒闕色，所以無污。文子

云：去其誘慕，除其嗜欲。又黃石

公云：朝臣待漏五更殘，鐵甲將軍

夜度關。隱士日高眠未起，筭來名利不如閑。

內觀於心，回光返照，本作其心。心無其心。



莊子云：道為太極。心為太極。又云：心無逆順，即無心也。三茅君云：靈臺湛湛似冰壺，只許元神在裏居。若向此中留一物，豈能證道合清虛？

外觀於形，以道觀之，無貴無賤。本作其形。形無其形。



朱子云：道之為體，其大無外，其小無內。太極左仙公云：體自然而然，生乎太無之先，起乎無因。經歷天地終始，不可稱載。太玄真人云：一點圓明等太虛，只因念起結成軀。若能放下迴光照，依舊清虛一物元。父母生前一切靈，不靈只為結成形。成形罩却光明種，放下依然徹底清。

遠觀於物，若以物觀之，自貴而物賤。本作其物。物無其物。



白玉蟾註《老子》云：道之為物，○

唯恍唯惚。惚兮恍兮，其中有象。

○恍兮惚兮，其中有物。○窈兮冥兮，其中有精。○其精甚真，○其中有信。○自古及今。呂洞賓云：此

中真妙理，誰道不長生？《神霄經》云：上無復神，下無復炁。務成子云：有物先天地，無形本寂寥。能為萬象主，不逐四時凋。

三者既悟，惟見於空。○函三為一，貴乎自然。

《天保長生經》云：遠觀應化無應化，無物也。內觀元神無元神，無心也。

外觀法界無法界，無形也。自然應靜而靜，靜中有神；無中生有，精能生炁。

應寂而寂，寂然而真。空中不空，炁能生神。逍遙子云：不知有此理，只為太分明。

觀空以空，空無所空。○道無象。

許旌陽《石函記》云：翫真空，顯仙蹤，莫言來世再相逢。太愚蒙，休談妙，有說真空說真空。事非同空即是色，色非空，其色花花照耀紅。與君說破我家風，太陽移在月明中。

月明太陽天上藥，人服之時跨鸞鶴。

石杏林云：不知丹訣妙，終日翫真空。

所空既無，無無亦無。○神無方。

《淮南子》云：大丈夫恬淡無為，與造化逍遙。了真子云：大道元來一也無，若能守一我神居。此心瑩若潭心月，不滯絲毫真自如。

無無既無，湛然常寂。○性無體。

《上乘無礙經》云：心生則性滅，心寂則性現。如空無相，湛然常寂。

丘長春云：道德元無象，丹青畫不真。聖賢潛濟物，今古默通神。


寂無所寂，欲豈能生？○炁無形。

老子云：我無為而民自化，我好靜而民自正，我無事而民自富，我無欲而民自朴。悟真子云：善惡一時忘念，榮枯都不關心。

欲既不生，即是真靜。○霧開日瑩，塵盡鑑明。

魏元君云：道生於安靜。昔施肩吾慕道年久，修持無功，夙夜自思，如負芒棘。因覽《三清經》云：夫修鍊

之士，當須入三靜關，淘鍊神炁，補續年命。大靜三百日，中靜二百日，小靜一百日。發志試之以小靜，閉戶不出，克期百日，方出靜室。未踰月，而神光耀目；百日，精神清健；三百日，眼如點漆，膚如凝脂，宿疾普銷，身心輕爽。則知仙經妙訣，言不虛矣。石杏林云：心天無點翳，性地絕塵飛。夜靜月明處，一聲春鳥啼。

真靜應物，圓陀陀，光燦燦。一本作真常應物。

老子云：有物混成，先天地生。劉海蟾云：只明真性不修丹，萬劫應知變化難。王鞅師云：炁止則神聚，神聚則丹成。《石函記》云：夫丹道者，非人間五金、八石、朱砂、水銀之所為也，是元形合虛，曠然虛無，是謂真虛。真虛之體，還丹之基，大藥之母。大藥之母何形容，形容體貌緣何質。質者混成中有物，有物來居象帝先，帝先真虛合自然。真虛自然合色象，色象因神而運轉。


運轉真虛虛不空，不空之妙有神通。丘真人云：丹轉一，冥冥海底生紅日。祥雲煙靄遍三田，種出玄珠如黍粒。丹轉二，炎炎朱雀燒天地。霞光入鼎虎龍蟠，一粒黃芽如犬齒。丹轉三，三才混象結成丹。形容妍醜隨人意，天質生身已造端。丹轉四，蓬壺靈戶常關閉。靜中暗轉長生輪，無限靈光照真子。丹轉五，靈真日日修仙所。重重道炁添光明，還為增長神明主。丹轉六，晝夜河車馳聖軸。靈泉直上崑崙巔，一輪月在瑤池浴。丹轉七，無為光裏藏靈質。主持道炁有真官，千神降福來神室。丹轉八，鍊得胎仙如滿月。同行同坐又同眠，雖在塵中人不識。丹轉九，聖功圓滿胎仙就。已證虛無自在身，此後不須行火候。

真常得性。一靈妙有，三界圓通。

李華陽云：不明真性只究命，此是修行第一病。夫性者，是心如一箇器皿，器中盛得底，如一箇寶珠，珠中光明底，是性。性發現，在胎為

身，在世為人，在眼曰見，在耳曰聞，在鼻嗅香，在口談論，手之運掉，足之舉措，散滿六合，斂之方寸。識者明為真性，迷者喚作精魂。《石函記》云：父母元胎不可論，浩浩生生萬種魂。種孕胎生卵濕化，人獸禽蟲幾萬般。人獸禽蟲各稟性，性命相連魂係命。原夫人與動物，皆稟炁於父，受形於母。潛符天地之理，炁足而生，各正性命。此理甚明。今人言修行人坐化，臨行念差則失身，入別胎殼中。誠可戒也。虛靖天師云：道不遠，在身中，物即皆空性不空。性若不空和炁住，炁歸元海壽無窮。

常應常靜，常清靜矣。

郝真人云：定體無念，慧照無邊，定慧混融，妙用無窮。曹先生云：混合為一復忘一，可與元化同出沒。透金貫石不為難，坐脫立亡猶倏忽。如此清靜，漸入真道。○心性無染，入衆妙門。

漢天師云：虛無大道，清靜希夷，不

染曰清，不動曰靜，不視曰希，不聽曰夷。此四者勤而行之，三年之外方免輪迴。又云：六根清靜，方寸澄徹，久而行之，可以坐役鬼神，呼召風雨。豈可忽哉？薩守堅云：寒潭秋夜月，碧澗水無痕。

既入真道，名為得道。心同虛空，虛空非心。

赤松子云：復性入虛無，凝神入混沌。古云神仙只是凡人做，是名得道。薛道光云：蓬萊三島客，元不在西邊。

雖名得道，顯法不真。

劉海蟾云：實相無相，微妙法門。悟真子云：項後有光猶是幻，雲生足下未為仙。

實無所得。○真法不顯。

視之不見，○無色也。聽之不聞，○無聲也。搏之不得，○無形也。玉谿子云：他心求覓也徒然，不在中間與內外。視之不見聽無聲，廓然瑩徹周沙界。仙經云：窈冥之內，恍惚元真。周紫陽云：如魚飲水，冷暖自知。陶弘景云：但可自怡

悅，不堪持寄君。

為化衆生，名為得道。萬化俱通，道本無名。

淮南子云：至道無為，盈縮卷舒，與時變化。所以太上隨機立教，以顯其道。然萬法千門，終致於一，其名雖異，同出乎心。《六韜》太公曰：夫人皆有性，趣舍不同。

能悟之者，可得聖道。○思曰睿，睿作聖。

張子云：真識根源，謂之知道。朱子云：自古及今，恁地袞將去，只是箇一陰一陽，是孰使之然也，乃道也。邵子云：否泰悟來知進退，乾坤見了識親疏。自從悟得環中意，閑炁胸中一點無。

賢愚見識章第四

太上老君曰：上士無爭，○性天廣大。下士好爭。○慧力無邊。

老子云：天之道，不爭而善勝。仙經云：守道一日，可奪天地一年之正炁。薩守堅云：孤雲長自在，野鶴任縱橫。

上德不德，無為。下德執德。有為。

顏子云：墮肢體，黜聰明，離形去

智。文子云：聰明廣智守以愚，多

聞博辨守以儉。張九成云：貧即無聊富即驕，回心獨爾樂簞瓢。箇中得趣無人會，惆悵遺風久寂寥。西王母云：瞻星禮月，苦己勞形，色見聲求，慕仙療病。《史記》扁鵲云：疾其在骨髓，雖司命無之柰何也。

執著之者，不名道德。逐妄迷真。

《九子丹經》云：人之可保者命，可惜者身，可存者炁，可貴者精。夫按摩導引，服炁餐霞，閉門行炁，御女採陰，存思舉意，絕穀休妻，諸旁門等法。蘇之瞻云：苟非吾之所有，雖一毫而莫取。

應現無方章第五

太上老君曰：衆生所以不得真道者，為有妄心。貪其所愛，不知休息。本無太上二字。

《了心經》云：心為道宗，心為禍本。前真云：夫人身賤羅綺，口飫珍饈，目惑邪色，耳亂鄭聲，所慕者榮華富貴，日就沉溺，焉知天地間有玄妙乎？尹壽子云：迷雲鎖慧月，業風

吹定海。

既有妄心，即驚其神。眼觀心動，耳聽神移。

漢天師云：心生法亂，炁散神離。

曹先生云：此物何曾有定位，隨時

變化因心意。在體感熱即為汗，在

鼻感風即為涕，在腎感情即為精，在

眼感悲即為淚，縱橫流轉炁血中，到

頭不出於神炁。虛靖天師云：神若

出，便收來，神返身中炁自迴。如此

朝朝與暮暮，自然赤子產真胎。

既驚其神，即著萬物。○道生之。

鍾會曰：神炁散而為萬物。老子

云：萬物負陰而抱陽。白玉蟾云：

此道常在萬物內，何物不在此道

中？悟真子云：草木陰陽亦兩齊，

若還缺一不芳菲。初開綠葉陽先

唱，次發紅花陰後隨。常道只斯為

日用，真源返覆有誰知？報言學道

諸君子，不識陰陽莫強嗤。

既著萬物，○德畜之。

尹真人云：善吾道者，即一物中知

天，盡神致命。邵子云：一物其來

有一身，一身還有一乾坤。須知萬

物備於我，肯把三才別立根。

即生貪求。○日日新，又日新。

許旌陽云：吾丹既成，變化自在。

所不足者，上帝之詔未至。於是積

功以期真命焉。丘真人云：丹轉足

愛養，三年防殆辱。濟人利物積陰

功，躡景凌空膺帝籙。

既生貪求，只是煩惱。○十二時中，守滿持

盈。

《黃庭經》云：仙人道士非有神，積

精累炁乃成真。莊子云：不離於

精，則謂之神。雲房云：下手工夫

易堅心，守道難焉自然云。金液還

丹因此識，只在人身休外覓。自有

黃婆匹配伊，金鼎鍊成丹赫赤。自

家修，自家惜，陽日起頭陰在脊。只

此便是水中金，餘外萬般休用覓。

金丹只此百日功，功成永作蓬萊翁。

煩惱妄想，念中境像，夢裏精神。

許旌陽云：靜定棲神，無生雜想。

雲房云：定中見境像繁華，有諸快

樂，皆不得認，乃妄想也。李仙君

云：存神養炁精，清靜心光明。妄

想不虛起，求真道乃成。

憂苦身心，○行住坐卧，如護嬰兒。

王子喬云：心無為而身自安。曹國

舅云：勸君惜取身心。邵子云：身

在天地後，心在天地先。天地自我

出，其餘何足言？

便遭濁辱，流浪生死，貴賤高低，死生平等。

裴清虛云：濁辱者，貪癡也。老子

云：知足不辱。富貴而驕，自遺其

咎。王盤山云：一念無生即無死

也。李華陽云：生死特一炁聚散而

已。郭璞云：死生聚散，變化無方。

玉谿子云：夫人心上有情，性上有

塵，塵情般弄，生死不停。前真云：

不生不滅本來真，無價夜光人不識。

凡夫虛度幾千生，雜在鑛中不能出。

常沉苦海，永失真道。精竭炁亡，炁亡神滅。

《黃庭經》云：一身精神不可失。昔

許旌陽與衆徒弟至一市，今名炭婦市也。

日晚，化炭為衆美女試之。惟時周

等十人無染，盡皆昇天；餘衆皆動

心迷戀，沉於慾海。天明視之，乃炭

也。各知失道，慚愧而散。陰君

曰：莫辭得失，一志而修，還丹可冀矣。安期生云：千日養不足，一旦害有餘。

真常之道，悟者自得。○若向此玄玄裏得。

許旌陽云：夫真常之道者，忠孝為百行之源，方便為萬善之本。水丘子云：不變不妄，謂之真常。《玄帝本傳》云：忠全孝盡，保舉昇仙。《淨明經》云：但願我赤子，孝順長在心。居家奉父母，在朝忠於君。不為貪淫行，泄散精與神。福來如流泉，派派自然明。梓潼真君云：日用常行皆是道，不退轉皆是道。白玉蟾云：平常心是道，不用生分別。廣成子云：至道之精，窈窕冥冥；至道之極，昏昏默默。無視無聽，抱神以靜，形將自正。必靜必清，無勞爾形，無搖爾精，乃可長生。慎內閉外，多知為敗。我處其一，以處其和，故千二百歲而形未嘗衰。得吾道者上為皇，失吾道下為土。將去汝，入無窮門，遊無極野，與日月參光，與天地為常。人其盡死而

我獨存矣。會麼？丹陽子云：一點靈光晃太虛，丹青妙手莫能模。休將明月閑相比，有缺因緣怎類吾？

得悟道者，○此玄玄外更無玄。

莊子云：道在太極之先而不為高，在太極之下而不為深，先天地生而不為久，長於上古而不為老。狝韋氏得之，以挈天地；伏羲氏得之，以襲烝母；維斗得之，終古不忒；日月得之，終古不息；堪坏得之，以襲崑崙；馮夷得之，以處玄宮；禺强得之，以立乎北極；王母得之，坐乎少廣。漢天師得之，三代飛昇，七代尸解；許旌陽得之，拔宅凌空；魏元君得之，位登紫虛；葛仙翁得之，昇仙，其妻尸解，女亦尸解；劉洞天師得之，昇仙，其妻尸解，女亦尸解。此略舉其一二。至於列仙得悟大道者，莫知其終。

常清靜矣。○天地合其德，日月合其明。

尹真人云：但使心長御炁，炁與神合，中既有主，形乃長存。若日月之週迴，同天河之輪轉，壽命無窮無極

也，乃證虛無道，得聖智圓通，隱顯莫測，出有入無，逍遙雲際，昇入金門，形神同妙，與道合真。《中黃經》云：十方彩女執旌麾，百靈列駕玉童隨。前有龍幡後有旗，羽服飄飄上太微。

太上老君說常清靜經終○謹終如始，則無敗事。

說經既畢，末後一句玄妙，怎生道麼？呂洞賓云：道妙玄微，天機深遠。下手速修猶太遲。蓬萊路、三千行滿，獨步雲歸。白玉蟾云：為君說此末後句，末後一句親分付。普為天下學仙者，曉然指出蓬萊路。道本虛無，無中運有。故云妙有，亦曰真空。混茫莫測，奚以經為？然非經則不能明道也。故元始開圖，敷落五篇，真文誕敷，發揚秘密，允為梯筏，溥接衆生。惟《常清靜》一經，實為要妙，還丹大道，至理昭然。夫所謂清靜者，一塵不染，故謂之清，萬緣俱息，故謂之靜。人能常清靜，自然與道玄同，直超彼岸。噫，

世人著種種相，苦惱無邊，雖欲超脫，耽玩此經，徒能誦言，而終莫能悟明其義也。一生狐惑，了無是處。大叙嘗獲紫清白真人《分章證誤》，司馬子微《解註》之本，言言造微，句句明理，實乃修真之指歸。切懼斯文之漫滅，輒繡梓以廣其傳。若遇有眼睛漢，便能徹視玄機，打翻關棧，何異披雲睹皞日、覲面見老聃？既到此際，則又清濁兩忘，動靜惟一，行住坐卧皆清靜也。白雲流水，青山明月，掀髯而長嘯者，無不清靜也。活潑潑地，如盤走珠，豈徒滯於枯木死灰耶？由是為清靜之說。句曲山人王大叙謹識。

《道德經》云：谷神不死，是謂玄牝。玄牝之門，是謂天地根。玄牝，一陰陽也；陰陽，一天地也。《易》乾為天玄，坤為地牝。類此天地之玄牝，人一身一乾坤，命腎左右分陰陽，此人之玄牝。命腎之間其門歟？其天地之根歟？《清靜經》原動靜即是理也。白玉蟾釋經，為作圖像于前，顯

明是義。蓋會此經於方寸，非徒口耳之學也。嘗謂儒者性命之說、釋氏胎息之說、老氏玄牝之說，名雖殊而理實一。第慨夫世之人假儒者之名，心圖進取，託佛老之言，而愚人心福田利益，豈立教之初意哉？觀白玉蟾傳此經若圖，當顏厚汗下，非獨師老氏者。王大叙、史大聞得是經，繡之梓，其志可尚。遂為之書。皇慶初元上已後。金壇四清翁蔣華子敬書。

（丁培仁點校）

008 太上老君說常清靜妙經

妙經纂圖解註

經名：太上老君說常清靜妙經
纂圖解註。元代道士王玠（字道淵）撰。一卷。底本出處：《正統道藏》洞神部玉訣類。

太上老君說常清靜妙經序

竊謂大而化之之謂聖，聖而化之不測之謂神。夫太上老君之神聖，居混沌之始，爲萬炁之宗，變化不可測也。於傳考之，初三皇時爲萬法天師，中三皇時爲盤古先生，後天皇之世爲鬱華子，神農時號大成子。至軒轅時爲崆峒山人，號廣成子，授道與軒轅氏。少皞時化號隨應子，顓帝時號赤精子，帝嚳時號錄圖子，帝堯時號務成子，帝舜時號尹壽子，夏禹時號真行

子，商湯時號錫則子。雖累世化身而未誕生之跡。至商王陽甲時分身化炁，寄胎於玄妙玉女八十一年，至武丁時庚辰歲二月十五日卯時誕於楚之苦縣瀨鄉曲仁里，母攀李樹，從左脇降生，鬚髮皓然，其顏如童，遂以李爲姓，名耳字伯陽，謚曰聃，號曰老子。至周文王時爲守藏史，武王時遷柱下史。見素抱朴，少思寡欲；執古之道以御今之有；隱道不彰，謙德不顯；內則固真養命，外則遠害全身；博古知今，無理不澈。東訓尼父，故有如龍之歎；西化金仙，大地作獅子吼。述《道德》五千言，授之尹喜。歷代變現，以道弘化。爲見世人貪迷不悟，自失元真，故說《清靜經》一卷，爲諸經之首。其言簡而道奧，垂示生死之因，開化玄風，誘人向道，領悟三生之理，不死萬劫之真。余嘗參究其經，未得其趣。近因師點開心，易得造化真常之宗，始識羲皇畫卦之妙，方知孔聖贊《易》之音，究其金仙般若之道，若合符節。夫太上之聖，超生死而獨立，亘今古而無

雙，是以百王取則，累聖攸傳。人或以爲虛無異端之教者，便是非聖人者無法。道本不遠人，人之爲道而遠。人得之者，愚可以智，濁可以清；修之者，石可以金，凡可以聖，出乎三界之外，永爲上仙，豈不玄哉。余以管窺之見，將是經逐節引先聖先賢之語，解註于下，而又纂圖貫通經註，曲暢旁通，一覽澈見，言辭雖鄙，無非直解其義。未敢爲是，其與我同志者鑒諸。混然子王玠道淵叙。

太上老君說常清靜妙經纂圖解註


混然子王玠道淵纂圖解註

太者，無大可謂之太也。上者，無極可極謂之上也。老者，道尊德貴亘古今也。君者，主也，一靈為萬物之主宰也。說者，開化也。常者，真常之道，不變不易也。清者，至虛無體也。靜者，至潔無雜也。妙者，玄之又玄也。經者，天道之常、人之有心也，又言人人共行之徑路也。太上見世人生居劫濁之中，貪著物欲，昧了本初之性，憂道之失也，不得已，故說《清靜經》開化世人，誘引知其本末。言人初生是為赤子，赤子之心未嘗有不善，只因年漸長成，眼中見色，耳中聞聲，鼻中嗅香，舌中知味，貪愛不息，習染漸深，是以情牽欲蔽，與道相違。人若能清其心，靜其性，明其善，復其初，一念不生，諸塵不染，自然清靜，與道合真矣。

老君曰：大道無形，生育天地；大道無情，運行日月；大道無名，長養萬物。道生，自然。

大道者，至虛無體，本無形、無情、無名也。當浩劫之始，已有梵清景三氣，太清、太微、太素，隱而無象，溟溟泮泮，遼廓無光，一混沌而已。渾是陰氣，裏外虛中，有箇乾健不息之理，蟠旋而極，是有一陽初動于中，便生奇耦，分陰分陽，生育天地。清氣上而為天，濁氣下而為地。天地既判，萬物居其中。陰氣出地，而復上昇於天，陽炁從天，而復下降於地，陰陽往來，循環不已。是以日月運行，五炁順布，四時行焉，故能長養萬物。大則天地，小則微塵，無一物不是道之化育。善參究者，反身求之，我身即天地。道雖生我無名，我故名之道也。《道德經》云：有物混成，先天而生。寂兮寥兮，獨立而不改，周行而不殆，可已為天下母。吾不知其名，字之曰道，強為之名曰大。大曰逝，逝曰遠，遠曰反。故道

大是也。



吾不知其名，強名曰道。言道者是誰？


太上言道大沖虛，本無名喚，因不虛立，假形而用。且夫人身之生也渾淪，是箇太極，則天地萬物之道總在我身。心之虛靈，道自歸之。靜為性，動為情。性主乎內，為體；情運乎外，為用。體用一源，顯微無間，乃曰道。道之為言，精氣化形，神虛今妙，豈可以知其名也？若不言道，何以呼之？是不以已，強名稱之曰道也。《道德經》云：道為物，惟恍惟惚。惚兮恍兮，其中有象；恍兮惚兮，其中有物；窈兮冥兮，其中有信。故顏子歎聖人之道曰，仰之彌高，鑽之彌堅，瞻之在前，忽然在後。是以易存無體，神化無方，此之謂也。

○渾淪無象
 迎之不見在首
 吾不知其名強名曰道。故曰
 隨之不見在後
 金丹之體
 象帝之先

夫道者，有清有濁，有動有靜。天清地濁，天動地靜；男清女濁，男動女靜。降本流末，而生萬物。氣化，生形。

夫道之為物，虛而無象，因氣化而有道之名。道生于一，一生于二，二氣感合而生萬物，理自然也。道居天地之先，包含覆載，寂靜無名，乃曰無極之真也。無極之中道因虛極而已，陽發而遂通，無極而太極，是二五之精妙合而凝也。太極動而生陽，靜而生陰。陽清而為天，主於動；陰炁濁而為地，主於靜。天覆於地，地載於天，天動地靜，二氣互交。陽氣先者為陽道，陰炁先者為陰道。《易繫》所謂乾道成男，坤道成女。男體天故清、故動，女體地故濁、故靜。男女相感，陰陽翕暢，泄其真精，降本流末，而生萬物。萬物之生，同此之理，炁質化行，各從其

類，生生化化，則道無不一焉。孔子：君子之道，造端乎夫婦，及其至也，察乎天地。是以順則生人、生物，逆則成佛、成仙。周子作《太極圖》，深得其旨矣。是故斯經尊妙，只此數語，已了一本《周易》。以丹道言之，天地喻爐鼎，男女喻坎離，以乾剛運陽火不息，乃曰天清、男動；以坤柔退陰符而混藏，乃曰地濁、女靜。因陰陽有動靜之機，故用抽坎填離，返本還源而復道，是降其本而流其末，生養吾身之萬物也。有何疑哉？




清者濁之源，動者靜之基。返本還源。

清者，元陽祖氣也；濁者，幻形陰氣也。動者，陽之靈也；靜者，心之地也。言人之生也，四大一身皆屬陰，唯有此一點元陽祖氣在人身天地之正中，乃曰命蒂。有蒂則有根，根深

而蒂自固，精乃為根，氣乃為蒂，神為根蒂之主靈。達斯理者，可以全真，自然精全而能化氣，氣全而能化神，神全而能化虛，虛空獨立而無死生。當作丹之用，以性內運，以情外移，乃曰清者濁之源。以戊己二土攝回十方之氣而臻靈，乃曰動者靜之基。此妙存乎口訣。




人能常清靜，天地悉皆歸。心要在腔子裏。常者，平常也。清者，萬緣頓息也。靜者，一念不生也。言人能於每日平常二六時中行住坐卧，收其放心，存其良心，內不出，外不入，一心空澈，唯道為身，自然悠悠不生，神自清而氣自靜，性自住而命自停，則天地之道總歸於我身矣。孔子曰：道也者，不可須臾離也，可離非道也。又語云：君子無終食之間違仁，造次必於是，顛沛必於是。堯授道與舜曰，惟精惟一，允執厥中，是也。



夫人神好清而心擾之，動念即乖。


神者，人身中之元神也。神為萬物至靈，虛含洞妙。自曠劫至今不曾添些，不曾減些，本無其清，亦無其濁，是自然之妙也。白紫清真人曰：此神非是思慮神，乃與元始相比肩。大則包地包天，小則藏諸一粟，朗朗澈，豈可以有好清也。若以神思神，便非神也。何況神去好清，却不知被清字縛住，則心地愈生雜念，擾之不寧也。《道德經》云，其出彌遠，其知彌少，是也。



人心好靜而欲牽之。法出好生。


心即神也，神即心也。欲者，私念也。牽者，引去也。言人之良心本

來空寂之妙，不動不靜，非思非言。一法不立，萬法昭然，有何靜可好？達磨曰：不思善，不思惡，只恁么地。孔子曰：喜怒哀樂未發謂之中，發而皆中節謂之和。中也者，天下之本也。和也者，天下之達道也。是以聖人得心法相傳，故能安心如是，渾然天理，無有罣礙也。人雖有賢哲之資，不得真師口訣，則心無棲泊之地。存之則有，不存則無，只是把捉其心，私意揣度。聖人之道亦以其心好靜，被靜縛住，却不知衆欲已牽引良心出於萬里之遠矣。豈聖人三返回靈，復其見天地之心也哉。於此宜玩味。




常能遣其欲而心自靜，澄其心而神自清，自然六欲不生，三毒消滅。克己復禮。六欲者，眼、耳、鼻、舌、身、意也。三

毒者，貪嗔癡也。人身之中有三尸之神，其名曰彭瑯、彭躡、彭躑，是為三魂。人有念頭不正者，魂神即令人馳聘錯亂，貪著邪淫，入於鬼道，喪本迷真。《度人經》所云，鬼道易邪是也。世人若能解悟四大一身，是地、水、火、風假合而有此幻形，到頭終有敗壞，睹其萬物之有形者，無不同此之理，我則從今不貴其物，唯究一心。心為一身之寶。心是地，性是君，君來心地上居住，主宰萬機，常存淵默之真。此靈不隨世變，一切物欲盡能遣之，自然心自靜而神自清，六欲不生而三毒自消滅矣。《道德經》云，聖人為腹不為目，故去彼取此，是也。



所以不能者，為心未澄、欲未遣也。自家


人生天地之間，風土不同，則命稟各有殊異。性非不靈也，蓋因受氣之濁性，天常如黑雲之蔽，所以眼見、耳聽、鼻聞、舌味，對境觸物，隨窮所漏，放其心而不知返也。元神昏散，故不能復其本真，而自墮冥劫者，乃為心不能澄也，欲不能遣也。



能遣之者，內觀於心，心無其心；外觀於形，形無其形；遠觀於物，物無其物。三者既悟，唯見於空。虛靈不昧。

此一節言學人能直下悟見，絕欲清源，立志如山之不動，雖傍柳隨花倚染於我，內則觀於心，心亦忘也；外則觀於形，形亦忘也；遠則觀於物，物亦忘也。既悟三者都忘，唯見吾身中是一箇太虛，清清明朗，廣大無邊，不知天地為我，亦不知我為天地。行功至此地位，方見其空之妙。是謂案非可象，物非可物。《道德經》云：視之不見，名曰夷；聽之不


聞，名曰希；搏之不得，名曰微。此三者不可致詰。《易·艮卦》云，艮其背，不獲其身；行其庭，不見其人，是也。



觀空以空，空無所空；虛無生有。所空既無，無無亦無；大道無形。無無既無，湛然常寂；神氣合一。寂無所寂，欲豈能生？易相無體。欲既不生，即是真靜。與道合真。

此一節乃承上云，三者既悟，唯見於空，恐人著在頑空上存意，故於此發明觀空以空，空無所空，乃謂要人活潑潑地，當性天無欲之時，吾以觀其妙；有欲之時，吾以觀其微。《道德經》所謂此兩者同出而異名，同謂之玄也。所空既無，無無亦無者，此言既得復道還空，空清氣朗，廣大虛含無際，實無象之可觀也。無無既無，湛然常寂者，此言既得一切忘盡，則


吾身自然真一常存也。寂無所寂，欲豈能生者，此言性非死寂，我但隨機應變，無住於相，如是降伏其心，欲豈能生也。欲既不生，即是真靜者，此言勤行符火之道，已得梵氣臻靈，結成金胎聖賢，陰濁消滅而真道純陽，打成一片，客塵自不相干，智慧發現，性剛潔如山之鬼然，真靜不搖也。到此田地，方是超凡入聖，與天齊年，豈虛語哉。



真靜應物，應物無染。真常得性。一念不生。常應常靜，萬緣頓息。常清靜矣。智慧圓滿。


此一節承上云，欲既不生，即是真靜，故次之以真靜應物，真常得性。所謂聖智圓滿，性自真靜。凡物之來，隨物轉應，如盤走珠，圓陀陀地，

轉漉漉地，則此心坦蕩無礙，自然應物無染而得性矣。《道德經》云：夫物芸芸，各復歸其根。歸根曰靜。復命曰常。知常曰明。不知常，妄作，凶。《金剛經》云：不應住色生心，不應住聲、香、味、觸、法生心，應無所住而生其心。尹喜真人曰：凡物之來，吾皆應之以情，而不對之以心。孔子曰：君子素其位而行，不願乎其外。以此言之，豈不是常應常靜、常清靜矣。




如此清靜，漸入真道。道者以誠而入。

此以下為化衆生向道，或有愚可以智，濁可以清，豁然頓悟種性者，故告戒如此清其心、靜其性，不與萬緣作對，只恁麼修去，革其舊染之污，而日新其德，自然漸入真道矣。



既入真道，名為得道。我即元始。


此承上云漸入真道，乃謂學者已得覺性之理，於未得師授口傳其秘，於此故啓喻既入真道，名為得道者，此言真道非是聰明廣記，口須三昧講說之道，實乃是身中三真三全之妙，必拜真師，耳畔一語，直下安心，方入真道。養性不失其中，修命而運橐籥，不失其節，自然性命混融，金液流注，是故名為得道也。



雖名得道，實無所得。本來空寂。

此承上云名為得道，恐學人明理未澈，著在得字求想，則道反背矣，故次之以雖名為得道，實無所得，直欲學人參須實參，悟須實悟。夫道之為物，大象無形，大音希聲，大方無隅，實無名喚。人身四維上下纔著一處存思，便不是也。又不可離了此身，向外別求。不可思，不可議，亦非動，亦非靜。一體萬殊，萬殊一

體。頭頭物物，總皆現前到這裏，轉得一語，則鐵壁銀山，驀直透過，方是得道。得之無得，不被相惑，但吾一靈真性覺照，常居象帝之先，朗朗分明處，乃曰真得。正丹家所謂不見中親見，見中不見；不聞中親聞，聞中不聞。透得這箇破，參學事畢，何得之有？



為化衆生，名為得道。能悟之者，可傳聖道。一以貫之。

化者，開發也。衆生者，貪著之人也。此結前云如此清靜，漸入真道。太上以謂天下人物之多，聖凡混雜，是種性難見，其中豈無有根器者，故以道曲折引喻，開化其理，或有利器之人聞吾此說，直下悟見，即得頓脫根塵，唯道為身，向我道中參究不怠，勤而行之，乃曰為化衆生，名為得道。得之為言，本無所得，但為他人說此得字，誘衆人必是將心想道

而不忘也。《道德經》曰：善人不善

人之師，不善人善人之資。是以人本具，無不與我同性，只因貪著其事，乃名曰衆生。若能真箇領悟者，皆可以傳於聖道也。如六祖盧慧能本廣東獠，一聞客人誦《金剛經》，至應無所住而生其心，言下大悟。次後竟至馮母山拜見五祖，問其由，答言如湧泉。故見其根器大利。恐人謀害，叱令舂碓，人不為意。後五祖故令大衆作偈，能明心見性，見即付之衣鉢。衆皆讓首座神秀作偈，神秀述偈四句，未盡其善。惠能一聞，即次其韻曰：菩提無有樹，明鏡亦非臺。本來無一物，何處惹塵埃？五祖暗點頭，約其夜半付中堂，以袈裟圍繞其身，將《金剛經》誦至應無所住而生其心，於此印傳心法，授與衣鉢，而復送之過江，遂為一代祖師。此所以人不可以形觀，當以志看。如馬丹陽度任屠，始則為凶人，一旦醒悟，即為善人。以此論之，豈不是能悟之者，可

傳聖道也歟？




太上老君曰：

此名太上者，乃真人稱述之辭。前之所言道也，於此以下又起箇名喚，所言者德也。《道德經》所謂德者同於德，失者同於失，故有上士、下士之不同也。學者宜具隻眼看。

上士無爭，下士好爭；各見不同。

上士者，聖人大德之謂也。下士者，賢人執著之謂也。聖人之心，渾同天理，無分賢愚皆包之，和光混俗，與衆同塵，謙躬處於卑下，銼銳埋鋒，不露圭角。善者善之，不善者亦善之。行不言之教，處無為之事，與人無辯無爭，乃曰上士也。賢人之心有所執著，以謂人之學皆不如己之學，自是自彰，自矜自伐。論其古之賢哲，則謂其曰長，某曰短；論其今之人，孰曰是，孰曰非。成仙成佛之聖，猶非其虛無寂滅異端之學如


是好爭，乃曰下士也。尹喜曰：聖人龍之，賢人蛟之，龍能化蛟，蛟終不能化龍，此之謂也。



上德不德，下德執德。執著之者，不名道德。謙德者全，執德者偏。

上德者，無為之道也。下德者，有為之道也。執者，執著不通之謂。德者，得也。心之所蓄，性之混融，開物成務之理也。此言上德之聖人未嘗顯己之有德，藏身潛迹，抱朴含光，專氣致柔，如嬰兒也。下德之賢人執著其事，唯於世情是非，得失之場理論，揚於己德，以被聰明所蔽，故分其彼此貴賤、高低，如是執著，故不明其有道德也。《道德經》不云乎：上德不德，是以有德；下德不失德，是以無德。上德無為而無以為，下德為之而有以為。故太上所謂我有三寶，保而持之，一曰慈，二曰儉，三曰不敢為天下先。孔子


曰：聖吾不能，我但述而不作，信而好古，竊比於我老彭。默而識之，學而不厭，誨人不倦，何有於我哉？終不曾言自己之有德。以此言之，豈不是上德不德也。下德執德之人，著形所見，其於政事、文章、詩詞、方術有能其一者，便自高大、誇逞其能，執著一偏之見，豈可以明道德也。以堯舜之聖，善與人同，以大禹之明，聞一善言即拜，何嘗執著？學人宜於此詳味。



太上老君曰：衆生所以不得真道者，何以故？爲有妄心。求生之厚。


此一節又題太上之名者，乃真人稱述，警戒世人，於此著眼看衆生所爲之事。所謂衆生者，乃愚昧貪著之人，形須人身，心實乃是獸，性海黑暗，逐浪貪生，全無一分德行。上不畏君王之法，下不惜父母之身，盜竊

奸欺，靡所不至。所以不得真道者，爲其有妄想之心，私慾交蔽，則道愈失之矣。《道德經》云：大道甚夷，而民好徑，朝甚除，田甚蕪，倉甚虛，服文彩，帶利劍，厭飲食，財貨有餘，是謂盜誇，非道也哉。又云：民不畏威則大威至。無狹其所居，無厭其所生。夫唯不厭，是以不厭。如是之徒，至死不悔，其心猶念未足，輾轉作下輪迴種子，皆由一箇妄心迷失真道也如此。




既有妄心，即驚其神；被他欺下。

此承上云，因眼見於色，神即領受在心；心既領受，遂起妄念，本身元神化為識神；神隨境亂，意逐情迷。《道德》云：所謂馳騁田獵，令人心發狂；難得之貨，令人行妨。是以即驚其神也。皆因心君不能為主，被色相眩惑，耗散其真道，則夢寐亦不安寧也。




既驚其神，即著萬物；衆欲交攻。

此言神想於物則心地自不安神，故有驚見一物而著愛於物，被物牽引放縱，不知其鄉，是以著萬物而不知其厭足也，舍身履險亦不知危也。



既著萬物，即生貪求；認賊作子。


此言神著萬物，蔽隔真性，隨陰魄之營。營則流情，落於醉生夢死之場，貪求入於愛河欲海之地，無休無息，萬緒千頭，則終身不救也。



既生貪求，即是煩惱。自詞枷帶。

此謂貪求乃入邪道之源矣。今日貪求，明日貪求，見之者即貪，聞之者


即求。每日種種所得，而心終不知止，却不知已造下煩惱根業，家雖豐足而生賊盜，百計千謀，心放不下。古人所謂財多累身，所以被他縛住，添箇煩惱，而禍起隕身，因自取之也。



煩惱妄想，憂苦身心，便遭濁辱，流浪生死，常沉苦海，永失真道。著形害了。

此一節總結上云，衆生為有妄心，不得真道之故，舍死貪生，作下煩惱種子。衆生之為心，唯求利以厚其生，只圖目前家道豐富，沉滯色聲香味之場，迷惑有無愛欲之趣，是自取於煩惱妄想，憂苦身心。平日所為，不忠不孝，欺天瞞人之罪，鬼神暗錄其尤。一旦天災罪己，禍害刑身，或陽報其惡，或陰罰其愆，是以遭於濁辱，流浪生死，一靈不知，所自化生，異類之中，百千萬劫，難獲人身，常沉苦海，永失真道也。世人若能回


頭鑒此為戒，早參至道之宗，免墮輪迴之苦，聖人豈欺我哉？



真常之道，悟者自得。得悟道者，常清靜矣。與太虛同體。

真常者，不生不滅也。無始劫來只恁麼也。悟者，覺悟此理也。自得者，親聞見也。清靜者，湛然無染也。此言人能覺悟自性，本來圓成，不假修合。始因氣化，結形真靈，入殼被形，所罩靈性，於此隨氣質發現。故聖賢愚之不同，雖大智不能無下愚之心，然下愚不能無上智之性。此所以要悟要修。悟者，性也；修者，命也。性命雙修，方是自得真常之道。既得性命混一，道大沖虛，吾心自然清靜，無有往而不知，無有來而不應；內則了證死生，外則能盡人事。此乃總結斯經一篇首尾之妙。前言曰道，後言為德，實發《道德經》五千言之骨髓，直欲世

人明此道德之理，明道者不有德，乃曰上士，執道者不失德，乃曰下士，安心貪求者乃曰衆生。故此經末言真常之道，悟者自得，乃太上好生，慈憫衆生之苦，多方曲喻，令人早早回頭，領悟此道。或有豁然貫通悟見者，即得常清靜矣，豈不玄哉？



太上老君說常清靜妙經纂圖解註

真人讚

仙人葛玄曰：吾得此道者，曾誦此經萬遍。此經是天人所習，不傳下士。吾昔授之於東華帝君，東華帝君授之於金闕帝君，金闕帝君授之於西王母。西王母皆口口相傳，不記文字。吾今於世書而錄之。上士悟之，昇爲天官；中士悟之，南宮列仙；下士悟之，在世長年，遊行三界，昇謁金門。

此章乃仙翁葛玄讚太上說經之妙，此經非是文字之經。自曠劫至今，不生不滅，不增不減，爲道之徑路也。人身玄關謂之經，行道工夫謂之誦。誦非口誦，乃用乾坤闔闢之機關，運坎離顛倒之妙用。昔仙翁感授道之後誦萬遍者，行此道也。萬遍乃工夫，行運不絕，綿綿若存也。得其一粒黍米之珠，落于黃庭，結爲空氣金胎，如母之育嬰，兒神澆灌，十月胎完，天門迸破，陽神出現，千變萬化，乃曰真人。是此經之功

德，大不可思議，天人所習之文不可輕傳於下士也。傳道傳經，傳之有德忠孝之人。輕傳之者，必遭天譴。張紫陽三度非人，三遭天譴是也。仙聖每每隱秘此經，唯以口口相傳，不記文字，恐天魔之泄慢。因後人不及古人純朴者多，若不以文字開化，則衆生何由而悟，不得已筆錄其經，傳流于世。上士悟之者，勤功修證，昇爲金闕之仙；中士悟之者，久久修證，乃爲南宮之列仙；下士悟之者，亦爲地仙，在世長壽，隱顯莫測，可以遊行三界，昇謁金門也。

左玄真人曰：學道之士持誦此經者，即得十天善神擁護其人，然後玉符保神，金液鍊形，形神俱妙，與道合真。

仙翁重讚此者，老婆心功，剖露是經之祕，實金丹大道之宗，學道之士者，乃誘後來學仙之人也。所謂持誦者，信受奉行之也。十天者，流戊就己，戊己二土各五，共成十數，乃曰十天也。玉符者，符火也。金液者，神水也。當其一陽初動之時，便

以神歸炁，炁歸竅，沉下海底，去抱出日頭來。是持誦此經也。流戊土，迫逐金精，上昇南宮，繼此後用己土斂陽退陰符，同歸坤中之位，乃曰即得十天善神擁護其人也。神安隱，鎮氣發火，沖逼出其身玉漿金液流注，乃曰然後玉符保神、金液鍊形也。形曰命，神曰性，性合一乃曰道。故言形神俱妙，與道合真也。若以世法言，凡有道之人，自有十天善神長擁護其人，豈虛言哉？《道德經》云：入甲兵不被刀刃，入虎兇不被爪牙，是也。

正一真人曰：人家有此經，悟解之者，灾障不干，衆聖護門，神昇上界，朝拜高尊。功滿德就，相感帝君。誦持不退，身騰紫雲。

此篇乃祖天師張道陵稱讚之詞。所謂人家者，非人家之家，乃指人身正中之心也。此經者，即寶珠也，寶珠即道也。悟解者，親得見聞之妙，理當鉛見癸生之時，懸寶珠於空中，去地五丈，飛輪旋轉諸天星宿，盡入珠

口，化煉為丹，此真悟解也。既得丹凝成片，浩氣純陽，自然灾障不干，乃得諸天衆聖暗加神護其身。是以一身萬神也，一氣萬氣也。丹成之日，脱胎換鼎，移神上居泥丸玉山上京之上，而有三清所居，則吾身朝謁高尊，直待功成行滿，乃感帝君而錄籍。身常清靜，潔戒精嚴，行此道誦持不退者，自有天頒勅詔，來徵身騰紫雲，而白日飛昇天闕也。如漢祖天師誅妖馘崇，葛仙翁祭鍊鬼魂，許旌陽斬蛟誅蟒，皆得大功行於世，舉家飛昇。學仙之道，誠有之也。

(丁培仁點校)

009 太上老君清靜心經

經名：太上老君清靜心經。撰人不詳，約出于唐代。底本出處：《正統道藏》太清部。又見《雲笈七籤》卷十七。

老君曰：夫道，一清一濁，一靜一動。①清靜爲本，濁動爲末②。故陽清陰濁，陽動陰靜③；男清女濁，男動女靜。降本流末，而生萬物。清者濁之源，靜者動之基。人能清靜，天下貴之④。人神好清而心擾之，人心好靜而欲牽之。常能遣其欲而心自靜，澄其心而神自清，自然六欲不生，三毒消滅。而不能者，心未澄、欲未遣故也。能遣之者，內觀於心，心無其心；外觀於形，形無其形；遠觀於物，物無其物。三者莫得⑤，唯見於空。觀空亦空，空無所空。既無其無，無無亦無。湛然常寂⑥，寂

無其寂。無寂寂無，俱了無矣，欲安能生⑦？欲既不生，心自靜矣。心既自靜，神即無擾。神既無擾，常清靜矣⑧。既常清靜，及會其道。與真道會，名爲得道⑨。雖名得道，實無所得。既無所得，強名爲得。爲化衆生，開方便道⑩。老君曰⑪：道所以能得者，其在自心。自心得道，道不使得。得是自得之道，不名爲得。故言實無所得。

老君曰：道不能得者，爲見有心。既見有心，則見有身。既見其身，則見萬物。既見萬物，則生貪著。既生貪者，則生煩惱。既生煩惱，則生妄想。妄想既生，觸情迷惑，便歸濁海，流浪生死，受地獄苦，永與道隔。人常清靜，則自得道。於是而說偈曰⑫：

天尊妙用常眼前，舉體動心皆自然。
息箇動心看動處，動處分明無際邊。
邊際由來本性空，非觀心照得虛空。
自悟因緣無自性，倏然直入紫微宮。
宮中宮外光且明，萬法圓中一道平。
清心清鏡皎無礙，無礙無心心自在。
平等道平無有異，天堂地獄誰安置。

神既內寂不虧盈，善惡若空何處生。只爲凡夫生異見，強於地上起縱橫。縱橫遮莫千般苦，一一諦觀無宰主。諦觀無主本無宗，只箇因緣即會中。中間雖會常無會，放會無爲任物通。若時有人知是經意，行住坐卧，若能志心念誦，深心受持，則能滅除無量一切宿障諸惡⑬，冤家皆得和合，無受苦報。邪魔外道，道能降伏。告諸衆生，欲度厄難，各已清淨，信受奉行。

太上老君清靜心經

①「夫道，一清一濁，一靜一動」，《清靜經》作「夫道者，有清有濁，有動有靜」。

②「清靜爲本，濁動爲末」二句，《清靜經》所無。

③「故陽清陰濁，陽動陰靜」，《清靜經》作「天清地濁，天動地靜」。

④「人能清靜，天下貴之」，《清靜經》作「人能常清靜，天地悉皆歸」。

⑤「三者莫得」，《清靜經》作「三者既悟」。

⑥「觀空亦空……湛然常寂」，《清靜經》作「觀空亦空，空無所空。所空既無，無無亦無。無無既無，湛然常寂」。

⑦「寂無其寂……欲安能生」，《清靜經》作「寂無所寂，欲豈能生」。

⑧「欲既不生……常清静矣」，《清静經》作「欲既不生，即是真静。真静應物，真常得性。常應常静，常清静矣。」

⑨「即常清静……名爲得道」，《清静經》作「如此清静，漸入真道。既入真道，名爲得道」。

⑩「强名爲得，爲化衆生，開方便道」，《清静經》作「爲化衆生，名爲得道。能悟之者，可傳聖道」。

⑪以下「老君曰」二段，《清静經》作「老君曰：上士無争，下士好争」云云一段，文多不同。

⑫「於是而說偈曰」以下，《清静經》無其文。

⑬「无」原作「元」。茲據《雲笈七籤》本改。

(丁培仁點校)

010 太上老君內觀經

經名：太上老君內觀經。撰人不詳，約出於南北朝末或隋唐之際。一卷。底本出處：《正統道藏》洞神部本文類。

老君曰：天地媾精，陰陽布化，萬物以生。承其宿業，分靈道一。父母和合，人受其生。始一月為胞，精血凝也；二月成胎^①，形兆胚也；三月陽神為三魂動而生也^②；四月陰靈為七魄靜鎮形也；五月五行分藏，以安神也；六月六律定腑，用滋靈也；七月七精開竅，通光明也；八月八景神具，降真靈也；九月宮室羅布，以定精也；十月炁足^③，萬象成也。元和哺食，時不停也。太一帝君在頭曰泥丸君，總衆神也。照生識神，人之魂也。司命處心，納生元也^④。無英居左，制

三魂也。白元居右，拘七魄也。桃孩住臍，深精根也^⑤。照諸百節，生百神也。所以周身，神不空也。元炁入鼻，灌泥丸也。所以神明，形固安也。運動住止，關其心也。所以謂生，有由然也。予內觀之，歷歷分也。心者，禁也，一身之主。心能禁制，使形神不邪^⑥也。心則神也，變化不測，故無定形^⑦。所以五藏藏五神：魂在肝，魄在肺，精在腎，志在脾，神在心。所以字殊，隨處名也。心者，火也。南方太陽之精主火，上為熒惑，下應心也。色赤，三葉如蓮花，神明依泊，從所名也。其神也，非青非黃^⑧，非大非小，非短非長，非曲非直，非柔非剛，非厚非薄，非圓非方，變化莫測，混合陰陽；大包天地，細入毫芒；制之則正，放之則狂；清淨則生，濁躁則亡，明照八表，暗迷一方。但能虛寂，生道自常；永保無為，其身則昌也。以其無形，莫之能名，禍福吉凶，悉由之矣。所以聖人立君臣，明賞罰，置官僚，制法度，正以教人，人以難伏^⑨，唯在於心。心若清淨，

則萬禍不生。所以流浪生死，沉淪惡道，皆由心也。妄想憎愛，取捨去來，染著聚結，漸自纏繞，轉轉繫縛，不能解脫，便至滅亡。由如牛馬引重趨泥，轉增陷沒，不能自出，遂至於死。人亦如是^⑩，始生之時，神元清靜，湛然無雜。既受納有形，形染六情，眼則貪色，耳則帶聲，口則耽味，鼻則受馨，意隨健羨^⑪，身欲肥輕^⑫。從此流浪，莫能自悟。聖人慈念，設法教化，使內觀己身，澄其心也。

老君曰：諦觀此身從虛無中來，因緣運會，積精聚炁，乘業降神^⑬，和合受生；法天像地，舍陰吐陽；分錯五行，以應四時。眼為日月，髮為星辰，眉為華蓋，頭為崑崙，布列宮闕，安置精神。萬物之中，人最為靈^⑭。性命合道，人當愛之^⑮。內觀其身，惟人尊焉^⑯。而不自貴，妄染諸塵，不淨臭穢，濁亂形神。熟觀物我^⑰，何疏何親。守道長生^⑱，為善保真。世愚役役，徒自苦辛也。

老君曰：從道受分謂之命，自一

稟形謂之性，所以任物謂之心，心有所憶謂之意，意之所出謂之志，事無不知謂之智，智周萬物謂之慧，動而營身謂之魂，靜而鎮形謂之魄，流行骨肉謂之血，保神養炁謂之精，炁清而馱^①謂之榮，炁濁而遲謂之衛，總括百骸^②謂之身，萬象備見謂之形，塊然有閔謂之質，狀貌可則謂之體，大小有分謂之軀，衆思不測謂之神^③，邈然應化謂之靈^④，氣來入身謂之生，神去於身謂之死，所以通生謂之道。道者，有而無形，無而有情，變化不測，通神群生，在人之身則爲神明，所謂心也。所以教人修道，則修心也，教人修心，則修道也。道不可見，因生而明之；生不可常，用道以守之。若生亡則道廢，道廢則生亡，生道合一，則長生不死、羽化神仙。人不能長保者，以其不能內觀於心故也^⑤。內觀不遺，生道長存^⑥。

老君曰：人所以流浪惡道，沉淪滓穢，緣六情起妄而生六識，六識分別，繫縛憎愛，去來取捨，染著煩惱，與道長隔。所以內觀六識因起六欲。識

從何起？識自慾起。慾從何起？慾自識起^⑦。妄想顛倒，而生有識。亦曰自然，又名無爲，本來虛靜^⑧，元無有識。有識分別，起諸邪見。邪見既興，盡是煩惱。展轉纏縛，流浪生死，永失於道矣。

老君曰：道無生死，而形有生死。所以言生死者，屬形不屬道也。形所以生者，由得其道也；形所以死者，由失其道也。人能存生守道，則長存不亡也。

老君曰：人能常清靜其心，則道自來居。道自來居則神明存身，神明存身則生不亡^⑨也。人常欲生，而不能虛心，人常惡死，而不能保神，亦由欲貴而不用道，欲富而不求寶，欲速而足不行，欲肥而食不飽也^⑩。

老君曰：道以心得，心以道明。心明則道降，道降則心通。神明之在身，由火之因卮也。明從火起，火自炷發^⑪，炷因油潤，油藉卮停。四者若廢，明何生焉？亦如明緣神照，神託心存，心由形有，形以道全，一物不足，明何

依焉？所以謂之神明者，眼見、耳聞、意知、心覺，分別物理，細微悉知，由神以明，故曰神明也。

老君曰：虛心者遣其實也^⑫，無心者除其有也，定心者令不動也，安心者使不危也，靜心者令不亂也^⑬，正心者使不邪也，清心者使不濁也，淨心者使不穢也。此皆以有令使除也^⑭。四見者^⑮，心直者不反覆也，心平者無高低也，心明者無暗昧也，心通者無窒礙也^⑯。此皆本自然^⑰者也。粗言數者，餘可思也。

老君曰：知道易，信道難；信道易，行道難；行道易，得道難；得道易，守道難。守而不失，乃常存也^⑱。

老君曰：道也者，不可言傳，口受而得之，常虛心靜神，道自來居^⑲。愚者不知，勞其形，苦其心，役其志，躁其神，而道愈遠，而神愈悲。背道求道，當慎擇焉^⑳。

老君曰：道貴長存，保神固根，精炁不散，純白不分^㉑。形神合道，飛昇崑崙。先天以生，後天以存，出入無

間，不由其門。吹陰煦陽，制魄拘魂。億歲眷屬，千載子孫。黃塵四起，騎羊真人。金堂玉室，送故迎新。

老君曰：內觀之道，靜神定心，亂想不起，邪妄不侵，固身及物^⑩，閉目思尋，表裏虛寂，神道微深。外觀^⑪萬境，內察一心。了然明靜，靜亂俱息。念念相系，深根寧極。湛然常住，杳冥難測^⑫。憂患永消，是非莫識。

老君曰：吾非聖人，學而得之。故我求道，無不受持，千經萬術，惟在心也^⑬。

太上老君內觀經

- ①「成」，《雲笈七籤》本作「爲」。
- ②「而」，《雲笈七籤》本作「以」。
- ③「炁」，《雲笈七籤》本作「氣」。下同。
- ④「生元」，《雲笈七籤》本作「心源」。
- ⑤「深」，《雲笈七籤》本作「保」。
- ⑥「心能禁制，使形神不邪也」，《雲笈七籤》本作「禁制形神，使不邪也」。
- ⑦「故無定形」，《雲笈七籤》本作「無定形也」。
- ⑧「非青」之下，《雲笈七籤》本尚有「非白非赤」。

⑨「人以難伏」，《雲笈七籤》本作「人之難伏」。

⑩「是」，《雲笈七籤》本作「之」。意義相同。

⑪「隨」，《雲笈七籤》本作「懷」。

⑫「肥輕」，《雲笈七籤》本作「輕肥」。

⑬「業」，原作「華」。茲據《雲笈七籤》本改。

⑭「人最爲靈」，《雲笈七籤》本作「人稱最靈」。

⑮「人當愛之」，《雲笈七籤》本作「當保愛之」。

⑯「惟人尊焉」，《雲笈七籤》本作「誰尊之焉」。

⑰「熟」，《雲笈七籤》本作「執」。

⑱「長」，《雲笈七籤》本作「全」。

⑲「駛」，原作「駛」，形近而訛也。「駛」音khai，同「快」。茲據《雲笈七籤》本改。

⑳「骸」原作「神」。茲據《雲笈七籤》本改。

㉑「測」，《雲笈七籤》本作「得」。

㉒「邈」，《雲笈七籤》本作「莫」。

㉓《雲笈七籤》本無「長」、「能」二字。

㉔「長」，《雲笈七籤》本作「常」。

㉕「識從何起」至「慾自識起」，《雲笈七籤》本作「從何而起，從心識起，心從我起，我從欲起」。

㉖「靜」，《雲笈七籤》本作「淨」。

㉗「亡」原作「忘」。茲據《雲笈七籤》本改。

㉘「由」，《雲笈七籤》本作「猶」。按「由」乃「猶」之假借字。又《雲笈七籤》本在「不用道」、「不求實」有「肯」字。

㉙「速」，《雲笈七籤》本作「疾」，義同。

㉚「發」，《雲笈七籤》本作「存」。

㉛《雲笈七籤》本在「老君曰」後尚有「所以言」三字。

㉜《雲笈七籤》本無「安心者使不危也，靜心者令不亂也」二句。

㉝《雲笈七籤》本「以」作「已」、「令」作「今」，誤。

㉞《雲笈七籤》本無「四見者」三字。

⑳「室」，《雲笈七籤》本作「質」。

㉑「然」，原作「照」。茲據《雲笈七籤》本改。

㉒「守而不失，乃常存也」，《雲笈七籤》本作「守道不失，身常存也」，義較確。

㉓「居」，《雲笈七籤》本作「也」。

㉔「當慎擇焉」，《雲笈七籤》本作「怨道不慈」。

㉕「純」，《雲笈七籤》本作「淳」。

㉖「固」，《雲笈七籤》本作「周」。

㉗「觀」，原作「藏」。茲據《雲笈七籤》本改。

㉘「杳」，《雲笈七籤》本作「窈」。

㉙《雲笈七籤》本在「心」後多一「志」字。

(丁培仁點校)

011 太上老君說了心經

經名：太上老君說了心經。撰人不詳，約出於唐代。一卷。底本出處：《正統道藏》洞神部本文類。

若夫修道，先觀其心。心爲神主，動靜從心。心動無靜，不動了真。心爲禍本，心爲道宗。不動不靜，無想無存。無心無動，有動從心。了心真性，了性真心。心無所住，住無所心。了無執住，無執轉真。空無空處，空處了真。

老君曰：吾從無量劫來觀心得道，乃至虛無，有何所得。爲諸衆生，強名得道。

老君曰：吾觀衆生不了其心，徒勞浩劫，虛役其神，於心無了，永劫沉淪。依吾聖教，逍遙抱真。

太上老君說了心經

(丁培仁點校)

012 太上玄都妙本清靜身心經

經名：太上玄都妙本清靜身心經。撰者不詳，約出於隋唐之際。早於李榮所造《洗浴身心經》。一卷。底本出處：《正統道藏》洞真部本文類。

爾時元始天尊在玄都大治元陽上觀七寶華林紫瓊宮內，太上道君與十方聖衆、諸天真仙、三界帝王、一切天神龍鬼應受度者，無缺之衆，登真一位，得無爲心，同會其所。玄都宮觀皆以金銀、瑠璃、珊瑚、琥珀、真珠、碧玉種種裝飾，光明赫奕，映照內外。列座衆真，不能名目；自然祥瑞，表見尊前。天雨寶花，散滿於地；靈鈞雅樂，不鼓自鳴。百和神香，芬馥流溢。爾時四座咸起驚疑，默念思惟，莫能先

問。

天尊撫几，杜彼機緣，入慧觀門，示無爲道，思念萬兆稟受之初，乃發鴻音，告四衆曰：汝等男女，本地身心，悉皆清靜，實相不動，始終恒一，猶如虛空，來去無礙，離於受染，絕諸愛想，正性湛然，本無生滅。但以顛倒，隨業受形，譬如明珠，恒埋糞壤，歷劫隱蔽，不睹其光。汝等男女，將來衆生，執虛假身，迷真實道，造顛倒業，積邪僞塵，埋智慧珠，聚愚癡垢，墮生死海，溺貪愛流，居五欲場，處四魔境，有惑煩惱，結縛身心，隨業轉輪，三塗五道，廕蓋正性，沉沒玄珠，翳本光明，亦復如是，輪迴生死，無解脫期。是故我今開發妙門，令汝得悟。汝等四衆，以本分力，汲道性水，採無爲香，調智慧湯，居清淨室，爲諸衆生除根葉穢，洗虛妄塵，令入慧門，觀於實相。煩惱漏累，畢竟消除。洞照一乘，深明二際。還源反本，復我清虛。得道自然，永無流轉。爾時大衆聞是說已，敬奉思惟，心開意解，歡喜踊躍，稽首道前，長跪頌

曰：

元始無上大慈尊，善說衆生邪倒業。諸法妙本常清淨，動則沉淪經萬劫。妄想既植貪癡根，隨根即生煩惱葉。花葉繁滋彌世界，善惡輪迴互重疊。狂迷競貪邪僞果，子果不絕恒相接。煩惱垢重覆明珠，身心臭穢乖清淨。示我汲引道性水，洗滌千邪歸一正。平等清淨智慧湯，盪除癡垢開真性。有緣速入正觀室，無爲香水澄如鏡。能照去來邪倒業，洗滌貪嗔師戒定。心垢惱病豁已除，各復真根歸慧命。慈尊所說叵思議，我等稽首咸恭敬。爾時會中有一真人，名曰法解，即從座起，整頓衣巾，手執香鑪，從容雅步，怡神息慮，攝念安心，長跪道前，白天尊曰：臣等有幸，得預斯會。侍座以來，未聞此說。四衆心識，猶自蒙昧。特乞神尊，賜垂訓諭。唯願哀原，愍所不逮。於是天尊撫几微笑，答法解曰：善哉男子，汝能於此法會爲決疑悟，末世衆生，真所荷賴。於汝功德，更復增

高。有所不了，恣汝等問，勿懷疑惑，封執之心。法解承恩，稽首問曰：衆兆愚癡，隨業生滅，垢穢深重，迷惑纏身。今調法湯，建清淨室，洗滌罪根，消除體穢。未審儀軌，其事云何？

天尊答曰：善男子，汝等常用月十直日，以上善水，調法香湯，於淨室中，正念安坐，先觀身心，垢穢聚積，無量迷惑，共成此身。外內貪癡，麤細不淨，生老無常，衆苦結縛。三業障道，六塵覆心，如彌天雲，翳明盛日。作是念已，以法香湯，先從皮膚，四支五體，六根九竅，次第灌洗，悉令清淨。外清淨已，復以靜觀，薰修心惑，一切煩惱，妄想執計，貪嗔癡垢，普令清靜。內外既淨，住法身心，常居道場，斷邪僞垢，是名法湯滌除之要。衆真聞說，咸皆讚歎，彈指懺悔，同聲稱善。

爾時真人以宿命通，得他心智，照知末劫有等衆生，心識闇昧，於法未了。是故乘機稽首進問：不審今會演說是經，以何名曰修持供養功德，云何假有之身既蒙開度，真無之識亦獲福

乎？臣等庸愚，忝居真位，於斯義趣猶自未通。唯願神尊特垂開示，降甘露雨，遍灑人天；垂智慧雲，廣覆無外。

爾時天尊歡喜答曰：異哉，真子得宿命通，了他心智，悟一乘道，達三世機，能為將來致殷勤請。我今具說，汝當諦聽。衆生性相，皆悉是空，暫寄有形，終歸壞滅。不住三世，豈繫一身？能體有空，自當無假。有空無假，何藉資憑？真了當知假有之身，必須修習。在生如是，處死亦然。凡人壽終，識居中廕，善業資助，必獲上生。是其家人，及諸同學，當為作福，種種裝嚴，建大寶壇，懸諸幡蓋，修齋願念，講誦是經，燒香然燈，照燭幽夜，拔其苦爽，令睹光明；無為法湯，滌除紛穢；神識絕淨，乃得昇天，反彼清虛，歸自然域。是經功德，不可格量，猶如虛空，難以量度。若有抄寫，供養受持，此人即得妙本澄清，身心潔白，獲報無量，等彼微塵。故名《玄都妙本清淨身心》。汝輩四衆、善男女等，當知此經，濟度法中最為第一，禳災法中最

為第一，修習法中最為第一，無為法中最為第一，智慧法中最為第一，觀行法中最為第一。此經微妙，不可思議，於餘法中無不第一。我昔過去，與諸天尊之所奉行，而得成道。汝宜寶祕，慎勿輕傳。若得其人，當須授受，燒香誓願，頂戴奉持。十方天尊，必記汝等。於是青華童子、丹元真人、素光玉女、玄宮使者、黃中大神，率其官屬三十六人，備衛靈文，保護於汝。汝能於此靜心習誦，存念形神，日夜精思，不辭勞倦，即得三宮明淨，六識清虛，十轉業成，五神依止，無為大道，發爾身心，一切羣魔，自然消伏。作是說已，是諸男女，並皆歡喜。

天尊俄然瞑目高抗，四衆瞻仰，無敢諮詢，又手道前，而作頌曰：

妙本常清淨，身心無垢膩。衆生習業人，迷惑懷疑貳。是故感慈尊，為明權實義。一相度黎元，真為平等語。垢穢既以除，煩惱自然離。負荷匠成德，飛步玄都治。

爾時衆聖說此頌已，於是天尊怡

然含笑，即吐五色微妙神光，徹照諸天福堂及九幽長夜地獄，四座男女乘此神光，悉睹諸天諸地罪福報對，如觀指掌，了了分明，咸皆一心歸命，懺謝宿根業累、即世深殃，願拔衆生離諸苦惱。天尊慈愍，感彼衆心，乃振威神，彈指叩齒，應時地獄悉得閑寧，餓鬼囚徒俱昇道境。寶光收照，法界猶明。林木山川，緬然平等。祥風鼓吹，慧日流光。預法會中，並加真位。十方衆聖、三界人天種種羣生，皆蒙利益，稽首作禮，依教奉行。

太上玄都妙本清靜身心經

(丁培仁點校)

013 太上靈寶洗浴身心經

(敦煌本)

經名：太上靈寶洗浴身心經。
原不題撰者。唐釋玄嶷《甄正論》稱唐道士李榮造《洗浴經》，當即此書。一卷。《正統道藏》未收。底本：敦煌S.3380號寫本。參校：P.2402及BD14523.2寫本。

元始天尊時於太玄都玉京山金闕七寶紫微宮，與十方聖衆、諸天真仙、諸天帝王，及一切種類人天龍鬼，應受度者無量之衆，登真一位，得無爲心，同會其所。尔時天尊告諸四衆：汝等身心本地清淨，實相不動，始終恒一，猶如虛空，去來無礙。但以倒想^①隨業受形，積邪僞塵，聚貪痴垢，欲惡染性，穢濁纏身。譬如明珠恒埋糞壤，歷劫

隱蔽，不顯珠光。將來衆生，迷真道本，造顛倒業，種邪僞根，埋智慧珠，增煩惱垢，墮生死海，溺貪愛流，驅馳五欲，處魔怨境，煩惱結縛，身心臭穢，隨業流轉三惡五道，廢蓋正性，沉沒玄珠，翳本光明，亦復如是。汝等四衆，以本分力，汲道性水，採無爲香，調智慧湯，居清淨室，爲諸衆生洗愚痴垢，滌身心穢，得真實淨，畢竟無染，平等解脫，令入道場。尔時大衆聞是說已，奉教思惟，心開意解，歡喜踴躍，仰瞻尊儀。而說頌曰：

元始無上大慈尊，善說衆生顛^②倒業。
不悟妙本常清淨，動則沉淪經萬劫。
妄想既植貪痴根，隨根即生煩惱葉。
根葉繁滋彌世界，善惡輪回互重疊。
狂迷競食耶僞果，子果不絕恒相接。
煩惱垢重覆明珠，身心臭穢乖清淨。
示我汲引道性水，洗滌千耶歸一正。
平等清淨智慧湯，蕩除痴垢開真性。
有緣速入正性空，無爲香水澄如鏡。
能照去來耶倒業，洗滌貪嗔歸誠定。
心垢惱病豁以除，各復真根增惠命。

慈尊所說頗思議，我故稽首咸恭敬。

時此會中天真皇人從座而起，上白天尊：唯願慈雲廣覆無外，上妙法雨遍灑人天。衆生愚痴，隨業生滅，垢穢深重，耶或纏身。令調法湯，建清淨室，爲諸衆生^③洗滌罪垢，消除耶穢，未審儀軌，其事云何？天尊曰：凡諸行道，入靜燒香，爲己及人請謝罪福，皆當沐浴，蕩滌身心；過此每月一浴，是其常法。然諸天帝王，敕其男女依法清淨，作五種香水，廣開淨室，散花燒香，行道禮拜，持齋奉誠，講說經文。每至年終上八，集仙真聖，天中男女洗濯身形，將勸衆生回向正道，出生死煩勞。汝等宜依此法，至是八日，勸諸男女及以國王、大臣宰輔、天下人民，作法香水，懸諸幡蓋，建齋行道，懺悔禮拜，講誦此經。入清淨室，正念安坐，先觀身心，垢穢聚積，無量邪或，不淨塵勞，共成我身，內外貪癡，粗細不淨，生老無常，衆苦結縛，三業障道，六塵覆心，彌天雲翳日月光明^④。作是觀已，了了分明^⑤。以法香水，先從首面

皮膚、四支五體、六根九竅，次第灌洗，悉令清淨。外清淨已，復以淨觀，重修^⑥內心邪或煩惱，妄想執計，貪嗔癡垢，普令清淨。內外既淨，住法身心，常居道場，斷邪偽垢，是名法水洗浴身心。若有善男子、善女人，能為國主人王、九玄七祖、所生父母、己身男女、天下人民，三徒五苦一切衆生，施法香水、出家法服、俗衣香藥、沐浴之具，修齋行道，散花燒香，禮拜念誦，聽講經教，受誠發願，供養十方諸天上聖、妙行真人、神仙玉女及出家法身，所得功德，最為無量，不可思議。所以者何？是人能為一切行人洗塵垢故，塵垢既除，得見真道，是故得福最為無量。作是說已，諸仙歡喜，各隨儀軌，依法奉行，禮拜天尊，一時而退。

太上靈寶洗浴身心經一卷

- ①「倒想」，BD14523 作「顛倒妄想」。
②「顛」字原缺，據P. 2402 補。
③「為諸衆生」，原缺，據P. 2402 補。

④「明」字據P. 2402 補。

⑤「分明」，P. 2402 作「分別」。

⑥「重修」，BD14523 作「熏修」。

(王卡點校)

014 太上靈寶智慧觀身經

經名：太上靈寶智慧觀身經。
撰人不詳，似出於南北朝或隋唐之際。一卷。底本出處：《正統道藏》洞玄部本文類。參校本：《金石萃編》卷九十六。

靜觀真人於思微中，觀身實相，深達智慧，了見四大、六種根識、及五聚蔭、五印世法皆悉空寂，入無相門。所謂外想、內想，若生想，若滅想，了了照盡，無淨穢法，無生滅法；如是盡處，亦無所盡，究皆是空，空竟升玄。何以故？內想者名境觀空，是空亦空，空空亦空，空無分別空故。是無分別空，亦復皆空，空無二致，故言其盡。若善男女，照法空性，無起滅心，無憍慢心，無恐怖心，無憎愛心，能於世間免種種

苦。所謂生死別苦、鬼神害苦、官私口舌苦、水火刀兵饑寒苦，皆悉免離。如是盡利益，非於一人、二人，必於無量無邊、無量數人；非一天、二天，無量無邊、無量數天，其功德力，不可思議。是故此說，名為解脫，名利益義，名無量義，名第一義。如是諸義，若書若寫，若讀若誦，若解說，是為入智慧門，遊智慧室，坐智慧牀，餐智慧食，得智慧真相之體。即於爾時說智慧頌曰：

智慧起本無，朗朗照十方。結空峙玄霄，諸天挹流芳。其妙難思議，虛感真實通。有有非有，無無不無。

智慧常觀身，學道之所先。渺渺入玄津，自然錄我神。天尊常擁護，魔王衛寶言。晃晃金剛軀，超超太上仙。

智慧生戒根，真道戒為主，三寶由是興，高仙所崇受。汎此不死舟，倏忽濟大有。當此說戒時，諸天來稽首。

太上靈寶智慧觀身經

(丁培仁點校)

015 太上洞玄靈寶觀 妙經

經名：太上洞玄靈寶觀妙經。
撰人不詳，約出於唐代。一卷。
底本出處：《正統道藏》洞玄部
本文類。

夫欲觀妙成真，先去邪僻之行。外事都絕，然後澄靜其心，所思次束次滅。習之既久，其心漸閑。唯滅動心，不滅靜心；但凝空心，不凝有心。靜心之上，豁然無覆；靜心之下，寂然無載。有事無事，常若無心；處靜處誼，其志唯一。若束心太急，又却成疾，發乎狂癡，是其候也。心若不動，又須放任，恒自調適，勿令結滯。處誼無惡，涉事無惱者，此是真靜也。不以涉事無惱，故求多鑒乎。靜久神凝，天光自發。勿舉急求，致以乖自然。於靜境

中見無所取；若有所取，則偽亂真。久而行之，自然得道。夫得道者，心有五時，身有七候。一時，心動多靜少；二時，心動靜相半；三時，心靜多動少；四時，心無事則靜，有事還動；五時，心常與道冥，觸亦不動。七候：一者，心得真定，不雜囂塵；二者，宿疾蠲消，身心清爽；三者，填補虧損，復命還年；四者，延齡度世，名曰仙人；五者，鍊形爲氣，名曰真人；六者，鍊氣成神，名曰神人；七者，鍊神合道，名曰至人。其於鑒力，隨候益明。夫久學靜心，都無一候，但令穢質殂謝方空，欲成真道，未之聞也。

太上洞玄靈寶觀妙經

（丁培仁點校）

016 洞玄靈寶定觀經註

冷虛子註

經名：洞玄靈寶定觀經註。原不題撰者，經文約出於南北朝末或隋唐之際。又據後跋，註文當係唐代道士冷虛子撰。底本出處：《正統道藏》洞玄部玉訣類。參校本：《雲笈七籤》卷十七。

靈者，神也，在天曰靈。寶者，珍也，在地曰寶。天有靈化，神用不測，則廣覆無邊；地有衆寶，濟養羣品，則厚載萬物。言此經如天如地，能覆能載，有靈有寶，功德無窮，證得此心，故名靈寶。定者，心定也，如地不動。觀者，慧觀也，如天常照。定體無念，慧照無邊，定慧等修，故名定觀。

天尊告左玄真人曰：

左者，定也。玄者，深妙也。真者，純也，一而無雜。人者，通理達性之人也。曰者，語辭也。

夫欲修道，

進趣之心，名為修道。

先能捨事，

一切無染，名為捨事。

外事都絕，

六塵為外事，須遠離也。六塵者，

色、聲、香、味、觸、法。更不染著，名

為都絕。

無與忤心，

境不來忤，心即無惱；心不起染，境

則無煩。心境兩忘，即無煩惱。故

名無與忤心。

然後安坐，

攝澄煩惱，名之為安。本心不起，名

之為坐。

內觀心起。若覺一念起，須除滅，務令

安靜。

慧心內照，名曰內觀。漏念未除，名

為心起。前念忽起，後覺則隨。起

心既滅，覺照亦忘。故稱除滅。了

心不起，名之為安。覺性不動，名之為靜。故稱安靜。

其次，雖非的有貪著，浮遊亂想，亦盡滅除。

衆心不起，妄念悉忘，亂想不生，何有貪著？故曰滅除。

晝夜勤行，須與不替。

晝之言淨，夜之言垢。垢淨兩忘，無

有間替，故名不替。

唯滅動心，

忘想分別，名曰動心。覺照祛之，故

名為滅。

不滅照心；

慧照常明，無有間，故名不滅照心。

但凝空心，

不起一切心名空心。

不凝住心，

一切無著，名之不凝住心。

不依一法而心常住。

若取一法，即名著相。心不取法，名

為不依。照而常寂，故為常住。

然則凡心躁競。其次，初學息心甚難，

或息不得，暫停還失。

言習性煩惱，難可滅除，定力未成，暫停還失也。

去留交戰，百體流行。

心起染境，境來牽心，心境相染，故名交戰。妄念不息，百非自生，名曰百體流行。

久久精思，方乃調熟。勿以暫收不得，遂廢千生之業。

定心不起，則契真常。一念不收，千生遂廢。

少得靜^①已，

初得清淨，正慧未生，故曰少得靜已。

則於行立坐卧之時，

四威儀之時也。

涉事之處，誼鬧之所，

見一切諸相為涉之處，起一切諸心，名為誼鬧之所也。

皆作意安；

息亂歸寂，名為作意。恬淡得所，名之為安也。

有事無事，常若無心；處靜處誼，其志惟一。

有無雙遣，寂用俱忘，萬法不二，名之唯一。

若束心太急，又則成病，氣發狂顛，是其候也。

偏心執靜，名曰束心。心外見相，名為顛也。

心若不動，又須放任，寬急得所。

從定發慧，名為放任。定慧齊融，名曰得所。

自恒調適，

定多即愚，慧多即狂；定慧等用，名曰調適。

制而不著，放而不動，處喧無惡，涉事無惱者，此是真定。

寂而常照，照而常寂，空而常用，用而常空，得本元寂，故為真定。

不以涉事無惱，故求多事；不以處喧無惡，強來就誼。

習性塵勞，常須制御，不可縱逸。

以無事為真宅，

見本性空寂，故為真宅。有事為應跡。

慧用無邊，故為應跡。

若水鏡之為鑒，則隨物而現形。

本心清淨，猶如水鏡，照用無碍，萬象^②俱現，名為現形。

善巧方便，唯能入定。

諸法性空，寂無所起，故為入定。慧發遲速，則不由人。勿令定中急急

求慧，急則傷性，傷則無慧。

急求知見，真定乃亡。貪著諸相，故云無慧。

若定不求慧而慧自生，此名真慧。

心體寂靜，妙用無窮，故為真定。

慧而不用，實智若愚。

了無分別，名之不用。韜光晦跡，故曰若愚。

益資定慧，雙美無極。

寂照齊融，故云雙美無極。

若定中念想，多感衆邪，妖精百魅，隨心應見。

為心取相。諸相應生，一切邪魔，競來撓亂。

所見天尊、諸仙、真人，是其祥也。

此為諸相，不可取著。

唯令定心之上，豁然無覆；定心之下，

曠然無基。

前念不生，故云無覆；後念不起，故曰無基。

舊業日銷，新業不造。

宿習並盡，名曰舊業日銷，更不起心，故名新業不造。

無所罣礙，迴脫塵籠。

一切無染，故名無所罣礙；解脫無繫，故云迴脫塵籠。

行而久之，自然得道。

智照不滅，名曰行而久之；契理合真，故云得道。

夫得道之人，凡有七候；一者，心得定易，覺諸塵漏；

心得清靜，塵念盡知，故曰覺諸塵漏。

二者，宿疾普銷，身心輕爽；

真氣胎息，痼疾盡瘳。體道合真，身輕不老。

三者，填補天損，還年復命；

骨髓堅滿，故填補天損；駐顏不易，名為還年復命也。

四者，延數萬歲，名曰仙人；

長生不死，延數萬歲，名編仙錄，故曰仙人。

五者，鍊形為氣，名曰真人；

得本元氣，故曰鍊形為氣；正性無偽，故曰真人。

六者，鍊氣成神，名曰神人；

真氣通神，陰陽不測，故曰神人。

七者，鍊神合道，名曰至人。

真神契道，故曰至人。

其於鑒力，隨候益明。

鑒力者，常照不息也。益明者，明明不絕也。

得至道成，慧乃圓備。

若了本性，得道成真，智慧圓明，萬法俱備。

若乃久學定心，身無一候，促齡穢質，色謝方空。自云慧覺，又稱成道者，求道之理，實所未然。

通神合道即得道真成。

心惑身亡，不離生死。《西昇經》云：是故

先生本，焉能知道源？

而說頌曰：

智起生於境，火發生於緣。

各是真種性，承流失道源。

起心欲息知，心起知更煩。

了知性本空，知則衆妙門。

洞玄靈寶定觀經註終

道由心學，匪假佗求；神依形住，罔有其外。我之靈明，亘今亘古，惟其絀於六情，是以戕我正念。貪嗔癡昧，種種見惑，背真向偽，無有殫期。寔惟真師憫念衆生無知，故演此妙經，作人天規鑑，為證道梯航。是有定觀之說，發揮妙本，洞徹玄微，滌乎垢氛，超乎視聽；明無相於有形之後，致虛極於未兆之先；物我俱忘，形神俱妙。凡我羽流，敬之敬之。龍集壬申三月初吉，冷虛子稽首謹識。

①「靜」，《雲笈七籤》本作「淨」。

②「萬象」，《雲笈七籤》本作「萬物」。

③「痼」，《雲笈七籤》本作「故」。

④「即得道真成」，《雲笈七籤》本作「即身得道真」。

⑤「惑」，《雲笈七籤》本作「證」。

⑥「種」，《雲笈七籤》本作「動」。

⑦《雲笈七籤》本所錄經註止於此，無後泠虛子題識。

(丁培仁點校)

017 太上洞玄靈寶天尊

說大通經

經名：太上洞玄靈寶天尊說大通經。撰人不詳，疑係唐宋道流所作。一卷。底本出處：《正統道藏》洞玄部本文類。

真空章

先天而生，生而無形；後天而存，存而無體。然而無體，未嘗存也。故曰不可思議。

玄理章

靜為之性，心在其中矣；動為之心；性在其中矣。心生性滅，心滅性現，如空無相，湛然圓滿。

玄妙章

大道無象，故內攝於有；真性無為，故外不生其心。如如自然，廣無邊際。對境忘境，不沉六賊之魔；居塵

出塵，不落萬緣之化。致靜不動，致和不遷。慧照十方，虛變無為。

偈曰：

有法悟無法，無修解有修。包含萬象體，不罣一絲頭。

太上洞玄靈寶天尊說大通經

(丁培仁點校)

018 太上大通經註

都梁參學清庵瑩蟾子李道純註

經名：太上大通經註。元人李道純註。一卷。底本出處：《正統道藏》洞真部玉訣類。

太上謂無上可上，大通謂無所不通，經謂登真之徑路，衆所通行之道也。首章云無形無體，謂真空妙理最上一乘之妙也，即太上之義。次章云如空無相，謂四通八達無所窒礙，即大通之義也。下章云無相無為，廣無邊際，謂大道至廣至大，至妙無窮，日用之間，頭頭顯露，此所以為經也。

先天而生，顯諸仁。生而無形，藏諸用。後天而存，所存者神。存而無體，神無方易無體。然而無體，陰陽不測。未嘗存也。運化不息。故曰不可思議。妙用無窮。

右真空一章。原道之始也。子曰：天何言哉，四時行焉，百物生焉。即先天而生，生而無形之義也。《中庸》曰：視之而不見，聽之而不聞，體物而不可違，即後天而存，存而無體之義也。然而無體，故運化生成而無窮也。非窮理盡性者，其孰能與於此，故授之以玄理章。

靜為之性，寂然不動。心在其中矣。感而遂通。動為之心，見物便見心。性在其中矣。無物心不見。心生性滅，心生種種法生。心滅性現，心滅種種法滅。如空無相，大象無形。湛然圓滿。通上徹下。

右玄理章。原性之元也。《中庸》曰：喜怒哀樂未發之謂中，中也者，天下之大本也。即靜為之性之義。又曰：發而皆中節，謂之和，和也者，天下之達道也。即動為之心之義。性本靜，非心則不見。心本靜，非動即不見。因物見心，潛心見性。性寂知天，是謂通也。苟或心隨物轉，性所以忘也。故曰心生性滅。設若潛心入寂，性所以現也。故曰心滅性現。蓋性如虛空，動與不動，常寂；見與不見，常明。一切物來相撓，如片雲點虛空相似，太清還受點也。無既不受點，則湛然圓滿。我之性天亦復如是。

大道無相，故內其攝於有。養其無象，象故常存。真性無為，故外不生其心。無所用心，心故常存。如如自然，廣無邊際。無為則無不通。對境忘境，不沉於六賊之魔。

我不逐境，境無干我。居塵出塵，不落萬緣之化。我不立塵，塵不染我。致靜不動，大定。致和不遷，大慧。慧照十方，大明。虛變無為。大通。

右玄妙章。明道之理也，故次之以玄理章。《洞古經》云：養其無象，象故常存，即大道無相之義。孟子曰：無為其無所不為。即真性無為之義。內無相則如如自然，外無為則廣大悉備。祖師謂丹田有寶休問道，對境無心莫問禪。即此義也。對境忘境，何魔之有？居塵出塵，何緣之有？緣息則性靜，魔息則心和。致靜則不動，致和則不遷。二理兼持，則圓明普照，神變無方也。

頌曰：有法悟無法，心隨法生，法隨心滅。無脩解有脩。性本無脩，脩即非性。包含萬象體，心空性寂，無所不容。不掛一絲頭。纔染一塵，即成滲漏。

右頌。言其體用也。體之則無，用之則有。所以自有法頓悟無法，因無脩勘破有脩。至於有無不立，心法雙忘，體同太虛，包羅無外，大道之理，至是而盡矣。

太上大通經註

（尹志華點校）

019 太上昇玄消灾護命 妙經

經名：太上昇玄消灾護命妙經。
撰人不詳，約出於南北朝末或隋
唐之際。一卷。底本出處：《正
統道藏》洞真部本文類。參校
本：1. 唐司馬承禎《太上昇玄
消灾護命妙經頌》（簡稱頌注）；
2. 敦煌P.2471、S.3747號抄本。

爾時元始天尊在七寶林中，五明
宮內，與無極聖眾俱。放無極光明，照
無極世界^①，觀無極衆生，受無極苦
惱；宛轉世間，輪迴生死，漂浪愛河，
流吹欲海，沉滯聲色，迷惑有無；無空
有空，無色有色^②，無無有無，有有無
有，終始暗昧，不能自明，畢竟迷惑。
天尊告曰：汝等衆生，從不有中
有，不無中無，不色中色，不空中空^③；

非有爲有，非無爲無，非色爲色，非空
爲空。空即是空，空無定空；色即是
色，色無定色；即色是空，即空是色。
若能知空不空，知色不色，名爲照了，
始達妙音。識無空法，洞觀無礙，入衆
妙門，自然解悟，離諸疑網，不著空見，
清靜六根，斷除邪障。我即爲汝說是
妙經^④，名曰護命，濟度衆生，隨身供
養^⑤。傳教世間，流通讀誦。即有飛天神
王、破邪金剛、護法靈童、救苦真人、金
精猛獸，各百億萬衆，俱來^⑥侍衛是經，
隨所供養，捍厄扶衰，度一切衆生，離
諸染著^⑦。爾時天尊即說偈曰：

視不見我，聽不得聞。
離種種邊，名曰妙道。

太上昇玄消灾護命妙經

①「放無極光明照無極世界」，敦本P.2471、S.3747作「放無極光，照無極界」。
②「沉滯聲色，迷惑有無；無空有空，無色有色」，P.2471此數句作「滯聲香味觸中，迷有無無色內，無色有色」。S.3747作「滯聲香味觸中，迷有無無有內，無色有色」。

③「從不有中，不無中無，不色中色，不空中空」，此數句敦本P.2471缺漏。

④「我即爲汝說是妙經」，P.2471作「我故爲汝四輩說是妙經」。

⑤「隨身供養」，道藏本原缺，據P.2471及頌注本補。

⑥「俱來」，道藏本原無「來」字，據頌注本補。

⑦敦煌本此句後有「入衆妙門」四字，但缺下句「爾時天尊即說偈曰」。

（王卡點校）

020 太上昇玄消災護命

妙經頌

唐貞一先生司馬子微撰

經名：太上昇玄消災護命妙經頌。唐道士司馬承禎（字子微）撰。一卷。底本出處：《正統道藏》洞真部贊頌類。

太上昇玄消災護命妙經頌序

天尊示見三界，慈憫四生，開衆妙之門，救無極之苦，是以垂文玄教，曲奏妙音，俾未聞者聞，令未悟者悟。此經者，蓋太上玄元老君之所作也。其旨也，即妙性之本，萬法之宗焉。文雖簡略，理實淵深，一毛吞四海之波，巨黍納無軌之衆，神明莫測，智識難詮，不可以聲求，不可以色見，遠而無外，近而無親，追之不見其前，伺之不來其

後，無上之上，不可階而升也。玄之又玄，不可得而聞也。混先天而不古，歷浩劫以長存，尊而無名，貴而無位，逡巡萬變，倏忽無邊，照耀則日月有虧，覆載則乾坤不普；隨機化導，對境忘心，訣疑網以入玄宗，引輪迴而歸覺路，散余一氣，毓彼羣生，失我則逝水以俄頃，保我則後天而不老。毀之者持巨筭以掃崑崙，究之者類鴻鵠之飲滄海。所以玄言莫暢，聖道難彰，縱有修行，徒多讀誦，朝聞夕死，未見其人，不揆斐然，輒爲頌云。

太上昇玄消災護命妙經頌

太上本來真，虛無中有神，若能心解悟，身外更無身。

爾時元始天尊，

假名元始，號元始虛無老，心源是元始，更無無上道。

在七寶林中五明宮內，

七寶為林苑，五明宮殿寬，人身皆備有，不解向心觀。

與無極聖衆俱。

三世諸天聖，相因一性宗，一身無萬法，萬法一身同。

放無極光明，照無極世界，

放出光明，照無央世界中，乾坤明表裏，日月覺朦朧。

觀無極衆生，受無極苦惱，

妙觀無盡苦，自性不能知，妄想隨緣去，何時有出期。

宛轉世間，輪迴生死，

生滅何時盡，相因浩劫來，似環螻蟻轉，如穀碾塵埃。

漂浪愛河，流吹欲海，

誰言河海闊，深淺尚能知，愛欲情無底，何年有出時。

沉滯聲色，

水鳥及風林，咸歸一法音，如何顛倒性，自起萬般心。

迷惑有無，

虛無含有象，有象復歸無，心若明白了，知權呼有無。

無空有空，無色有色，

無空空不空，無色色不色，若能知色空，色空皆自得。

無無有無，有有無有，

有有兼無有，無無及有無，虛心能不動，妙道自來居。

終始暗昧，不能自明，

如人入黑暗，目睹又何曾，若要分明見，須憑浩劫燈。

畢竟迷惑。

有相兼無相，迷惑終不知，未能明覺性，安得決狐疑。

天尊告曰：汝等衆生，

衆生情行劣，迷失道根源，特謂宣宗

旨，教令入妙門。

從不中有，不無中無，

物向無中有，道從有裏無，莫生無有見，迷執自消除。

不色中色，不空中空，

空色互相生，相纏如糾墨，要知空色理，自莫分空色。

非有爲有，非無爲無，

道性本虛無，虛無亦假呼，若生無有見，終被法來拘。

非色爲色，非空爲空。

不空是真空，不色是真色，空色便爲真，真法何曾得。

空即是空，空無定空，色即是色，色無定色。

是空及是色，究竟總非干，要認真空色，迴心身己觀。

即色是空，即空是色，若能知空不空，知色不色，

空色宜雙泯，不須舉一隅，色空無滯礙，本性自如如。

名爲照了，始達妙音。

妙音喻虛性，虛心非妙音，認他毫髮

事，難得自由心。

識無空法，洞觀無礙，

一心觀一切，一切法皆同，若能如斯解，方明智慧通。

入衆妙門，自然解悟。

了悟性根源，名爲入妙門，妙門方便法，是法勿留存。

離諸疑網，不著空見，

決破疑惑網，有無都不干，正心長自在，如準入雲盤。

清靜六根，斷除邪障，

心靜六根清，六根隨性行，性能無著物，邪障那邊生。

我故爲汝說是妙經，名曰《護命》。

妙經無礙性，權立妙經名，故爲衆生說，令教悟此經。

濟度衆生，隨身供養，

一真度一切，如檝濟橫流，真性隨身有，勿於身外求。

傳教世間，流通讀誦，

傳教虛無理，世間散布行，誦經能萬遍，其義自分明。

即有飛天神王、破邪金剛，

真性號神王，飛天無定方，破邪能自外，堅固喻金剛。

護法靈童、救苦真人、金精猛獸，

靈童即正性，無染號真人，威猛喻師子，名殊一法身。

各百億萬衆，俱來侍衛是經。

諸天諸聖衆，無一亦無二，性不逐波流，是名真侍衛。

隨所供養，捍厄扶衰，

語默及游息，無生一念思，忘形歸恍惚，神鬼不能窺。

度一切衆生，離諸染者。

正法度邪法，衆生見處偏，若生無有見，即被染心田。

爾時天尊即說偈曰：

天尊重說偈，直為指心源，汲引迷惑者，令歸解脫門。

視不見我，聽不得聞，

道非于視聽，視聽轉生疑，應物臨機用，虛心即可知。

離種種邊，名為妙道。

心疑隨萬境，隨境認心田，道非有為有，方名離種邊。

太上昇玄消災護命妙經頌

（曾召南點校）

021 太上昇玄消災護命

妙經註

清庵瑩蟾子李道純註

經名：太上昇玄消災護命妙經
註。元道士李道純撰。一卷。
底本出處：《正統道藏》洞真部
玉訣類。

爾時元始天尊，

元始，謂元始祖氣也。元始祖氣化
生諸天，即釋教所謂無上道，不動
尊，故曰天尊。

在七寶林中，

人之一身，三元四象具足，故謂之七
寶林。

五明宮內，

即中宮黃庭內境，虛明普照，故曰五
明宮。

與無極聖衆俱，

謂種種變化也。

放無極光明，

謂種種知見也。

照無極世界。

謂種種境界也。

觀無極衆生，

謂種種幻妄也。

受無極苦惱，

謂種種纏縛也。

宛轉世間，

翻軀換殼，無有了期。

輪迴生死，

出生入死，不自知覺。

漂浪愛河，

愛河浪闊，漂蕩者情緣之故。

流吹慾海，

慾海波深，沉溺者貪著之故也。

沉滯聲色，

色聲所眩，謂之業識。

迷惑有無。

有無所遷，謂之根塵。

無空有空，

無空不是空，有空即幻空。

無色有色，

無色不是色，有色是幻色。

無無有無，

無無不是無，有無即幻無。

有有無有，

有有不是有，無有即幻有。

終始暗昧，

纔著一邊，便是昧了也。

不能自明，

不著一邊，到底不明。

畢竟迷惑。四者惑亂，終身不定。

右一章。開示說經之義。一切有

情，皆住有無色空差別境界。是故

天尊垂慈演說是經，設種種方便，蓋

欲使人假此幻身而修正覺，故有七

寶五明之喻。若欲玉符保神，金液

鍊形，必先存乎元始祖氣，而後檢攝

種種因緣，始能破一切差別，離一切

境界，斷一切幻妄，解一切纏縛。是

以不為愛慾苦惱，而永無輪轉也。

作是見者，長生久視之道得矣。

天尊告曰：

重宣此義。

爾等衆生，

一切衆生皆由幻生。

從不中有，

一切有相本不有。

不無中無，

一切無相本不無。

不色中色，

一切色相本不色。

不空中空。

一切空相本不空。

非有爲有，

著有爲有，非有也。

非無爲無，

著無爲無，非無也。

非色爲色，

見色爲色，非色也。

非空爲空。

迷空爲空，非空也。

空即是空，

空即空，頑空也。

空無定空。

空豈有定體。

色即是色，

色即色，幻色也。

色無定色。

色豈有定體。

即色是空，

色不異於空。

即空是色。

空不異於色。

若能知空空不空，

不空之空，是謂真空。

知色不色，

不色之色，是謂真色。

名爲照了，

照了色空則一，了達有無不二。

始達妙音。

聞無所聞，謂之妙音。

識無空法，

空無所空，謂之空法。

洞觀無礙。

有無不二，無礙之門。

入衆妙門，

色空如一，衆妙之門。

自然解悟。

不著有無，心性豁達。

離諸疑網，

不見色空，疑團粉碎。

不著空見。

無眼界乃至無意識界。

清淨六根，

無色聲香味觸法。

斷除邪障。

無色無受想行識。

右二章。此章發明昇玄之心法也。

天尊慈憫之故，直指有無色空的

旨趣，叮嚀告戒，返復再四。蓋欲使

人離諸差別境界，不住有無空見。

昇玄造微之要，至是盡矣。修真高

士，若向這裏具隻眼，參學事畢。其

或未然，諦聽末後句。

我故爲汝說是妙經，

解義如前。

名曰《護命》，

長生久視之道。

濟度衆生，

信之者不遭濁辱。

隨身供養，

存於內，形存壽永。

傳教世間，

施於外，利益人天。

流通讀誦。

誦之者捍厄扶衰。

即有飛天神王、破邪金剛、護法靈童、救苦真人、金精猛獸，各百億萬衆，俱侍衛是經，隨所擁護，

是經所在之處，即得十天善神擁護。

即佛經所謂：是經所在之處，如佛

塔廟之義也。

捍厄扶衰，

是謂延生之藥石。

度一切衆生，

是謂濟度之津梁。

離諸染著。

是謂洗塵之法雨。

爾時天尊即說偈曰：

重宣妙義。

視不見我，

戒慎乎其所不睹。

聽不得聞，

恐懼乎其所不聞。

離種種邊，

故君子常慎其獨。

名爲妙道。

昇玄之道，至是盡矣。

右三章。誘喻持經之功德也。前說有無色空四趣真趣，作昇玄之階級，濟度之津梁，惟恐力不及者，承當不去，又於是章假立種種法相，接引中人以下，敬信奉持，俾之誦言求意，漸入佳境。又作四句偈言，直指玄要，直欲使其人與非人，俱昇玄境之意也。以此見太上好生之德，可謂至矣。若非篤志力行者，不足以報玄恩。經間庵者，更宜勉之。

太上昇玄消災護命妙經註

（李剛點校）

022 太上昇玄說消災護

命妙經註

脩江混然子註

經名：太上昇玄說消災護命妙經註。元道士混然子王玠（字道淵）撰。一卷。底本出處：《正統道藏》洞真部玉訣類。

太者，無也。上者，極也。昇，高也。玄，妙也。說，開化也。消，滅也。災，害也。護，保也。命，身也。妙，玄之又玄也。經，心也，徑也，人人共行之徑路也。天尊言：無極大道，化生天地。萬物之多，無物不有其妙，唯人得其秀而最靈。然雖靈也，人生風土不同，稟受則有殊異，是有賢愚不等。故天尊以慈憫力，開方便門，普化世人，明本來之真性，全見有之身命。以心鍊念，以情

歸性，然默運天機，流精化氣，會於乾宮，充周四體，乃謂之昇玄。運符火以鍊神，嚙金液以鍊形，形強神清，諸邪不入，百病不生，長生久視，超塵出劫，乃謂之消災護命。若有能受持此道，運行一身，與聖仙並駕，與天地同軀，是為妙經也。《道德經》謂：善人，不善人之師，不善人，善人之資，故無棄人。所以衆生雖是有貪愛之心，其中皆有善智之性。天尊說此經，開化妙理，以喻後之來者。流通讀誦，究竟大道之由，悟之者，愚可以智，濁可以清，超凡入聖，自然消災、滅罪、保命，乃得延年，豈不是妙經也哉。頌曰：無極玄元始，巍巍靈寶尊，昇玄弘教化，顯道說經文。

爾時元始天尊在七寶林中五明宮內，爾時者，昔混沌之時也。元始者，祖氣也。天尊者，一靈至貴，天上地下，唯此獨尊也。七寶林者，心也，神也。五明宮者，黃庭也。以世法釋，當龍漢之初，八角垂芒，一點祖

劫之氣，化正氣萬道，浮滿空中，結成聖體，一神含妙萬有，乃強名曰元始天尊也。當說之時，在始青天七寶林中五明宮內也。以道用言，人之生，皆有元始天尊。此言一點真陽之氣，居於生門密戶，中間空懸一竅，乃曰天心，性亦寓焉，為萬神朝會之祖，是謂元始天尊者也。凡遇一陽初動，當轉經之時，則神下墜玄關，鼓巽風吹發離宮三昧之火，追二氣於黃道，會三性於元宮，混融成丹。所以鍊性，如金之堅，全藉火力以鍛鍊。火以七言，土以五言，是以在七寶林中五明宮內者也。此即《度人經》所謂：元始懸一寶珠，大如黍米，在空玄之中，去地五丈，登引天真之道也。頌曰：元始先天地，無為浩劫宗，一心抱衆體，真下翫真空。

與無極聖衆俱，放無極光明，照無極世界。此承上言，一神正位，萬神朝宗。以世法言，當天尊說經之時，則諸天諸

地、三界十方、無極聖衆，一時同會於七寶林中五明宮內，咸聽說經之妙，是時放無極光明，照無極世界也。以道用言，凡作丹之時，以天罡之斡運，逆回斗柄之機，則通身萬神萬氣同會於心，薰蒸片餉，即得神清氣爽，心廣體胖，靈含空妙，萬竅光明，是照無極世界也。此即與《度人經》所言：上聖高尊、妙行真人、無鞅數衆，浮空而來，俱入寶珠之內。既入珠口，不知所在。法事粗悉，諸天復位。倏歛之間，寂無遺響是也。頌曰：一黍藏天地，諸真集聖軀，慧光生恍惚，遍界照虛無。觀無極衆生，受無極苦惱，宛轉世間，輪迴生死，漂浪愛河，流吹慾海，沉滯聲色，迷惑有無。

觀者，洞觀也。無極者，言天下人物之多，生生不盡之意也。衆生者，下愚貪愛之人也，及其一切含靈之物，皆是衆生。此一節以下，天尊居靜極之中，以智慧目，洞觀大^①之內，劫濁之間，有等貪夫俗子下愚之人，不

畏天命，不惜生身，紛紛貪愛，形雖人身，心如禽獸也。柰何此等衆生，不識人倫，不懼國法，心為形役，逐利迷情，舍死貪求，了無厭足，造成種種之愆，作下無遮罪業。一旦自招殃咎，天災罪己，小則自陷一身，大則禍連骨肉，是以受無極苦惱，宛轉世間，輪迴生死於六道之中，永無出期。漂浪於愛河，流浪於慾海之地，汨沒沉淪，無有休息。天尊憐憫衆生之苦，深可痛哉，故以此等由，開化世人，早悟回頭。殊不知造惡者必有惡報，如影隨形，竟不尋思，至此唯務縱念所為，沉滯於聲色，耳中聽，眼中見，紛紜馳逐於外，自身精神耗散，化為異類而不復，猶自不醒，迷惑有無而終不改也。頌曰：衆生心自昧，造業受輪沉，愛滯於聲色，何如獸與禽。

無空有空，無色有色，無無有無，有有無有，終始暗昧，不能自明，畢竟迷惑。此一節承上言，衆生迷惑有無，不自醒悟，於此故言大道之始，本無形、

無情、無名，因氣化生物，一分為二，遂有形、有情、有名。衆生所以不得真道者，執著幻形為有，昧了本來之性。道本不空，執著為空。道本無色，執著有形。道本無形，執著有。妄心不信真道，不知其來，不知其去，是以終始暗昧，不能自明，畢竟迷惑，故造惡作非，遭於濁辱，受報無休，永失真道也。頌曰：大道本無色，真空非是空。若人明得透，顯出舊家風。

天尊告曰：爾等衆生，從不有中，不無中無，不色中色，不空中空。非有為有，非無為無，非色為色，非空為空。空即是空，空無定空；色即是色，色無定色。即色是空，即空是色。

空者，道虛無體也。色者，一切有形之物也。此一節以下，天尊慈憫世人不悟真道，於此丁寧反覆告戒，形容道之體用，教人如此悟見大道至虛無體，因不虛立，故生形以立道。形為道之室，道為形之用，是以有其

形必有其神，必有其道。人之元神本是虛靈，因形所梏，障礙不靈。譬如空中有日，千江同色，水清月明，水濁月昏。月不離水，水不離月，形不離神，神不離形。形有敗壞，神無生滅。人生不過假此幻形以成於道。何故衆生如此之愚，執此幻形，被他所使，棄其本，逐其末，終不悟性命之理。天尊故言：爾等衆生，可以諦聽吾說，從不有中者，此言形非長有，不可認形為有。不無中無，此言人性虛靈，亘古亘今，不生不滅，不可以性為無也。不色中色者，此言大道清虛，本無其色，不貪迷其色也。不空中空者，此言人神含妙，主宰萬機，本無其空，不可固執為空也。非有為有者，此言人初生為赤子之時，本來素儉非有，今日不可貪生厚利，為我之有也。非無為無者，此言人物之生，一身一竅，一物一太極，造化妙理，無不在人一身，不可棄我之有而為無者也。非色為色者，此言大道沖虛，無物不

貫，天地神明，無處不存，本無形色之可睹，不可執其非色而為色者也。非空為空者，此言成道之人，變化自在，劫劫長存，本來非空而實有，不可執著為虛無而笑之為空也。空即是空，空無定空者，此言大道無形，變化莫測，生天生地生人物，豈有定空之理。至如青天白日，一時風雲雷雨變化，頃刻遍滿大千世界是也。如人性靜之時，乃太空也，一時發其喜怒，神機不測，亦復如是。豈不是空無定空者也？色即是色，色無定色者，人以眼觀色，眼即色也，若能覺之，得色觀色，迴光返照，了徹心空，色皆無也。且夫天地之間，陰陽化生萬物，隨氣成質，隨質變色。有情而變無情，貞女化為石山，蚯化百合之類；無情而變有情，丹楓化羽人，腐草化為螢之類。萬物皆化，輪迴無期，豈不是色無定色者也？是以即色是空，即空是色。豈不聞《金剛經》云：無我相、人相、衆生相、壽者相。凡有所相，即是虛妄。若是

諸相非相，即見如來。斯言至矣。學人於此玩味，其庶幾乎！頌曰：道妙非空法，人迷幻色心，有無都放下，陸地盡平沉。喝！會得麼？行到水窮山盡處，鳥啼花笑一般春。若能知空不空，知色不色，名為照了，始達妙音。識無空法，洞觀無礙。入衆妙門，自然解悟。離諸疑網，不著空見。

此一節承上文而言，為化衆生。其有能悟之者，不墮頑空，不著邪見，唯存一心，湛然常寂，了了真空，無所不知，無所不透，道在我而不在於彼。若領悟至此地位，方信知空不空，知色不色，是以名為照了，始達妙音。識無空法，洞觀自在，此心通於他心，無物不盡其性。穿山透石，無有隔礙，於我慧性生明，廣照無際。所以入衆妙門，自然解悟，頭頭是道，物物同真。一切疑網，盡行掀翻，獨露本來，不著空見也。頌曰：空空本不空，色色即非色。直下悟玄機，知白守其黑。

清靜六根，斷除邪障。

清靜者，虚心實腹也。六根者，眼耳鼻舌身意也。斷，絕也。除，去也。邪障，一切塵勞色慾也。此承上言不著空見之意，於此教人清靜其六根，絕去其邪障，內不出，外不入，自然神清氣靜，六根安寧，邪障斷除矣。頌曰：了徹一心，通天徹地。陽盛陰消，邪魔退位。

我即爲爾說是妙經，名曰《護命》，濟度衆生，傳教世間，流通讀誦。

我者，天尊自稱也。爾者，言悟道之人也。說，開化也。妙，玄也。經，心也，猶路也，人人共行之路也。濟者，接引之意也。度者，超彼岸也。此一節，天尊故言世人若能悟道明徹，不被形縛，不著邪障所蔽，透得向上機關，至此田地，方纔可與爾言說大道之宗，轉經之妙。這誦經之者，可以通神。悟之者，可以養命。得之者，可以長年。是名曰《護命》。濟度衆生，傳教世間，使人人流通讀誦，願得箇箇早悟圓成，豈不稱天尊

之心哉。頌曰：箇箇身同道，人人心是經，精凝神氣固，護命保長生。即有飛天神王、破邪金剛、護法靈童，救苦真人、金精猛獸，各百億萬衆，俱侍衛是經。

此章以世法言，凡好道持誦是經之人，當依經說，有如是神童猛獸侍衛誦經者身。以道用言，飛天神王者，意轉靈寶昇玄之道也。破邪金剛者，武鍊也。護法靈童者，文烹也。救苦真人者，退魔也，復其天心也。金精猛獸者，五色獅子也。總而言之，凡行靈寶之時，則當轉護命之經。命吾黃意入東海，鞭起潛龍駕火輿，上昇玄谷之宮，乃曰飛天神王。倒流黃河之水，作他崑崙蕩氛之霖，乃曰破邪金剛。從西山跨白虎以歸家，乃曰護法靈童。戰退強魔，元神復位，乃曰救苦真人。身坐空玄五色獅子之上，凜然肅正其威儀，乃曰金精猛獸。通身萬神萬氣悉歸一心，乃曰各百億萬衆俱侍衛是經也。學人能悟此妙，內有默運

綿綿如是之功，外則自有十天善神長擁護其人。斯經玄妙，不可思議功德也哉。頌曰：一點無多子，超凡入聖基，道高魔自伏，神妙顯威儀。

隨所供養，捍厄扶衰，度一切衆生，離諸染著。此言有道誦經之人，隨身所至，自有神明擁護供養，外則攝伏羣魔，內則通真顯聖。一切含靈，皆沾道蔭，有情無情，咸登彼岸。所以捍其厄而扶其衰，度一切衆生，離諸染著也。頌曰：道妙無窮，神化莫測，救度衆生，扶衰捍厄。

爾時天尊即說偈曰：視不見我，聽不得聞，離種種邊，名爲妙道。

此天尊說經已畢，不敢自讚，故尊稱爾時天尊，即說偈言，形容大道之妙，總結此經一篇之玄。此四句偈，爲學人喫緊處。老子所謂視之不見，名曰夷，聽之不聞，名曰希，搏之不得，名曰微。所以道在天地，天地不知，道在萬物，萬物不知。澄之不清，撓

之不濁。動中不動，靜中不靜。妙體至虛，靈應萬有，不可得而形容也。可以離形棄智，即此用。不見中親見，見中不見，不聞中親聞，聞中不聞。默識心通，神領意會，到此之間，自離種種諸相，方名為妙道也。豈不為學人希有之功者乎？頌曰：大象無形，大音希聲，虛空粉碎，神昇太清。

太上昇玄說消災護命妙經註

①「大」字下疑脫一「千」字。

（李剛點校）

023 元始天尊說生天得道經

經名：元始天尊說生天得道經。
 撰人不詳，約出于唐宋間。南宋初編《秘書省續四庫書目》著錄『生天得道經一卷』，當即此書。底本出處：《正統道藏》洞真部本文類。參校本：《正統道藏》洞真部讚頌類：超然子王吉昌《生天經頌解》。

爾時元始天尊在大羅天上玉京山中，為諸天仙眾說此《生天得道真經》。告諸仙曰：吾今為汝略啟身心，明宣道要。十方得道神仙，皆從此經修行而通微奧。善男子、善女人，依憑齋戒，作是^①津梁，一切有為，顯諸真路^②，體此法相，乃可受持。能屏眾緣，永除染著，外想不入，內想不出，於正念

中^③，皆^④得五臟清涼，六腑調泰。三百六十骨節之間，有諸滯礙，十惡之業，百八十煩惱之業，眾苦罪源，悉皆除蕩。即引太和真炁注潤^⑤身田，五臟六腑，心目內觀，真炁所有，清靜光明，虛白朗^⑥耀，杳杳冥冥，內外無事，昏昏默默，正達無為，古今常存，總持淨念，從茲解悟，道力資扶，法藥相助。仍節飲食，驅遣鬼尸，安寂^⑦六根，淨照八識，空其五蘊，證^⑧妙三元，得道成真，自然昇度。爾時諸天仙眾白^⑨天尊言：自從無始以來，至于今日，未聞如是大乘經典。我等緣茲幸會，廣及一切，道果圓明，而說偈曰：

杳杳冥冥清靜道，昏昏默默太虛蹤，
 體性湛然無所住，色心都寂一真宗。

元始天尊說生天得道經

①「作是」，《生天經頌解》作「是作」。
 ②「路」，《生天經頌解》作「露」。
 ③「於正念中」，《生天經頌解》無此四字。
 ④「皆」，《生天經頌解》作「乃」。

⑤「潤」，《生天經頌解》作「想」。
 ⑥「朗」，《生天經頌解》作「晃」。
 ⑦「寂」，《生天經頌解》作「靜」。
 ⑧「證」，《生天經頌解》作「正」。
 ⑨《生天經頌解》「白」上有「上」字。

（尹志華點校）

024 生天經頌解

超然子頌

經名：生天經頌解。金元間道士超然子（王吉昌）撰。一卷。底本出處：《正統道藏》洞真部贊頌類。

元始天尊

至高至大虛無祖，接引羣生萬法根。
三十二天都教主，如如不動號為尊。

說此生天

生天生地亦生人，四象三才育五行。
無相無名天地始，有情有相物情宗。
得道真經。

深根固蒂始中心，復命歸根立本真。
鍊就九陽金鼎出，慧光朗照遍乾坤。
爾時，元始天尊

泓濛混合未分源，似有如無恍惚間。
至寂至虛含萬象，漸生五太立人天。

在大羅天上玉京山中，

大羅天上玉京山，曠朗無塵絕往還。

覺悟剎那生靜境，迷情如隔萬重關。

告諸仙曰：吾今為汝略啓身心，

虛無妙相身心啓，暫假凡軀主妙規。

金口泄開天地奧，靈光射出混元機。

明開道要。

道要玄微非有無，無中生就有形軀。

有中鍊出無形體，自在逍遙物外居。

十方得道神仙皆從此經修行而通微

奧，

萬八千篇立妙玄，生天得道始修仙。

愛河須仗舟船渡，到岸遺舟合自然。

善男子、善女人，

天尊普化遍十方，男女無殊一體觀。

大抵澄心崇至道，智愚凡聖總成仙。

依憑齋戒，是作津梁。

洗心防患真齋戒，除情去慾是津梁。

境滅心忘無垢染，靈明何處不圓方。

一切有為，顯諸真露，

色心未動本無為，朴散形生自有為。

籍假養真真露顯，莫因假物喪靈儀。

體此法相，乃可授持。

方求魚兔覓蹄筌，得兔忘蹄魚亦然。

乃可授持雖有相，有為無作越中邊。

能屏衆緣，永除染著，

外行周圓託衆緣，莫將名利喪根源。

洪鍾在叩聲雖嚮，應物無心兩事全。

外想不入，內想不出，

六門長閉緊牢關，莫縱三尸恣往還。

二物調和收寶鼎，一條銀焰出崑山。

乃得五臟清涼，六腑調泰，

四象中央一炁先，週流三界任巡還。

青龍火裏噴寒霧，白虎潭中吐赤煙。

三百六十骨節之間有諸滯礙，十惡之

業，

三三六六結成形，口四身心眼耳馨。

始為七情耽染著，屏除十惡認元宗。

百八十煩惱之業，

七情三業喪靈源，半是凡身半是仙。

鍊就極陽無相禮，自然煩惱不相干。

衆苦罪源，悉皆除蕩。

三彭恣縱業根源，五慾身耽惹禍愆。

罪業屏除無苦惱，自然超脫死生關。

即引太和真炁，注想身田，

意定心寧莫強求，綿綿來往自通流。

華池澆灌三田潤，要長靈芝飼白牛。
五臟六腑，心目內觀，

五氣朝元五氣清，六陰消盡六陽生。
慧眸踢起分明覷，內外無塵體自真。
真炁所有，清靜光明，虛白晃曜。

虛白靈光晃太空，輝輝煥煥古今存。
莫將明月清風論，風月何曾得久停。
杳杳冥冥，內外無事，

內無所感外無求，真樂真歡喜自由。
昏昏默默如醉夢，了無一物掛心頭。
昏昏默默，正達無爲，

混混茫茫有若無，昏昏裏性恬虛。
法界往來無所住，無為無作了元初。
古今長存，總持靜念，

浩劫綿綿非有有，不增不減不空空。
長江萬頃無波溢，湛湛澄澄息浪風。
從茲解悟，道力資扶，

迷雲消散靜乾坤，朗照虛無若鑒容。
玉兔奔馳投絳闕，金烏飛入廣寒宮。
法藥相助，仍節飲食。

天地相和萬物沖，衣食調攝自然通。
抽添水火無虧溢，煉就神丹射九宮。
驅遣鬼尸，安靜六根，淨照八識，

陰魔遣却六神寧，寶鼎祥光晃太空。
八景返為八色水，結成雲篆出崑崙。
空其五蘊，正妙三元，

五慾蠲除五蘊空，五般霞彩鬥爭新。
三官昇降無窮盡，穩跨金龍赴玉京。
得道成真，自然昇度。

金丹煉就保長生，玉性玲瓏萬法空。
得道有如非得道，自然昇度九霄中。
爾時諸天仙衆，上白天尊言：

諸天仙衆各歸依，仰謝天尊潔衆迷。
雲散風停天瑩靜，一輪明月照希夷。
自從無始以來，至於今日，

未分五太混元初，恍惚其中若有無。
浩劫長存無損益，有餘那得證無餘。
未聞如是大乘經典，

視之不見聽無聲，非色非空絕我人。
只為衆生著有相，教風權且立三乘。
我等緣茲幸會，廣及一切，道果圓滿。

未曉前生作甚緣，今生同遇上真傳。
亘初業障皆消散，行滿功周赴九天。
而作頌曰：杳杳冥冥清靜道，

無中生有陰陽道，五行內外俱顛倒。
忘心忘法亦忘形，杳杳冥冥清靜道。

昏昏默默太虛縱。

無拘無染越和沖，聲色非千萬法空。
得意忘言如酩酊，昏昏默默太虛縱。
體性湛然無所住，

絕情絕意忘憂慮，慧光不染纖塵汗。
茫茫浩劫獨縱橫，體性湛然無所住。
色心都寂一真宗。

正眼拂開塵世景，靈臺不掛半毫分。
真清真靜玄中妙，色心都寂一真宗。

生天經頌解

(曾召南點校)

025 元始天尊說得道了身經

經名：元始天尊說得道了身經。
又名《生天得道全真了身經》。
撰人不詳，似出於宋元時期。一卷。底本出處：《正統道藏》洞真部本文類。

爾時，元始天尊在玉清聖境清微天宮鬱羅蕭臺之中、森羅淨泓之上，現虛無自然有為真聖相，恢元始無極大道，闡揚混沌未分先天真奧妙論、清靜無為全真大道，為諸天仙眾說此《生天得道全真了身經》。

夫修鍊了身，飲食有則，禁口獨坐，口唇相沾，牙齒相對，眼不觀邪色，耳不聽淫聲，洗心滌慮，對境忘境，萬緣消息，外想不入，內想不出，莫起一念，萬事俱忘。凝耳韻，含眼光，緘舌

炁，調鼻息，存神定意，一心內守。調息綿綿，微微輕出，似有而無，莫教間斷。息依神定，性定命住，性命雙全，形神俱妙，與道合真。湛湛澄澄，杳杳冥冥，昏昏默默，純純全全，混混沌沌，精神魂魄意，三五混融，三元輻輳，合和四象，五炁朝元，三花聚頂，返本還元，復命歸根，萬神歸一，無所不包，無所不容。自然心火下降，腎水上昇，口裏津液，自然而生。烹煎煅鍊，久久不散，自然體中血脉如風行，腹中如雷聲鳴。無絃之曲，不撫而自聲，不鼓而自鳴。沖和炁透，醍醐灌頂，甘露灑心，晝夜無眠，三千日足，功成果滿，陰盡陽純，聖胎成就，身內有身，神成真聖。真聖合太虛，太虛合真空，真空合虛無自然。虛無自然是元始真一，元始真一是吾真身也。先天而生，生而無形；先天而長，長而無體。誰無形體，大道常存，永劫不朽不壞，萬聖同居，得觀內境，見虛無之事，神自言語，與天地齊壽，日月同年，脫離生死，方得全真道果。天得真一，神光清明；地

得真一，萬物發生；邪得真一，自然歸正；神得真一，千靈萬聖；人得真一，真神仙胎也。道本虛無，三才六合之中，無所不靈，無所不聖。道乃萬聖之祖，萬物之宗，清靜混沌，凝神鍊炁，二六時中，常清常靜。靈臺無念為清，一念不起為靜。意定神全水源清，意動神行水源濁。此是木金真間隔。飲食太飽，息炁難定；眼光不凝，神光不明；耳不絕聽，神不得住；聲色不絕，精炁不全；萬緣不絕，神不安寧。神不安寧，心神不靈。心神不靈，聖胎不成。聖胎不成，為陰靈下鬼。身是炁宅，心是神舍。意動則有為，有為則神動，神動則炁散。有為真動不動，靜在其中矣。息依神定，純純全全，混混沌沌，神凝炁結，全真無為，萬神歸一，則神炁聚。神炁聚，則五行真炁結成刀圭。神炁津液為真水火，嚙津服炁為飲刀圭，一名醍醐灌頂、甘露灑心，一名洗心滌慮。心神不動為之真沐浴。真清真靜，動在其中矣。修行道人，不識動靜真機，不達真常全真道理，如何

得道成真？息不動意定爲之抽，意不動神凝爲之添。神凝意動爲武鍊，息定神凝爲文烹。外想不入、內想不出爲固濟。二炁交合各一斤。虛無自然爲運用，萬神歸一爲守成。性定命住爲養火，鍊炁成神爲真金。心火下降爲復命，腎水上升爲歸根。火迎真水爲金液，水迎真火爲還丹。五行凝結爲九還，陰盡陽純爲七返。降伏內魔爲野戰，神全無欠爲全真。精血炁神真種子，神凝炁結合真空。中宮胎意爲黃婆，金情木性爲夫婦。心神真汞爲姤女，精炁真鉛爲嬰兒。精凝形固成黑龜，鍊神凝結爲赤蛇。煅鍊呼吸爲龍虎。龍虎龜蛇成一塊，爲和合四象。一性攝情爲金木併，陰陽還返爲水火交。火與木同源，兩性一家，南二東三同成五。南一，心神，火也。東三，肝木，性也。此是火生於木也。水與金同源，兩性一家，北一西四同成五。北一，腎精，水也。西四，肺金，情也。此是水生於金也。中五屬土，土者，意也。呼則虎嘯風生，虎嘯則汞投

鉛。汞即是性，性即是砂中汞，砂汞即是離中陰，離中陰即是人心中神炁也。息意定則神炁全，神炁全則了性。吸則龍吟雲起，龍吟雲起則鉛投汞。鉛即是命，命即是水中金，水中金即是鍊精化炁，鍊精化炁即是精炁凝，精炁凝則形固，形堅固則精炁全，精炁全即了命。性命雙全，精炁血滿，神凝炁結，三千功滿，鍊就純陽，是爲富國安民。精鍊成日精，血鍊就月華，炁鍊成黃金，髓鍊就白玉，腦鍊成丹砂，腎鍊就碑磬，心鍊成珊瑚。此是七寶，居身不散，功成行滿，跨鳳乘鸞，飛昇金闕，上朝玉帝，永爲真神仙矣。

元始天尊說得道了身經

（尹志華點校）

026 元始天尊說太古

經註

龜山長筌子註

經名：元始天尊說太古經註。
原題龜山長筌子註，此人係金元之際全真派道士。一卷。底本出處：《正統道藏》洞真部玉訣類。

太古經序

夫至道無言，真空非色，思之者，莫能知，觀之者，不可見，蹟之不可得，行之不能到，陶鑄天地，率循造化，寂而不動，應滿六虛，令萬物蒙休，羣生復命。巍巍乎至矣哉！非聖人孰能通之者耶？況元始天尊，慈心廣布，慧照十方，觀見衆生忘歸失本，宛轉世間，輪迴不息，長劫受苦，不能自明。遂感

法雨敷滋，宣揚妙道，引接有情，出生死海，遊清虛之境，恬淡之鄉，超乎塵垢，步乎寥廓，逍遙獨化，微妙玄通，無爲自然，返於純素冥極混茫者也。

元始天尊說太古經註

元者，氣之先也。始者，物之初也。是以虛無自然，清淨無爲，包羅衆妙，應接羣生，故曰元始者也。

天尊者，上玄至極，高明貴真，三界之主，天人之師，幽贊德號之所稱也。說者，宣述敷演也，造作遷流也。慈雲覆布，法雨垂滋，普潤羣情，善芽增長。

太古者，無名無象，不變不遷，虛空同體，歷劫長存，先天地而不爲老，後六極而不爲下，寂兮寥兮，獨立而不改，經陰陽而不殆，不生不死，無往無來，卓然安靜矣。

元始天尊大發慈悲之行，廣開方便之門，宣揚妙旨，述作微言，救度蒼生，悉除衆苦。經者，非俗談鄙語之稱，乃妙法真常之異號，總善之要徑，入聖之階梯，是逍遙之正路，平坦之玄途，廣莫之野，無何有之鄉。古今達士無不游茲。若苦海衆生，

素蘊仙風，宿有靈骨，遇此金文，一聞解脫，捐諸業縛，遠離煩惱，優游方外，詎不幸哉。

天尊曰：

夫聖人垂教，若天行四時，率信而善應也。語若樞機，正如號今發而直截，無不中也，出而威明，無不當也。譬如良藥玉漿、大明之燈，能治衆生一切苦疾，能破羣迷黑暗癡業。言勝金石，動若春風，激悟凡夫，頓開心地。榮通萬化，各復其根。引接世人，解冤釋縛，出離生死，超脫有無，游於大道，奚不至矣哉。

有動之動，在乎無動。有動者，應機也。無動者，抱元守一也，歸根復命也。故經云：清者濁之源，靜者動之基。唯精唯一，允執厥中。夫物芸芸，各復歸其根。歸根曰靜，至靜不動也。有爲之爲，在乎無爲。

神本湛寂，感而遂通，不得已而後起，隨機接物，妙用無窮。去智與仁，故循天之理，淡然無極，而衆妙

歸之。

氣住則萬物皆生，

專氣致柔，能如嬰兒。抱守沖和，真氣氤氳，萬物皆長生也。知和曰常，心使氣曰強。強者，堅強壯老，死之徒也。

氣泯則萬物皆滅。

氣絕神逝，九竅百骸變滅塵土也。更何疑之。

物物相資，固養其根。

以虛養虛，以實養實。何以故？忘形養氣，忘氣養神，忘神養虛，虛室生白，吉祥止止，神氣沖寧，靈根深固，故成長生久視之道也。

默而悟之，我自植之。

至道至玄，不假外物而得。默默昏昏，無應無問。靈光獨耀，迴脫根塵。體露真常，不隨萬法，可以全生，可以復本也。

出乎無間，

無間者，無有也。是不言之教，無為之益，圓通無礙，應化無窮，遍滿十方，時時運動，無有間斷也。

不死不生，

玄珠燦燦，今古常明。萬物混成，法法平等。非靜非染，無始無終。故曰不死不生者也。

與天地爲一者哉。

天道清虛，所以能長。地道寧靜，所以能久。人能悟理，達其妙道，致虛極，守靜篤，恬淡寂然，不為萬物之所累，清靜無為，可以與天地爲一者哉。

天尊曰：

天尊者，人人本有，箇箇具足。蓋謂衆生緣薄福鮮，煩惱障蔽，迷情重濁，不悟真源，雖遇明師，不信不曉。忘於目則光溢無極，

五色亂明，令人目盲。色者，彰也。色色者，未嘗顯。何謂也？法眼圓通，明照十方三界，觀物無物，觀空不空，視之冥冥。杳冥之中，獨見曉焉。靈光充塞，無窮極也。

泯於耳則心識常淵。

五音亂聽，令人耳聾。心是清淵，本自湛澄，是非言語，美惡聲音，皆為

妄情偽物，飄風驟雨，動擾心源，神室不靈。若能泯絕是非，不受於中，無聲之中，獨聞和焉。然後可以聽玄歌白雪，不鼓陽春，仙音之曲調也。

兩機俱忘，是謂太玄。

聲色雙泯，動靜兩忘，聽之不以氣，視之不以神，是謂太玄之妙，虛曠之靈。深之又深，而能物焉。神之又神，而能精焉。無為之為，不知而知，靈明曠徹，廣大虛寂，妙無邊際也。

混混沌沌，合乎大方；

物我俱忘，有無不立，昏昏默默，杳杳冥冥，無邊無際，非外非中，其游無端，其出無方，化育萬物，不可為象，混成無方隅也。

溟溟淖淖，合乎無倫。

至道重玄，浩浩蕩蕩，理無等倫。藏之則為元精，用之則為萬靈。含之則為太一，放之則為太清。無相無名，至尊至貴，迷之則凡夫，悟之則聖賢。

天地之大，我之無盈；

古今聖賢，得道真人，提挈天地，把握陰陽，雕琢萬物，澤及羣品，不為難乎。

萬物之衆，我之所持。

宇宙在乎其手，萬化生乎一身。

曷有窮終，以語其弊哉。

聖人直說妙道，普現普光，惟恐後世凡夫不信疑惑，大發謙辭，若言不盡其理，以語為弊，惡舛訛之說也。

天尊曰：

天尊者，微妙玄通，深不可識，故曰口帶玄而無路，舌頭談而不談。

養其真火，身乃長存。

真氣薰蒸而時無寒暑，純陽流注而民無死生。故曰心燈朗照，法身長存。慧燭不明，道容豈載。

固其真水，體乃長在。

天地相合，以降甘露，滋榮羣品。人能安靜和暢，寶瓶堅固，玉漿香美，真水下降，滋養妙體，返老如童孩，不亦善乎。

真真相濟，故曰長生。

水火既濟，魂魄相守，鉛汞相凝，鍊成大藥，結就金丹。燦爛光輝，無幽不燭。純白入素，無為復朴。長生不滅，沒身不殆，號曰真人者也。

天得其真，故長；

天得純粹不雜之道，則故能覆蓋羣有，包羅萬象，歷劫清凝，鑒物無私，不言而應，妙用無窮，高虛長遠，大無不包，久而不易也。

地得其真，故久；

地得其真，則育養萬物，深根固蒂，安靜無為，乃長久也。

人得其真，故壽。

死而不亡者壽。但世人悟其真趣，得其妙元，與道合真，沒身不殆，同其聖賢，令後代祭祀不輟，何以加此焉。

世人所以不得長久者，養其外，

五味濁口，五臭熏鼻，聲色闕塞耳目，取捨滑心，使性飛揚，迷情徇物，念念相撓，使心智遊乎外，鬼神入其內，是非寵辱，亂擾靈源，與物相刃相靡，終身疲役，區區業網，而不知

其歸，可不悲乎。身適美厚，錦繡羅縠，意迷邪見，顛倒妄想，至於窮年，不知天命。喪已於物，失性於俗者，謂之倒置之民，可不哀哉。

壞其內也。

內本清靜光明，虛白晃耀，奈何愛染萬緣，不生返照，飄飄一性之散，沉沉萬劫之迷，難省真身，遷於別蛻，迷其真源，壞其內也。萬劫輪迴，生死海中，不能超度，甚可哀憐矣。

長生之道，

體露真常，不拘文字。心性無染，本自圓成。但離妄緣，長生之道，得之可矣。

不視不聽，

不視不聽者，墮其肢體，黜其聰明，外不觀乎宇宙，內不知有太初。不登崑崙，不游太虛，坐忘遺照，合乎洞玄，同而無好，化而無常，希夷微妙，不可測量耳。

不華不榮，

不利貨財，不近富貴，不苟於人，不飾於物。衆人熙熙，我獨怕兮，衆人

昭昭，我獨若昏。捐名忘勢，全身遠害，乃合天道也。

棄世離俗，

不尊顯於市朝，不困囚於妻子。如孤雲野鶴，飛騰自在，舒卷無心，乃修真之士也。

積精全神，

賢人尚志，聖人貴精。內以沖和之氣養神，外以諸聖妙法以滋慧命。內外瑩徹，覺性圓明。心境俱忘，頓超諸漏。體此法乃可修持也。

寂寞無爲，

無為者，無不為也。恬淡無為，乃合天德。故曰無不忘也，無不有也。澹然無極，而衆美從之。故曰寂寞恬淡，虛無無為，乃天地之平，道德之質也。故聖人恬淡矣，平易矣。平易恬淡，則哀樂不能入，邪氣不能襲，其神不虧，故其德全，靜一而不變也。故一切賢聖，其道密庸，不以無為法而有成聖功者，理未聞也。

乃得道矣。

夫道者，有情有信，無為無形，可傳

不可得，可受不可見。先天地而生，生而無名，然未嘗生也；後今古而存，存而無象，然未嘗存也。故曰不可思議。既不可致詰，思惟何以得之。衆生但能心境兩忘，一念不生，呼吸屈伸，踏步蹠蹈，不知是誰，更休得携燈問火，涉水尋津，頓悟本心，即得道矣。

茲為衆生即說偈曰：

天尊宣祕密，方便示慈悲。法雨滋羣品，玄談釋衆疑。觀凡如夢幻，引接悟希夷。水火歸爐竈，雲霞罩坎離。沖虛通聖道，清靜結靈芝。物得能長久，人行絕禍危。逍遙三界外，永永證無為。

元始天尊說太古經註

(李剛點校)

027 太上赤文洞古經註

龜山長筌子註

經名：太上赤文洞古經註。金末元初全真道士長筌子註。一卷。底本出處：《正統道藏》洞真部玉訣類。

太上赤文洞古經註序

夫至道無言，真空非色，思之者莫能知，觀之者不可見，蹟之不可得，行之不能到，陶鑄天地，率循造化，寂而不動，應滿六虛，令萬物蒙休，羣生復命。巍巍乎至矣哉！非聖人孰能通之者耶？況元始大聖，慈心廣布，慧照十方，觀見衆生忘歸失本，宛轉世間，輪迴不息，長劫受苦，不能自明。遂感法雨敷滋，宣揚妙道，引接有情，出生死海，遊清虛之境，恬惓之鄉，超乎塵垢，

步乎寥廓，逍遙獨化，微妙玄通，無爲自然，返於純素冥極混茫者也。

太上赤文洞古經註

操真章上

有動之動，出於不動。

有動者，應機也。無動者，抱元守一也，歸根復命也。故經云：清者濁之源，靜者動之基。唯精唯一，允執厥中。夫物芸芸，各復歸其根。歸根曰靜，至靜不動也。

有爲之爲，出於無爲。無爲則神歸。

神本湛寂，感而遂通，不得已而後起，隨機接物，妙用無窮。去智與仁，故循天之理。淡然無極，而衆妙歸之。

神歸則萬物云寂。

專氣致柔，能如嬰兒。抱守沖和，真氣氤氳，萬物皆長生也。知和曰常，心使氣曰強。強者堅強壯老，死之徒也。

不動則氣泯，氣泯則萬物無生。

氣絕神逝，九竅百骸，變滅塵土也，更何疑之。

神神相守，物物相資，厥本其根。

以虛養虛，以實養實。何以故？忘形養氣，忘氣養神，忘神養虛，虛室生白，吉祥止止，神氣沖寧，靈根深固，故成長生久視之道也。

默而悟之，我自識之。

至道之玄。不假外物而得。默默昏昏，無應無問，靈光獨耀，迴脫根塵。體露真常，不隨萬法，可以全生，可以復本也。

入乎無間，

無間者，無有也。是不言之教，無為之益。圓通無碍，應化無窮，遍滿十方，時時運動，無有間斷也。

不死不生，

玄珠燦燦，今古常明。萬物混成，法法平等。非靜非染，無始無終，故曰不死不生者也。

與天地為一。

天道清虛，所以能長。地道寧靜，所以能久。人能悟理，達其妙道，致虛極，守靜篤，恬淡寂然，不為萬物之所累，清淨無為，可以與天地為一者

哉。

入聖章中

忘於目，則光溢無極。

五色亂明，令人目盲。色者，彰也。色色者，未嘗顯。何謂也？法眼圓通，明照十方三界，觀物無物，觀空不空，視之冥冥。杳冥之中，獨見曉焉。靈光充塞，無窮極也。

泯於耳，則心識常淵。

五音亂聰，令人耳聾。心是清淵，本自湛澄。是非言語，美惡聲音，皆為妄情偽物。飄風驟雨，動擾心源，神室不靈。若能泯絕是非，不受於中，無聲之中，獨聞和焉，然後可以聽玄歌白雪，不鼓陽春，仙音之曲調也。

兩機俱忘，絕衆妙之門。

聲色雙泯，動靜兩忘。聽之不以氣，視之不以神，是謂太玄之妙，虛曠之靈。深之又深，而能物焉。神之又神，而能精焉。無為之為，不知而知。靈明曠徹，廣大虛寂，妙無邊際也。

純純全全，合乎大方。

物我俱忘，有無不立。昏昏默默，杳冥冥。無邊無際，非外非中。其游無端，其出無方，化育萬物，不可為象，混成無方隅也。

溟溟滓滓，合乎無倫。

至道重玄，浩浩蕩蕩，理無等倫；藏之則為元精，用之則為萬靈，含之則為太一，放之則為太清；無相無名，至尊至貴，迷之則凡夫，悟之則聖賢。

天地之大，我之所維。

古今聖賢，得道真人，提挈天地，把握陰陽，雕琢萬物，澤及羣品，不為難乎？

萬物之衆，我之所持。

宇宙在乎其手，萬化生乎一身。

曷有窮終，以語其弊哉。

聖人直說妙道，普現普光，惟恐後世凡夫不信疑惑，大發謙辭，若言不盡其理，以語為弊，惡舛訛之說也。

住世章下

養其無象，象故常存。

真氣薰蒸，而時無寒暑。純陽流注，

而民無死生。故曰心燈朗照，法身長存。慧燭不明，道容豈載？

守其無體，體故全真。

天地相合，以降甘露，滋榮羣品。人能安靜和暢，寶瓶堅固，玉漿香美，真水下降，滋養妙體，返老如童孩，不亦善乎。

全真相濟，可以長久。

水火既濟，魂魄相守，鉛汞相凝，鍊成大藥，結就金丹，燦爛光輝，無幽不燭，純白入素，無為復朴，長生不滅，沒身不殆，號曰真人者也。

天得其真，故長。

天得純粹不雜之道，則故能覆蓋羣有，包羅萬象，歷劫清凝，鑒物無私，不言而應，妙用無窮，高虛長遠，大無不包，久而不易也。

地得其真，故久。

地得其真，則育養萬物，深根固蒂，安靜無為，乃長久也。

人得其真，故壽。

死而不亡者壽。但世人悟其真趣，得其妙元，與道合真，沒身不殆，同

其聖賢，令後代祭祀不輟，何以加此焉。

世人所以不能長久者，為喪其無象，散其無體，

五味濁口，五臭熏鼻，聲色闕塞耳目。取捨滑心，使性飛揚，迷情徇物，念念相嬰，使心智遊乎外，鬼神入其內，是非寵辱亂擾靈源，與物相刃相靡，終身疲役。區區業網而不知其歸，可不悲乎？身適美厚，錦繡羅縠，意迷邪見，顛倒妄想，至於窮年，不知天命。喪己於物，失性於俗者，謂之倒置之民，可不哀哉！

不能使百骸九竅與真體並存，故死矣。

內本清靜光明，虛白晃耀，奈何愛染萬緣，不生返照，飄飄一性之散，沉沉萬劫之迷，難省真身，遷於別蛻，迷其真源，壞其內也。萬劫輪迴，生死海中，不能超度，甚可哀憐矣。

太上赤文洞古經註

（李剛點校）

028 無上赤文洞古真

經註

都梁參學清庵瑩蟾子李道純註

經名：無上赤文洞古真經註。
元李道純註。一卷。底本出處：《正統道藏》洞真部玉訣類。

無上：只這兩箇字，一經之義盡矣。首章云不動無爲，次章云冥目忘耳，下章云無象無體，都是這箇題目。雖然，却不可作有無會，亦不可作無無會，無中不無，方是真無。學者要識這箇真無。當知體象是幻垢，色聲是根塵。外空色聲，內空體象，內外俱空，真一常存。豈非不無中無乎？太上云：空無所空。所空既無，無無亦無。無無既無，湛然常寂。《易係》云：易無思也，無爲也，寂然不動，感而遂通。川老云：有象有求皆是妄，無形無象墮偏枯。堂堂真體何曾問，一道寒光燦太虛。以此觀之，三教先師皆以真無發明後學，使學者向不動中動，無爲中爲。內忘形體，外忘聲色，養其無象，守其無體，全其本真，超出虛無之外，是謂最上一乘，無上可上也，故曰無上。

赤文：赤者，虛無空烝也。文者，煥然普照也。釋氏以赤身爲空身，以赤手爲空手，以赤地爲空地，以赤洒洒爲空象，故之赤者，空之喻也。《說卦》云：乾爲赤。乾，天也，亦是空之義。故知赤文乃是空烝。《度人經》云：五文開廓。又云無文不度等語，皆謂煥然之明也。學者誠能抱本歸根，入乎無間，則空烝煥然，塞乎天地，光明普照，故曰赤文也。

洞古：洞，觀也。古，始也。觀其古始，則知其終。即是原始返終之說。太上云：執古之道，以御今之有。《陰符經》云：觀天之道，執天之行，盡矣。學者但能忘目泯耳，收視返聽，則自然光溢無極，心識常淵，深不可測也。作是觀者，名爲照了，始達妙音，洞觀無礙，以知古始也，故曰洞古。

真經：經，徑也，衆所通行之大路。是謂最上一乘之妙，虛無空烝之玄，作洞觀無礙之法門，造原始返終之間奧。超無生之捷徑，真出世之要津也。讀是經者，切不可尋行數墨，當於言句之外會意可也。苟或嘿而悟之，使自得之，直造虛無之真境，同游元始之先天，故曰真經。

有動之動，出於不動。有爲之爲，出於無爲。橫渠云：動無靜，靜無動，物也。動有靜，靜有動，神也。老子云：無爲無不爲。予謂不動中動，真動也，無爲中爲，真爲也。神歸則萬物芸寂，氣泯則萬物無生。老子云：夫物芸芸，各復歸其根。歸根曰靜。釋云：心滅種種法滅。予謂潛神於絕境，萬物芸然而不動。息於中虛，萬物

寂然而無生。神神相受，物物相資。《易係》云：生生不窮之謂道。予謂以神感神，以物感物，皆無窮。厥本歸根，嘿而悟之。《易係》云：嘿而成之，不言而信。予謂存真一於木之根，謂之本。存真一於木之梢，謂之末。神領意會者，則能窮根悟本。我自殖之，入乎無間。《易係》云：

聖人以此洗心，退藏於密。予謂殖者，埋藏也。委身於絕境，則能入乎無間之域。不死不生，與天地爲一。《易係》云：原始返終，故知生死之說。

《心經》云：不生不滅。予謂生死乃晝夜之常。晝夜自晝夜，死生自死生。作如是見者，與天地爲一。

右操真章。不動之動，無爲之爲，操真之體也。神歸烝泯，相受相滋，操真之用也。歸根自殖，與天地爲一，操真之聖功。故授之以入聖章。頌曰：神從不動動中動，道向無爲爲處爲。見得動中爲底箇，先天造化總歸伊。

忘於目則光溢無極，泯於耳則心識常淵。老子云：不窺牖，見天道。不出戶，知天下。

予謂目不視則神光普照，耳不外聞則心識弘深。兩機俱忘，純純全全，合乎大方。溟溟淅淅，合乎無倫。《詩》云：不識不知，順帝之則。先賢云：渾渾淪淪。《度人經》云：溟溟大梵，寥廓無光。予謂見無所見，聞無所聞，純乎純一，全乎全真，委身寂然，委心泯然，故能超今越古，出乎無倫。

天地雖大，我之所維。萬物之衆，我之所持。《易係》云：效法莫大乎天地。孟子

云：萬物皆備於我。予謂天動地靜，我得總持。萬物之衆，統之則一。曷有終窮，以語其弊哉。先儒云：天地人物，不可終窮。苟言可者，豈非弊乎。予謂一以貫之，其理自盡。

右入聖章。忘目泯耳，色聲無礙，則能與天地混而爲一。若於萬物有所窒礙，不造理者也，深造理者，一以貫之。三才總持，所以長久。故次之以住世章。頌曰：無聞無見終爲妄，隨色隨聲又屬塵。二理總持方入聖，功深力到造全真。

養其無象，象故常存。守其無體，體故全真。老子云：大象無形。又云：外其身而身存。予謂無象之象乃實象，故歷劫不壞。無體之體乃真體，故全其本真。全真相濟，可以長久。先儒云：純一無偽。予謂純一謂之全，無偽謂之真。全真相濟，長生久視之道也。天得其真故長，地得其真故久。老子云：天地所以能長且久者，以其不自生。予謂不自生，忘形也，故能全其本真，與天地齊久。世人所以不得長久者，爲喪其無象，散其無體。《金剛經》云：一切有爲法，如夢幻泡影。予謂夢幻泡影，雖有象而終化。故著於體象，皆是妄幻，終有敗壞。不能使百骸九竅，與真體並存，故死矣。開禪師云：才涉有無喪身命。予謂世人所以不得長久者，貪著故也。念著者，爲物欲所轉，故與物俱化，不能使百骸九竅與真體並存，故死矣。

右住世章。養其無象，守其無體，故長久。執著之者，喪其本真，故早已。有形終有壞，無形故長在。萬有歸一無，故全其本真。一無歸萬有，故失其本真。去彼取此者，是謂至人，可以留形住世，可以長生久視。雖然，更有出世無生道在，且道如何是出，是無生底道？咄。幻體有形終有壞，法身無相故長存。有形無相都空盡，方是如不動尊。

無上赤文洞古真經註

（李剛點校）

029 老子說罪福大報 應經

經名：老子說罪福大報應經。
撰人不詳，約出於唐代。原本卷數不詳，現僅存第七卷。《正統道藏》未收。底本出處：敦煌P.2818號寫本。

老子說罪福大報應經第七

罪有十不善之報，
福有十信行之報。

尔時衆中有一真人，名曰惠通，整頓威儀，上白之曰：每聞愚聾衆生，行十不善之惡業者，今所未詳，願具示之，令衆得知，將爲教戒之矣。

於是高上老子又告之曰：第一行不善之惡業者，此間南方棄賢世界穢土之中，乃有女之人，生性慳貪，藏舉

畜積，不肯施散，營建功德〔名〕望^①。以是業緣，命終之後，生於餓鬼道中，飢渴惆悵，歸趣無所，飢則食炭，渴飲火精，飢渴之火，焚燒其身，無福可拔，難以^②得出。万劫之後，忽還人中之者，則貧窮孤露，減竿促年，三壽不終。若欲滅斯第一行不善，慳貪不肯營建之大罪者，唯唱大慈大悲尋聲救苦元始无上尊者，方可以得免此受報之貧窮，并去減竿之促年。

第二行不善之惡業者，乃有衆生受化寄物，抵拒不還，違心不臣。如此之人，命過之後，亦落餓鬼道中，飢渴惆悵，歸趣無所，飢則食炭，渴飲火精，飢渴之火，焚燒其身，負他財物，難以得出。万劫之後，若還人中之者，則生身瘦瘠音漏瘡，醫所不救，常被人枉，屈滯無申。若欲滅斯第二行不善，違心受寄之大罪者，唯唱大慈大悲尋聲救苦元始无上尊者，方可以得免此受報之瘦瘠，并去屈滯之無申。

第三行不善之惡業者，乃有衆生自行手煞，又以財物雇人，令煞人之

命。惡業既深，命過之後，亦落餓鬼道中，飢渴惆悵，歸趣無所，飢則食炭，渴飲火精，飢渴之火，焚燒其身，負他之命，難以得出。万劫之後，忽生人中之者，家遭疫病，斷後滅門，无人祭祀。若欲滅斯第三行不善，煞人之大罪者，唯唱大慈大悲尋聲救苦元始无上尊者，方可以得免此受報之疫病，并去滅門無祭祀。

第四行不善之惡業者，乃有婦人私避夫婿，亦避女男，烹肥宰膩，獨食偷餐。以是惡緣，命過之後，亦落餓鬼道中，飢渴惆悵，歸趣無所，飢則食炭，渴飲火精，飢渴之火，焚燒其身，苦痛楚毒，難以得出。万劫之後，忽以受生，生作護食之狗，乃無母子之情，逢食而相齧互絞反。若欲滅斯第四行不善，偷食之大罪者，唯唱大慈大悲尋聲救苦元始无上尊者，方可以得免此受報獨食之狗身，并去狗无母子之重情。

第五行不善之惡業者，乃有衆生心不殷勤，齋供不潔，用以供師。此人命終，亦落餓鬼道中，飢渴惆悵，流轉

无趣，飢則食炭，渴飲火精，飢渴之火，焚燒其身，苦痛楚毒，難以得出。万劫之後，忽生受報，報作狗身，食人不淨，常致腥臊。若欲滅斯第五行不善，作齋食不淨之大罪者，唯唱大慈大悲尋聲救苦元始无上尊者，方可以得免此受報狗食人之不淨，并去狗之常有腥臊。

第六行不善之惡業者，乃有衆生狂誣^③良善，引入幽牢，斷其水火，禁以資糧，使命終將爲快己。此人命過之後，亦落餓鬼道中，被閉惆悵，常見飢渴，飢則食炭，渴飲火精，飢渴之火，焚燒其身，苦痛楚毒，難以得出。万劫之後，忽還人中之者，常遭橫事，羈繫囹圄，用報宿冤。若欲滅斯第六行不善，枉誣良善之大罪者，唯唱大慈大悲尋聲救苦元始无上尊者，方可以得免此受報常遭橫事，并去於宿冤。

第七行不善之惡業者，乃有丈夫作人獨食，不賑妻兒，甘肥餼息營反具，狼藉座籩。妻子但聞其香，不知其味，何況戚屬，豈籩同餐。此人命終，亦落

餓鬼道中，飢渴惆悵，流轉無從，飢則食炭，渴飲火精，飢渴之火，焚燒其身，苦毒楚痛，難以得出。万劫之後，忽生人中之者，孤獨乞食，衣弊履穿，命不肯終。若欲滅斯第七行不善，不賑妻兒飲食之大罪者，唯唱大慈大悲尋聲救苦元始无上尊者，方可以得免此受報孤窮乞食，并去衣之弊穿。

第八行不善之惡業者，乃有衆生貪利太深，當爐酤酒，加水增灰，或內蚯蚓，出色令甘，以誑百姓，自作教他，行之不已。此人命終，亦落餓鬼道中，飢渴惆悵，輪轉無從，飢則食炭，渴飲火精，「飢渴之火，焚」^④燒其身，苦毒楚痛，難以得出。万劫之後，忽生人中之者，身遭水瘡鐘勇反，行步烝喘，顏色痿黃。若欲滅斯第八行不善，酤酤爲去聲也酒加水之大罪者，唯唱大慈大悲尋聲救苦元始无上尊者，方可以得免此受報身之水瘡，并去顏色之痿黃。

第九行不善之惡業者，乃有衆生心性凶獷瓜猛切，調伏見難，教計自由，不用他言。此人命終，亦落餓鬼道中，

飢渴惆悵，輪轉無從，飢則食炭，渴飲火精，飢渴之火，焚燒其身，苦毒楚痛，難以得出。万劫之後，忽以託生之者，常作水牛，爲性狼狽，而難調伏，遂使^⑤鼻穴。若欲滅斯第九行不善，心性凶獷之大罪者，唯唱大慈大悲尋聲救苦元始无上尊者，方可以得免此受報身作水牛，并去穴鼻之苦。

第十行不善之惡業者，乃有衆生賈音商估諸香，取他貴值，付以惡香，貪利誑惑謂愆。此人命過，亦落餓鬼道中，常聞臭烝入鼻額間，飢渴惆悵，歸趣無所，飢則食炭，渴飲火精，飢渴之火，焚燒其身，苦毒楚痛，難以得出。万劫之後，忽以受生，報作蝘蝓，轉以糞丸，用爲甘食。若欲滅斯第十行不善，賣香誑惑之大罪者，唯唱大慈大悲尋聲救苦元始无上尊者，方可以得免此受報蝘蝓之身，并去不淨之轉丸。

於是高上老子又告惠通真人曰：彼之東方難勝淨土之中，乃有善女人，第一修信善行之者，敬信尊像，他自共脩，營造供養，功用非^⑥。後身受報，

得生貴人之家，常爲人尊，世世榮樂，胤祚豪強。

第二脩信善行之者，敬信經法，聽讀不虧，宗奉供養，勸誦更加。後生人中，世世欣慶，門族榮華，仕官不絕。

第三脩信善行之者，敬信法師，施^⑦以法服，助以香油，飴以齋中，功感諸天。後生人中，身无疾病，資貌絕偉，冠善蟬聯。

第四脩信善行之者，常行慈念，不煞放生，廣救一切含血衆生。後之受報，三壽不夭，世世康強，不遭橫禍。

第五脩信善行之者，□□吾遜讓^⑧退身，評詳鬥亂，計諍常无。後生人中，形相姝好，哥詠語言，行步舉止，視無厭足。

第六脩信善行之者，好脩齋戒，檢御非違，齋業亂敗無從。後生人中，智惠聰達，廣覽經書空无法理。

第七脩信善行之者，不說人私，不談骨肉殛毒，形正心平。後生人中，財祿豐贍成艷反，勝越閭里，長雅逍遙。

第八脩信善行之者，不自是而非

彼，不長己而短他。後生人中，形相嚴麗，長大過人，出語香潔，他人樂之，悉用其說。

第九脩信善行之者，攝養孤遺，慈念老病，施惠貧窮。後生人中，身有威德，人見伏從，終不違逆，崇敬无冤。

第十脩信善行之者，不恡錢財，不簡貴賤，承事賓旅，迎接有序。後生人中，所住所行，爲他祇敬，饋遺不窮。

一切未脩之人，若欲願斯十善福報之者，當唱大慈大悲尋聲救苦元始无上尊者，方可以得此果。

於是惠通真人既蒙高上神尊賜示衆生十不善之業，又示衆生脩十善之信行，既將自利，亦欲利他，請奉所聞，廣加開化，令悉悟解。預是徒衆，歡喜彈指，一時再拜，頂禮奉行。

大報應經卷第七罪有十報，福有十報。^⑨

①「名」字原缺，據前後文義補。

②「難以」，原作「難從」，據後文例改。

③「狂誣」，當從後文作「枉誣」。

④「飢渴之火焚」，五字原缺，據前後文例補。

⑤「遂使」，原誤作「逐使」。

⑥原本「非」字下當缺漏一字。

⑦「施」字原缺，據文義據補。按南北朝隋唐靈寶經中，常勸信徒施助法師法服及香油。

⑧經文「讓」字前原缺一字，據注文推測，疑當作「謙讓」。

⑨以上經文原抄本中部分俗寫異體字，錄文已改作通行繁體字。

（王卡點校）

030 老子玄通經

經名：老子玄通經。又名《天應經》。撰人不詳，約出於南北朝或唐代。一卷。《正統道藏》未收。底本出處：貞松堂藏敦煌寫本。

老子玄通經亦曰天應經

老子曰：夫道分靈布化，生成萬物，精係於天，質凝於地，人動作吉凶，莫不應之於天。故星象明耀，彰於禍福，所以聖人設教，令勤悔謝，奉行齋誠，建諸善功，慈仁忠孝，敬賢任能，濟惠貧弱，拯救危苦，愛養孤寡，撫育病痛，憫念蟲魚，不傷草木，放生贖命，開悟愚迷，慈心萬物，普度衆生，則諸天靈司列言，太上延壽益年，名書上清，天應嘉慶，富貴壽樂，子孫賢孝，智惠

聰明，門戶興盛，胤嗣不絕。若毒害傷割，讒諛諂佞，妒嫉良善，矯黠欺詐，貪取無厭，蠱道祝詛，殺伐衆生，不慈不孝，不義不仁，邪淫放縱，綺語妄言，嘖嘖自是，傲誕師尊，啖食酒肉，譖毀賢明，憎嫌老病，欺犯貧窮，不念善道，唯惡爲先，地官列刺，上聞諸天，削除生錄，北帝舉名，天應凶禍，衆惡相加，刀兵水火，虫獸虎狼，毒螫傷害，形獄繫閉，疾病灾厄，凶殃輻軻，貧窮孤寡，万事屯遭。世人凡愚，不信罪福，唯求衣食，貪聚財寶，以育子孫，終日造罪，未嘗修善，常謂此身千年不死，豈知臟滿命窮，神逝形亡，魂被收錄，送於酆都，晝夜考掠，辛苦備經，動則万劫，无有出期。吾念愚迷，說法度人。

老子曰：万兆云云，謂之行尸，飢能知食，寒知覓衣，不識宿命，不識因緣，豈知罪福，善惡吉凶，故諸天哀敏，降生聖人，與之作主，建國設官，擇賢選良，勸化人民，養育凡愚，使得安全。非欲自貴，馳聘淫奔，廣造宮苑，器服奢華，賦役勞苦，損害万人，遨遊田獵，

殺伐无度，峻其威刑，明其賞罰，動乖大道，不順人心，百姓怨酷，上聞於天，象靈暴怒，諸灾競生，水旱虫霜，温行疫病，万癘交集，身滅國亡，古來暗主虐君，受其刑戮，亦何量哉。

老子曰：人主執生殺之命，群生父母行教之首，善惡吉凶，皆奉於君。君若行善，則万人亦善，君若行惡，則万人亦惡，君若清淨，万人忠正，君若貪濁，万人淫欲，舉動運爲，皆本於君。故人主者，常當清淨无爲，少私寡欲，則常守其國。

老子曰：天下鳥獸虫魚，萬物草木，一切有形在於土地者，悉是國主所化，若人君行善，則万物亦善，天應以善，國中之物，莫不皆善，故太平之世，君聖臣賢，父慈子孝，兄友弟悌，夫順妻貞，人民淳朴，草木滋茂，男女聰明，風雨調節，日月洞清，星辰合度，四氣平和，百穀豐稔，兆庶歡娛，毒虫惡草，不生於郊，祥禽靈獸，神芝玉英，靈雲吉瑞，天應休禎。若無道世，君暗臣愚，諂佞讒害，滿於朝廷，小人道長，君

子道窮，父子不穆，兄弟異居，夫妻異心，人民矯黠，男女醜陋。風雨不調，草木枯瘁，百穀不成，星宿失度，日月昏昏，百姓飢寒，人民死亡，毒草惡虫，隨處聚生，泉源枯塞，山岳崩摧，天裂地坼，雨血雨灰，攙搶枉矢，旬始縱橫，神吟鬼哭，厲厲交并，水旱虫霜，兵寇死亡，万人怨訴，天應不祥。

老子曰：君爲其首，臣爲手足，人爲其身，君臣百姓，同一形也，有一不和，則身不安。治國養人，亦如治身，百節調適，形則長存，明君治國，先存於人，後存其身，所以長久，天下太平。

老子曰：人之所喜，富貴壽樂也，所以喜之，欲以資身，而求之過度，遂至顛危，不亦愚乎。夫飲食不過滿腹，衣服不過遍形，車馬不過容體，宮宅不過藏身，而周身之外，並爲禍患，所以明君薄其飲食，廉其衣服，儉其車馬，卑其宮宅，省其遊娛，止其田獵，子孫昌熾，百姓安樂，而人愛之，過於父母。及至庸君暗主，窮天下之味，以供其口，殫天下之帛，以給其身，飾車馬以

充閑，廣宮宅以自居，百姓勞苦，怨訴於天，天應不祥，身死國殘，子孫絕滅，痛哉痛哉。

老子曰：富貴莫若知足，貴莫若無罪，壽莫若盡年，樂莫若無憂，善莫若全身，智莫若達道，明莫若內觀，慈莫若自愛，賢莫若自知，反視內聽，常自觀身，清淨無欲，空虛其心，万灾不干，道德滿身。

老子曰：道常欲人之生，而人不能保之，人若能虛其心，愛其神，保其氣，嗇其精，不須求道，而道自來。

老子曰：天象至遙，善應人心，謂道無靈，善知人情，禍福報應，其猶影響，子心未言，道聞子聲，子心欲動，天爲子怒，天道无心，其如人心，幽潛隙曲，莫不照臨，所以然者，一切善惡，諒在子心，心善則應善，心惡則應惡，永不乖也。

老子曰：心者微妙无形，出入身中，人不覺知，包裹天地，能入細微，急如掣電，疾若風馳，與道變化，心連色持，虛寂恬淡，常存不移，悟則易了，迷

則難知，不欲躁擾，唯願無爲。

老子曰：天地日月星辰，山河溪谷，風雲草木，鳥獸虫魚，一切万物，象衆雖多，靜而思之，總在心中，所以遠取諸物身，了然懸解，與道合真，尹喜稽首伏受要言。

老子玄通經亦曰天應經一卷

①「溫行」，疑當作「流行」。

②「貴」，疑此字爲衍文。

031 老子十方像名經

經名：老子十方像名經。撰人不詳，約出於唐代。假託高上老子說十方天尊靈像名號，勸人敬禮供養。原本卷數不詳，現殘存上卷。底本出處：敦煌S.1513、P.3344、S.6009V號寫本^①。

老子十方像名經卷上

四方品有二百卅名

尔時高上老子與十方十真、十部威神、無量等衆，遊歷十方無極世界之中，教化十方一切衆生。乃見十方一切衆生，以作十方百惡重罪。緣此罪故，出閻入明，一死一生，輪轉無滅，流曳十方地獄之中。或墮東方風雷地獄之中，或入南方鑪炭地獄之中，或在西

方金槌地獄之中，或處北方寒冰地獄之中，或落東北溷湯地獄之中，或墜東南銅柱地獄之中，或陷西南屠割地獄之中，或沒西北火車地獄之中，或投上方火阬地獄之中，或沉下方糞阬地獄之中。種種受罪，各各不同。身首糜碎，一分一張，一苦一痛，深爲悲傷，唯罪是履，極見難忍，愍之在心，無復已。故爲說此十方天尊靈像一千一百六十名號，欲令十方無極世界之中一切衆生敬禮稱揚，用爲二代存亡悔過滅惡，生福長善。故一一具之，各宜諦聽。

於是高上老子乃告東方普濟真人曰：東方九炁無極世界之中，有九十天尊靈像名號，禮之者滅罪無量，得福無量。

- 至心敬禮東方普慈護國天尊。
- 至心敬禮大忍無礙天尊。
- 至心敬禮東華上相天尊。
- 至心敬禮青華至極天尊。
- 至心敬禮青靈妙寶天尊。
- 至心敬禮青和虛極天尊。

- 至心敬禮青元積善天尊。
- 至心敬禮皇上真老天尊。
- 至心敬禮金闕玉虛天尊。
- 至心敬禮玉華玄應用尊。
- 至心敬禮靈都大度天尊。
- 至心敬禮玄靈至德天尊。
- 至心敬禮高上太虛天尊。
- 至心敬禮圓明虛極天尊。
- 至心敬禮至明真相天尊。
- 至心敬禮寶相元和天尊。
- 至心敬禮寶藏圓極天尊。
- 至心敬禮寶明真定天尊。
- 至心敬禮淨明圓行天尊。
- 至心敬禮金華寶相天尊。
- 至心敬禮真行明華天尊。
- 至心敬禮威光真際天尊。
- 至心敬禮開度通道天尊。
- 至心敬禮慧解慧明天尊。
- 至心敬禮紫虛紫極天尊。
- 至心敬禮仙靈仙應天尊。
- 至心敬禮慧源慧寶天尊。
- 至心敬禮真覺慧訓天尊。
- 至心敬禮真如慧明天尊。

至心敬禮仙度妙寶天尊。
至心敬禮紫府靈應天尊。
至心敬禮紫華開耀天尊。
至心敬禮金光善慧天尊。
至心敬禮玄虛真行天尊。
至心敬禮慧空度脫天尊。
至心敬禮慧嚴玄覺天尊。
至心敬禮太玄虛極天尊。
至心敬禮虛皇靈應天尊。
至心敬禮虛極真皇天尊。
至心敬禮玄極惠明天尊。
至心敬禮寶相真陽天尊。
至心敬禮安漢凝神天尊。
至心敬禮法雲玉潤天尊。
至心敬禮法明法照天尊。
至心敬禮法寶法相天尊。
至心敬禮妙相妙辨天尊。
至心敬禮本明本際天尊。
至心敬禮本玄本相天尊。
至心敬禮妙樂威光天尊。
至心敬禮普照普明天尊。
至心敬禮法緣法本天尊。

至心敬禮隨緣機感天尊。
至心敬禮法正玄虛天尊。
至心敬禮精光惠日天尊。
至心敬禮瓊華耀日天尊。
至心敬禮浮香七耀天尊。
至心敬禮飛香四照天尊。
至心敬禮普度藥王天尊。
至心敬禮海空惠解天尊。
至心敬禮慈悲與樂天尊。
至心敬禮虛舟普濟天尊。
至心敬禮法燈惠炬天尊。
至心敬禮高上太虛天尊。
至心敬禮大慈拔苦天尊。
至心敬禮功德慈善天尊。
至心敬禮安忍妙樂天尊。
至心敬禮玄和妙寶天尊。
至心敬禮無爲定惠天尊。
至心敬禮玄虛嚴淨天尊。
至心敬禮慈悲法忍天尊。
至心敬禮惠源素德天尊。
至心敬禮淨嚴德素天尊。
至心敬禮虛玄至極天尊。
至心敬禮自然虛極天尊。

至心敬禮慈悲救護天尊。
至心敬禮無名寶相天尊。
至心敬禮法雲慈蔭天尊。
至心敬禮慈恩福慶天尊。
至心敬禮元和普潤天尊。
至心敬禮虛和善積天尊。
至心敬禮惠凝澄湛天尊。
至心敬禮廣運慈善天尊。
至心敬禮囑累法寶天尊。
至心敬禮弘普度脫天尊。
至心敬禮崇仙開化天尊。
至心敬禮大乘正法天尊。
至心敬禮法橋普度天尊。
至心敬禮德藏福田天尊。
至心敬禮權變應見天尊。
便長跪懺悔。

高上老子曰：此天尊等，並各身作真金妙色，項負飛艷員光，頭戴遠遊紫磨金冠，建龍爪煙彩華簪，佩九色雲錦華文雜色納披，著丹霞離羅搖曳長裙，躡紫霄丹霞流彩之屐。又與天龍猛卒、神虎步兵、巨天驍將、威劍神王、啓途獅子、按行摩兵，夾侍二真，各爲

十部扈從天尊。天尊於此東方九炁無極世界之中，坐天池青蓮寶花之上，憑七寶鳳紋曲几，把松煙結彩風搖塵拂，敷說道要真經，廣度一切有罪衆生，令入樂道，各使得安。

尔時高上老子又告東方普濟真人及諸仙衆曰：卿等若能勸化東方無極世界之中一切善男子善女人，悉令送心投款，至心敬禮，稱揚此東方九炁無極世界九十天尊靈像名號者，即得滅除存亡二代從來所犯傲忽三寶，不生肅敬之罪；次滅違經破誠，去善就惡之罪；次滅商略師主，攻擊非法之罪；次滅欺心負債，違理不償之罪；次滅惡口非法，呪詛罵詈之罪；次滅醉酒鬥醜，陵忽公私之罪；次滅潛行謀惡，陰賊害人之罪；次滅憎親密疏，瞋內喜外之罪；次滅譖毀善人，牽入鬼神之罪；次滅毀善長惡，面從背違之罪。有此東方十惡之罪，無量無邊不可測憶之罪。今能彈指懺悔，滅除此十罪者，則不爲東方十直之神天帝使者錄其罪目，上奏天曹。則壽終命

過之後，不墜東方九炁無極世界風雷地獄之中，長免雷公霹靂苦痛之患，五體完全，六府清淨，則得天衣挂體，百味充飢，後生人中，快樂無極，財食多饒。此則上賴東方九炁無極世界九十天尊之恩，下副此等男女送心投款歸命之誠。於是普濟真人及諸仙衆彈指頂禮，敬奉教言。

尔時高上老子又告南方普度真人及諸仙衆曰：南方三炁無極世界之中，乃有卅天尊靈像名號，禮之者滅罪無量，得福無量。

至心敬禮南方威德大慈天尊。
至心敬禮朱光靈耀天尊。
至心敬禮南極朱陵天尊。
至心敬禮南極嚴淨天尊。
至心敬禮南極長生天尊。
至心敬禮丹靈定惠天尊。
至心敬禮丹老光妙天尊。
至心敬禮朱明法本天尊。
至心敬禮司命主祿天尊。
至心敬禮威光度脫天尊。
至心敬禮玄明度世天尊。

至心敬禮無礙自在天尊。
至心敬禮巧說法相天尊。
至心敬禮增益惠解天尊。
至心敬禮指掌蒙昧天尊。
至心敬禮善寂虛玄天尊。
至心敬禮無等智德天尊。
至心敬禮紫府太微天尊。
至心敬禮虛寂通微天尊。
至心敬禮玄鑒惠明天尊。
至心敬禮梵明弘教天尊。
至心敬禮洞明玄奧天尊。
至心敬禮昇玄玄極天尊。
至心敬禮至妙寶天尊。
至心敬禮中和大惠天尊。
至心敬禮大乘虛極天尊。
至心敬禮玄宗誕應天尊。
至心敬禮無量威福天尊。
至心敬禮玄暉妙覺天尊。
至心敬禮冥神洞晏天尊。
高上老子曰：此天尊等，並各身作真金妙色，項負飛艷員光，頭戴自然芙蓉花冠，建虎牙，雲色彩簪，佩三光五文山雲納披，著黃雲飛光流彩長裙，

躡五色六領師子方屨，各與天龍驍將、揮劍神王、延頸瓊鳳、啓道金鸞、共首九鬼、同體千摩、秉鉞五帝、攬摩百狼，各爲十部，翊衛天尊。於是天尊步經躡紀，共遊南方三炁無極世界之中，廣度一切有罪衆生，令入樂道，各使得安。

余時高上老子又告南方普度真人及諸仙衆曰：卿等若能勸化南方無極世界之中一切善男子、善女人，悉令送

心投款，至心^⑤敬禮，稱揚南方三炁無極世界三十天尊靈像名號者，即得滅除存亡二代從來所犯誹謗真經，用爲邪說之罪；次滅忘師傳授，不憶教誨之罪；次^⑥滅占候圖讖，妄說吉凶之罪；次滅誑誘良人，壓爲奴婢之罪；

次滅淫犯情色，浪行非法之罪；次滅剥脫行人，取其衣服之罪；次滅偷竊三寶、常住法具之罪；次滅發掘冢墓，劫剥死人之罪；次滅祕惜經書，不肯傳授之罪；次滅妒人家富，願令衰耗之罪。有此南方十惡之罪，無量無邊不可測憶之罪。今能彈指懺悔，滅除

此十罪者，則不爲南方十直之神太一八神使者錄其罪目，上奏天曹。壽終命過之後，不墮南方三炁無極世界鑪炭地獄之中，長免灼爛苦痛之憂，五體完全，六府清淨，則放浪閑豫，娛樂無爲。若還生人中，則通靈聰達，才智清遠。此則上賴南方三炁無極世界三十天尊之恩，下副此等男女送心投款歸命之誠。於是普度真人及諸仙衆彈指頂禮，敬奉教言。

余時高上老子又告西方慈悲真人及諸仙衆曰：西方七炁無極世界之中，有七十天尊靈像名號，禮之者滅罪無量，得福無量。

至心敬禮西方景福護魂天尊。
至心敬禮西靈惠照天尊。
至心敬禮西極顯真天尊。
至心敬禮九真九老天尊。
至心敬禮十聖十華天尊。
至心敬禮四虛四照天尊。
至心敬禮三元七映天尊。
至心敬禮三素皓靈天尊。
至心敬禮皓映普光天尊。

至心敬禮太華太極天尊。
至心敬禮洞空虛極天尊。
至心敬禮明光玄度天尊。
至心敬禮九空六素天尊。
至心敬禮九光八景天尊。
至心敬禮九華七覺天尊。
至心敬禮太素光明天尊。
至心敬禮太洞華景天尊。
至心敬禮太一洞真天尊。
至心敬禮太和真洞天尊。
至心敬禮定光命祿天尊。
至心敬禮皓華素德天尊。
至心敬禮妙寶淨光天尊。
至心敬禮真明虛極天尊。
至心敬禮太虛靈應天尊。
至心敬禮太玄高上天尊。
至心敬禮虛極妙靈天尊。
至心敬禮妙寶元和天尊。
至心敬禮藏景祕妙天尊。
至心敬禮宗師度脫天尊。
至心敬禮玄素摠德天尊。
至心敬禮太華摠謂天尊。
至心敬禮高皇玉帝天尊。

至心敬禮光華寶曜天尊。
至心敬禮高聖玄景天尊。
至心敬禮中皇真際天尊。
至心敬禮真洞玉晨天尊。
至心敬禮元和高上天尊。
至心敬禮至極太空天尊。
至心敬禮玉虛流景天尊。
至心敬禮捻真元洞天尊。
至心敬禮流光應見天尊。
至心敬禮玄鑒洞虛天尊。
至心敬禮通鑒洞淵天尊。
至心敬禮精曜金容天尊。
至心敬禮玄丹散景天尊。
至心敬禮流光八朗天尊。
至心敬禮洞元積感天尊。
至心敬禮高玄摠衆天尊。
至心敬禮浩明梵寶天尊。
至心敬禮金光素老天尊。
至心敬禮玉皇真極天尊。
至心敬禮玄極太微天尊。
至心敬禮洞惠虛玄天尊。
至心敬禮明機流鑒天尊。
至心敬禮尋真大洞天尊。

至心敬禮洞明會聖天尊。
至心敬禮宣真玄一天尊。
至心敬禮寶光玄耀天尊。
至心敬禮流光景德天尊。
至心敬禮耀明高上天尊。
至心敬禮華景光耀天尊。
至心敬禮瓊華玉潤天尊。
至心敬禮玉華元一天尊。
至心敬禮六空洞府天尊。
至心敬禮七變元和天尊。
至心敬禮光華景秀天尊。
至心敬禮含光祕景天尊。
至心敬禮靈都虛極天尊。
至心敬禮靈化洞空天尊。
至心敬禮洞虛安漠天尊。

高上老子曰：此天尊等，並各作真金妙色，項負飛艷員光，頭戴明光七耀蓮冠，建飛電警空華簪，佩丹霞素霓耀日羽披，著七色流光長裙，躡金虎鳳文華舄，坐六領師子寶座。乃與毒龍猛卒、威劍神王、巨天力士、風水將軍、嚇怒摩王、麾幢卒吏、執戟威將、揮戈健士，各爲十部，前導後從，顯晦周流，

按行西方七炁無極世界之中，廣度一切有罪衆生，令入樂道，各使得安。余時高上老子又告西方慈悲真人及諸仙衆曰：卿等若能勸化西方七炁無極世界之中一切善男子、善女人，悉令送心投款，至心敬禮，稱揚西方七炁無極世界七十天尊靈像名號，即得滅除存亡二代從來所犯言無信實詭誑之罪；次滅嫉妒他人有才勝己之罪；次滅恃其勢力，欺陵貧賤之罪；次滅口善心惡，面喜意瞋之罪；次滅巧文曲判，枉人直道之罪；次滅叱咤尊卑，輕欺老病之罪；次滅傳人過溢惡語之罪；次滅五形不隱，露於三光之罪；次滅無故嫌恨責罰之罪；次滅言語調弄過分之罪。有此西方十惡之罪，無量無邊不可測憶之罪。今能彈指懺悔，滅除此十罪者，則不爲西方十直之神下太一錄其罪目，上奏天曹，壽終命過之後，不墮西方七炁無極世界金槌鐵杖地獄之中，長免鞭撻之患，五體完全，六府清淨，憑真受樂，藉福安和。若更生人中，則子孫隆盛，歷代冠纓。

上賴西方七炁無極世界七十天尊之恩，下副此等男女送心投款歸命之誠。於是慈悲真人及諸仙衆彈指頂禮，敬奉教言。

尔時高上老子又告北方救苦真人及諸仙衆曰：北方五炁無極世界中，有五十天尊靈像名號，禮之者滅罪無量，得福無量。

- 至心敬禮北方延壽保命天尊。
- 至心敬禮北極明耀天尊。
- 至心敬禮玄虛太極天尊。
- 至心敬禮紫度虛皇天尊。
- 至心敬禮金真五福天尊。
- 至心敬禮瓊華十善天尊。
- 至心敬禮玄微紫耀天尊。
- 至心敬禮紫真太寶天尊。
- 至心敬禮玄和大度天尊。
- 至心敬禮紫晨元福天尊。
- 至心敬禮元和真寶天尊。
- 至心敬禮福堂幽寂天尊。
- 至心敬禮玄景光德天尊。
- 至心敬禮玄淳抱素天尊。
- 至心敬禮寶真寂照天尊。

- 至心敬禮紫極元君天尊。
 - 至心敬禮玄素妙寶天尊。
 - 至心敬禮四照無極天尊。
 - 至心敬禮六合玄虛天尊。
 - 至心敬禮明輝景秀天尊。
 - 至心敬禮玉輝玄耀天尊。
 - 至心敬禮金映流真天尊。
 - 至心敬禮玄上紫虛天尊。
 - 至心敬禮太微皇極天尊。
 - 至心敬禮靈光空相天尊。
 - 至心敬禮明空流景天尊。
- (中缺十一行天尊名號)
- 至心敬禮弘明寶相天尊。^⑧
 - 至心敬禮明遠空惠天尊。
 - 至心敬禮重光万善天尊。
 - 至心敬禮玄暢含德天尊。
 - 至心敬禮遊虛常善天尊。
 - 至心敬禮端虛上德天尊。
 - 至心敬禮明霞通德天尊。
 - 至心敬禮乘煙導化天尊。^⑨

①案敦煌S.1513寫本，首全尾殘，卷首二十餘行文字爲《一切道經序》(另見)。第23行標題「老子十方像名經卷上」，

四方品有二百卅名」，以下存經文一百七十一行。P.334號寫本首尾均殘，無標題，存經文一百六十八行，卷首兩行與S.1513寫本末兩行相同，可斷定爲同一經文寫本。S.6009寫本僅殘存八行。以上三件內容大致與《正統道藏》洞神部本文類所收《老子像名經》十卷本之前四卷相當，但文字頗多差異。《道藏》本文字較爲簡略，疑係後人據敦煌本刪節改編。敦煌原本應有三卷，寫於唐高宗時，係唐代《道藏》(即《一切道經》)所收諸經之一。原抄本中少數俗寫異體字，錄文改作通行繁體字。

②P.334號寫本起於此行，前文缺。

③S.1315寫本止於此行，後文缺。

④「虎牙」，原誤作「虛牙」。

⑤「投款至心」四字原缺，據前後文例補。

⑥「次」字原缺，據前後文例補。

⑦P.334號寫本止於此行。下文缺。

⑧S.6009號寫本起於此行。據《道藏》本，此行前與P.334號寫本未行之間，缺十一行天尊名號。

⑨S.6009寫本止於此行。據《道藏》本，此行後缺五行天尊名，以及高上老子告北方救苦真人語。

(王卡點校)

032 老子像名經

經名：老子像名經。撰人不詳，約出於唐代。係敦煌本《老子十方像名經》之改編本。原本十卷（缺第六至八卷）。底本出處：《正統道藏》洞神部本文類。

老子像名經卷之一

爾時高上老子與十方真人、十部威神、無量等衆遊歷十方無極世界，宣揚教化。見諸衆生廣造十方諸惡重罪，孤魂塗炭，受諸苦惱，出閻入明，一死一生，流曳十方地獄之中，或墮東方風雷地獄，或入南方爐炭地獄，或在西方金鎚地獄，或處北方寒冰地獄，或落東北鑊湯地獄，或墜東南銅柱地獄，或陷西南屠割地獄，或役西北火車地獄，或投上方火坑地獄，或沉下方糞穢地

獄，受種種之罪，隨業不同。身首糜碎，分張異處，晝夜拷掠，無時暫停。深愍衆生，受如是苦。今當說此十方天尊應化靈像一千一百六十名號，欲令十方無極世界一切衆生敬禮稱揚，悔過滅惡，生福長善。汝等衆真，各宜諦聽。於是高上老子告東方普濟真人及諸仙衆東方九氣無極世界九十天尊靈像名號，禮之者滅無量罪，得無量福。

- 至心信禮東方普慈護國天尊
- 至心信禮大忍無礙天尊
- 至心信禮東華上相天尊
- 至心信禮青宮演化天尊
- 至心信禮仙靈妙寶天尊
- 至心信禮含和虛極天尊
- 至心信禮九天積善天尊
- 至心信禮皇上真老天尊
- 至心信禮元靈隱耀天尊
- 至心信禮金闕玉虛天尊
- 至心信禮疑心玄應天尊
- 至心信禮靈都大度天尊
- 至心信禮玄靈至德天尊
- 至心信禮高上太虛天尊
- 至心信禮圓通妙極天尊
- 至心信禮開明真相天尊
- 至心信禮寶勝元和天尊
- 至心信禮法藏圓極天尊
- 至心信禮玄明真定天尊
- 至心信禮衆智成滿天尊
- 至心信禮金華上相天尊
- 至心信禮真行明因天尊
- 至心信禮威光實際天尊
- 至心信禮開通信悟天尊
- 至心信禮慧解智明天尊
- 至心信禮紫虛上極天尊
- 至心信禮靈心普照天尊
- 至心信禮惠源廣潤天尊
- 至心信禮正覺垂訓天尊
- 至心信禮真智照極天尊
- 至心信禮仙度妙寶天尊
- 至心信禮紫陽靈應天尊
- 至心信禮妙意無邊天尊
- 至心信禮金光善慧天尊
- 至心信禮玄虛真行天尊
- 至心信禮慧空度脫天尊

至心信禮裝嚴玄覺天尊
至心信禮靈感遍通天尊
至心信禮虛皇降照天尊
至心信禮妙極真源天尊
至心信禮玄應慧明天尊
至心信禮寶相真陽天尊
至心信禮凝神湛照天尊
至心信禮法雲普潤天尊
至心信禮虛明遠覽天尊
至心信禮法相圓滿天尊
至心信禮妙意端嚴天尊
至心信禮本際玄微天尊
至心信禮冲真寂照天尊
至心信禮妙樂威光天尊
至心信禮普照幽明天尊
至心信禮法緣無盡天尊
至心信禮隨機赴感天尊
至心信禮正智玄虛天尊
至心信禮瓊華炳曜天尊
至心信禮浮香遠覽天尊
至心信禮飛雲廣覆天尊
至心信禮普度樂王天尊

至心信禮海空慧解天尊
至心信禮慈悲與樂天尊
至心信禮虛皇普濟天尊
至心信禮法燈朗照天尊
至心信禮高上太虛天尊
至心信禮大悲拔苦天尊
至心信禮上德慈救天尊
至心信禮安住至樂天尊
至心信禮玄和妙寶天尊
至心信禮無爲定慧天尊
至心信禮玄虛嚴淨天尊
至心信禮慈悲善濟天尊
至心信禮慧量應物天尊
至心信禮裝嚴素德天尊
至心信禮虛玄至極天尊
至心信禮妙本自然天尊
至心信禮慈悲救護天尊
至心信禮無名寶相天尊
至心信禮法雲垂蔭天尊
至心信禮慈恩廣化天尊
至心信禮玄津普潤天尊
至心信禮靈和善積天尊
至心信禮大慧凝湛天尊

至心信禮廣開戒定天尊
至心信禮囑累法寶天尊
至心信禮冥神洞照天尊
至心信禮崇仙開化天尊
至心信禮大弘正法天尊
至心信禮法橋普度天尊
至心信禮德藏包含天尊
至心信禮權變應見天尊

高上老子曰：如天尊，衆相圓滿，左右侍衛，無量徒衆，並處東方九氣無極世界之中。廣演大乘，敷說道要，度脫一切有罪衆生，令其離苦，咸使安樂。

爾時高上老子告東方普濟真人及諸仙衆：汝等若能導化十方無極世界一切衆生，若男若女，咸共歸誠，至心敬禮，稱揚讚歎東方九氣無極世界九十天尊靈像名號，能滅衆生生死報對，從來所犯傲忽三寶、不生肅敬之罪，違經破戒、去善就惡之罪，輕慢師主、不依盟約之罪，欺心負信、違理不償之罪，惡口非法、呪詛罵詈之罪，醉酒酗鬥、凌忽公私之罪，潛行謀惡、陰賊害

人之罪，憎親愛疏、嗔內喜外之罪，讒毀善人、牽入邪徑之罪，損善長惡、面從背違之罪。如是東方十惡之罪，無量無邊，不可記憶。今能一心發露懺悔，願除此十罪者，則不為東方十直之神、天帝使者錄其罪目，上奏天曹，命過之後，不墮東方無極世界風雷地獄之中，生死身神，當免雷霆霹靂之難，後生人中，快樂無極。於是普濟真人及諸仙衆一心頂禮，敬奉教言。

老子像名經卷之一

老子像名經卷之二

爾時高上老子告南方普度真人及諸仙衆：南方三氣無極世界有三十天尊靈像名號，禮之者滅無量罪，得無量福。

至心信禮南方威德大慈天尊
至心信禮炎光靈耀天尊
至心信禮南極朱陵天尊
至心信禮南上嚴淨天尊
至心信禮無相長生天尊
至心信禮丹靈定慧天尊
至心信禮丹元光妙天尊
至心信禮朱明法本天尊
至心信禮慧命凝常天尊
至心信禮威光度脫天尊
至心信禮法身出世天尊
至心信禮無礙自在天尊
至心信禮巧說法相天尊
至心信禮增益慧解天尊
至心信禮善權化物天尊
至心信禮至寂澄明天尊

至心信禮智德無等天尊
至心信禮太微應號天尊
至心信禮玄通定相天尊
至心信禮洞鑒幽明天尊
至心信禮梵明弘教天尊
至心信禮安樂勝報天尊
至心信禮昇玄至極天尊
至心信禮妙光寶勝天尊
至心信禮中和大慧天尊
至心信禮一乘虛極天尊
至心信禮玄宗誕應天尊
至心信禮無量威化天尊
至心信禮玄暉妙覺天尊
至心信禮冥神洞晏天尊
高上老子曰：如天尊，衆相圓滿，左右侍衛，無量徒衆，並處南方三氣無極世界之中。廣演大乘，敷說道要，度脫一切有罪衆生，令其離苦，咸使安樂。

爾時高上老子告南方普度真人及諸仙衆：汝等若能導化南方無極世界一切衆生，若男若女，咸共歸誠，至心信禮，稱揚讚歎南方三氣無極世界三

十天尊靈像名號，能滅衆生生死報對，從來所犯誹謗真經、謂爲邪說之罪，忘師傳授、不遵教誨之罪，占候圖讖、妄說吉凶之罪，誑誘良善、壓爲奴婢之罪，放情縱欲、浪行非法之罪，剝脫行人、取其衣服之罪，偷竊三寶常住法具之罪，發掘塚墓、劫剝死人之罪，祕惜經書、不肯傳授之罪，妬人富有、願令衰耗之罪。如是南方十惡無量無邊之罪，不可記憶。今能一心發露懺悔，除此十罪，不爲南方十直之神太一使者錄其罪目，上奏天曹，命過之後，不墮南方無極世界鑪炭地獄之中，生死身神，長免灼爛苦痛之憂，後生人中，快樂無極。於是普度真人及諸仙衆一心頂禮，信奉教言。

老子像名經卷之二

老子像名經卷之三

爾時高上老子告西方慈悲真人及諸仙衆：西方七氣無極世界有七十天尊靈像名號，禮之者滅無量罪，得無量福。

- 至心信禮西方金映護魂天尊
- 至心信禮西靈慧照天尊
- 至心信禮西極顯真天尊
- 至心信禮玄真九老天尊
- 至心信禮上聖十華天尊
- 至心信禮四虛普照天尊
- 至心信禮真元七映天尊
- 至心信禮三素皓靈天尊
- 至心信禮金門演教天尊
- 至心信禮太華上極天尊
- 至心信禮空洞虛皇天尊
- 至心信禮玄光度世天尊
- 至心信禮九空太素天尊
- 至心信禮靈耀八景天尊
- 至心信禮七覺照疑天尊
- 至心信禮三素光明天尊
- 至心信禮大洞景華天尊
- 至心信禮無量真如天尊
- 至心信禮元和寶勝天尊
- 至心信禮皓華素德天尊
- 至心信禮妙寶淨光天尊
- 至心信禮真明虛極天尊
- 至心信禮冲和靈應天尊
- 至心信禮太玄高上天尊
- 至心信禮虛極妙靈天尊
- 至心信禮寶花元梵天尊
- 至心信禮淨藏祕景天尊
- 至心信禮宗師度脫天尊
- 至心信禮玄素總德天尊
- 至心信禮太華應運天尊
- 至心信禮高皇玉帝天尊
- 至心信禮勝光寶曜天尊
- 至心信禮高聖玄景天尊
- 至心信禮中皇真際天尊
- 至心信禮元洞玉晨天尊
- 至心信禮高上太一天尊
- 至心信禮至極明宮天尊
- 至心信禮玉虛挺相天尊

至心信禮總真元洞天尊
至心信禮流光應見天尊
至心信禮玄覽照幽天尊
至心信禮通遠深淵天尊
至心信禮金容顯相天尊
至心信禮垂形散景天尊
至心信禮流光四朗天尊
至心信禮洞元積感天尊
至心信禮高玄總衆天尊
至心信禮浩明梵寶天尊
至心信禮金光七素天尊
至心信禮玉皇真極天尊
至心信禮玄上太微天尊
至心信禮洞慧虛容天尊
至心信禮明機流覽天尊
至心信禮尋真大洞天尊
至心信禮凝神會聖天尊
至心信禮真玄太一天尊
至心信禮淨滿保光天尊
至心信禮大乘景德天尊
至心信禮耀明高上天尊
至心信禮普息緣照天尊
至心信禮玉潤流輝天尊

至心信禮上華元一天尊
至心信禮六空洞府天尊
至心信禮七變元和天尊
至心信禮五劫開化天尊
至心信禮含光祕景天尊
至心信禮清都證極天尊
至心信禮靈化洞空天尊
至心信禮冲虛入妙天尊
高上老子曰：如天尊，衆相圓滿，左右侍衛，無量徒衆，並處西方七氣無極世界之中，廣演大乘，敷說道要，度脫一切有罪衆生，令其離苦，咸使安樂。

爾時高上老子告西方慈悲真人及諸仙衆：汝等若能導化西方無極世界一切衆生，若男若女，咸共歸誠，至心信禮，稱揚讚歎西方七氣無極世界七十天尊靈像名號，能滅衆生生死報對，從來所犯言無信實、詭誑之罪，嫉妬他人勝己之罪，恃其勢力、欺凌貧賤之罪，口善心惡、面喜意嗔之罪，巧文曲判、枉抑直道之罪，呵叱尊卑、輕侮老病之罪，傳人惡語、以成嗔恨之罪，五

形不隱、露於三光之罪，無故嫌恨、妄相責罰之罪，言語調弄、初喜後怒之罪。如是西方十惡之罪，無量無邊，不可記憶。今能一心發露懺悔，除此十罪，不爲西方十直之神錄其罪目，上奏天曹，命過之後，不墮西方無極世界金鉗鐵杖地獄之中，生死身神，長免鞭撻之患，後生人中，快樂無極。於是慈悲真人及諸仙衆一心頂禮，信奉教言。

老子像名經卷之三

老子像名經卷之四

爾時高上老子告北方救苦真人及諸仙衆：北方五氣無極世界有五十天尊靈像名號，禮之者滅無量罪，得無量福。

至心信禮北方延壽保命天尊
至心信禮北極明耀天尊
至心信禮玄虛太極天尊
至心信禮紫度虛皇天尊
至心信禮金真應福天尊
至心信禮瓊華十善天尊
至心信禮玄微隱耀天尊
至心敬禮高真太寶天尊
至心信禮玄和大度天尊
至心信禮紫晨降福天尊
至心信禮上慧弘慈天尊
至心信禮寶寂幽源天尊
至心信禮靈光正德天尊
至心信禮還淳示像天尊
至心信禮安神寂照天尊
至心信禮紫極元君天尊

至心信禮玄真妙寶天尊
至心信禮四達無礙天尊
至心信禮六辨虛疑天尊
至心信禮明暉景秀天尊
至心信禮圓光炳耀天尊
至心信禮金映流真天尊
至心信禮玄上紫虛天尊
至心信禮太微極妙天尊
至心信禮靈光空相天尊
至心信禮無上景皇天尊
至心信禮虛明洞慧天尊
至心信禮寶玄流化天尊
至心信禮澄神保劫天尊
至心信禮妙智湛常天尊
至心信禮五靈玄德天尊
至心信禮闕寶闡化天尊
至心信禮六度凝神天尊
至心信禮高元上相天尊
至心信禮普光弘濟天尊
至心信禮凝玄高上天尊
至心信禮耀景元和天尊
至心信禮弘明寶相天尊
至心信禮空慧無滯天尊

至心信禮重光萬善天尊
至心信禮含和遠暢天尊
至心信禮遊虛常樂天尊
至心信禮端嚴上德天尊
至心信禮明霞通知天尊
至心信禮乘真導化天尊
至心信禮靈化機感天尊
至心信禮通玄釋滯天尊
至心信禮德意無上天尊
至心信禮虛皇演聖天尊
至心信禮大哀廣濟天尊

高上老子曰：如天尊，衆相圓滿，左右侍衛，無量徒衆，並處北方五氣無極世界之中，廣演大乘，敷說道要，度脫一切有罪衆生，令其離苦，咸使安樂。

爾時高上老子告北方救苦真人及諸仙衆：汝等若能導化北方無極世界一切衆生，若男若女，咸共歸誠，至心信禮，稱揚讚歎北方五氣無極世界五十二天尊靈像名號，能滅衆生生死報對，從來所犯殺他含血衆生之罪，不肯施散、營建功德之罪，啖食衆生以爲滋味

之罪，鷹犬遊獵、殺害衆生之罪，放火燒山、傷殺蠱蠕之罪，見人疾病、不生憐愍、救治之罪，要路掘坑、墜人手足之罪，恣施棘刺、斷人要路行蹤之罪，偷人妻子、誑誘奴婢之罪，盜人尊像、鍾磬、雜物之罪。如是北方十惡之罪，無量無邊，不可記憶。今能一心發露懺悔，除此十罪，不爲北方十直之神、北斗司殺之鬼錄其罪目，上奏天曹，命過之後，不墜北方無極世界寒冰溟泠地獄之中，長免露卧冰牀苦痛之患，後生人中，快樂無極。於是救苦真人及諸仙衆一心頂禮，敬奉教言。

老子像名經卷之四

老子像名經卷之五

爾時高上老子告東北慈敬真人及諸仙衆：東北梵氣無極世界有一百二十天尊靈像名號，禮之者滅無量罪，得無量福。

至心信禮東北方慈忍救苦天尊
至心信禮元靈高聖天尊
至心信禮中皇太一天尊
至心信禮梵氣彌綸天尊
至心信禮黃庭太保天尊
至心信禮三素洞神天尊
至心信禮大哀愍苦天尊
至心信禮霞光朗耀天尊
至心信禮中玄正一天尊
至心信禮黃房洞晏天尊
至心信禮高上虛無天尊
至心信禮玄微太寶天尊
至心信禮黃庭九老天尊
至心信禮靈威拔苦天尊
至心信禮八明浩氣天尊
至心信禮玄真上景天尊

至心信禮太皇勝妙天尊
至心信禮靈光保命天尊
至心信禮流光通導天尊
至心信禮飛華慶善天尊
至心信禮回光至極天尊
至心信禮應像飛光天尊
至心信禮無心妙體天尊
至心信禮六度真容天尊
至心信禮興隆道相天尊
至心信禮高真觀妙天尊
至心信禮流變延真天尊
至心信禮妙樂難勝天尊
至心信禮元靈一氣天尊
至心信禮玄靈八素天尊
至心信禮真老福慶天尊
至心信禮青真妙覺天尊
至心信禮碧霞始老天尊
至心信禮玄和淨德天尊
至心信禮太空至德天尊
至心信禮明真四極天尊
至心信禮自然虛極天尊
至心信禮積慶元和天尊
至心信禮廣運慈善天尊

至心信禮萬福普護天尊
至心信禮慈善廣濟天尊
至心信禮明賢慈愛天尊
至心信禮開度福道天尊
至心信禮垂光慈蔭天尊
至心信禮八達常善天尊
至心信禮六合通明天尊
至心信禮開度憂惱天尊
至心信禮乘烟太帝天尊
至心信禮七元八會天尊
至心信禮太丹三素天尊
至心信禮元和寶相天尊
至心信禮太真高上天尊
至心信禮瓊光靈耀天尊
至心信禮通玄真定天尊
至心信禮中和善寂天尊
至心信禮崇愛延光天尊
至心信禮流光太明天尊
至心信禮靈真流梵天尊
至心信禮太微至極天尊
至心信禮景德太丹天尊
至心信禮通光普照天尊
至心信禮玄機妙應天尊

至心信禮金真流映天尊
至心信禮玉光耀彩天尊
至心信禮揮光振景天尊
至心信禮滅魔度脫天尊
至心信禮祕景長生天尊
至心信禮通真解滯天尊
至心信禮垂光景耀天尊
至心信禮太華定相天尊
至心信禮內景含和天尊
至心信禮通靈回化天尊
至心信禮飛步九空天尊
至心信禮步紀七元天尊
至心信禮豁落長耀天尊
至心信禮七耀延靈天尊
至心信禮混成開化天尊
至心信禮通明四洞天尊
至心信禮啓明無極天尊
至心信禮空玄明梵天尊
至心信禮太空玄隱天尊
至心信禮靈都集慶天尊
至心信禮景雲普被天尊
至心信禮洞浮七耀天尊
至心信禮靈光四照天尊

至心信禮保命護魂天尊
至心信禮洞空圓極天尊
至心信禮演法開化天尊
至心信禮丹華皓映天尊
至心信禮流輝帝一天尊
至心信禮洞啓幽玄天尊
至心信禮玄普靈耀天尊
至心信禮神光遠鑒天尊
至心信禮紫庭會聖天尊
至心信禮匠導衆真天尊
至心信禮廣運玄化天尊
至心信禮靈源普潤天尊
至心信禮崇真演教天尊
至心信禮安化太玄天尊
至心信禮耀景棲真天尊
至心信禮寶耀洞明天尊
至心信禮八景回晨天尊
至心信禮圓景耀霞天尊
至心信禮明光晨極天尊
至心信禮靈源廣洽天尊
至心信禮金光玄耀天尊
至心信禮弘真度物天尊
至心信禮總御衆真天尊

至心信禮法明靈鑒天尊
至心信禮太霄耀景天尊
至心信禮結朗重明天尊
至心信禮啓真玄素天尊
至心信禮混化變生天尊
至心信禮思玄會寂天尊
至心信禮靈光皓映天尊
至心信禮華光流耀天尊
至心信禮慧源玄暢天尊
至心信禮凝虛善寂天尊
至心信禮法光寶相天尊
至心信禮玄光普照天尊

高上老子曰：此天尊等，並各身作真金妙色，項負飛艷圓光，頭戴通天芙蓉七寶華冠，建雲光流耀華簪，體佩五雲雜色錦帔，著丹霞流彩長裙，足躡雙珠景光方履，各與天龍猛卒、地仙道士、控制魔王、護法真人、持地金剛、天丁力士、侍香玉童、散花玉女、五色師子、負弩神王各爲十部羽從。於是天尊乘虛步煙，同遊東北無極世界之中，廣度一切有罪衆生，令入樂道，各使得安。

爾時高上老子又告東北慈敬真人及諸仙衆曰：卿等若能勸化東北無極世界一切善男子、善女人，悉令送心投款，至心禮敬，稱揚東北梵氣一百二十天尊靈像名號者，則滅除存亡二代從來所犯張羅布網、捕獵鳥獸之罪，次滅好放鷹鷂、遊捕衆生之罪，次滅歲節告終、屠殺六畜以供薦饗之罪，次滅橫引清人以令入獄之罪，次滅奪人恩愛、分隔骨肉之罪，次滅刺印奴婢面額以作痕迹之罪，次滅敗人婚媾、不使和合之罪，次滅身體不淨、觸突三寶之罪，次滅笑人癡癩風癩疾病之罪，次滅批毛覓疵、求人過惡之罪。有此東北十惡之罪，無量無邊，不可測憶之罪，今能彈指懺悔，滅除此十罪者，則不爲東北十直之神太一使者錄其罪目，上奏天曹，則壽終命過之後，不墮東北梵氣無極世界鑊湯地獄之中，長免鑊湯爛煮之患，五體完全，六腑清淨，紫房遊縱，丹闕閑居。若更生人中，作人師範，開化衆生，令入法相。此則上賴東北梵氣一百二十天尊之恩，下副此等男女

送心投款歸命之誠。於是慈敬真人及諸仙衆彈指頂禮，敬奉教言。

老子像名經卷之五

（卷六至八原缺）

老子像名經卷之九

爾時高上老子告上方延壽真人及諸仙衆：上方梵氣無極世界三百二十天尊靈像名號，禮之者滅無量罪，得無量福。

至心信禮上方慈悲救苦天尊
至心信禮嚴淨法忍天尊
至心信禮應變威力天尊
至心信禮無畏梵形天尊
至心信禮大智慧海天尊
至心信禮無量法藏天尊
至心信禮大悲萬善天尊
至心信禮玄微自在天尊
至心信禮無邊正覺天尊
至心信禮慈和妙寶天尊
至心信禮端嚴威力天尊
至心信禮光明上德天尊
至心信禮法橋大度天尊
至心信禮開顯妙門天尊
至心信禮弘通保命天尊
至心信禮護魂慈救天尊

至心信禮因緣濟度天尊
至心信禮流光法喜天尊
至心信禮玉真慈愛天尊
至心信禮威聖化凡天尊
至心信禮常安定慧天尊
至心信禮洞虛慈念天尊
至心信禮信慧匠成天尊
至心信禮增益勝智天尊
至心信禮功德嚴淨天尊
至心信禮寶光慈救天尊
至心信禮混成長樂天尊
至心信禮普明淨愛天尊
至心信禮乘光善寂天尊
至心信禮增上勝慧天尊
至心信禮相光自在天尊
至心信禮金真度命天尊
至心信禮善定玄通天尊
至心信禮垂慈普濟天尊
至心信禮妙蹟入微天尊
至心信禮幽寂通冥天尊
至心信禮洞暢高玄天尊
至心信禮長生萬善天尊
至心信禮至虛靜妙天尊

至心信禮真遊高上天尊
至心信禮大洞通真天尊
至心信禮法流遠洽天尊
至心信禮高德寶藏天尊
至心信禮慧成明智天尊
至心信禮善應無疑天尊
至心信禮凝常轉命天尊
至心信禮普光勸善天尊
至心信禮玄德定願天尊
至心信禮總真應見天尊
至心信禮妙成圓行天尊
至心信禮慈悲化度天尊
至心信禮龍德威力天尊
至心信禮應身萬變天尊
至心信禮常施衆善天尊
至心信禮威儀開度天尊
至心信禮真淨善誠天尊
至心信禮洞靈梵度天尊
至心信禮正德保祚天尊
至心信禮幽寂守常天尊
至心信禮淨土開緣天尊
至心信禮善權流布天尊
至心信禮虛明大度天尊

至心信禮威德無畏天尊
至心信禮常安妙行天尊
至心信禮隨應勸善天尊
至心信禮稱緣機感天尊
至心信禮大藏妙音天尊
至心信禮寶明法勝天尊
至心信禮智寂嚴光天尊
至心信禮願力無盡天尊
至心信禮普見難勝天尊
至心信禮慧觀日華天尊
至心信禮寶藏月輪天尊
至心信禮淨王滿足天尊
至心信禮能忘辯慧天尊
至心信禮耀明觀照天尊
至心信禮妙積仙梵天尊
至心信禮飛輪步紀天尊
至心信禮法筵化度天尊
至心信禮高玄太素天尊
至心信禮妙色金華天尊
至心信禮靈真太帝天尊
至心信禮勝光普救天尊
至心信禮上智觀空天尊
至心信禮開緣定慧天尊

至心信禮金姿妙相天尊
至心信禮洞元光應天尊
至心信禮萬德齊倫天尊
至心信禮太空洞照天尊
至心信禮虛容善積天尊
至心信禮法王應感天尊
至心信禮法妙守真天尊
至心信禮空解智海天尊
至心信禮飛玄法藏天尊
至心信禮威變神通天尊
至心信禮開明旨要天尊
至心信禮善應空寂天尊
至心信禮無上最勝天尊
至心信禮玄宣至教天尊
至心信禮隨方廣濟天尊
至心信禮真解降魔天尊
至心信禮證空信慧天尊
至心信禮法澤廣霑天尊
至心信禮長存駕景天尊
至心信禮常善化物天尊
至心信禮空洞太無天尊
至心信禮匠成緣會天尊
至心信禮寶智長生天尊

至心信禮元妙本相天尊
至心信禮真性常一天尊
至心信禮玄極凝和天尊
至心信禮流耀辨照天尊
至心信禮真妙澄玄天尊
至心信禮智德慈善天尊
至心信禮法元隨應天尊
至心信禮玄匠莊嚴天尊
至心信禮善導開蒙天尊
至心信禮弘仁上聖天尊
至心信禮無畏善誘天尊
至心信禮宣流妙化天尊
至心信禮運度四生天尊
至心信禮開引法教天尊
至心信禮應世法王天尊
至心信禮寶德周遍天尊
至心信禮機感被緣天尊
至心信禮威雲降福天尊
至心信禮善護無棄天尊
至心信禮慧量真極天尊
至心信禮仙遊淨妙天尊
至心信禮開劫度人天尊
至心信禮通明滿足天尊

至心信禮玉輝淨慧天尊
至心信禮寶意勝上天尊
至心信禮無極玄微天尊
至心信禮流光普壽天尊
至心信禮太玄高勝天尊
至心信禮上德太真天尊
至心信禮妙顯光相天尊
至心信禮聖智飛玄天尊
至心信禮超登寶海天尊
至心信禮辰光上善天尊
至心信禮騫林啓聖天尊
至心信禮神真廣德天尊
至心信禮滿相金容天尊
至心信禮玉華寶照天尊
至心信禮應真無滯天尊
至心信禮道慧幽微天尊
至心信禮神真無礙天尊
至心信禮玄應自然天尊
至心信禮妙覺大成天尊
至心信禮忘功至蹟天尊
至心信禮善慧延生天尊
至心信禮上靈高妙天尊
至心信禮金闕照量天尊

至心信禮普通玄德天尊
至心信禮金剛湛寂天尊
至心信禮空相端嚴天尊
至心信禮虚心致福天尊
至心信禮淨慧德本天尊
至心信禮劫初制度天尊
至心信禮遍覺常淨天尊
至心信禮道機權應天尊
至心信禮真宰妙樂天尊
至心信禮大洞玄虛天尊
至心信禮至德通慧天尊
至心信禮流布光化天尊
至心信禮威禁萬靈天尊
至心信禮冥同聖智天尊
至心信禮寂寥玄默天尊
至心信禮明威御世天尊
至心信禮大成法利天尊
至心信禮虛皇妙宰天尊
至心信禮靈耀重光天尊
至心信禮智勝真要天尊
至心信禮含光洞晏天尊
至心信禮會鏡流明天尊
至心信禮高玄隱德天尊

至心信禮冲虛匿景天尊
至心信禮弘救度生天尊
至心信禮大方種智天尊
至心信禮神通普被天尊
至心信禮冲微久視天尊
至心信禮超昇有漏天尊
至心信禮積成玄智天尊
至心信禮騫林示相天尊
至心信禮增益化生天尊
至心信禮寶智虛容天尊
至心信禮洞晏消魔天尊
至心信禮玄虛寶蔭天尊
至心信禮妙勝真淨天尊
至心信禮澄神鍊影天尊
至心信禮靈慶長流天尊
至心信禮制魔威變天尊
至心信禮稱物機緣天尊
至心信禮乘虛匠導天尊
至心信禮玉光淨德天尊
至心信禮威德難勝天尊
至心信禮幽元湛寂天尊
至心信禮玄上靈源天尊
至心信禮冲真會聖天尊

至心信禮愛忍宣教天尊
至心信禮開化導迷天尊
至心信禮黃庭太極天尊
至心信禮降魔救苦天尊
至心信禮寂照虛無天尊
至心信禮正真靈妙天尊
至心信禮默念幽玄天尊
至心信禮紫極太元天尊
至心信禮含光普願天尊
至心信禮太虛衆妙天尊
至心信禮冲微滿月天尊
至心信禮浩劫元皇天尊
至心信禮救護法王天尊
至心信禮重玄凝寂天尊
至心信禮寶林妙行天尊
至心信禮自在應權天尊
至心信禮遍智真容天尊
至心信禮無名隱德天尊
至心信禮大慈惠愛天尊
至心信禮玄德智藏天尊
至心信禮慈顏湛相天尊
至心信禮應真太一天尊

至心信禮威光無礙天尊
至心信禮高聖通明天尊
至心信禮玄元誕妙天尊
至心信禮空慧凝常天尊
至心信禮方便善救天尊
至心信禮通真遍應天尊
至心信禮衆善慈施天尊
至心信禮香光忍辱天尊
至心信禮凝神玄覺天尊
至心信禮大慈無我天尊
至心信禮運化微明天尊
至心信禮虛通品量天尊
至心信禮大惠衆善天尊
至心信禮海量無涯天尊
至心信禮光妙高玄天尊
至心信禮常住虛假天尊
至心信禮玄微德本天尊
至心信禮耀靈度命天尊
至心信禮會善開宗天尊
至心信禮妙空真相天尊
至心信禮含弘品量天尊
至心信禮智藏微達天尊
至心信禮慧解空寂天尊

至心信禮普照幽玄天尊
至心信禮法本虛凝天尊
至心信禮天寶自在天尊
至心信禮智成大滿天尊
至心信禮平等善應天尊
至心信禮開光濟物天尊
至心信禮無量救苦天尊
至心信禮靜處玄默天尊
至心信禮清微證悟天尊
至心信禮淵澄洞照天尊
至心信禮大明空解天尊
至心信禮高妙慧天尊
至心信禮開緣普救天尊
至心信禮無量妙身天尊
至心信禮光相萬變天尊
至心信禮紫虛玄聖天尊
至心信禮飛空智勝天尊
至心信禮玉晨耀景天尊
至心信禮梵寶太虛天尊
至心信禮元靈觀惠天尊
至心信禮海空辯慧天尊
至心信禮尊勝妙光天尊
至心信禮善願普音天尊

至心信禮希微威德天尊
至心信禮慈悲護度天尊
至心信禮端靜梵行天尊
至心信禮善誠清淨天尊
至心信禮仙靈正行天尊
至心信禮慈施興善天尊
至心信禮威力難思天尊
至心信禮隨緣應物天尊
至心信禮常住慧能天尊
至心信禮真遊本行天尊
至心信禮三乘洞極天尊
至心信禮積念通靈天尊
至心信禮虛皇妙寶天尊
至心信禮常樂獨存天尊
至心信禮彌綸浩劫天尊
至心信禮香林挺相天尊
至心信禮無爲普濟天尊
至心信禮保命上生天尊
至心信禮智德無等天尊
至心信禮道慧高極天尊
至心信禮端嚴淨行天尊
至心信禮平等善救天尊
至心信禮海藏無盡天尊

至心信禮演聖開元天尊
至心信禮延福寶神天尊
至心信禮興隆妙化天尊
至心信禮衆德普見天尊
至心信禮靈音演暢天尊
至心信禮華上度仙天尊
至心信禮金容感應天尊
至心信禮寶意常寂天尊
至心信禮觀照虛无天尊
至心信禮六通證悟天尊
至心信禮照用圓明天尊
至心信禮玄真妙蹟天尊
至心信禮分形通德天尊
至心信禮元靈端靜天尊
至心信禮無量大度天尊
至心信禮安漠無爲天尊
至心信禮至真幽寂天尊
至心信禮玄牝虛凝天尊
至心信禮寶頂大成天尊
至心信禮法積光明天尊
至心信禮寶華嚴淨天尊
至心信禮應見常容天尊
至心信禮普照緣感天尊

至心信禮常施威德天尊
至心信禮周行救苦天尊
至心信禮念度羣生天尊
至心信禮入定體常天尊
至心信禮妙音寂響天尊
高上老子曰：如天尊，衆相圓滿，左右侍衛，無量徒衆，普處上方無極世界之中，廣演大乘，敷說道要，度脫一切有罪衆生，令其離苦，咸使安樂。

爾時高上老子告上方延壽真人及諸仙衆：汝等若能導化上方無極世界一切衆生，道俗男女，咸令歸誠，至心敬禮，稱揚讚歎上方梵氣無極世界三百二十天尊靈像名號，能滅衆生生死報對，從來所犯身受法戒、拜跪社竈以行祭祀之罪，信用師巫、邪祀鬼神之罪，好與俗人無法戒者同床坐卧之罪，說人長短、隱僻不便之罪，男女混雜、行諸不軌之罪，假造文狀、悞陷善人之罪，罵詈天地、三光、風雨之罪，凌忽官司、攻訐長短之罪，偷盜三寶常住法物之罪，侵取三寶福地、用爲田宅之罪。

如是上方十惡之罪，無量無邊，不可記憶。今能一心發露懺悔，除此十罪，不爲上方十直之神上元太一錄其罪目，上奏天曹，命過之後，不墜上方無極世界火坑地獄之中，長免苦痛灼爛之憂，後生人中，快樂無極。於是延壽真人及諸仙衆一心頂禮，敬奉教言。

老子像名經卷之九

老子像名經卷之十

爾時高上老子告下方保命真人及諸仙衆：下方梵氣無極世界一百二十天尊靈像名號，禮之者滅無量罪，得無量福。

- 至心信禮下方還魂起死天尊
至心信禮妙寶上真天尊
至心信禮開明祖劫天尊
至心信禮普植化生天尊
至心信禮上極妙容天尊
至心信禮梵氣普生天尊
至心信禮周回度世天尊
至心信禮上生保命天尊
至心信禮大慈延壽天尊
至心信禮圓寂證空天尊
至心信禮嚴校主錄天尊
至心信禮削除罪謫天尊
至心信禮威權自在天尊
至心信禮超凌上界天尊
至心信禮垂神濟物天尊
至心信禮舟航苦海天尊
- 至心信禮保舉監生天尊
至心信禮圓明智勝天尊
至心信禮無我慧通天尊
至心信禮緣慈親善天尊
至心信禮威制羣魔天尊
至心信禮乘真御運天尊
至心信禮景化凝玄天尊
至心信禮示見萬像天尊
至心信禮還源歸寂天尊
至心信禮安樂保常天尊
至心信禮全生護命天尊
至心信禮主錄保年天尊
至心信禮安鎮含識天尊
至心信禮回靈養素天尊
至心信禮開度宿障天尊
至心信禮保命受生天尊
至心信禮壽窮劫量天尊
至心信禮流演萬範天尊
至心信禮運度八威天尊
至心信禮梵景金真天尊
至心信禮一氣元綱天尊
至心信禮太皇鬱秀天尊
至心信禮報願生因天尊

至心信禮混合萬靈天尊
至心信禮玄會八冥天尊
至心信禮高真上智天尊
至心信禮浩劫玉虛天尊
至心信禮流津布氣天尊
至心信禮總持衆行天尊
至心信禮元梵度人天尊
至心信禮洞幽凝寂天尊
至心信禮天真太妙天尊
至心信禮乘願往生天尊
至心信禮慧覺通元天尊
至心信禮太極妙成天尊
至心信禮招真會聖天尊
至心信禮定光景耀天尊
至心信禮觀明大度天尊
至心信禮真要匠導天尊
至心信禮龍章萬變天尊
至心信禮威光玄感天尊
至心信禮觀緣品景天尊
至心信禮玉真梵景天尊
至心信禮太明七耀天尊
至心信禮玄素蒞光天尊
至心信禮景德冲用天尊

至心信禮巡虛飛步天尊
至心信禮十華上願天尊
至心信禮大安梵度天尊
至心信禮虛明總監天尊
至心信禮神真妙用天尊
至心信禮周濟忘功天尊
至心信禮玉明玄覺天尊
至心信禮梵氣彌羅天尊
至心信禮通玄萬範天尊
至心信禮十聖回輪天尊
至心信禮長生護度天尊
至心信禮普修萬行天尊
至心信禮延和正化天尊
至心信禮廣運慈善天尊
至心信禮善濟智成天尊
至心信禮遍空懸解天尊
至心信禮玄樞冥寂天尊
至心信禮空慧弘通天尊
至心信禮洞虛會聖天尊
至心信禮建德明和天尊
至心信禮常善救物天尊
至心信禮妙樂無等天尊
至心信禮契寂昇玄天尊

至心信禮興弘德化天尊
至心信禮崇仙尚善天尊
至心信禮敬愛慈忍天尊
至心信禮開濟四生天尊
至心信禮弘宣廣應天尊
至心信禮上德普聞天尊
至心信禮玉華流潤天尊
至心信禮大忘辯智天尊
至心信禮明空照寂天尊
至心信禮通慧正信天尊
至心信禮澄神靜域天尊
至心信禮赴感被緣天尊
至心信禮一乘觀照天尊
至心信禮至真玄本天尊
至心信禮洞淵三昧天尊
至心信禮六度大通天尊
至心信禮混元祖劫天尊
至心信禮凝虛太妙天尊
至心信禮冥根弘濟天尊
至心信禮大悲化遠天尊
至心信禮愍念淪墜天尊
至心信禮哀救人天天尊
至心信禮超登浩劫天尊

至心信禮迴出三清天尊
至心信禮大羅凝湛天尊
至心信禮至妙尊勝天尊
至心信禮虛極大通天尊
至心信禮玄宗空解天尊
至心信禮妙勝周應天尊
至心信禮通幽證極天尊
至心信禮遍化世界天尊
至心信禮開元應聖天尊
至心信禮上善玉華天尊
至心信禮寶真常樂天尊
至心信禮功成息照天尊

高上老子曰：如是天尊，衆相圓滿，左右侍衛，無量徒衆，並處下方梵氣無極世界之中，廣演大乘，敷說道要，度脫一切有罪衆生，令其離苦，咸使安樂。

爾時高上老子告下方保命真人及諸仙衆：汝等若能道化下方無極世界一切衆生，讚歎下方梵氣無極世界一百二十天尊靈像名號，能滅衆生生死報對，從來所犯棄擲經書、輕毀聖文之罪，先嘗齋食以貪口腹之罪，奸邪姪

妬、分離骨肉之罪，擅用三寶竹木種種法物之罪，大斗重秤、方便侵人之罪，出放販物、過分求利之罪，賣買孤虛、欺誑賢良之罪，惡口罵詈、謗毀良賤、比諸畜生之罪，宰殺衆生、屠割物命之罪，輕慢父母、自愛妻兒之罪。如是下方十惡之罪，無量無邊，不可記憶。今能一心發露懺悔，除此十罪，不爲下方十直之神下元太一錄其罪目，上奏天曹，命過之後，不墮下方無極世界糞穢地獄之中，長免臭處之苦，後生人中，快樂無量。於是保命真人及諸仙衆一心頂禮，敬奉教言。

高上老子曰：如是十方天尊，皆是元始應氣，生死十方，安鎮國土，教導衆生，隨其緣感，散影分身，變見無窮，與劫輪轉，隱顯不恒，開度一切，福被萬天。若道士、女冠及諸男女能發善心，爲人主、國王、父母、妻子、己身眷屬、七祖九玄、天下地上一切衆生，隨其分力，金銀珠玉、瓦石銅鐵、丹青繡畫，造其形像，布散十方，遍滿國土，禮拜供養，立觀度人，行道念誦，散華

然燈，懺悔發願，奉誠持齋，見世安樂，過去生天，獲福無量，不可思議。若國主有災，日月勃蝕，星辰失度，水旱不調，兆人疫癘，兵革四興，當於靈觀玄壇及以宮殿庭闕，以萬二千燈作十重，千二百盞，開八方門，使內外圓足，光明朗徹，然於其中，晝夜禮懺，散華燒香，歸命十方一千一百六十靈像名號，稱揚念誦，建大寶齋，放生布施，立百高座，講說三洞大乘妙經，即得國土安樂，天下太平。若公侯牧伯、一切人民有衆災危，亦當勤行，見世昌熾，七祖昇天，免脫地獄，長夜光明，世世罔極，長享無爲。然燈之法，亦可羅列十方千二百盞，亦可大建寶輪，上安萬二千燈，亦可所在立之，公侯以千，庶人用百。皆依此法。夜則使燈光不絕，晝則息之。停散之日，皆當廣設大齋，行道讚歎，言功諸天，得福無量，不可勝言。於是十方真人及諸徒衆一時稽首，稱善而退。

老子像名經卷之十

（丁培仁點校）

033 太上說轉輪五道宿命因緣經

經名：太上說轉輪五道宿命因緣經。撰人不詳，似出於唐代。假託太上老君為左玄真人等說宿命因緣。一卷。底本出處：《正統道藏》洞神部本文類。

爾時，太上老君在迦維羅衛國精舍中，與諸天仙、地仙、仙童、玉女等一千二百五十人俱。九月長齋，一時訖，竟從神舍中出，往到舍衛國祇樹下給孤獨園。二國中，有一大樹名尸俱類，高一千八百六十里，枝葉方圓覆六百三十里。其樹上有子數千萬石，食之甘香，其味如蜜。甘果熟落，人民食之，衆病自愈，耳目精明。吾坐樹下，是諸仙等取果食之。

左玄真人告諸仙等，吾觀天地萬

物，各有宿命因緣。諸仙等即前作禮，長跪白天尊言曰：何等宿命因緣，此諸弟子願聞也。唯具演說，開化未聞。真人答曰：善哉，若有樂聞者，一心諦聽。

道言：夫人作福亦如此樹，小小漸大，收子無限。人今生在世，豪貴為帝王國主，諸侯方伯，此人先身從禮拜三寶中來。今身為人大富，財物無量者，此人先身從布施中來。今身為人長壽，無有疾病者，此人先身從持戒中來。今身為人端正，顏色潔白，暉容第一，手足柔爽，衆人見之，皆各喜悅，視之無厭者，此人先身從忍辱中來。今身為人精進，無有懈怠者，此人先身從福德精進中來。今身為人安詳，言行審諦者，此人先身從精思中來。今身為人聰明，達解經法，讚揚妙法，開悟愚蒙，人聞其言，莫不諮受宣明為珍者，此人先身從智慧中來。今身為人音聲清澈者，此人先身從歌詠三寶中來。今身為人潔淨，無有疾病者，此人先身從慈心中來。

諸仙等上白天尊曰：云何為慈心。左玄真人答曰：一慈念衆生如母愛子。二慈念世間一切衆生各得自在。三解道意，心常歡喜。四為一切不犯衆惡。此是為慈心也。

道言：今身為人姝美者，此人先身恭敬人故。今身為人醜陋者，此人先身喜嗔恚故。今身為人無所知者，此人先身不學問故。今身為人顛愚闇塞者，此人先身不教人故。今身為人瘡癩者，此人先身無辜謗毀人故。今身為人聾盲者，此人先身不喜看經，不肯聽經故。今身為人奴婢者，此人先身負債不償，亦不禮三寶故。今身為人醜黑者，此人先身遮翳光明故。今身生在佻國人中者，此人先身輕衣裸露唐突精舍故。今身生在馬蹄人國中者，此人先身布施作福還悔惜心故。今身生麀鹿中者，此人先身意驚恐人故。今身墮在龍中者，此人先身喜相調戲故。今身生惡瘡癩疾難瘥，醫藥不治，苦毒難言者，此人先身無辜鞭打衆生故。今身為人所憎，人不欲見，

見不歡悅者，此人先身見人不歡喜故。今身爲人，人見歡喜敬念者，此人先身見人喜悅故。今身爲人，數遭縣官繫閉牢獄，節核其身，枷鎖在體者，此人先身無辜籠罩繫縛衆生不得縱意故。今身爲人免缺者，此人先身坐釣魚口缺故。如此之罪，不可不慎也。

道言：今世愚人，聞人好言善語，心不樂聞，於中兩舌亂人非是者，此人後世當作食音答耳狗。若世人聞經，心不聽採者，後生當墮驢中。若世人慳貪獨食者，後生墮餓鬼之中，得生出世，或爲獨身，或爲人貧窮飢餓，衣不蓋形，食不供口。若世人好食，自噉惡食施人者，後死當作猪狔蜣螂之中。若世人劫奪人財物，生剥脫人衣服者，後死當墮羊中，人還生剥其皮，償其宿罪。若世人喜殺，一生捕魚者，後死爲水上蜉蝣之蟲，朝生暮死。若世人無辜盜取人財物者，後死出世，當生奴婢牛馬之中。若世人喜姪人婦女，不避三光者，死逕入地獄之中，男抱銅柱，女卧鐵牀。後得出世，必生鷄鴨之中。

若世人好妄語，傳人善事以作惡言者，死逕入地獄，洋銅灌口，拔出其舌，以牛犁之。後得生世，當作鴟梟惡鳥，人聞其聲，莫不驚怖，皆言變怪，衆口呪之，必令其死。若世人喜酒耽醉者，犯三十六失，死墮泥犁之中。後生出世，愚癡甚無所知。若世人夫婦不相和順，數共鬥爭，更相驅遣者，後生墮鳩鵠之中。若世人貪人力者，後生當作象形。

道言：若世人爲州郡令長者，廩食於官，奉於祿爵，或私侵於民，鞭打捶杖，逼強輸送，告訴無所考劾，繫錄不得寬縱。此人罪重，死逕入地獄之中，神經百痛數千萬劫，罪畢出世，當作水牛，貫穿其鼻，牽車挽重，大棒打之，償其宿罪。

道言：今身爲人不沐浴者，此人先身從猪狔蜣螂中來。今身爲人慳貪，不讓譏辭多聲者，此人先身從惡狗中來。今身爲人狼戾自用意者，此人先身從羊中來。今身爲人言不安詳，不能忍事者，此人先身從獼猴中來。

今身爲人身體腥臭者，此人先身從魚鱉中來。今身爲人趨惡行毒心者，此人先身從蝮蛇中來。今身爲人好作美食，殺害衆生，無有慈心者，此人先身從豺狼虎豹中來。今身生在邊方六夷國中者，此人先身不信道法故。今身爲人背偻者，此人先身禮拜三寶不申背故。今身爲人疾病多有鍼灸者，此人先身作大醫師，爲人鍼灸，或瘥或劇，而無功效，便取他物直之故。

道言：今身爲人安序文身，直理多智，開暢妙義，人所尊貴者，此人先身宣通真義，從諸天中來。今身爲人學問清徹，聰明不貪者，此人先身積福無量劫中來。今身爲人潔白，花色了了者，此人先身常喜持旛華奉上三寶中來。今身爲人身體口氣香潔者，此人先身行無有過，口無有惡，今故如此也。今身爲人被燒死者，此人先身常喜放火，燒殺衆生之故。今身爲人溺水死者，此人先身無辜以衆生投擲水中故。今身爲人自縊死者，此人先身無辜以繩索繫衆生故。今身爲人被遭

惡虎毒蛇死者，此人先身無辜受貸殺人故。今身爲人被天雷霹靂死者，此人先身爲行多惡，欺罵長者，陵慢父母，污穢三光故。今身爲人孤獨至老，無有兒子者，此人先身常陰懷惡憎，妒他人兒孫故。今身爲人生而短命，胞胎傷墮，出世未已而早夭終，在三塗數千萬劫可得出也。

道言：今身爲人眼目眇者，此人先身常不喜看經文，收拭老人眼目中來。今身爲人巧匠，興造觀治工巧者，此人先身從諸天宮殿中來。今身爲人明徹解了妙音者，此人先身常喜聽受經法教人中來。今身爲人盲聾，六根不具者，此人常好狎人及衆生故。今身爲人早失父母孤獨者，此人先身殺人父母故。生於分離，各異鄉土，爲人下賤，奴婢驅使者，此人先身常好作劫賊，或破人家，或要路斷道，捉人打拍縛束轉賣，使人父母懊惱，肝心寸絕，至死無益。今償宿罪，如此之故。

左玄真人曰：吾見宿世以來，罪福如此，明可慎之。

道言：凡人作功德者，皆應身自行香福食及以轉經，不請人食，而不盡願者。如借人食，豈自得飽者乎。善思作福爲惠也。

左玄真人曰：燒香行道，齋戒誦經，然燈續明，盡願以爲常法布施。得福並達智慧，無所罣礙，諸神將接，萬惡皆消，衆魔不敢復當。懈怠之人，無有精進心者，一朝疾病，無有吉利，方欲燒香，便云作福，諸惡以降，衆魔守前，競來作諸變怪。以是之故，常當精進。罪福隨人如影響也。

道言：植種福田，如尸俱類樹，本種幾根也。諸仙等即前作禮上白太上言：本一根，小小漸大，收子無限。

太上語諸仙曰：施一得萬倍，言豈虛也。道乃頌曰：

賢者好布施，天神自扶將。施一得萬倍，安樂壽命長。今日施善人，其福不可量。皆當得仙道，度脫諸十方。

太上告諸仙人等：世人無智，生死肉眼，不知罪福。吾以道眼睹無數劫來，至于今日。罪福報應，由如掌中

視寶珠瑠璃，內外無有狐疑。諸天仙人等即起，整頓衣服，作禮上白太上曰：演說斯義，未能解悟，願賜開諭。太上曰：此名爲《五道輪轉宿命因緣報應經》，若善男子善女人能誦詠宣傳者，功德無量。

是時左玄真人與諸天仙人等，世間人民聞說是經，皆大歡喜，因緣各起，圍遶三匝，稽首作禮而退。

太上說轉輪五道宿命因緣經

(李剛點校)

034 太上清静元洞真文 玉字妙經

經名：太上清静元洞真文玉字妙經。撰人不詳，似出於隋唐。教人書寫真文玉字消災之法。一卷。底本出處：《正統道藏》太玄部。

皇天太上帝君無極太上元君者道君東之王父者青陽之氣萬神之先無爲西王母太陰之氣生在自然皇天上帝太一元君者天中央星是君解偃文偃王漢昌李監漂融子赤成子收子過梁強子玄子王神祖太曾子一大海溺水尋之英隨孔通盧黃子荒命光子音由窮英壩公孔子柱天士貽英丹成承翼起玄女光堅緊藏李常子玄光仲成子太和典德李玉靈角思耶干西大方伯陽鬱華陳預子廣大成赤精成子六曲務猶尹子喬真子錫射有邑

肯成仲伯景餌文成五意無爲古歷東山

静真交元氣碧羅香幽文通鞠歷藏伯朝使廓大鄉俠門御黃神過俠門神静通門智達旭命是章元辰流影靈妙錢英皆空飛瓊羽章百星山黃必日蛇儒嶽華命走通禹易工款殘山制軒在極逐勿紫丑市代元馥紀命一上下九日日元一長九音乙延馬命上激雨上天安通静智真恭命童侯林光華德祚旭上王庭音丘靈上影真虛漢含正童冥靈太神譜恢廓靈真人降陵珠子白馬玄通玄微通身紫度炎光黃承徹身玄命益祚流嬰月精青代還精却毒温身枯真益華丹行地胙延年度命幽微智静真飛騰生石梁真諱玄星宿養雲生草根玉林受命位口口出口中非我爾不仙非我爾不成迴靈吐曜玉華之身君降沙與丹水本出元三天

右三百九十字三元檢真隱書解文天文合符命元六乙參知木解兆形一分

右九天譜錄後符訣，一十七字制屯天安心明師心三身名心合九子太方凶無上人然刀凶天亦前天愛火鳥束

心元世陰光

右龍飛尺素隱訣三十七字混洞開明導沌卒喘蘭羅勒羅慶特越梓泓淵拔覽造基簡平寧憐知齊耀爛淵谷盈法綜通桐景游昌澄珠玦師慶翁京雲延覺寂范戲飛上婆生羽影明延蘭莽椿述玦豔候度高仙昌涼度玄景度生勃崇雲普仙波鄉詣扇扈迅碧欵霞泰羽留甥升通靈虜紫英松雲恭静遂蘭芝三十二字屬正天名 十方正諱 四方正諱 九星正諱 七星正諱 五星正諱 真天三 二十四真人 八生 八死

右上古百一十道君諱。

東嶽天玄，諱始風，字玉昌義光。東方青帝，歲星虛皇子，青帝玄光長玄府，服青帝之精，詠真文三通。南嶽天□，諱開明，字吁喚代。南方赤帝，熒惑星虛皇子，赤帝天元長生府，服赤帝之精，詠真文三通。西嶽天虛，諱明皇，字瓊林。此諱屬下符。西方白帝，太白星白藏子，白帝元曜長壽府，服白帝之精，詠真文三通。

北嶽元真，諱濟啓，字孟瑰冰琅。

北方黑帝，辰星虞疆君，黑帝元明玄宮府，服黑帝之精，詠真文三通。

中嶽華陽，諱孟瑛，字林丘。

太上中央黃帝，鎮星陽精君，黃帝元陽府，服黃帝之精，詠真文三通。

右解杖中五符真訣，解靈寶策符字。

爛明靈威仰洞浮極炎赤飄弩通班元氏含樞紐上金昌開曜魄寶黑節靈會隱侯局寶諱真訣解子。

右三十三字，並是五方正寶諱。

祕名無處不用，所以書符爲轉者，東行呼東方真諱，無所不辟，南行呼南方寶諱真名，無所不辟。解傳上真符字法度，應得道之人，不度中仙也。出赤書上篇。

右解靈寶策符字。

解八景錄符訣

貸諱宗媿，鼎諱閔，碑諱破胴，晃諱張虎，由共諱玄風。

右是靈寶三部錄上五方魔王姓真名，法度宿有玄名，東華紫宮中青錄上者，得道之人，不傳中仙道士。若

行東方者，口陰呪青天魔王姓名，除凶去殃。若南行者，亦爾。四季月行者，呪中央。若西行，喚西方姓名。若北行，喚北方姓名。五方行來書亦爾。輕傳者，有風刀之考也。洞玄文，九天真，三五隱，十四言，二七去六八。

前生胎化，流金元國，未盛身德，已係神仙。

暫過五苦庭，前身有宿緣，虛亭設中素，願度八難身，蕩除穢濁氣，相與戲上真。六度生梵跡，至真出虛玄。空洞嚮雲霄，仰秀十極寶。形受天尊相，遼遼造登賢。

太上三天合同七寶鎮靈

此三部八景符真訣，度宿有仙名者，不妄傳不信之人，有風刀之考。三部八景錄三十二天寶書，法應度得道之人，不傳下仙。自非萬劫輪轉，善緣今生，衆不見此寶訣。可擇其人而傳。傳必得其人。真訣出經卷中。

右三部八景符，合九十六符。訣出小劫卷中。

又太上三天合同七寶鎮靈十字，是八景後大符真訣。

大明化仙，迴元解惡。魂通剛正，萬惡伏諾。司命定生，皇神安魄。若有凶犯，悉付玄霍。

太一變六合，五神輔泥丸。七積滅三塗，血尸塞下關。三衿對帝真，拔斫胞樹根。丈人號神宗，同心元素君。天皇入太清，五老奉符文。世世登羽宮，重華日中軒。元王始明精，固我本命門。保弼運綠氣，歸上谷下玄。玄景映形神，朝濟太上輪。日月併玉衿，年隨二晨分。丹書玉堂內，位爲無上君。左鑄羽臺子，右提金顏仙。

太上清靜元洞真文玉字妙經

(曾召南點校)

035 太上老君說報父母

恩重經

經名：太上老君說報父母恩重經。撰人不詳，似出於唐代。假託太上老君為海空智藏等聖真說報恩因緣。一卷。底本出處：《正統道藏》洞神部本文類。

爾時太上老君於西那玉國鬱利山中，敷暢道德，宣闡科戒，廣為十方說因緣事。於時隨從五萬人，俱往彼處恭幸遭筵會，擎拳叉手，禮諸尊顏，問訊既周。是時眾中有一真人，名曰海空智藏，出班長跪，白太上曰：臣等稟受髮膚，皆因父母，父母恩深，無由報效。惟願大慈愍傷一切，如蒙啓訓，生死荷恩。

爾時太上惻然良久，告海空智藏言：善哉善哉，子之所問，要乎深矣。

子可諦聽，當為解說。夫形直者其影必正，形不直者其影必斜，其聲清者其響必淨，聲不清者其響必濁。孝與不孝，其義如是。若孝悌者，一家之中老少安樂，天人欽仰，神明守護，子孫相承，孝慈不斷，招感孝順，以為其子。若不孝者，世世相繼，一門之內總是冤家，雖為父子，甚於讎敵，招五逆以為其兒，父子兄弟各財異食，同園別菜，共田分穀，隱藏珍饈，喫食如偷，雖是人形，不如禽獸，神明不佑，天下輕欺，一生所為，諸不吉利，死入地獄，受一切苦罪畢，受報為百勞鳥，生子能飛，共食其母，百劫之後，託生人中，聚集五逆，諸不孝緣，共為父子，更相殘害，死生憂苦，輪轉無窮，天下苦痛，莫過於此。夫人生世，父母為親，非父不生，非母不養。是以天地覆廕，寄託母胎，氣識相凝，懷娠十月，繫妊胞重，坐卧失常，歲滿月充，誕育之候。其母恐怖性命，惻然惻怛，心神憂喪，產孕之日，內觸外觸，苦痛交切，失聲號叫，受大苦惱，匍匐戰懼，駭愕驚嗟。及至生

已，手摩其頂，墮於草上，呱呱號啼，安藏被褥，側身三月，常畏邪魔之所侵害。飢時須飯，非母不哺，渴時須飲，非母不乳，計飲母乳八斛四升，千日提携，遮蓋塵垢，推乾就濕，嚙苦吐甘，非義不親，非母不養。忽離欄車，出於地上，十指爪中，食子不淨。母或東西，確磨鄰里，官私急切，不得時還，即知我兒家中啼哭，母子天親，心性相感。分母百骸，而為兩身，氣血相傳，兩體無二。兒既憶母，母即心驚，馳步走歸，兩乳湧出。還到門外，見子庭中，或在欄車，或房門際，或有人抱，或無人抱，或在牀上，或在地下，或時坐不淨，或時把泥草，或尚啼哭，或啼哭欲止，舉眼見母，啼笑噓嘻，搖頭弄腦，曳腹而行。嗚乎嗚乎！哀向其母，母乃為兒屈身下就，長舒兩手，拭除不淨，吹噓其口，以乳與之。含乳看母，嘻嘻其聲，母見兒喜，兒見母喜，二情思想，慈愛親重，情親相念，莫過於此。二歲三歲，弄意始行，寒熱屎尿，非母不悉，笑時懷喜，啼時知嗔，唯樂飲食，所餘

無願。父母行來，值他酒座，或得餅肉，不敢不食，懷挾將歸，向與其子。十回九回，恒常歡喜，一回不得，嬌聲佯啼，以此爲常。嬌生不孝，孝子不嬌，必有慈順。及年長大，朋友相隨，年生少壯，耽翫逸樂，梳頭摩髮，欲得好衣，揀擇精妍，持爲其子，羸疏弊惡，父母自充，忽無衣裳，經求四遠，傾心南北，逐子東西，橫簪向頭，爲索妻婦。情愛偏重，其母轉疏，私房之中，共相笑語。父母年老，氣力漸衰，終朝至暮，不來省問，獨守空房，猶如外客，少衣少食，飢凍切身，手脚胼胝，耳聾眼暗，單床飄薄，度日如年。身既尪羸，多饒蟣虱，蚊虻嚙體，通夕不寐。長吟嘆息：何罪之有，生此不孝之子。柱杖巡喚，低頭下氣，欲伸所欠，未盡前言，其兒興聲，瞋目罵詈，回頭却退，扶壁而歸，搥胸自非，流動目腫，連聲唱苦，不如早亡。母告兒言：汝初小時，非吾不育，飲食遮蔽，非吾不養，懷汝十月，如携重擔，氣息奔喘，劇於走馳，或時寒熱，坐卧不安，腹皮拆裂，心胸

填滿，髮落消瘦，不能飲食。臨生產時，逆前一月，常懷憂怖，恐不相離，或有時安，或有時患。當生之日，命如風燭，四肢百脉，及以五藏，或如刀刺，或如鈎牽，或熱如火，或冷如水，比當解離，或死或生，盡世間苦，口不能述。既得生已，喜懼交集，諸苦諸痛，不可堪忍。三年携抱，日夜不離，坐卧不淨，眠食失時，視兒氣色，將息飢渴。或有疾病，父母心痛，聞子忍苦，母不能食，心口乾燥。萬種求福，黃金白銀，衣服玩具，心念子可，無所吝惜。念汝小時，東西隨我，不離寸步，食亦隨我，眠亦隨我，一日無我，終日不食，一夜無我，啼哭不眠。如何長大，忽成冤對，今雖有汝，不如本無，付之於天，幽冥當鑒。願我早過，與你相離，奈何奈何！

爾時太上說斯事已，即現神變，令此大地一切震動，於震動中，忽見此方地獄之內，無數衆生足踐刀山，手穿劍樹，拔出其舌，鐵柱刺之，酷痛號哭，身體膿爛，毛孔之內，悉皆流血，大小狼

藉，流曳楚毒。於是海空智藏肅寒毛豎，流淚嗚咽，上啓太上曰：斯之罪魂，何罪令爾？

是時太上告海空智藏言：斯罪人也，生不慈孝，違弃父母，誹謗三寶，侮慢出家，今之受報，塗炭何極，日趣長遠，無可如何。爾時太上仍說偈言：

善善自會善，惡惡歸惡根。生前不慈孝，死後報何恩。苦哉縈痛毒，往返十八門。非吾三赦日，何得暫蒙原。

爾時太上說此偈已，大眾悲號，流淚不止，便即抗手彈指。於彈指中，即令大眾回面顧視，盼於南方，即見南宮天堂之內，善男女等威儀庠序，華容挺出，天厨百味，珍玩無有窮者，恣形妍盛，娛樂自在。智藏歡喜，重白道言：不審此人承何福對，得處天堂，衣食自然，受此快樂。

爾時太上答海空智藏言：此人生時，至心慈孝，供養父母，禮敬三寶，布施持戒，信重出家，今受福慶，果報無窮。是時太上仍說偈曰：

前緣至孝慈，供養禮無違。敬信

於三寶，無期福會歸。天堂裏容曳，福祉高巍巍。斯樂今無極，由來福慶隨。

爾時太上說斯偈已，嘆息良久，告海空智藏言：善哉善哉，父母恩重，昊天罔極。嗚呼慈母！云何可報。吾憶前世，誕於洪氏胞，凝神瓊胎之府，積三千七百年。逮至上皇，重胞李母，陰陽數極八十一年。思報母恩，至今劫期，猶恐不復。何況子等凡流之輩，而不報恩。竭力盡心，尚虧禮敬，況犯上事，而有差違。諸教戒中不宣其目，三十六部不著斯言，千聖萬聖，誰不遵教，況子學道而不報恩。汝等衆人，深宜篤志，外存孝養，內蘊弘慈，粉骨糜身，亦不能盡。若有衆生，能爲父母書寫此經，讀誦受持，燒香禮拜，於中元日設大齋醮，市辦名香，緣山摘藥，造諸淨供，夙夜懇懃，請福祈恩，拔度先祖，名報父母養育之恩，五逆十惡罪得消滅。若能每月一日日中，清齋燒香，行道禮拜，誦念轉讀此經，罪亦消滅，名報父母。又於此日，當請高上淨德法師，開講此經，宣通妙義，勸衆生等

發慈孝心。如此功德，最上第一，不可思議。千萬功德，不如相勸講誦報恩。於其中間聞此經者，忽生孝心，供養父母，福德無量。上感諸天一切大聖，中感幽冥一切靈識，下流後世遠代子孫，皆生孝順，恭敬不絕。

爾時大衆及海空智藏真人等聞太上說無上恩重報父母經，各懷涕淚，受斯語已，愈感孝誠，刻骨不忘，尊敬殷重，各還本國，稽首奉行。

太上老君說報父母恩重經

（李剛點校）

036 太上真一報父母恩重經

經名：太上真一報父母恩重經。
撰人不詳，約出於隋唐。假託元始天尊為上智仙人講述父母寄胎養育恩重，勸人為父母建齋消災，超度亡靈。一卷。底本出處：《正統道藏》洞真部本文類。

元始天尊在西那玉國七寶城中，琉璃宮內，與諸天仙如常說法。無鞅數衆，周匝圍繞。爾時衆中有一仙人，名曰上智，作禮前進而白天尊：臣從昔劫以來，屢聞正道，惟報父母恩重，未睹因緣，願聽妙音，為衆演說，欲使來世有所稟修。

天尊答曰：汝當靜念在心，我為汝說。天下人民，皆因父母寄胎，誕育而得生身，受炁在胎，其苦無量，懷胎

十月，迅速不停，受孕滿時，肢脉俱解。其中非一因以喪身，幼小嬰孩，提携養育，洗滌穢濁，不憚艱辛，寧損己身，欲兒寧處。父母恩重，難報難量。若或有人能為父母多修齋供，廣造真經，讀誦受持，教人遵奉，當知是人及於父母，承此果報，即得長生，給養自然，心靈快樂。或薦亡沒，七七修齋，轉誦靈文，以資魂識，不歷塗毒，便得生天，身詣玉京，神遊金闕。或因父母疾病纏綿，建立道場，修崇道法，其病即愈，平復如常。或因父母險厄囚繫，惡鬼害身，蟲獸為妖，夢寐驚恐，但能恭潔念道修齋，退殄災殃，消除魘魅，當以降生之日，默念至親生我之恩，精勤齋戒，廣修衆善，以報劬勞。如是等人修持如上，免墮幽塗，生於正覺。汝當遵奉，宣布教化，持此經典，罔令謗讟，生不信想，獲罪無量。爾時上智及諸天衆既聞是語，歡喜踊躍，言我等衆若遇是人，皆當擁護，得受快樂，瞻仰無已。而說頌曰：

大慈無上尊，衆生真父母。能說

報恩經，聞者皆開悟。有人精受持，不久登仙路。略讚一毫端，稽首天尊去。

太上真一報父母恩重經

（曾召南點校）

037 太上老君說益筭神符妙經

經名：太上老君說益筭神符妙經。撰人不詳，似出於唐代。假託太上老君為天師及其弟子說佩帶北斗諸星神符，除病益筭之法。一卷。底本出處：《正統道藏》洞神部本文類。

爾時太上老君與天師真人，俱遊禪黎國土碧落界中，見諸衆生盡遭橫禍，疾病灾衰，暴厄困苦，夭化者多。於是真人從座而起，上白太上老君曰：如是衆生，未審行何科法，作何功德，可以濟度，今生永壽，無有灾衰？

老君曰：是諸衆生，為身各有四大之苦，不明正道，迷惑致此。天師稽首踊躍，請問罪源。

老君為說偈曰：

一為前生不信道，二為夙世不修行，三為有身不回向，四為立身愛諸纏，致使招灾及衆禍，疾厄衰病便聯綿。若要扶衰攘灾患，無過清齋轉益筭，靈符佩帶常擁護，得保長年驅惡緣。

老君說是偈已，時上元甲子正月七日。老君乘紫雲之車，與天師俱往蜀都，是月十五日，於赤石城敷座說法，普濟衆生。時有趙昇、王長信奉道法，詣前長跪，乞為弟子。於是老君命天師召集諸天星官、長生司命、六甲將軍、天神地祇，無鞅數衆，俱來就坐，同議靈音，將救衆生，令各免難，時即刻石為信，傳度神符，宣說妙經，流通世間，以為益筭。真人於是再拜啓白：雖蒙開暗，衆生猶未曉了，若乃善男子善女人，依憑齋戒，能遵教法，不負師慈，永脫諸苦，如是毀謗不信之人，復與何說，令得濟度。


老君曰：善哉，爾心憫諸衆生，啓問如是。君有世代奉道之者，篤敬不渝，燒香禮拜，轉誦真經，即得身心安泰，壽筭延長，福祿增崇，日臻至道。

老君曰：道能覆愛，道能育養，道能生成，道能救護，若有命盡之者，是道能增一萬二千九百九十九筭，與道齊堅，天地合德，萬物滋榮，真君下世，與弟子長生益筭，灾崇咸寧。若有諸患衰危厄難，一切苦病之者，即命六甲將軍、諸天星官、四萬八千聖衆，俱來救治。甲子將軍王文卿，遣官一百二十人，生弟子某身筭萬二千道，所護人身，為除百病。甲戌將軍展子江，遣官一百二十人，定弟子某心筭萬二千道，所護人身，為除魔惑。甲申將軍扈文長，遣官一百二十人，添弟子某祿筭萬二千道，所護人身，為除虛耗。甲午將軍衛上卿，遣官一百二十人，為添弟子某福筭萬二千道，所護人身，為除橫害。甲辰將軍孟非卿，遣官一百二十人，保弟子某財筭萬二千道，所護人身，令無衰損。甲寅將軍明文章，遣官一百二十人，永弟子某壽筭萬二千道，所護人身，令無夭折。


老君曰：六百甲子三元道泰君，萬生益筭君，大慈曜明等三千五百真

人，一時下降，救護人身，得延萬歲，昇入正真。爾時諸天星宿大聖，為絕冤讎。


北斗貪狼星君，主祛惡氣。




北斗巨門星君，主祛伏屍。




北斗祿存星君，主祛百鬼。




北斗文曲星君，主祛惡夢。




北斗廉貞星君，主祛口舌。



北斗武曲星君，主祛官事。



北斗破軍星君，主祛虛耗。



北斗左輔星君，主人命筭。

北斗右弼星君，主人身形。

三台星君共增祿壽，令無禍殃。



第一惡星，第二良星，第三辟星，第四熒惑星，第五危星，是諸眾星尊神，各

為弟子某消災度難，辟除天下疫氣疾病、姦姪姘妬妨害之鬼，各令速去千里萬里之外，急急如太上神符律令！

老君曰：吾今宣傳妙經，廣說道法，以符救人，佩帶之者，當須精勤，心常敬信，無不安寧，千災萬禍，俱時消化，行藏動靜，善瑞日臻，所求所願，皆得遂心。於是天師受得妙法，而作頌曰：

神符神符，泄自太無。生天生地，與道卷舒。佩奉之者，厄難消除。得成真道，身昇玄都。

天師說是頌畢，與弟子趙昇、王長稽首奉辭而退。

太上老君說益筭神符妙經

(曾召南點校)

038 太上老君說長生益 筭妙經

經名：太上老君說長生益筭妙經。撰者不詳，約出於唐代。假託太上老君為諸仙真天師說召神佩符，除病益筭之法。一卷。底本出處：《正統道藏》洞神部本文類。

太上老君昔在禪黎國土碧落天中，見有男女抱病困厄，壽不以理，便當天化，筭未應全，太上老君以他心智，洞究玄妙，垂顏顧視，即召十方天官、五嶽真君、長生司命，侍從左右，同會七寶琉璃之座，諸天宮主筭六甲符圖，天神地祇，無鞅數衆，俱來稽首，長跪作禮，端簡恭肅，受命教誨。

道言：下界之人，信道者稀，不知求生，為惡日積，其來以久，不識真君，

致招衆禍，恒嬰六疾，太上哀念兆庶，即命東極長生真君，以召六甲主筭神人，各有無量騎乘，遊行國界，持經教誨，命受天人，示其愚蒙，賜其符籙，佩服身中，轉經益筭，齋戒為常，冀續年命，免脫諸難。若有至心男女，受持供養，燒香灑掃，情無厭倦，晝夜翹勤，尊敬三寶，大慈廣濟，救護危厄，苦毒蒙原，除魔消患，滅惡澄清。甲子將軍王文卿，從官一百三十九人，生我益筭萬二千道，所護人身，得蒙成就，真神鎮心，除其惡疾。甲戌將軍展子江，從官一百三十五人，生我益筭萬二千道，所護人身，體中除患却禍。甲申將軍扈文長，從官一百三十一人，養我益筭萬二千道，救護人身還魂復魄。甲午將軍衛上卿，從官一百三十九人，與我益筭萬二千道，保護人身一百二十歲之期。甲辰將軍孟非卿，從官一百三十五人，扶我益筭萬二千道，守護人身不令見惡。甲寅將軍明文章，從官一百三十一人，救我益筭萬二千道，衛護人身斷諸惡魔。六十甲子三元道泰君，

萬生益筭君，若有命盡者，大聖之恩，能益其壽，萬道下生，與我增筭，道能覆愛，道能救護，道能生成，道能育養，若人筭盡者，是道能益一萬二千九百九十九筭，與道齊堅，天地合德，萬物滋榮，其道能生，真君下世，與我長生，益我壽筭，稟氣長存，一萬二千七百種道下生護人，若疾病之者，韓君丈人、明醫玉女、直符小吏四萬八千人，俱來救治，若有魔邪祿魅侵姪者，大慈耀明等三千五百真人，俱時破魔，剪罰殃殄，百禍崩消，道化無窮，與我益筭三千道，守護人身，命得堅強，勇猛精進，五百諸仙下生，與我益筭萬道，護人身命九億萬歲，常得正道敷生大聖興隆，益我年筭，我壽自然，百千萬道，常護人身，開智慧門，通達無礙，萬道下生，為我益筭三萬五千道，保護人身，威儀備足，衆魔摧闕，九千萬衆真人神童與我益筭，乘三千聖道救我所願。

爾時太上老君及諸真人仙童，文始先生德然等，同趣真宗，普為益筭，衛護我身，萬二千道神符，打鍛衆魔蠱

毒，山林社稷倚託形聲，假稱神勢，盡令收滅。

太上神符打鍛衆魔風王，竈君殘殂水龍之神，土公害氣，咸使銷亡。六甲神符打鍛五魃六耗，惡夢歌吟，野道呪詛，魑魅魍魎血氣之鬼，盡令除蕩。此經尊妙，威力難稱，衆經之王，降魔滅偽，最爲第一，勤修至理，德流一乘，大福普匝，慎勿輕宣，行之如法，祕而奉焉。心當存念，道不虛言，能依命者，諸惡莫干，毀削罪錄，解散怨讎，身康宅寧，萬災絕源。貪狼星主惡氣，巨門星主悲屍，祿存星主百鬼，文曲星主口舌，廉貞星主惡夢，武曲星主官事，破軍星主魑耗，左輔斗星主人命筭，右弼斗星主鬼神，三台星護人身命。

第一惡星，第二良星，第三辟星，第四熒惑星，第五危星，銷災度難，辟除天下疫氣疾病，奸非嫉妒妨亂之鬼，速去千萬里之外，急急如太上老君律令！

第一開心符，第二益筭符，第三護身命符，第四金木水火土不相剋符，第五主

生人阿姪死鬼虛耗神符，所生之法，一切惡物見符當自散滅，急急如律令！

六甲將軍在上元甲子正月一日。


太上老君與天師，以漢安元年於蜀都，五月壬午在赤石城崖舍之中，折石爲信，奉道之民，若有壽終筭盡，年衰月厄，當自沐浴燒香，齋戒存心，聞我太上神符，保護萬姓，百年無闕，若歲月日時衰忌，當佩神符，無有衰厄，大道真符，授與其人，過災度厄，增年益筭，受符之後，壽命延長，九億萬道符護身命，願壽登一百二十歲，筭得備足，三宮丹田，真氣充滿，身有光明，諸仙生我，諸經載我，日月照我，玉光映我，陰陽長我，四時養我，五芝蔭我，五雲蓋我，五真護我，六甲生我，五帝助我，五音樂我，五兵翼我，星辰覆我，真聖衛我，仙人扶我，玉女侍我，青龍引我，白虎俠我，公侯吏人愛我，百姓敬我，萬民營我，長者順我，鄉里欽我，弓箭刀兵盜賊離我，虎狼蛇蟲獸避我，五毒蠱道避我。弟子佩符之後，天開四通，百鬼伏從，墮水不溺，履火不燒，

出入吉慶，不逢禍殃，四海五嶽，將軍所護，天道備衛，萬法俱宣。


太上神經，賢聖衛我，良藥餉我，

洞究吉凶，神符護我，百鬼避我，仙道念我，天門通我，地戶閉我，清泉飲我，神人達我，風伯送我，雨師除道。當吾符者死，背吾符者亡，符厭嫉妒耗害田蠶之鬼，符厭死喪新舊哭泣雌雄破殃復連之鬼，符厭山林社稷田君殘殂之鬼，符厭遊光精魅百怪之鬼，符厭赤舌呪詛盟誓之鬼，符厭比舍起屋動土尸疰之鬼，符厭日遊土氣禁忌之鬼，符厭腥血傷亡客死之鬼，符厭兵死獄死之鬼，符厭男女殃殍之鬼，符厭無辜枉殺人鬼。弟子今受大道神符，行流動靜，四道開通，寢不惡夢，善瑞日臻，所求所願，皆得遂心，千道萬法，正真之威，如符所勅，急急如太上道君律令！


第一開心符




第二益筭符




第三護身命符




第四金木水火土不相剋符




第五主人生阿姪死鬼魑耗神符



符馱遊光之鬼




符馱山林之鬼




符馱五土之鬼



符馱遊止土氣之鬼



符馱客死之鬼




符馱獄死之鬼




符馱無辜之鬼




符馱赤舌之鬼



符馱雌雄之鬼



符馱腥死之鬼



太上老君說長生益筭妙經

(曾召南點校)

039 太上老君說上七滅罪集福妙經

經名：太上老君說上七滅罪集福妙經。撰人不詳，似出於唐宋間。假託太上老君說念誦北斗七真名號，懺罪消災請福延生之法。一卷。底本出處：《正統道藏》太清部。

爾時太上老君昔龍漢末劫，在須彌山絕頂峰上，與天仙、地仙、飛仙、神仙、十方來衆，集於頂上，宣說道法，以善眼觀瞻南閻無極衆生，家家盡有瘟氣，官府口舌，破財失職，人口死亡之患，尋時召北斗七真訊問，天下萬姓盡遭其事。是時北斗七真乃整衣冠，端簡向前，瞻禮三拜，上奏老君曰：納臣之言，萬民不信三寶，背正信邪，十惡五逆，不解回心向善，逐月上七，亦無

燒奏，懺洗身心，保安骨肉。是時斗口使者，每到上七，抄劄善惡，上奏天曹，滅尅祿壽，致令有此禍害，上奏。

老君：善哉善哉！北斗七真善能奏對，利益之事，衆生不知不覺，豈懼災危，北斗七真可先爲十大滅罪消災興福助善天尊，若善男子善女人，聞此上七妙經，供養燒香，對聖念誦者，能消開眼合口生身所造罪障業障，即隨聖號消滅一切所作之罪。是時老君即說名曰：

貪狼天尊，願我宅舍得安寧，
巨門天尊，願我父母保長生，
祿存天尊，願我榮業得稱情，
文曲天尊，願我闔門盡康健，
廉貞天尊，願我子孫保榮盛，
武曲天尊，願我衆惡永消滅，
破軍天尊，願我六畜保興生，
輔弼天尊，願我疾病得痊瘥，
三台天尊，願我財物不虛耗，
華蓋天尊，願我橫事永不起。
道言：凡俗無知，上七真聖每月降在人間，可以消災懺罪，請福延生，

隨力章醮，福德增崇。其有上七，善男善女不信香火，此爲輕生迷本，不愧人身，天司奪祿減筭，如此之人，身謝之後，漂諸六趣，生禽獸中，永失人身。上七之日，善男子善女人，能修燒香進奏，善達天曹，世世身富聰明，人中殊勝。其有男子善女人，生身果薄貧窮，縱知上七，無力修奉，可以酌水獻華，望北斗稽首禮拜，念北斗十大天尊及本命真君名號者，皆得延生注福，繫係人身，災厄蠲消，獲福無量，福壽增延，保安家眷，以今轉經功德，先用裝嚴上界諸天十方大聖，國王帝主師尊父母，下爲今時轉經弟子一家大小，各乞平安，次及法界衆生，俱離苦源，齊登道果。而作誦曰：

於是七元君，大聖善通靈。
濟度諸厄難，接出苦衆生。
若有咨告者，持誦保安寧。
盡憑生百福，皆由奉此經。
道言：說經將畢，龍鶴天仙來迎老君還於玉京。是時老君重告北斗七真曰：可以宣揚正教，濟度衆生，福利

無邊，同霑上善，若善男子善女人一生恭敬，轉念此經，信受三十年者，天曹有字，地府除名，祿盡壽終，不居幽界，一逕昇天，十王案上，永絕姓名。是時北斗七星成道真人再拜老君，流傳在世，廣行傳度，勿云非人，誠慎之焉。

太上老君說上七滅罪集福妙經

（曾召南點校）

040 太上老君說消災經

經名：太上老君說消災經。撰人不詳，約出於唐宋間。假託太上老君為諸仙真說經，授予尹喜。勸人誦經念神，消災除病。一卷。底本出處：《正統道藏》洞神部本文類。

老君以庚寅年四月二十八日丙午，與諸天大聖俱坐碧霞之殿、五雲之座，真仙侍衛，無鞅數衆建節捧香，羅列左右，一時同會。即召天仙地仙、五嶽衆仙、天仙三十六皇主、地仙二十四皇主、神仙十皇主、飛仙大聖衆，又別國主上仙三十六萬人，中仙二十五萬人，下仙十四萬人，八大龍主、八大鬼主、八大畜主、三五之君、二十四性，悉皆來集。勅勒天都錄事地都名字，即使攝錄天下邪魔惡鬼、魑魅魍魎、盜賊

虎狼、及橫官口舌、兵戈水火、疾病災害急厄，患之者，莫問男女，皆當香湯沐浴，齋戒然燈，燒香禮誦，供養此經。若家有衆魔野盜精邪疾疫，急厄難之時，當呼三十六金剛，二十五神王、二十七力士、三十七天師，凡此金剛神王，力士天師等名號者，皆主知萬病災變，吉凶好惡悉皆由也。若有善信男女，能長齋燒香，禮誦此經，功德無量，所有千災萬病，惡逆盜賊虎狼，一切病難，自然消滅。天尊降福，覆護其人，所向從心，無不獲福，家門安泰，子孫隆昌，修習之人，皆致靈感，輕慢之者，禍及九祖，令可告男女，令知報應，皆得利焉。

元炁金剛，混沌金剛，總領金剛，萬兆金剛，捉鬼金剛，部錄金剛，收炁金剛，好生金剛，鎮守金剛，去邪金剛，保命金剛，守形金剛，守炁金剛，行真金剛，除僞金剛，除邪金剛，破惑金剛，上奏金剛，下衛金剛，上明金剛，保身金剛，長生金剛，變化金剛，清定金剛，

定身金剛，朱雀金剛，玄武金剛，大聖金剛，成道金剛，天道金剛，地道金剛，神道金剛，火頭金剛，威怒金剛，大力金剛，滅魔金剛，天大神王，地大神王，王大神王，元素神王，素生神王，陰德神王，鍊炁神王，鍊精神王，鍊生神王，開化神王，造化神王，真道神王，神道神王，護身神王，破邪神王，執正神王，破夷神王，破賊神王，覓鬼神王，斬鬼神王，遠行神王，安身神王，殺鬼神王，食魅神王，捕精神王，除姦力士，除佞力士，破怨力士，破迷力士，開道力士，消災力士，散禍力士，解厄力士，消魔力士，把攬力士，領鬼力士，收鬼力士，收邪力士，抄錄力士，定文力士，定罪力士，上奏力士，對君力士，奉承力士，天顯力士，地廣力士，攝邪力士，破軍力士，征伐力士，攝神力士，橫天力士，食精力士，啓元天師，道光天師，開化天師，

進仙天師，重光天師，朗清天師，清定天師，定邪天師，收鬼天師，制魔天師，斬鬼天師，啓天天師，部錄天師，上奏天師，除死天師，定生天師，保護天師，普濟天師，濟厄天師，救死天師，護生天師，度命天師，度人天師，好生天師，好善天師，變化天師，神妙天師，皇上天師，萬福天師，至極天師，玉辰天師，上聖天師，虛皇天師，無量天師，明皇天師，洞深天師，普攝天師。

老君曰：此天師者，位在三十六天之上也，仍下統世界，普領鬼神，及一切精邪疫疾，虎狼毒獸，時瘟疫疠，口舌呪詛，悉皆由也。若人不信道法，違背仙經，專事邪神，或修俗教，或習邪風，或祭祀鬼神，如此等類，罪由轉盛，無知穢俗，背正信邪，故受考對，萬劫無明，千劫受罪，乃得還生畜生之類，非人之形，任他役使，不可思議，死經地獄，無有還期，其罪深重，不可盡言，如此之人，縱得受生，恒遭疾病，貧

窮苦厄，無時安靜，官府所尅，衆人所害，年命短促，死入長夜冥冥地下，人所不知，百劫受罪，乃得返人之形。若能洗心易行，而得生也，若迷而不迴者，而近於死也，將以長處惡道，無由重生也，今重告子，明慎之焉。是時諸真大仙，歡喜踴躍，稽首而作頌曰：

道言甚微妙，普濟度天人。習者皆成道，背者悉殃身。此經能消災，蕩穢絕囂塵。衆生無智慧，違者信邪神。死入寒冰苦，受罪甚艱辛。迴心歸正道，方可受真身。一心歸仙路，乃得度天津。永享無期壽，分形百萬真。九幽長披散，七祖離冥津。自然天厨食，皆賴聖皇恩。靈歌唱玄路，萬劫保清真。隨世人人度，三真應聖皇。五方而靜默，道法漸時光。似如人半日，妖魅入心藏。陰陽或衰盛，百姓並飢荒。真人將去世，混雜實難當。潛龍欲重起，閉目在幽房。狂人顛倒業，不久自遭殃。沉淪地獄下，痛毒被刑傷。皆由心邪見，致使受焦惶。金剛令上道，威力破迷荒。行歌而交泰，至道永開

張。風調而雨順，五穀滿盈倉。四方皆賓伏，麟鳳自呈祥。明君時有道，萬劫保年長。

老君謂尹喜曰：此經尊貴，乃衆仙得真之要也，子今受吾之要，直須精專，內自保之，勿示非人，唯學仙道士，及善信男女，此可依經傳受，明宣道法，令深慎科戒，勿使失時，今重告子曰：不得妄傳，吾言甚祕，宜慎之焉。喜即稽首跪拜受經。是時諸真衆仙聞說經畢，退席恭敬，侍立俄頃，有諸仙駕浮空而下，無鞅數衆各捧香花，持符執節來詣道前，一時稽首，奉請老君還玉京。老君於是歡喜臨駕，重謂喜曰：吾當上昇矣，子受此經，必成道矣。喜即莽然悲涕，俯伏禮謝，忽失其所在，唯聞音樂震動山川，因仰面視諸龍駕，雲炁旋遶，五色鮮明，世之莫識，須臾漸遠，隱而不見矣。

太上老君說消災經

（曾召南點校）

041 太上老君說解釋呪詛經

經名：太上老君說解釋呪詛經。
撰人不詳，約出於唐宋間。假託太上老君為尹喜真人說解除呪詛厭魅之法。一卷。底本出處：《正統道藏》洞神部本文類。

爾時太上老君在於闐國中仙度之所，語尹喜曰：上古之時，人民淳朴，心行正直，稟性柔和，不相嫉妬。末世浮澆，人心狡詐，不修善行，唯習凶惡，不奉大道，倚托邪神，作法呪詛，專害人命。是時尹喜真人稽首再拜，上告太上老君曰：憫念蒼生沈淪下鬼，魂被考劾，魄無依倚，願賜解脫之法，使諸衆生免遭枉橫。

老君語尹喜曰：汝當諦聽，吾所說者，切見中古之人，專行厭禱，便於

天下地上邪鬼廟社之中，畫其形像，書其姓名庚甲，私竊呪誓，以水噴灑，以脚踐踏，努目張口，種種形勢，專行無道，枉害良善，若自作，若教他作者，令受其殃。善男子善女人，或被惡人呪詛厭禱者，皆當香湯沐浴，建立道場，請三洞道士轉誦此經，功德不可思議，其病即瘥。若男若女被人呪詛，便可解釋，免沈身命，奉請五方五帝部從兵馬各九百萬人，為弟子某於四面八方上下中央，剪除邪魅不祥之鬼，令弟子福壽延長。即說呪曰：

大法堂堂，天圓地方。天有九柱，地有九梁。厭呪之人，自受其殃。六柱三梁，厭蠱消亡。三梁六柱，還其本主。六甲六乙，厭蠱速出。六丙六丁，厭蠱不行。六戊六己，厭蠱不起。六庚六辛，厭蠱不真。六壬六癸，厭蠱自死。呪詛速解，急急如律令！

奉請三五將軍、八風使者、九州社令、萬古將軍兵士百千萬衆，追取厭蠱五音之人三魂七魄，付北陰天獄，呪詛惡人，精魂散越，神志猖狂，頭破作七

分，一如律令！

吾今所說解除呪詛厭魅經法，若有善男子善女人得聞此經，為人轉誦，救治病難，度脫衆災，令得安樂，身強體輕，福壽延長，永無災障，冤家債主，速蒙消釋，魅害驅除，三屍墮落，得道成真。是時老君而作偈曰：

我昔遊中國，位登無上天。今來入竺國，教化諸衆生。九十有六種，其中各有緣。令其敬信者，展轉自相傳。精進心不退，得生無上天。有誦此經處，斯人壽命延。百靈來護衛，萬病悉皆痊。見世得安樂，身如金石堅。至真無上法，消灾福自然。

太上老君曰：無始以來，諸仙聖衆救度群生，便得安寧，驅蕩妖邪，解釋呪詛，凶殃散滅，吉瑞扶持。是時大聖衆真歡喜踴躍，咸願受持，稽首叩頭作禮而退。

太上老君說解釋呪詛經

（曾召南點校）

042 太上老君說安宅八陽經

經名：太上老君說安宅八陽經。
撰人不詳，約出於唐宋間。假託
太上老君為太極真人說誦經安
宅之法。一卷。底本出處：《正
統道藏》洞神部本文類。

爾時太上老君在福德天中，召集
十方聖衆、天神地祇，俱來集會，講說
妙法，時有太極真人，端簡上告老君：
爲見閻浮衆生修造宅舍，頻遭厄難，作
何方便，以救凡愚？

老君答曰：若有善男子善女人，
起造宅舍，驚動龍神，屋宇鳴喚，地華
土裂，南堂北屋，東廊門戶，井竈碓磨、
庫藏船車、寓止六畜欄圈、莊舍寺院，
但是屋宇房廊窟穴，觸犯天煞地煞年
煞月煞日煞時煞，四方諸煞，五方地

祇，青龍白虎朱雀玄武將軍太歲，黃旛
豹尾十二時神六甲禁忌，土公土母土
府伏龍一切惡煞，宜轉此經禳謝，所犯
神煞悉皆隱藏，遠送四方，各鎮方隅，
不敢爲害，念誦此經，是諸惡鬼，皆自
消滅，疾病驅除，身強體輕，念誦此經，
功德無量。若有善男子善女人匡保蚕
桑，至心念誦此經，福德報應。或起造
屋宇，修營倉庫、牛欄、馬坊、猪圈、雞
栖，掘鑿動土，轉誦此經三徧至百徧，
令土府相生，陰陽和合，向坐宜良，龍
神匡贊，百福咸臻，眷屬和平，悉無障
礙，所求皆得，所願皆成。於是大衆聞
說此經，皆大歡喜，作禮而退，信受奉
行。

太上老君說安宅八陽經

（曾召南點校）

043 太上老君說補謝八陽經

經名：太上老君說補謝八陽經。
撰人不詳，約出於唐代。假託太上老君為三官及諸神說禳災安宅之法。一卷。底本出處：《正統道藏》洞神部本文類。

道言：天地水三官，日月五星，二十八宿，南北二斗，五土八卦，大地十二諸神，十方衆聖，盡來聽言。

老君曰：爲見四方三界、國土州縣、城市鄉坊，每有動土興工，修造宅宇，添新換舊，東西南北，四維上下，種種施工，建修之後，頻遭三灾九厄，十苦八難，土氣流行，生死輪迴，劫劫殃深，無由解謝，乃敕日遊月煞將軍，太歲遊龍伏龍，天煞地煞歲煞月煞日煞時煞，大煞小煞灾煞劫煞，六甲六神，

天中十二神，地中十二時神，黃幡豹尾官符病符死符，蚕官蚕命蚕室奏書，大耗小耗五土八卦門丞戶尉，行年本命星官，天上地下千二百禁忌諸神，已往未作動土興工，修造之後，但當燒香受持供養，讀誦此經，永無忌諱，土氣潛藏，普令和順，國土安樂，干戈永息，風雨無愆，民安物泰，萬事昌榮，出入水陸，公私利益，非橫不生，家門肅睦，眷屬和平，入宅大吉，常納光明，龍神擁護，鬼祟潛形，灾消禍散，福祿臻盈，諸如所願，天下太平，永保元吉，克遂心誠，人天奉法，依律敬焉。

太上老君說補謝八陽經

（曾召南點校）

044 太上老君玄妙枕中

內德神咒經

經名：太上老君玄妙枕中內德神咒經。撰人不詳，約出於唐代。假託太上老君說誦經念咒存神衛身之法。一卷。底本出處：《正統道藏》洞神部方法類。

老君曰：大道無形，常居杳冥，隨機化物，以應精誠，子能寂念，受吾真經，能持受者，口淨神清，然後誦之，萬惡不生，可以治病，可以延齡，百邪不干，群妖束形，所以然者，一切有情，受吾真經，乃得長生。今更於中，苦鍊身形，常靜三業，澄止六情，自然五神守護，三一長存，坐卧安穩，魂魄康寧，旦夕兩時，三徧誦經，耳聰目明，身強體輕，一如後文，子當諦聽。

老君曰：子等身中，有三萬六千

神，左三魂，右七魄，身有千二百形影，體有萬二千精光，五藏六腑，二十四神，常存念之，勿令離身，有病三呼，即降其真。

老君曰：子欲過度三灾九厄，應作是言，我以天爲父，地爲母，吾居其中，常如赤子，日爲功曹，月爲主簿，雷公使者，在吾左右，風伯雨師，在吾前後，六甲直符，周匝圍繞，青龍扶吾左，白虎侍吾右，朱雀導吾前，玄武從吾後，北斗覆吾頭，天罡指吾首，騰蛇在吾足，爲吾滅殃咎。吾居丹房中，太一爲吾偶，左三右七，戴九履一，二、四爲吾肩，六、八爲吾足，吾居中宮以爲腹實，今敕千鬼萬神，各還本鄉，當吾者死，背吾者亡，速出奔迸，隱匿深藏，大丁力士，斬滅不祥。急急如律令！

老君曰：臨卧之時，當出四獸自衛其身，青龍從吾肝，出在吾左；白虎從吾肺，出在吾右；朱雀從吾心，出在吾前；玄武從吾腎，出在吾後。汝等四獸，磨牙礪齒，在吾左右前後，辟除衆邪妖鬼，不得妄來干吾玉房，令吾坐

卧安穩，無惡夢想。急急如律令！

老君曰：都念既畢，即當還神，肝主藏魂，肺主藏魄，心主藏神，脾主藏意，腎主藏精。青龍還吾肝，朱雀還吾心，白虎還吾肺，玄武還吾腎，黃龍鎮吾脾，以爲腹實，衆邪惡鬼不得下居。急急如律令！

老君曰：還神既訖，即鳴天鼓三十六通，咽液三十六過，即閉氣，從一至十，心暗數之，滿九便止。當存心中赤氣，從口而出，狀如火光，輪行四布，周遍室中，定即內想，自然安寢其中。常能如此，永無疾患，千灾萬魅，莫或敢干，與道合真，長生久視，子孫昌樂，富貴日興，金車入門，仕宦高遷，祿位三公，心忠志孝，輔弼帝君。急急如太上女青詔書律令！

太上老君玄妙枕中內德神咒經

（曾召南點校）

045 太上老君說救生真經

經名：太上老君說救生真經。
撰人不詳，約出於唐宋間。假託
太上老君說誦經保命延生之法。
一卷。底本出處：《正統道藏》
洞神部本文類。

爾時太上老君與八千徒衆，在紫微宮中瑠璃七寶殿上，廣說妙法，讚歎世間中國男子女人，光如日月，持齋存念真經，所有非災橫禍，盡乞消除，廣布受生，延年益筭，千冤和釋，萬惡潛藏，災害不生，禍亂不作，罪障消沉，福祥臻集。

爾時太上老君敕令六甲六丁守護受經之人，常使永無殃咎，疾病不侵，四時平善，八節康寧，盜賊潛藏，妖怪伏匿，念誦此經一七徧至二七徧，乃至

三七徧，功德無量，慕道皆成，常令耳目聰明，身強體輕。

爾時太上老君說此真經，救生保命，永無災障，生生遇道，世世逢真，若能抄寫此經，受持供養，永保平安，壽筭延長，咸仰皈依，信受奉行。

太上老君說救生真經

（曾召南點校）

046 太上說十煉生神救

護經

經名：太上說十煉生神救護經。
撰人不詳，約出於唐代。假託太上老君為衆生說念誦十方天尊名號，除罪延生之法。一卷。底本出處：《正統道藏》洞神部本文類。

爾時太上老君分形變化，廣歷十方，興隆教法，救度存亡，隨於帝代，為其師範，教諸衆生，常令誦念：

東方慈悲救苦天尊，
南方好生救苦天尊，
西方平等救苦天尊，
北方大慈救苦天尊，
東北方普濟救苦天尊，
東南方無量救苦天尊，
西南方等觀救苦天尊，

西北方惠化救苦天尊，

上方徧慈救苦天尊，

下方廣度救苦天尊。

老君曰：受吾指教，敬誦十方救苦天尊名號，能為拔贖苦魂，令得悟解。汝等四輩衆生，應有三業六根，殺生偷盜邪淫、貪嗔嫉妬、愚癡顛倒、妄言綺語、惡口兩舌、罵詈呪詛、違天逆地、不孝不義、不仁不直，罪根無量，致招殃咎。若能奉此真經聖號，俱蒙解脫，孤魂滯魄獲生天堂，塵沙罪咎盡使消除，又或見存四輩衆生，能常清靜持誦此經，凡諸厄難，亦得蠲消，壽命延長，身心安泰，稽首歸命天尊，敬信奉行。

太上說十煉生神救護經

（曾召南點校）

047 太上太清天童護命

妙經



三茅山道者梁悟真受

經名：太上太清天童護命妙經。
 撰人不詳，約出於唐代。假託太上老君說誦經吞符，消灾除病之法。附錄宋紹興甲子（一一二一）茅山道師傅霄跋文，宣稱大觀三年（一一一三）太上以『加句天童護命經』授道士梁悟真。一卷。底本出處：《正統道藏》洞神部本文類。

太上曰：皇天生我，皇地載我，日月照我，星辰榮我，諸仙舉我，司命與我，太一任我，玉宸召我，三官保我，五帝衛我，北辰相我，南極佑我，北斗輔我，金童侍我，玉女從我，六甲直我，六丁進我，天門開我，地戶通我，山澤容

我，江河渡我，風雨送我，雷電隨我，八卦尊我，九宮遁我，陰陽宗我，五行符我，四時成我，我命著我。太清玄籍，三宮升降，上下往來，无窮无息，金飯玉漿，向求皆至，虛梵日月，與天為誓，魑魍魎魁魍魎星，所求皆得，所向者亨，所為者合，所欲者成，種種變化，與道合真，何神不使，何令不行。我前有朱雀，後有玄武，左有青龍，右有白虎，上有華蓋，下躡魁罡，神道光嚴，威鎮十方，愛我者生，惡我者殃，謀我者死，憎我者亡，靈童神女，破邪金剛，三千六百，常在我傍，執節捧符，與我同遊，太上攝京，天大吉昌，二十四符，與星曆俱，急急如律令！

太上驅邪治病靈符



太上太清天童護命靈文，乃金闕上真授付修道之士，及世間男女，若能每日清朝，念此經三遍至七遍，乃至百遍，即有十方靈寶无上仙眾、三元將軍、翊天四帥真君、飛天神王、破邪力士，統領神將吏兵，各千萬億，守衛誦經者，常令安穩，金精猛獸無鞅外護，百鬼不能侵，邪魔不敢害，可以破廟除邪，可以治病消灾。旦夕持誦，令人耳目聰明，身強體輕，延年益壽，永保長生，兼書篆此靈符二十四道佩帶，則驅邪，吞服則治病，常以甲子庚申朱書，唯在志誠，佩而行之。

太上太清天童護命妙經

隋大業十三年，老君遣霍山神，預告唐公受命之符，至高祖武德元年二月二十三日，有老人鬚髮皓白，素衣烏冠，乘白馬，駿尾及蹄皆赤，現晉州羊角山，謂絳人吉善行曰：與我語大唐天子，今得聖治，社稷延洪，言訖騰空而去。其年四月二十七日，復現如前，但未審將何爲信，老人曰：汝到京，有獻石龜者可爲驗，言訖不見。善行以

五月五日，見晉州總管賀孝義，具言其事，孝義將善行見秦王，王討賊駐節於晉，遂差都督杜昂，與善行於所現處致祭，老人復現，如善行所言，秦王令昂與善行馳驛入奏，五月十九日到京，於朝堂門見邛州治中張達進石龜，上有文曰：天下安，子孫興，千萬葉，千萬歲。乃同入奏，果符前驗。高祖大悅，勅於現處立廟。善行復見老人曰：天子疑我何事？答曰：爲不知聖者姓名，老人曰：我是无上神仙，號曰老君，即帝之聖祖也。亳州有枯檜再生，以驗天下太平。善行即告孝義奏聞，又於其年十二月七日，老君於廟復現，

爲善行曰：我亳州廟中枯檜已更生，唐得聖治，子孫當享國綿永，已遣神兵百萬，待四月節助國討劉黑闥。即馳入奏，至次年四月二十一日，果平黑闥。於是天下大定，而枯檜果更生焉，改羊角山爲龍角山，以廟爲慶唐觀。至高祖龍朔間，老君復現，依狀圖寫，號爲瑞像。

今本觀正係天下第一地肺福地，高辛時，展上公得道昇仙，晉有許長史披尋其地，建宅修真，父子得道，俱已仙去，丹井存焉。梁有陶隱居，追尋其跡，而建昭真臺，纂集三洞四輔靈文。唐開元間，李玄靜先生爲玄宗度師，請于朝，賜以金帛，即昭真臺基而立瑞像殿，逮今幾五百年，而殿宇瑞像皆唐人所造，爲古道場，甲於茅山也。本朝大觀三年四月十三日，有執爨道者梁悟真，凌晨汲水於殿前養龍池，俄有紫雲彌覆其所，須臾，見一羽衣，厖眉皓首，長髯如雪，乘白馬，自空而下，梁驚視其狀，與殿中粹容無異，梁急作禮伏地，太上曰：吾居太清境上，偶降靈

壇，憐汝服役勤勞，有志於道，而一無所遇，今授汝《加句天童護命妙經》，當專心誦之，立功行於世，道將爲汝得矣。梁拜受慈訓，仰睹聖真，復乘馬嘶鳴凌虛而去。是歲，其地產芝草，一本數莖，梁自此却粒，神觀頓異，平時庸愚，未嘗識字，至是能書誦經，靡不通曉，示人灾福，歷歷如神，而梁仙去前三日，書二十四符投池中，凡有疾之人，入山求水，服而愈者，不可勝數，奉道之士，晨夕崇奉，凡有所求，虔心祈禱，無不感應。霄嘗讀《混元聖紀》，故錄示像之因，並顯應之跡，以告來者。紹興甲子茅山都道正明真通微大師傅霄謹書。

（曾召南點校）

048 太上太清天童護命妙經註

經名：太上太清天童護命妙經
 註。金朝道士侯善淵撰。一卷。
 底本出處：《正統道藏》洞神部
 玉訣類。

太上太清天童護命妙經註序

夫太上者，玄元之王，萬聖之師，至上至尊，至高無位。上則包羅衆象，中則普濟羣生，下則長養萬物。生生化化，受炁於太始之中，物物頭頭，稟道在虛无之內，千變萬化，无不太上矣。故天道者，運爲清陽之炁也，童德者，動合純粹之真也，兩機相契，妙用爲一，護命養生。神明佑助，兇虎无由所傷，毒蟲焉能所害，何爲堅固，至在於神之機也。

太上太清天童護命妙經註

姑射山太玄子侯善淵註

太上太清天童

高真攝化，神用无方。頌曰：太上玄元第一尊，跌蓮高坐玉清宮，天童妙化圓明體，光鑑寰瀛萬象空。
 護命妙經。

誦者除邪，修之攝正。頌曰：太上親傳護命經，玄言直語甚分明，清晨默念持三徧，无限羣魔盡失驚。
 皇天生我，

金公道父，覆我之真。頌曰：萬物因從道炁生，皇天育我氣神清，壺中逗引龍行火，鼎內金丹漸結成。
 皇地載我，

黃婆牝母，運我之形。頌曰：一炁冲和萬物彰，本因生產在中央，丹田養就靈仙藥，始覺神遊入帝鄉。
 日月照我，

天地之精，感而純陽。頌曰：交逕鳥飛兔走波，二輪晶耀越天河，達人

到此開青眼，試問凡夫認得麼。

北斗輔我，

心通七竅，斗柄分明。頌曰：斡開斗口運天關，兩點流星任往還，鼎眼滿傾銀浪滾，爐門一派水晶翻。

星辰榮我。

滿天精秀，照我神凝。頌曰：極目陽精數點輝，往來昇降疾如飛，空中頤養胎仙就，穩跨金龍入太微。

江河渡我，

曲江金水，穩駕神舟。頌曰：靈波滾滾接東流，傾入汪洋法海收，穩駕神舟淤歷徧，水心直下釣龍鈎。

北辰侍我，

北辰初顯，侍我同明。頌曰：北極玄微鎮碧霄，心開頓悟亦非遙，胎光一點澄凝處，萬道流霞物外飄。

風雨送我，

寰中虛靜，雨過風清。頌曰：薄霧輕煙細雨霏，遠嵐凝翠可相宜，清風送我歸何處，拍劍騎龍上紫微。

諸仙舉我，

衆真相助，一體无分。頌曰：諸仙

舉我朝三界，衆聖相扶入帝京，金闕門中呼羽客，玉霄榜上列仙名。司命與我，

天中司命，與我同源。頌曰：司命從容意自清，介然與我育神嬰，嬰兒長大渾无物，一顆靈光處處明。

太一任我，

太一玄機，任我神通。頌曰：太一爐開師子吼，混元鼎破火龍飛，滿天光焰燒空界，萬派精金照日輝。

六丁進我，

六門通泰，進我神遊。頌曰：六丁進我任遨遊，散髮披襟跨火牛，仗劍咬牙吞日月，飛符追下活人頭。

玉女從我，

金童前引，玉女後隨。頌曰：玉女相隨入洞遊，笙歌引上水晶樓，凭欄不見紅塵事，唯有虚空浮日頭。

五帝衛我，

五般霞彩，聚入神宮。頌曰：五炁朝元入寶宮，三花片片落空中，玄珠配合生光瑩，遍照乾坤上下通。

天門開我，

上朝金闕，出入夷門。頌曰：閑騎白馬上天門，信步因遊翫月宮，寶殿姮娥新有令，賜余丹桂一枝紅。

地戶通我，

心通兩竅，神致无方。頌曰：一擊玄關地戶開，絳宮仙子上靈臺，遍觀極目瓊花綻，盡向紅爐火裏栽。

我命著我，

性命俱備，精炁神全。頌曰：養炁全神別有方，安魂定魄不飛颺，丹成已覺心通聖，鑿壁穿山透海滄。

太清玄籍，

太清之道，玄籍萬神。頌曰：太清永劫鎮夷門，萬化生乎在彼中，一性貫穿天地匝，金嬰還返玉晨宮。

三宮昇降，

上昇下降，三一浮沉。頌曰：三宮昇降定浮沉，達者心開性自深，太一爐添文武火，硃砂鼎裏鍊精金。

上下往來無窮，

親遠疏近，大計無窮。頌曰：上下無窮不見形，無形之體自然清，蠲蠲贈得靈砂滿，燦燦交光照眼明。

金飯玉漿，向求皆至。

天然一味，食者延年。頌曰：一盤金飯浸瓊漿，啜罷神清入太倉，五色雲中朝聖主，紫微殿裏奏明皇。

虛梵日月，

虛懸寶鑑，道眼高明。頌曰：虛梵煌煌映大羅，高懸日月照婆娑，鼎中汞水涓涓滴，鑄就紅砂滿鼎多。

與天爲誓，

天性人也，人心機也。頌曰：天性人兮人象天，天人相契立根元，根元混一歸何處，蕩蕩茫茫萬化前。

魑魍魎魁，

北極之號，受正除邪。頌曰：北極元君鎮上方，咬牙執劍斬魔王，妖精魑魍全俱滅，總化無形變血光。

所爲者成，

背之者死，向之則生。頌曰：修成丹藥永無枯，玄牝空中任吸呼，白虎每吞金鳳髓，烏龍常飲太陽酥。

何神不使，

人人有分，物物皆從。頌曰：萬神同喜聚三光，至道無生得久長，常使

汞鉛顛倒用，自然丹就得純陽。

何令不行，

天地萬物，受炁而生。頌曰：一陽

初動黃芽秀，二炁相交白雪清，兩味

合和十六兩，完容一粒寶珠明。

上有朱雀，

火龍蟠頂，丹鳳凝陽。頌曰：朱雀

離巢趁日飛，上侵天谷徹雲霓，展開

金翅磨星斗，推落陽光滿太微。

下有玄武，

烏龜水府，太陰之精。頌曰：玄武

交宮水府行，赤蛇相繞火中生，刹那

一井金波湧，傾入紅爐滿鼎烹。

左有青龍，

龍從震位，汞自西生。頌曰：青龍

一蹶出東渝，舒展紅霞罩玉都，兩道

電光听霹靂，三天驚動鎮江湖。

右有白虎。

虎從兌位，鉛自東生。頌曰：白虎

深藏入兌方，須彌靜坐泛龍光，射開

宇宙羣魔退，獨霸山川鎮海滄。

愛我者生，

全神養炁，保命長生。頌曰：陰陽

火候勿令差，鉛鼎飛霜吐翠砂，一粒

明珠顛倒滾，滿天精耀放紅霞。

惡我者殃，

貪嗔損炁，嫉妬傷神。頌曰：貪嗔

嫉妬勿交生，信任寰中自在行，清靜

若逢尸鬼鬧，袖中携劍斬三彭。

謀我者死，

財色利名，親之者死。頌曰：功名

富貴莫爭儼，愛慾恩深業轉多，達士

超然俱遠避，迷人不悟永耽耽。

憎我者亡。

心猿意馬，縱之則亡。頌曰：邪魔

陰鬼亂交紛，握固存神意不容，寂靜

若逢塵事撓，放開心月照虛空。

玉女三千六百，常在我傍，

萬神聚會，不離我身。頌曰：一簇

神仙秀炁清，彩雲深處賀昇平，空中

一派仙音奏，捧箇真人入洞庭。

執節奉符，與我同遊。

行住坐卧，動止相隨。頌曰：玉女

同遊不夜鄉，鳳鸞迎駕入明堂，金童

滿勸瓊漿液，味覺清香透頂涼。

太上攝京，

高真攝位，衆聖來朝。頌曰：太上

扶空坐寶蓮，放開惠日照無邊，諸仙

總攝高真位，衆聖來朝御坐前。

天大吉昌。

寥寥空靜，湛湛盈虛。頌曰：混元

一炁定沉浮，獨立寥寥空萬象初，渺渺

玄玄千劫外，澄澄湛湛覆虛無。

二十四符，

神符去病，心印除邪。頌曰：神符

斷崇陰消滅，心印除邪道自生，金籙

玄科親授訣，濟民助國永清平。

與星曆俱。

星河玉潔，心月冰清。頌曰：星河

皎潔透銀蟾，無上真人至仰瞻，玉女

掣開秋水殿，金童舒起夜明簾。

急急如律令！

經中得意，急急修持。頌曰：功行

齊修兩事全，煥然輕舉化飛仙，青童

引至朝元去，鶴駕香風入洞天。

太上太清天童護命妙經註

（曾召南點校）

049 太上泰清皇老帝君 運雷天童隱梵仙經

經名：太上泰清皇老帝君運雷
天童隱梵仙經。撰人不詳，約出
於宋元。言召遣雷神將帥之符
咒秘法。一卷。底本出處：《正
統道藏》洞神部本文類。

唵風火雷兵嚇吒大神，唵都噓呢
耶唵黑殺那耶。皇天生我，皇地載我，
日月照我，星辰榮我，諸仙舉我，司命
與我，太乙任我，玉宸召我，三官保我，
五帝衛我，魑魍隨我，天官傳我，受法
靈童，地官有勅，雷部侍我，水官有令，
火氣合迎，諸龍聽我，上徹玉清，都天
五將，噉雷發聲，玉帝有勅，南宸佐我，
北斗輔我，金童侍我，玉女從我，六甲
直我，六丁進我，天門開我，地戶通我，
山澤容我，江河渡我，雷電隨我，八卦

遵我，九宮遁我，陰陽宗我，五行扶我，
四時成我。唵吽咭吒，披頭散髮，各變
真形。天蓬元帥寶印照我，天猷元帥
持戟衛我，詔聖真君扶劍守我，玄天真
武水火助我，四瀆護我，九龍遶我，甘
雨從我，雷火隨我，閃電照我，二十四

愛我者生，惡我者殃，謀我者死，憎我
者亡，靈童神女，破邪金剛，三千六百，
常在我傍，執節捧符，與我同遊，太上
攝景，天大吉昌，二十四將，與星歷俱，
祛龍跨虎，收斬妖精，稍有違令，牒送
雷霆，急急速攝攝。

炁輪將直我。吾身神光，虛梵日月，與
天爲誓，魑魍魑魁。唵九天高明神，唵
唵吽咭吒。唵摩吒臨魑魑星，唵
咭吒唵噉攝馘吒，唵嚙炁和，中養三
魂，內育七魄，雷公電母，隨鼓而擊。
唵飛毛羽吒攝銅牙鐵爪，唵充南北攝
至東西臨體色馘逐飛空，黃中理炁，
黑暗蕩蕩，震起斗牛，神奔鬼愁，三令
閉塞，五申徘徊，金神騰駕，木郎大神，
水冲玄戶，火降离明，土安五宮，日月
朗朗，龍虎交橫，風雨應生，江河倒逆，
山嶽摧傾，冲天破地，萬丈興行，所求
者得，所向者成，所欲者合，所謀者遂，
天罡大聖，河魁尊神，種種變化，與道
合真，何神不使，何令不行，左有青龍，
右有白虎，前有朱雀，後有玄武，上頂
華蓋，下躡魁罡，神通光嚴，威震十方，

唵噴音田吒音邦命囉耶阿送陀噉噴
吟耶，北帝黑刹，嚴嚇威神，轟天霹靂
攝。乾元救晶，勅負風猛吏，追風使
者，風伯道彰，趕龍奔霧，風雲疾興，引
雷使者，電光發興，風起巽戶，罡布箕
星，三台輔我，飛雷震驚，風伯雨師，急
降黑雲，雷公掣電，所往無虞，入海天
門開，入河地戶出。九天勅令都天元
帥，唵欵火奉令五帝雷公，陰陽雷公，
四令雷公，六甲雷公，霹靂雷公，發水
雷公，八風雷公，十雨雷公，六道雷公，
掣電雷公，興風雷公，行雨雷公，五嶽
雷公，四瀆雷公，八節雷公，六候雷公，
大川雷公，溪谷雷公，江河雷公，四海
雷公，鳴鼓雷公，轟輪雷公，火車雷公，
火輪雷公，移山雷公，走石雷公，興雲
雷公，洒雨雷公，行雪雷公，布霜雷公，

打瘟雷公，驅邪雷公，光明雷公，黑暗雷公，火印雷公，破陣雷公，金玉豐隆，所求皆至，世間珍寶，由吾所聚，天下鬼神，受吾所驅，有一不從，雷斧速誅，明離大神。有功之日，名書上清，身中之神，自然清靜，太玄保舉，玉班有名，前排力士，後擁天丁，驅雷霹靂，飛走火鈴，城隍社令，不得留停。唵囉嚩吒祛役天丁，五方使者，霹靂大神，勅誥奉行，急急如太上皇老帝君律令！

太上泰清皇老帝君運雷天童隱梵仙經

(曾召南點校)

050 太上九真妙戒金錄

度命拔罪妙經^①

經名：太上九真妙戒金錄度命拔罪妙經。撰人不詳，約出於南北朝或隋唐之際。假託元始天尊為酆都北帝及諸仙真說九真妙戒金錄寶符，拔度衆生罪魂出離地獄。一卷。底本出處：《正統道藏》洞真部戒律類。參校本：敦煌S.957號寫本。

爾時元始天尊在九清妙境三元宮中，御三炁之華寶雲玉座，騫林之下，與諸大聖、太上道君、太上老君、九皇上真、飛天大聖，妙行真人、四司五帝、天龍神鬼^②，無鞅數衆，一時同會劫仞寶臺。十方來衆皆駕五色瓊輪，八景琅輿，玄靈翠節，飛雲^③素蓋，麟駕羽軒^④，龍旂鳳葆，獅子白鶴，嘯歌邕邕，

燒香散花，遊空飛步，誦詠洞章，朝讚天尊，總校圖錄，拔度諸苦。時三元上宮光明照耀，洞朗太空，靈都紫微，輝映十方，下及無極境界，長夜九幽地獄之中，善惡命根，光中煥然，一切玄司，無不照耀，一一天宮皆見。元始天尊與諸大衆敷弘至妙，開化人天，標記善功，注名黃錄，金格玉簡，陳列三清，一地獄之中皆見。十方救苦天尊入於九幽，拔度諸苦，敕命北帝三官九府，百二十曹、五帝考官、察命童子、司命司錄、司功司殺^⑤、土皇九壘，及四明公賓友僚屬、五嶽掾吏、執罰神兵、巨天力士、天驪甲卒，牛頭獄吏，威劍神王、三界大魔，九億鬼王，皆集九幽地獄之中，同稟教戒。

爾時酆都北帝及諸鬼官，咸皆震悚，各作是念：我等積罪，身為鬼官，統御冥司，常居黑暗，動經億劫，不見光明，今日何緣，忽感上聖威光朗耀，普照重昏，欲有啓問，懷疑未敢。爾時普掠獄中，有諸罪人，名入黑簿，牛頭獄卒驅上刀山，皆悉身首^⑥爛壞，五體

零落，其中獨有一人，循山上下，逐樹高低，履鋒踐刃，無一傷損，所有刃戟，變成蓮花。爾時北帝心大驚怖，稽首禮謝，上白天尊：弟子先緣不幸，身任冥司，自處酆都，已經億載，屢見罪人受諸苦惱，亦見東方風雷之獄，常有黑風，震雷霹靂，飛戈飄戟，衝突罪人，分散肢體，穿穴五臟，萬劫受苦，不捨晝夜。又見南方火翳之獄，有諸罪人，吞火食炭，為火所燒，頭面焦燎，頭戴火山，皮膚骨肉，節節生火，萬劫受苦，不捨晝夜。又見西方金剛之獄，有諸罪人，金鎚鐵杖，亂拷無數，肢體爛壞，筋骨零落，鐵叉^⑦穿腹，金鎚塞心，萬劫受苦，不捨晝夜。又見北方溟泠^⑧之獄，有諸罪人，沈沒丘寒之池，冰戟霜刃，衝斷筋骨，百毒之汁，以灌其上，五體零落，心腹破壞，萬劫受苦，不捨晝夜。又見中央普掠之獄，有諸罪人，身被拷掠，痛毒難忍，斷筋流血，悶絕擲地，於是獄卒方以鐵叉又刺，令諸罪人各各巡上刀山劍樹，八達交風，吹樹低昂，足履刀山，掛身劍鏢，萬劫受苦，不捨

晝夜。又見東南方銅柱之獄，有諸罪

人，身上銅柱，大火猛焰，令諸罪人手抱足登，表裏焦爛，腹背膿潰，萬劫受苦，不捨晝夜。又見西南方屠割之獄，有諸罪人，身被倒懸，刀劍割體，四肢筋脉，皮膚五臟，皆有刀刃割切其中，罪人血流滿地，非可堪忍，萬劫受苦，不捨晝夜。又見西北方火車之獄，有諸罪人，五車裂體，四肢分散，或身處火車，東西南北^⑨。一一車輪，皆有刀刃隨輪運轉，割切罪人，加諸猛火，燒炙焦爛，萬劫受苦，不捨晝夜。又見東方鑊湯之獄，有諸罪人，身被鐵叉，又入鑊湯，五體煮潰，四肢潰爛，膿血臭穢，不可堪忍，萬劫受苦，不捨晝夜。未審今此罪人，以何因緣，循上刀山劍樹，了無傷損，刀戟鋒刃，變成蓮花，相好端嚴，獨步無畏，衆苦所加，莫能害者？忽感上聖迴駕，天真降集，一切震懼，莫能所知^⑩。惟願天尊大慈大悲，普濟普度，令諸九幽受苦衆生，拔除衆罪，自識宿命，捨惡從善，得出九幽，身處光明，輪轉福報^⑪，長得解脫，永離三

塗。

爾時九幽地獄衆生，聞是北帝廣爲啓請，心生悔過，願求拔罪，舉聲悲叫，響振梵天。於是^⑫十方救苦天尊大悲觀心，普及一切，度身威光，假六通慧，令諸罪人閉目靜思。俄頃之間，自識宿命，各各明了生存之日造諸惡業。或手弑君父，不孝二親，或誹謗大道，背真就偽，或殘傷兄弟，謀反師尊，或六親通同，淫犯骨肉，或爲劫賊，殺害人命，或屠割衆生，自饒一身，或以彊凌弱，以貴虐賤，或浮好三寶，執心不專，或輕慢法師，穢賤靈文，或心懷陰賊，安忍嫉妬，或惡口兩舌，鬥亂善人，或殺生淫祀，裸露三光，或心生，或口語，或自作，或教他，積劫以來，所有諸罪，一時頓憶，各各明了，倍增悲惱，願求解脫。

天尊普告四衆：汝等諦聽，此諸罪人，曠劫已來，不信經教，惟罪是修，惡惡相牽，過滿罪定，遂使名書惡簿，身沒九幽，淪滯三塗，未應解脫，賴於其中有此一人，生存之時，曾立九幽大


齋，受持金錄白簡九真妙戒，標名金格，列字玉清，德重功高，感通上界，我以神力隨念救護，今當普宣禁戒，絕諸惡根，咸使汝等一時解脫。爾時北帝聞是說已，心大歡喜，不勝踴躍，瞻仰尊顏，而作頌曰：

善哉元始尊，衆生慈父母。傾光紫微宮，曲映九幽戶。峨峨丘寒庭，迴照廓冰浦。炎炎烈火燄，霈然灑法雨。圓通大哀智，常善濟衆苦。拔度長夜魂，今得稽首禮。

爾時北帝說是頌已，諸天大眾同聲稱善，鈞天伎樂，萬種互作，幢蓋香花，廕覆一切。於是元始天尊復告四衆：汝等諦聽，靜念在心，吾當爲汝顯說九真妙戒，金錄白簡，受持功德，拔難濟苦，神力難思，衆靈稽首，伏受教命。天尊告曰：

一者克勤，忠於君主；二者敬讓，孝養父母；三者不殺，慈救衆生；四者不淫，正身處物；五者不盜，推義損己；六者不嗔，兇怒凌人；七者不詐，諂賊害善；八者不僞，傲忽至真；九

者不二，奉戒專一。



元始符命金錄白簡救苦真符。告

下十方無極世界、三官九府、百二十曹、五帝考官、九幽地獄，巨天力士、執領神兵、司錄司命、司功司殺、牛頭獄卒、三界大魔，拔度亡過某靈魂出離地獄，永辭長夜，睹見光明，萬罪蕩除，冤仇和釋，承此九真妙戒拔度功德，上生天堂，一如告命，風火驛傳。

太歲 年某月某朔某日齋壇告



元始符命金錄白簡長生靈符。告

下南方丹天世界、朱陵火府、南昌上宮長生大君、韓君司馬、司命司錄、延壽益筭度厄尊神、迴骸起死監生大神，超

度亡過某靈魂上登朱宮流火之庭，玉眸煉質，黃華蕩形，書名紫冊，受化更生，承此金錄度命功德，時刻昇遷，一如告命，風火驛傳。

太歲 年某月某朔某日，齋壇告

下。

汝等若能受持金錄白簡九真妙戒長生靈符，救苦真符，當消九幽大罪，標名九宮，察命童子，護戒威神，五帝直符，六宮掾吏，自當隨逐簡文，覆護受戒弟子。天尊又曰：若有國土兵灾不息，疫毒流行，是其國主后妃太子王公及以兆庶，亦當修設九幽大齋，各各受持九真妙戒金錄寶符，兵灾靜息，妖惡自屏，天人稱悅，忻國太平。若在山林曠野，為虎狼猛獸之所奔突，便當寧心存思金簡靈符、察命童子、受戒法師、護法神王，猛獸自退，終不害己。若入大海遭遇惡風，亦當存念，風浪靜息，得達於岸。若在軍陣白刃之中，亦當存念，兵仗伏匿，不有害傷。若在牢獄枷鎖之中，亦當存念，冤枉自伸，必得解脫。若為邪精鬼賊衆苦所纏，亦

當存念，鬼魅消滅，自然痊愈。若人命過應入九幽，名書黑簿，夫妻男女門人同學，當為亡人立九幽大齋，書名白簡，為受九真妙戒，燒除黑簿，彼諸罪人，應時解脫，魂昇九天，因緣輪轉，得為九宮真人。天尊又曰：金錄妙戒長生靈符，威禁至重，若能如法修行，其福無量。若復有人起心誹謗，生輕慢想，當知此人積惡萬劫，罪障深重，名書惡簿，身沒鬼官，命過之後，必當淪陷九幽地獄，備受諸苦，綿綿長夜，不可解脫。設復有人初雖信受，後起慢心，察命童子奏上三官，削除金簡，注名死錄，或在見世身受惡病，蟲癩癰疽，人所棄擲，求生不得，求死不得，憂惱自煎，無由解脫，或復長被橫惡所加，或犯王法，或犯刀兵，或犯虎狼，或犯水火，或犯惡人口舌呪詛，室家不和，門族起爭，冤家牽引，一失真道，長淪惡趣。是故汝等依科遵奉，勿生異念，宣告男女，咸使聞知。是時北帝及諸四衆九幽罪人，聞是說已，心開悟解，各生善念，衆苦消釋，身心泰然，皆

發道意，性不退轉。是時九幽黑簿，一時焚燼，火山息燄，冰池靜波，吞火食炭，化爲甘露，金鎚鐵杖，變成蓮化。飛空步虛而作頌曰：

稽首無上道，歸心元始尊。至真妙應主，開化飛玄門。妙戒怡五靈，金書警萬神。察命定錄籍，靈符度苦魂。乘雲朝玉帝，齊契玄中人。

太上九真妙戒金錄度命拔罪妙經

① 敦煌本卷首題名爲『太上九真妙戒金錄度命九幽拔罪妙經。』

② 『天龍神鬼』，敦煌本作『天龍人鬼。』

③ 『飛雲』，敦煌本作『飛霓。』

④ 『羽軒』，敦煌本作『羽騎。』

⑤ 『司功司殺』，敦煌本作『司罰司煞。』

⑥ 『身首』，敦煌本作『身手。』

⑦ 『鐵叉』，敦煌本作『鐵杖。』

⑧ 『溟冷』，敦煌本作『溟靈』。

⑨ 『東西南北』，敦煌本作『隨車東西』。

⑩ 『莫能所知』，敦煌本作『莫知所以』。

⑪ 『輪轉福報』，敦煌本作『轉輪福慶』。

⑫ 『於是』，敦煌本作『余時』。

⑬ 『及以』，疑當作『以及』。

（曾召南點校、王卡復校）

051 太上說九幽拔罪心印妙經

經名：太上說九幽拔罪心印妙經。撰人不詳，約出於唐宋間。假託元始天尊為救苦真人說拔度衆生罪根，使身心清靜之法。一卷。底本出處：《正統道藏》洞真部本文類。

爾時元始天尊坐七寶殿，放大光明，徧照三千大千世界，觀見衆生受諸苦惱，沉淪生死，受報無窮。於是救苦真人即從座起，瞻仰尊顏，長跪問曰：是諸衆生，以何因緣，飄蕩苦海，沉沒無邊？

天尊告曰：如是衆生，受諸惡業，皆由自心，妄想顛倒，不悟無爲，一切罪根，皆從心起，天堂快樂，自由心生，三界沉淪，亦從心起。心生邪見，妄起

念嗔，心生惑亂，存念非真，心懷殺害，受諸類身，心生諂曲，與道無因，心生虛寂，與道相親。重宣此義，而說偈曰：

大道澄廓，元理幽深。先天而生，運化古今。道無形體，澄濾身心。不貪不慾，不嗔不淫。是非莫識，表裏思尋。身心清淨，煩惱不侵。無起無滅，冥漠難斟。湛然空寂，了心無心。自然合道，衆聖來欽。昇朝金闕，遊翫騫林。七祖解脫，永離幽陰。皆契心印，悟道合真。念念相繼，勿起塵心。

是時受苦衆生聞說妙經，咸皆解脫。衆真作禮，悉大歡喜，稱揚讚歎，依教奉行。

太上說九幽拔罪心印妙經

（曾召南點校）

052 元始天王歡樂經

經名：元始天王歡樂經。撰人不詳，約出於唐代。假託元始天尊為九氣天君演說，勸導國王后妃修齋行道，以保國土太平。一卷。底本出處：《正統道藏》洞真部本文類。

元始天尊成就十方國土，度諸衆生，國土成就，將還大羅冥寂元通於天首之山、萬光瑤殿七寶瓊臺，衆真侍衛，諸天齊臨，與高上玉帝、太上道君至聖尊神、諸天帝君仙真聖品校錄法門，以三十六部真經，付囑三千世界五億諸天，流通教化，開度天人，使當來男女普入信根。付囑既已，九炁天君從座而起，長跪稽首，擎拳上白天尊曰：臣從无量劫來，輪轉生死，運度因緣，常在福中得遇道真，經教開張，寔

由天尊廣救之恩。常見下方世界，宛利天中，人王國主，造惡者多。或耽著姪色，飲酒猖狂，不憂百姓，苦酷萬端，或畋遊漁獵，放蕩無窮，或廣造宮殿臺榭城池，或音樂倡樂，馳騁人間，或大營陵廟，征討四方，或毒心熾盛，殺害賢人，或信用讒諛，不從忠正，或賦役繁雜，以供一身，或不信宿命罪福因緣，或毀道形像、玄壇靈觀，或殺道士、山林栖遁，或焚燒經教，皆毀聖真，或父子相殘，自相誅戮，或兄弟讎關，骨肉交爭。怨氣聞天，暴虐無度，人靈號訴，不可勝言。未審此輩何以教之，伏願天尊開大慈悲，說法度人，令歸善道。

天尊答曰：皆由衆生業緣所感。不信罪福宿命因緣，无量劫來，值今惡對。洪灾流蕩，水火刀兵，倒海傾山，死亡飢疫，父南子北，男女分張，萬苦縱橫，百姓荼毒，山鳴鬼哭。妖彗遍天，地震天崩，河驚海沸，衆灾交沴，獸化成人。惡氣感生，星辰見象，誠示天下，令識吉凶，誰謂愚癡，不能自覺，吾

今爲汝說此經文，使諸國王，悉得歡樂，率土安寧。九氣天君稽首請曰：唯願慈尊特垂大宥，告以未聞。

天尊曰：若國主人王，及以妃后、大臣宰輔、男女善人，常當發心歸依正道，供養三寶，廣建福田，立觀度人，抄經造像，行道禮拜，受戒持齋，布施放生，懺悔發願，救濟窮厄，解免囚徒，開赦罪人，省諸賦役，遠離酒色，儉約己身，愛養人民，憂勞一切，常敷百座，講說大乘，廣召法師，教化羣品，然燈照夜，散華燒香，晝夜誦經，投告山水神仙洞府、天地靈祇、嶽瀆名川，置諸仙觀，開度男女，皆使出家，保護住持，永不休替，即諸天歡樂，國土安寧，日月星辰，各依分度，河海潛默，風雨和調，一切欣欣，普天快樂。是時善忍國王捨其宮苑，及以城闕、國中勝處、山林名嶽，置諸靈觀，玄壇精舍，遍其境土，擇國中男女形容端正，智慧聰敏有善心者，皆使出家，並諸王子妃主、公侯牧伯宰輔大臣，能出家者，悉令入道，紹隆正法，助國化人，兼諸妃后公主王

子、宰輔大臣、國中男女大富長者，各隨王發心，捨施屋宅，及以園苑、池臺庭院，造諸靈觀，安置經像，開度男女，皆使出家，住持供養，願國安寧。又常造天尊无上法身、應真化像仙真聖品、金剛神王、師子辟邪、香官使者、仙童玉女、龍虎君等，禮拜供養，係念見前，願得真道，不死長生。常寫三洞經教，裝潢條軸，流通讀誦，講說敷演，願求神仙。常建百座，廣召法師，晝夜講說三洞大乘无量妙義，教化一切，保護人民常持齋禮拜，散華燒香，奉戒發願，以度己身。常放贖生命奴婢下賤，布施貧窮，道邊立井，種植果林，造諸屋舍，及以橋梁，濟度一切，廣布慈悲。常設義田，施衣及食，拯救飢寒。常然燈照夜，解拔災厄，助天光明，不入盲道，普消暗冥。常以法衣、法具、器物、几杖、飲食、華果、名香、上藥，供養出家十方法身。常以綾羅錦綺、綿絹布帛、金銀珠玉、七寶珍奇、車馬童僕、田園屋宅、男女妻妾、米麥之屬，供養三寶常住福田。常造鍾磬、幡華、幢蓋、

香鑪、帳座、巾帕、裊褥、玄壇、欄楯如意、澡灌塵拂、坐具、夾膝等物，供養經像，及以法身，常修靈觀、殿堂樓閣、師房廊宇、臺榭池沼，功德巍巍。常念經念道，懺悔祈恩，以滅罪愆。常修上清大洞金房天寶洞真三元行道，以求鍊質得道成真。常修金籙行道，調理璿璣，正天分度，國祚興隆。常修黃籙行道，以拔億曾萬祖地獄幽魂。常修明真行道，和天安地，保國寧人。常修自然行道，普爲生死，男女存亡。常修靈寶三元行道，懺謝天地水火，拔贖先亡，開度己身。常修塗炭行道，以度厄難，水火刀兵，囚徒繫閉，疾病災厄。常修洞神三元行道，遍爲天地一切衆生。常修洞淵神呪行道，辟除魔沴、一切鬼神、山精妖魅、疫病瘟疫。常修旨教行道，開導危苦，解厄消災。常修正一行道，延年益筭，保命扶衰。常修太平洞極行道，兵戈止息，百穀熟成。常修五鍊行道，安穩陵廟，開度亡人。常供養巖栖學真道士，願早成真。常投告山水行道，設齋願國土太平。常持

正一符籙，徵邪劾鬼，爲諸男女。常誦道德，清靜无爲，少私寡欲。常持洞神經誡，制斷邪精，役御神鬼。常持洞玄經誡，滌除三業，清淨六根，滅慮忘身，轉神入妙。常持洞真經誡，冥心寂想，與道合真。常持三洞大法，行諸觀慧，寂定歸无。常以六齋十直，詣觀燒香，行道念誦，講說大乘，散華然燈，布施發願，爲物及身。常修故像及諸舊經，福德薰修，遍及存亡。常至月半，請諸大德法師懺悔受誡，洗濯身心。常自講說讀誦，教化國人，令生道心。常行讚歎，歌頌天尊无量聖德，覆護衆生。常卑宮室，清廉克己。常遠酒色，保養形神。常行仁德，以懷他國。常行慈念，安樂衆生。常斷畋漁，放贖生命。常減滋味，服食持齋。常少賦斂，救濟貧窮。常无徵召，安撫邊方。常用和柔，不行刑罰。善忍國王，及以妃后、大臣宰輔、國中男女諸王子等，常行如此功德，精進勇猛，清淨智慧，忍辱持戒，布施奉齋，心心不退，名聞諸天，天王歡樂，降駕齊臨，神仙兵馬、仙童玉

女、三界五帝、一切威靈，常來擁護，天靜地默，日月光明，星宿合度，風雨順時，百穀豐熟，男女興隆，地藏發泄，枯骨更生，年命長遠，无有夭傷，王及妃后並諸大臣王子，皆得輕舉，白日登天。今爲四梵真人善忍國復爲極樂國矣，來生男女各自勤焉。

爾時天尊常遣智日真人、寶月真人、明遠真人、淨光真人、開天真人、通生真人、文德真人、慈等真人、福力真人、平和真人、虛寂真人、空玄真人、无相真人、有惠真人、遍空真人、普明真人、惠遠真人、清明真人、澄照真人、等鑑真人、玄覽真人、大覺真人、智力真人、寶藏真人、金明真人、思遠真人、法藏真人、玄通真人、流照真人、觀慧真人、大慧真人、明相真人、至誠真人、同明真人、紫光真人、金景真人、玉英真人、靈真真人、真空真人、洞虛真人、微妙真人、凝玄真人、保志真人、守定真人、安忍真人、抱玄真人、自然真人、无名真人、覺空真人、太明真人、登玄真人、至清真人、圓道真人、玄一真人、本

際真人、真一真人、瑤光真人、靜智真人、長生真人、淨空真人、明道真人、寶首真人、獨覺真人、法海真人、澄明真人、寶相真人、見空真人、四達真人、八明真人、九轉真人、三輪真人、六通真人、七覺真人、一相真人、二儀真人、五惠真人、十輪真人、常淨真人、信德真人、定志真人、寶真真人、安志真人、通微真人、入无真人、龍漢真人、延康真人、赤明真人、開皇真人、上皇真人、寶海真人、寶香真人、香水真人、玉鏡真人、德水真人、法水真人、天一真人、大一真人、明天真人、廣道真人、遍照真人等一百真人，或乘飛雲丹霄八景玉輿，瓊輪羽蓋，浮空步虛，神仙兵馬巨億萬計，按節持旛，无鞅數衆，教化人間，演說經法，敷暢靈音，舉善輟惡，名奏諸天。若男若女，皆當一心修齋行道，立諸善功，真人降駕，一時監臨，燒香散華，莫不記聞。

復遣輪天童子、承香童子、明玉童子、首明童子、捧印童子、奉法童子、侍經童子、奏香童子、流光童子、日蓋童

子、抱月童子、休靈童子、浮空童子、驛龍童子、傳章童子、通命童子、典護童子、守堂童子、衛香童子、宣梵童子、清唱童子、聞法童子、玉音童子、金聲童子、鳴鍾童子、金首童子、寶明童子、瓊日童子、瑤華童子、合煙童子、飛雲童子、上空童子、昇天童子、清淨童子、錄善童子、禮香童子、智首童子、浮香童子、挹真童子、執符童子、玉籍童子、南昌童子、朱明童子、赤光童子、通靈童子、遍天童子、遙天童子、飛虛童子、九光童子、八惠童子、金輪童子、玉關童子、天關童子、紀善童子、檢天童子、檢地童子、遊輪童子、慈上童子、六能童子、四非童子、迎香童子、扶容童子、晨華童子、寶冠童子、玉表童子、乘虛童子、飛煙童子、橫空童子、坐虛童子、持蓋童子、上藥童子、獻華童子、金銀童子、瓊輿童子、接生童子、育嬰童子、神英童子、福堂童子、靈華童子、舞鳳童子、祥鸞童子、變化童子、問法童子、請經童子、玉童童子、金符童子、瑤印童子、寶璽童子、瓊珮童子、金龍童子、得

道童子、无礙童子、自在童子、常樂童子、延筭童子、致福童子、護命童子、扶衰童子、捍厄童子、益筭童子等一百童子，常處人間，勸化男女持奉齋誠，誦經行道，禮拜懺悔，生諸善心，清淨六根，衆惡惱難，一切罪福，微細必知，凡厥福田，皆來監映。

復遣龍華玉女、鳳環玉女、金箱玉女、玉璫玉女、寶函玉女、銀華玉女、散華玉女、扶香玉女、進符玉女、傳言玉女、開經玉女、啓香玉女、捧衣玉女、扶冠玉女、迎風玉女、龍光玉女、鳳裙玉女、金髻玉女、寶耀玉女、益筭玉女、延齡玉女、萬壽玉女、千福玉女、玉輪玉女、金蓋玉女、昌樂玉女、長壽玉女、安國玉女、開明玉女、四照玉女、六度玉女、七惠玉女、明靈玉女、明真玉女、注福玉女、除殃玉女、消灾玉女、度厄玉女、延年玉女、護相玉女、歡樂玉女、守身玉女、保命玉女、歸福玉女、來祥玉女、致靈玉女、祈真玉女、圓淨玉女、和樂玉女、正一玉女、靈華玉女、扶烟玉女、定生玉女、太玄玉女、青宮玉女、丹

臺玉女、絳宮玉女、紫房玉女、黃素玉女、拜真玉女、乘雲玉女、飛香玉女、含香玉女、玉蘭玉女、玉華玉女、金掌玉女、流環玉女、說法玉女、講經玉女、奉戒玉女、持齋玉女、行香玉女、禮拜玉女、散香玉女、步玄玉女、吟真玉女、誦念玉女、清水玉女、素雲玉女、八輪玉女、金芝玉女、瑤英玉女、玉容玉女、金姿玉女、常慈玉女、明相玉女、明空玉女、六空玉女、四華玉女、三天玉女、四梵玉女、三清玉女、大羅玉女、東華玉女、北真玉女、西靈玉女、南極玉女、中黃玉女、十天玉女、五色玉女等一百玉女，常爲男女筭定年命，灾危厄難，保命扶衰，校勘罪福，善惡吉凶，凡諸動意，皆悉上聞。

復遣辟邪金剛、斬邪金剛、召鬼金剛、降魔金剛、伏毒金剛、禦非金剛、消灾金剛、逐凶金剛、吐火金剛、吞精金剛、乘龍金剛、霄輪金剛、排虛金剛、拓山金剛、吸海金剛、吹雲金剛、威靈金剛、捕邪金剛、束鬼金剛、八威金剛、橫風金剛、攝龍金剛、虎威金剛、奔虛金

剛、踏空金剛、召天金剛、移山金剛、引仙金剛、斷祆金剛、攝地金剛、把日金剛、履月金剛、漱火金剛、食鬼金剛、飲河金剛、叱石金剛、啖鐵金剛、消靈金剛、振威金剛、防非金剛、分影金剛、通明金剛、勇武金剛、奮威金剛、大力金剛、百邪金剛、萬天金剛、橫空金剛、滿虛金剛、萬丈金剛、分身金剛、千形金剛、等空金剛、齊天金剛、倒嶽金剛、典經金剛、侍靈金剛、防護金剛、天靈金剛、按善金剛、清神金剛、八鎮金剛、正道金剛、住持金剛、護戒金剛、衛堂金剛、奉齋金剛、禦邪金剛、防兇金剛、步空金剛、金頭金剛、鐵額金剛、捍厄金剛、延年金剛、保命金剛、益筭金剛、扶衰金剛、當奸金剛、度厄金剛、消難金剛、橫天金剛、保國金剛、滅凶金剛、辟兵金剛、伏鬼金剛、通天金剛、攝魔金剛、非靈金剛、震明金剛、動天金剛、玉弩金剛、金兵金剛、迴風金剛、駕日金剛、糾非金剛、彈邪金剛、吞祆金剛、噬獸金剛、八殺金剛、神通金剛等一百金剛，常行人間，將諸侍從无鞅數衆，遍

滿虛空，若有善男子善女人持齋禮拜，誦經行道，然燈散華，供養三寶，建諸善功，是諸金剛將諸徒衆，應時臨降，防護宅舍，侍衛左右，驅除凶惡，斬馘精邪，一切鬼賊，永不干身，三界五帝，常來衛護，名聞諸天。

復遣禦凶神王、威劍神王、吐雲神王、起雨神王、伏魔神王、徵靈神王、召鬼神王、飛天神王、浮空神王、青天神王、侍經神王、周天神王、九首神王、六眼神王、十手神王、勝力神王、大威神王、明天神王、察地神王、制邪神王、攝精神王、馭日神王、正好神王、揮光神王、調劍神王、搗幢神王、吞山神王、飲海神王、吹風神王、火焰神王、消灾神王、捍厄神王、延年神王、保命神王、度厄神王、益筭神王、詔命神王、除難神王、蕩邪神王、保國神王、橫海神王、丹天神王、迴凶神王、歸善神王、守信神王、定非神王、變化神王、无畏神王、啖邪神王、吞煙神王、徵雷神王、激電神王、滅影神王、鐵眼神王、六足神王、飛龍神王、翻天神王、倒地神王、伏寇神

王、止奸神王、斷邪神王、伏兇神王、輪空神王、轉天神王、八極神王、昇天神王、隱化神王、潛靈神王、殺鬼神王、望雲神王、千手神王、百眼神王、四口神王、青舌神王、綠齒神王、黑耳神王、紫毛神王、開胸神王、大面神王、脩肱神王、獨足神王、一目神王、偏手神王、共首神王、金眼神王、大額神王、橫口神王、隆鼻神王、玉勝神王、寶華神王、雲行神王、按劍神王、翔風神王、聲威神王、萬力神王、轉勝神王、素天神王、搖真神王、撫仙神王、明道神王等一百神王，常在人間，保護國王有道心者，興雲致雨，伏寇除兇，斥逐灾殃，不令侵擾。若男女有心誦誦經法，建大善功，皆來監映，助其福力，降伏魔精，辟除灾沴，人王有道，常當保護，率土安寧。

復遣斬邪將軍、柱天將軍、總土將軍、歷旌將軍、剛風將軍、辟邪將軍、降魔將軍、網羅將軍、破邪將軍、捕鬼將軍、橫天將軍、收鬼將軍、功曹將軍、太衝將軍、天剛將軍、太一將軍、勝先將軍、小吉將軍、傳送將軍、從魁將軍、河

魁將軍、登明將軍、神后將軍、大吉將軍、六紀將軍、乘風將軍、行天將軍、遊虛將軍、步剛將軍、躡紀將軍、金冠將軍、龍首將軍、鳳威將軍、伏奸將軍、八威將軍、六害將軍、九宮將軍、吞魔將軍、烈天將軍、總氣將軍、攝山將軍、召海將軍、誅寇將軍、金手將軍、收邪將軍、誅符將軍、定奸將軍、開山將軍、伏靈將軍、蕩凶將軍、勝輪將軍、神虎將軍、金虎將軍、王兵將軍、仙官將軍、捍厄將軍、扶衰將軍、度厄將軍、保命將軍、護身將軍、消灾將軍、救度將軍、好生將軍、把山將軍、吐毒將軍、伏妖將軍、掃邪將軍、衛經將軍、伏非將軍、斷邪將軍、窮奇將軍、鬱壘將軍、玉斗將軍、司殺將軍、候常將軍、宣道將軍、奔星將軍、寧國將軍、保民將軍、守真將軍、平天將軍、九地將軍、三天將軍、平氣將軍、正一將軍、洞神將軍、太上將軍、靈寶將軍、神祝將軍、洞真將軍、護戒將軍、招靈將軍、揮虎將軍、激邪將軍、登天將軍、天丁將軍、都官將軍、驛騎將軍、左天將軍、右陰將軍等一百將

軍，常在人間防兇止惡，誅邪伏鬼，保祐人民，使國安民豐，天下太平。

天尊曰：若國主人王，及以妃后、大臣宰輔、國中男女，能發善心，置立玄壇靈觀，造像寫經，建齋行道，受戒懺悔，布施發願，燒香散華，放贖生命，建百高座，講說大乘，晝夜不倦，廣修功德，大設義田，施衣及食，開度一切，救濟貧窮，吾常遣真人、童子、玉女、金剛、神王、將軍擁護國王，保祐人民。若有善男女輩，常能誦習講讀此經，呼其名字，及造形像，旦夕禮拜，燒香存念，所有灾厄，隨心消滅，求男得男，求女得女，求長命得長命，居家安樂，富貴巍巍，天王歡樂，列名上清。當來男女宜勗之矣！

爾時諸天聖衆及九氣天君，將諸徒衆，同聲唱善，禮拜天尊，一時而退。

元始天王歡樂經

①「雒關」，疑當作「雒關」。

（曾召南點校）

053 太上洞真五星秘授經

經名：太上洞真五星秘授經。撰人不詳，約出於唐宋間。南宋《秘目》及《通志·藝文略》著錄『靈寶五星秘授經一卷』，當即此書。經文假託元始天尊為天地水仙說三元九曜星君名號，勸人敬禮念咒，祈福消災。一卷。底本出處：《正統道藏》洞真部本文類。

爾時元始天尊，於大羅天上白玉京中、黃金闕內承華殿上，與天仙地仙水仙等說三元兩曜五星，及羅睺計都二十八宿等真君之號，而言曰：吾觀見四海之內，九地之人，上至帝王侯伯，下及飛走萬類，山河分野臨照之處，禍福應見，不能詳辯，況大地人民

多造罪惡，希成善因，致九州靈官三元上奏罪業深重，減祿促壽，速歸下泉，變種種形狀，永居畜類，今我演此真經，令九地之人，依法遵敬，獲種種福，俱得延齡。而宣言曰：

東方木德真君，主發生萬物，變慘為舒，如世人運炁逢遇，多有福慶，宜弘善以迎之。其真君，戴星冠，躡朱履，衣青霞壽鶴之衣，手執玉簡，懸七星金劍，垂白玉環珮。宜圖形供養，以異花珍果，淨水名香，燈燭清醴，虔心瞻敬，至心而呪曰：

木星真君，動必懷仁。憫見志願，壽我千春。

西方金德真君，主擎斂萬物。告成功肅，如世人運炁逢遇，多有灾怪刑獄之咎，宜弘善以迎之。其真君，戴星冠，躡朱履，衣皓鶴白霞之衣，手執玉簡，懸七星金劍，垂白玉環珮。宜圖形供養，以異花珍果，淨水名香，燈燭清醴，虔心瞻敬，至心而呪曰：

金星真君，禍無常準。蠢動成形，俱希含忍。

南方火德真君，主長養萬物，燭幽洞微，如世人運炁逢遇，多有灾厄疾病之尤，宜弘善以迎之。其真君，戴星冠，躡朱履，衣朱霞壽鶴之衣，手執玉簡，懸七星金劍，垂白玉環珮。宜圖形供養，以異花珍果，淨水名香，燈燭清醴，虔心瞻敬，至心而呪曰：

火星真君，主張諸惡。去邪護真，慎勿交錯。

北方水德真君，通利萬物，含真振靈，如世人運炁逢遇，多有灾滯劫掠之苦，宜弘善以迎之。其真君，戴星冠，躡朱履，衣玄霞壽鶴之衣，手執玉簡，懸七星金劍，垂白玉環珮。宜圖形供養，以異花珍果，淨水名香，燈燭清醴，虔心瞻敬，至心而呪曰：

水星真君，含育萬類。禍福不差，其功罔匱。

中央土德真君，主四時廣育萬類，成功不愆，如世人運炁逢遇，多有憂塞刑律之厄，宜弘善以迎之。其真君，戴星冠，躡朱履，衣黃霞壽鶴之衣，手執玉簡，懸七星金劍，垂白玉環珮。宜圖

形供養，以異香珍果，淨水名香，燈燭清醴，虔心瞻敬，至心而呪曰：

土星真君，陰弘至德。福我蒼生，長躡壽域。

太陽真君，主照臨六合，舒和萬彙，如世人運炁逢遇，多有喜慶，宜弘善以迎之。其真君，戴星冠，躡朱履，衣絳紗之衣，手執玉簡，懸七星金劍，垂白玉環珮。宜圖形供養，以異花珍果，淨水名香，燈燭清醴，虔心瞻敬，至心而呪曰：

太陽真君，杲杲高邁。萬類仰之，群動是賴。

太陰真君，主肅靜八荒，明明輝盛，如世人運炁逢遇，多有慘慘之憂，宜弘善以迎之。其真君，戴星冠，躡朱履，衣素紗之衣，手執玉簡，懸七星金劍，垂白玉環珮。宜圖形供養，以異花珍果，淨水名香，燈燭清醴，虔心瞻敬，至心而呪曰：

太陰真君，常弘正道。陰德不愆，福我億兆。

羅睺真君，主九天之下一切諸惡，

如世人運炁逢遇，多有灾厄深重，宜弘善以迎之。其真君，戴星冠，躡朱履，衣純玄之衣，手執玉簡，懸七星金劍，垂白玉環珮。宜圖形供養，以異花珍果，淨水名香，燈燭清醴，虔心瞻敬，至心而呪曰：

羅睺真君，冥冥可畏。好道含弘，可期千歲。

計都真君，主九地之一切罪惡，如世人運炁逢遇，多有厄難困苦之灾，宜弘善以迎之。其真君，戴星冠，躡朱履，衣純玄之衣，手執玉簡，懸七星金劍，垂白玉環珮。宜圖形供養，以異花珍果，淨水名香，燈燭清醴，虔心瞻敬，至心而呪曰：

計都真君，默默察察。九天之下，護命惡殺。

二十八宿真君，主世人榮樂壽苦之數。其真君，俱戴星冠，躡朱履，衣絳紗之衣，手執青玉簡，佩七星寶劍，垂金璫珠珮。各宜圖形供養，以異花珍果，淨水名香，燈燭清醴，虔心瞻敬，至心而呪曰：

群星飛光，環拱辰極。普天兆民，常蒙至德。

天尊言：九地世人，若遇灾星臨照之處，但依受此法，无不獲諸福慶，若三元設醮，建立壇場，誦諸神呪，廣積吉善，為民祈福，三官上奏。即命真籙延算，俱得長生。天尊勅諸大仙，及九府靈官三元上奏三官，隨其善惡，速須上奏，我令一切成形，永不墜諸惡類，獲種種福。是時應諸大仙稽首上奏，願承慈旨，永當奉行。

太上洞真五星秘授經

(曾召南點校)

054 元始天尊說十一曜 大消災神呪經

經名：元始天尊說十一曜大消災神呪經。撰人不詳，約出於唐宋間。假託元始天尊為青羅真人說念誦十一曜大消災神呪之法。一卷。底本出處：《正統道藏》洞真部本文類。

爾時元始天尊在大羅天上、玉京山中、騫林樹下，鳴大法鼓，扣大法鐘，普集十方三界諸天諸地，日月星宿，一切聖衆，為說過去未來一切衆生善惡報應、災福因緣。時於座中有一真人，名曰青羅，即於座起瞻仰尊顏，稽首再拜，長跪而言：弟子夙生慶幸，得遇人天，伏遇天尊大慈，設大法橋，廣為衆生說諸因緣，令得開悟，普入法門。臣今下觀慾界衆生，以何因緣，四時之

中，橫遭刑獄，一生之內，疾病纏綿，或分野州縣，水火災荒，兵戈競起，疫疾流行，臣今未悟，幸望天尊特開慈憫，以釋愚蒙。天尊隱几而言：奇哉，青羅能為衆生問諸緣業，切以慾界衆生，輪回生死，沈溺愛河，唯務貪生，不修正道，不知有五行推運，十一曜照臨，主其災福，至如上火留伏，金木凌犯，羅計勃逆，日月薄蝕，致以州縣播遷，人民災難，水火蟲蝗，刀兵相犯，悉皆由也。凡以衆生託蔭為人，皆稟陰陽造化，或貴或賤，或富或貧，定分雖殊，災福一矣。至如帝王國主，后妃臣僚，

係於紫微垣中，各有品位，五嶽四瀆，乃如分野一切人民，屬於日月五星臨照。吾今示汝下觀星斗，看其行度，如有五星不順，凌犯宮宿，照臨帝土及諸分野，災難競起，疫毒流行，兆民死傷。速令塑繪十一曜形儀，於清淨處建立道場，嚴備香花燈燭，請命道士，或自持念《十一曜大消災神呪經》，一七日，二七日，或三七日，修齋行道，禮懺懺悔，即得上消天災，保鎮帝土，下攘毒

害，以度兆民，汝宜聽信，轉轉教人受持讀誦。青羅真人叩頭再拜，上告天尊，伏願大慈廣為宣說。是時，天尊即說十一曜大消災神呪：

九星都呪

九曜順行，元始徘徊。華精瑩明，元靈散開。流盼無窮，降我光輝。上投朱景，解滯豁懷。得馭飛霞，騰身紫微。人間萬事，令我先知。

五星神呪

五星列照，煥明五方。水星却災，木德致昌。熒惑消禍，太白辟兵。鎮星四據，家國利亨。名刊玉簡，字錄帝房。乘鸞扇景，飛騰太空。出入冥无，遊宴十方。五雲覆蓋，招神攝風。役使萬靈，上衛仙翁。

太陽真君神呪

東望扶桑宮，稽首朝鬱儀。太陽洞明景，寥寥何所思。令我拜金色，候天望英姿。皇華將玉女，臨軒降此時。

太陰真君神呪

仰望顧八表，惟月孕陰精。

中有太素皇，夫人駕綠輶。
耀華光二極，混明照三清。
慤懃求至道，五色下來迎。

木星真君神呪

歲星乘木德，展轉耀東鄉。
凌天姿潤澤，正色滉明皇。
尋花歌浩漾，擲水詠芝房。
經時頻禱祝，獲福自然長。

火星真君神呪

芒角森龍鳳，威光叱十方。
丹罌耀五夜，朱火焰三邊。
晶明符正炁，劍戟煥兵權。
攬搶應滅跡，孛彗敢當前。

金星真君神呪

太白凌清漢，騰霜耀素英。
亭亭浮瑞彩，皎皎盛長庚。
鋒高能禦寇，色潤每降兵。
推窮符曆數，合道與長生。

水星真君神呪

妙哉符五炁，彷彿見辰門。
嵯峨當丑位，壬癸洞靈君。
分輝凝皎潔，盼蠻赴思存。
仙歌將舞蹈，良久下金天。

土星真君神呪

高穹符戊己，藏陸起重霄。
五行尊暗耀，九土見光昭。
甘石推留伏，陶巫算沈寥。
上仙垂雨露，伏地禮空搖。

羅喉真君神呪

神首循黑道，冥冥超至靈。
暗明期朔望，陽德晦陰精。
高鎮黃旛闕，矛戟耀霜鈴。
志心俟多福，稽首諷真經。

計都真君神呪

處暗表陰德，豹尾鎮星宮。
怒指摧山嶽，權雄暝太空。
龍蛇生怪狀，變異忽昏朦。
主人長壽福，禳應在恪恭。

紫炁真君神呪

授制宗元帝，含精耀紫微。
陰陽乘運極，幽顯闕靈機。
玉輿登廣漠，金鈴步斗飛。
四宿循周度，九土尊天威。

月孛真君神呪

太陰光玉緯，精魄育群生。
青桂黃華輔，鬱羅保素靈。

毛頭分怪狀，彗尾或潛經。
舍次流灾福，齋修洞杳冥。

三啓頌

妙哉三洞響，寥寥何鈴鈴。
尋聲若无有，運之不見形。
響音洞十方，聽之不聞聲。

又

大道須人弘，遊心歸太空。
朝禮運十方，昇度乘九龍。
飄飄超三界，亦由雲中崇。

又

吾師天中尊，超超无上皇。
仰觀地維表，彷彿紫炎堂。
巍峨玄都室，但見仙人房。

天尊告青羅真人曰：此諸神呪，若能虔心諷誦，即得星辰順度，疾病消除，社稷安寧，人民道泰。青羅真人稽首再拜，及諸仙衆聞說經呪，皆大歡喜，作禮而退。於是青羅真人下傳世間，推窮曆數，信受奉行。

元始天尊說十一曜大消灾神呪經

（曾召南點校）

055 太上說六甲直符保胎護命妙經


經名：太上說六甲直符保胎護命妙經。撰人不詳，約出於唐宋間。假託元始天尊為真人尹喜說保胎護命之法。一卷。底本出處：《正統道藏》洞真部本文類。

爾時元始天尊在玉清宮中，與无量聖眾演說三洞寶經，時有真人名曰尹喜，從眾中起，恭敬稽首，上白天尊言：臣竊見世間女子懷抱陰陽，生產男女，臨欲分解，皆被眾邪魍魎妖魅鬼神妄相干惱，或傷殺男女，令其產母妄語狂亂，心意迷惑，如何救免，唯願天尊特垂憫念，教所未聞，如蒙開悟，仰荷聖恩。

天尊告真人曰：夫天地媾精，陰

陽布化，父母和合，人乃受生。始一月胞精血凝，二月胎形兆胚，三月陽神為魂，四月陰靈定魄，五月分藏安神，六月定腑滋靈，七月開竅通光，八月神具降靈，九月宮室羅布，十月炁足成象。然後百神具體，始乃降生。汝前所請，此皆男女生在世間，不信至道，不敬經文，或累業前緣，或今生縱造，不識宿命，不崇正教，信用邪妖，心轉迷惑，含受元炁，懷抱陰陽，臨至產時，真神不附，致使邪魅魍魎鬼神妄來干犯。若欲救此產生之難，須信用吾言：世間女子若始懷胎，未滿十月，須預修功德，建立道場，及造此經，一心供養。臨至產月，請諸道士，三人、五人、七人、十人，或於宮觀，或在家庭，懸繒幡蓋，然燈續明，燒香禮拜，轉讀此《六甲直符保胎護命真經》七七遍，或百遍，乃至千遍萬遍，吾當遣六甲直符神將，領諸天兵及神仙玉女、无量聖眾，持符執節，來降道場，擁護懷胎女子，令无苦惱，母子分解，保命護身，宅舍清淨，合家平安，一切妖邪自然潛伏。真人

尹喜奉天尊教誡，頂禮恭敬，勸諸世人，若有生產難者，須廣修功德，敬造此經，至誠供養，保命護身，獲福无量。



此符用朱書，產母頂戴，辟一切邪妖魔蠱。

甲子王文卿直符，從官十八人，持符執節降下，定三魂，安七魄，保胎護命。乙丑龍季卿直符，從官十六人，持符降下，定三魂，安七魄，保胎護命。丙寅張仲卿直符，從官十四人，持符降下，定三魂，安七魄，保胎護命。丁卯司馬卿直符，從官十二人，持符降下，定三魂，安七魄，保胎護命。戊辰楚季卿直符，從官十人，持符降下，定三魂，安七魄，保胎護命。己巳何文昌直符，從官十三人，持符降下，定三魂，安七魄，保胎護命。庚午馮仲卿直符，從官十七人，持符降下，定三魂，安七魄，保胎護命。辛未王文章直符，從官十

五人，持符降下，定三魂，安七魄，保胎護命。壬申侯博卿直符，從官十三人，持符降下，定三魂，安七魄，保胎護命。癸酉孫仲房直符，從官十一人，持符降下，定三魂，安七魄，保胎護命。甲戌展子江直符，從官十四人，持符降下，定三魂，安七魄，保胎護命。乙亥龐明心直符，從官十二人，持符降下，定三魂，安七魄，保胎護命。丙子邢孫卿直符，從官十六人，持符降下，定三魂，安七魄，保胎護命。丁丑趙子玉直符，從官十四人，持符降下，定三魂，安七魄，保胎護命。戊寅虞子張直符，從官十二人，持符降下，定三魂，安七魄，保胎護命。己卯石文陽直符，從官十五人，持符降下，定三魂，安七魄，保胎護命。庚辰尹佳卿直符，從官十三人，持符降下，定三魂，安七魄，保胎護命。辛巳楊仲公直符，從官十人，持符降下，定三魂，安七魄，保胎護命。壬午馬子明直符，從官十五人，持符降下，定三魂，安七魄，保胎護命。癸未呂威明直符，從官十三人，持符降下，定三魂，安

七魄，保胎護命。甲申扈文卿直符，從官十六人，持符降下，定三魂，安七魄，保胎護命。乙酉孔利公直符，從官十四人，持符降下，定三魂，安七魄，保胎護命。丙戌車元升直符，從官十二人，持符降下，定三魂，安七魄，保胎護命。丁亥張文通直符，從官十人，持符降下，定三魂，安七魄，保胎護命。戊子樂石卿直符，從官十四人，持符降下，定三魂，安七魄，保胎護命。己丑范仲卿直符，從官十七人，持符降下，定三魂，安七魄，保胎護命。庚寅褚進卿直符，從官十五人，持符降下，定三魂，安七魄，保胎護命。辛卯郭子良直符，從官十三人，持符降下，定三魂，安七魄，保胎護命。壬辰武稚卿直符，從官十一人，持符降下，定三魂，安七魄，保胎護命。癸巳史公來直符，從官九人，持符降下，定三魂，安七魄，保胎護命。甲午衛上卿直符，從官十八人，持符降下，定三魂，安七魄，保胎護命。乙未杜仲卿直符，從官十七人，持符降下，定三魂，安七魄，保胎護命。丙申朱伯

衆直符，從官十四人，持符降下，定三魂，安七魄，保胎護命。丁酉臧文卿直符，從官十二人，持符降下，定三魂，安七魄，保胎護命。戊戌范仲卿直符，從官十人，持符降下，定三魂，安七魄，保胎護命。己亥鄧都卿直符，從官十三人，持符降下，定三魂，安七魄，保胎護命。庚子楊仲升直符，從官十六人，持符降下，定三魂，安七魄，保胎護命。辛丑林衛卿直符，從官十五人，持符降下，定三魂，安七魄，保胎護命。壬寅丘孟卿直符，從官十三人，持符降下，定三魂，安七魄，保胎護命。癸卯蘇他家直符，從官十一人，持符降下，定三魂，安七魄，保胎護命。甲辰孟非卿直符，從官十四人，持符降下，定三魂，安七魄，保胎護命。乙巳唐文卿直符，從官十二人，持符降下，定三魂，安七魄，保胎護命。丙午魏文公直符，從官十六人，持符降下，定三魂，安七魄，保胎護命。丁未石叔通直符，從官十四人，持符降下，定三魂，安七魄，保胎護命。戊申范伯陽直符，從官十二人，持符降

下，定三魂，安七魄，保胎護命。己酉成文長直符，從官十五人，持符降下，定三魂，安七魄，保胎護命。庚戌史子仁直符，從官十三人，持符降下，定三魂，安七魄，保胎護命。辛亥左子行直符，從官十一人，持符降下，定三魂，安七魄，保胎護命。壬子宿上卿直符，從官十五人，持符降下，定三魂，安七魄，保胎護命。癸丑江漢卿直符，從官十三人，持符降下，定三魂，安七魄，保胎護命。甲寅明文章直符，從官十六人，持符降下，定三魂，安七魄，保胎護命。乙卯戴公陽直符，從官十四人，持符降下，定三魂，安七魄，保胎護命。丙辰霍叔英直符，從官十三人，持符降下，定三魂，安七魄，保胎護命。丁巳崔巨卿直符，從官十人，持符降下，定三魂，安七魄，保胎護命。戊午從元光直符，從官十四人，持符降下，定三魂，安七魄，保胎護命。己未時道卿直符，從官十七人，持符降下，定三魂，安七魄，保胎護命。庚申華文陽直符，從官十五人，持符降下，定三魂，安七魄，保胎

護命。辛酉邴元玉直符，從官十三人，持符降下，定三魂，安七魄，保胎護命。壬戌樂進卿直符，從官十一人，持符降下，定三魂，安七魄，保胎護命。癸亥左石松直符，從官九人，持符降下，定三魂，安七魄，保胎護命。

元始天尊勅六甲直符神君從官等：若世間女子於前件日辰生產男女，汝等可領六甲直符及神君從官等，保胎護命，令速得分解，坐卧安穩，心神真正，无諸痛惱。善女人若能抄寫此經，清淨安置，燒香然燈，懸諸幡蓋，供養禮拜，我即令人得見正道，年命長遠，合門安泰，所向諧和，父慈子孝，衣食自然。若臨產難，一心歸依奉持此呪七七遍，一切神真常加守衛。爾時天尊即說呪曰：

上方世界八千人，下方治地四將軍。
三五吏兵除惡鬼，四六童子守我神。
六甲直符驅魘魅，六丁玉女護我身。
吾左青龍右白虎，頭上朱雀足玄武。
前有功曹後主簿，驅除妖魅並魘蠱。
若有魘禱還本主，一切妖魅不得住，

須臾不去與天斧。急急如律令！
天尊說此神呪已，一切天人无量聖衆，及六甲直符從官，聞經歡喜，作禮奉行。

太上說六甲直符保胎護命妙經

①「千」，疑爲「干」之誤。

（曾召南點校）

056 太上元始天尊說金

光明經

經名：太上元始天尊說金光明經。撰人不詳，約出於唐宋間。假託元始天尊演說，勸世人修道誦經，消除眼疾，得見光明。一卷。底本出處：《正統道藏》洞真部本文類。

爾時元始天尊與諸大衆登寶座說法，歷觀世界衆生受種種苦楚。或被疫疾，眼目暗昧，三光雖照，由如盲人，皆爲不敬三寶。或被冤愆，呪詛相纏，致使眼目昏暗，視之不見。

爾時元始天尊開大慈悲方便之門，憫念生民，乃爲演說此經，救度衆生。善男子善女人，若遇此經救世，急當香湯沐浴，建立道場，轉誦此經，信敬供養。即有金光童子、日光童子、月

光童子、開光童子、星光童子、光明童子、煥光童子、清光童子、道眼童子、法境童子、圓光童子、慧光童子^①。

道言：此十二童子能消災難，若有衆生眼目障昧，急轉此經，自然開度，光明無礙，仙真護祐，萬惡消亡，伏屍故氣，精邪之鬼，遠令除蕩。善信男子女人敬信此經，即得疾病痊愈，眼目光明，前緣業障，見世愆辜，罪累消除，衆聖祐助，同睹光明。此經神驗，不可思議。有輕之者，殃及七祖，禍連汝身。於是天尊及諸仙聖、天仙地仙、三界官屬，聞說妙法，皆大歡喜，信受奉行。

太上元始天尊說金光明經

① 文意未完，疑有脫句。

（曾召南點校）

057 元始天尊說甘露昇天神呪妙經

經名：元始天尊說甘露昇天神呪妙經。撰人不詳，約出於宋元。假託元始天尊為靜明月光童子說拔度酆都地獄亡靈，使飲食甘露，斷絕煩惱之法。一卷。底本出處：《正統道藏》洞真部本文類。

爾時元始天尊在西那玉國香林園中、七寶蓮華座上，與天中神仙說无上真道，令入大乘，生解脫門，離於空見。後與天地神仙說五行運化見應功德小乘妙道，盡十方空界，令入道域。又言有鬼中仙，夫鬼中仙者，昔於人中行三千陰功，死經太陰，不入惡趣，變化作用，與鬼神等，功德力及乃成鬼仙。今為說九化鍊陰生屍章，令生陽輝，上昇

九天。又說十方九地之下，三塗地獄，善惡報應，因緣福果，无不該備。是時法會中，有一童子，名曰靜明月光，從座而起，稽首仰面，讚歎華麗稀有，大慈，廣為天人說諸法相，各令解脫，小臣今日得面聖顏，臣有所疑，上聞玄造，願開金口，廣布慈雲。適見天尊說三塗五苦地獄冤罪，无有休息，今見世間衆生興十惡心，迷五毒行，无邊无量，其業无盡，惡道盈溢，業火熾盛，聞諸衆生死入長夜，廣被業牽，飢渴苦辛，煩燥悶絕，縱遇清冰，悉變猛焰，其諸苦惱，道意可量，如是三塗，須憑功德，若蒙玄化，永荷洪恩。伏願天尊云何救拔。爾時天尊興方便意，開利益門，宣玉匱科，傳靈寶旨，何^①月光童子。

天尊曰：若有三界十方无量世界衆生，死入惡道受業對者，當須見在為其亡過處，取土一抔於淨器中，用香華飲食散覆其上，法事竟，然念^②開業道甘露通真呪，曰：

功德金色光，暉暉開閻幽。華池

流真香，蓮蓋隨雲浮。千靈重元和，常居十二樓。急宣靈寶旨，自在天堂遊。天尊言：此神呪若地獄亡者聞之，自然快樂，飲食甘露，生回向心，絕煩惱業，再令法會衆念淨酆都破地獄昇天神呪：

茫茫酆都中，重重金剛山。靈寶无量光，洞照炎池煩。七祖諸幽魂，身隨香雲繙。定慧青蓮華，上生神永安。

爾時天尊說此法竟，天地中神仙龍鬼等，與靜明月光童子及人天等衆，一時生无量慧，發无為心，入大乘門，成无上道，前進稽首，發言：善哉善哉，臣今請問為諸亡過衆生，蒙轉聖道，各得解脫，三塗空閉，九幽罷對。在會大衆，欣喜稱讚，理莫能及，作禮而退，信奉真道。

元始天尊說甘露昇天神呪妙經

①「何」，疑當作「付」。

②「然念」，疑當作「衆念」。

058 元始說功德法食往生經

經名：元始說功德法食往生經。
撰人不詳，似出於唐宋間。假託元始天尊為大慈大慧真人說超度地獄餓鬼畜生，施捨法食之法。一卷。底本出處：《正統道藏》洞真部本文類。

爾時元始天尊與諸天聖眾、天仙地仙三界官屬、五嶽地司、五帝水府、北都羅酆、善惡二童子，遊東方玉寶樓閣世界、空青樹下碧蓮華上，說十種因緣，一千業報，令諸法會生解脫心。

爾時天尊現大光明，滿彼世界，見諸地獄餓鬼畜生，頭面焦爛，身體火然，刀輪劍鋒，苦毒徹天，痛傷骨髓，猛火焰天，渴飲鎔銅，號叫冤債，无有休息，是時眾中普皆觀見。爾時有一真

人名曰大慈大慧，悲泣傷歎，從座而起，稽首歛容禮拜，上告天尊：伏願聖慈特垂聽覽，臣與法會諸眾及飛仙神仙等，愍恤下界眾生，伏願天尊平等大慈如何救度。

爾時天尊默默良久，方啓慈顏，舉五明扇，發大弘音。乃答真人曰：善哉！善哉！汝能廣為眾生啓慈念，今問此事，令我應見汝等一會，當須諦聽。

天尊言：三塗九府、一百二十酆都地獄，有諸眾生不修真道，死入長夜，魂為下鬼，沉淪惡趣。愍歎而作頌曰：

泠泠甘露滋，法味難思議。騫香流七真，冥冥何生疑。受此法食者，生天登紫微。福田高巍巍，供施令清淨。一切有為事，普皆成代命。拔汝三塗苦，施汝九玄慶。臨當受食時，諸天皆讚詠。

寒庭多悲苦，迴心禮元皇。女青靈寶符，中山真帝書。一念昇太清，再念歸太无。功歸九幽下，旋旋生紫虛。

天尊曰：施食與亡者，不可思議，是諸亡魂，是男是女，當比飽滿，各得離苦解脫受生，清涼蓮華座永得脫離。是時天尊重宣偈曰：

功德不思議，行者膺福報。施與法食餐，永生安樂道。

爾時天尊說是偈已，應諸所見地獄，尋聲消散，是諸幽魂隨願往生，大慈大慧真人及諸法會等眾，咸皆歡喜踊躍，五體投地，作禮而退，信受奉行。

元始說功德法食往生經

（曾召南點校）

059 太上元始天尊證果真經

經名：太上元始天尊證果真經。
撰人不詳，約出於唐宋間。假託元始天尊為諸仙上聖演說，勸人誦經消災長生。一卷。底本出處：《正統道藏》洞真部本文類。

爾時元始天尊，在玉清宮內，與諸仙上聖演說真經。若能傳受，身有光明，左有天丁，右有七星，三界侍從，受吾真經，能持誦者，萬鬼銷寧，誦吾真經，自然長生，五帝侍衛，萬劫皆明，隨劫輪轉，逍遙上清，光奇仙子，受者長生，玄真妙籙，禁斷惡神，千千截首，萬萬剪形，天符勅令，斷絕鬼神，頭破七分，除滅根源，修行有志，對御留恩，真經微妙，難遇難聞。

上帝高尊，五靈大神。三界收戮，

十惡絕根。洞明師子，護持龍門。三界玉真，真中有神。天人護衛，絕魔邪群。傳受萬民，世世長存。

道言：證果真經者，讀誦萬遍，生者長生，家門有慶，死者幽魂出苦，身離惡趣，世間善信男女，宜各敬而行焉。

太上元始天尊證果真經

（曾召南點校）

060 太上元始天尊說續命妙經

經名：太上元始天尊說續命妙經。撰人不詳，約出於唐宋間。假託元始天尊為太上道君說，勸人誦經消災延壽。一卷。底本出處：《正統道藏》洞真部本文類。

爾時元始天尊告太上道君曰：三界衆生，漂流苦海，无有解脫，汝豈忍受，宜須精勤奉行我法，普該救度。太上道君既奉告命，不敢藏情，若有衆生危厄疾病，當誦此經，稱大慈大悲大惠真人，大慈大悲救苦真人，即得離苦，長得解脫，永離嬰纏，長生益壽，老命更延，一切厄難，皆得消滅。

太上道君宣說頌曰：

大慈二真人，能救三界苦。放光

照世間，地獄悉停住。刀山高巍巍，鑊湯飛炎炎。至心念真人，罪魂解宿冤。疾病多苦厄，非災難可言。痛哉傷五神，真人愍悲辛。清信善男女，歸命須至心。常念二真人，離苦免憂沈。疾病消衆厄，邪魔不敢侵。晝夜心不離，解脫全爾身。勇猛發回向，同歸七寶林。

太上元始天尊說續命妙經

（曾召南點校）

061 元始天尊濟度血湖真經

經名：元始天尊濟度血湖真經。

撰人不詳，約出於宋元。假託元始天尊為太一救苦天尊等仙真說，拔度酆都北陰血湖地獄衆生罪魂之法。三卷。底本出處：《正統道藏》洞真部本文類。

元始天尊濟度血湖真經卷上

爾時元始天尊在九清妙境三元寶宮、御劫仞臺中騫木林下，陞七寶妙座，與太上道君、太上老君、諸君丈人、諸天帝君、十方無極飛天神王、三界五帝大魔王，三界群仙一時同至，皆駕八景鸞輿，五色瓊輦，麟馭羽騎，鳳葆龍旂，遊空飛步，吟詠洞章，朝贊天尊，總校圖錄，拔度生死。時有諸天帝君、王

妃、玉女、妙香天女等衆，嚴整衣冠，從容雅步，燒香散華作禮，端拱侍立，歌詠仙章。

是時元始天尊、玉皇尊帝，放无量九色祥光，遍照遐邇，於諸光中化現百千萬億。三清上帝、玉皇天帝俱坐九龍百寶千葉瑞蓮妙座，復於光中化現无量百千萬億。妙行真人列班上侍至尊，復以祥光下照十方無極世界，上至圓羅，下及風泉，鐵圍內外，瑩然朗徹，俱同九色琉璃水晶之光，三界一視，俱在目前。

是時慈悲救苦諸大真人，乘斯祥光，上詣天闕，燒香散華，端簡長跪，上白天尊言：賤臣忝列仙真，職惟濟度，忽見東北方乃有鬱勃黑毒之氣，上衝天宮，盤結不散，其氣腥惡臭穢，大衆驚異。惟願天尊示以未聞，得悟罪根因緣所起，施大法藥，醫救沉淪，震大法音，開迪愚昧，注大法雨，灌沐身心，布大法雲，覆蔭群品，然大法炬，照燭幽昏，開大法門，級引萬類。如蒙慈愍，仰荷玄恩。

是時天尊撫几高抗，空碧鍊真，凝神遐想，哀愍衆生，廣啓慈悲法門，敕命東極長樂世界大慈仁者、太一尋聲救苦天尊，開三元秘藏丹簡瓊樓，出示大行梵炁三元金書，救度真文，遷拔之格，告命青玄救生拔死靈官、符吏億萬衆，下往幽途，尋聲救拔受度魂儀上生天堂。

是時天尊又曰：三洞衆經，萬天寶梵結空爲篆，聚炁成文，彌綸空洞之中，羅絡虛玄之表，具有成典，亘越古今。夫萬物吾生，萬靈吾化，良由下界衆生，本身自昧，遭苦遭厄，吾須救之，重爲衆生顯說因緣，從劫捨身受身，受身不忠不孝，不仁不義，不慈不敬，不讓不謙，傲忽正真，輕慢大道，訾毀經典，誹謗善良，害物傷生，貪婪無厭，七情六慾，三業十纏，營造罪根，結諸惡業，自作自受，猶響應聲。終劫說之，亦難窮盡。略舉其要：夫人之稟生，同資一氣，及乎誕育，命係三元，壽夭吉凶，富貴貧賤，種種罪福，善惡生死，各逐宿命根元，悉有報應，隨其業力，

永不差移。凡有下界衆生男子女人，在世之時，或遭王法，橫惡所加，兵刑

剋戮，牢獄枷鎖，癰疽癩毒，膿血淋漓，人所棄擲，求生不得，求死不得，憂惱自煎，无由解脱，罪業愈重，復墮血湖，永无出期，以爲果報，皆由衆生妄想貪著，不識正真，執繫是非，積諸罪業，任心運意，何莫非愆，不睹慈光，无由曉悟。況人之降衷，稟五行之秀，爲萬物之靈，得生男子，驚天駭地，貴亦難勝，只緣貪婪愛慾，迷失本真，一念既差，降生女質，五濁形漏，匹配夫妻，陰陽結聚，以爲胎孕，冤家債主，互相償報。是故生產有諸厄難，或月水流行，洗浣汗衣，或育男女，血汗地神，汗水傾注溪河池井，世人不知不覺汲水飲食，供獻神明，冒觸三光。或誤服毒藥，損子墮胎，或男女數多，故行溺死，冤仇報對，魔鬼相攻。或致子死腹中，母亡產後，或母子俱亡，至傷性命。或遭刑戮，兵解難逃。或疾染惡鬼，橫傷非命，死入酆都血湖地獄，備受諸苦，由積血以成湖，認幻緣而有獄。汝以弘

願欲救斯苦，吾爲演說真不二法門，濟度厄難。

三洞大法諸天救拔梵炁隱語：

觀覺鬱繼，太明紫靈。九神度魂，

開闢玉真。阿奕煒煒，飛天流音。輪

景帝常，都靈頤臻。豁落大有，慶雲啓

靈。七耀輝魔，恬愴敷榮。虚无上首，

天紀彌宸。四吁育象，濯曜騰精。煥

赫洞陽，浮景玉堂。七靈謠歌，世元紫

堂。羅英散景，耀明玉房。八景總獸，

韶炁攝精。九都騫鬱，飛生上靈。宿

羅靜境，馥育空輪。灌沃黃華，靈運玄

明。神宜開廓，延宛昇庭。大猷浮景，

真定化元。蜺宛素眇，玉梁澄煙。蕭

峙結隅，景羅七纏。秀盤玉府，流輝九

玄。寂然虚邈，飛華拂軒。晨濫錄籍，

太漠由延。阿丘九度，六龍儻轅。翕

靄浮羅，紫精馥淵。溟滓太育，九機化

乾。覆形厚德，元河淪精。育英明陀，

景晨眇雲。大仞總監，秀樂禁天。紫

虚陀立，劫量交前。碧霞損梵，眇眇遊

元。六變運量，馘絕惡愆。恢冠玄漠，

萬度成仙。

是時諸天大聖、妙行真人、三界十方无鞅真宰，雲集元始座下，聞聽法音，開悟正性，各各作禮信受奉行。

元始天尊濟度血湖真經卷上

元始天尊濟度血湖真經卷中

爾時元始天尊懸坐空浮五色獅子之座，玉童玉女，萬億天真，羅列侍衛。而告妙行諸仙真人曰：東北方壬癸之地，有大荒溟渤，海水腥穢，無邊莫測，中有大山，上參碧落，下入風泉，名曰北陰酆都羅山。周迴萬里，是陰氣之主，九地樞機焉。分列諸獄，考罰世人罪惡，及飛禽走獸、胎卵濕化、鱗甲羽毛、動植飛潛，咸皆隸焉。中有一獄，在北陰大海之底，名曰血湖，硤石大小鐵圍，無間溟泠，地獄又分四子獄：曰血池、血盆、血山、血海。四獄相通，有神主之號，曰血湖大神，在於無極水底，水流其上，臭氣衝天。凡世間產死血屍女人，皆是宿世母子仇讎，冤家纏害，乃至今生一一還報，寂寂於冥夜之中，號號於黑暗之下，渾身血汗，臭穢觸天，金槌鐵杖，亂考無數，飢餐猛火，渴飲血池，萬死萬生，不捨晝夜，常居黑暗，不睹光明，雖遇符簡善功，罪過

小減，不能出離，雖得出離，化生異類，子須有神力，不能救拔。此東方長樂世界，有大慈仁者太一救苦天尊，昔在劫初，發弘誓願，化身如恒河沙數，物隨聲應，在天呼為太一福神，在世呼為大慈仁者，在地獄呼為日耀帝君，在外道攝邪呼為獅子明王，在水府呼為洞淵帝君，汝是吾之炁，吾是汝之根，汝知吾知。此是九陽之精，甚靈甚靈，或居天宮，或降人間，或居地獄，或攝群邪，或為仙童玉女，或為帝君聖人，或為天尊道士，或為皇人老君，或為天醫功曹，神通無量，功行無窮，尋聲救苦，應物隨機。汝等可舉聲唱太一之名，使仙官齊詠，自然應化現身。於是諸仙真人齊聲稱詠太一救苦天尊之名，想見天尊乘五色祥雲、九頭獅子，放百寶瑞光，浮空而至元始會下，稽首作禮，遵稟受戒。

於是元始天尊曰：吾觀慾界衆生女人，造種種罪業，身墮血湖受苦沉淪，動經億劫，永無出期。吾今開琅函寶藏，出金籙赦文，卿可齎往下方，宣

告三界十方、三官九署、十二河源、九幽血湖地獄，赦拔罪魂，得辭長夜，睹見光明。於是太一救苦天尊，大慈大悲普濟普度，時有慈悲救苦真人、大慈大惠真人、太一八十一神、天丁力士、青玄功曹、黃籙童子、玉女神王，擁從法駕。天尊放百億瑞光，左手擎瑠璃寶瓶，右手執空青羽枝，乘九頭獅子金蓮翠葉之座，乘空而去，敕詔九鳳破穢大神、洗浣大神、無義斷恩大神、正精火目大神、震雷鼓目大神、全形復體大神、解冤釋對大神，清蕩血湖，破除厭穢，告下元始符命，元皇曲赦救度產死罪魂，時刻昇遷。是時酆都北帝及諸鬼官、牛頭獄卒、威斂神王、三界大魔、九億鬼王、血湖大神，咸遵勅命，赦拔罪魂，九幽黑簿，一時焚燼，血湖清蕩，化為寶池，金槌鐵杖，變成蓮華，飲血食穢，化為甘露。一切罪魂，須悟本真，乘光超度，皆得生天，地獄冥官，皆發善念，同乘惠力，證道成真。而獻頌曰：

稽首虛無上道，慈悲救苦大慈尊。

神光百億照中昏，遍覆慈雲濡法雨。
硤石溟泠无間獄，血湖血海血池盆。
玉籙大赦諸罪魂，解脫沉淪萬劫苦。
鍊形度命失陵府，悟道登真衆妙門。
巍巍功德難思議，永爲衆生作慈父。
是時慈悲救苦諸大真人，依稟聖
言，宣通命令，開明長夜，救拔幽途，凡
沐慈恩，同超極樂。

元始天尊濟度血湖真經卷中

元始天尊濟度血湖真經卷下

爾時元始天尊告諸大聖妙行真人
同^①：下界衆生，五濁色身，不識因緣
罪福，貪著淫慾，或爲女身，生育男女，
橫遭厄難，或生異疾，夭喪天年，展轉
輪迴，不自知覺。告諸衆生，能發善
心，恭敬三寶，不殺不害，不嫉不妬，不
淫不盜，不貪不慾，不憎不妬，奉戒冥
心，能持是經功德，即有十天善神、護
法神王、九天衛房聖母、監生大神、與
无量天真大聖，俱來衛護。

天尊言：道生一，一生二，二生
三，三生萬物，負陰抱陽，恍恍惚惚，其
中有物。其中有物，其名不去，萬物歸
之終不爲大，視之不足見，聽之不足
聞，用之不足既矣。衆等聞說是經，各
各會道觀心，怡神默悟。是時太一救
苦天尊、諸天上帝、慈悲救苦諸大真
人，承元始之威光，頒宣三元符命，普
告北陰世界，九幽長夜，无間溟泠，硤
石血湖諸大地獄之中，救領衆生，咸得

超度。

天尊復告衆真曰：吾今演說，即
是《靈寶昇玄濟度血湖真經》，昔祕紫
微上宮三天奧藏，盟真有禁，四萬劫一
傳，今當劫運告終，大法宜行，斯可下
傳人間，流通轉誦，其有男女若能如法
修行，利益人天，獲福无量。於是重宣
三元祕梵天寶靈書：

一炁成真，二儀運虛。五靈續絕，
七曜扶衰。旋綱躡空，飛步雲宮。胚
胎有始，億劫无終。金城孕質，玉洞凝
神。真氣內養，以成真人。上入太虛，
下通幽泉。雲宮寶室，中有真魂。出
入福鄉，周旋生門。咀嚼靈芝，灌漱金
泉。甘露川流，懸澍丹田。紫霞朝映，
三炁凝煙。瓊室化仙，安座金蓮。真
儀掩日，塵劫爲年。

爾時天尊重告諸仙真人曰：人生
幾何，易生易滅，如彼石火，不得長久，
如彼浮漚，豈能堅固。生老病死，日夜
相侵，變滅不常，須臾散壞，宜爾忘乎
目，則光溢无極，泯乎耳，則心識常淵，
兩機俱忘，淳淳全全，合乎大方，溟溟

滓滓，合乎无倫，我之所維，與天地共
爲長久。於是諸仙衆等聞天尊演說度
人津梁，功德不可思議，各各稽首禮
謝，信受奉行。

元始天尊濟度血湖真經卷下

①「同」，當作「曰」。

(曾召南點校)

062 元始天尊說酆都滅罪經

經名：元始天尊說酆都滅罪經。
撰人不詳，內載十殿閻王名號，約出於宋元。假託元始天尊說拔度酆都地獄亡魂之事。底本出處：《正統道藏》洞真部本文類。

爾時元始天尊演此《滅罪真經》，告於天靈地祇，修齋功德无量，召諸天龍地神、酆都主者、六宮掾吏、四明公十殿冥官、五嶽府君、九州城隍、司命司錄、五道大神，來詣天尊前集會禮拜，於是稽首莊嚴而受約束。天尊曰：當來果報，凡有衆生，並是大魔王管攝，十惡五逆，繫閉牢獄，日夜受苦，無緣度脫。若修十會，功德業鏡受記，酆都大帝歡喜，放赦罪人，如是七七修

齋，明作牒狀奏獻上，六曹善惡童子抄記玉曆，當生快樂之處，如修十會功德，无量如海，廣建道場，以報父母深恩，悉獲超升淨境。

爾時天尊說斯十會齋功十王名號，留傳世間，開示愚蒙：

- 一七、秦廣大王太素妙廣真君，
- 二七、初江大王陰德定休真君，
- 三七、宋帝大王洞明普靜真君，
- 四七、五官大王玄德五靈真君，
- 五七、閻羅大王最勝耀靈真君，
- 六七、變成大王寶肅昭成真君，
- 七七、泰山大王等觀明理真君，
- 百日、平等大王无上正度真君，
- 小祥、都市大王飛魔演慶真君，
- 大祥、轉輪大王五化威德真君。

天尊告曰：衆生父母眷屬，當隨地獄死亡之後，建修功德善會，死魂託生上天，不墮惡道，流傳國界，依教修行，拔度亡魂，不經地獄。如修道教，功德无量，隨罪輕重，各受果報，或造廣惡，不修片善，命沒之後，勒入二十四獄，依法考罪：

- 第一曰監天地獄，第二曰平天地獄，
- 第三曰九天地獄，第四曰律令地獄，
- 第五曰清冷地獄，第六曰無量地獄，
- 第七曰太真地獄，第八曰三六地獄，
- 第九曰天乙地獄，第十曰黑劫地獄，
- 第十一女青地獄，第十二拷掠地獄，
- 第十三刀山地獄，第十四劍樹地獄，
- 第十五銅柱地獄，第十六勒牀地獄，
- 第十七火山地獄，第十八爐炭地獄，
- 第十九銅汁地獄，第二十鋸釘地獄，
- 二十一石碓地獄，二十二寒冰地獄，
- 二十三河伯地獄，二十四熱火地獄。

天尊言曰：世間人民命沒之後，男女爲修功德，請道迎真，廣置香華幡像，轉經救苦，行道設齋，方得魂神不經十苦八難地獄之中，超離苦海，不滯迷途，自然解悟，次第超沖，免歷苦趣。一心歸向，信受奉行。

元始天尊說酆都滅罪經

（曾召南點校）

063 太上說酆都拔苦愈

樂妙經

經名：太上說酆都拔苦愈樂妙經。撰人不詳，似出於唐宋間。假託拔苦愈樂天尊說超度衆生經文。一卷。底本出處：《正統道藏》洞玄部本文類。

爾時拔苦愈樂天尊，在酆都上境東極宮中，放五色圓光，照十方世界，酆都三萬八千獄、二萬七千幽牢之中，見無量受苦衆生，往來刀山之上，萬轉千迴，悶絕哀哭，俱入鑪炭鑊湯之中，展轉輪迴，不捨晝夜，萬生萬死，無有休息。是故天尊慈惠，哀愍衆生，爲汝演說酆都普濟妙經。普度受罪窮魂，獲生朱陵，上登仙境，仙化成人，願刀山成寶座，劍樹化騫林，六道與三塗，火化皆消散，無邊諸大罪，普悉化爲

塵，歷劫河沙界，皇恩得赦除，回心歸正道，縹渺上紫微。

太上說酆都拔苦愈樂妙經

（曾召南點校）

064 太上九天延祥滌厄

四聖妙經

經名：太上九天延祥滌厄四聖妙經。撰人不詳，約出於宋元。假託元始天尊說召請四聖消災之法。一卷。底本出處：《正統道藏》洞真部本文類。

啓請呪

仰啓北方四元帥，束縛羣魔大聖尊。披頭仗劍偉形容，百萬天兵常擁護。天蓬天猷除兇惡，翊聖真武賜吉祥。臣今伏願降靈壇，一切灾厄自消散。

至心皈命禮，六龍陞左，九虎關中，現三頭六臂之威容，運七政八靈之洪造，帝鐘纒震，萬聖齊臨，鉞斧輕揮，羣魔碎滅，神光赫赫，常救護於衆生，真性巍巍，誓永興於正道，劈尸千里，斬鬼五形，大悲大願大聖大慈、通天祈

祐、延祥滌厄、保寧身命、北極天蓬八十一軍大元帥、護國消魔真君、證果法雲普覆天尊。

至心皈命禮，妙有天中，通明殿右，領天罡之次帥，列下土之諸侯，憫凡庸迷謬以喪真，仰聖相大光而作序，讚演諸天之隱韻，述敷大梵之仙章，俯憐崇奉之誠，大賜護持之力，雲隨步發，海逐身流，大悲大願大聖大慈、通天祈祐、延祥滌厄、滋育身命、北極天猷大元帥、普化天帝、證果冲和應善天尊。

至心皈命禮，帝闔功成，天庭位列，總三洞五雷之號令，掌八天九地之權衡，愍造化之樞機，僚真仙之將吏，無邪不斬，何鬼敢當，攝大力之妖魔，逐流星之芒怪，光華日月，威震乾坤，大悲大願大聖大慈、通天祈祐、延祥滌厄、護持身命、北極翊聖黑殺大元帥、儲慶保德真君、證果遊行三界天尊。

至心皈命禮，虛危分宿，壬癸孕靈，化身自金闕之尊，居位極玉虛之奧，玄妙極至，奚止於輔正除邪，正一

所生，豈但於消魔護國，保劫終而制劫始，護羣品而掌羣仙，勇果全才，威神備德，大悲大願大聖大慈、通天祈祐、延祥滌厄、安和身命、北極佑聖真武大元帥、玄天元聖仁威上帝、金闕化身、證果終劫濟苦天尊。

至心皈命禮，始青天之最上天，清都闕之真妙闕，承五色光明之洞照，一會罕逢，聽九天延祥之玄機，四真可仗，喜遇金方之皇老，重啓塵世之業因，幸元尊垂示以符文，對衆聖重付以祕呪，開大地祈祥之便路，彰大玄有感之赫靈，何灾不滅，何福不臻，依願而行，依誠而應，大悲大願大聖大慈、靈臺會上，滌厄品中，十方上聖諸天帝君、三官五帝、日月諸星、北斗南辰、真人神仙、至真大聖、九天丈人、天曹列聖、生日本命、運限星辰、四聖部中靈童力士、神王猛將、北方兵從、法錄威神、嶽瀆主宰、祀典神祇、經筵鑒證，一切真靈，伏願愚忱上達，聖駕俯臨，滅灾錄善，而所啓所從，鹹毒衛生而作威作福，願與諸含生一心皈命禮。

開經玄蘊呪

天地真元象，人間道德尊。天文書八角，悟者釋邪根。懃意通丹闕，虔心達紫清。祥煙森八極，瑞靄布仙京。渺渺三乘理，明明一性存。今思最上法，願得出迷津。

太上九天延祥滌厄四聖妙經

爾時元始天尊在始青天中，玉都之闕，靈臺之上，放五色光明，色色俱異，洞照內外，皆使朗徹。大會十方諸天，日月星宿，三官四聖，北斗南辰，真人神仙，至真大神，四維上下，嶽瀆主宰，無鞅數衆，說無爲妙道，金光射日，紫靄盈身，法雨遍施，靈風普扇，金童執節，玉女捧香，鸞鳳交鳴，妃后奏樂，座前土木百精皆聽思議。是時座下有一天君，號曰西方白帝七炁天君，執簡長跪，上白天尊曰：臣觀世間人處牢籠，種種不同，或有衣之錦繡，食之珍羞，金殿玉堂，雕梁峻宇，或有朝丐暮覓，服露殘軀，神廟依棲，竄身無地，或有雖生人道，傴僂瘡癩，人皆憎嫌，寒餓困窮，盲聾啞啞，手攣跛，身不具

足，或爲下賤，答撻苦楚，萬種千辛，無門可告，或有恃上逼下，以強凌弱，未審此因緣何若是？小臣未曉，伏願天顏不捨，大開妙義，以明未悟，以解無知。

天尊言：善哉，白帝發問斯由，復坐存真，吾爲汝說。夫人者，誕育塵寰，戴天履地，自幼至老，自壯及衰，喜名利之華，樂生生之厚，馳逞不息，豈顧危亡，陷溺賢良，任爲三業起造，六根竟生，六根既與九結爲禍，是故有身即有累，有累即有業，有業即有報，既知有報，全在修持，生諸省悟。且衆生之果，貧窮下賤，宿業相成，富貴榮華，前生所積，善惡昭昭二徑，羣迷任向一途，善者當有善報，惡者乃處惡根，過去今生，如斯是理。

天君再問：人生或有疾病困篤，年命，灾衰邪鬼來侵，妖魔作害，以何善利可以驅除？

答曰：世人不知己身如風如燭，幻化浮生，念念因循，豈可久長，爭財競寶，利己損他，口是心非，恣情嫉妬，

故使妖魔作害，無可依投，致得橫傷，枉遭諸苦，吾家自有四將，當爲至誠密念其文，無所不應。

天君曰：四將是何，惟願慈尊明書其跡。

天尊曰：北方自有天蓬、天猷、翊聖、真武，統領天兵，驅遣將吏，如有急難，可以注念，自降神威，隨念而至，靈光赫赫，殺氣巍巍，魔鬼潛形，精邪伏匿，一切灾殃，盡皆消滅。爾時天尊愍念衆生，即說通天祈祐延祥滌厄四聖神呪。

天蓬呪曰

天蓬天蓬，九玄殺童。五丁都司，高刁北翁。七政八靈，太上皓兇。長顛巨獸，手把帝鐘。素梟三神，嚴駕夔龍。威劍神王，斬邪滅蹤。紫氣乘天，丹霞赫衝。吞魔食鬼，橫身飲風。蒼舌綠齒，四目老翁。天丁力士，威南禦凶。天驪激戾，威北銜鋒。三十萬兵，衛我九重。劈尸千里，祛却不祥。敢有小鬼，欲來見狀。鑿天大斧，斬鬼五形。炎帝烈血，北斗然骨。四明破骸，

天猷滅類。神刀一下，萬鬼自潰。急如律令！

天猷呪曰

天猷天猷，位列諸侯。上佐北帝，下臨九州。肩生四臂，項長三頭。身披金甲，手執戈矛。雲隨步發，海逐身流。紅光杳杳，紫氣悠悠。雄風鬣鬣，猛霧颼颼。真氣宛轉，星斗回周。千神自朝，五嶽巡遊。金童鼓吹，玉女歌謳。名列金闕，位鎮艷幽。蒼禽獅子，巨海蛟虬。三十萬兵，從我周遊。逢妖即斬，遇鬼皆收。人遭尤善，崇遇無休。降臨福氣，滌蕩無憂。無知小鬼，敢有遲留。吾目一視，永作泉囚。急急如律令！

黑殺呪曰

北方黑帝，太微六甲。五帝靈君，光華日月。威震乾坤，走符攝籙。絕斷鬼門，行神布氣。攝除五瘟，左右吏兵。三五將軍，雷公霹靂。電激風奔，刀劍如雨。隊仗如雲，手把帝鐘。頭戴崑崙，行遶天下。搜捉鬼神，九州社令。血食之兵，不許拒逆。敢有張鱗，

鎮星縛手，北斗收魂。三台七星，持劍斬身。罪不重考，殃及子孫。邪精魍魎，耳不得聞。聞吾呪者，頭破腦裂，碎如微塵。急急如律令！

真武神呪

乾元有將，頂戴三台。披髮圓象，真武威靈。助吾大道，龜蛇合形。身如山嶽，四氣朗清。金光赫赫，怒目光明。牙如劍樹，手執七星。天魔外道，鬼魅妖精。見吾爲血，化作紫塵。魁罡正氣，是吾本身。天符通現，大保乾坤。江河淮濟，五嶽之神。城隍社令，拱聽吾命。指揮綱紀，敢有攝停。上帝有勅，救護羣生。敢有小鬼，捉縛來呈。急急如律令！


天尊再言曰：衆生處於三毒十惡

之世，常被諸魍魎精魅、惡鬼邪神、毒蟲猛獸、刀兵水火、桎械牢獄、疾病苦痛，一一纏染，不能自安，吾先曾出妙法，普度衆生，以符圖神呪付諸法學，及三天大魔王分布人間，救護一切，令得自然。凡夫破齋犯戒，違天負地，不識因緣，不知善惡，不親聖教，不近仙


宗，漸入邪風，隨諸煩惱，明明造惡密，故爲恣縱身心，損傷物命，天道不遠，如鑑如水，一一無差，是故毒風惡氣，六天魔鬼，遍滿人間，流行殺伐，中害死傷，日夜萬計，不可稱量。吾遣諸天十極神王下降人間，廣行救度，拯濟衆生，令得清吉，人豈知之。今後世人若能投承大道，篤敬真宗，謝過祈恩，禳灾益筭，無門可解，或新蓋宅宇，動土興工，犯觸禁方，當於中庭燃燈七盞，備時新五菓，燒種種名香，至心望北念經，朱書四聖靈符，貼於舍內四隅，自獲禎祥，四天帝王四聖元帥來下扶護。此之妙典，所禳者伏，所求者應，所陳者達，所啓者從。

四聖真君應號真符


第一北極天蓬大元帥，延祥滌厄，保寧身命。



第二北極天猷副元帥，延祥滌厄，滋育身命。



第三翊聖儲慶保德真君，延祥滌厄，護持身命。



第四北極佑聖真武真君，延祥滌厄，安和身命。



天尊曰：此四聖名號經呪，其功甚大。若遇年灾月厄，當面北焚香，存神靜慮，至心禮念，皆得消散。或遇身多疾病，服藥不痊，亦當面北，存神靜慮，至心禮念，自然清肅。或遇蝗蟲作


害，旱澇為灾，亦當面北，存神靜慮，至心禮念，自然平寧。或遇灾厄相纏，不能解釋，亦當面北，存神靜慮，至心禮念，自然清吉。或為邪精為怪，侵害損傷，亦當面北，存神靜慮，至心禮念，自然驅除。或遇宅宇不寧，財物耗散，亦當面北，存神靜慮，至心禮念，自然康寧。或遇身遭牢獄，酷受苦刑，亦當面北，存神靜慮，至心禮念，自然天仙兵馬，四聖將軍保護其身。此經乃吾家隱祕之文，上帝幽玄之典，若遇本命生辰，及諸齋日，清靜身心，或為父母，或為兄弟，或為己身，或為骨肉，或自禮念，或請正一道士，或三或五或七，以至四十九員，當於聖前至心轉誦，亦有靈童力士、神王猛將、北方兵從，依願而行，依誠而應。

爾時天尊即說四聖都呪曰：

北方有將，上帝靈尊。披頭仗劍，主管四維。天上地下，咸使聞知。刀劍如雨，器仗光輝。逢魔即殺，見善令歸。若遇凶灾，至心轉持。飛戈擲火，上徹紫微。身命之官，有厄相隨。急

難為吉，日月並齊。今時即念，得獲悲慈。三五將軍，保護吾身。金光靄靄，霹靂轟轟。逆吾者死，避之者生。內外家眷，得保清寧。天罡魁星，三十萬兵。毒龍猛獸，巨海金精。貪狼巨門，祿存文曲。武曲廉貞。左輔右弼，斬邪破軍。真光速到，萬鬼潛形。急攝急攝，不得久停。合門昌吉，昇入無形。急急一如太上混元皇帝律令！

黃紙朱書四聖都符，佩帶則無不應驗。



道言：四聖元帥永鎮玉帝殿下，

統攝三界妖邪，每歲常乃降於人間，察人善功，賜人昌吉，保持帝祚，覆蔭羣迷，斷絕惡根，增延祿壽。若世人精專，嚴潔禮念，若一遍，保鍊形骸，誦之二遍，得獲清寧，誦之三遍，內外安和，誦之四遍，神兵自護，誦之五遍，魔鬼遠潛，誦之六遍，身絕病苦，誦之七遍，

得見真光，誦之百遍，三界保舉，誦之千遍，永睹禧祥，誦之萬遍，身處仙宮，與道合同。斯文爲修行之徑路，作進道之梯航，內能保煉其真，外可屏除其業，靜中觀靜，玄中又玄。於是諸天仙聖得聞妙義，得獲真篇，踴躍歡欣，喜不可計。天君進前作禮，上謝天尊而獻頌曰：

至道尊元，包育諸天。本寧本靜，乃聖乃仙。抱黃回紫，出青入玄。天尊悲慈，開演真篇。妙理希夷，上坤下乾。匪彫匪斲，弗黨弗偏。體而用之，身登大千。元罡萬化，播運機權。無爲無礙，處乎湛然。今獲靈文，上聖親言。若悟之者，浩劫綿綿。壽齡遐遠，福祿長堅。得處清靜，永向道前。

天尊告諸天仙曰：我等誓願流傳此經，若人誠心堅懃，即使灾消福降，永得仙真護持，子孫不絕，世世生生。睹天尊前諸聖說經已竟，受得妙法，迴車乘鶴，鳳輦雲輶，拜謝天尊，奉辭而退。

太上九天延祥滌厄四聖妙經

（曾召南點校）

065 太上護國祈雨消魔經

經名：太上護國祈雨消魔經。
撰人不詳，約出於唐宋間。假託元始天尊為月光真人說祈雨消灾法。一卷。底本出處：《正統道藏》洞真部本文類。

爾時元始天尊與諸天大聖、妙行真人、及諸天龍、鬼神、天仙、飛仙、神仙、天童、玉女、太上、二師在玉京山說法，廣大濟惠。是時天雨寶花，地皆金色，天尊放大光明，徧照十方無量世界，上至三十六天帝諸宮，下至幽冥無數地獄，悉令普徧，救攝衆生，令得安穩，受諸妙樂，天香普薰，飢餐玉粒，渴飲金漿，餓鬼衆生皆得飽滿，速得離苦，面見天尊，生於清淨長樂界中，常居法會。

爾時下方有一真人，名曰月光，乘白鶴，手執玉英，來至法會，整理衣冠，恭敬禮拜，長跪稽首，白天尊言：我今修行，欲得救治一切衆生，而無神通方便智慧，我見下方閻浮世內，種種諸惡，或被水漂，或遭火難，或遇飢饉，或有劫賊，或有疫疾，或遇大旱，草木焦然，五穀不熟，國界不安，人民驚懼，如何救拔？唯願天尊廣說方便，救護衆生，令免斯厄。

爾時元始天尊語月光真人曰：善哉善哉！子今能為大地衆生作大利益，至誠救護，我有無量天丁力士、妙行真人、慈悲真人、玉清真人、皇洞真人，百千萬衆，玉清童子二十萬衆，天靈赤官、功曹主簿、長生司馬、韓君丈人，以百千萬衆，天仙飛仙神仙二十萬衆，威劍神王、大力神王、攝毒神王、消魔神王、食邪神王、碎魔神王、擲火神王、洒水神王、食精神王、收瘟神王、飛仙神王百千萬衆，禁戒三師、雲雷八部，常居世間，救諸厄難。若遇水火，當轉此經，若有劫賊，當轉此經，若遇

時疫，亦轉此經，若遇炎旱，亦轉此經，國界不安，亦轉此經，五穀不收，亦轉此經。若能書寫，至心轉讀，獲無量福，是諸惡毒，悉皆消滅，是諸劫賊，悉令破散，是諸疫毒，自得除滅，水火災患，自然止息，國界不安，當得安帖，四夷歸奉，異國來朝，疫病速差，口舌磨滅，官事枷鎖，速得解散，復連斷絕，魔邪不興，疫毒遠去。

爾時月光真人又白天尊言：天下及諸方外國，時遭灾旱，如此苦惱，作何法事，即得雨水調和，五穀令得豐熟，人民飽滿？

天尊語月光真人曰：子受吾教，於閻浮之內，或在聚落，或在高山，或在水岸，或在洞穴，或在清淨之處，建立壇場，安置尊像，掛諸幡蓋，燒香然燈，香湯沐浴，著新淨衣服，轉讀此經，廣為衆生設諸花果名香，隨時供養，廣設齋饌，上獻十方無量天尊、三十六天帝君、天功父母，及諸神仙、一切龍神，及諸靈聖，作大利益，天帝當遣八部大龍王、雲雷雨師，興動雲霧，旋遶世間，

須臾之頃，即令江河溪澗、上下田疇，令得霽霑，草木叢林、一切花果五穀之類，悉皆生成，枝葉茂盛。

於是月光真人禮謝元始天尊，以偈讚曰：

北雲曇曇至，西雲呼嘯來。南注江流水，東方九神靈。中央真龍王，救濟諸衆生。五龍一時下，飄飄太上京。天降開大雨，蔭蓋崑崙山。吾以此經教，永得共興行。

爾時月光真人重啓天尊曰：我從無量劫來，希見難遇，今日得聞微妙經典，及大醫王，一切聖衆，種種變化，不可思議，是經當何名之？我等如何受持？

天尊曰：此經名曰《天功護國祈雨消魔經》，子好宣傳，恭敬頂戴，若有愚人輕賤，當墮惡道，長夜受苦。坐中天人龍梵仙衆，皆悉信受，作禮而去，稽首奉行。

太上護國祈雨消魔經

(曾召南點校)

066 太上元始天尊說大雨龍王經

經名：太上元始天尊說大雨龍王經。撰人不詳，約出於唐宋間。假託元始天尊為衆生說召請龍王降雨消災法。一卷。底本出處：《正統道藏》洞真部本文類。

爾時元始天尊成就五方國土，若有善男子善女人國土成就，與諸大眾轉讀念誦是經，受持供養，時旱則雨風來止，善男女隨有國土，其中衆生受持讀誦，書寫解說聽受此經者，當知此人善，神法力常加衛護，何以故？法典之中，有諸聖力能為衆生廣開濟度，是時天尊悉為宣說：

天尊大慈念，普為諸衆生。道言諸功德，微妙難思議。有求皆應感，甘

雨倏然施。勤勤即隨念，萬法皆如斯。

道言：男女善人讀誦書寫《龍王經》者，為諸大眾之所稱讚，若有國土祈雨者，六齋之日，當於淨土嚴潔灑掃，燒香供養，禮拜稱善祈請，天尊應感，即召龍王降雨消災，普得甘潤，即說龍王名曰：

清淨龍王，大地龍王，法海龍王，妙羅龍王，修吉龍王，受愛龍王，大海龍王，列厲龍王，淨日龍王，師子龍王，蠡聲龍王，金色龍王，金明龍王，黑髮龍王，大雨龍王，天師龍王，雷電龍王，九江龍王，水帝龍王，翅羅龍王，娑山龍王，大梵龍王，願受龍王，伊羅龍王，降雨龍王，恒河龍王，妙法龍王，天華龍王，寶蓋龍王，甘露龍王，仙真龍王，淨月龍王，非人龍王，有德龍王，天降龍王，地降龍王，左右龍王，白虎龍王，青色龍王，龍鱗龍王，尊聖龍王，真聖龍王，閻羅龍王，上帝龍王，黃色龍王，法門龍王，變化龍王，千萬龍王，諸天龍王，感天龍王，感地龍王，威德龍王，法身龍王，念經龍王，雨水龍王，四大

龍王，達利龍王，頂拜龍王，大法龍王，妙德龍王，無上龍王，國主龍王，太上龍王，道德龍王，宣化龍王，真人龍王，老君龍王，家令龍王。

如是諸龍王聞是稱善，即現感通，興騰雲雨，遍洒人間，救彼焦枯，悉得生發，免其時害，無損禾苗，川瀆流通，河源注潤。是經功果難可稱揚，濟度群生，有茲聖力。若有善男子善女人，能為國界巡邑，方里遭其旱涸，時雨愆期，陰陽不調，人民惶恐，當為書寫，嚴淨受持，請高德法師建立道場，旛花供養，轉讀此經，當得上徹，天垂甘雨，地湧靈泉，草木滋榮，田疇豐稔，人無憂戚，歲保乂寧，災沴永消，土地常吉，家門歡樂，福利無窮，萬善裝嚴，百神敬護，雨澤既足，當發虔心，上荷通靈，常隨念誦。時諸大眾聞說是經，喜躍奉行，作禮而退。

太上元始天尊說大雨龍王經

（曾召南點校）

067 太上長生延壽集福

德經

經名：太上長生延壽集福德經。
撰人不詳，似出於唐宋間。假託
元始天尊為長生護福神王說延
壽集福之法。一卷。底本出
處：《正統道藏》洞真部本文類。

爾時元始天尊於赤明劫，與諸真
仙上聖、長生大君、五福神王、諸天龍
神，詣化城國霄陵園中、善福堂內芝英
臺上，說劫運功德。時有長生護福神
王從座而起，禮白天尊而作是言：今
見諸方世界有諸男女，行諸善道，未入
法門，常被水火刀兵災病所臨，來入法
門，修何功德，令得安樂，年壽長遠，衣
食自然，伏願慈悲廣垂開度。

天尊答曰：善哉，神王能為衆生
開發道要，自今已後，若有衆生歸依信

奉無上大道，感生化恩來入法門者，先
令平等，挫銳解紛，行三清淨：第一身
清淨，第二心清淨，第三口清淨。三業
淨者，然後可付三洞上法，永劫無息，
常居天堂，五福長集，百靈保衛。若遇
三元、五臘、八節、四時、本命生辰，於
清淨堂中燒衆妙香，東向長跪作禮，叩
齒咽液，而念長生延壽呪曰：

玄玄真一身，演經九天文。飛行
大羅界，金臺朝皇人。長生無苦根，年
齡依華椿。百骸洞瓊光，虔謝白元君。

念畢，叩齒三通，咽液三過，瞑目觀
身，端坐五色光中，又念集福德呪
曰：

玉臺童子書，靈仙保其門。福德
隨日新，身光晃三天。紫蓋羅千宮，心
歸無上尊。五福長綿綿，密護玄中人。

天尊言：若復有人行持、志念此
經，神魂洞徹，外散鬼魔，福德日積，體
入自然，身有光明，永歸正道，世世安
樂。是時護福神王聞天尊說此廣大福
報，冥心諦信，稽首叩頭，仰謝玄恩，高
發雅音而作頌曰：

天尊玄化育，真教十方土。功德
露見在，壽筭無窮數。善福積吉祥，禮
謝玄中主。

說是頌畢，諸仙衆聖及天龍鬼神
城國人等，悉發無上道意，開悟善心，
信受奉行，禮畢而退。

太上長生延壽集福德經

(李剛點校)

068 三光注齡資福延壽 妙經

經名：三光注齡資福延壽妙經。
撰人不詳，約出於唐宋間。假託
道君言修身延齡之法。一卷。
底本出處：《正統道藏》洞真部
本文類。

道言：吾隱六合之內，處明堂之
中，守鍊精魄，自然衝衝，明達四遠，萬
境咸通，開闢之始，道之先宗，吾陳此
因，說子之身，子須祕受，勿施於人。
天有七機，亦有三光，斗應其機，光應
其罡，斗有七孔，來應五臟，安靜怡神，
名正修養。耳則不可以亂聽，眼則不
可以視惡，鼻則不可以聞臭，口則不可
以雜味，虛中三光，周流徧體，頭以爲
天，足以爲地，道法濟人，自然之炁。
耳若亂聽，聲色敗人，眼若視惡，真光

不明，鼻若聞臭，玉真不清，口若雜味，
身多病生。是故病從口入，福從色敗，
子若戒之，命同天在。能服金液，飛仙
必尅，能服還丹，堅骨延年，子若有志，
但於名山，無爲無欲，安而復遷，莫同
凡俗，貪欲爲冤，大道玄聖，在子目前，
斗覆子形，光映子精，密而行之，方得
道成。

三光注齡資福延壽妙經

（曾召南點校）

069 太上神呪延壽妙經

經名：太上神呪延壽妙經。撰人及時代不詳。假託元始天尊說救苦益算法。一卷。底本出處：《正統道藏》洞玄部本文類。

爾時元始天尊救護益筭，濟人壽命疾病苦厄。是時，道君長跪稽首，一心除亂，衆惡消滅。甲子將軍，生我益筭。天尊所願，願得成就。尋聲往救，壽筭天年。世世不休，流通無礙。符破五虛六耗惡夢妨害，復連呪詛。若能受持此經，不相加害，符保百年。若有年厄月厄，日時衆厄，佩符之後，無有厄忌。若能受此經，延年益筭，過度灾厄，壽命延長，拔贖年命，簿中斷死。文昌宮中，注上生名。六齋十直，甲子庚申，本命八節，誦念是經，魂神澄正，素髮還青。身心安定，萬願從心。三

河四海，九江八極，諸真人等，仙童玉女，三界地祇，三官九署，一切神明，聞持此經，即爲消除一切苦惱，頑逆醜惡無量大罪，輕師調道，穢藉天經，奸邪偷盜，貪利入身，皆蒙釋散。日夜六時，誦念是經，五瘟疫毒，永離家門。世上凶魔，奔馳萬里，急急如律令。

太上神呪延壽妙經

(曾召南點校)

070 太上道君說解冤拔度妙經

經名：太上道君說解冤拔度妙經。撰人不詳，似出於唐宋。一卷。底本出處：《正統道藏》洞玄部本文類。

爾時，太上道君與諸聖衆，在八騫林下，七寶臺中，羅列威儀，敷陳道要。怡神默坐，如玉京山。放山寶^①光明，照福堂地獄。見福堂之內，男玄^②善人，快樂無爲，逍遙自在。復見諸地獄之中，餓鬼窮魂，以日繼夜，受種種苦惱。悉無人形，五體壞爛，飢食猛火，渴飲鎔銅，足履刀山，身贊^③鐵杖，徧體流血，悲號徹天。是時，會中有一真合^④，名曰廣信，從座而起，稽首前進^⑤，上白道君曰：不審此輩窮魂，生有何咎，而受茲苦？道君曰：受諸罪者，在

世之時，不敬三光，欺負神理，十惡五逆，不忠不仁，不慈不孝，毀傷物命，殺害衆生，福盡壽終，當受斯苦。是時，廣信真人心生哀憫，欲其濟拔，幸望妙力威光，許令開度。伏蒙道君垂賜金言，廣設法要，爲諸衆生演說是經，名曰《解冤拔罪》，流布於世，利益存亡。若有善男子善女人，一心專志，入靜持齋，焚香行道，六時轉念是經，吾當隨願保佑其人，使宿世冤讎，乘福超度，幽魂苦爽，各獲超升。真人廣信歡喜再拜，覩縷勝因，而作頌曰：

偉哉大道君，常普無量功。舟楫生死海，濟度超羅鄴。罪對不復遇，福報與冥通。用神安可測，讚之焉能窮。是時，廣信真人與諸聖衆，聞法將畢，各各稽首歸依，信受奉行。

太上道君說解冤拔度妙經

① 此經與《太上說通真高皇解冤經》同書異名，現兩相互校。據《太上說通真高皇解冤經》「山寶」當作「九色」。
② 據《太上說通真高皇解冤經》「男玄」當作「男女」。

③ 據《太上說通真高皇解冤經》「身贊」當爲「身負」。
④ 據《太上說通真高皇解冤經》「真合」當作「真人」。
⑤ 據《太上說通真高皇解冤經》「前進」當作「進前」。

（曾召南點校）

071 太上說通真高皇解冤經

經名：太上說通真高皇解冤經。
撰人不詳，似出於宋元。假託太上老君為廣信真人說拔度地獄餓鬼窮魂之法。一卷。底本出處：《萬曆續道藏》。

爾時，太上道君與諸聖衆，在八騫林下、七寶臺中，羅列威儀，敷陳道要，怡神默坐，如玉京山。放九色光明，照福堂地獄。見福堂之內，男女善人，快樂無爲，逍遙自在。復見諸地獄中，餓鬼窮魂，以日繼夜，受種種苦惱。悉無人形，五體壞爛，餓餐猛火，渴飲鎔銅，足履刀山，身負鐵杖，徧體流血，悲號徹天。是時會中有一真人，名曰廣信，從座而起，稽首進前，上白天尊曰：不審此昔窮魂，生有何咎，而受苦楚？

老君曰：受諸苦者，在世之時，不敬三寶，欺負神理。十惡五逆，不忠不仁，不慈不孝，毀傷物命，殺害衆生，福盡壽終，當受斯苦。是時，廣信真人心生憐憫，欲其拔濟，幸望妙力威光，許令開度。道君垂賜金言，廣設法要，爲諸衆演說是經，名曰《解冤拔罪》，流布於世，利益存亡。若有善男信女，專心志，入靜室，持齋焚香，六時行道，轉念是經，吾當隨願保佑真^①人，使宿世冤讎，乘福超度，幽魂苦爽，各獲飛昇。廣信真人歡喜再拜，而作頌曰：

偉哉大道君，恒普無量功。
舟楫生死海，濟度超羅鄴。
罪對不復遇，福報與冥通。
用神安可測，讚之焉能窮。
是時廣信真人，與諸衆聞經既畢，各各稽首皈依，信受奉行。

太上說通真高皇解冤經

① 此經與《太上道君說解冤拔度妙經》同書異名，據該經，「真」爲「其」之誤。

（曾召南點校）

072 太上洞神天公消魔護國經

經名：太上洞神天公消魔護國經。撰人不詳，約出於唐宋間。三卷。上卷假託元始天尊為無極真人說消災護國之法。中下二卷假託太上老君為尹喜真人說道教經籙齋科，勸人修行天公齋法，消災護福。底本出處：《正統道藏》洞神部本文類。

太上洞神天公消魔護國經 卷上

開度品第一

爾時元始天尊與諸天天帝、十方至真、無極大聖、妙行真人、十方得道諸大聖衆、金童玉女、太上三師、侍衛

衆真，在玄都玉京山紫微宮內說法，廣度一切衆生。是時日月光照，天地寧閑，天尊放五色光明，遍照諸天無極世界，上至三十二天，下至幽冥地獄，神光照耀，普濟無窮，令幽顯衆生，咸得安穩，受諸快樂，無有疾傷，天香普熏，祥風聿布，飢餐金飯，渴飲玉漿，餓鬼窮魂，皆得滿足，神魂超度，業報悉原，地獄寧閑，仙階漸陟，速得離苦，面睹天尊，上生華胥，常居法會。是時衆中有一真人，名曰無極，即從座起，身披霞帔，手執玉英，嚴整衣冠，恭敬作禮。禮畢，冥心長跪，稽首上白天尊曰：臣幸因前福，得預斯會，聞天尊金口敷闡妙門，悉令大地幽顯一切衆生，咸得安穩。臣今觀見下方國土一切人民，有種種諸惡，或被水災，或逢火難，或有饑饉，或有劫賊，或遭時疫，或遇大旱，五穀不熟，草木焦枯，國界不安，人民驚懼，種種罪累，憂愍在心，思欲救之，爲無方便，臣今發願救理衆生，上黷高真，曲垂方便，道之利用，生育爲先，乞濟衆生，令免斯厄。

是時元始天尊語無極真人曰：善哉善哉，子今能爲大地一切衆生發大誓願，作大利益，至心救護，令免災厄，利物之功，深矣遠矣！我今勅九天總統三界大魔、三五將軍、六甲神將、天丁力士、妙行真人、慈悲真人、玉清真人、洞皇真人、百千萬衆、玉清神童二十萬衆、天靈赤官、功曹主簿、長生司馬、韓君丈人八百萬衆、天仙地仙三十萬衆、威劍神王、攝毒神王、消魔神王、食邪神王、破魔神王、飛仙神王百千萬衆，禁戒三師、雲雷風雨閃電諸神，遊歷世間，救諸厄難。凡有衆生，若遇水火之厄，但能冥心至禱，開轉此經，若遇賊盜，當轉此經，若遭時疫，當轉此經，若遇大旱，當轉此經，國界不安，當轉此經，五穀不熟，當轉此經，萬事不諧，當轉此經。此經若有書寫供養之人，自感九天總統三界大魔、三五將軍、六甲神將、天丁力士、妙行真人、慈悲玉清洞皇真人、玉清神童、功曹主簿、長生司馬、天仙神仙、威劍神王、消魔攝毒、食邪食鬼、破魔收瘟飛仙神

王、禁戒三師、風伯雨師、雷公電母，千乘萬騎，浮空而來，雲集轉經之所，乃獲無量之福。是諸惡毒悉皆消滅，是諸惡賊悉皆破散，是諸疫毒自得消除，水灾火厄，自然止息，國界不安，當得寧靜，四夷歸湊，異國來朝，疫病差除，口舌消滅，官橫枷鎖，速得解散，伏連斷絕，邪魔不興。

是時無極真人又白天尊曰：天下之內，一切衆生，時遭炎旱，如此熱惱，作何方法，乃得風雨調和，五穀豐熟？

天尊語無極真人曰：子今受吾教法，勤而行之，可於高山，或在水岸，或在洞穴巖前，或在清淨之地，或於觀宇，或在家庭，建立壇場，安置尊像，懸諸幡蓋，五色旌幢，雜色寶蓋，燃燈燒香，沐浴齋戒，以諸花果供養，廣爲演說，啓設壇場，轉經行道，上獻三清上聖、玉皇大天帝、天父地母、三官五帝、九天五斗九曜衆星，及諸仙衆、一切靈官、并諸龍神，作大利益，天尊當遣飛天神王、五帝大魔、風伯雨師，興雷動

霧、巡遶世界，須臾之間，即令風雨應祈、江河溪澗、上下田疇，令得普潤，草木叢林，一切花果五穀之類，悉皆生成，枝葉茂盛。

元始天尊即說讚曰：

北風飄飄至，西雲鬱鬱來。南丹鳳風翔，東九龍徘徊。真人奉天符，部領天雨雷。來蓋崑崙上，普潤諸苦荄。

是時無極真人重告天尊曰：臣從無量劫來，稀見難遇，今日得聞微妙經典，及救治一切衆生，種種變化，不可思議，是經當何名之，臣等如何受持？

天尊曰：此經名曰《太上靈寶天公消魔護國經開度品》，子好宣傳，恭敬頂戴，若有愚人輕賤，當墮惡道，長夜受苦。是時座中天人仙衆，悉皆奉受，作禮而去。

太上洞神天公消魔護國經卷上

太上洞神天公消魔護國經 卷中

應機品第二

爾時太上老君於太清仙境靈寶殿中，憑几而坐，手執玉塵，說法度人。尹喜真人、十方仙衆、金童玉女，執節捧香，列侍左右。時有頂門金闕郎中，引一靈官，捧一朱書青函，於瑤池前奏對，奏訖進函，逡巡而返。於是尹喜真人前進作禮，上白老君曰：喜侍太上，迄至于今，凡是衆仙朝會，諸天敷奏，自有真儀，適見金闕郎中，引一靈官，至瑤池前奏對進函，逡巡而去，喜愚昧不敏，伏願聖慈曲垂宣示。

老君曰：汝能發問，吾願應機，此乃世間劍州臨津縣，奉道佩錄修金丹弟子王法進，修靈寶天公道場齋，一日一夜，言功拜章，飛龍驛騎，騰達上奏，至于頂門，是時金闕郎中依儀引見故也。

老君曰：夫天公齋者，出於九等齋科告謝之格，所以世間善信男女，悟大道生成，感乾坤覆載，三元上燭，五行下滋，寒暑相推，水火相濟，分五土之利，順四時之宜，上奉天真，下滋長幼，一家富樂，萬類從心，神明護門，邪精伏匿。每六齋十直之月，選擇良辰，精潔宅宇，法天像地，懸像掛幡，建設道場，中設三清玉皇，次設十方上聖、五方五帝、三元三官、三十二天、天皇地后、諸天列宿、三界群仙、風伯雨師、雷公電母、虛空監察太歲尊神、伏羲神農、左社右稷、財庫保命延生、名山大川、五嶽四瀆、四直使者、土地靈官、奏事監官、衛壇場將吏，一家精潔，冥樹至誠，請正一三洞法師，或二人五人七人，或一日或三日，以時新五果、茶酒香華、蘋藻齋羞、淨巾鎮信、銀錢雲馬、命米紋繒，然燈燒香，依法行道，壇場告畢，言功賞真，拜表投詞，仰祈福祐，以憑四直使者上章詞，靈官奏事監官驛龍騎吏騰達章表，上奏三清，三清錄言，舉功遷善，勅下三官九府、五帝考

官、彼境仙官、城隍社令、司命司錄土地之神，咸奉天符，擁護修齋之所，以此之故，故有是焉。

尹喜真人與諸仙衆一切禮謝，重白老君曰：靈寶天公齋者，果感靈驗，深不可詳，未委此齋由何而有？喜愚未悟，願聞聖言。

老君曰：吾昔在三清境上，觀見世間一切衆生，因時澆漓，大樸漸散，下民失道，邪風勃行，不敬二儀，猷患風雨，棄賤百穀，枉費絲綿，不孝不慈，不仁不義，專事邪教，妄祀鬼神，嫉賢妬能，慳貪姪欲，不崇大道，害物傷生，致使鬼神害盈，天地降喪，水火相繼，五穀不滋，疫毒流行，瘟魔競起，萬民塗炭，怨天尤地，哀愍衆生，不悟罪福，遂說三十六部尊經，演三洞上清寶符，設九等齋科，述九轉丹訣，俾一切衆生，因經悟道，佩錄除邪，持齋感真，修真鍊行，歸真得道，乃□^①長生。夫三十六部尊經者，太上靈寶洞真十二部也，太上靈寶洞玄十二部也，太上靈寶洞神十二部也，凡三十六部，計一百八

十八萬四千二百二十卷。洞真十二部者，言天地造化，陰陽出沒，九轉還丹，金液鍊形飛仙之道也。洞玄十二部者，言消災治病，謝過祈禳，濟度薦拔存亡之道也。洞神十二部者，言治國治家修身之道也。三洞靈符者，上清部、中法部、正一部也。九等齋科者，三九二十七等也。太真齋、金錄齋、玉錄齋、明真齋、自然齋、黃錄齋、三元齋、塗炭齋、洞神齋、神呪齋、九天齋、指教齋、正一齋、天寶齋、九幽齋、五鍊齋、太平齋、太一齋、八帝齋、三皇齋、上清齋、大洞齋、金房齋、北帝齋、五帝齋、化胡齋、靈寶齋、天公齋，皆因其事隨而修之。惟金錄、玉錄、九天齋者，是帝王之齋，非臣庶所修也。黃錄齋者，則廣救三塗，遐被群有，薦拔存歿也。靈寶天公齋者，則荷大道生成，酬乾坤覆載，解百生過咎，祈未來福祥，希風雨順時，百穀豐稔，除瘟滅毒，降福延齡。凡修此齋者，切須滌慮凝神，效心誠懇，福德立降如響應聲也。

是時老君重謂尹喜曰：昔我祖師

太上元始天尊，與玉晨大道君處三清之上，觀見西域于闐等八十一國，稟西方金精之氣，其臭羶，其性獷烈，耽淫好殺，殘害生靈，不君不臣，不父不子，酷虐無量，罪業轉深，吾受元始大道金

口之言，令往西域化胡。至函谷關，汝爲關吏，吾見汝性命合道，專一崇真，遂授金丹於汝，千日功就，期於大蜀青羊肆，與汝白日昇天，經歷九天，上朝玉皇。汝雖得道，未曉元始大道微妙通變之由，汝當至心，當爲汝說。昔天地未分，日月未明，星辰未敷，萬物未眛，浩浩蕩蕩，沌沌蒙蒙。於是元始天尊生於天地之先，無祖無宗，凝然獨化，無名無象，微妙玄通，變化無窮，深不可測，遂生一氣，孕育五行。五行相生，遂生天地，天地既判，動植流形，故天得一氣，上澄爲天，地得一氣，下凝爲地，中和一氣，化生萬靈。日生於陽精，月生於陰魄。安東斗於東方，五行屬木，主春發生。設南斗於南方，五行屬火，主夏長養。布西斗於西方，五行屬金，主秋成熟。建北斗於北方，五行

屬水，主冬收藏。排中斗於中央，五行屬土，主於四季，萬物得土，自然化生。五斗既敷，衆星列位，天文垂象而豈徒哉，明顯水火金丹之道，見之者昌。

爾時老君而說讚曰：

天地之前，元始上仙。無宗無祖，獨化凝然。孕生一氣，五行爲先。濁氣爲地，清氣爲天。中和爲人，散爲山川。星辰列布，日月高懸。木星東上，金星西邊。北斗坎位，南斗離偏。春夏秋冬，遞互推遷。金自水生，與木相連。火生其土，相逆相憐。九還七返，配之在天。見之者昌，鍊之者仙。至道深妙，玄之又玄。

老君曰：元始天尊以一炁生三炁，三炁生九炁。三炁者，玄元始也，以玄一之炁，化爲玉清聖境大羅之天，瓊樓寶殿，玄都玉京，紫微宮闕，太上元始天尊都焉，號龍漢之劫。又以元一之氣，化爲上清真境禹餘之天，玉樓瓊殿，寶樹爲林，玉晨大道君都焉，時號赤明中劫。是時太上道君師資元始天尊，元始天尊於始青天中，召十方無

極聖衆，於寶林之內證度說法傳道。又以始一之炁，化爲太清仙境，珠樓金闕，七寶爲殿，是吾之處也，時號開皇今劫，吾又師資玉晨大道君。其三清三聖，各相去一劫化生，號三清上境大羅天中玄都玉京也。又三炁各生三炁，化成九炁，以成九天。三清之外，又列九天，九天帝君居焉。九天仙號曰：

- 第一鬱單無量天，
 - 第二上上禪善無量壽天，
 - 第三梵監須延天，
 - 第四寂然兜術天，
 - 第五波羅尼密不驕樂天，
 - 第六洞元化應聲天，
 - 第七靈化梵輔天，
 - 第八高虛清明天，
 - 第九無想無結無愛天。
- 九天之外，別有三十二天，三十二天帝居焉。

東方八天仙號曰：
太皇黃曾天，太明玉完天，清明何童天，玄胎平育天，虛無越衡天，太極

濛翳天，元明文舉天，上明七曜摩夷天。

南方八天仙號曰：

赤明和陽天，玄明恭華天，耀明宗飄天，竺落皇笏天，虛明堂曜天，觀明端靖天，玄明恭慶天，太煥極瑤天。

西方八天仙號曰：

元載孔昇天，太安皇崖天，顯定極風天，始皇孝芒天，太皇翁重浮容天，無思江由天，上揲阮樂天，無極曇誓天。

北方八天仙號曰：

皓庭霄度天，淵通无洞天，太文翰寵妙成天，太素秀樂禁上天，太虚无上常融天，太釋玉隆騰勝天，龍變梵度天，太極平育奕奕天。

雖有諸天，猶拘劫運，於是玉晨道

君撰《元始靈書》四篇，凝雲作篆，每字方廣一丈，八角垂芒，一篇鎮東方八天，一篇鎮南方八天，一篇鎮西方八天，一篇鎮北方八天，以此保制劫運，使天長存。

東方八天靈書曰：

亶婁阿蒼，無恕觀音。須延明首，法攬菩曇。稼那阿奕，忽訶流吟。華都曲麗，鮮菩育臻。苔落大梵，散煙慶雲。飛灑玉都，明魔上門。無行上首，回蹠流玄。阿陀龍羅，四象吁員。

南方八天靈書曰：

南閻洞浮，玉眸洗洗。梵形落空，九靈惟前。澤洛菩臺，綠羅大千。渺莽九醜，韶謠緣遭。雲上九都，飛生自騫。那育郁馥，摩羅法輪。靈持無鏡，攬姿運容。馥朗廓奕，神纓自宮。

西方八天靈書曰：

刀利禪猷，婆泥咎通。宛藪滌色，太眇之堂。流羅梵萌，景蔚蕭嶠。易邈無寂，宛首少都。阿濫郁竺，華莫延由。九開自辯，阿那品首。無量扶蓋，浮羅合神。玉誕長桑，栢空度仙。

北方八天靈書曰：

獲無自育，九日導乾。坤母東覆，形攝上玄。阨羅育邈，眇氣合雲。飛天大醜，總監上天。沙阨劫量，龍漢瑛鮮。碧落浮黎，空歌保珍。惡奕無品，洞妙自真。元梵恢漠，幽寂度人。

由是日月運行，星辰列照，五行迭用，四序調流，一晝一夜，一寒一暑，雷公電母，風伯雨師，仰順天常，各司其局。讚曰：

玄元始炁，自道而生。三炁變化，化爲玉京。瓊樓玉殿，寶樹崢嶸。大羅天主，三清都焉。三清仕師，三劫乃全。三炁仍引，又生九天。九天應變，三十二天。七寶爲殿，鎮玉之篇。保制劫運，使天長年。日月運轉，星宿聯綿。五行無忒，四氣相宣。一晝一夜，無黨無偏。雷公電母，風伯雨師。奉承天命，各司其司。玉燭既調，萬物咸滋。至道天地，功深無私。

太上洞神天公消魔護國經卷中

太上洞神天公消魔護國經 卷下

統御品第三

老君曰：天公者，天道公平無私也，天父地母，玉皇大天帝也，天地萬物既備，元始大道退居無爲，遂命玉皇統御三界，覆育蒼生，公平無私也。命地母爲地后，勅天官司天曹，勅地官司地府，勅水官司水府。又列四瀆五嶽，名山大川，洞府福地，各勅仙官而主領。又遣司命司錄，日遊月行，年月日時、四直使者，虛空監察，當境主司土地山神，分司列職，巡遶天下，糾察是非，故人間天子，法象天地，乃於中原建邦設都，外布九州百郡，四夷八蠻。設春夏秋冬四時之官，三公九卿，文武百僚，分司列職，統御天下。夫天子者，非世間之人也，稟真元精一之炁，歷代降生，在仙爲上仙，在宿爲上宿，皆受大道玉皇之命，承運而下降，承運

而上昇，皆天之歷數也。是故北辰在上而衆星拱之，天上有帝座星、后妃星、太子星、庶子星、三台星、內座四輔星、諸侯星、君基星、臣基星、民基星、文星武星，下有萬物，上應萬星。天地實大道之子，萬物實大道之孫，大道爲天地之始，二儀爲萬物之根，陰陽升降，天地氣通，然後播種百穀，普濟蒼生，大道乾坤，功深莫測，潛養萬物，不德不仁，萬物知歸，其功不宰，故齋直以報大道天地之恩。讚曰：

天父地母，后土玉皇。天地既立，三清退藏。玉皇承命，統御萬方。天地水府，三官主張。嶽瀆洞府，衆仙之房。司命司錄，日遊月行。年月日時，四直神王。巡遊天下，糾察不祥。人間天子，建國立邦。仰觀俯察，乃構明堂。法天象地，背陰向陽。九州萬國，四夷遐荒。三台四輔，文武百僚。分司列職，以收萬方。無爲無事，凝冕垂裳。上仙上宿，下爲帝王。承天歷數，上下無常。北辰在上，三台在旁。后妃太子，諸侯百王。天子穆穆，諸侯煌

煌。下育群品，上奉天蒼。功格天地，降福降祥。雲行雨施，普潤無疆。百穀有收，萬物無傷。大濟衆生，千倉萬箱。大道天地，玄功無量。故設天齋，以賀平康。

老君曰：夫人者，皆稟妙道天地之氣而生，故頭圓象天，足方象地，肉象土，骨象石，氣象風，血象水，眼象日月，髮象草木，聽象原洞，言象雷叫，寤象晝，寐象夜，行象雲，坐象山，喜象晴，怒象雨，五臟象五行，四肢象四氣，九竅象洞穴，以應陽之數也。且人生四肢五臟六腑，動靜喜怒，既象天地，豈不是妙道天地之氣所生哉！

老君曰：凡人受胎，即天降司命司錄，常來擁護，以至生下男，則萬神稱善，女則萬神唱恭，籍係三元，名書上帝，東斗注筭，西斗記名，北斗落死，南斗上生，元辰保命，中斗延齡，大道生之，至德畜之，五行成之，高天覆之，厚地載之，日月照之，星辰祐之，神明護之，四氣運之，風雨潤之，絲綿衣之，人倫奉之，大樂和之，大禮檢之，大君

臨之，大道天地生育之功妙矣哉，大矣哉，至矣哉！凡厥衆生，若悟此者，咸宜至心奉道，篤敬天地父母，日月星辰，上順天常，下分地利，父慈子孝，兄弟恭，爲臣克忠，爲君克聖，大道垂祐，天地降祥，金液鍊形，長生久視。若輕侮大道，不敬天地，棄賤五穀，枉費絲綿，背道崇邪，姪慾殺害，訶風罵雨，訾毀經文者，則道不生，天不覆，地不載，日月不照，星辰不祐，神明不護，四氣不運，風雨不調，五穀不養，絲綿不衣，人倫不奉，大樂不和，大禮不檢，大君不臨，貧窮下賤，疾病纏綿，受業將盡，司殺來誅。既謝人寰，沉淪地獄，受諸苦掠，痛毒難忍，熱抱銅柱，寒卧鐵床，鋸釘刀傷，吞火食炭，永墮惡趣，無有出期。吾今爲汝及一切衆生，說此妙經，敬而奉之，勤而行之。即說讚曰：

大道乾坤，生育爲理。人及萬物，咸稟一氣。言之爲常，驗之乃貴。頭圓象天，足方象地。肉土骨石，氣風血水。聲象雷鳴，髮象草矣。陰霾爲怒，

清明象喜。晝則象寤，夜則象寐。動似雲行，坐如山止。五臟四肢，五行四炁。擾擾蒼生，戴髮含齒。大道乾坤，生爾育爾。一切衆生，退而自省。男女媾精，胞胎始營。司命司錄，衛而降靈。父之天氣，母之地精。十月脫胎，子母分形。男則覆生，女則偃生。男則萬神稱善，女則萬神怡情。上係天曹，中係星辰。三元掌籍，五帝司迎。東斗主筭，西斗記名。北斗落死，南斗上生。元辰保命，中斗延齡。道德生育，天地覆載。三元照曜，晝夜相代。四時五行，物無不賴。五穀資生，絲綿被體。和之以樂，檢之以禮。天子穆穆，人倫濟濟。天地大道，功深無裏。上孝父母，下友兄弟。用天之道，亦無灾疹。勤奉天地，長生罔逝。反此而行，致遠恐泥。貧窮下賤，疾病屯滯。贓滿罪定，司殺來制。沉淪地獄，永謝人世。萬劫受殃，莫之可計。善男善女，邪心永誓。

老君曰：言此經尊貴，乃衆生謝過祈恩修真之要，可以本命元辰、四時

八節六齋十直之日，或灑水旱，或祈五穀，或祈福祐，或謝過消灾，或解呪詛，隨其所願，虔心至禱，請正一三洞法師，或一或二，或三或五，或七人，隨力建功，轉誦此經，修齋行道，福德立降，消諸不祥。或於三春天地發生之時，或於秋冬萬物成熟之際，燒香修奉，開轉此經，以荷大道天地生育之功，天能聽卑，道能通感，錄茲至禱，咸賜福祥，玄理深微，威恩莫測，敬之哉，敬之哉！凡修天公齋直，須齋潔，預禁葷辛，掃洒宅院，是事精潔，大道天地，鑒錄誠懇，切忌使常用之物，及孝子孕婦、雞犬僧尼不潔之物，犯傷天真大道，天地賞罰無私，恭慢之應，威不可當。凡齋科供養之具，直須事事豐足，若稍輕慢，上帝不歆，反成殃累，一切男女敬而慎之。此天公勅邪神呪，若有信心奉道善信男女，凡欲持課，先須燒香頂禮，冥心三清上真、諸天天帝、天父地母、日直香官、土地靈祇。然後叩齒三通，誦之七遍，自然靈應感徹，天真護持，百邪不干，萬罪消滅也。

太上說經既已，尹喜真人及侍衛
仙衆，一時頂禮恭敬再拜，勤而奉行。

太上洞神天公消魔護國經卷下

①此字不清，暫以□代之。

（曾召南點校）

073 太上洞神五星諸宿 日月混常經

經名：太上洞神五星諸宿日月混常經。撰人不詳，約出於宋元。言日月星宿之精化身降世濟人之事。一卷。底本出處：

《正統道藏》洞神部本文類。

北斗之星，太一之精，常以四孟元日爲卜人，遊於聚落之處，識度談論，與常人異。儻虔心求問者，無不應耳。

木，歲星之精，其性仁。常以立春後甲乙日，遊於寺觀，爲人端正，中形少髭鬚，衣綠衣裳，參問禪侶，談玄詰難，理無所敵。恭敬和雅，貌殊衆人，目精明朗，好齒口，善接對。知者尋而問之，以禮待之，言論有所求者，但以心事白之，無不從允。若求錢財，俯對以仁，常取辰日伏於東嶽。

火，熒惑之精，其性禮。立夏後，以丙丁日爲朱衣童子，好顏色，形容端正，衣異色之錦，異花之綾，耳目聰俊，多儀範，揖讓進退，舉止合儀，言語分明。好與小兒同羣偶，謳謠邑中之事，警覺先知，識者而問之好，人求心事，俯對以禮，是人皆得從志，常以未日伏於南嶽。

土，鎮星之精，其性信。常以四季及季夏土王戊己日，遊於市肆酒店，衣黃衣，形狀殊異。好美飲食，自齋持訪人同食，有遇者得飲食錢物，求者如請，以常多奇道理遊行行李下，常欲濟人，遇者子孫富貴，錢財日自資長，常以辰日伏於崧山。

金，太白星之精，其性義。立秋後庚辛日遊於女色之家，衣白衣，長大，善音樂，能言語，有寶物遺人。識者求之，無不稱遂。或爲老人騎白馬，亦有執樂器，求之亦願與人。常以戌日伏於華山。

水，辰星之精，其性智。常以壬癸日遊於溪澗幽奇之處，或臺榭之上，蒼

黑色衣服，執尺書吟詠，優遊自樂，言語談諧，多道理。識者求之，以文書術數授與人。常以戊己日伏於恒山。

日者，太陽之精。常以四孟丁巳日，遊於大澤中，衣黃赤衣，乘駟馬，獨行，歌唱自娛樂，馬上有文書囊，如識者以此日澤中訪之，道禮義書不死之術，行大郡好女之家，有遇者，必得仙術耳。

月者，太陰之精。常以辛酉日爲女，好色能言語善，行出好容儀，獨遊閑中，識者多問兵機奇勝之術，亦廣濟人，遇者國王好愛，自然得好官職，一生貴富，亦愛與人寶物，常以丙子日伏於軍旅之中，博慈廣愛，求之者皆如意，自於別處得錢衣物，三年之內稱意富貴。覺是已上七精者，常以禮待賓接，一生富貴，官職稱意，所求皆得，有所得者，即是度世不死之術。

角星之精，常以立春後寅卯日，遊於寺觀中，形少髭鬚，參問禪理，理無所敵。或遊於酒肆，自飲樂，衣青蒼衣，識者求之，多示人養生播種之術。

亢、氏、房三星之精，常以寅卯日同行，衣青蒼衣，皆乘驄馬，遊於人衆中，或大齋會處。容貌殊異，頭上微有紫氣，即是求之，多與人救世之術，不令貧苦。

心、尾、箕三星之精，常以辰日同衣黃衣，或爲道士遊於寺觀中，每自手中皆執一色異物，身形端正，少言語，識者求之，示人醫術方藥。是此七星之精往見，但能識察者求之，皆得隨意，自然富貴，亦令人多精神聰明智利。

井、鬼二星之精，常以巳日爲師僧，端正執珠如意，遊於忠孝之家，好事及貴人家，求好飲食及酒，與之，不求，自得富貴。此日陰陽合者，定生貴子。所求皆得自通，亦好妙巧功於外，人亦無所求取矣。

柳、星二星之精，常以甲午日作道士，好精神，能言語，愛以道術不死之法誘人，求者皆得白日上昇。其形中，衣黃白衣，衣下更有珠衣裳。識者以禮待之，若生不敬之心，即遇賊敗。

張、翼、軫三星之精，同爲老人，衣黃衣，騎黃牛，執酒器，遊於大墅聚落。求之者，多遣人酒，飲者求爲地仙不死；若言語謗議，即生不具之子，三年內破家；若敬仰，即生貴子，錢財日自資生長。凡前七星之神精，遇者不爲重臣，即爲當世術士，遇者，一月內，肥白充溢，錢財不求自得，賢人哲士不求自至，皆得遇之。

奎、婁、胃三星之精，爲美少年，奇文足巧，衣帛不定，乘好白馬，亦是馳騁。常以申酉日遊於聚落，好將珍寶物相隨，識者求之，皆得所與，遺好果子喫，喫者不死，若女人喫，即生貴子，重臣奇才。

昴、畢二星之精，常以庚子日爲少年，善音樂，或執樂器遊於貴人重臣之門，生才藝貴子，若生女子，即爲妃后，好飲酒，與者大富。

觜、參二星之精，常以戊戌日爲童子，好姿顏，多媚好，乘驢，衣黃衣，手中執金銀器，花葉形狀，與時人不同。遇者求之，皆得所欲，即自然得好官

職，好妻妾，好衣裳，常有人自然遺之，蓋非力也。凡此七星之精，所到人家，累世不貧，識之不死，所求如意。若不以禮待之，三年之內，家破人亡，生不具目之子，亦令人生賊惡子。

斗、牛二星之精，常以壬子日爲老母，好顏色，衣青黑色衣，能言語，妙祇對，持好衣裳賣，好遊善人之家及好事家，所得則乃敬重之，若衣之入朝，即天子好愛，官職不求自得，女人衣之，即生貴子，聰明多藝，地下金銀，不求自得之。

女星之精，常以癸巳日爲少女，可年二十已來，容貌無比，鮮衣服，妙行步，能梳掠，善化人。遊於聚落，以度男子，得遇者，時得富貴，爲國重臣，不出三年，君自徵召。若非理祇對，言語干黷，不出三年，患大疾。合者若有求術，即得太陰玄女不死之術，白日上昇。

虛、危、室、壁四星之精，常以癸丑日爲尼師，好顏色，衣鮮潔衣服，遊於聚落。或至人家門戶，廣說譬喻，以度

男子。得遇者，當年田、蠶、六畜家業，日日資長，生貴子，必爲重臣，大富貴不求自得，髭髮不白。意有所求，若不隨意者，一年之內，家破人亡，生無目之子。凡前七星，遇者得一切欽敬，有所欲者即應，一切不求自得，老者反少。

凡前諸宿之精，識者多矣。但諸宿之精所臨分野，及至聖明官長所治之邦，亦皆見此。太公識太白之精，李斯識鎮星之精，諸葛亮識熒惑之精，得兵機祕要之訣，黃帝識太陰月之精，白日上昇。張良識歲星之精及太白之精，韓信識角亢之精，李靖識南方七星之精，得萬勝兵訣，雷公之式。曹操識日精，李淳風識東方七星之精，通玄象識氣候。若遍論，識者甚多矣，自古及今，非一人而得之，文煩不能具載，尋往往見之，見者自然聰明，皆自富貴，識度與常人不同，即須在意。

太上洞神五星諸宿日月混常經

（曾召南點校）

074 太上洞神三元妙本

福壽真經

經名：太上洞神三元妙本福壽真經。原不題撰人。據後序稱，系元代道士苗善時據古本改編，書成於泰定元年（1324）。假託太上老君說天地水三官本體妙用，勸人誦經求福。一卷。底本出處：《正統道藏》洞神部本文類。

開明三景章

爾時大聖祖玄元道德天尊太上老君，在太清仙境紫微天宮，時諸天帝、諸大天仙、三元帝真、無鞅仙聖，列班朝元，天丁力士、金童玉女，侍衛羅列。時有通玄至德大真人出班奏曰：臣聞五太初分，一真造化，兩儀健運，五炁生成，皆由三元宰御，三官統轄，

至四維八極，三界十方，山川海嶽，聖凡人物，禽獸龍魚，草木昆蟲，飛潛動植，盈虛消息，生生化化，無有不屬三元主運。凡居境域，上至帝王，下及兆民，榮顯興衰，富壽康寧，吉凶成敗，禍福災虞，皆屬三元定分，臣愚，不知三元帝真何因何德，掌握樞機？古今運化，歷劫常存，靈感報應，善惡公私，毫杪不差，惟願大慈細微開示，使諸天人明了通達，修崇皈向。奏畢，九拜，長跪，端珪拱聽。

時太上於金光中寂無音響，端然微笑，默視無上文始妙道天尊、金闕帝君，時帝君默契太上密旨，誠告通玄至德大真人曰：吾聞無始無元，先天先地，道非常道，而視之不見，名無可名，而聽之莫聞，玄之又玄，希夷微之密契，妙兮極妙，虛靜極以冥符，三元潛溟溟滓滓之中，五太胎寂寂寥寥之內，中至真於鴻洞，宰太一於混元，不有不空，無聲無象，妙有無有，卓然如在，真無不無，湛兮若存，強名象帝之先，寓號元皇之始，自太極肇而三元造化，從

混沌鑿而一炁生成，三極建中，二儀定位，帝宰乎綱維，神御乎樞紐，故天始凝水，地統其源，氤氳混一，元炁中融，化鈞密運，生意綿存，故三元帝君職任宰御，巡歷考校，凡仙官真人、天神地祇、水母三界，萬靈君臣，人物善惡，悉主隸焉。

天官誠運章

原夫天官體精一而中正純粹，主健運而元亨利貞，雷震風飄，雲行雨施，有無無有，消息如環，鈞陶造化融一炁，生生不窮，升降屈伸，運四時綿綿不息，正令行乎少昊，至仁發乎暘谷，鼓舞仁風，草木山川咸秀麗，化融元炁，飛潛動植悉冲和，孔德成莫大之神功，玄仁變無窮之妙用，主天曹大生之柄，宰天府元化之機，帝德無方，真功罔極，凡天下山嶽府君城隍社令，主職攸司，一切不正神祇君臣人物，悉屬考校，黜陟賞罰焉。

地官厚本章

道乃萬物之奧，坤為羣類之基，地官融五太于窈窈冥冥之中，坤宰育萬

有于化化生生之內，上承天道，體至柔而動則剛，中蘊元黃，用極廣而微之博，包括八荒十壙，乘載四海九州，含萬象而化光，全生生之妙體，貫九泉之脈絡，總密密之玄機，山澤通炁，會風雲于幽谷，地天妙合，激雷電，干太空，東至扶桑，西及細柳，南極南維，北屆北都，中載岱嶽名山，上御崑崙仙境，推盪陰陽之復姤，晦彰日月之夷升否塞，則成冬之收藏泰亨，則發春之化育無情有情之物，總理中黃巨象，微相之形，咸生厚土，故后土功高莫極，中帝德厚無疆，凡人素履行藏，悉承厚載之德，死生安止，咸庇含弘之恩，凡世間九州八荒山川原野不正神祇、妖魔魍魎、幽爽猖亡，為人民患者，悉屬考校罰滅，及無情有情生成長育，悉隸造造化化焉。

水官歸源章

夫水官者，大道一源，弘通萬派，聖德淵澄于滄海，神功寂湛于瑤池，深潛莫朕之鴻濛，冲漠未鑿之混沌，混茫莫測，滔騰混于太空，澄澈無涯，靜止

息于先地，能柔能順，用莫之既，可方可圓，深不可量，實滿而不自盈，往來而不失信，其質柔而體至剛，其性下而公用平，其海藏也，韞金玉珠珍，其源流也，育鯤龍魚蜃，細無不入，大無不包，神其變化，則傾山倒嶽，攻其堅強，則貫金透石，道濟天下，載萬斛之巨舟，光澤世間，印千川之皎月，體之若此，升降自然，故上善若水，利萬物而不爭，至神如天，歷千古而無變，汪洋清潔，溥博柔和，與天地大通，共虛空同體，滋生萬物，澤育群生。柰凡流莫曉洪澤之恩，徒為望洋之嘆，凡江海河瀆，川源溪澗，井谷潭池，龍宮海藏，一切水淵神母，毒龍蛟蜃，魚鱉水怪諸妖，與人為害者，咸隸考校伐戮焉。

三元體妙章

夫先天太玄至真混元中黃之元炁，洞淵清澤之元精，暘谷青華之妙道，三元若此，人亦如然，若夫世間善信賢良，夙植功德，得聞如上妙微，冰消幻妄，清靜身心，淵毓元精，綿息元炁，寂照元神，混神炁精，冲凝天谷，復

無極至真之妙道，劫運長存，獲無量壽，受無量福，其聖功玄德，不可思議，吾代奉太上慈慧妙音，宣揚重說三元呪曰：

大哉玄元始，妙道自然然。真陽冥赫赫，真陰密玄玄。真宰冲漠朕，極肇生諸天。元皇析五太，建極主三元。三元融五炁，造化人坤乾。三才氤氳混，萬物生生焉。惟人最慧貴，真性體高天。無為至清靜，秉昇道德全。純粹如玉瑩，剛明體金堅。如坤柔厚德，如水善方圓。性本無生滅，心生成倚偏。四非縱八識，愛惡生妄緣。苦海浪翻復，滾滾喪真源。太上憫慈救，強道作法船。濟人登道岸，無柰人狂顛。渾流無定止，甘心墮幽泉。輪回諸苦趣，長劫業火然。暴棄不自悔，執昧深可憐。心息無生滅，心清罪業蠲。心空超八識，心淨絕諸愆。心純無妄偽，心明光慧圓。心通無障礙，心了樂象先。但肯回心正，火中生金蓮。迷昧為下鬼，明悟登上仙。寶固精神炁，三元復本然。無量大功德，妙微難言宣。

洗心志專精，齋心至敬誠。誠誠中應感，自然咸利貞。不空真妙象，無色無臭聲。神化妙難測，寂明中洞明。釋一切罪厄，消一切災迤。行止常清吉，福祿壽康寧。三元微妙道，如意大光亨。稽首誠不二，敬信力尊行。心君常安泰，天下永和平。

三官慈誓章

時三元三官帝君聞是經呪，即九禮太上道前，端珪而誓曰：臣然主任三元，巡訪考校，常清靜體道，無爲自然，亦不自知己美，今聞如上法音，誓願傳教世間，凡良善男女，有能受持三元齋戒，澡沐身心，誦味是經，敬持真呪，精進力行，臣如太上勅命，普告諸天仙聖、三元官曹攸司、三界十方神祇等，如有世間持誦是經呪者，隨其誠意，即爲赴感護衛，拯救水火兵盜病患，生產船楫苦厄災傷，宥釋夙生見在一切冤愆罪障，保其精進無上至真妙道，即令夙疾普消，精神清健，形質康安，增延福壽。奏畢再拜。是時通玄至德大真人與諸天天帝天仙、三元仙

聖、無鞅仙真，同聲讚詠，歷劫未聞如上妙旨，得悟三元大本，三官願力，皆真歡至樂，天樂雍肅，清音妙韻，天花天香馥朗，十方仙聖神真恭禮，各復元所，普願人天敬信奉行。

太上洞神三元妙本福壽真經

後序

本元天性，清寂虛明，了無慾情，安有善惡，心念一起，邪正區分。嘗聞上古君臣民物，皆真真實實，朴朴純純，初無貳心，咸有一德，自然三元融暢，一性慧靈，中古以來，尚機智聰明，流心情妄，貪嗔好勝，嫉妬好爭，詐僞奸邪，驕奢欺昧，了無覺知，終不改悔。人慾甚而天性喪矣，致冤枉罹禍，良善受殃，苦屈無伸，以其上下邪氣交征，感生疫癘兵兇，飢荒奸盜、鬼神陰毒，魔怪興妖，災害並生，以至病疾傷殘，性命夭折，苦哉！我太上慈憫，上帝降衷，職任三官天曹府司，每遇三元巡訪考校，昭彰功罪，伸理曲直，赦罪救苦，解厄拯危，有功德者，賜福祿壽，以至子孫賢哲榮顯，作罪業者，罰戮勦除，以至子孫愚頑凌替，聖明公直，報應如響，自然而然，萬無一失。此經太上妙玄三元道德大體妙用，聖力神功，俾夫志士修真明本，反朴還淳，復上古之玄

風，證至真之妙道。僕受授古本，校正分章，使夫易曉玄理，精明道心，上祝皇圖永固，聖壽遐昌，次願善信齋心誦持，誠意修奉，庶不負太上聖慈，道濟天下，三官願力福祐人間。仲庵王居士一見誠誦喜躍，發心勸緣繡梓，普化人天，同歸正道，豈小補哉！泰定甲子陽至日，金欄紫衣玄一高士臣苗善時頓首敬序。

①「鈞」，疑爲「鈞」之誤。

（曾召南點校）

075 太上虛皇保生神 呪經

經名：太上虛皇保生神呪經。
撰人不詳，似出於宋元。念四言
呪語求太上虛皇及五方神靈消
灾保生。一卷。底本出處：《正
統道藏》洞玄部本文類。

太上虛皇，開散玉庭，金房晃曜，
翠臺鬱青。我設三道，滅鬼生靈，我能
無死，亦能無生。長生自在，迴老返
嬰，魂魄受鍊，五神安寧。迴飈車輪，
北謁玉清，升入太無，與日合明。遂成
真人，五帝合并，三元所告，萬神咸聽。
洞玄三昧，無量真靈，羣仙侍衛，名列
玉清。洞真玉虛，無中之無，道中之
道，神化須臾。洞神靈應，法象有爲，
驅邪滅惡，運轉璇璣。東方保生，青童
神靈，正一守魂，克保昌齡。南方保

生，固氣赤靈，萬神無越，使我長寧。
西方保生，侍魄白靈，辟除妖氣，令我
利亨。北方保生，通利元精，五氣真
符，使臣長榮。中央保生，主我身形，
飛行自在，天地齊并。遊觀太虛，上朝
玉京，下祛祲魅，福惠羣生。

太上虛皇保生神呪經

（曾召南點校）

076 太上七星神呪經

經名：太上七星神呪經。撰人不詳，似出於宋元。假託黃老元帝請天老帝君說，念誦七星神呪消災護國之法。一卷。底本出處：《正統道藏》洞玄部本文類。

黃老元帝於上清玉洞紫宸金闕臺，問天老曰：下界人民災禍之由，起乎何也？

天老曰：昔混沌未分，元化體一，天地設位，乃見五行巡歷天下，察無道之國，觀不祥之人，凡處虛域之內，蠢動含生，命係於天，星辰凌犯，彗孛衝破，遂生兵災，水旱流移，知而逃形，可全自己，逆之遇害，凶釁迭生，黎民死亡，淪沈苦海。

元帝曰：民之所苦，吾豈忍之，何以救拔，免遭厄難？

天老帝君令念七星神呪，禹步微言。每日面東七徧，可以上消天災，下散地禍，妖邪蠱魅、魍魎毒精，自消攝伏，遠行避路，不敢損害。道人能除錯謬之氣，續罄竭之年，凡百災殃，隨呪即滅。汝須秘藏金櫃，慎勿流傳，授非其人，天降刑書。即說呪曰：

日出東方，赫赫大光。靈神衛我，慶門立章。祿存拱惠，不雲炳剛。把持既濟，標攝大匡。未越絕命，故水鬼鄉。三元滿體，八神作疆。逆吾者死，敢有衝當。黃老律令，急離遠方。北神統錄，永斷不祥。急急如律令。

太上七星神呪經

（曾召南點校）

077 太上金華天尊救劫

護命妙經

經名：太上金華天尊救劫護命妙經。撰人不詳，約出於宋元。歌頌金華天尊奉玉皇之命救人劫難。一卷。底本出處：《正統道藏》正一部。

金華天尊敕，延真救劫經。至真無極道，虛皇最上尊。避隱恒救劫，時因壬運興。三昧九真相，大洞起超明。驅除凶悖氣，真道救群生。劫期生死會，善惡運當分。元皇玉帝勅，較錄普天民。善則超三界，魔王來敬迎。有過沉九地，萬劫歷幽冥。諸天同考較，分毫無隱容。時遇清虛降，搜究萬仙真。元華真大道，末劫小人輕。聰明頤者廢，敬信遇之成。青蓮栽滿地，攀採污泥中。聖凡皆有分，焉論貴何貧。有緣須敬授，遇必證金身。普天聞正

道，俱下寄凡塵。爭取金天號，皆尋不壞因。所以陰陽否，天昏地翳騰。六洞精魔出，九天妖怪生。六合成既濟，水火自交并。混混渾一體，各各內尋真。火煨真精灼，凶邪悖逆傾。陰陽純粹子，精燦結真人。元一成舍利，雜穢化爲塵。其中靈應實，誅斬萬魔群。七帝承元命，軸關下紫庭。破武廉文祿，巨貪爲帝真。五德真光射，妖魔自不神。霹靂南丹勝，破軍北極真。西方白帝子，東界護生君。中央天元號，擊電滅妖氛。天威同太歲，雷賁萬億神。飛羽金身現，躬鞭護吉人。天罡驅穢惡，萬萬斬邪形。武祖金華勅，八卦助神兵。乾元坤應德，震巽霹靂風。艮壓妖魔碎，離燒百怪凶。兌澤通萬里，坎吉護天民。天罡并昊勅，誦佩禍無因。有緣人得遇，急急速勤行。無緣必見毀，準備化黃塵。神應急如電，授者慎莫輕。誦持心不退，闔戶見清平。目前壬辰道，陸地得登雲。愚迷全不悟，毀謗妄招凶。執閉癡心客，猶罪帶華文。此是天元法，萬劫再難逢。

遇者超三界，永不降凡塵。生滅俱無異，方崇救劫經。聞命無上語，稽首禮慈尊。無礙無爲體，坦蕩度刀兵。稽首七元天星君，速來救劫護天民。稽首破軍天星君，速來救劫護天民。稽首天罡大星君，速來救劫護天民。稽首霹靂大仙君，速來救劫護天民。稽首庚辛白帝君，速來救劫護天民。稽首壬癸黑帝君，速來救劫護天民。稽首甲乙青帝君，速來救劫護天民。稽首丙丁赤帝君，速來救劫護天民。稽首中央黃帝君，速來救劫護天民。稽首救劫衆將軍，速來救劫護天民。稽首太歲保生兵，速來救劫護天民。稽首五方雷賁將，速來救劫護天民。吾乃青蓮子，元皇道祖孫。天罡來扶我，七帝護吾身。八卦爲神力，萬禍化爲塵。登山通猛宇，渡水引陰從。出行天命護，入陣九光軍。順我成真道，違我滅逆形。急急金華勅，昊天玉皇文。

太上金華天尊救劫護命妙經

（曾召南點校）

078 太上玉華洞章拔亡度世昇仙妙經

經名：太上玉華洞章拔亡度世昇仙妙經。原不題撰人。據卷末叙文，乃金朝皇統二年（1142）山西汾州天寧萬壽觀道童杜長春撰。經文假託元始天尊為通玄真人說救度衆生，消災證道之事。一卷。底本出處：《正統道藏》洞真部本文類。

解釋幽牢救苦拔罪洞章第一

爾時元始天尊在玉清境上玄都山中，登九色碧霞寶座，鳴金響玉，普集聖衆，五老上帝、十極高真、九天主宰、三界元君、十方得道衆真，无量天人，齊同法會。是時有一真人名通玄，從衆中越班而出，執簡長跪，稽首天尊：臣聞下世欲界衆生，不窮正教，各起

邪心，竟生貪好、貪高、貪貴、貪榮、貪富、貪財、貪寶、貪業、貪冤、貪傷、貪害、貪愛、貪嗔、貪戀、貪心，欺吝憎嫌，奸詐巧佞，諂曲邪妄，虛偽囂浮，兇頑妬毒，十惡五逆。憑心所棄，棄貧、棄賤、棄修、棄善、棄慈、棄愍、棄性、棄命、棄本、棄真。多貪多棄，無時休息。所爲人天難固，鬼道易歸，不睹明耀，落墮陰關，萬劫沉淪，無有出離。忽于衆中貪生懼死者，或以吞霞絕粒，吐故納新，屈伸導引，望達長生之路，及至臨年，以遭輪劫，不免亡身，不係仙籍，將過命終，以歸地府。如此等人，是何異因，不成道果，伏願天尊爲衆演說。

天尊曰：此等衆生，只求利於己身眷屬，不念濟物救於衆人，志不守於一法，心不除於十事。通玄真人稽首再拜：何爲十事？

天尊告曰：一曰不敬天地，忠于國主。二曰不孝父母，祭祀先祖。三曰心懷諂曲，妄起憎妬。四曰姪亂敗亡，終身不固。五曰塵情不絕，妄思榮辱。六曰損人安己，虐貧趨富。七曰殺害生命，屠割痛苦。八曰吞啗葷腥，飲食酒肉。九曰輕師慢法，心生嫉毒。十曰誑惑至真，指投迷路。緣此十事，不離身心，三業自種，十惡心生，向正法中，盡生分別，所以不得長生之路，脫死之門，失于陽道，落向幽關。

通玄真人曰：臣聞幽關長夜之府，在于鬼地深淵，羅酆所主，中有魔王，六洞神君，十二小洞，三官九府，百二十曹，一十八獄，二十四獄，三十六獄，八十一獄，百二十獄，如此大獄，山高三十六萬里，山根入水三十六萬里，向于其下考對罪魂，風雷霹靂，飛戈飄戟，火翳千重，鐵圍萬仞，金槌鐵杖，冰鋒霜刃，銅柱鐵輪，毒蛇猛獸，刀山劍樹，冰池火車，鑊湯碓擣，磑磨黑闇，鋸解犁耕，萬般受苦，無時暫停，永劫幽冥，不捨晝夜，苦痛之聲，衝震天地，不可忍聞，此一境罪魂無有解釋，仰望天尊特垂哀愍之心，普爲救拔。

天尊曰：幽冥之間，先亡後喪，一境罪人，在于陽道時，死生不避，勞力用心，自迷自執，自頑自愚，自枷自杻，

自羅自網，自纏自繳，自繫自縛，自殘自害，自損自壞，自意自行，積孽甚多，數不可窮。死當諸獄，罪刑苦痛，此非地獄所招，皆是衆生自作自受。

通玄真人曰：唯願天尊大慈大悲，威光暫放，下徹羅山，赦諸罪魂，出離幽暗，得證人天，歸崇大道，得見仙風。又緣在地衆生，運劫消磨，水旱灾荒，兵戈盜賊，疫毒流行，兆民死傷，六道輪迴，无有休息，伏願天尊普施慈惠，廣度沉淪，出離苦趣，睹見光明。

天尊曰：吾有玉闕金文，祕于玄都上館，下凡不聞，可以上消天灾，中證一身，下攘鬼禍，斷絕統牽，長生久視，脫離長夜，超騰陽天，吾當爲汝開釋明通道矣。

有无動靜陰陽化生洞章第二

有无動靜，化生根源，陰陽混合，恍惚爲門，神爲化本，氣是生因，剛柔順逆，内外浮沉，含英構精，故乃化生。混沌自然，浩劫圓靈，含霄灌氣，火象開明，動極成炎，靜極成泉，陽嘘陰吹，有无合元，四時長育，二氣斡旋，春木

孕火，爲夏紅炎，秋金育水，爲冬清泉，上下相應，復化生源，五運肇闢，離合根元。陽胞陰胎，守固以神，神爲化本，氣是生因，神爲心本，心以意從，萬神寂靈，真氣彌盈，千原成一，共守玉瑛，陰魄洪化，陽魂秉生，九變十合，金闕翬聯，水爲太一，形若含蓮，化生大神，玉好精延，太空九氣，中有玉淵，湛境納象，星斗内躔，赤明開圖，用週自然，箕迴斗歷，真氣上元，八景冥合，杳入玄泉，玄爲神母，陰使陽官，有无長育，動靜洪纖，以否調泰，以地合天，左付于右，後極于先，至道之機，太空無關，真一等空，化生之鮮，化極而變，變極而玄，玄中真皇，同一太和，萬氣齊焉，白雲之門，有氣如泉，養育混源，大量玄玄。

三華始分保胎護命洞章第三

天地未生，元氣肇始，九十億劫，三氣混淪，九十大劫，三華始分，五老補胎，三元育魂，道用神化，自然成真，太溟分分，大道隱存，倏忽應化，是生精神，神爲物靈，混沌斯成，内外相合，

二象淳停，以白付赤，陰陽合併，以赤付黑，胞胎乃凝，中有太虛，耀明三清，神空峨峨，元氣照明，内有靈童，出玄入青，紫胞解帶，瑩然真形，仙玄脫胎，產育神英，威儀同化，杳杳冥冥，冥中之精，至真之神，有神能光，有神能明，有神能立，有神能生，有神能榮，有神能清，建于人物，三華妙庭，紫閣朱官，胎光爽靈，潛伏瓊根，細微泰寧，中有保胎，叔火之君，中有變嬰，和菟之神，中有司男，伯華之君，中有雲房，在庭之真，男呼孟非，女呼子宜，元胎鍊就，百福來綏，保粹成真，无念无爲。

天地生成二儀離合洞章第四

太始初生，真中杳冥，元物化就，紫雲來迎，圓化歸真，黃人降靈，元老持符，三界開明，天清地寧，純陽以生，威神以靈，萬物以成，範氣左騫，彌光右盈，天垂彩耀，地踴玉瑛，乾坤靜默，洞慧洞清，景耀現明，赤甲陽旌，參尾警前，育魂利真，飛吸張奏，樂道爲儔，九天八極，大劫交周，建植元命，分布九丘，太初極于陽九，太素極于陰六，

爲變志真，布化无憂，左嘯黃童，右迎地神，陽健陰輝，元精化一，二儀昇降，和合自然，四時順德，造育忘愆，百靈協化，萬物咸昌，風俗淳厚，尊崇洞章，五行運泰，其體真常，能冥能光，能存能亡，知而行此，驅陰用陽，外榮恢範，內守天玄，內外忘機，符合真詮，元皇太極，妙道微玄，帝熙持鑰，啓關天門，金真朗郁，流響雲鸞，玉音攝氣，靈風聚煙，紫芝育秀，結化胎仙。

五行備足生靈壽域洞章第五

天地始分，大道要妙，三才運用，五行靈蘊，周天氣者，六期爲之大成，終地紀者，五歲爲之小成，五行滋茂，瑞氣平正，人无夭傷，得全天年，所爲吉昌，正宮正徵爲太一，少宮少徵爲太素，五行平正，則陰陽无剋，陽法順施，則長生不死，元化馥郁，則生死出入，羽化成仙，默合道體，五星之晶，感降真形，運氣備足，至道騰昇，五氣之運，補缺平騰，續紀延年，運極化源，知生之機，得道之本，五行昌泰，數極于九，九化爲一，一化爲九，滋而成一，无過

不及，金木相生，水火既濟，一氣充盈，慧性生源，合和四象，九載登真，出幽入寂，化育生成，五氣安鎮，永保昇平，高天澄清，大地安榮，心向至真，咸獲登瀛，存亡受慶，十迴度人，太清寥廓，妙範氤氳，同一彌光，照玄深根，神一浮景，太華生音，三玄降伏，有炁有象，瑞相生祥，陰復陽明，太素正一，開度生圖，高上耀榮，普授天恩，碧簡鳳篆，丹策龍書，巍巍玄京，靄靄雲車，太微妙境，真聖之居。

神變炁化无極无窮洞章第六

神化无窮，炁化无極，知道顯然，正一神氣，得其妙用，坎離媾合，陰陽和平，神不離身，真氣內榮，神不離體，長生久視，內循靈境，外出塵扃，氣化齊遷，遊宴玉京，神氣相守，結化成嬰，內景調泰，金池玉蕊，神識超越，一氣同昇，神乃九真，氣化九宮，元潔太素，同明妙本，得遇元功，爲神太妙，爲真太靈，得一萬氣，天清地寧，爲道之機，爲道之生，種種妙庭，真境瑛瑛，子母慶會，朝現三清，陽神爲天，陰氣爲泉，

太極无色，太始藏詮，杳杳冥冥，天地湛然，无形无名，萬象生成，獨立太空，混合萬靈，布化无窮，生育萬有，把握溟濛，坦蕩仙宮，始見春風，朗然自應，名曰至神，三界仙人，諸天雲峰，神化週流，皆由道存，此道祕奧，得之乃真。

存亡混合鍊炁變仙洞章第七

鍊炁變仙，最上妙道，識道亡言，太清太明，炁柔炁剛，炁方炁圓，炁沖炁達，炁鮮炁榮，言无華綺，口无惡聲，以氣合道，以道合真，百神會聚，瑞氣綿綿，五臟六腑，出有入无，玄之又玄，淒淒永永，氣化爲神，五老侍衛，三元斡旋，滌蕩九醜，炁極通元，太真妙範，我炁非物，能生衆物，我炁无情，能化有情，炁爲道母，炁爲大神，動而爲有，靜而爲玄，萬物造化，智蠢賢愚，上宰下官，皆從道育，應時胎仙，洪造胚暉，隨炁所感，炁妙相傳，若亡若存，虹京瑤池，日澤藥淵，養育贊化，瑞色高懸，神遊靜境，樂道仙源。

水火騰臨長生久視洞章第八

道本玄奧，生而不滅，久視不衰，

然而无祠，洞照三界，流通死生，視之不見，聽之不聞，搏之不得，乃謂窮乎，无窮極乎无極也，論其至微，而不可欺，得其利用，溉灌天池，長育周濟，生道无遺，水底挑燈，倒行逆施，返老成嬰，達者獨馳，拙於攝養，智難管窺，汎濫淪溺，上聖垂慈，救度傾覆，與脱嶮巖，善於取用，妙發玄機，陰日添火，五行未虧，火之彌晦，而不可損，至真之火，明粲經躔，及其電爍，光于九天，上善加佑，无黨无偏，身值劫火，火中生蓮，静防躁進，豈與物誼，陽恐陰撓，有害靈詮，達茲至邃，長育齊肩，昧者滋惑，焚和燬安，如蛾自赴，竟不迴瞻。

上帝矜憫，糜爛重痊，萬不失一，達觀妙玄，陽時加火，長生自然，知斯二者，潜精内默，洞觀陽天，无生死中，真境自現，道與神合，顯應通玄，道本无爲，道本新鮮，迴骸起死，以氣能元，天光入身，永劫幽玄。

超死脱生證凡成聖洞章第九

妙道玄微，能免生死，不入流浪，不居艷景，不染凡華，不歸名利，不去

貪求，不起憎愛，不生妄想，不生思念，斷除死户，能起生門，太一通靈，五行氣聚，四象齊生，黃庭大帝，真境清清，玄元真寶，灌頂充盈，浮沉上下，長保利貞，百魔束伏，群妖縮形，静寂常寂，百神隨行，周天甲子，細審精誠，北府除記，南簡標名，左持金策，右持玉瑛，鸞鶴天仙，來往騰昇，形神安静，浩渺開明，至道永固，三魂現靈，坎離交泰，養就仙胎，證凡朝聖。

通玄真人稽首拜謝：臣等感荷慈恩，開明諦授，衆真敬禮，國泰民豐，艷幽静默，三界歡欣。通玄真人啓白衆聖：今日幸遇師傅第授，各生虔奉，轉誦真經，功不可窮，若有得遇玉華靈文，轉念者先當清心静意，齋沐焚香，禮拜十方，各令三過，然後面東平座，集神定志，誦經一遍，兇禍不生，誦經十遍，萬邪歸正，誦經百遍，神鬼欽承，誦經千遍，得保長生，誦經萬遍，上超九祖，下廕七玄，終證一身，永爲天宮，在世不忘，信受奉行。

太上玉華洞章拔亡度世昇仙妙經

敘傳授經事

汾州天寧萬壽觀，本唐之開元觀，乃閻鍊師所居之地也。鍊師發揮至德，演暢玄風，真得道之奇士也。迄今四百餘年，有唐宋批招、閻公歌詠，刊之于石，可考而知。緣兵火之後，羽衣蕭疏，皇統二年冬，道衆相顧而歎曰：寧无愧於先公鍊師乎，近聞孝義西郭有杜長春者，蓋未冠童子，牧羊得遇仙真，一夕豁然頓悟，若夢者覺、醉者醒，談說以幽微，教諭以詩詞，書翰若龍蛇，至于書符呪水以愈疾病，遠近聞其風而悅之，欲請本觀住庵行化，以光先師，使教門復振，不亦可乎！道衆咸喜，及同慕道之士，於觀後創建一庵，延以廊廡，植以松竹，就孝義邀請長春住庵行化。次年上元設醮，趨赴者僅千人，惟杜長春暇日因語道衆曰：余有太上真經一卷，未行於世，今欲傳授爾等，其經讀之，上消天灾，中證一身，下攘鬼禍，救苦拔罪，長生久視，乃修

真得道之旨也。道衆皆悉忻抃，願聞其詳，於二月真元節，設醮請經，以爲信受，至三月上巳節，設醮傳授經一卷，名曰《太上玉華洞章拔亡度世昇仙妙經》，書于縑帛，約三千餘言，叙以九章，又次真人靈符神呪，付之卷末。是日香華畢集，迎詣太霄殿三清聖位前，傳讀合衆跪聽頂戴，莫不願爲終身誦之者，遂命工鏤板，印造作帙，遍呈奉道之士，以廣其傳爾。

①「不窮」，當爲「不奉」之誤。

（曾召南點校）

079 元始天尊說三官寶號經

經名：元始天尊說三官寶號經。
撰人不詳，約出於宋元。假託元始天尊為赤脚大仙說持誦三官寶號，消災免厄之法。一卷。底本出處：《正統道藏》洞真部本文類。

爾時元始天尊在大羅天上八景宮內，與諸天神王、日月星宿上聖高尊、無極聖衆，說無上至真妙法。有一真人名曰赤脚大仙，越班而出，擎拳長跪，上白天尊曰：下界人民，或有水火刀兵，疾病生產，鬼魅精邪，天羅地網，一切厄難，何由救免？

天尊言：得道神仙，皆從三官保舉，下方生人但持三官寶號，能除厄難，悉皆消滅，吾今授汝下世流傳，人

間看誦者，得福無量，消一切厄。即說寶號曰：

北極玄穹，紫微帝庭。泰山岱嶽，水國清泠。綱維三界，統御萬靈。三元校籍，善惡攸分。齋戒禮誦，無願不成。消災釋罪，降福延生。功德無邊，大悲大願。大聖大慈，至尊妙道。上一品，賜福天官。紫微大帝，中元二品。赦罪地官，清虛大帝。下元三品，解厄水官。洞陰大官，三元主宰。三百六十，應感天尊。

爾時赤脚大仙與諸天神王、真仙大衆，聞說寶號，皆大歡喜，作禮稽首而退。

元始天尊說三官寶號經

（曾召南點校）

080 太上三元賜福赦罪 解厄消災延生保命 妙經

經名：太上三元賜福赦罪解厄
消災延生保命妙經。撰人不詳，
約出於明代。假託救苦大仙請
天尊道君說誦經念咒，求三官賜
福赦罪解厄之法。一卷。底本
出處：《萬曆續道藏》。

三官諸呪寶誥

凡誦經者，切須齋戒，嚴整衣冠，
誠心定氣，叩齒演音，然後朗誦，慎勿
輕慢交談接語，務在端肅，念念無違，
隨願禱祝，自然感應。

先念淨心神呪

太上台星，應變無停。驅邪縛魅，
保命護身。智慧明淨，心神安寧。三

魂永久，魄無喪傾。急急如律令！

淨口神呪

丹朱口神，吐穢除氛。舌神正倫，
通命養神。羅千齒神，却邪衛真。喉
神虎賁，炁神引津。心神丹元，令我通
真。思神鍊液，道炁長存。急急如律
令！

淨身神呪

靈寶天尊，安慰身形。弟子魂魄，
五臟玄冥。青龍白虎，隊仗紛紜。朱
雀玄武，侍衛身形。急急如律令！

安土地神呪

元始安鎮，普告萬靈。嶽瀆真官，
土地祇靈。左社右稷，不得妄驚。回
向正道，內外澄清。各安方位，備守家
庭。太上有命，搜捕邪精。護法神王，
保衛誦經。皈依大道，元亨利貞。急
急如律令！

淨天地解穢呪

洞中玄虛，晃朗太元。八方威神，
使我自然。靈寶符命，普告九天。乾
羅荅那，洞罡太玄。斬妖縛邪，殺鬼萬
千。中山神呪，元始玉文。吾誦一遍，

却鬼延年。按行五嶽，八海知聞。魔
王束首，侍衛我軒。凶穢消蕩，道炁長
存。急急如律令！

祝香呪

道由心學，心假香傳。香爇玉爐，
心存帝前。真靈下盼，仙旆臨軒。今
臣關告，逕達九天。

金光神呪

天地之宗，萬炁本根。廣修萬劫，
證吾神通。三界內外，惟吾獨尊。體
有金光，覆映吾身。視之不見，聽之不
聞。包羅天地，養育群生。受持萬遍，
身有光明。三界侍衛，五帝司迎。萬
神朝禮，役使雷霆。鬼妖喪膽，精怪亡
形。內有霹靂，雷神隱名。洞慧交徹，
五炁騰騰。金光速現，覆護真人。急
急如玉皇光降律令勅。

開經偈

寂寂至無宗，虛峙劫仞阿。豁落
洞玄文，誰測此幽遐。一入大乘路，孰
計年劫多。不生亦不滅，欲生因蓮花。
超凌三界途，慈心解世羅。真人無上
德，世世爲仙家。

三官頌

稽首皈命天地水，三官大帝慈悲主。
神功妙德不思議，謹運一心皈命禮。

上元天官寶誥

志心皈命禮，玄都元陽紫微宮中，
部三十六曹，偕九千萬衆，考較大千世
界之內，錄籍十方國土之中，福被萬
靈，主衆生善惡之籍，恩覃三界，致諸
仙升降之私，除無妄之灾，解釋宿殃，
脫生死之趣，救拔幽苦，羣生是賴，蠢
動咸康，大悲大願大聖大慈上元九炁
賜福天官曜靈元陽大帝紫微帝君。

中元地官寶誥

志心皈命禮，青靈洞陽北都宮中，
部四十二曹，偕九千萬衆，主管三界十
方九地，掌握五嶽八極四維，吐納陰
陽，覈男女善惡青黑之籍，慈育天地，
考衆生錄籍禍福之名，法源浩大，而能
離九幽，浩劫垂光，而能消萬罪，羣生
父母，存歿沾恩，大悲大願大聖大慈中
元七炁赦罪地官洞靈青虛大帝青靈帝
君。

下元水官寶誥

志心皈命禮，賜谷洞元青華宮中，
部四十二曹，偕九千萬衆，掌管江河水
帝萬靈之事，水灾大會劫數之期，正一
法王，掌長夜死魂鬼神之籍，無爲教
主，錄衆生功過罪福之由，上解天灾，
度業滿之靈，下濟幽扃，分人鬼之道，
存亡皆泰，力濟無窮，大悲大願大聖大
慈下元五炁解厄水官金靈洞陰大帝暘
谷帝君。

三官諸呪寶誥

太上三元賜福赦罪解厄消 灾延生保命妙經

爾時救苦大仙，在大羅天上、九炁
紫微天宮，上白道君曰：集會三元天
地水官，三界四府衆聖曹官，考較司同
諸仙衆，講說經法，救拔衆生，放大光
明，照見天下，萬國九州之地，江河湖
海之內，閻浮世界之中，受苦衆生，造
惡非善，廣結冤讎，多行不足^①，財交不
明，不敬天地、日月三光，呵風罵雨，欺
神滅像，瞞天昧地，褻瀆聖賢，不敬父
母、叔伯六親，姦盜邪淫，不忠不孝，非
禮非義，斷絕往來恩路，不敬五穀，穢
污遭賤，不行正道，大斗小秤，明瞞暗
騙，橫言曲語，白口咒詛，怨天恨地，不
恤己身，不修片善，天不容，地不載，致
生惡毒，多起瘟瘡，多招訟非，輕重難
逃，故作事因，得此苦報，惡難臨身，無
處解釋。

於是救苦大仙，端簡上告三元天
官曰：善哉善哉，此等衆生，遭刑苦

難。若有善男信女，皈依三元齋戒，三年圓滿，命道轉誦此經，二五十遍，千五百遍，踴躍懺悔、悔過愆尤。道君曰：即有天官賜福，地官赦罪，水官解厄。於是告下三元，天尊即駕五色祥雲，行九炁清風至都會府，雲臺山上，放大毫光，廣大惠力，無邊法顯，濟民救苦、福應萬靈，諸天升降，除無妄之災，解有讎之愆，賜千祥之福，脫九厄之難，離三途之苦，癡蠢康泰，削去原罪，拔除冤根，永消愆尤，父母存亡，霑恩離苦，四生六道，餓鬼窮魂，孤魂野鬼，九玄七祖，未離地獄之中，存亡衆生，杻械枷鎖，囹圄閉塞。

於是地官至七月十五日，即與獄囚地獄受苦衆生除罪簿，滅惡根，削死名，上生籍，已去提，未去提，已提至，未提至，已結證，未結證，已發覺，未發覺，逢赦除之。地官曰：五刑十惡等罪，永不赦除。

天尊言：顛鴈入齶嚼入齶音咀齶音語，

蛇牙虎口，心如錐刀，惡毒之人，鬼眼鬼心，多計巧言，噴瞞癡愚，蠢子何知，

割他肉，不念他貧，只念己富，肥家潤身，使心用心，返累己身，心根結成，罪根難滅，貪財利己，天雷霹靂，瘟氣流傳，纏害身體，冤愆相併，併及子孫。

於是救苦大仙，再告天官。天官曰：轉誦此經，至滿千遍，大作踴躍，悔過愆尤，斷惡修善，即有地官赦罪，所有惡孽愆尤，俱一赦除，心心志音懇志音禱，盡一皈正，恍恍惚惚，耳目心定，神魂安靜，精神伏舊，罪滅福生，無量功德，其福無邊。

道君曰：世間衆生，招瘟惹災，毒氣流行，衆生染著，偕是造惡非善，冤讎相併，致生惡疾，淹延未愈。若誦此經，病即痊愈。若誦經者，至端陽中元之日，即有三元追回行瘟等衆，考較輕重等罪，俱一赦除。

水官曰：世間夫婦，命犯孤辰寡宿，刑害絕嗣，皆是前生不施，今生受之。若有善男信女。晨夕好靜，沐浴燒香，燃燈誦經，修齋布施，悔過消刑，便生端正有相之男，聰明富貴之子，聲鎮五湖四海。宿世今生，故作誤爲，謀

財負命，今世爲兒，取命化財，女人妊娠，三朝五日不行分娩，或在身兒亡，生下兒亡，三六九歲兒亡，十三五歲兒亡，一日一夜，萬死萬生，俱是冤愆相臨，化目化財，騙協財物，化爲畜生。若有善男信女，發心施財，戒沐浴，轉誦此經，悔過愆尤，即使愆尤永釋，人鬼分離，產生無難，母子雙全，關煞無刑，生長成人，利益雙親，經力弘深，祈福福至，禳禍禍消，讎人冰泮，冤家債主，自消自滅，孤魂等衆，九玄七祖四生六道，輪迴生死，出離地獄，即往東極天界，救苦門庭救苦地上好修行，只有天堂無地獄，閻王一見，不敢高聲，童子夜叉，擎拳拱手，牛頭馬面，總盡皈依，一十八重地獄，獄獄逍遙，三十天天宮，宮宮自在，超生天堂之境，即無地獄之聲，出離地獄，永離苦難，徑往人天，超生淨土，快樂無量，一去一來，無掛無碍。

水官曰：天下衆生，星辰不順，運限遲留，凶曜衝併，多生疾病，或瘟病相侵，或痢疾瘡毒相侵，或腫毒疥癩相

侵，氣候喉癰相侵，咽喉風毒相侵，泄瀉風痰相侵，祖塚瘟氣相侵，住基風水相侵，邪師敗聖相侵，火眼勞瘵相侵，吐血蠱毒相侵，白口咒咀相侵，刀兵火盜相侵，身泮顛狂相侵，弔頸枷鎖相侵，穢門閉瘴相侵，年月日時不利相侵，斫伐壇廟樹木相侵，乞坑動土相侵，開基開沼相侵，添新換舊相侵，修前整後相侵，瘡疾疹疾相侵，瘟火瘟氣相侵，官符口舌相侵，致生惡疾來纏，衆生染者，致於喪亡。若誦此經，即使惡疾不纏，吉星相護，凶曜退散，萬禍水^③消，千祥雲集，經通王界，福臨人間。天尊言：天下衆生，江河湖海，舟航商賈，風波汹涌，驚惶憂懼。若誦此經，皈依天地水官、水府衆聖，即使風恬浪靜，水途安妥，舟航穩載，繩纜堅牢，所謀順遂，諸聖擁護，萬神錫福。

於是天尊而說偈曰：

九炁青天上，日月星斗真。天地水官帝，雲雷電鼓隨。金童執華幡，玉女捧香花。五色祥雲內，放出白毫光。照一切天下，顯身救衆生。慶雲祥烟

護，拔離諸苦難。興雲布洪雨，驅雷掣電行。法顯無邊濟，無極無量法。無量度衆生，無極無量光。照出諸魂衆，一切冤家鬼。盡離地獄中，存亡諸衆生，一切離苦難。

天尊說經已畢，若誦此經，隨力見功，酌水獻花，其福自應。家有此經，宅舍光明，災難無侵。佩帶此經，萬神擁護，鬼祟永滅，心念不空，福力自然，神力扶持，隨心應口。此經共計一千六百七十五字，字字真詮，句句消愆，行行滅罪，卷卷賜福。一切諸天上帝、三界十方衆聖，聞說此經，皆大歡喜，信受奉行，作禮而退。

太上三元賜福赦罪解厄消災延生保命妙經

①「不足」，疑當作「不義」。

②「戒」，疑當作「齋戒」。

③「水」，疑當爲「永」。

（曾召南點校）

081 元始天尊說東嶽 化身濟生度死拔 罪解冤保命玄範 誥咒妙經

經名：元始天尊說東嶽化身濟生度死拔罪解冤保命玄範誥咒妙經。撰人不詳，約出於明代。假託元始天尊為金華真人等說皈命敬禮五嶽聖帝，消灾拔罪濟生度死之法。一卷。底本出處：《萬曆續道藏》。又見《道藏輯要》氏集。

爾時元始天尊在大羅天上金闕之內、玉清聖境天宮，陞九光寶座，舉五明如意、會集諸天帝君、日月星宿無鞅真仙聖衆，羅列道前。是時元始天尊發大弘音，演說無上至真妙法，天花繽

紛，瓊香繚繞。於是會中有四大真人，名曰大慈大悲金華真人，大慈大悲玉清真人，大慈大悲妙行真人，大慈大悲救苦真人，俱各出班長跪，上告啓奏天尊曰：臣等觀見下方世界之內，九幽地獄之中，或男或女，老少不同，雖處人世，貧寒困苦、疾病纏綿、鬼魅精邪，冤愆咒詛，凶禍官非，連年毒害，橫遭天傷；又見地獄之內，餓鬼窮魂孤幽等衆晝夜受刑，刀輪劍樹，炎熾火焚，寒冰凍體，無有休息；復見血湖獄中，許多女人受諸苦惱，不捨晝夜。兩途衆生是何異因，惟願天慈大開方便之門，廣示進脩之路。

是時元始天尊曰：汝等復位，諦聽妙音，我爲汝等一一演說。世間衆生不信因緣善惡果報，或不敬天地，不忠君王，不孝父母，不尊師長，欺負神理，忤逆兄弟親朋鄰友，背前面後，口是心非，一切過咎，已被嶽府之神曹官聖衆晨夕考較，紀錄罪咎，檢察是實。致令在世之日，貧乏困苦，惡病瘡毒，瘟疫疾疢，灾禍橫生，官司牢獄，妖邪

尅害，累歲經年，不能安泰，家門啾唧，每遇凶喪。或遭時歲刀兵水火，虫蝗饑饉，盜賊侵臨，希見太平。身歿之後，永墮地獄，餓鬼沉淪，屠割支體，鑊湯沸潰，寒冰受苦，千萬劫後，方脫輪迴，託生畜類，仍受殺傷，種種業報，無有盡期。於是四大真人聞是說已，各各含悲，啓叩天尊曰：願垂慈憫，平等救濟。

是時元始天尊仍白真人曰：昔混沌未判，太極之先，有混元道母，授太上彌羅教主赫天玄英祖炁金輪少海宗源，夢日光誕辰月二十八之降生，乃紫府東華聖人之弟，長白建功，羲皇受號，初則泰華真人，漢明泰山元帥，累朝節封東嶽大生天齊仁元聖帝。炁應青陽，位尊震位，獨居中界，統攝萬靈，掌人間善惡之權，司陰府是非之目，案判七十二曹，刑分三十六嶽，懲奸罰惡，錄死注生，化形四嶽四天聖帝，撫育六合萬物群生。世間若有善男子善女人，但遇三元五臘、四時八節、甲子庚申，每月三七，斗降本命、朔望吉旦

之辰，能施財帛設立壇場，廣陳供養，焚香燃燈，虔心懇禱，皈命東華上相東嶽大生天齊仁元聖帝威權自在天尊者，即得國平民樂，兵息穀登，宮壺清寧，皇圖鞏固。下及士庶男女罪業消除，灾衰洗蕩，福果臻身，延年益算，家門昌盛，子嗣綿長，出入起居吉無不利；過去亡者，不經地獄，罪罹蠲消，冤仇和釋，苦惱痊平，九幽罷對，五苦停刑，上生天堂，逍遙自在，快樂無邊，與道合真，一切有情均登無上。即說咒曰：

泰山第一東嶽大生天齊仁聖帝

東嶽蒼天，衮州司權。上應房宿，

下統震元。發生萬物，與天齊年。玄靈之館，字錄青篇。濟生度死，祚國綿延。

衡山第二南嶽司天大化昭聖帝

南嶽丹天，衡州司權。上應星宿，

下照離元。陶鑄萬品，俾熾長年。陽正玉闕，字錄朱篇。焚妖蕪惡，永滅風烟。

嵩山第三中嶽中天大靈崇聖帝

中嶽黃天，岱州司機。斡旋四宿，獨制艷山。總尊萬有，億劫斯年。玄都玉闕，字錄玉篇。五靈安鎮，殺鬼萬千。

華山第四西嶽金天大利順聖帝

西嶽皓天，華州司權。上應昴宿，下定兌元。資成萬彙，保命延年。金關玄窓，字錄素篇。安邦立業，備守三邊。

恒山第五北嶽安天大貞元聖帝

北嶽玄天，恒州司權。上應虛宿，下徹坎元。滋榮萬稿，益壽增年。鬱絕元臺，字錄黑篇。拔朽上生，度品成仙。

至心皈命禮：

赫天玄英之祖，金輪少海之宗，彌仙母夢日光，生紫府聖人東華弟，昔建功於長白，始受封於羲皇，初號泰華真人，漢明泰山元帥，唐會崇恩聖帝，聖朝勅字上主位鎮坤，維功參乾，造仁以德，仁回陽手於掌上，聖心益聖，麗日月於天中，五嶽稱讚於東方，三界獨尊於中界，仰奉行於大令，俯糾察於陰

司，掌人間善惡之權，字天下死生之柄，懲姦惡而獄分三十六，主司吉凶而案判七十二曹，行善者注生天堂，沉迷者尋聲救度，示慈尊垂慈之相，門衆生生化之門，福與天齊，功高無量，大悲大願大聖大慈，中界至尊東嶽聖帝慈光救苦威權自在天尊。

至心皈命禮：

乾元配位，坤德合形。淑氣明明，婉春融於三界，德慈育育，澄秋明於萬方。與聖同明，普天共仰，大慈大惠大淑大明東嶽正宮淑明坤德皇后。

至心皈命禮：

職贊天齋，股肱仁聖。布青陽之號令，掌泰岱之權衡。黼黻斯文，列嶽庭之上相，宣揚帝德，司塵世之下民。稟公忠正直之心，察善惡姦邪之事。大悲大願大智大聰東嶽上相司命鎮國真君。

至心皈命禮：

靈分三炁，質託九陽，木火相生，乃化成於本始，乾坤配位，育秀氣於靈根。體性炎炎，降福降祥降福祉，正心

耿耿，廣文廣武廣仁慈。遵父威權，體天行道，大悲大願大孝大仁東嶽上殿太子至聖炳靈仁惠王尊神。

至心皈命禮：

泰山頂上東嶽內宮，曩時現玉女之身，根本即帝真之相，應九炁而垂慈示相，冠百靈而智惠圓融，行滿十方，恩周億劫，位正天仙之號，冊顯碧霞之封，掌嶽府之神兵，管人間之善惡，尋聲赴感，護國安民，大聖大慈至仁至孝天仙玉女廣靈慈惠恭順普濟保生真人、護國庇民宏德碧霞元君。

至心皈命禮：

唯二神真，乃一統屬、善膺其福，賜金珠書略福之篇，忠註其祥，加厚祿集增福之字，丹篇紀善，玉府登庸，大悲大願大聖大慈嶽府掌增福略福之神。

至心皈命禮：

東嶽子孫。案九天監生司結秀成胎，稟兩儀之造化送生保產，乃二聖之綱維，變理陰陽，散行痘疹，九天稱慶，一視同仁，大悲大願大聖大慈普濟普

度九天監生明素真君、多男多女九天衛房聖母元君。

至心皈命禮：

本生閩地，立業南方，學道問道，授親傳於五祖，求仙得仙，使草人於三耕，護聖駕於洋子江心，顯神通於明君舡上，威名昭著，聖德難量，大悲大願大忠大勤江東忠祐崇惠之神。

至心皈命禮：

獄庭猛將，都副統兵，朱髮青顏，冠三山之鐵帽，皂袍束帶，提九節之鋼鞭，攝魄追魂，捉生落死，掌善罰惡，察過糾非，大悲大願大顯大靈嶽府顯應太保攝魂朱將軍都副統兵大元帥。

至心皈命禮：

七十五司。案東廊西廡神，十大太保，聽令於殿前，龍虎神君，鎮護於左右，速報見報，分善惡於兩途，陽曹陰曹，判儒釋之三教，註宰官將相之功勳，斷生老病死之苦趣，人鬼精邪之異類，胎卵濕化之生靈，事事悉歸於案椽，般般各屬於冥官，者對無停，詮量不息，大悲大願大寬大仁嶽庭州職曹

僚岱嶽諸司官典。

爾時元始天尊說是咒及十號已，

諸天衆真普皆讚仰，咸稱善哉。時天尊復白四真人云：凡有國王帝主后妃宮眷、州縣鎮宰官僚人民，或遇兵戈競起，盜賊興行，蟲蝗旱澇，赤鼠遊城，瘟疫流盛，若誦此經，即得天下太平，風調雨順，五穀豐登，人民樂業。若復有人牢獄枷鎖，久繫囹圄，若誦此經，即得赦宥，傳宣脫離枷鎖。若人凶星臨照，疾病纏綿，若誦此經，即得吉星絢彩，災患消除。若人求官進職，欲顯功名，若誦此經，即得祿位遷轉，榮任高騰。若人貧寒苦楚，祈求財帛殷富，若誦此經，即得財物豐盈，衣食自然。若人刑害絕嗣，鰥寡孤獨，但誦此經，即得九天稱慶，抱送嬰兒，寄胎誕育，得生智惠秀麗之男，傳流後代，綿綿不絕。若人家門衰，邪祟侵凌，若誦此經，即得門闌昌盛，妖邪潛形。若人興造卜築，莫遇良辰，觸犯土部歲神，致令雞犬作怪，災禍橫生，若誦此經，即得土禁還宮，家室安泰。又若有人冤

愆咒詛，消解魘屏斥，若人出入，行商坐賈，營謀事理，若誦此經，即得動止和平，水陸康吉，仕路亨通，營謀遂意。若人能爲亡過父母祖孀姻親孤魂等衆，若誦此經，是其亡者得生淨生^①，永享逍遙。若誦經者，必須齋戒沐浴，着新淨衣，端坐朗誦，即感五嶽善神保舉，十天衆真護持。是此經者，又若有善男子善女人虔心懇禱，請正一道士，或于宮觀廟宇之所，或就家庭燃燈獻果，請誦此經，十遍乃至數十百遍，俾令隨心求請，咸得如意。若復有人能捨命財，心無悋惜，印造此經千卷或百千萬卷，隨力建功，散施十方，流通誦誦，咸使知聞，即感五嶽聖帝，令下七十二曹文武公卿大夫、嶽府聖宮寶眷，或令護持，印施經人賜福延壽，消穰厄晦，宿世今生愆非悉解，國本綿延，歲時豐熟，生人安泰，過去超生。此經功德，利益無窮，玄範開張，不可輕泄，慎之。

於是天尊重宣嶽聖宗源，使汝開悟，而說偈曰：

無象無名無極祖，杳冥恍惚太虛靈。至真無二自然尊，默運玄元居上品。統領十方於黍米，周流八極總群倫。虛皇妙道玉宸尊，演說傳經開玄範。璇斗歷箕遊日月，光明普照廣無邊。混元上帝降凡間，無量度人三教主。西化金僊流沙界，東訓尼父亘古今。三千二百劫修行，清靜覺王如來佛。億劫至尊彌羅祖，無邊無量大天尊。太玄無極與真空，過去未來同現在。三十六天天帝主，恒河沙界等真仙。或居天上或人間，或在群仙山隱跡。濟死度生無罣礙，隨機赴感妙難量。他方此境每尋聲，九地三途常救苦。隱顯變化難可測，仙凡佛聖莫能知。慈悲現相作規模，無數有情皆濟度。拔朽^②上生無量劫，除灾却禍不思議。

依，頂禮：

毫光遍照法筵中，六趣九幽皆解脫。瑞氣氤氳乘寶輦，祥光晃耀降瑤壇。我今皈命禮嶽神，三界十方咸利益。是時天尊說是偈已，各各稽首皈依，頂禮：

東嶽大生天齊仁元聖帝，
四嶽四天聖帝岱嶽文武公卿，
東嶽正宮淑明坤德皇后，
東嶽上卿司命鎮國真君，
東嶽上殿太子炳靈仁惠王尊神，
東嶽泰山天仙玉女碧霞元君，
東嶽掌增福略福之神，
東嶽子孫安監生衛房聖母元君，
江東忠祐崇惠之神，
嶽府太尉朱將軍都副統兵元帥，
嶽庭七十五司冥官朝班官典。

爾時元始天尊重白諸天帝真曰：衆生既懇皈依過咎，盡誠懺悔，一切有情，均沾利益，是四真人俯蒙開示而獻頌曰：

蒼帝五嶽尊，長養育群靈。
司權七十二，萬物賴生成。
中界爲帝主，統領衆仙真。
能消一切罪，存歿盡沾恩。
獻是頌畢，惟見法雲縹緲，駕返丹霄，諸天仙衆莫不歡喜踊躍，稽首頂禮而退，信受奉行。

元始天尊說東嶽化身濟生度死拔罪
解冤保命玄範誥咒妙經

- ①『淨生』，疑爲『淨土』之誤。
②『杓』，疑爲『朽』之誤。

(曾召南點校)

082 碧霞元君護國庇民

普濟保生妙經

經名：碧霞元君護國庇民普濟保生妙經。撰人不詳，約出於明代。一卷。底本出處：《萬歷續道藏》。

開經偈

大慈天仙聖，劫初證上真。
化身爲救苦，發願度天人。
灾祥察善惡，休苦應元因。
嶽兵悉皆統，濟顯度幽沉。
有念無不應，誠思即感通。
志心祈福佑，皈命禮真經。
元始天尊說《碧霞元君護國庇民普濟保生妙經》
爾時元始天尊駕幸始青上境，碧玉瓊臺陞自然百寶法座，爲諸侍真說一元妙化至玄上道。

是時天尊光暎萬天，仙樂自鳴。天花徧滿，異香飛揚。諸天諸帝，三界群真，雲集臺下。作禮既畢，環拱座前，咸聽說法。時有五嶽獻花，四瀆貢寶。班集中有一真人，名曰鬱羅，出班端跪，上白天尊曰：臣昔宿何緣，得侍玉陛。幸聞至道，深荷恩慈。治化所司，愚懷未悟。切以下界生民，生生化化，各有神司，判注天人，悉由東嶽碧霞元君，亦主泰山，證位緣何，願聞道因。

天尊曰：善哉斯問，汝復其位，吾爲宣說。天地既判，五嶽莫方，萬物生春，萬化始東，東嶽注生，變理元工。上古生人，稟性貞良，克全忠孝，生而多壽，死而徑生，元無愆釁，無復幽冥，不失本真，往生善道。末世人民，行違古道，心生巧術。不忠君王，不孝父母，不敬師長，不友兄弟。恃強凌弱，妄行爭奪。殺盜姦淫，褻瀆三光，不懼神明。及有婦女，罔知宿世因緣。今受如是身命，不自悔悟，妄起貪嗔。欲富憎貧，怨天恨地。侮慢公姑，欺辱妯

娒。忍爲不仁，作踐兒女。淫祀邪神，暗行咒詛。爲惡種種，報對無停。是時元君已證太一青玄之位，觀見衆生受此沉淪，悲慈不已。爲化女流，普度群生。於四月十八日，分真化炁，現是慈顏。陟降泰山，靜居上境，復鍊元真，功周億劫。慈光洞照，徧徹幽微。應九炁以生生，體一元而化化。神功莫測，浩德難量。惠溥天民，傾土皈依。受命玉帝，證位天仙，統攝嶽府神兵，照察人間善惡罪福，照報感應速彰。真人稽首問曰：奸人巧詐，口是心非，何由照察？

天尊告曰：人之元神，稟受於天，善惡初萌，神明耶照，雖處幽隱，心跡自露。舉一善念，昭顯若光之影。人不能見，神已鑒之。即有掌善之神，記於善籍。舉一惡念，響應如谷裏之聲。人不能聞，神已聞之，即有掌惡之神，記於惡籍。善惡之作雖殊，感召之速則一。真人再拜問曰：報應驗，亦未得聞。

天尊告曰：神聖功用，無有聲色，

但假人事，默寓神機。凡人動作之際，遭逢善事，是爲善報。遭逢惡事，是爲惡報。或遭車馬舟航之沉落，或遭猛火洪水之焚溺，或遭刀兵劫賊之橫誅，或遭虎狼蟲蛇之毒噉，或遭官司牢獄之刑囚，或遭鬼祟邪精之纏害，或遭瘟瘴癘瘵之弗痊，或遭凶曜惡星之臨照，或遭蠱毒藥毒之傷殘，或遭非命橫亡之促暴，一切苦厄，雖係遭逢，皆由惡因，致罹斯苦。亦有爲善之人，而遭不善之事，必遇善人解釋，是爲神護。莫言五逆十惡之人，見履安福，各有本屬司命土地，會合社令城隍，里域神司，告聞所隸嶽主，錄奏玉帝。勅令火部雷司，勘驗真明，候時誅罰。帝嘗有命，行下斬伐叛逆大神，巡行人世。如有謀弑父母尊長者，事雖未形，心已萌惡，即行顯戮。魂下酆都，加諸苦罪，不得赦原。善男信女，命終之後，不見地獄，徑生天堂。若生人間，則居中國，爲男子身。聰明富貴，而獲壽年。真人問曰：善惡往因，昭報於世，何以見之？

天尊曰：欲知往生，當觀今生。欲知來世，當觀今世。今若生於王宮國戚，侯門臣室，及於清閒福地，身心不勞，安樂康榮，此是三世良因。今世雖或生於人中，眼目盲壞，瘡毒纏身，不得安愈，乞丐道途，不刑自痛，泣地號天，此是往生不敬天地三光，不信三寶，誹謗經文，今受斯報。或腐唇闕鼻，手攣足跛，人所憎棄，此是往生呵風罵雨，毀罵父母公姑，倚仗血氣，凌爍平人，今受斯報。或遭產難，不順分娩，或子存母喪，或母子俱亡，此是往生揉墮胎嬰，拋棄兒女，殘悞托生，今受斯報。或痴聾啞，難聽難言，此是往生巧運心機，哄惑痴愚，今受斯報。或衣不護寒，食不濟餒，死於溝壑，暴露尸骸，此是往生不惜五穀，作賤綾羅，今受斯報。或爲女流，生於卑賤之中，及遭寇夷虜掠者，此是往生倚恃兇強，姦欺良善，今受斯報。種種果報，說不可盡。俱係前因，判注無錯。若不悟悔前非，斷惡修善，復生於鱗介毛羽、爪牙蹄角之類。其中多受鞭撻，屠

割烹煎，復化微蟲，難復人身。真人聞是惡報，稽顙拜曰：下民無知，一如赤子。以何熏修，得免斯報，伏望天慈恩廣好生，開明善道。

天尊告曰：碧霞元君，雖曰罰惡，意在度人。但能自新，無不救度。所有神咒，能解宿愆。吾爲宣說：

大道之始，無象無言。天地既闢，萬神司權。泰山岱嶽，奠靖坤元。中有元君，號曰天仙。始證帝真，位居碧天。爲化衆生，示現慈顏。大顯神通，威德孔宣。安民護國，警世敦元。輔忠助孝，翼正扶賢。保生益算，延嗣綿綿。消灾化難，度厄除愆。驅瘟攝毒，剪崇和冤。嶽庭官將，號令威嚴。不仁不義，忤逆兇頑。不尊正道，化微塵烟。敢有咒詛，押送酆山。魂繫幽司，萬劫不原。下民有禱，無願不全。大慈應感，溥濟人天。

天尊謂鬱羅真人曰：若人一念回心，皈依正道，心神內靜，結習外消。便請清戒道士，或就觀宇，或于家庭，

嚴潔齋壇。盡心建善，諷誦是經。或三五七遍，或至百遍千遍，皈命元君，焚香懺悔，注想慈容，儼然如在。五體投地，百拜祈恩，即得罪銷黑書，愆除獄府。身家寧吉，禍患消弭。出入亨通，動居利泰。九玄七祖，咸得逍遙。真人聞是利益，踴躍歡忻。臣今得遇是經，願爲流布人間，俾令兆民咸歸仁化，齊興慈讓，保國清平。真人再拜，而說讚曰：

皈命碧霞經，宿業解三生。
轉誦碧霞經，災難不臨身。
仰體碧霞經，默有鬼神欽。
恪禮碧霞經，家眷保安寧。
存想碧霞經，精氣神光融。
敬慕碧霞經，福祿壽齊增。
佩帶碧霞經，邪惡不敢侵。
調演碧霞經，田宅益興隆。
供養碧霞經，火盜永不生。
讚詠碧霞經，萬願悉如心。
天尊曰：仁哉鬱羅，能爲天人遂其利樂，功德無量。宜進仙勳。
天尊說經法已，駕返清都。諸天

仙衆，頂禮奉送，慶會難言。是時真人下傳世間，以廣宣化。

元始天尊說碧霞元君護國庇民普濟保生妙經

天仙碧霞寶誥

泰山上頂，東嶽內宮，曩時現玉女之身，根本即帝真之質。膺九炁而垂慈示相，冠百靈而智慧圓融。行滿十方，功周億劫。位證天仙之號，冊顯碧霞之封。統嶽府之神兵，掌人間之善惡。尋聲赴感，護國安民。大聖大慈，至孝至仁。天仙玉女、廣靈慈惠、恭順溥濟、保生真人、護國庇民宏德碧霞元君。

（曾召南點校）

083 太上老君說天妃救

苦靈驗經

經名：太上老君說天妃救苦靈驗經。撰人不詳，出於明初。假託太上老君及廣救真人說天妃（媽祖）降世救苦護民之事。一卷。底本出處：《正統道藏》洞神部本文類。

仰啓勅封號無極，仁慈輔斗至靈神。威容顯現大海中，德廣徧施天下仰。護國救民無壅滯，扶危救險在須臾。或遊天界或人間，或徧波濤并地府。邪魔鬼魅總歸依，魍魎妖精皆潛伏。變凶爲吉如彈指，賜福消灾若殄微。凡人有禱捧金爐，一切歸心從懇禱。至心歸命禮：浦沲勝境，興化湄州，靈應威德非常，孝感神通廣大，救厄而平波息浪，扶危而起死迴生，大慈

大悲，救苦救難，勅封護國庇民明著妙靈昭應弘仁普濟天妃。

啓請呪

奉請三天都總管，九天遊奕不曾停。上聖天妃功護國，勅封靈惠衛朝廷。頭戴花冠乘鳳輦，身披鞞服仗龍形。東列西華排鬼將，南征北討助神兵。劍佩斗牛光凜冽，簡書勅命掃妖精。威容顯現人欽仰，心運慈悲雨露均。救民護國施恩德，祛害除灾利澤興。威德周圓通上界，垂慈降世度群生。山河社稷永安鎮，雨順風調保太平。散影分輝遍三界，人間天上日月明。天龍鬼神咸恭敬，奉勅皆令達上清。我今誓願永受持，一心歸命奉真經。

奉禮呪

陰德始生，陽光吉貞。威容烜赫，救度生民。斬鬼除魔，速達上清。三台來護，衆聖皆迎。戴天履地，步斗魁星。無憂不滅，無願不成。誦持神呪，道炁長存。

爾時太上老君在無極境界，觀見大洋溟渤、河瀆川源、四海九江、五湖

水澤、蛟蜃魚龍，出沒變化精妖鬼怪，千狀萬端。有諸衆生，或以興商買賣，採寶求珍，出使遐荒，交通異域，外邦進貢，上國頒恩，輪運錢糧，進納貢賦，舟船往復，風水不便，潮勢汹涌，驚濤倉卒，或風雷震擊，雨雹滂沱，其諸鬼神，乘此陰陽變化，翻覆舟船，損人性命，橫被傷殺，無由解脫，以致捉生代死，怨怒上衝，何由救免。於是廣救真人上白天尊曰：斗中有妙行玉女，於昔劫以來，修諸妙行，誓揚正化，廣濟衆生，普令安樂。

於是天尊乃命妙行玉女降生人間，救民疾苦，乃於甲申之歲，三月二十三日辰時，降生世間。生而通靈，長而神異，精修妙行，示大神通，救度生民，願與一切含靈解厄消灾，扶難拔苦，功圓果滿，白日上午，土神社主奏上三天。於是老君勅下輔斗昭孝純正靈應孚濟護國庇民妙靈昭應弘仁普濟天妃。於是天妃聽宣法音，弘是願言：自今以後，若有行商坐賈，買賣求財，或農工伎藝，種作經營，或行兵布

陣，或產難不分，或官非撓聒，或口舌所侵，多諸惱害，或疾病纏綿，無有休息，但能起恭敬心稱吾名者，我即應時孚感，令得所願遂心，所謀如意。吾常遊行天界，徧察人間，以致地府泉源江河海上，一切去處，令諸所求，悉皆遂願。

於是廣救真人聞是願言，稽首歸依，而說偈曰：

勅封輔斗，顯跡威靈。飛符走印，統領天丁。收捕奸盜，斬滅妖精。扶危濟險，護助天兵。邪魔永殄，疾病安寧。敬順者泰，橫逆者傾。厭息火盜，斷絕邪冥。東西南北，四方肅清。神威震肅，家國咸寧。

英烈天妃，善慶明時。遊行三界，徧察靈祇。風雷衛護，兵將維持。中臨人世，爲殄灾非。下通地府，徧告神司。枉橫者戮，殺人者誅。施人者愛，謀人者追。一心歸仰，萬物咸熙。急急如律令！

爾時天妃聞說偈已，稽首天尊道前，而說誓言：一者，誓救舟船達于彼

岸。二者，誓護客商，咸令安樂。三者，祛逐邪祟，永得消除。四者，蕩滅灾迤，家門清淨。五者，搜捕奸盜，屏跡潜形。六者，收斬惡人，誅鋤强梗。七者，救民護國，民稱太平。八者，釋罪解愆，離諸報對。九者，扶持產難，母子安全。十者，庇護良民，免遭橫逆。十一者，衛護法界，風雨順時。十二者，凡有歸向，保佑安寧。十三者，修學至人，功行果滿。十四者，求官進職，爵祿亨通。十五者，過去超生，九幽息對。

是時老君聞天妃誓言，乃勅玄妙玉女錫以無極輔斗助政普濟天妃之號，賜珠冠雲履，玉珮寶圭，緋衣青綬，龍車鳳輦，佩劍持印，前後導從，部衛精嚴，黃蜂兵帥，白馬將軍，丁壬使者，檀香大聖，晏公大神，有千里眼之察奸，順風耳之報事，青衣童子，水部判官，佐助威靈，顯揚正化。世間若有男女恭敬信禮，稱其名號，或修齋設醮，建置道場，或清淨家庭，或江河水上轉誦是經一徧，乃至百徧千徧，即得祛除

灾難，殄滅邪魔，疾病自痊，官灾永息，行兵臨陣，凶惡自離，囚獄之中，自然清泰，賊寇不侵，惡言無害，田蚕百倍，牛畜孳生，財祿盈餘，經營獲利，行商坐賈，採寶求珍，海途平善，無諸驚恐，求官作事，遂意稱心。

是時天尊說是經畢，天龍鬼神咸願護持，於是廣救真人復說偈曰：

金闕聖后，勅封輔斗。天人顯跡，嶽瀆毓秀。三月建辰，下弦應候。護國靈長，嵩呼萬壽。□福不臻，何難不救。與道合真，玉皇眷佑。依經轉誦，魔靈束首。燒香散花，修齋設醮。應有急難，即當虔告。如法受持，無不應驗。急急如律令！

真后斗仙，位列九天。上佐金闕，下及泉源。七元使者，道合自然。人間皈仰，福報無邊。昊天罔極，降福綿延。

英烈天妃，應感無方。人間天上，咸敬其名。貞風顯佑，國土清平。臣今遵奉，永保利貞。

是時廣救說是偈已，妙行天妃稽

首天尊，奉辭而退。三界靈祇，天龍神鬼，咸生歡喜，信受奉行。

天妃救苦靈符

齋
醮
終

勅符呪曰

輔斗真人，感應化生。一符一水，救濟萬民。除災去障，永保安寧。急急如律令！

齊天聖后，北斗降身。三界顯跡，巨海通靈。神通變化，順濟稱名。三十二相，相貌端成。隨念隨應，至聖至靈。威光顯赫，護國庇民。海風吹浪，至祝降臨。一心瞻仰，顯現真身。虛空出現，統領天兵。威神下降，鬼伏神驚。莆田土主，聖化竹林。北斗大聖，驅逐邪精。消災散禍，家國安寧。急急如律令！

右天妃靈符，如有急告焚香，念前呪七遍，書此符，用井花水磨乳香調服，自然安好，無不應驗。

太上老君說天妃救苦靈驗經

(曾召南點校)

084 太上老君說城隍感應消災集福妙經

經名：太上老君說城隍感應消災集福妙經。撰人不詳，出於明初。假託太上老君說禮拜城隍消災之法。一卷。底本出處：《萬曆續道藏》。

開經偈

稽首皈衣城隍尊，威靈烜赫鎮乾坤。
護國安邦扶社稷，降施甘澤救生民。
統轄大兵巡世界，賞善罰惡日同明。
正直公忠判生死，禍淫福善闡威靈。
虔心欽奉消災障，家道平康國土清。
真經開演我今誦，願賜恩光普降臨。
爾時太上老君道德天尊，昔在大羅天上七寶宮內，大集諸天諸地、日月星宿、三界官屬，弘演無上至真玄元大道。於是奇花燦爛，瓊香馥郁。時有

真人，名曰廣惠，執簡長跪，上白天尊曰：臣觀見世間一切衆生，受諸苦惱，伏望天慈憐憫開宥。

天尊乃撫几而言：此等衆生，造諸惡業，沉輪苦海，奸貪恣縱，任意所爲，不孝不忠，不仁不義，不恭三寶，不禮神明，小斗大秤，穢踐五穀，怨天怨地，恨雨恨風，毀謗正道，惡口傷人，邪淫奸盜，殺害生靈，致遭罪咎，永失人身。真人重告天尊曰：世間衆生，受此厄難，何緣得度？

天尊曰：善哉善哉。下方生人，皆由城隍申奏，定數不差。世間若有善信男女，轉誦此經三五十遍，以至百千萬遍，即得消除罪業，安享太平。

老君曰：其神天地儲精，山川鐘秀，威靈顯赫，聖道高明，無黨無偏，公忠正直，有求必應，如影隨形，代天理物，剪惡除兇，護國保邦，功施社稷，溥降甘澤，普救生民，統轄十八真司，主管百萬神將，積功累行，位正城隍，權掌天下，威鎮萬邦。真人聞說，稽首頂禮。

天下都城隍威靈公

天下十三布政城隍之神

天下各府州縣城隍之神

兩廊一十八司曹案官班聖衆

主管天下人生死案判官

主管長生注命案判官

主管病症疾疫案判官

主管福祿延壽案判官

主管注生子孫案判官

主管立應見報案判官

主管看經修功德案判官

主管齋戒殺生案判官

主管勾押推勘案判官

主管磨看陳詞案判官

主管風雨龍王案判官

主管追取遣送案判官

主管胎卵濕化案判官

主管惡鬼窮魂案判官

主管善惡報應案判官

主管億劫魍魎飢鬼案判官

主管山林分野案判官

主管六房曹吏案判官

左右金甲侍衛大神

前擁後從神武將軍

執旛金童散花玉女

隍同一切神兵將吏

是時城隍哀憫世間一切衆生，或有年灾月厄，命運蹇滯，天羅地網，鰥寡孤獨，瘟灾疫癘，瘡腫疥癩，官非口舌，尅乏後嗣，刀兵水火，盜賊生產，一切厄難，若誦此經，吾當速遣行瘟使者、收瘟聖衆，即除罪簿，永滅惡根。於是真人再告天尊曰：世間若有善男子、善女人，廣濟陰功，行諸方便，施財周急，愛老憐貧，欽此三寶，孝養父母，忠於君王，惜愛衣食，和同六親，不作非爲，持齋奉道，善籍標名，丹臺註善，增延福壽，世代榮昌，子嗣綿永，世世不絕。

天尊曰：城隍尊神，威權實重，顯化無邊，禱雨則甘霖蘇槁，禾稼成熟，祈晴則化陰成陽，應時朗霽。若有善男子、善女人，一心專志，念道思真，但於三元八節，諸神聖誕，朔望之期，本命良辰，持齋誦經，作種種功德，即得見世安樂，增長福田，門昌族貴，光顯

安榮，官階進崇高之職，商賈增阜盛之財，舟航無波浪之驚，陸程有妥妥之美。凡在塵壤，悉歸統制。於是天尊而說偈曰：

大哉城隍，實天生德。虹流華渚，山嶽降靈。承天稟命，統制萬邦。主判生死，報應分明。賞善罰惡，不爽毫分。明同日月，德並乾坤。皇都肅靖，奸宄不生。救灾拔難，佑國康民。大都乾地，廟貌尊嚴。國崇祀典，禮儀精裡。天下欽敬，率土歸心。禦灾捍患，永鎮八方。香膏綿永，億萬斯春。

天尊說是偈已，惟見龍輿鶴駕，迎歸碧落之天，萬聖千真，各返雲霄之內。

城隍上聖，頓首拜辭，留此真經，下傳世間，流通讀誦。若遵經旨，受福無窮。

諸神歡悅，信受奉行。

太上老君說城隍感應消灾集福妙經

都城隍真誥

社稷古公，天下正神，銓福國顯忠之行，稟賞善罰惡之仁。都邑之主，諸郡侍從，所隸十三布政，案判一十八司。廟社萬年，恩扶億劫，設作福作威之柄，造注生注死之權。運神力以護郢川，遇陰兵而驅夷寇，至靈至聖，乃正乃公。護國保寧佑聖王威靈公感應尊神。

（李剛點校）

085 太上大聖朗靈上將 護國妙經

經名：太上大聖朗靈上將護國妙經。撰人不詳，似出於宋元以後。一卷。底本出處：《萬曆續道藏》。

爾時興國太平天尊、義勇武安王、漢壽亭侯關大元帥勅封崇寧真君，聖父聰明正直忠翊仁聖明王，聖母助順明素元君，神子聖孫，參謀大將，麾下左右統兵分兵之神，伏兵降兵之神，藏兵收兵之神，布陣擺陣之神，團陣走陣之神，水陣火陣之神，八方八煞、四方四勇天丁，掣電轟雷、騰雲致雨、鳴鑼擊鼓、發號施令將軍，合司文武公卿，玉泉山得道仙真。

吾授玉帝勅命三界都總管、雷火瘟部、冥府酆都御史，提典三界鬼神。

吾今登壇示知爾衆：日在天中，心在人中。日在天中，普照萬方。心在人中，不容一私。寧爲忠臣而不用，毋邪媚以欺君。寧爲孝子而不伸，毋忿戾以懟親。無論綱常倫理，無論日用細微，皆當省身寡過，不可利己損人。一念從正，景星慶雲。一念從邪，厲氣妖氛。善惡明如觀火，禍福應若持衡。凡我含生，總盟此心。吾司雷部霹靂，奏疏速上天庭。晝察陽元功過，夜判冥府鬼神。若人傳寫千本，勝看一藏真經。吾遣天丁擁護，自然百福來臻。即說呪曰：

大聖馘魔糾察三界鬼神刑憲都提轄使、三界採探捕鬼使者、元始一炁七階降龍伏虎大將軍、崇寧真君、雷霆行符伐惡招討大使、三十六雷總管、酆都行臺御史、提典三界鬼神刑獄公事大典者、提督刑案神霄大力天丁、三界都總兵馬招兵大使、統天禦地誅神殺鬼大元帥。

爾時與會文武聖衆，聞是經說，莫不踴躍讚嘆稱善。若人虔心諷誦，上

至帝王，下及民庶，即得星辰順度，社稷安寧，人物康阜，灾厄蠲除。凡有請祈，悉應其感。一切人天，均霑利益。信受奉行，作禮而退。

太上大聖朗靈上將護國妙經

大明萬曆三十五年歲次丁未上元

吉旦

正一嗣教凝誠志道闡玄弘教大真人
掌天下道教事張國祥 奉

旨校梓

(李剛點校)

086 元始天尊說藥王救八十一難經

經名：元始天尊說藥王救八十一難經。撰人不詳，似出於宋元以後。一卷。底本出處：《萬曆續道藏》。

爾時元始天尊在大羅天上八景天中，召集十方三界萬億真仙，無鞅聖衆，說無量度人至真妙法。時於會中，有一真人，名曰救苦，越班而出，執簡長跪，上白天尊曰：伏聞上古人民，少染疾病，壽延千歲。今時世人，多生患難，天促年齡，是何因緣，惟願天尊大聖，爲衆演說，得聞至道。

天尊告曰：汝等救苦，能爲衆生問其因緣，吾當爲說，汝等諦聽。夫上古之人，尊崇大道，脩省本源。不殺不害，不嫉不妬，不欲不貪，不淫不盜，言

無誑妄，口無惡聲，不分人我，不與物爭。體性淳朴，形質固守，故無災難，遂得壽命延長，享及百千餘歲。近世衆生，不敬天地，不惧神明。心生嫉妬，意起貪嗔。殺生害命，利己損人。大斗小秤，瞞昧愚民。惡口兩舌，綺言誑語。倚強凌弱，伏富吞貧。淫污良善，損害好人。萬過千愆，果報速生。以致上天遣差五瘟使者，行病吏兵，降下災殃，散與病患。或中風，或傷寒，或瘟疫，或泄瀉，或痢疾，或火眼，或惡瘡，諸般病症，使身心身。恍惚，形體不寧，卧枕着床，無所求效。輕者旬日痊愈，重者箇月痲痲。至於過愆滿盈，經年累月，纏綿不愈，以及喪命殞身。年未半百，少壯夭亡，皆是不善之因，以致如斯。

真人再告天尊曰：特開慈憫，開示愚蒙。凡今慾界衆生，不知禁戒，有犯罪愆難逃憲網，遣降患難，或至妖亡，何由救免？伏望天尊大慈，普施好生之德，廣開救濟之門，矜憐愚昧，免遭災難。

於是天尊重告真人曰：此難匪醫不救，匪醫不療。昔有秦神，時爲國醫，源洞曉醫，深明脉理，號稱神應王扁鵲，爲神最罪，積功無量，勅封靈應藥王。真君玄默通乎天地，妙用動乎鬼神，普濟群生，名傳天下。有《救八十一難真經》，當傳世人，流通看誦，可免患難。若有善男信女，請此真經，至誠安奉，虔心供養，即得永世無災，平生少病。如遇有災之日，即於靜處建立道場，潔備香花燈燭，請命道士，或自持念《救難真經》三過五過乃至數千百過，致感靈應真君默送靈丹妙藥，夢寐針灸調治，遂得疾病消除，灾厄洗滌，身軀輕健，形體如常。凡有患難，急當焚香誦經，指日平安。於是說靈應真君救八十一難應驗曰：

靈應藥王扁鵲君，能救風寒暑濕難。
靈應藥王扁鵲君，能救山嵐瘴氣難。
靈應藥王扁鵲君，能救人風癱疾難。
靈應藥王扁鵲君，能救中風不語難。
靈應藥王扁鵲君，能救感冒傷寒難。
靈應藥王扁鵲君，能救天行瘟疫難。

靈應藥王扁鵲君，能救陽毒斑疹難。
靈應藥王扁鵲君，能救瘧疾纏綿難。
靈應藥王扁鵲君，能救痢疾腹痛難。
靈應藥王扁鵲君，能救泄瀉不止難。
靈應藥王扁鵲君，能救霍亂吐瀉難。
靈應藥王扁鵲君，能救嘔吐惡噦難。
靈應藥王扁鵲君，能救大腸秘結難。
靈應藥王扁鵲君，能救小便不通難。
靈應藥王扁鵲君，能救五勞七傷難。
靈應藥王扁鵲君，能救咳嗽虛損難。
靈應藥王扁鵲君，能救癆瘵尸癆難。
靈應藥王扁鵲君，能救傷食停飲難。
靈應藥王扁鵲君，能救諸氣閉塞難。
靈應藥王扁鵲君，能救積聚痞滿難。
靈應藥王扁鵲君，能救水腫鼓脹難。
靈應藥王扁鵲君，能救噎氣嘈雜難。
靈應藥王扁鵲君，能救翻胃倒食難。
靈應藥王扁鵲君，能救膈噎不通難。
靈應藥王扁鵲君，能救九種心疼難。
靈應藥王扁鵲君，能救絞腸腹痛難。
靈應藥王扁鵲君，能救頭疼眩暈難。
靈應藥王扁鵲君，能救腰脇疼痛難。
靈應藥王扁鵲君，能救痰飲厥厥難。

靈應藥王扁鵲君，能救喘脹哮喘難。
靈應藥王扁鵲君，能救盜汗遺精難。
靈應藥王扁鵲君，能救五淋白濁難。
靈應藥王扁鵲君，能救黃疸黑疸難。
靈應藥王扁鵲君，能救痺氣脚痿難。
靈應藥王扁鵲君，能救邪祟顛狂難。
靈應藥王扁鵲君，能救驚悸怔忡難。
靈應藥王扁鵲君，能救小腸寒疝難。
靈應藥王扁鵲君，能救吐血衄血難。
靈應藥王扁鵲君，能救腸辟痔漏難。
靈應藥王扁鵲君，能救痞塊癥瘕難。
靈應藥王扁鵲君，能救手足麻木難。
靈應藥王扁鵲君，能救耳聾不聽難。
靈應藥王扁鵲君，能救眼疼不明難。
靈應藥王扁鵲君，能救牙齒疼痛難。
靈應藥王扁鵲君，能救乳鵝喉痺難。
靈應藥王扁鵲君，能救失音不語難。
靈應藥王扁鵲君，能救尿血便血難。
靈應藥王扁鵲君，能救惡瘡疔腫難。
靈應藥王扁鵲君，能救發背惡瘡難。
靈應藥王扁鵲君，能救癰腫毒難。
靈應藥王扁鵲君，能救附骨癰疽難。
靈應藥王扁鵲君，能救疥癩瘡癬難。

靈應藥王扁鵲君，能救賺腿頑瘡難。
靈應藥王扁鵲君，能救劓骨疼痛難。
靈應藥王扁鵲君，能救破傷生風難。
靈應藥王扁鵲君，能救刀斧損傷難。
靈應藥王扁鵲君，能救跌撲損傷難。
靈應藥王扁鵲君，能救湯火燒燒難。
靈應藥王扁鵲君，能救誤吞銅鐵難。
靈應藥王扁鵲君，能救誤吞針刺難。
靈應藥王扁鵲君，能救誤中蠱毒難。
靈應藥王扁鵲君，能救誤吃食毒難。
靈應藥王扁鵲君，能救誤服藥毒難。
靈應藥王扁鵲君，能救婦人諸病難。
靈應藥王扁鵲君，能救月閉不通難。
靈應藥王扁鵲君，能救赤白帶下難。
靈應藥王扁鵲君，能救胎前產後難。
靈應藥王扁鵲君，能救難產逆生難。
靈應藥王扁鵲君，能救胎衣不下難。
靈應藥王扁鵲君，能救血崩惡漏難。
靈應藥王扁鵲君，能救吹乳膈乳難。
靈應藥王扁鵲君，能救小兒風癇難。
靈應藥王扁鵲君，能救重舌木舌難。
靈應藥王扁鵲君，能救急慢驚風難。
靈應藥王扁鵲君，能救痘疹黑靨難。

靈應藥王扁鵲君，能救痘疔潰爛難。
靈應藥王扁鵲君，能救疔疾痞塊難。
靈應藥王扁鵲君，能救吐瀉不止難。
靈應藥王扁鵲君，能救走馬牙疳難。
靈應藥王扁鵲君，能救脫肛不收難。
靈應藥王扁鵲君，能救一切疾病難。

於是真君，玄妙通靈，醫中至聖，藥中至神。元始祖炁，分炁分身，一炁分三，三炁合形。三三九數，九九復生，八十一炁，與道合真。以此爲願，願救世人，上醫國祚，下拯生民，治療病患，普救群生。若有告者，持誦虔誠，消災消難，永保安寧。

天尊說經已畢，還於玉清。若人看誦此經者，能酌水獻花，其驗速應。家有此經，人口安寧。佩帶此經，災難不生。褻瀆輕慢，反殃其身。於是救苦真人及諸真仙，十方聖衆，聞說此經，皆大歡喜，信受奉行。

元始天尊說靈應藥王救八十一難真經

① 此「身」字疑衍。
② 此處疑有脫漏。

（李剛點校）

087 大惠靜慈妙樂天尊

說福德五聖經

經名：大惠靜慈妙樂天尊說福德五聖經。撰人不詳，約出於宋元以後。假託天尊為定惠真人說頂禮五顯靈官大帝，誦咒祈福之法。一卷。底本出處：《正統道藏》正一部。

通天寶號

運元鼎化三十三天金臂圓光火犀大仙、都統王殿治靖捲簾大將軍、九天遊奕遠捉使、部領六天吏兵、降伏天下妖魔、輔正除邪辟瘟使、掌執火府火部使、主管南極天樞院、北極驅邪院文字、封山破洞正一靈官都大元帥、勅封五顯靈觀大帝。

呪曰：

靈觀大帝，睿聖聰明。日光菩薩，

氣射帝宸。金刊聖像，三日聖明。黃裳錦袍，足踏火輪。金磚金鎗，按行乾坤。名山大川，靈洞真君。火瓢火鴉，氣燄威靈。斬妖滅邪，如電如霆。護國砥柱，衛民靈神。德億萬世，福億萬民。輔靈助順，二聖將軍。順風千里，百萬神兵。救度災厄，如響應聲。變禍成福，如影隨形。護祐臣身，何求不應。神光洞照，永處吉慶。奉大帝勅，急急如律令！

焚香奉請

仰啓靈觀大元帥，福德華光五顯王。錦袍繡帽威容猛，火劍金鎗聖力强。天下正神功第一，佛中上善世無雙。玉宸殿畔登珠幌，金色臺邊建寶幢。破洞封山魑魅絕，興風走電鬼邪亡。化導萬民垂福祐，保安九域去災殃。焚香奉請虔誠禮，願賜恩光降道場。

爾時天尊在八景宮中紫光殿內，坐九色蓮花寶座，垂十絕鶴蓋，與諸天上聖、天真大神、天仙神仙、諸大仙衆、金童玉女、護法龍神，及諸侍衛等衆等時同會，天樂俱鳴，咸聽天尊說無極至

真妙法。是時會中有一真人，名曰定惠，越班而出，秉簡長跪，白天尊言：「臣聞五化之理可得聞乎？」

天尊曰：「三皇之初，民以道化，五帝之後，德化猶存。至於霸國，日事戰征，當彼之時，道德已廢，仁義弗行，所從化者，財與食爾，吾道何由化之。況乎末世，衆生以貪愛為本心，以狡佞為己行，奔馳利路，堅固業根，釀惡招愆，不崇善教，致使冤仇糾結，怨咎牽連，上千二氣之和，下致九州之害。或刀兵相戮，或旱澇相仍，饑饉荐臻，瘟疫傳染，人民夭橫，魔鬼流行，當此之時，必歸神化。」

於是定惠真人復告天尊曰：「邇者世間神化之主，臣等未悉，能知如何令彼衆生安穩無惱，富貴長壽，無諸災難？」


天尊告曰：「爾甚慈悲，欲令利益末世衆生，方便啓問，若諸善男子善女人，或有官災疾病冥訟精妖，一切急難無所救解者，但能起心信向，祈求福祐，自然亨泰，上聖威神之力，不可稱

量，皈命靈觀真形，頂禮呪曰：


太靈之神，錫以繁祉。頂踵被恩，曷有窮已。睿鑒孔昭，厥衷庸啓。臣今皈命，一心信禮。

三十三天星月宮內、雷音殿中，化現白蛇之冠，三頭六臂青身自在之體，圓光火犀大仙、靈官顯應，橫天急捉三界邪魔，封山破洞主法摧魔正神、靈觀大聖五帝大元帥真形睿號：

第一都天威猛大元帥
顯聰昭聖孚仁廣濟福善王




第二橫天都部大元帥
顯明昭聖孚義廣祐福順王




第三通天金目大元帥
顯正昭聖孚智廣惠福應王



第四飛天風火大元帥
顯直昭聖孚信廣澤福祐王



第五丹天降魔大元帥
顯德昭聖孚愛廣成福惠王



此真形睿號，普可受持，信女善男，常當讀誦，功德甚大，利益無窮。凡叨覆載之安居，悉向神祇之宰制，是故靈觀尊聖在天為五帥，在世為五王，勇烈明靈，威權至重，有賜福消災之力，有賞善罰惡之功，貧富差殊，窮通雖異，然隸攸司之考覈，悉歸上聖之裁

量，功過昭然，絲毫弗謬，知作善降祥之美，杜為愆釀惡之因，垢翳若除，慧光明朗，災尤消釋，福慶咸臻。凡有上士於三元八節、五臘、生辰持誦是經，外祛灾癘，內益經營，神祇密護於門庭，魔鬼遠離於境界，功圓果滿，獲大吉祥。

爾時天尊即說靈觀呪曰：

靈觀元帥，顯烈威雄。通天徹地，擲火奔風。上飛丹雀，下驟朱龍。金光灼灼，黑霧濛濛。邪魔喪膽，鬼魅潛蹤。安民護國，伐惡除凶。灾禍消滅，福德興隆。五靈真炁，降我身躬。所求皆遂，有願克從。北帝勅令，要立神功。急急如律令！

天尊曰：世間衆生，天灾重病，瘟疫時行，傳染不瘥，或久患卧床，不逢醫藥，及有猴犬之精，狐狸之祟，變易形質，迷惑陽人，詐托尊神，妄稱大聖，占人樓閣，攝人魂魄，放火拋磚，偷財盜物，門無風而自開，釜無火而自熱，百奇千怪，惱亂衆生，當於清淨庭宇，請正一道士依科立壇，騰奏章表，醮祭

五天大元帥，燒香燃燈，誦吾神呪。或一日，或五日，當有鐵輪大神、白蛇大將、無面目將軍、火部兵馬，一合來降，掃蕩妖氛，肅清定舍，生人安泰，驅逐不祥。又復有人身遭獄難，禁繫枷鎖，不能脫離，及有門戶閉塞，謀運不成，口舌頻生，非橫競起，錢財耗散，命祿衰微，五路不通，三災疊至，連年蹇滯，累歲屯遭，亦當命道士如前舉行，即得靈觀元帥、福德仙官、善慶童子應時下降，衛護衆生，災厄消除，一切如意。

若或經行曠野山林隈僻之處，獨宿恐怖，但能焚香誦經，凶惡自散，便得安穩。或有衆生根性頑惡，闡提不信，毀謗真經，輕慢香火，如此之人，巡察將軍地行使者，糾錄罪犯，定其輕重，所犯重者，投陷水火之中，卒於非命，其過若輕，減筭除祿，灾病苦身。當知靈觀元帥威雄猛烈，報應尤速，專持禍福之權，生殺之柄，以示神化，善男子善女人得遇此經，虔誠恭敬，受持讀誦，更能與人書寫，教人持誦，或印造是經，廣行勸化，靈觀元帥心大歡喜，速

得賜其福祐，自然門戶興隆，財物昌盛，貴人協順，聖力扶持，凡所願心，悉令成就。

於是定惠真人及諸仙等衆聞此說已，踴躍欣喜，稽首靈觀而祝願曰：

稽首靈觀五聖尊，願得國土保昇平。

稽首靈觀五聖尊，願得風雨應時行。

稽首靈觀五聖尊，願得百穀自登成。

稽首靈觀五聖尊，願得宅舍得安寧。

稽首靈觀五聖尊，願得父母享遐齡。

稽首靈觀五聖尊，願得謀運稱心情。

稽首靈觀五聖尊，願得財物足豐盈。

稽首靈觀五聖尊，願得火盜不相侵。

稽首靈觀五聖尊，願得出入利經營。

稽首靈觀五聖尊，願得無病保長生。

稽首靈觀五聖尊，願得諸福自來并。

稽首靈觀五聖尊，願得天真聖教興。

諸大仙衆稱讚願已，龍車旌節來迎天尊，復還真境。是時天尊再告定惠真人曰：爾等受吾此經，宜下人間流傳，信士依教奉行，祈霑福祐。於是定惠真人及諸仙衆遵奉道旨，作禮而退。

大惠靜慈妙樂天尊說福德五聖經

（曾召南點校）

088 高上玉皇本行集經

經名：高上玉皇本行集經。簡稱《玉皇經》。撰人不詳，約出於隋唐間。假託元始天尊演說玉皇修道證仙故事，及誦念玉帝經咒之功德果報。三卷。底本出處：《正統道藏》洞真部本文類。

高上玉皇本行集經卷上

清微天宮神通品第一

爾時元始天尊在清微天中玉京金闕七寶玄苑玉皇宮殿，昇光明座，與無數衆宣說靈寶清淨真一不二法門。是時玉皇尊帝，與諸真聖、飛天大聖、無極神王、靈童玉女九千萬人，清齋建節，侍在側焉。于時玉帝知時欲至，即於會前舉六通力，放大光明，徧照諸

天，無極梵剎一切境界，皆大震動；十方無極一切世界，俱同瑠璃玻瓈，無有隔礙；十方來衆，並乘五色瓊輪琅輿，碧輦、九色玄龍、十絕羽蓋，麟舞鳳唱，嘯歌嚙嚙，靈妃散花，金童揚煙，讚詠洞章，浮空而來。是時梵天一切金仙、大乘菩薩、四衆八部，承斯光照，皆乘金碧九霞流景飛雲玉輿，慶霄四會，三辰吐芳，飛香八湊，旋繞道前，雨衆妙花，如雲而下，遍覆會前。是時其光徧照諸天，下燭下方無極世界，同玄都境。凡彼人間，上近九天，連接交連，至親至邇。凡彼下方無極世界，山陵坡坂，溝澗溪谷，緬平如掌，六合至邇，三境非遙。天寶臺殿，星羅人間，瓊瑰羅列，朗耀雲衢，七寶欄楯，以界道路，玉樹仙花，精燦珠寶，景秀丹田，芝草綿覆。時彼下方，皆見諸天。鈞天妙樂，隨光旋轉，自然振響。又復皆見鸞嘯鳳唱，飛鳴應節，龍戲麟盤，翔舞天端。諸天寶花，零亂散落，徧滿道路。是時凡聖駭異，幽暗開光，天人悅慶，踊躍歡忻，凡夫學士，盡得飛昇，仰觀

劫仞寶臺，俯眄紫雲彌羅。是諸世界一切人民，咸臻道炁，白首面皺，皆得化度，紺髮朱顏、少壯幼稚，轉得形容，光澤美好，苦惱痊平，普蒙解脫，安樂快然。天下歌謠，欣國太平。當爾之時，神風遐著，萬炁揚津，天震地裂，枯骨更生，沈尸飛魄，皆起復形，艷都鐵圍、長夜九幽，即時破壞，地獄苦魂，化生諸天，三惡道苦，一時解脫。時諸罪輩，以斯光力，得生十方諸大天宮。

爾時玉皇即分其身，徧於十方諸大天宮，令諸天宮自然化現，白玉爲京，黃金爲闕，七寶玄苑大光明殿具光明座，幢節旛蓋，異寶奇花，徧布是處。爾時玉皇即以所分之身，徧於是處，白玉京中黃金闕內，七寶玄苑大光明殿光明座上，普爲十方演說清淨解脫之道。時化玉帝，各以無量天真大聖、妙行真人、靈妃玉女侍列左右。是諸玉女顏容姝妙，端麗奇特，天珍異寶，莊嚴身相，言音清徹，衆所樂聞。如是諸女，其身復出微妙解脫自然之香。是香芬馥，周徧諸天極妙樂土及諸大地

一切福處。六道一切衆生聞是香者，普蒙開度。所謂天道、人道、魔道、地獄道、餓鬼道、畜生道。若諸天道，一切天人或有能聞是此香者，五衰四相，永得除滅，轉增天福。若諸人道，王臣兆庶或有能聞是此香者，即得人天長壽之樂，身或滅度，乃得脫殼尸解之道。若諸魔道，一切諸魔或有能聞是此香者，安處天宮，鬪戰之苦，各得休息。若諸地獄道，一切衆生或有能聞是此香者，離地獄苦，得淨土樂。若諸餓鬼道，一切餓鬼等或有能聞是此香者，即得飽滿，無飢渴惱。若諸畜生道，一切畜生或有能聞是此香者，脫畜生苦，得智慧樂。

爾時諸生天罪衆，既得生是勝天宮已，緣承慈光攝受之故，便得覺悟，各各明了罪福因緣，與諸眷屬作天伎樂，來詣帝前。是諸衆等，各各含悲，俱發聲言，前後經千劫萬劫，不見三光，常處黑暗三惡道中，多受苦惱。伏蒙玉帝方便放光，愍救我等，皆生天上。是諸惡業，悉皆滅盡，無諸繫滯，

皆得往生。仰朝玉帝，各到道場。是諸生天一切罪衆，說是語已，稽首復位。

爾時玉帝出大妙音，普告十方諸天聖衆：汝等諦聽，此諸罪輩，曠劫以來，縱無明性，造十惡業，六塵徧染，三業縈纏，肆意任心，曾無覺悟。陰罪陽過，日積月深，背道違真，順邪棄正，舉心運念，動結愆尤。遂使命過之後，身落三塗，不得解脫。若非今日遇是法筵，何由出離？

爾時諸天化身玉帝，即以神通，不動其所，移接天人，皆令得至清微天宮玉清聖境元始會下，是諸衆等，不覺不知。是時天尊衆會，見是十方玉帝化身，普皆來集天尊會前，如無邊明鏡，照諸影像，互相容入。時諸大衆，稽首瞻仰。玉帝化身，聖中最尊，增長清信，益加志樂，心無退轉，起大堅固。時諸天人邇得生天，忽睹天尊，勝會道場，清淨第一，無爲功德之所莊嚴，踊躍歡喜，一時作禮，歎未曾有。

爾時十方諸化玉帝，俱復一體，從

法座起，北向長跪。天尊言曰：往昔去世，有國名號光嚴妙樂，其國王者名曰淨德。時王有后，名寶月光。其王無嗣，嘗因一日作是思惟，我今將老，而無太子，身或崩歿，社稷九廟，委付何人。作是念已，即便敕下，詔諸道衆於諸宮殿，依諸科教，懸諸幡蓋，清淨嚴潔，廣陳供養，六時行道，徧禱真聖。已經半載，不退初心。忽夜寶月光皇后夢太上道君與諸至真，金姿玉質，清淨之儔，駕五色龍輿，擁耀景旌，蔭明霞蓋。是時太上道君安坐龍輿，抱一嬰兒，身諸毛孔放百億光，照諸宮殿，作百寶色，幢節前導，浮空而來。是時皇后心生歡喜，恭敬接禮，長跪道前，白道君言：今王無嗣，願乞此子爲社稷主，伏願慈悲，哀愍聽許。

爾時道君答皇后言：願特賜汝。是時皇后禮謝道君，而乃收之。皇后收已，便從夢歸，覺而有孕。懷胎一年，于丙午歲正月九日午時誕于王宮。當生之時，身寶光燄，充滿王國，色相妙好，觀者無厭。幼而敏慧，長而慈

仁，于其國中所有庫藏、一切財寶，盡將散施窮乏困苦、鰥寡孤獨、無所依怙、飢饉癯殘一切衆生，仁愛和遜，歌謠有道，化及遐方，天下仰從，歸仁太子，父王加慶。當爾之後，王忽告崩，太子治政，俯念浮生，告敕大臣，嗣位有道，遂捨其國，於普明香巖山中修道，功成超度。過是劫已，歷八百劫，身常捨其國，爲羣生故，割愛學道。於此後經八百劫，行藥治病，拯救衆生，令其安樂。此劫盡已，又歷八百劫，廣行方便，啓諸道藏，演說靈章，恢宣正化，敷揚神功，助國救人，自幽及顯。過此已後，再歷八百劫，亡身殞命，行忍辱故，捨己血肉。如是修行三千二百劫，始證金仙，號曰清淨自然覺王如來，教諸菩薩，頓悟大乘正宗，漸入虛無妙道。如是修行，又經億劫，始證玉帝。說是語已，法筵清衆異口同聲，歎未曾有。

爾時衆中有一玉女，名曰夜光，從座而起，嚴整衣冠，從容雅步，長跪道前，白天尊言：臣宿昔何幸，仰侍御

前，親奉供養，已經億劫。三清境界，金闕玉京，寂淡逍遙，快樂自在，嬉遊聖域，餐聽法音，未嘗見此希有之事。不審向來光內所現十方諸天變現聖境，皆有玉帝應化法身，天真大聖、妙行真人、靈妃玉女以爲侍衛。是諸玉女相貌端嚴，形體姝妙，出衆妙香，無與等者。復蒙玉帝神通移接，今皆普集在清微天，未審今此玉女以何因緣，得證如是無上色身。恩惟聖慈，示以未悟。

爾時天尊謂夜光玉女言：汝固初入聖流，雖有智慧，未能明了。此諸玉女乃自往昔無量劫中，修諸妙行，具解脫門，同清淨信，同清淨解，同清淨念，同清淨行，同清淨身，同清淨心，同清淨意，同清淨果，同清淨報，同大慈心，同大悲心，覆護衆生，如母撫念，愛於赤子，奉戒專一，冥心大道，清齋弘誓，千萬劫中，尊奉玉帝。此諸玉女，非實是女，皆天至真，爲度羣生，現玉女身。是故身色、神通、智慧，隱顯變化，與帝同焉。

爾時夜光聞是說已，心得開悟，稽首歡喜，默然復位。爾時高虛清明天主與諸天眷屬，馭八景鸞輿，蔭九光寶蓋，奏玄歌妙樂，詠無量洞章，散天寶花，噴天真香，飛步遊空，來詣道前。承天尊玉帝威神之力，是諸寶花即於空中化一寶蓋，蔭覆大衆，無不周徧。是時高虛清明天主見此希有，稽首長跪，白天尊玉帝言：賤臣懈怠，後會法筵，今日吉慶，興此法橋，幽顯聖凡，普霑聖澤，放大光明，現希有相，上照諸天，四梵六慾一切樂土，諸真聖衆睹此光明，悉皆雲集，下照下方無極世界，同玄都境，近接九天，靈風奏樂，宮商相和，激朗雲庭，皆成洞章。一切衆生，咸臻道化，艷都鐵圍、長夜九幽、一切地獄受苦衆生，盡承光力，皆生諸天，得受快樂。今日所散天寶奇花，旋結成蓋，徧覆大衆，盡承斯光，威神之力，臣等千劫良因，九天運會，皇道蕩蕩，正法興隆，今日大吉，咸仰玄功。是時高虛清明天主以偈讚玉帝曰：

金闕玄穹主，高上玉皇尊，妙相冠

諸天，慈光燭三界。真聖妙道師，天人依仗師。大乘垂法語，真一指迷途。功德若虛空，讚揚無窮盡。

是穹蒼主，浩劫之尊，妙見妙知，無等無倫，湛寂真靜，杳亡杳存，上聖上靈，大神通、光明藏、大丈夫，開化人天，教道無窮，大慈大悲，流煥法輪，爲度羣生，是號玉皇。穹蒼真老，妙圓清淨，智慧辯才，至道至尊，開度衆生，故放是光。

爾時高虛清明天主說偈讚歎已，天尊普告四衆云：是帝身即道身也，非常體也。是無量功德之身，是清淨自然之身，是神明堅固不壞真空無上法身。威靈恢廓，名聲周徧，無幽不開，神奇堂堂，難可稱焉。是帝非有爲功德之所熏修，而帝昔雖下生人間，多劫行化，示大神通而身清淨，未嘗不在金闕，分身變化，應現隨方，利濟羣生，超昇道岸，普垂教法，開悟後人，依按奉行，登真成道。以斯功德之所壯嚴，是故光明常充諸天，神智妙達，莫可度量。是身光明，皆具妙號，所謂大神通

光、大慈悲光、大喜捨光、大忍辱光、大平等光、大柔和光、大自在光、大利益光、大如意光、大智慧光、大吉祥光、大解脫光、大歸依光、大功德光、大圓滿光、大無礙光、無能勝光。是故汝等欲見是帝，乃不可得者，緣以汝等尚於身口，不捨結習，煩惱行業，由是障故，不能得睹是帝慈顏。吾今爲汝時會衆等，宣示斷障之法，汝等大衆宜各奉行。時諸大衆不勝喜躍，各於至尊几前，稽首作禮，俱欲願聞。

天尊言曰：斷障之法，當生大悲，無起疑惑，無起貪嗔，無起淫慾，無起嫉妬，無起殺害，無起凡情，無起凡思，無起昏垢，無起聲色，無起是非，無起憎愛，無起分別，無起高慢，無起執著。凝神澄慮，萬神調伏，心若太虛，內外貞白，無所不容，無所不納。無令外邪亂其至道，牽失真宗，敗其靈根，盜其至寶，致爾萬劫永墮凡流，透入俗網，萬魔來攻，百千萬劫，不聞妙法，鬼神執誅，從生入死。是故汝等應當志心，善護真宗，無令喪失。如前所說如是

諸障，汝等各各當除斷之，身得清淨，超度諸難。是名道寶，持法棟梁。更當修奉是此經典，如近是帝，生尊重心，注想尊容，稱揚尊號，然後汝等得睹慈顏，咸蒙護度，普聞妙法，親奉供養，永無流轉。是時四衆聞已歡喜，歎未曾有。

高上玉皇本行集經卷上

高上玉皇本行集經卷中

太上天光明圓滿大神呪品第二

爾時天地始祖五老上帝，稽首長跪，白天尊言：伏聞高上玉皇慈念蒼生，普放神光，照燭法界，六凡四聖普叨道蔭。竊以凡夫短景，劫運將終，正道宜行，以濟兆民，使修真之子，有期輕舉，末代烝民，俱獲壽考。自昔《元始洞玄靈寶赤書玉篇真文》，生於元始之先，空洞之中，天地未根，日月未光，幽幽冥冥，無祖無宗，無氣無象，無色無名，無形無緒，無音無聲，混沌太無，靈文菴藹，乍存乍亡。一儀待之以分，太陽待之以明。靈圖革運，玄象推遷，乘機應會，於是存焉。玉帝授臣靈寶祕篆，大不可思議神呪，故天地得之而分判，三景得之而發光，靈文鬱秀，洞映上清，發乎始青之天，而色無定方，支勢曲折，不可尋詳。元始鍊之於洞陽之館，冶之於流火之庭，鮮其正文，

瑩發光芒，洞陽烝赤，故號赤書。靈圖既煥，萬帝朝真，飛空步虛，旋行上宮，燒香散花，口詠靈章。是時天降十二

玄瑞，地發二十四應，上慶九天之靈奧，讚三天之寶明，神風既鼓，皇道咸暢。元始登命，太真按筆，玉妃拂筵，鑄金爲簡，刻書玉篇，五老掌錄，祕於九天靈都之館。玉女典香，太華執巾，玉童侍衛，玉陛朝軒，九天上書，非鬼神所聞。故天寶之以致浮，地祕之以致安，五帝掌之以得鎮，三光乘之以高明，上聖奉之以致神，高尊賞之以致真，五嶽從之以得靈，天子得之以致治，國祚享之以太平。實靈文之妙德，乃天地之玄根。威靈恢廓，普加無窮，蕩蕩大化，爲神明之宗。其量莫測，巍巍乎太空，明真有格，今當以行。是時元始革運，玄象開圖，靈文鬱秀，神表五方，分判天地，開化萬靈。此太宗之業，可得暫披於靈輶乎？今皇道敷暢，澤被十方，仰觀劫運，真風宜行。臣私心實欲使雲蔭八遐，風灑蘭林，寒條仰希華陽之繁，朽骸蒙受靈澳之津。仰

對元慈，下伸丹懇，惟願哀憫俯念蒼生，不審《靈寶玉篇真文》可得見授，下教於未聞者乎？

於是元始天尊撫几高抗，凝真遐想，觀時已至，普謂時會一切真聖，論定陰陽，推數劫會，移較河源，檢錄天度，選擇種人，指拈太無，嘯朗九玄，念無開聽於陳辭，有若閉礙求真之路。

是時五老上帝啓問不已，良久，元始天尊乃垂眄皆之容，慨爾歎曰：微乎深哉！子今所叩，豈不遠乎。此元始靈寶之玄根，空洞自然之真文，生天立地，開化神明，施鎮五嶽，安國康民。靈寶玄妙，爲萬物之尊，天發玄瑞，靈應自然。今三天盤運，六天道行，雜法開化，當有三萬六千種道以擇來者之心。此法運訖，三龍之後，庚子之年，雜氣普消，諸天慶會，吾真道乃行。今且可相付，當錄於上館，未得行於下世。玄科有禁，不得便傳。子可詣靈都紫微上宮，聽天音於金格，取俯仰於神王，然後當使得備天文，以總御元始之天也。

於是五老上帝與諸真聖，清香執戒，徘徊雲路，嘯命十天，上詣上清太

玄玉都寒靈丹殿紫微上宮，受俯仰之格，乃知天真貴重，難可即聞。還乃更詣元始道前，謚以禁戒之儀，遜謝不逮。是時天尊慈顏愍喻，靈關廓開，登命五老上帝開洞陽之館，披九光八色之韞、雲錦之囊，出《元始靈寶赤書玉篇真文》，金書玉篆，微妙祕密，運御乾坤大光明圓滿大神呪玉章，以付五老上帝及諸真聖，使依玄科，按法以傳。

是時東方安寶華林青靈始老蒼帝所受神呪誥命：

東方九炁，始皇青天，碧霞鬱壘，中有老人，總校圖籙，攝炁舉仙。

二十四字青帝祕文，書于九天元臺，主召九天上帝，校神仙圖籙。

歲星輔肝，角亢鎮真。氏房心尾，四景迴旋。箕主七辰，正斗明輪。承炁捕非，掃除灾羣。

三十二字祕文，書于紫微宮東華殿，主召星官，正天分度。

東山神呪，攝召九天。赤書符命，制會

艷山。束魔送鬼，所誅無蠲。悉詣木宮，敢有稽延。

三十二字祕文，書于東華玄靈之館，主攝鬼魔，正九天炁。

下制東河，溟海水神，大劫洪灾，蛟龍負身。水府開道，通徑百千。上帝赤文，風火無間。

三十二字祕文，書于九天東北玉闕丹臺，主攝東海水帝，大劫洪灾，召蛟龍及水神事。此《東方九炁靈寶玉篇真文》合一百二十字。皆太上无上大光明圓滿大神呪空洞自然之書，一名《生神保真洞玄章》，一名《東山神呪》，一名《青帝八威策文》。

右玉皇誥命，以錫東方安寶華林青靈始老蒼帝九炁天君，令統御東方諸天諸地、日月星宿、名山靈洞、水府泉宮上聖高尊、真仙聖衆、一切威靈，符命所臨，如誥奉行。

南方梵寶昌陽丹靈真老赤帝所受神呪誥命：

南方丹天，赤帝玉堂。中有大神，號曰赤皇。上炎流煙，三炁勃光。神仙受

命，應會太陽。

三十二字赤帝祕文，書于九天洞陽之館，主召九天神仙，圖籙金名。

熒惑輔心，井鬼守房。柳星張翼，抗禦四鄉。軫總七宿，迴轉天常。召運促會，正道驛行。

三十二字祕文，書于三炁丹臺，題于西南正陽，主召星官，明度數，正天分。

赤文命靈，北攝艷山。束送魔宗，斬滅邪根。符教所討，明列罪原。南山神呪，威伏八方。羣妖滅爽，萬試摧亡。四十字祕文，書于西南陽正玉闕，主制北艷，正鬼炁。

南河水帝，太伯龍王。神呪流行，普掃不祥。洪水飛灾，上召蛟龍。開除水徑，千道萬通。敢有干試，攝送火宮。赤書所告，莫有不從。

四十八字祕文，書于西南陽正西闕，主攝南海水帝，大運交期，洪水四出，召蛟龍及水神事。此《南方三炁靈寶玉篇真文》，合一百五十二字。皆太上无上大光明圓滿大神呪空洞

自然之書，一名《南雲通天寶靈經》，一名《九天无上之上呪》，一名《赤帝八威策文》。

右玉皇誥命，以錫南方梵寶昌陽丹靈真老赤帝三炁天君，令統御南方諸天諸地、日月星宿、名山靈洞、水府泉宮上聖高尊、真仙聖衆、一切威靈，符命所臨，如誥奉行。

中央寶劫洞清玉寶元靈元老黃帝所受神呪誥命：

中央總靈，黃上天元。始生五老，中皇高尊。攝炁監真，總領羣仙。典錄玄圖，宿簡玉文。催運上炁，普告萬神。

四十字黃帝祕文，書于太玄玉寶玄臺，主召神仙，玉簡宿名，總歸仙炁。

鎮星輔脾，迴度北元。魁魎主非，截邪斬根。魍魎魍魎，掃穢除氛。魍正玄斗，明度天關。九天符命，金馬驛傳。

四十字祕文，書于玄都玉臺，主攝星官，正天度數。

敕攝北帝，遏塞鬼門，翦除不祥，莫有當前。

十六字祕文，書于玄都玉臺，主攝北

帝，正天氣，檢鬼精。

中山神呪，召龍上雲，制會黃河，九水河源。不得怠縱，善惡悉分。千妖萬姦，上對帝君。敢有干試，太陽激憤。赤書玉字，宣告普聞。

四十八字祕文，書于玄都玉臺四壁，以攝中海水帝四泉之水、洪水涌溢之數，主召水神，止蛟龍事。此《中央一炁靈寶玉篇真文》，合一百四十四字。皆太上无上大光明圓滿大神呪空洞自然之書，一名《寶劫洞清九天靈書》，一名《黃天大神呪》，一名《黃帝八威策文》。

右玉皇誥命，以錫中央寶劫洞清玉寶元靈元老黃帝一炁天君，令統御中央皇天后土、日月星宿、名山靈洞、水府泉宮上聖高尊、真仙聖衆、一切威靈，符命所臨，如誥奉行。

西方七寶金門皓靈皇老白帝所受神呪誥命：

西方素天，白帝七門。金靈皓映，太華流氛。白石峨峨，七炁氤氳。上有始生，皇老大神。總領肺炁，主校九天。

檢定圖錄，制召上仙。

四十八字白帝祕文，書于九天素靈宮北軒之上，主召仙炁，舉仙道也。太白檢肺，奎婁守魂。胃昂畢觜，主制七關。參總斗魁，受符北元。

二十四字祕文，書于金闕玄窗，主攝白帝星官，正明天度。赤書玉字，九天正文。攝召萬炁，普歸帝君。

十六字祕文，書于九天金闕三圖之館，以攝六天鬼炁。西山神呪，八威七傳。符水上龍，召山送雲。在所校錄，同到帝門。輔衛上真，斬滅邪源。若有不祥，截以金關。赤書符命，風火驛傳。

四十八字祕文，書于九天金闕三圖之館，主攝西海水帝，制水中萬怪，惡毒之精，召雲龍，以防水旱之灾也。此《西方七炁靈寶玉篇真文》，合一百三十六字。皆太上无上光明圓滿大神呪空洞自然之書，一名《金真寶明洞微篇》，一名《西山神呪》，一名《白帝八威召龍文》。

右玉皇誥命，以錫西方七寶金門，皓靈皇老白帝七炁天君，令統御西方諸天諸地、日月星宿、名山靈洞、水府泉宮上聖高尊、真仙聖衆、一切威靈，符命所臨，如誥奉行。

北方洞陰朔單鬱絕五靈元老黑帝所受神呪誥命：

北方玄天，五炁徘徊。中有黑帝，雙皇太微。總領符命，仙鍊八威。青裙羽襪，龍文鳳衣。上帝所舉，制到玉階。

四十字黑帝祕文，書于鬱單無量元紫微臺北軒之內，主召諸真人神仙圖錄。

北辰輔腎，斗牛衛扉。女虛危室，豁落四開。壁總七星，執凶糾非。却灾掃穢，明道動輝。

三十二字祕文，書于天心北元玄斗中，主攝北方星官，正天炁也。

北山神呪，激陽起雷。流鈴煥落，獲天鎮威。北酆所部，萬妖滅摧。

二十四字祕文，書于北方洞陰朔單鬱絕元臺，主攝天魔北帝，制伏惡神萬鬼事。

九河傾訖，鳥母羣飛，蛟龍通道，水陌洞開。赤文玉書，驛龍風馳。

二十四字祕文，書于洞陰朔單鬱絕元臺，以攝北海水帝，制水中萬精，主召蛟龍，興雲致雨以負身。此《北方五炁靈寶玉篇真文》，合一百二十字。皆太上无上大光明圓滿大神呪，空洞自然之書，一名《本命紫微元神生真寶明文》。一名《北山神呪》，一名《黑帝八威制天文》。

右玉皇誥命，以錫北方洞陰朔單鬱絕五靈元老黑帝五炁天君，令統御北方諸天諸地、日月星宿、名山靈洞、水府泉宮上聖高尊、真仙聖衆、一切威靈，符命所臨，如誥奉行。

道言：是大神呪者，元始之妙言，玉皇之真誥，上清自然之靈書，九天始生之玄札，空洞之靈章，上聖之祕語，玉晨之尊典，成天立地，開張萬真，安神鎮靈，成生兆民，匡御運度，保天長存。上制天機，中檢五靈，下策地祇，嘯命河源，運役陰陽，召神使仙。此至真之妙文，神應自然，致天高澄，令地

固安，保鎮五嶽，萬品存焉。玉帝昔授五老上帝，是時五老跪捧其章，祕題靈都之館，天真皇人昔書其文，掌之於上，清真境太玄玉都寒靈丹殿紫微上宮，累經劫運，而其文保固天根，無有毀淪，與運推遷。是大神呪混之不濁，穢之愈清，毀之不滅，滅之極明。大有之文，天真所尊，自光真名，帝圖刻簡，昭示來生。斯文隱祕，不得窺聞，有得之子，保萬炁長存，勤行修奉，克致神仙。

玉皇功德品第三

爾時玉虛上帝白天尊言：惟願慈悲，願爲四衆帝釋等，及四梵天王、一切諸天、一切諸仙，及未來一切衆生，是經人，說利益事。

爾時天尊告玉虛上帝言：快哉斯問，不亦善乎。汝以慈悲，愍念衆生，故請問於我。天尊言曰：若有三界十方無量國土，及國王大臣，或兵戈並起，疫氣大行，水旱蟲蝗、凶灾飢饉，是其國君、后妃、太子、宰輔、大臣，當發

慈悲，爲其黎庶，徧救國內州縣鎮宰，令諸道流清淨嚴潔于其觀內，設大齋醮，六時行道，爲轉此經，當得國土清平，五穀豐熟，黎庶安泰。若復有人，入諸山林，遇毒惡獸，但能存想，一念真經，山神衛護，猛獸自退，終不害己。若入江入海，採寶求珍，值遇惡風，如法持念是此真經，風浪頓止，安穩達岸。若在軍陣，戈戟既接，兩刃相交，存心默念是此真經，是諸惡賊悉自退散。若在牢獄，枷鎖之中，淨心定慮，存念真經，冤枉自伸，即得解脫。若爲邪精鬼賊衆苦所加，如法持念是此真經，衆邪遠避，自然除愈。若人爲求嗣息，如法尊重，持念此經，帝敕天曹明檢丹籍，九品之內，四果仙人，運應數合，謫降下生，爲其作子，才辯明慧，人中尊貴。若婦人臨難之月，如法持念是此真經，即得母子平安，生福德男女，人所愛敬。若爲求官進職，爵祿亨達，貴遇人君，如法持念是此真經，即得職務遷轉，子孫榮貴，世世不絕。若人欲求資財殷富，如法奉持是此真經，

即得財寶充溢，衣食自然，慶流子孫，傳之萬世。若人被諸惡星之所照臨，困苦牀枕，如法持念是此真經，是諸惡星，返降吉祥。若人命過，應入地獄，注名惡籍，父母師長、夫妻男女，當爲亡人持念真經，或安置道場，齋花供養，即得亡者鬼籍盡除，神生淨土，同苦罪衆，咸蒙護度，承斯勝利，皆生天上。又此經所在之處，常有十天至真大聖、無極飛天神王侍衛供養。持是經人，當得自稱爲正一真人。是人在處，自得十方至真至聖、金剛力士潛護其人，如護己身。若出若入，遊行之處，百邪避路，魔鬼殄除，精靈伏藏，一切灾殃，不能侵近。是持經人，命欲終時，更不見諸地獄惡相，即見天宮一切玉女持幢下迎，而生天上。如天福盡，下生人間，即得千生、萬生中常爲國王、大臣、聖賢慶會，國土清平，人民樂業，常得宿性通明，遵奉大道，展轉修持，至登道岸。是持經人，獲福如是。又若有持是經人，若雨下時起大悲心，如法向空，念此經三卷一徧，其雨所

霑，面所向方，一切衆生、五逆十惡、一切重罪，悉皆消滅；一切重病，使得痊愈。是諸衆生，命終之後，不墮地獄，神生淨土，蓮花化生，何況持是經者。又若有持是經人，若行於道路，值大風起吹，是持經之人觸身之塵，是塵所霑，一切衆生一切惡業悉皆滅盡，更不墮三惡道，當生天上。故知持經功德，不可思議。是持經人，若在江在河，在海沐浴其身，是水所霑，其中衆生，魚鼈龜鼉、一切水族，是諸衆罪，悉得除滅。盡此一報之身，命過之後，更不受胎卵濕化一切等身。是持經人，口出一切語言，或善或惡，一切天魔外道聞者，皆是清淨法音。是持經人，若遇諸神廟，能爲其神誦詠是經，是諸鬼神得聞是經，即脫鬼趣，登真仙道，恭敬是人，如奉是帝。若人在世，不孝父母，不敬三寶，殺生偷盜，邪淫妄語，作種種極重罪業，將命終時，若有道心正信衆生，于其亡者未氣斷時，起大悲心，于其頭邊念帝尊號，或一七、二七、三七、四七，乃至百徧、千徧，是其亡者生

前所造諸不善業，悉得消滅，更不墮諸惡趣，神昇九天，何況受持是此經者。又若復有人，自從往劫，乃至今身，輪轉人天，漂沈世域，積千愆萬過在於己身，若遇是持經人影暫映其身，如爲帝光之所攝受，或與同語，或聞其聲，如奉帝言，道語之所慰諭，彼人罪障，永得除滅。又若持是經人，造作長旛，書帝名號于其旛上，懸諸長竿，或在觀宇，或在家庭，是旛被諸風吹，所持方面，一切衆生，皆霑勝利，一切惡業，悉得除滅。又若有持是經人，書帝名號在一切有聲物上，或鐘或磬、鈴鐸鏡鈸，一切道具法事之屬，或以道場，或以戲擊，或被風觸，是聲出時，或遠或近，一切衆生，聞是聲已，所有罪障，悉得清淨。又若有持是經人，了悟生死，深入山林，修真學道，或時登臨，上山顧望，目所及處，山林溪谷，含生品類，有形無形，胎卵濕化，動植飛潛，種種諸類，所有罪業，永得除滅，身心清淨，命終生天，何況受持是此經者。當知是人即是道藏，功德身也。

爾時天尊謂玉虛上帝言：今我略說，未盡其妙。若廣說之，凡流邪見，疑惑不信。是經功德，窮劫難言。爾時玉虛上帝聞是說已，心生歡喜，不勝踊躍，瞻仰慈顏，稽首讚歎，而作頌曰：

九天之上，謂之大羅，玉京金闕，雲層峨峨。中有天帝，仁慈惠和。至道無敵，降伏衆魔。天寶靈符，玉律金科，神仙億萬，幢旛衆多。聞者罪滅，永出愛河。是號玉皇，穹蒼真老，妙圓清淨，智慧辯才，至道至尊，三界師，混元祖，無能勝主，四生慈父，高天上聖，大慈仁者，十號圓滿，萬德周身。無量度人，拔生死苦。

爾時玉虛上帝說是頌及十號已，是諸天衆，異口同音，歎未曾有。

高上玉皇本行集經卷中

高上玉皇本行集經卷下

天真護持品第四

爾時昊天上帝聞說經法，從座而起，長跪帝前，白言玉帝，願爲大衆及諸人天持是經人，說利益事。

爾時玉皇尊帝興方便意，開利益門，宣玉匱科，傳靈寶法，告於昊天上帝言：汝今諦聽，當爲汝說受持功德，扶危拔苦，利益存亡，神妙之事。衆真稽首，俱發聲言：弟子等，今日幸聞湛然常住之法，莫不上福三界諸天，下消三塗毒害。惟願慈悲，愍臣等故，演斯妙義。

玉帝告曰：若有衆生，孝養父母，恭敬三寶，竭忠於君，不殺不盜，不淫不妬，不嗔不恨，不驕不詐，奉戒持齋，冥心大道，生尊重心，持誦是經，我即敕下周流沙界，徧傳十方無極世界。我敕東方東華帝君青騎神仙兵馬，無鞅數衆，悉令下降，覆護受持是此經

者。我敕東南扶桑大帝與其部衆神仙兵馬，無鞅數衆，悉令下降，覆護受持是此經者。我敕南方朱陵大帝赤騎、神仙兵馬，無鞅數衆，悉令下降，覆護受持是此經者。我敕西南太華元老與其部衆神仙兵馬，無鞅數衆，悉令下降，覆護受持是此經者。我敕西方皓靈皇老白騎神仙兵馬，無鞅數衆，悉令下降，覆護受持是此經者。我敕西北皇天上帝與其部衆神仙兵馬，無鞅數衆，悉令下降，覆護受持是此經者。我敕北方紫微帝君黑騎神仙兵馬，無鞅數衆，悉令下降，覆護受持是此經者。我敕東北沖虛天君與其部衆神仙兵馬，無鞅數衆，悉令下降，覆護受持是此經者。我敕中央天皇帝、崑崙蒼老黃騎神仙兵馬，無鞅數衆，悉令下降，覆護受持是此經者。我敕上方來和天君、名山大洞神仙兵馬，無鞅數衆，悉令下降，覆護受持是此經者。我敕下方一切金仙、四衆八部及諸眷屬，悉令下降，覆護受持是此經者。我敕十方飛天神王、飛天大神、三官四聖、

二曜九星、北斗南斗、東西中斗、二十八宿周天衆星、金剛力士、神王等衆，各與部衆，悉令下降，覆護受持是此經者。我敕降魔力士、四天門王、五嶽四瀆及餘諸山、四海九江、十二河源、山林川澤一切主者，令與眷屬，覆護受持是此經者。諸險惡處，令得安穩。我敕所在一切土地靈官並溝渠等一切諸大力鬼王，皆令覆護受持是此經者。令衆魔外道，悉皆懾伏，潛形遁迹，高飛海外，遠避他方，如是山林社稷廊廟血食之賓、一切鬼神，當自消滅；五方行病瘟疫鬼帥、諸惡鬼神并風王水怪、孽龍妖神、土精木魅，盡自消滅；五虛六耗、夢寐乖常、野道呪詛蠱毒之類，皆自消滅。心欲願者，一切如意，皆得滿足。是持經人，或不依科教，未能修齋，未具淨戒，以能信受尊重，景慕是此經典，並同修齋、護淨戒者。是人功德，坦然無礙，自在逍遙，號人中聖，德惠長新，同諸真人。

爾時昊天上帝聞是說已，即於帝前乃爲歌曰：

大哉至道，無形無名。渺渺億劫，黃道開清。神清朗耀，九魂吐精。玉虛澄輝，太霞高明。玉皇開化，溥度天人。三元道養，二象攝生。朽樹故根，已枯復榮。蠢動蛭息，長生化形。懷胎含孕，俱得生成。亡者命過，魂歸三清，魄受鍊度，南宮飛昇。今日大吉，皆得光明。五帝鑒映，普告萬靈。天神地祇，及諸河源。五嶽四瀆，及諸名山。洞玄洞虛，洞空洞仙。無極大聖，至真尊神。無窮無極，普監度生。惡根斷絕，玄都記名。衆真班列，咸聽帝言。經是帝敕，保誦持人。至度道岸，無使災侵。我奉帝命，一切咸聽。

爾時昊天上帝說是歌已，告大衆言：此玉皇妙法語，諸聖祕密言，路絕道斷，微妙難思，巍巍大範，爲神明之宗，保鎮國土，拔度生死。

爾時昊天上帝說是語時，法筵清衆，咸仰道言，溥得開悟。于是天尊而說偈曰：

玉帝功德大，玄理極幽深。生於浩劫前，運化於古今。我今說妙經，愍

念諸有情。此誠極妙法，功德中功德。名號最上乘，無比爲第一。大光明王尊，威德聖希有。能破暴惡魔，皆令心降伏；能滅極重罪，皆令得清淨。若人聞是經，或聞是帝名，稽首生恭敬，一切罪消滅。十惡四重罪，五逆害父母，信心一稱名，隨聲盡消滅。保護人天衆，四相與五衰。三塗極重苦，人間見厄難。凶年飢饉喪，毒藥及厭魅，刑獄與冤家，軍陣鬪戰苦，山林惡道中，虎豹豺狼等，江海毒龍類，迅雷風雨雹，水火及盜賊，蠱毒所中心，失志發狂亂，蛇蝎毒惡蟲，邪魔凶怪神，伺求人便者，由持是真經，普皆自散滅。惡病久沈綿，夢寐亦不安，非理欲殘命，殄滅不爲殃。緣遇是經故，安穩得自在。所有希求願，財寶及富貴，以此經功德，如意皆稱遂。神威自在仙，衆德十一曜，三十二天主，二十八宿王，靈妃玉女等，天神及地祇，三界虛空神，江海諸龍王，水火及風神，宮殿與宅舍，山林樹木衆，溝渠井泉神，由持是經故，一切皆擁護。衣食常自然，子孫

居富貴。出言人希聞，所至皆恭敬。若爲求男女，持誦此真經，帝詔下天曹，落籍天仙人，謫降生其家，爲其作男女。顯貴人崇重，七祖盡昇仙。光大慶其門，延及父母親。吉祥常熾盛，灾障不能侵。是故我今說，大衆宜諦聽。慈悲度一切，皆令達上清。

于是天尊普告四衆：凡人持念此經，受持帝號，皆道根深重，宿有善緣。此經尊妙，普度天人。但精心恭奉，家國安寧，保命度灾，掃諸不祥。天子王侯得奉之者，致國太平，凶寇自夷，邊域不爭。兆民歌唱，普天興隆。運推數周，正道當行。有得之者，天真妙重，祕之祕之。

報應神驗品第五

爾時慈悲度厄真人、尋聲救苦真人、濟生度死真人、萬福護身真人，俱從座起，越班而出，俱白天尊言：若諸世末凡夫，雖宿有善緣，得遇是經，被諸邪障之汙，本末疑惑，不信是經功

德。如是之人，見在過去，於諸地獄得何罪報？惟願聖慈，說其報應惡趣之苦。

是時天尊謂四真人云：若諸世間，剛強暴惡不善衆生，終日竟夜，對諸道像，無恭敬心，出誹謗語，是罪當墮五無間獄。若得值遇是持經人，設諸方便，誘引勸諭，如是之人，暫滅惡心，信向是經，彼人罪業淨盡無餘。又有邪見愚執惡人，睹持是經，生諸惡逆，偏眼邪視，乃至起一惡心，發一惡言，謗讟如是持經之人，其罪過是，命終之後，墮大地獄，永無出期，何況世間衆生，得遇是經，不生敬仰，穢手汗觸，葷口讀誦，牀榻不淨，便將安置，或讀是經，講習俗語，共同戲笑，以爲常典。如是之人，命過之後，墮無間獄，永無出期，殃緣九祖，受拷酈都；累及後世，害纏子孫。是人于地獄中，歷無量劫，受大苦惱，遇無邊聖，累承救拔，罪惡小減。又遇聖人救拔得出，生餓鬼中，歷千萬劫，不聞漿水之名。鬼報得出，生畜生中。畜生報出，若生人

中，更生邊夷外道，而復女身，貧寒困苦，癯殘百病，受無量苦，人所棄擲，求生不得，求死不得。輕斯經故，獲罪如是。又若復有人，初雖信受，後復慢易，善惡童子上奏三官，黑簿添名，青編減筭，身歿之後，拘閉幽牢，往復三塗，無由解脫。或於見世受種種病，疥癩癰疽，以爲果報，憂悲苦惱，日夜相煎，而身或被橫惡所加；或牢獄繫鎖，非分自害，誤食毒藥；或被虎狼毒蛇之所噉食，或爲冤家之所讎對；或行山林，值遇惡人，被他屠割，推落崖岸；或被邪精魍魎之所殘害，或值水火之所焚漂，或被刀兵之所橫誅。輕斯經故，橫喪天年，獲如是果，獲如是報。可不悲歎，可不痛歎。故報汝等，依此奉行，勿生邪念。若諸念不生，萬緣頓息，塵沙惡業隨心消散；一切災魔，自然殄滅。此經功德，不可思議。是誠無比最上妙法、諸經之王，有大利益。非人勿示。若諸天人、五衰四相，輪迴侵逼，能捨除妄想，受持是經，坐招自然，天福益固，身度三界，與道長

存。是此經典，無與等、無能勝。是大威德大神呪，能令一切枯槁便生枝葉，花果茂盛，能除衆生極重苦惱，能令短命衆生而得長壽。此經功德，不可思議，歎莫能盡。若不宿植道本，廣種福業，乃至經名尚不得聞，何況得見是經？蓋是經依三洞真格，八萬劫一傳，此清都至真上聖所寶，祕於玉京金闕宸宮，甚爲微妙，難可得遇。如宿有仙骨，當爲九天真仙之人，得遇斯文，承斯緣故，後當齎金寶，從師告盟受之，方當承機應運，乃可付焉。不得輕泄，敬之慎之。

於是天尊重宣此義，爲說偈曰：
設使江河水，波浪能生蓮，慈烏毛能白，如經故難遇。設使龜生毛，堪採爲衣服，夜月能消冰，如經故難遇。設使蚊蠓足，堪構爲舟橋，能載一切重，如經故難遇。設使黃口雀，能銜諸大山，擲之他方界，如經故難遇。設使一葉舟，力能載崑崙，浮渡於大海，如經故難遇。設使諸水蛭，口能生巨齒，其大如象牙，如經故難遇。設使蓬蒿葉，

能覆無鞅界，蔭芘無鞅衆，如經故難遇。設使烏梟類，同樹一巢棲，銜食共相飼，如經故難遇。設使兔生角，堪用爲梯磴，上窮有頂天，如經故難遇。設使鼯鼠等，緣於兔角梯，至天能食月，如經故難遇。設使驢顏唇，色如蘋婆果，復能作歌舞，如經故難遇。設使蠅蟲等，能飲鐘石酒，迷荒而沈醉，如經故難遇。

爾時天尊宣說偈已，普告四衆：是故持是經人，名功德身，一切有情，被其蔭故。持是經人，名神通身，一切吉祥，咸臻集故。持是經人，名清淨身，是諸惡業，不能侵故。持是經人，名威德身，天魔異道，不能攝故。持是經人，名無等身，上帝謠唱，萬神敬故。持是經人，名堅固身，惡劫大難，不能損故。持是經人，名道藏身，口出語言，鬼神仰故。持是經人，名慈悲身，六道衆生，賴其善故。持是經人，名大道身，出入所在，無怖畏故。持是經人，名良醫身，善行妙法，安樂人故。持是經人，名光明身，常爲帝光，所攝

受故。持是經人，名自在身，天宮妙境，神能遊故。持經功德，說不可盡。又若道士至人，能結壇誦經，著新淨衣，於夜半後，闐寂獨處清淨室中，叩齒九通，東向端坐，誦詠是經。於是時也，太真御几，玉妃拂筵，萬神班列，諸天臨軒，三界侍衛，五帝司迎。然後閉目靜思，存想是經，不覺身處五雲之內，俄見其身光明赫奕，上昇天宮，衆真下迎，心有所請，一切應奉；仙丹妙寶，隨意自得。故當依科閉心，奉行此經，乃至三世金仙、十方大聖，皆從此經依按修奉，故頓得超證無上妙道。是此帝也，諸佛之師，衆聖之王。是故凡夫值遇是經，致以五帝輔翼，召使神仙，御役神宮，運導陰陽，千真敬仰，萬神懾伏，百邪避路，羣魔束形，命過之後，即得南宮受鍊，飛步上清，逍遙自在，與道長存。又設復世間衆生，曾聞是經，心常渴仰，能於家中擇清淨處，畫帝尊像，日夜虔虔，晨昏濟濟，香花燈果，尊重供養，稱名瞻禮，是人當得三十種上妙功德：

一者諸仙讚重，二者先亡生天，三者宿殃解脫，四者所往通達，五者無盜賊事，六者所求遂心，七者除水火厄，八者橫事潛消，九者夜夢吉祥，十者疾病不臨，十一者智慧聰明，十二者人見歡喜，十三者衣食豐盛，十四者子孫榮貴，十五者六親見喜，十六者門族和睦，十七者除三惡報，十八者轉女成男，十九者形容端嚴，二十者爲國大臣，二十一者生爲帝王，二十二者鬼神欽仰，二十三得宿命通，二十四者諸神護念，二十五者九族受蔭，二十六者處世長年，二十七者有情賴善，二十八者魔王保迎，二十九者決超三界，三十者白日上昇。

爾時天尊復告四衆：此經功德，能碎鐵圍諸山，竭苦海水，破大地獄，拔重罪苦，降暴惡魔，護諸國土，能滅一切惡鬼，能除一切重病，能解一切惡毒，能離一切惡人，能伏一切毒獸，能摧一切邪道，一切諸天，皆令降伏。其餘功德，說不可盡。

爾時道場大衆、金仙菩薩、真聖眷

屬聞是說已，歡喜踊躍，稽首敬禮，而作頌曰：

大哉至道，無宗上真。上度諸天，下濟幽魂。上無師祖，惟道爲身。丹臺紫府，金闕玉京，祕此妙法，溥福含靈。滅我萬罪，增我遐齡。萬神朝禮，魔王保迎。功德昌盛，黃籙書名。渺渺億劫，使我長存。

於是衆等說是頌畢，稽首皈依，奉辭而退。

高上玉皇本行集經卷下

(丁培仁點校)

089 高上玉皇本行集經

張良校釋本

經名：高上玉皇本行集經。原題天樞上相張良校正，係《玉皇經》之校釋本。校釋者疑為宋代道士。三卷。底本出處：《正統道藏》洞真部本文類。

三天門下校經詔文

門下湛寂常道，信擬議之至難；恢漠神通，豈形容之可盡。凡寓讚揚之語，庸昭誘導之門。諒一時聞聽之差殊，致諸仙流傳之舛異。矧經世歷年之甚久，故誦言作字之弗真。曷嫌魚魯之成曾，奚怪烏焉之為馬。不有謾證，寧免乖訛。肆申命於文臣，俾稽詳於聖典。天樞上相張良，宿專儒業，今領樞司。既命壇演化於南洲，已出

書度人於下界。宜職討論之任，倍隆參校之功，副人世之誦持，示天書之蘊奧。悉令誤戾，咸至完全。於戲，道本心傳，妙悟實由於言外；義因言顯，進修當自於經中。可倍加審訂之思，使無愧編修之寄。并述參求之路，誕彰造入之階。庶真徒即此以求玄，俾善士由茲而得道，反其澆薄，還此清淳。俟畢奏陳，當憑頒下。故茲詔諭，切可遵承。

右奉三清敕，如前敕至準敕，故牒。

年 月 日 下

林 少 華 受

蒼 汝 嘉 付

三 天 大 丞 相

天樞上相辭表并所降請辭之意

臣良上言：昨恭準睿旨，委臣良參詳審訂《玉皇尊經》者。臣良恭聞道妙難言，豈在言語敷宣之悉；經昭垂教，要先教彰演述之詳。是理孔明，在人皆喻。第念格言之當理，無得而踰。矧夫凡世之素承，久則難變。儻妄有

一言之更革，則不免萬姓之持疑。宜不易於舊章，庶弗生於他議。且恨庸才之孱暗，難於聖典以參詳。敢干鼎鑊之誅，上布肝腸之懇。臣良誠惶誠恐，稽首頓首。重念臣良塵區微類，濁世賤臣。幸憑師匠之陶鎔，獲遂仙曹之升擢。謬以疏愚之質，輒司樞要之權。夙夜以思，情誠交懼。惟欲勉效於駑鈍，求以苟逃於罪辜。豈意睿慈特頒明詔，綸言溫穆，煥如春日之和；玄旨雍容，豈類秋霜之凜。挈校經之重任，俾效拙於祕詮。顧此昏庸，孰堪任使？況聖語曲盡於至理，而真經久瀆於凡心。時若卒更，民焉盡信？深懼無知之愚俗，反萌不信之凡心，或侮祕文，將貽巨譴。非但賤質有失職之誚，弗免寶文為覆瓿之羞。論至於斯，事有可議。臣愚欲望天光燭暗，睿鑒知潛，體察下誠，特蠲重任，或乞更命英哲，掄擇巨能，畀之討論，庶無擬議。臣良祇膺玉旨，敢布狂言，實非上拂於眷隆，率以悉傾於意願，罪當萬死。恩望三清切巧，斷自宸衷，播告中外，誓當

勉揚臣職，仰答寵光。臣良干冒天威，下情無任悚慄戰懼之至。稽首頓首，謹具表奏聞，伏候敕旨。謹奏。

年 月 日 臣 良 上表

三清再詔

所奏備悉。卿學貫百家，道班列聖，已領度人之職，久專出書之權。眷彼南洲之民，素佩名理之誨。顧《本行集經》適有於舛雜，視下方黎庶各抱於迷疑。肆議選掄，特俾詳校。宜祇膺於前詔，再恭奉於茲言。毋忽謙辭，仰副責任。故再詔諭，切可欽承。

天樞上相發明誦持大義并述校經之意

琅函積阜，無非妙義之存；寶蘊儲沙，莫匪玄機之寓。皆上聖憂人之切，故祕言垂世之多。雖千編萬軸，不勝其繁，然隻字片言，即蘊厥要。苟解提綱而振領，自然掘土而得金。如或見味粗精，識迷微妙，不啻隔紗而視日，奚殊認鹿以爲牛。直饒辛苦百年，

勤勞一世，竟未達穹玄之要妙，豈能知混浩之機關？要須心外攝心，眼中著眼，咀味至真之實，忖惟太妙之根，用能勘破玄中之玄，卓領寂中之寂。是謂嚼得龍肝鳳髓，脫茲俗質凡軀，自然昇入無形，頓超有漏，神飛金闕，優游彌羅之天，體合玉京，左右穹蒼之主。恭惟《玉皇本行經》者，至真真體，上聖聖機，寓真一之妙於紀述之餘，示解脫之門於讚揚之際。辭意互攝，理事交參。言中包蓄於真玄，更無隱奧；語內鋪舒於微妙，蔑有緘藏。味之者神洽太和，誦之者心離諸漏。神功妙用，廣博難量；沖義靈機，包羅無外。第以衆生障重，凡類識迷，言上求言，不貫爲言之脈絡；字間究字，不參訂字之根苗。徒求本行之始終，豈悟至言之紀極。遂至謾貪果報，祇求立效之爲神；獨畏憲章，昧謂鮮殃之得徵。聖典固彰於異迹，玄言本寓於真機。曷容即粗以捨精，宜勿著羸而離妙。然後脗合天尊之本旨，默符玉帝之宸衷。進趣修行，頓遠濁惡之世；昇騰

超證，高陪清淨之儔。斯可造清微天，登光明殿，不勞玉帝妙音之再出，獲詣天尊法門而泛游，具六神通，得大自在。斯乃始名於信受，斯乃真號於誦持。苟或萬徧譎譎，不究真一之旨，六根泛泛，不投解脫之機，是皆未可以仰酬天尊說經之勞，未可以仰獲玉帝護經之績。更諮敬信之士倍加持奉之功，口誦心存，如處玉光之內；神交意晤，如遊寶苑之中。諦觀分身合身之神通，靜想應化應物之妙用，湛然無累，卓爾有憑。即乃平步天宮，列名聖籍。臣良仰膺睿詔，將讚寶經，敬先敷露於鄙言，于以宣告於當世。至如獲持功德之說，報應神驗之詳，已具成經，不勞贅語。若夫鋪張至理，訂證誤文，雖非謬才之可能，幸以溫詔之所畀。已嘗遜避，弗許謙辭，即當剗剔此心，審正于下，先作斯語，肇闢于經，庶界來觀之人，首認紀述之意。臣良稽首頓首，拜手謹書。

高上玉皇本行集經卷上

天樞上相臣張良校正

清微天宮神通品第一

道言^①：元始天尊昔在清微天中玉京金闕七寶玄苑玉皇宮殿昇光明座，與無鞅數衆宣說靈寶清淨真一不二法門。

右《應運說法章》並已詳校，略無舛誤。臣謹言曰：大道之妙，始於無始，窮於無窮，器形不可圍也，見聞不可即也。三界有形，欲造斯道，將奚所自耶？臣恭惟元始天尊知大道之高玄，憫生靈之冥晦，撫機應運，大闡法門而示之，俾三界生靈由是門求道，庶乎茫然蠢動俱可以即夫清淨真一之門，而復至於虛無自然之域也。結經衆真將欲紀述天尊宣說法門之迹，故述是章為首。雖然，是經始終純紀玉帝神變生化之實，而結經之真乃直指為宣說靈寶清淨

真一不二法門，非靈機洞悟、心印相符者，疇克爾哉？敬重宣化義，以告來者。伏乞上聖垂鑒云。臣良謹言。是時玉皇尊帝與諸真聖、真聖一本云天真飛天大聖、無極神王、靈童玉女九千萬人清齋建節，侍在側焉。

右《乘機與會章》，並已詳校，略無舛誤。臣謹言曰：上聖之心，一而不一，上聖之迹，同而不殊。故天尊方即七寶玄苑，登光明座，為欲說經，未始出一玄言，而有所詔召也。乃蒙玉帝，心默契遇，與諸大聖會於不約，豈非心一而不一，迹同而不殊者哉。深恐下方衆生未達斯理，敢以是告。伏乞上聖垂鑒。臣良謹言。

于是^②玉帝知時欲至，即於會前舉六通力，放大光明，徧照諸天，無極梵刹一切境界皆大震動；十方無極一切世界，俱同瑠璃玻瓈，無有隔礙。

右《知時放光章》，並已詳校，略無舛誤。臣謹言曰：崇卑莫位，遐邇殊方，位莫方殊，體勢斯異，非有統一，其應豈同？恭惟玉帝，張主萬天，總

御諸地，故於斯日，特放光明，照燭諸方，震動一切，俾夫含識俱起覺知。乘際妙緣，霑沐道貺。然而神光妙義，世舉未知。敢泄玄機，普施無量。夫光明者，即道性也。蠢動含生，無一不具。特以上聖則修鍊融混，全乎至精；蠢動含生，則流蕩沈迷，失其至寶。故上聖至精之全，則光色明耀，含生至寶之失，則沈墜暗冥。上聖一以同有之道性，運神變以燭之，則彼同有道性之含生，莫不警聳而動悟。是以神光一發，充滿法界，而法界萬有，莫不震動而警悟也。以性合性，妙用如斯，學者以是求之。伏乞上聖垂鑒。臣良謹言。

十方來衆並乘五色瓊輪、琅輿碧輦、九色玄龍、十絕羽蓋，麟舞鳳唱，嘯歌噫嚙，靈妃散花，金童揚煙，讚謠^③洞章，浮空而來。

右《十方來集章》，並已詳校，略無舛誤。臣謹言曰：以勢而論，十方固殊；以形而言，萬聖亦異。然而物我同體，賢聖豈殊，遠邇等觀，方隅

奚限？天尊說經，玉帝放光，而十方之衆普皆來集，理勢然也。萬有生靈，宜各知之。臣良謹言。

是時梵天一切金仙、大乘菩薩、四衆八部承斯光照，皆乘碧霞九靈流景飛雲玉輿，慶霄四會，三辰吐芳，飛香八湊，旋繞道前，雨衆妙花，如雲而下，徧覆會前。

右《金仙普至章》，並已參校，略無舛誤。臣謹言曰：道出于一教，或有異出于一者，宗也；或有異者，派也。自派求宗，異乃合一，又奚可差別哉？今人世以道釋為殊途，不啻朱墨，豈知道釋同乎一宗，初無少異。故天尊說經，玉帝放光，而金仙之衆，並獲與會。此蓋聖真同心，道釋同宗也。人世其知之。臣良謹言。

是時其光徧照諸天，下燭下方無極世界同玄都境。凡彼人間，上近九天，通接交連，至親至邇。時彼下方無極世界山陵坡坂溝澗谿谷，緬平如掌，六合至邇，三境非遠。天寶臺殿，星羅人

間，瓊瑰羅列，朗耀雲衢，七寶欄楯，以界道路，玉樹仙花，積璨珠寶，景秀丹田，芝草覆綿。時彼下方皆見諸天，鈞天妙樂，隨光旋轉，自然振響。又復皆見鸞嘯鳳唱，飛鳴應節，龍戲麟盤，翔舞天端。諸天寶花，零亂散落，徧滿道路。

右《光照下方章》。臣竊謂：自天上而視人間，則天上此也，人間彼也。今凡本云，令此人間，上近九天，是彼此不辨。又神光所燭，自然上下貫通，混融無際。今凡本以令為言者，是強使之然，非自然也。謹更令此為凡彼。又時此下方，亦謹更為時彼。至如凡本云，又復令見鸞嘯鳳唱。其間令字，亦是強然，今更令字為皆字。臣竊謂：經乃天文，非世所有。緣天真降世，口授下方諸仙。彼下方諸仙，憶而筆之下仙。自人世而言，故多言此字，或其間雜有不安之語，是亦無足怪也。臣今更之，欲俾文義大正。恐人世未知，故詳述于此。誦持之士，毋諸他疑。

臣謹言曰：以鏡燭物，有形者皆現；以灰覆物，不潔者皆鮮。況以上帝無礙平等神通之光，照燭一切，宜乎俯仰一如，無彼此遠近之間也。舍^⑤生能體玉帝放光之事。混物我，一親疏，等善惡，蔑夷險，俾此心光如玉帝無礙平等之光，則心光之發，殆昭符於帝光也。事上求理，初無誑誣。有生其知之。臣良謹言。

是時凡聖駭異，幽暗開光，天人悅慶，踴躍歡忻；凡夫學士，盡得飛昇，仰觀劫初寶臺，俯眄紫雲彌羅。是諸世界，一切人民，咸臻道氣，白首面皺，皆得化度，紺髮朱顏，少壯幼穉，轉得形容，光澤美好，苦惱痊平，普蒙解脫，安樂快然。天下歌謠，欣國太平。

右《神通感效章》。臣竊見光照下方之後，當即睹效異之著。今凡本中略有舛異，致意義弗貫。謹移是時二字於凡聖駭異之上。又人民既至於安樂快然，則天下斯至大治矣。謹移天下歌謠欣國太平八字於安樂快然之下。其餘神風遐著等語，乃

神化玄功，著見於幽冥之際，非特明及人間也。故移置下章。臣謹言曰：幽顯雖殊，理致不異。以人間帝王德音之下，則死者、生罪者、釋黜者、復降者、升尊者、益榮顯者愈貴，是特帝王恩澤之所加也。況上帝神光之降，是謂非常之恩，則彼學者昇仙，老者反壯，少者皆強，病者獲痊，亦當然之理也。含生宜勉奉聖真，勤希道學，佇玉帝之覃恩焉。道不負人，聖有明訓，其謹信之。臣良謹言。

當爾之時，神風遐著，萬氣揚津，天震地裂，枯骨更生，沈尸飛魄，皆起復形；酆都鐵圍、長夜九幽，即時破壞，地獄衆生，化生諸天，三惡道苦，一切解脫。時諸罪輩，以斯光力，得生十方諸大天宮。

右《枯朽化生章》。臣竊謂：神化道用，及物雖均，然亦不無遠近先後之叙。故神光照世之效，先及夫明明之人間，然後及夫冥冥之諸類，此自然之叙也。舊凡本中所紀，頗有不

次。臣今輒移當爾之時字冠於神風遐著之上，次以酆都鐵圍等語接於皆起復形之下，俾先後之叙不紊，而旨意脉絡貫通，庶乎不失曩日說經之時目見之實迹也。又舊經中有生諸天已之語，今亦削之。臣謹言曰：枯骨當朽，沈尸當壞，惡趣當囚，此常理也。然帝恩非常，不可以常理論。含生不可謂有惡有過，當有原宥生天之日，而或萌僥倖之心，倖心一生，則反受幽囚也。事有可畏，故首為言之。然當復明祐起囚出之義。夫罪趣之沈，非本沈也，蓋以含生積惡過重，業集故，地獄之報，有不容脫，一受真恩，自宜超化。矧逢玉帝放光之事，恩宥非常，則過惡盡釋，如湯沃冰。以其元始一靈，乘陽光而上九天，決非難事也。若夫枯骨沈尸之生起，則當假喻以明之。夫鯁骨腐於泥，得水而再活；井萍燥於地，得水亦復萌。水特一物，魚萍得之，猶且若是，矧上帝非常之恩乎。且尸者，人之化者也；

骨者，尸之削者也。骨乃尸，尸乃人，人受天地陰陽之氣而生焉可以骨，而況物哉。蓋骨者，精之所化也。今學人能鍊精，則精化為金玉之丹，而留形住世，長生神仙。彼骨乃精之化，宜其有異於凡物也。是以萬物得土則期年而腐，惟人之骨殖久入土而不化焉。此由精之所化而然也。故上聖慈悲，有太陰鍊形之術。吁，不能度之於既生，而猶欲活之於已死，其慈悲行願，若此其至也哉。今茲上帝放光，俾囚脫尸起，以至於枯骨更生，則上聖好生之德，將奚以報之也。苟有少負，羅酆鐵圍，其可逃哉。含生宜知之。臣良謹言。

爾時玉皇即分其身，徧於十方諸大天宮，令諸天宮自然化現，白玉為京，黃金為闕，七寶玄苑大光明殿具光明座，幢節旛蓋，異寶奇花，徧布是處。

右《分身化現章》，並已詳校，略無舛誤。臣謹言曰：道體猶虛空，空無所不有，豈容限以一隅哉？夫月現

于空，凡有水處，影無不沈也；雷震于天，凡可聞處，聲無不徹也。玉帝妙道真身，譬之虛空，無所不在，豈雷與月之可比哉？又豈待分之而後徧現諸天地哉？然衆生眼根，依物乃轉，故玉帝揭示身相之分，俾一切有情，隨相瞻視，攝念歸依，佇聽妙法。是以徧於諸天各現一相，諸天之衆，各為景慕，然後隨方說法，普受萬靈。吁，知玉帝道身之一，而不知其分，則見有所膠而不融；知玉帝道身之分，而不知其一，則識至於亂而無統。是一非一，是分非分，隱顯聚散，冥寂玄通，茲乃玉帝分現之微旨也。含生其思之。臣良謹言。

爾時玉皇即以所分之身徧於是處，白玉京中、黃金闕內七寶玄苑大光明殿光明座上，普為十方演說清淨解脫之道。

右《分演妙道章》，並已詳校，略無舛誤。臣謹言曰：濁世衆生，不悟真道，是以七情六欲縱而不收，萬過千愆，積而不解，地獄之報，目瞑不逃。

豈意上帝之慈，敷恩赦度，俾之徑陟淨境，快樂無涯。然豈知積福生天，福盡猶不免於復墜，况承恩而生，則生天之緣，直以恩之所及也。苟昧進脩，曷為解脫？玉帝聖恩優渥，猶欲終俾解脫，故為宣說清淨之道，俾諸天人獲究竟之果。吁，慈澤混浩，慈意深遠，天人其可不勉自進趣，以副玉帝接度之意乎？人世衆生，宜思玉帝赦度拯接苦趣之迹，勉勉為善，勿自暴棄，則帝恩之降，殆不止若是也。雖然，是章載玉帝為天人說清淨解脫之道，而以下諸章並不見玉帝所說清淨解脫之語，何也？蓋玉帝以一切玉女侍衛，而玉女真身流香，默寓清淨解脫之旨，以至於諸趣承光覺悟，及妙音宣演等事，莫非清淨解脫之意。是乃玉帝不言之言也。結經諸真，默識是義，直紀普為十方演說清淨解脫之道。吁，識洞帝心，見徹事外，結經之真，其造妙通玄，有如此者，誠不可思議也。夫誦經之士，其因茲而求之。臣良謹

言。

時化玉帝各以無量天真大聖、妙行真人、靈妃玉女侍列左右，是諸玉女，顏容殊妙，端嚴奇特，天珍異寶。

謂天上之珍，奇異之寶也。舊本以

天珍為天真，今更正之。

莊嚴身相，言音清徹，衆所樂聞。如是諸女，其身復出微妙解脫自然之香。是香芬馥，周徧諸天。

舊本云能徧諸天。夫玉女身香之出自然，充滿法界，若以能字加於徧字之上，則能乃強然也。今正其誤為周字。

極妙樂土及餘大地一切福處。六道一切衆生，

一本云能令六道一切衆生。夫六道苦趣自然聞香，初非強使聞之也。

今正其誤，削此能令二字。

聞是香者，普蒙開度。所謂天道、人間、魔道、地獄道、餓鬼道、畜生道。

舊本畜生道下有當此已後四字。夫玉女出香，六道於當時得聞，初非在此以後也。神仙口傳，紀錄有誤。

今削當此已後四字。

若諸天道，一切天人或有能聞是此香者，五衰之相，永得滅除，轉增天福。若諸人道，王臣兆庶或有能聞是此香者，即得人天長壽之樂，身或滅度，及得脫殼尸解之道。若諸魔道，一切諸魔或有能聞是此香者，安處天宮，鬪戰之苦，各得休息。若諸地獄道，一切衆生或有能聞是此香者，離地獄苦，得淨土樂。若諸餓鬼道，一切餓鬼等。

舊本云一切餓鬼神等。臣竊謂神趣雖有亦墮餓鬼道者，然既墮鬼趣，即是鬼矣。今著神字，似礙神祇之神。謹削此一字。

或有能聞是此香者，即得飽滿，無飢渴惱。若諸畜生道，一切畜生，

舊本云一切衆生。前地獄言衆生，今此畜生道之下當作畜生。今有間別，故易衆字為畜字。

或有能聞是此香者，脫畜生苦，得智慧樂。

右《聞香解脫章》，並已詳校，更正訖。臣謹言曰：理之常者，衆人之所

共知；理之異者，雖賢哲亦或未悟也。臣於《聞香解脫章》敢悉鄙見，以告人世云：臣竊見玉帝於七寶玄苑放光之初，下方人民，地獄苦趣，並承光照，已皆生天矣。今經於玉帝分身普現之後，復載玉帝分現之時，以諸大聖、玉女侍衛，又載玉女身香徧於是處，而六道衆生聞香者莫不解脫。世人之疑，謂人民苦趣，既以帝光而生天，用生天之事是帝光之效也，奚與於玉女之身香乎？吁，此疑議非人世之罪也。蓋事出於常理之外，有不容不疑，奚足怪哉？臣謹明之，以釋世人之惑。恭惟天尊，今茲說經，正為欲發明清淨之法門也。夫女人之身，純陰之質也。惟其純陰，故常與不淨為鄰。惟其鄰於不淨，故其身鮮有芬馥之致。乃今一切玉女能與玉帝行解見識等並同清淨，故其身雖純陰、鄰於不淨，而微妙解脫自然之香，乃出於其身。譬之世人處於濁惡，苟能俾心見識行等悉處淨鄉，則異香之微妙解脫亦

當生於其身也。此經專以清淨真一解脫為主，故結經衆真專紀玉女身香一事，發明妙旨。雖然，香雖名香，要當以理論，不可著物而言也。凡人之身苟無過無咎，知道悟真，凡出一言、行一行，為衆人之所欣羨讚歎，則亦猶玉女之身，不濁不穢，有微妙解脫之香，為諸天福處之所聞。玉女譬之則濁身也，香譬之則我之言行也，香徧於諸天福處譬之則言行發見於千里之外也，六道聞香而解脫譬之善言善行見用於世而利益於人物也。此乃修行之徑，舍生其味而行之。妄揣若茲，言略意窒。仰惟上聖鑒之，人世信之。臣良謹言。

爾時諸生天罪衆既得生是勝天宮已，緣承慈光攝受之故，便自覺悟，各各明了罪福因緣，與諸眷屬作天伎樂，來詣帝前。是諸衆等，各各含悲，俱發聲言，前後經千劫萬劫，不見三光，常處黑闇，三惡道中，多受苦惱。伏蒙上帝方便放光，愍救我等，皆生天上。是諸

惡業，悉皆滅盡，無諸繫滯，皆得往生。仰朝上帝，各到道前。是諸生天一切罪衆說是語已，稽首復位。

右《承光覺悟章》，並已參校，略無舛誤。臣謹言曰：衆生障重，業識昏迷，積惡累愆，至墮地獄。彼時雖悔，將何及哉。一旦忽受天恩，非但得脫苦趣，且獲徑生天宮，此之幸會，億載一逢。事出望外，其喜豈有涯際哉？今雖離苦得樂，實為慶幸，然不若在世之日直累善緣，徑升樂地之為愈也。世之衆生，當勤種善果，勤求真道，毋俾既墮地獄，方覲天恩，以求解脫；縱使天恩果得，則此身已受衆苦，殊為可痛念也。衆生宜思之。臣良謹言。

爾時玉帝出大妙音，普告十方諸天聖衆：汝等諦聽，此諸罪輩，曠劫以來，縱無明性，造十惡業，六塵徧染，三業縈纏，肆意任心，曾無覺悟，陰罪陽過，日積月深，背道違真，順邪棄正，舉心運念，動結愆尤，遂使命過之後，身落三途，不得解脫。若非今日遇是法筵，

何由出離？

右《妙音開度章》並已詳校，略無舛誤。惟是舊本，《妙音》一章，係在移接天人之後。臣伏見玉帝分現之後，六起聞香解脫，承光覺悟，各了宿緣。於是玉帝乃出妙音，再垂重訓，以堅修進，然後移接天人，同現元始。舊本以上真降傳下仙，紀錄次序頗紊。臣今輒行遷證，庶獲貫穿。臣謹言曰：臣嘗聞之經曰，生我者神，殺我者心。故嘗詳味妙義，然後知心之為用，其為害與利，不可勝言也。夫人生之初，特神之寓，未嘗有是心也。迨夫四大混合，神凝為心，心以神寓，即為離本矣。心為離本，而心又生念，一念既著，則百為以生。百為既生，則萬罪萬善，於是發萌矣。是以斯念之起，適於善者，則功德以成；適於惡者，則罪惡以就。此無他，一心之生故也。今觀六趣之墜，初非係於別法之導指，特在舉心運念之不純，故愆尤之結，以至於三途久墮，不獲超離。若夫三業之

縈，六塵之染，初非離於一心之生，一念之起也。玉帝誕敷弘恩，接度諸趣，深恐諸趣承恩超離，根念未固，不能進脩，特出妙音，為明沈淪之自，俾六趣灼識大本，不復迷沈。是皆慈意恢洪，故屑屑不厭也。俗世人民，當即帝之妙音，堅持禁戒，勿俾干犯，則升天證果，不啻反掌。如或慢忽自縱，有拂妙音之戒，則沈落苦海，將猶立板而走丸，不可復反也。毋謂帝恩之渥常可得之。臣良謹言。

爾時諸天化身上帝，即以神通，不動其所，接移天人，皆令得至清微天宮玉清聖境元始會下，是諸等衆，不覺不知。是時天尊衆會，見是十方玉帝化身普皆來集，天尊會前，如無邊明鏡，照諸影像，互相容入。時諸大衆，稽首瞻仰。上帝化身，聖中最雄，增長清信，益加志樂，心無退轉，起大堅固。時諸天人，邇得生天，忽睹天尊勝會道場，清淨第一，無為功德之所莊嚴，踴躍歡喜，一時作禮，歎未曾有。

右《移接天人章》，並已參校，略無舛誤。臣謹言曰：法性平等，廣大無量，增之不益，削之不欠，近之不邇，遠之不遐。曰聖曰真，曰天曰人，初未嘗有異也。奈何衆生具體，離本去原，毫釐一差，千里之謬。是以崇卑頓異，凡聖迥殊，彼此相窺，億萬有間。今玉帝覃恩，度移苦趣，皆俾超昇，雖妙音之出，為明罪本，既詳且盡，然猶慮諸趣未體法性之妙，故現異境，示以法性無礙之實。故不動其所，移接天人，俾至元始會下。自諸天而觀，則元始之會遠在極尊之域，自元始會下而觀，則諸天之境亦遠在至卑之地。今玉帝不動其所，俾諸天元始之境，如指掌中，瞭然在目。豈非法性妙用，天人一理，崇卑一致哉。修學之士宜即《移接》一章，參味玄奧，則性中天地、心內聖凡，和會混融，廣博無礙。是不特下仙修證之比也。道不負人，宜加勤焉。臣良謹言。

爾時十方諸化玉皇，俱復一體，從法席

起，向北長跪。天尊言曰：往昔去世，有國名號光嚴妙樂，其國王者名曰淨德。時王有后，名寶月光。其王無嗣。帝^①因一日作是思惟：我今將老，而無太子，身或崩滅^②，社稷九廟，委付何人？作是念已，即便敕下詔諸道衆於諸宮殿，依諸科教，懸諸幡蓋，清淨嚴潔，廣陳供養，六時行道，徧禱真聖。已經半載，不退初心。忽夜寶月光皇后夢太上道君與諸至真，金姿玉質，清淨之儔，駕五色龍輿，擁耀景旌，蔭明霞蓋，是時太上道君安坐龍輿，抱一嬰兒，身諸毛孔放百億光，照諸宮殿，作百寶色，幢節前導，浮空而來。是時皇后心生歡喜，恭敬接禮，長跪道前，白道君言：今王無嗣，願乞此子為社稷主。伏願慈悲，哀愍聽許。爾時道君答皇后言：願特賜汝。是時皇后禮謝道君，而乃收之。皇后收已，便從夢歸，覺而有孕。懷胎一年，于丙午歲正月九日午時誕于王宮。當生之時，身寶光燄，充滿王國，色相妙好，觀者無厭。幼而敏慧，長而慈善^③，于其國中

所有庫藏、一切財寶，盡將散施窮乏困苦、鰥寡孤獨、無所依怙、饑饉癯殘一切衆生，仁愛和遜，歌謠有道，化及遐方，天下仰從，歸仁太子，父王加慶。當爾之後，王忽告崩，太子治政，俯念浮生，告敕大臣，嗣位有道。遂捨其國，於普明香嚴山中修道，功成超度。過是劫已，歷八百劫，身常捨其國，為羣生故，割愛學道。於此後經八百劫，行藥治病，拯救衆生，令其安樂。此劫盡已，又歷八百劫，廣行方便，啓諸道藏，演說靈章，恢宣正化，敷揚神功，助國救人，自幽及顯。過此已後，再歷八百劫，亡身殞命，行忍辱故，捨己血肉。如是修行三千二百劫，始證金仙，號曰清淨自然覺王如來，教諸菩薩頓悟大乘正宗，漸入虛無妙道。如是修行，又經億劫，始證玉帝。說是語已，法筵清衆異口同聲，歎未曾有。

右《化生本行章》，並已參校，略無舛誤。臣謹言曰：無上大因緣、大功德，自無始以來，未有如玉帝化生一事也。天尊為是因緣功德，特建微

妙道場，顯示三界。是以先俾玉帝放光，現大神化，然後敷宣祕密，詳述化生本行。故玉帝於移接天人之後，自分而合，返本還元，現無上道身，上朝元始，朝謁之時，初未嘗出一語以白天尊也。天尊玉帝，心光混融，非一非二。故玉帝北向，跪奉朝儀，而金口妙言，即宣本行。自今觀之，以帝身而分現諸天，即真一應化也；以分現諸身而合為一體，即真一不動也。天尊建微妙道場，是欲宣演大因緣功德也。金口宣演化生本行，是欲俾三界萬生知玉帝因緣功德之大而做進修也。真一不二法門，即此是也；清淨解脫之道，亦此是也。含生宜現玉帝化生修累之事，而勉建無上之玄功，則功德巍巍也。又觀玉帝自一而分，自分而一，則可以造真一不二之門而成無上道也。儻能不憚辛苦，自一時以至於四時，自一年以至於百年，自一生以至於多生，自一劫以至於億劫，堅勤不退，則凡身濁質，離垢成真，

大彌羅天當為汝鋪張分位，俾汝登證也。列侍三境，進事玉帝，又奚難矣哉。含生及修行之士，宜諦思之。臣良謹言。

爾時衆中有一玉女，名曰夜光，從座而起，嚴整衣冠，從容雅步，長跪道前，白天尊言：臣宿昔何幸，仰侍御前，親奉供養，已經億劫。三清境界，金闕玉京，寂淡逍遙，快樂自在，嬉遊聖域，餐聽法音，未曾見此希有之事。不審向來光內所現十方諸天變現聖境皆有上帝應化法身^①，天真大聖、妙行真人、靈妃玉女以為侍衛，是諸玉女，相貌端嚴，形體殊妙，無與等者。復蒙上帝神通移接，今皆普集在清微天，未審今此玉女以何因緣，得證如是無上色身？思惟聖慈，示以未悟。

大悲心，覆護衆生，如母撫念，愛於赤子，奉戒專一，冥心大道，清齋弘誓，千萬劫中尊奉玉帝。此諸玉女，非實是女，皆天至真，為度羣生，現玉女身。是故身色、神通、智慧，隱顯變化，與帝同焉。爾時夜光聞是說已，心得開悟，稽首歡喜，默然復位。

右《玉女妙行章》，並已參校，略無舛誤。臣謹言曰：諺云，人不知身為聖，馬不知身為龍。誠哉，是言也。夫玉女之身，純陰之質也。純陰近乎濁，宜乎進修之難於清淨也。今玉女以其修諸妙行，遂能具解脫門。夫所謂具云者，無所不解脫也。然原其所以具解脫門之自，則始於修諸妙行，而妙行之修，又根本於大悲之心，與夫所信所解，曰念曰行，曰身曰心，曰意，並由清淨，故其果其報，莫不清淨，以至於解脫之具焉。吁，玉女陰濁之身，能慈悲清淨，修諸妙行，而能至於解脫，仰侍玉帝，且又身色、神通、智慧，隱顯變化，與帝一同，甚而至於俾六道苦

趣，聞其身香，而亦臻解脫，則妙行之修，其功德果報，一何崇大廣博也哉。斯世之人，凡受中稟氣，皆自元始，初未嘗異於玉女也。苟能修諸妙行，俾與玉女不異，則後之起證，又焉與玉女異哉？含生宜黽勉，倣此而修之。若夫前章言玉帝為十方之衆演說清淨解脫之道，即此是也。玉帝有不言之言，並宜思之。臣良謹言。

爾時高虛清明天主與諸天眷屬馭八景鸞輿，蔭^⑮九光寶蓋，奏玄歌妙樂，詠無量洞章，散天寶花，噴天真香，飛步遊空，來詣道前。承天尊上帝^⑯威神力，是諸寶花即於空中化一寶蓋，蔭覆大衆，無不周徧。是時高虛清明天主見此希有，稽首長跪，白天尊上帝言：賤臣懈怠，後會法筵。今日吉慶，興此法橋，幽顯凡聖，普霑聖澤，放大光明，現希有相，上照諸天、四梵六慾一切樂土，諸真聖衆睹此光明，皆悉雲集，下照十方無極世界，同玄都境，近接九天，靈風奏樂，宮商相和，激朗雲庭，皆

成洞章。一切衆生，咸臻道化。酆都鐵圍、長夜九幽、一切地獄受苦衆生，盡承光力，皆生諸天，得受快樂。令臣所散天寶奇花，旋結成蓋，徧覆大衆，盡乃^⑰斯光威神之力。臣等千劫良因，九天運會，皇道蕩蕩，正法興隆，今日大吉，咸仰玄功。是時高虛清明天主以偈讚上帝曰^⑱：

金闕玄穹祖，高上玉皇尊。妙相冠諸天，慈光燭三界。真聖妙道師，天人依仗師。大乘垂法語，真一指迷徒。功德若虛空，讚揚無窮盡。

是穹蒼主浩劫之尊，妙見妙知，無等無倫，湛寂真淨，杳亡杳存，上聖上靈，大神通，光明藏，大丈夫，開化人天，教道無窮，大慈大悲，流煥法輪，爲度羣生，是號玉皇。穹蒼真老，妙圓清淨，智慧辯才，至道至尊，開度衆生，故演^⑲是光。

右《天主讚仰章》，並已參校，略無舛誤。臣謹言曰：玉帝功德之大，言辭不可讚也，譬喻不可盡也。雖以塵沙界中無量天人，身具萬舌，美之

讚之，皆不可窮，況以一人之舌讚美之哉。今高虛清明天主以偈讚歎，是蓋恐三界萬生，猶有未知玉帝之功德者也。模倣陰陽之真形，繪畫日月之神光，雖良工決不可以用其巧，矧帝之功德崇大廣博，容可言揚哉。雖然，天主之偈美則美矣，至則至矣，雖猶未足以形容帝德之萬一矣，然天主之意，蓋欲託此而啓金口無盡之言。故偈頌稱讚，不辭縷複。天尊察知其誠，故於後章繼有聖訓云。臣良謹言。

爾時高虛清明天主說偈讚歎已，天尊普告四衆云：是帝身即道身也，非常體也。是無量功德之身，是清淨自然之身，是神明堅固不壞真空無上法身。威靈恢廓，名聲周徧，無幽不開，神奇堂堂，難可稱焉。是帝非有爲功德之所熏修，而帝昔雖下生人間，多劫行化，示大神通而身清淨，未嘗不在金闕分身變化，應現隨方，利濟羣生，超昇道岸，普垂教法，開悟後人，依按奉行，登真成道。以斯功德之所莊嚴，是故

光明常充諸天，神智妙達，莫可度量。是身光明，皆具妙號，所謂大神通光，大慈悲光，大喜捨光，大忍辱光，大平等光，大柔和光，大自在光，大利益光，大如意光，大智慧光，大吉祥光，大解脫光，大歸依光，大功德光，大圓滿光，大無礙光，無能勝光。是故汝等欲見是帝，乃不可得者，緣以汝等尚於身口不捨結習，煩惱行業，由是障故，不能得睹是帝慈顏。吾今爲汝時會衆等，宣示斷障之法，汝等大衆，各宜奉行。時諸大衆不勝喜躍，各于至尊几前，稽首作禮，俱欲願聞。

天尊言曰：斷障之法，當生大悲，無起疑惑，無起貪嗔，無起淫慾，無起嫉妬，無起殺害，無起凡情，無起凡思，無起貪妬，無起聲色，無起是非，無起憎愛，無起分別，無起高慢，無起執著，凝神澄慮，萬神調伏，心若太虛，內外貞白，無所不容，無所不納，無令外邪亂其至道，牽失真宗，敗其靈根，盜其至寶，致爾萬劫永墮凡流，透入俗網，萬魔來攻，百千萬劫，不聞妙法，鬼神執誅，從

生入死。是故汝等應當志心，善護真宗，無令喪失。如前所說，如是諸障，汝等各各當除斷之，身得清淨，超度諸難，是名道寶，持法棟梁。更當修奉是此經典，如近是帝，生尊重心，著想尊容，稱揚名號，然後汝等得睹慈顏，咸蒙護度，普聞妙法，親奉供養，永無流轉。是時四衆聞已歡喜，歎未曾有。

右《垂教斷障章》，並已參校，略無舛誤。臣謹言曰：經者，徑也，修行之路也。凡人奉經，有二法門：一曰口誦，一曰心持。口誦者，謂以口業稱揚也；心持者，謂以意業遵行也。口誦者當以心持為本，心持者當以口誦為先，心口相資，功德乃就。舉一廢一，功德不成。故經中合言誦持也。誦而不持，是言譎譎而心無益也；持而不誦，是心雖動而意不達也。是必二者並舉，事乃成焉。此誦持之說也。若夫誦持玉帝之經，是當遵行帝之功德，做慕帝之修證而後可也。遵行做慕，有五法門：一曰尊重景慕，二曰懺斷障業，

三曰積功利濟，四曰含容明通，五曰真一變化。所謂尊重景慕者，經中所謂著想尊容，造帝形像，稱揚名號，誦念經訓是也。所謂懺斷障業者，經中所謂斷障之法，備載諸說是也。積功利濟者，經中所謂分身變化，利濟人間，敷揚教法等是也。含容明通者，經中所謂心若太虛，無所不容，無所不納，慈悲方便是也。真一變化者，經中所謂而身清淨，常在金闕應現隨方是也。人能按是五門勤而行之，當證大彌羅天神仙之位。行之三年，萬神敬仰，羣魔束形；行之十年，十方奉事，神昇玉清；行之二紀，功滿德就，身騰玉清，既登玉清，乃證三身。三身者，經中所謂無量功德之身，清淨自然之身，神明堅固不壞真空無上法身也。修學之士，誦經之人，宜味吾言而行之。如口誦是經，身犯諸戒，經中妙音及斷障之法也，則《報應神驗品》中具載其報。學士誦人宜畏之敬之。臣良謹言。

高上玉皇本行集經卷上

- ①「道言」，白文本作「爾時」。
- ②「于是」，白文本作「于時」。
- ③「謠」，白文本作「詠」。
- ④「遼」，白文本作「遙」。
- ⑤「舍生」，疑為「舍生」之訛。
- ⑥「衆生」，白文本作「苦魂」。
- ⑦「諸天化身上帝」，白文本作「諸天化身玉帝」，是。張校本多改「玉帝」為「上帝」。
- ⑧「玉皇」，白文本作「玉帝」。
- ⑨「帝」，白文本作「嘗」，是。
- ⑩「崩滅」，白文本作「崩歿」，是。
- ⑪「慈善」，白文本作「慈仁」。
- ⑫「上帝應化法身」，白文本作「玉帝應化法身」。以下「上帝神通移接」同。
- ⑬原無「蔭」字。茲據白文本補。
- ⑭「天尊上帝」，白文本作「天尊玉帝」，是。下同。
- ⑮「盡乃」，白文本作「盡承」，是。
- ⑯原作「以讚上帝曰」。白文本作「玉帝」；「讚」之前有「偈」字，茲據補。
- ⑰「演」，白文本作「放」，是。

高上玉皇本行集經卷中

天樞上相臣張良校正

太光大光明圓滿大神呪品第二

爾時天地始祖五老上帝稽首長跪，白天尊言：伏聞高上玉皇一本云天尊高上玉皇。竊見放光事專屬玉皇，今略天尊二字。慈念蒼生，普放神光，照燭法界，六凡四聖，普叨道蔭。竊以凡夫短景，劫運將終，正道宜行，以濟兆民，使修真之子有期輕舉，末代烝民俱獲壽考。自昔《元始洞玄靈寶赤書玉篇真文》生於元始之先，空洞之中，天地未根，日月未光，幽冥冥冥，無祖無宗，無氣無象，無色無名，無形無緒，無音無聲，混沌太無，靈文晦曖，乍存乍亡，二儀待之以分，太陽待之以明，靈圖革運，玄象推遷，乘機應運，於是存焉。玉帝授臣靈寶祕篆，大不可思議神呪，故天地得之而分判，三景得之而發光，靈文鬱秀，洞映上清，發乎始青之天，而色無定方，支

勢曲折，不可尋詳。元始鍊之於洞陽之館，治之於流火之庭，鮮其正文，瑩發光芒，洞陽烝赤，故號赤書。靈圖既煥，萬帝朝真，飛空步虛，旋行上宮，燒香散花，口詠靈章。是時天降十二玄瑞，地發二十四應，上慶九天之靈奧，讚三天之寶明。神風既鼓，皇道咸暢。元始登命，太真按筆，玉妃拂筵，鑄金爲簡，刻書玉篇，五老掌籙，祕於九天靈都之館。玉女典香，太華執巾，玉童侍衛，玉陛朝軒，九天上書，非鬼神所聞。故天寶之以致浮，地秘之以致安，五帝掌之以得鎮，三光乘之以高明，上聖奉之以致神，高尊掌之以致真，五嶽從之以得靈，天子得之以致治，國祚享之以太平。實靈文之妙德，乃天地之玄根。威靈恢廓，普加無窮，蕩蕩大化，爲神明之宗。其量莫測，巍巍乎太空，明真有格，今當以行。是時元始革運，玄象開圖，靈文鬱秀，神表五方，分判天地，開化萬靈。此大宗之業，可得暫披於靈韞乎？今皇道敷暢，澤被十方，仰觀劫運，真風宜行。臣私心實欲

使靈蔭八遐，風灑蘭林，寒條仰希華陽之繁，朽骸蒙受靈奧之津。仰對元慈，下伸丹懇，惟願哀憫，撫念蒼生，不審《靈寶玉篇真文》可得見授，下教於未聞者乎？

於是元始天尊撫几高抗，凝真遐想，觀時已至，普謂時會一切真聖，論定陰陽，推數劫會，移校河源，檢錄天度，選擇種人，指拈太無，嘯朗九玄，永無開聽於陳辭，有若閉礙求真之路。是時五老上帝啓問不已，良久，元始天尊乃垂盼皆之容，慨爾歎曰：惟乎深哉。

子今所扣，豈不遠乎？此元始靈寶之玄根，空洞自然之真文，生天立地，開化神明，施鎮五嶽，安國康民。靈寶玄妙，爲萬物之尊，天發玄瑞，靈應自然。今三天盤運，六天道行，雜法開化，當有三萬六千種道以擇來者之心。此法運訖，三龍之後，庚子之年，雜氣普消，諸天慶會，吾真道乃行。今且可相付，當錄於上館，未得行於下世。玄科有禁，不得便傳。子可詣靈都紫微上宮，聽天音於金格，取俯仰於神王。然後

當使得備天文以總御元始之天也。於是五老上帝與諸真聖，清香執戒，徘徊雲路，嘯命十天，上詣上清太玄玉都寒靈丹殿紫微上宮，受俯仰之格，乃知天真貴重，難可即聞。還乃更詣元始天尊，諮以禁戒之儀，遜謝不逮。是時天尊慈顏愍喻，靈關廓開，登命五老上帝開洞陽玉館，披九光八色之韞雲錦之囊，出《元始靈寶赤書玉篇真文》金書玉篆、微妙祕密運御乾坤大光明圓滿大神呪玉章，以付五老上帝及諸真聖，使依玄科，按法以傳。

臣謹言曰：臣竊見五太未兆之初，二氣未始判也，萬類未始形也。恭惟元始上帝，凝道炁於混茫，列真書於杳漠，神風交扇，二氣乃分。二氣既分，萬類乃兆。然後降已凝之道炁，錫已列之真書，寓為河洛之文，以立人道，以治三才。已凝之道炁，已列之真書，即今世間所謂真文靈符者是也。然真文之大者，以之判天地，以之運陰陽，山河之流峙，人物之生成，皆真文之所為也。是乃造化之

機緘，天地之神用，茲未始傳於下世也。惟度人弭災制魔之篆，今見於世焉。即《神呪品》中諸品呪文是也。但經之行世，傳於上真，受於下仙，傳之者非一真，受之者非一人，故語言之詳略，意義之精粗，間有可得而議者焉。如《神呪品》啓關之文，或詳或略，或言有未倫，或意有弗貫，世之誦者，每每致疑。臣仰奉玉音，繆職參校，欲行裁益，深自憂虞，蓋恐裁益之文既行，而世間念誦之疑轉熾。輒從舊本，略證乖謬，其他意義之失貫，辭語之未倫，俱不敢議。惟世間之經，其略者恐包括之未盡，其詳者頗終始之周密。敢潔詳者一本為正，俾人世即此而誦持焉。臣良謹言。

是時東方安寶華林青靈始老蒼帝所受神呪誥命：
東方九炁，始皇青天，碧霞鬱壘，中有老人，總校圖錄，攝炁舉仙。

𠄎𠄎𠄎𠄎𠄎𠄎𠄎𠄎
𠄎𠄎𠄎𠄎𠄎𠄎𠄎𠄎
𠄎𠄎𠄎𠄎𠄎𠄎𠄎𠄎

右篆是前二十四字青帝祕文，書于九天元臺，主召九天上帝，校神仙圖錄。

歲星輔肝，角亢鎮真。氏房心尾，四景迴旋。箕主七辰，正斗明輪。承炁捕非，掃除災羣。

𠄎𠄎𠄎𠄎𠄎𠄎𠄎𠄎
𠄎𠄎𠄎𠄎𠄎𠄎𠄎𠄎
𠄎𠄎𠄎𠄎𠄎𠄎𠄎𠄎

右篆是前三十二字祕文，書于紫微宮東華殿，主召星官，正天分度。

東山神呪，攝召九天。赤書符命，制會

鄴山。束魔送鬼，所誅無蠲。悉詣木宮，敢有稽延。

𠄎𠄎𠄎𠄎𠄎𠄎𠄎𠄎
𠄎𠄎𠄎𠄎𠄎𠄎𠄎𠄎
𠄎𠄎𠄎𠄎𠄎𠄎𠄎𠄎
𠄎𠄎𠄎𠄎𠄎𠄎𠄎𠄎

右篆是前三十二字祕文，書于東華玄靈之館，主攝鬼魔，正九天炁。

下制東河，溟海水神。大劫洪災，蛟龍負身。水府開道，通徑百千。上帝赤文，風火無間。

𠄎𠄎𠄎𠄎𠄎𠄎𠄎𠄎
𠄎𠄎𠄎𠄎𠄎𠄎𠄎𠄎
𠄎𠄎𠄎𠄎𠄎𠄎𠄎𠄎
𠄎𠄎𠄎𠄎𠄎𠄎𠄎𠄎

右篆是前三十二字祕文，書于九天東北玉闕丹臺，主攝東海水帝，大劫洪災，召蛟龍及水神事。欲免水災，用黃書此字於青紙上，別呪投水中，解難也。

東方青帝符


靈寶九炁天文，化生赤帝炁，三天九真太空尊神。



右少陽之炁，化生太陽三炁，丹天，主小劫巳、大劫午，運周，赤帝行佩此文，得度其災。符文如前，當依此，以朱筆書于青縑九寸上。

東方安寶華林青靈始老蒼帝符命


日月以定，山林以開，三天大慶，羣真徘徊。



右元陽之炁，生九炁青天寶，東方青帝治，九九八十一周，則九天之炁交為大劫，更始，佩此文，則與運推移，得度洪災。當以青筆書文白繒上。

元始青帝真符

召直符區更生守靈寶天文。道士吞之，靈炁鎮肝，生青精寶華九葉，神為役使，通靈致神仙。直符區更生無上大真。




右上始天光文，出青帝真文篇，以安東方九炁之天。青帝受此文，以鎮東嶽，封一通，藏九靈洞室。四萬劫一開。修真之子，命屬東嶽，青書絳繒，佩身。並本命日，朱書，向東服之九枚，直符吏區更生，隨符入腹，

肝臟之中，九年皆生青精寶華，九重光映于形外。又當青書絳繒，內神杖次黑帝上節中，青衣玉女九人侍衛。勿致不精，當有考吏。修真之子，佩服前符篆，東向叩齒九通，想青炁入肝中，生九重華光，徹映項後。書符置前，乃呪曰：


无上青精，九炁大靈。神光遐散，流映東青。華景鬱勃，灌我身形。官府安鎮，寶魂自生。洞達八朗，飛昇玉庭。前訣說別呪者，此呪是也。

東方安寶華林青靈始老蒼帝三元符命九駕命天，龍符保真。多川災水，不敢彌天。




右九炁青天下元，小陽九已，小百六午，其年大災，除民靈寶。青帝出下元符命，下東嶽，保存萬物，安國康民，制九炁青天分度，以度學者之身。青書白繒。

中山神呪，易為神臣。度人命籍，萬災不纏。



右中元，太陽九申、大百六酉，其年禾稼俱衰。青帝出中元符，下東嶽，蔭育萬物，制天分度，以度種人大災。青書白繒。

西山上王，命為保真。一人有道，位事九真。



右上元，大劫交周，天地改易，金玉山海，人民鳥獸，一時滅盡，天地溟滓，無復光明。青帝出上元符下東嶽，保存萬物，制九天炁，以度學者。其三元符命，保固青天元始之炁，佩之皆得始分之中。其此文九千年一出。東嶽青帝云：大劫交周，當刻書金札，以佩身。青書白繒。

右玉皇誥命，以錫東方安寶華林青靈

始老蒼帝九炁天君，令統御東方諸天諸地、日月星宿、名山靈洞、水府泉宮上聖高尊、真仙聖衆、一切威靈，符命所臨，如誥奉行。

南方梵寶昌陽丹靈真老赤帝所受神呪誥命：

南方丹天，赤帝玉堂。中有大神，號曰赤皇。上炎流煙，三炁勃光。神仙受命，應會太陽。

𠄎𠄎𠄎𠄎𠄎𠄎
𠄎𠄎𠄎𠄎𠄎𠄎
𠄎𠄎𠄎𠄎𠄎𠄎
𠄎𠄎𠄎𠄎𠄎𠄎

右篆是前三十二字赤帝祕文，書于九天洞陽之館，主召九天神仙圖錄金名。

熒惑輔心，井鬼守房。柳星張翼，亢御四鄉。軫總七宿，迴轉天常。召運促會，正道驛行。

𠄎𠄎𠄎𠄎𠄎𠄎
𠄎𠄎𠄎𠄎𠄎𠄎
𠄎𠄎𠄎𠄎𠄎𠄎
𠄎𠄎𠄎𠄎𠄎𠄎

右篆是前三十二字祕文，書于三炁

丹臺，主召星官，明度數，正天分。

赤文命靈，北攝艷山。束送魔宗，斬滅邪根。符教所討，明列罪原。南山神呪，威伏八方。羣妖滅爽，萬弒摧亡。

𠄎𠄎𠄎𠄎𠄎𠄎
𠄎𠄎𠄎𠄎𠄎𠄎
𠄎𠄎𠄎𠄎𠄎𠄎
𠄎𠄎𠄎𠄎𠄎𠄎

右篆是前四十字祕文，書于西南陽

正玉闕，主制北艷，正鬼炁。南海水帝，太伯龍王。神呪流行，普掃不祥。洪水飛災，止蛟召龍。開除水徑，千道萬通。敢有干弒，攝送火宮。赤書所告，莫有不從。

𠄎𠄎𠄎𠄎𠄎𠄎
𠄎𠄎𠄎𠄎𠄎𠄎
𠄎𠄎𠄎𠄎𠄎𠄎
𠄎𠄎𠄎𠄎𠄎𠄎

右篆是前四十八字祕文，書于西南陽正西闕，主攝南海水帝，大運交期，洪水四出，召蛟龍及水神事。

右《南方三炁靈寶玉篇真文》，合一百五十二字，皆太上無上大光明圓滿大神呪空洞自然之書，一名《南雲通天寶靈矜》，一名《九天無上之上呪》，一名

《赤帝八威策文》。

南方赤帝符


靈寶三炁天文，化生黃帝炁，王事司斗，正屯尸身。



右太陽之炁，化生中央一炁，黃天，主小劫丑未、大劫辰戌九天炁交，黃帝行佩此文，防陽九之災。符如前文，當以黃筆書于絳縑三寸之上。

南方梵寶昌陽丹靈真老赤帝符命

玉音吐炁，素奏以御。保命定仙，玉曆定封。




右洞陽之炁，生三炁丹天寶，南方赤帝治，九九運周，陽炁激，大劫終，佩此文，度災橫，見太平。以丹筆書之。

元始赤帝真符

召直符昌中守靈寶天文。道士吞之，靈炁鎮心，生丹精寶華三葉，神為役使，通靈致神仙。

直符昌中止道統御。




右上陽明文，出赤帝真文篇，以安南方三炁之天。赤帝受此文，以鎮南嶽，封一通南霍山阿，四萬劫一開。道士命屬南嶽，赤書黃縑，佩身，並本命日朱書，向南服之三枚，直符祝昌中隨符入腹，心府之中，三年皆生赤精寶華，三重光映于形外。又當赤書黃縑，內神杖次青帝下節中，太丹玉女三人侍衛。勿致不精，當有考吏。修真之子佩服前符篆，南向叩齒三通，想赤炁入心中，生三重華光，徹映胸後，書符置前，呪曰：


丹華流映，寶芝生光。神情徹幽，散靈八方。直符攝炁，嘯命朱童。三精敷煥，注我絳宮。赤神安鎮，五香溢充。洞映形外，表裏發光。身生水火，獨步飛行。前訣說別呪者，此呪是也。南方梵寶昌陽丹靈真老赤帝三元符命正一命人，長生上天。



右三炁丹天下元，小陽九辰戌、小百六丑未，其年土中生火，萬物自死，靈寶赤帝出下元符，下南嶽，保存萬物，安國康民，制三炁丹天分度，以度學者之身。赤書黑縑，萬川洪流符吏，水母竭焉。



右中元，大陽九亥、大百六子，其年火滅水出，赤帝出中元符，下南嶽，度兆民災，制天分度，消滅水火之戾。赤書黑縑，日月力出王平山東，火災不起，人民臣。



右上元，大劫交周，天地改易，金玉山海，人民鳥獸，一時滅盡，天地溟滓，無復光明。赤帝出上元符，下南嶽，保度萬物，制九天炁，以度學者。其三元符命保固丹天元始之炁，佩之，皆得始分之中。其此文九千年一出。南嶽赤帝云：大劫交周，當刻書金札，以佩身，赤書黑繒。

右玉皇誥命，以錫南方梵寶昌陽丹靈真老赤帝三炁天君，令統御南方諸天諸地、日月星宿、名山靈洞、水府泉宮上聖高尊、真仙聖衆、一切威靈。符命所臨，如誥奉行。

中央玉寶元靈元老黃帝所受神呪誥命：

中央總靈，黃上天元。始生五老，中皇高尊。攝炁監真，總領羣仙。典錄玄圖，宿簡玉文。催運上炁，普告萬神。

中央總靈黃上天元
始生五老中皇高尊
攝炁監真總領羣仙
典錄玄圖宿簡玉文
催運上炁普告萬神

朔夜盛興極輝輝
其於真炁真炁炁
炁炁炁炁炁炁炁

右篆是前四十字，黃帝祕文，書于太玄玉寶玄臺，主召神仙，玉簡宿名，總歸仙器。

鎮星輔脾，迴度北元。魁魁主非，截邪斬姦。魍魎魍魎，掃穢除氛。魍正玄斗，明度天關。九天符命，金馬驛傳。

鎮星輔脾迴度北元
魁魁主非截邪斬姦
魍魎魍魎掃穢除氛
魍正玄斗明度天關
九天符命金馬驛傳

右篆是前四十字祕文，書于玄都玉臺，主攝星官，正天度數。救攝北帝，遏塞鬼門。翦除不祥，莫有當前。

序強蒼怒曼豐眾頭
茲際丙陰發所苗家

右篆是前十六字祕文，書于玄都玉臺，主攝北帝，正天炁，檢鬼精。

中山神呪，召龍上雲。制會黃河，九水河源。不得怠縱，善惡悉分。千妖萬姦，上對帝君。莫有干試，太陽激憤。赤書玉字，宣告普聞。

中山神呪召龍上雲
制會黃河九水河源
不得怠縱善惡悉分
千妖萬姦上對帝君
莫有干試太陽激憤
赤書玉字宣告普聞


運示炁候落於運炁
炁示炁候落於運炁

右篆是前四十八字祕文，書于玄都玉臺四壁，以攝中海水帝，四泉之水，洪災涌溢之數，主召水神，止蛟龍事。

右《中央一炁靈寶玉篇真文》，合一百四十四字，皆太上無上大光明圓滿大神呪、空洞自然之書，一名《寶劫洞清九天靈書》，一名《黃天大神呪》，一名《黃帝八威策文》。

中央黃帝符


靈寶一炁天文，化生白帝炁，山陽之日，正斗屯乙，有物兮申爲上仙元。



右元一之炁，化生少陰之炁，素天，主小劫申、大劫酉，大運交會，洪災掃天，白帝行佩此文，得過大陽九。符如前式，當以白筆書文于黃繒三

寸上。


中央高皇玉寶元靈元老黃帝符命
總召天地，九天以制。同係王炁，上帝遙觀。



右元高皇之炁，生元一炁黃天寶。中央黃帝治，九九運終，陽炁激陰，炁勃大災，涌水彌天，掃穢，佩此符，得度天災，見太平君。黃筆書之。

元始黃帝真符

召四方直符守靈寶天文，保中央。道士吞之，靈炁鎮脾，生黃精寶華十二葉。神爲役使，通靈致神仙，直符中非三天靈文。




右總靈文，出黃帝真文篇，以安中央之天，黃帝受此文，以鎮中嶽，封一通嵩山靈洞之中，四萬劫一開。道

士命屬中嶽，黃書白繒，佩身，並本命日朱書，向王方服之十二枚，直符司中非隨符入腸，脾府之中十二年，皆生黃精寶華，十二重光映于形外。又當黃書白繒，內神杖次赤帝下節中，黃素玉女十二人侍衛。勿致不精，當有考吏。修真之子佩服前符篆，向王方叩齒十二通，思黃炁入脾之中，生十二重華光，映一身，後書符置前，呪曰：

總元高靈，回神四鄉。黃上散華，五帝交芳。流精散漫，十二重光。混合我形，萬神相迎。安鎮黃脾，養氣中方。保齡度劫，永鎮無窮。

前訣說別呪者，此是也。

中央高皇玉寶元靈元老黃帝三元符命
天徊月移，劫運無衰。




右一炁黃天，下元，小陽九申、小百六酉，其年霧障迷天，不分晝夜，靈寶黃帝出下元符，下中嶽，保存萬物，安國康民，制一炁黃天分度，保

度學者之身。黃書青繒。丁詢有命，勿句存獲為無育，見乾坤。



右中元，大陽九寅、大百六申，其年山川俱壞，黃帝出中元符，下中嶽，度種民，制天分度，固地炁，禳灾危。黃書青繒，出陽入陰，壞山川，九土欲崩，符不聽頽。




右上元，大劫交周，天地改易，金玉山海，人民鳥獸，一時滅盡，天地溟滓，無復光明。黃帝出上元符，下中嶽，保度萬物，制九天炁，以度學者。其三元符命保固中央黃天元始之炁，佩之，皆得始分之中。其此文九千年一出，中嶽黃帝云：大劫交周，當刻書金札，以佩身。黃書青繒。

右玉皇誥命，以錫中央寶劫洞清玉寶

元靈元老黃帝一炁天君，令統御中央皇天后土、日月星宿、名山靈洞、水府泉宮、上聖高尊、真仙聖衆、一切威靈，符命所臨，如誥奉行。

西方七寶金門皓靈皇老白帝所受神呪誥命：

西方素天，白帝七門。金靈皓映，太華流氛。白石峨峨，七氣氤氳。上有始生，皇老大神。總領肺氣，主校九天。檢定圖籙，制召上仙。



右篆是前四十八字白帝祕文，書于九天素靈宮北軒之上，主召仙氣，舉

仙道也。

太白檢肺，奎婁守魂。胃昂畢觜，主制七關。參總斗魁，受符北元。



右篆是前二十四字祕文，書于金闕玄窗，主攝白帝星官，正明天度。

赤書玉字，九天正文。攝召萬炁，普歸帝君。



右篆是前十六字祕文，書于九天金闕三圖之館，以攝六天鬼炁。

西山神呪，八威七傳。符水上龍，召山送雲。在所校錄，同到帝門。輔衛上真，斬滅邪源。若有不祥，截以金關。赤書符命，風火驛傳。


賜恩威澤心救羣燒
振弱茲滋短苒焚車
庫向必聖海致禁亞
蕪蕪茂庚斯柔忍
壽壽丙壽壽蕪蕪
怨毒林福美所魏快

右篆是前四十八字祕文，書于九天金闕三圖之館，主攝西海水帝，制水中萬怪、惡毒之精，召雲龍，以防旱之災也。

右《西方七炁靈寶玉篇真文》，合一百三十六字，皆太上無上大光明圓滿大神呪、空洞自然之書，一名《金真寶明洞微篇》，一名《西山神呪》，一名《白帝八威召龍文》。


西方白帝符

靈寶七炁天文，化生黑帝炁。上止五道，乙勿人迴遊兆子三天門。



右少陰之炁，化生太陰五炁，玄天，主小劫申、太劫酉，陽炁極百六乘九，黑帝行佩此文，度甲申大水洪災。符如前式，當以黑筆書于白繒七寸上，佩身。

西方七寶金門皓靈皇老帝君符命策駕五老，西盼九都。億劫同會，明定九河。




右元陰之炁，生七炁素天寶，西方白帝治，九九數，陰炁涌，陽炁否，九天炁交為太陽九之災。佩此文，其時則晏，鴻毛而高翔，觀洪波於天際。當白筆書其文。

元始白帝真符

召直符吏曲正，守靈寶天文。道士吞之，靈炁鎮肺，生白精寶華七葉，神為役使，通靈致神。

仙，直符曲正洪災度人。



右光天靈文，出白帝真文篇，以安西方七炁之天，白帝受此文，以鎮西嶽，封一通於金穴九掖洞中，四萬劫一開。道士命屬西嶽，白書黑繒，佩身，本命日朱書，向西服之七枚，直符吏辱曲正隨符入腹，肺府之中，七年皆生白精寶華，七重光映于形外。又當白書黑繒，內神杖次黃帝下節中。太素玉女七人侍衛。勿致不精，當有考吏。修真之子佩服前符篆，向西叩齒七通，想白炁入肺之中，生七重華光，映丹田，後書符置前而呪曰：

金靈七炁，素帶流分。金精童子，首建元巾。帶符攝炁，萬神會門。寶光奕奕，照我命根。安鎮肺華，萬劫長存。前訣說別呪者，此是也。

西方七寶金門皓靈皇老帝君三元符命西山注鬼，煥乎九天。醜力難逼，斬以金關。

右七炁素天，下元，小陽九亥、小百六子，其年人民萬物，被水漂蕩，靈寶白帝出下元符，下西嶽，保存萬物，安國康民，制七炁素天分度，以度學者之身。白書赤繒。日為正王陽生三，斬殺萬魔雲龍間。

右中元，大陽九巳、大百六午，其年兵革四興，白帝出中元符，下西嶽，度兆民，制天分度，除滅兵戈之戾。白書赤繒，上盈事巳，人身三道在一，一保人身。

右玉皇誥命，以錫西方七寶金門皓靈皇老白帝七炁天君，令統御西方諸天諸地、日月星宿、名山靈洞、水府泉宮上聖高尊、真仙聖衆、一切威靈。符命所臨，如誥奉行。

北方洞陰朔單鬱絕五靈玄老黑帝所授神呪誥命：
北方玄天，五炁徘徊。中有黑帝，雙皇太微。總領符命，仙鍊八威。青裙羽襪，龍文鳳衣。上帝所舉，制到玉階。

右篆是前三十二字祕文，書于天心北元玄斗中，主攝北方星官，正天炁也。

右篆是前四十字黑帝祕文，書于鬱單無量玄元紫微臺北軒之內，主召諸真人神仙圖錄。

北辰輔腎，斗牛衛非。女虛危室，豁落四開。璧總七星，執凶糾非。却灾掃穢，明道輪輝。

右篆是前三十二字祕文，書于天心北元玄斗中，主攝北方星官，正天炁也。

也。

北山神呪，激陽起雷。流鈴煥落，獲天振威。北艷所部，萬妖滅摧。

黃書賊眾淫炁虐厲

詭說禁符護靈邦煎

焚熨淫濁飛焚厥孽

右篆是前二十四字祕文，書于北方洞陰朔單鬱絕元臺，主攝天魔北帝，制伏惡神萬鬼事。

九河傾訖，鳥母羣飛。蛟龍通道，水陌洞開。赤文玉書，驛龍風馳。

危瀾龍飛共危孽

歛穢冠劫弱劫劫飛

劫危淫流禁炁逆邪

右篆是前二十四字祕文，書于洞陰朔單鬱絕元臺，以攝北海水帝，制水中萬精，主召蛟龍，興雲致雨，以負身。一本云：興雲致雨事。

右《北方五炁靈寶玉篇真文》合一百二十字，皆太上無上大光明圓滿大神呪、空洞自然之書，一名《本命紫微元神生真寶明文》，一名《北山神呪》，一名《黑帝八威制天文》。

北方黑帝符

靈寶五炁天文，化生青帝炁，三炁高王易遷川人司萬言。

右太陰之炁，化生少陽九炁，青天，主小劫亥、大劫子，陰炁勃，天地周。青帝行佩此文，度洪流大水之灾。符文如前，當以青筆書于黑繒五寸上，以佩身。

北方洞陰朔單鬱絕五靈玄老帝君符命北斗定命，九期景散，八極明，石玄滋。

右洞陰之炁，生五炁玄天寶，北方黑

帝治，九九交運，陰炁勃，陽炁激，九天炁交，天地大灾。佩此文，則免洪流萬厲之中。以朱書文。

元始黑帝真符

召直符尹豐守靈寶天文，道士吞之，靈炁鎮腎，生玄精寶華五葉，神為役使，通靈致神仙，直符尹豐開道赦鬼。


右通明文，出黑帝真文篇，以安北方五炁之天，黑帝受此文，以鎮北嶽，封一通於玄陰洞室，四萬劫一開。道士命屬北嶽，黑書青繒，佩身，本命日朱書，向南服之五枚，直符吏尹豐隨符入腹，腎府之中，五年皆生黑精寶華，五重光映于形外。又當黑書青繒，內神杖次白帝下節中。太玄玉女五人侍衛。勿致不精，當有考吏。修真之子，佩服前符篆，向北叩齒五通，想黑炁入腎府之中，生五重華光，輝映背後。書符而呪曰：

北上太玄，五炁徘徊。寶華五重，流光


煥暉。雲景鬱香，洞映太微。仰注我身，腎府鮮開。安鎮靈宅，萬神總歸。身生羽服，舉形自飛。前訣說別呪者，此呪是也。

北方洞陰朔單鬱絕五靈元老黑帝三元符命

上王適月命天仙，戊巳多力士，辟水源。




右五炁玄天，下元，小陽九寅、小百六卯，其年洪水連天，人民流散，靈寶黑帝出下元符，下北嶽，保存萬物，安國康民，制五炁玄天分度，以度學者身。黑書黃繒，三命正戊入力人，任曰遺患無為君。



右中元，大陽九辰戌、大百六丑未，其年天地枯旱，海底揚塵，人民焦

死，萬無遺一。黑帝出中元符，下北嶽，度兆民，制天分度，除滅旱荒之戾。黑書黃繒，適百百九君，有臣三千，此度己身。



右上元，大劫交周，天地改易，金玉山海，人民鳥獸，一時滅盡，天地溟滓，無復光明。黑帝出上元符，下北嶽，保存種民，制九天炁，以度學者。其三元符命，保固北方玄天元始之炁，佩之皆得始分之中。其文九千年一出。北嶽黑帝云：大劫交周，當刻書金札以佩身，黑書黃繒。

右玉皇誥命，以錫北方洞陰朔單鬱絕五靈元老黑帝五炁天君，令統御北方諸天諸地、日月星宿、名山靈洞、水府泉宮、上聖高尊、真仙聖衆、一切威靈，符命所臨，如誥奉行。

臣謹言曰：五老上帝分理五天，下地萬生俱屬統治，妙道生成之任，莫此

為尊。故玉帝初劫，昇以度人，弭災制魔，《玉篇真文》昇之，以接度學仙之人，昇之禳救星辰之災，又昇之息洪流，制魔害，無非所以厚生成之澤，使萬類各得其所也。五老既奉之，以守其職矣。猶恐帝恩之未博，生靈之未遂，故於玉帝放光之後，繼用啓陳，挈所受之真文，以授下世。吁，帝心之慈，如此其至也。而五老能廣而充之，豈非上聖之心均於仁愛也歟。前《五篇真文》，道書備載，書篆之式，施行之訣，悉詳見於諸經。今茲載於《本行經》者，特正文也。蓋《本行經》專主於誦念，故正文不可無，而雲篆庸可略？至若一切諸符、九炁諸炁真文、三元諸符，今並略之，刊於經末。修行者各當即行之，但真篆正文之誦，尤當嚴謹。蓋此文乃上帝誥命也。誥命之宣，萬靈聞之，莫不稽首。儻輕慢苟簡，視為常文，出入吻唇，姑為談戲，則懲責之酷，當如《報應品》中之載。誦經者，宜欽奉之。臣良謹言。

道言：是大神呪者，元始之妙言，玉皇之真誥，上清自然之靈書，九天始生之玄札，空洞之靈章，上聖之祕語，玉晨之尊典；成天立地，開張萬真，安神鎮靈，生成兆民，匡御運度，保天長存；上制天機，中檢五靈，下策地祇，嘯命河源，運役陰陽，召神使仙。此至真之妙文，神應自然，致天高澄，令地固安，保鎮五嶽，萬品存焉。玉帝昔授五老上帝。是時五帝跪捧其章，祕題靈都之館，天真皇人昔書其文，掌之於上清真境太玄玉都寒靈丹殿紫微上宮，累經劫運，而其文保固天根，無有毀淪，與運推遷。是大神呪混之不濁，穢之愈清，毀之不滅，滅之極明。大有之文，天真所尊，自光^③真名，帝圖刻簡，昭示^①來生，斯文隱祕，不得窺聞。有得之子，保萬氣長存。勤行修奉，克致神仙^⑤。

臣謹言曰：《五篇玉書真文》神功妙用，莫可測量，蓋得度人錄仙真文而施行之，則九天衆真紀名仙籍，降炁接度；得制星真文而施行之，則三

光照形，列曜削危，形神罔命，不罹殞傷；得制魔真文而施行之，則北酆畏威，萬魔束首，百邪敬慄，弗敢侵馘；得制水真文而施行之，則萬龍保身，水府欽畏，劫壞之日，可跨蛟虯而越九霄。吁，神功妙用，果可度量哉。但施行之訣，別有祕要，非世人皆可獲此效也。惟學仙之士，當做其訣而服行之。故經曰：有得之子，保萬炁長存，勤行修奉，克致神仙。臣既職校經，不敢不舉其要，以告來者。伏乞上聖垂鑒。臣良謹言。

洞玄靈寶玉皇功德品第三

爾時玉虛上帝白天尊言：唯願慈悲，願爲四衆、帝釋等及四梵天王、一切諸天、一切諸仙及未來一切衆生持是經人說利益事。

爾時天尊告玉虛上帝言：快哉斯問，不亦善乎。汝以慈悲，愍念衆生，故請問於我。天尊言曰：若有三界十方無

量國土、及國王大臣，或兵戈並起，疫氣大行，水旱蟲蝗，凶災饑饉，是其國君、后妃、太子、宰輔、大臣，當發慈悲，爲其黎庶徧救國內州縣鎮宰，令諸道流清淨嚴潔，于其觀內設大齋醮，六時行道，爲轉此經。當得國土清平，五穀豐熟，黎庶安泰。

臣謹言曰：世有言曰，干羽不足以釋圍，鄉飲不足以息戰。此事理之當然者也。夫剽悍禍賊，始從事於干戈，寇賊姦宄，始容心於兵革，非智術有以過之，勇力有以勝之，決未可以挫其威虐也。乃今《玉帝經》中謂，干戈並起之難，當救國內臣庶，命道流誦真經以息之，何其迂誕也哉。吁，是大不然也。夫天變上臨，則地禍下作，干戈兵革，莫非自夫陰陽拂逆，躔度汨亂，乃始流災而起亂。今觀往昔之圖讖，則可驗也。是以經中之訓，俾國家值亂，則以斯而禳援，蓋所以請命上天，消天變而息地禍，非謂以斯經而止亂也。若夫厲兵秣馬，高城深池，寧可一日廢

哉？昔有庸君，識見窒昧，乃直謂釋老經呪可以禦敵，旋罹禍難，至貽哂誚，迄今為羞，良可嘆也。今世昧夫，凡睹是經，率執此為謗毀之自，敢因校經而辯之。臣良謹言。

若復有人，入諸山林，遇毒惡獸，但能存想，一念真經，山神衛護，猛獸自退，終不害己。若入江入海，採寶求珍，值遇惡風，如法持念是此真經，風浪頓止，安穩達岸。若在軍陣，戈戟既接，兩刃相交，存心默念是此真經，是諸惡賊，悉自退散。若在牢獄，枷鎖之中，淨心定慮，存念真經，冤枉自伸，即得解脫。若為邪精鬼賊衆苦所加，如法持念是此真經，衆邪遠避，自然除愈。若人為求嗣息，如法尊重，持念此經，帝敕天曹明檢丹籍，九品之內，四果仙人，運應數合，降謫下生，為其作子，才辯明慧，人中尊貴。若婦人臨難之月，如法持念是此真經，即得母子平安，生福德男女，人所愛敬。若為求官進職，爵祿亨達，貴遇人君，如法持念是此真經，即得職務遷轉，子孫榮遇，世世不

絕。若人欲求資財殷富，如法奉持是此真經，即得財寶充溢，衣食自然，慶流子孫，傳之萬世。若人被諸惡星之所照臨，困苦牀枕，如法持念是此真經，是諸惡星，返降吉祥。若人命過，應入地獄，注名惡籍，父母師長、夫妻男女，當為亡人持念真經，或安置道場，幡花供養，即得亡者鬼籍盡除，神生淨土；同苦罪衆，咸蒙護度，承斯勝利，皆生天上。又此經所在之處，常有十天至真大聖無極飛天神王侍衛供養，持是經人，當得自稱為正一真人。是人在處，自得十方至真至聖金剛力士潛護其人，如護己身，若出若入，遊行之處，百邪避路，魔鬼殄除，精靈伏藏，一切災殃，不能侵近。是持經人命欲終時，更不見諸地獄惡相，即見天宮一切玉女持幢下迎，而生天上；如天福盡，下降人間，即得千生萬生中常為帝王^⑥，令國土清平，人民樂業，兼得為王，獲宿性通^⑦，遵奉大道，展轉修持，至登道岸。是持經人獲福如是。又若有持是經人，若雨下時起大悲心，如法

向空念此經三卷一徧，其雨所霑，面所向方一切衆生，五逆十惡、一切重罪，悉皆消滅，一切重病，便得痊愈。是諸衆生，命終之後，不墮地獄，神生淨土，蓮花化生，何況持是經者。又若有持是經人，若行於道路，值大風起吹，是持經之人觸身之塵，是塵所霑，一切衆生一切惡業，悉皆滅盡，更不墮三惡道，當生天上。故知持經功德，不可思議。是持經人若在江、在河、在海，沐浴其身，是水所霑，其中衆生、魚鼈龜鼉、一切水族，是諸衆罪，悉得除滅。盡此一報之身，命過之後，更不受胎卵濕化一切等身。是持經人，口出一切語言，或善或惡，一切天魔外道聞者，皆是清淨法音。是持經人，若遇諸神廟，能為其神誦詠是經，是諸鬼神得聞是經，即脫鬼趣，登真仙道，恭敬是人，如奉是帝。若人在世，不孝父母，不敬三寶，殺生偷盜，邪淫妄語，作種種極重罪業，將命終時，若有道心正信衆生，于是亡者未氣斷時，起大悲心，于其頭邊念帝尊號，或一七、二七、三七、

四七，乃至百徧、千徧，是其亡者生前所造諸不善業，悉得消滅，更不墮諸惡趣，神昇九天，何況受持是此經者。又若復有人，自從往劫，乃至今身，輪轉人天，漂沈世域，積千愆萬過，在於己身，若遇是持經人影暫映其身，如爲帝光之所攝受，或與同語，或聞其聲，如奉帝言道語慰諭，彼人罪障，永得除滅。又若持是經人，造作長旛，書帝名號于其旛上，懸諸長竿，或是觀宇，或在家庭，是旛被諸風吹，所指方面，一切衆生皆霑勝利，一切惡業悉得除滅。又若有持是經人書帝名號在一切有聲物上，或鐘或磬，鈴鐸鑊鉢，一切道具，法事之屬，或以道場，或以戲擊，或被風觸，是聲出時，或遠或近，一切衆生，聞是聲已，所有罪障，悉得清淨。又若有持是經人，了悟生死，深入山林，修真學道，或時登臨，上山顧望，目所及處，山林溪谷，含生品類，有形無形，胎卵濕化，動植飛潛，種種諸類，所有罪業，永得除滅，身心清淨，命終生天，何況受持是此經者。當知是人即是道藏

功德身也。

臣謹言曰：天尊之語，實而不虛，真而不妄。其片辭隻字，曷嘗若發，凡世昧者識未通真，見不詣遠，或於諸經苟有少可議，則遂從而疑之，以爲世無是理也。嗚呼，是人也，奚不詳觀熟究，耽研咀味，而曲求其旨哉？《功德品》中天尊說持經之人所得功德，如所謂死而生天，天福之盡，當得千生萬生中可爲帝王，與夫持經之人誦經於雨下之時，涉途於風起之際，至於沐於水，觀於山，現於影，能昇一切衆生罪惡消除，獲大功德，以爲無有是理。彼蓋謂帝王之福，高而無踰，非誦經之功可得而獲證也。況千生萬生常爲帝王乎？彼又謂誦經之福及一身可也，衆生極重過惡、四生積愆受報，此天憲之確，纖毫不移，使經百劫而不亡，果報猶當自受，焉可以誦經之身，一歷其所而頓能解脫，且獲福德也哉？斯人之語，蓋知其一而未知其二也。且夫行堯之行，即堯之身，希顏之人，

亦顏之徒。今有人焉於是經也，朝於斯，夕於斯，趨亦趨，步亦步，於《本行經》中誦其言，行其事，咀其華，含其英，做十大妙行而服行之，敬斷障諸戒而離遠之，守之以堅，持之以誠，愈久而不渝，受撓而不變，日漸月漬，混然與玉帝之身如出於一，或陟或降，在帝左右，則彼身乃帝身也，帝身亦彼身也。身既混融，則功德之成，豈有異哉？玉帝放光，神化若是之廣且大，則今茲誦經之人，所歷所至，其福蔭衆生，亦猶帝恩、帝光之所暨及也。雖然，斯言也，天尊謂誦持斯經而純與帝合者矣，非謂入耳出口徒曰誦念者言也，然而自入耳出口，誦念不替，充而至於與帝之合，則正一真人之自稱，殆亦未可以表其德操也。學士宜思而行之。臣良謹言。

爾時天尊謂玉虛上帝言：今我略說，未盡其妙，若廣說之，凡流邪見，疑惑不信。是經功德，窮劫難言。爾時玉虛上帝聞是說已，心生歡喜，不勝踊

躍，瞻仰慈顏，稽首而作頌曰：

九天之上，謂之大羅。玉京金闕，雲層峨峨。中有天帝，仁慈惠和。至道無敵，降伏衆魔。天寶靈符，玉律金科。神仙億萬，幢幡衆多。聞者罪滅，永出愛河。是號玉皇，穹蒼真老，妙圓清淨，智慧辯才，至道至尊，三界師，混元祖，無能勝主，四生慈父，高天上聖，大慈仁者。十號圓滿，萬德周身，無量度人，拔生死苦。

爾時玉虛上帝說是頌及十號已，是諸天衆異口同音，歎未曾有。

臣謹言曰：事悅於心，辭溢於外。故玉虛上帝之讚，推尊稱頌，極言苦談，求有以盡玉帝之德。吁，帝德之大，其可言盡哉。臣敢以不言為稱讚，庶與玉虛上帝相表裏云。臣良謹言。

高上玉皇本行集經卷中

③「光」，原作「無」。茲據白文本改。

④原脫「昭示」二字。茲據白文本補。

⑤「克」原作「刻」。茲據白文本改。（下同）。

⑥「帝王」，白文本作「國王」。

⑦「兼得為王獲宿性通」，白文本作「常得宿性通明」。

高上玉皇本行集經卷下

天樞上相臣張良校正

天真護持品第四

爾時昊天上帝聞說經法，從座而起，長跪帝前，白言玉^①帝，願為大衆及諸人天持是經人說利益事。

爾時玉皇尊帝興方便意，開利益門，宣玉匱科，傳靈寶法，告於昊天上帝言：汝今諦聽，當為汝說受持功德，扶危拔苦，利益存亡、神妙之事。衆真稽首，俱發聲言：弟子臣等，今日幸聞湛然常住之法，莫不上福三界諸天，下消三塗毒害。惟願慈悲，愍臣等故，演斯妙義。玉帝告曰：若有衆生，孝養父母，恭敬三寶，竭忠於君，不殺不盜，不淫不妬，不嗔不恨，不驕不詐，奉戒持齋，冥心大道，生尊重心，誦持是經，我即敕下周流沙界，徧傳十方無極世界。敕命東方東華帝君青騎、神仙兵馬、無鞅數衆，悉令下降，覆護受持是此經者。敕

①「永」，白文本作「念」。

②「聽」，原作「視」。茲據白文本改。

命東南搏桑大帝與其部衆、神仙兵馬、無鞅數衆，悉令下降，覆護受持是此經者。敕命南方朱陵大帝赤騎、神仙兵馬、無鞅數衆，悉令下降，覆護受持是此經者。敕命西南太華元老與其部衆、神仙兵馬、無鞅數衆，悉令下降，覆護受持是此經者。敕命西方皓靈黃老白騎、神仙兵馬、無鞅數衆，悉令下降，覆護受持是此經者。敕命西北皇天上帝與其部衆、神仙兵馬、無鞅數衆，悉令下降，覆護受持是此經者。敕命北方紫微帝君黑騎、神仙兵馬、無鞅數衆，悉令下降，覆護受持是此經者。敕命東北沖虛天君與其部衆、神仙兵馬、無鞅數衆，悉令下降，覆護受持是此經者。敕命中央天皇大帝崑崙蒼老黃騎、神仙兵馬、無鞅數衆，悉令下降，覆護受持是此經者。敕命上方來和天君、名山大洞神仙兵馬、無鞅數衆，悉令下降，覆護受持是此經者。敕命下方一切金仙、四衆八部、及諸眷屬，悉令下降，覆護受持是此經者。敕命十方飛天神王、飛天大神、三官四聖、二

曜九星、北斗南斗、東斗西斗、中斗、二十八宿、周天衆星、金剛力士、神王等衆，各與部衆，悉令下降，覆護受持是此經者。敕命降魔力士、四天門王、五嶽四瀆、及餘諸山、四海九江、十二河源、山林川澤、一切主者，令與眷屬，覆護受持是此經者，諸險惡處令得安穩。敕命所在一切土地靈官、并溝渠等一切諸大力鬼王，皆令覆護受持是此經者，令衆魔外道，悉皆懾伏，潛形遁迹，高飛海外，遠避他方；如是山林社稷祠廟血食之賓、一切鬼神，當自消滅；五方行病瘟疫鬼帥、諸惡鬼神、并風王水怪、孽龍妖神、土精木魅，盡自消滅，五虛六耗，夢寐乖常，野道呪詛，蠱毒之類，皆自消滅；心欲願者，一切如意，皆得滿足。是持經人，或不依科教，未能修齋，未具淨戒，以能信受尊重，景慕是此經典，並同修齋、護淨戒者。是人功德，坦然無礙，自在逍遙，號人中聖，德慧長新，同諸真人。

臣謹言曰：誦經功德，天尊已嘗於前品言之矣，今昊天上帝猶以為未悉

也。復於茲時，再用啓請於帝前，求有以周悉之。此蓋上聖慈心之切，必欲導斯人以持誦之事，而望上帝以優渥之恩也。玉帝悲願，廣大無際，故於茲時，宣示明敕，始終備至，了無纖末之遺。始於東方，而終於十方萬靈，罔不畢舉。是欲世之含生凡克於經效心，則在在靈祇莫不協祐也。然帝敕之重，雖皆周悉，而玉敕之宣，首以盡忠、盡孝等事為始，蓋必能忠孝恭敬，不殺不盜，不淫不妬，不嗔不恨，不驕不詐，奉戒持齋，冥心大道，一一皆如帝言，則十方萬靈然後護持，如帝之敕。使其未然，則雖饒饒吻頰，予未保十方萬靈果悉加護也。雖然，淨戒之具謂前忠孝等事也。固玉帝責望之嚴。然三界有生，根品有間，苟不別智愚而一，以是責之，則淨戒之具，難乎其人也。帝德慈憫，仁愛洪大，故於宣敕之末，復出玉音，曰：或不依科教，未能修齋具戒，以能尊慕功德，德慧同諸真人。吁，此非玉帝之

慈，不以絕法待天下，寧有此敕哉？
鈍根下士，宜體帝敕，先降尊重景慕之心，增而上之，以冀十方萬靈之祐。然不可謂帝敕容以未能修齋具戒而安於怠慢焉。臣良謹言。

爾時昊天上帝聞是說已，即於帝前，乃為歌曰：

大哉至道，無形無名。渺渺億劫，黃道開清。神清朗耀，九魂吐精。玉虛澄輝，太霞高明。玉皇開化，溥度天人。三元道養，二象攝生。朽樹故根，已枯使榮。蠢動蛸息，長生化形。懷胎含孕，俱得生成。亡者命過，魂歸三清，魄受鍊度，南宮飛昇。今日大吉，皆得光明。五帝鑒映，普告萬靈。天神地祇，及諸河源。五嶽四瀆，及諸名山。洞玄洞虛，洞空洞仙，無極大聖，至真尊神。無窮無極，溥監度生。惡根斷絕，玄都記名。衆真班列，咸聽帝言。經是帝敕，保誦持人。至度道岸，無使灾侵。我奉帝命，一切咸聽。

爾時昊天上帝說是歌已，告大衆言：此玉皇妙法語、諸聖祕密言，路絕道

斷，微妙難思。巍巍大範，為神明之宗，保鎮國土，拔度生死。爾時昊天上帝說是語時，法筵清衆咸仰道言，溥得開悟。于是天尊而說偈曰：

玉帝功德大，玄理極幽深。生於浩劫前，運化於古今。我今說妙經，愍念諸有情。此誠極妙法，功德中功德。名號最上乘，無比為第一。大光明王尊，威德聖希有。能破暴惡魔，皆令心降伏。能滅極重罪，皆令得清淨。若人聞是經，或聞是帝名，稽首生恭敬，一切罪消滅。十惡四重業，五逆害父母，信心一稱名，隨聲盡消滅。保護人天衆，四相與五衰，三途極重苦，人間凡戾難，凶年饑饉喪，毒藥及厭魅，刑獄與冤家，軍陣鬪戰苦，山林惡道中，虎豹豺狼等，江海毒龍類，迅雷風雨雹，水火及盜賊，蠱毒所中心，失志發狂亂，蛇蝎毒惡蟲，邪魔凶怪神，伺求人便者，由持是真經，普皆自散滅。惡病久沈綿，夢寐亦不安，非理欲殘命，殄滅不為殃。緣遇是經故，安穩得自在。所有希求願，財寶及富貴，以此經功

德，如意皆稱遂。神威自在仙，衆德十曜，三十二天主，二十八宿王，靈妃玉女等，天神及地祇，三界虛空神，江海諸龍王，水火及風神，宮殿與宅舍，山林樹木衆，溝渠井泉神，由持是經故，一切皆擁護。衣食常自然，子孫居富貴。出言人希聞，所至皆恭敬。若為求男女，誦持此真經，帝詔下天曹，落籍天仙人，降謫生其家，為其作男女。顯貴人崇重，七祖盡昇仙。光大慶其門，延及父母親。吉祥常熾盛，灾障不能侵。是故我今說，大衆宜諦聽。慈悲度一切，皆令達上清。

于是天尊普告四衆：凡人持念此經，受誦帝名，皆道根深重，宿有善緣。此經尊妙，普度天人。但精心恭奉，家國安寧，保命度灾，掃諸不祥。天子王侯得奉之者，致國太平，凶寇自夷，邊域不爭，兆民歌唱，普天興隆。運推數周，正道當行。有得之者，天真妙重，祕之祕之。

臣謹言曰：玉帝之敕，其丁寧周悉，已極其至也，而昊天上帝之讚、天尊之

偈，猶至於委曲周詳如此。蓋上聖高真，愛人念切，以故發揚印證，不憚諄復，必欲俾衆生之信奉也。帝敕若是，而天尊天帝之言又若是，則持誦之效，當決如經之所載也。臣良再出斯言，奉勉衆生宜崇信之。臣良謹言。

洞玄靈寶^②報應神驗品第五

爾時慈悲度厄真人、尋聲救苦真人、濟生度死真人、萬福護身真人，俱從座起，越班而出，俱白天尊言：若諸世末凡夫，雖宿有善緣，得遇是經，被諸邪障之污，本末疑惑，不信是經功德，如是之人，見在、過去於諸地獄得何罪報？惟願聖慈，說其報應惡趣之苦。是時天尊謂四真人云：若諸世間剛強暴惡不善衆生，終日竟夜，對諸道像，無恭敬心，出誹謗語，是罪當墮五無間獄。若得值遇是持經人，設諸方便，誘引勸諭，如是之人暫滅惡心，信向是經，彼人罪業淨盡無餘。又若有邪見

愚執惡人，嗜持是經，生諸惡逆，偏眼邪視，乃至起一惡心，發一惡言，謗黷如是持經之人，其罪過是，命終之後，墮大地獄，永無出期。何況世間衆生，得遇是經，不生敬仰，穢手污觸，葷口讀誦，牀榻不淨，便將安置，或讀是經，講習俗語，共同戲笑，以爲常典。如是之人，命過之後，墮無間獄，永無出期，殃緣九祖，受考酆都，累及後世，害纏子孫。是人于地獄中，歷無量劫，受大苦惱，遇無邊聖，累承救拔，罪惡小減。又遇聖人救拔，得出生餓鬼中，歷千萬劫，不聞漿水之名。鬼報得出，生畜生中。畜生報出，若生人中，更生邊夷、外道，而復女身，貧寒困苦，癯殘百病，受無量苦，人所棄擲，求生不得，求死不得。輕斯經故，獲罪如是。又若復有人，初雖信受，後復慢易，善惡童子，上奏三官，黑簿添名，青編減筭，身歿之後，拘閉幽牢，往復三途，無由解脫；或於現世受種種病，疥癩癰疽^③，以爲果報^④，憂悲苦惱，日夜相煎；而身或被橫惡所加，或牢獄繫鎖，非分自

害，誤食毒藥，或被虎狼毒蛇之所食噉，或爲冤家之所讎對，或行山林，值遇惡人，被他屠割，推落崖岸，或被邪精魍魎之所殘害，或值水火之所焚漂，或被刀兵之所橫誅。輕斯經故，橫喪天年，獲如是果。可不悲歎，可不痛歎。故報汝等，依此奉行，勿生邪念。若諸念不生，萬緣頓息，塵沙惡業隨心消散，一切灾魔自然殄滅，此之功德，不可思議。是誠無比最上妙法，諸經之王，有大利益。非人勿示。人能不生邪念，頓息業緣，是謂大利益法門也。若諸天人，五衰四相，輪迴侵逼，能捨除妄想，受持是經，坐招自然，天福益固，身度三界，與道長存。是此經典，無與等，無能勝，是大威德，大神呪，能令一切枯槁便生枝葉，花果茂盛，能除衆生極重苦惱，能令短命衆生而得長壽。此經功德，不可思議，歎莫能盡。若不宿植道種^⑤，廣種福業，乃至名字亦不得聞，何況得見是經。依三洞真格，八萬劫一傳。此清都至真上聖所寶，祕於玉京金闕宸宮，甚爲微妙，難可得遇此

經^⑥宿有仙骨，當爲九天真仙之人，得遇斯文，承斯緣故，後當齎金寶，從盟師受之^⑦，方當乘機應運，乃可付焉。不得輕泄，敬之慎之。

臣謹言曰：臣嘗聞之經書曰，諦觀法界性，一切惟心造。此語如宣說，以爲破地獄偈。是知心生則地獄生，心滅則地獄滅也。心之生滅，地獄之有無，況心不止於生而又至於起惡哉。是以《尊經報應品》中謂凡夫造罪，無量無邊，苟能暫滅惡心，則一切罪業遂至於盡淨無餘，而起一惡心，則其罪其殃，有非言之可盡者。是知方寸之間，乃利害之機、升沈之本，豈容不謹之、畏之哉？品中下文又載一切天人，或有五衰四相之起，能捨除妄想，則天福益固。蓋想者，即心之所起也。人與天相去遼邈，然升沈利害，切由一心。吁，心果可縱哉？心果可晦哉？儻一切衆生，未能俾心之不生，則亦宜勿起惡心，捨除妄想，使諸念不生，萬緣頓息，庶幾塵沙惡業隨心消散，得以

爲善人。君子之歸則於斯經，乃爲無愧。所謂灾魔之殄，萬靈之護，帝恩之及，當如影隨形也。又能廣而充之，俾心若太虛，內外貞白，無所不容，無所不納，直詣天尊真一不二法門，高證清淨解脫之道，則一十二真人之位、玉帝三身之果，有不難至也。衆生宜勉之。臣良謹言。

於是天尊重宣此義，爲說偈曰：

設使江河水，波浪能生蓮，慈烏毛能白，如經故難遇。設使龜生毛，堪採爲衣服，夜月能消冰，如經故難遇。設使蚊蠓足，堪構爲舟橋，能載一切重，如經故難遇。設使黃口雀，能銜諸大山，擲之他方界，如經故難遇。設使一葉舟，力能載崑崙，浮渡於大海，如經故難遇。若使諸水蛭，口能生巨齒，其大如象牙，如經故難遇。設使蓬蒿葉，能覆無鞅界，蔭芘無鞅衆，如經故難遇。設使烏梟類，同樹一巢棲，銜食共相食，如經故難遇。設使兔生角，堪用爲梯磴，上窮有頂天，如經故難遇。設使驪鼠等，緣於兔角梯，至天能食月，如

經故難遇。設使驢顏唇，色如蘋婆果，復能作歌舞，如經故難遇。設使蠅蟲等，能飲鐘石酒，迷荒而沈醉，如經故難遇。

爾時天尊宣說偈已，溥告^⑧四衆：是故持是經人，名功德身，一切有情，被其蔭故。持是經人，名神通身，一切吉祥，咸臻集故。持是經人，名清淨身，是諸惡業，不能侵故。持是經人，名威德身，天魔異道，不能攝故。持是經人，名無等身，上帝遙唱，萬神敬故。持是經人，名堅固身，惡劫大難，不能損故。持是經人，名道藏身，口出語言，鬼神仰故。持是經人，名慈悲身，六道衆生，賴其善故。持是經人，名大道身，出入所在，無怖畏故。持是經人，名良醫身，善行妙法，安樂人故。持是經人，名光明身，常爲帝光，所攝受故。持是經人，名自在身，天宮妙境，神能遊故。持是經人功德，說不可盡。

臣謹言曰：天書仙格，不可泛示下世，故經中動以勿示非人、妄傳輕泄

為戒。然末世衆生，昏迷不悟，儻不示以徑級，則善念不萌，功德無積。所以天尊說經，雖以寶秘為戒，而玄蘊妙義，輒宣剔之不惜。此蓋上聖之慈憫也。臣奉旨校經，敢援是則，所以採摘妙義，列造經中。今經中修證果位雖未嘗準經文之示三，輒為傳之。《報應品》中載天尊言，持經之人所證諸身天府，今列此為真人之位，謂如名功德身，即功德真人之位是也。衆生有能勉奉是經，誦持不退，當直證此真人之位。今四天選舉司見有陞陟是位者。衆生宜堅確念慮，口誦心持，俾勿犯諸戒，俾依如玉音，求以上證此品，則九族蒙恩，七玄受鍊，非獨此身減災得福也。敬信無怠，同會瑤華。卑言苦祝，望毋疑惑。臣良謹言。

目靜思，存想是經，不覺身處五雲之內，俄見其身光明赫奕，上昇天宮，衆真下迎，心有所請，一切應奉，仙丹妙寶，隨意自取。故當依科閉心，奉行此經，乃至三世金仙、十方大聖，皆從此經，依按修奉，故頓得超證無上妙道。是此帝也，諸天之師，衆聖之王。是故凡夫值遇是經，致五帝輔翼，召使神仙，御役神官，運導陰陽，千靈敬仰，萬神懾伏，百邪避路，羣魔束形。命過之後，即得南宮受鍊，飛步上清，逍遙自在，與道長存。又設復世間衆生會聞是經，心常渴仰，能於家中擇清淨處，畫帝形像，日夜虔虔，晨昏濟濟，香花燈果，尊重供養，稱名瞻禮，是人當得三十種上妙功德：

一者諸仙讚重，二者先亡生天，三者宿殃解脫，四者所往通達，五者無盜賊事，六者所求遂心，七者除水火厄，八者橫事潛消，九者夜夢吉祥，十者疾病不臨，十一者智慧聰明，十二者人見歡喜，十三者衣食豐盛，十四者子孫榮貴，十五者六親見喜，十六者門族和睦，十七者除三惡報，十八者轉女成男，十九者形容端嚴，二十者為國大臣，二十一者生為帝王，二十二者鬼神欽仰，二十三得宿命通，二十四者諸神護念，二十五者九族受蔭，二十六者處世長年，二十七者有情賴善，二十八者魔王保迎，二十九者決超三界，三十者白日上昇。

爾時天尊復告四衆：此經功德，能碎鐵圍諸山，竭苦海水，破大地獄，拔重罪苦，降暴惡魔，護諸國土，能滅一切惡鬼，能除一切重病，能解一切惡毒，能離一切惡人，能伏一切毒獸，能摧一切邪道，一切諸天，皆令降伏。其餘功德，說不可盡。爾時道場大衆、金仙菩薩、真聖眷屬聞是說已，歡喜踊躍，稽首敬禮，而作頌曰：

大哉至道，無宗上真。上度諸天，下濟幽魂。上無師祖，惟道為身。丹臺紫府，金闕玉京，祕此妙法，溥福含靈。滅我萬罪，增我遐齡。萬神朝禮，魔王保迎。功德昌盛，黃籙書名。渺渺億劫，使我長存。

於是衆等說是頌畢，稽首歸依^①，奉辭而退。

臣謹言曰：尊莫尊於諸天也，而大彌羅天乃天中之天；貴莫貴於諸帝也，而玉皇上帝乃帝中之帝。故天尊言曰：是此帝也，諸天之師，衆聖之王。惟是帝處至尊至貴之位，無與等，無能勝，是以衆生能萌尊重之心，則功德無有與之並者。或起輕慢之心，罪報亦無有與之並者。所謂三十種上妙功德，特天尊舉其要略，而品中具載罪報，亦天尊姑言其梗槩也。衆生苟有慶幸，得觀是經，宜三復玩味。即良此言，始終反復，觀之於是經也。留神儲思，勉勉誦持，積至三年，功德無量。臣既奉校經之旨，謹專具奏，仰乞帝旨，專署一司，校錄誦持《玉皇本行經》之人所積功績，以示神報。帝德慈憫，必俞所請也。經末示此，衆生宜知之。臣良謹言。

高上玉皇本行集經卷下

①「玉帝」原作「上帝」，茲據白文本改。

②白文本無「洞玄靈寶」四字。

③「疽」原作「症」，誤。茲據白文本改。

④「果報」，原作「莊嚴」，誤。茲據白文本改。

⑤「道種」，白文本作「道本」，是。

⑥白文本無「此經」二字。

⑦「從盟師受之」，白文本作「從師告盟受之」，是。

⑧「溥」，白文本作「普」。

⑨「會聞」，白文本作「曾聞」，是。

⑩「離」，原作「滅」。茲據白文本改。

⑪「歸」，白文本作「皈」。

奏陳表文

臣昨奉詔，校正《本行集經》，恭準宸翰，令臣俟畢奏陳者。臣聞：垂世立教，捨上智以奚堪；刪詩定書，必聖人而後可。蓋典誥示斯民之繩準，而詰訓爲格言之筌蹄。儻一字之弗諄，實萬世之取誤。故述而不作者，先哲所重；而辭弗能措者，大儒莫膺。信系屬之非輕，致倚任之不易。恭惟《玉皇本行集經》祕傳金口，妙蘊瓊宮，下仙難可獲聞，濁世罕能忽見。玄義邃滄溟之遠，真機崇崑嶽之高。言言彰解脫之門，語語鼓清淨之吹。嘆之莫盡，即以奚窮。偶歷時之過多，忽傳本之致誤。點霧固何傷於日月，小疵庸曷損於瓊瑤。豈期聖慮之過慈，猶欲寶文之全善。誕頒溫詔，寵命愚臣，俾據狂斐之才，直膺謔證之職。綸音震響，耳然眷聽之琳琅；宸翰揮揚，豁爾塵襟之開廓。臣遜辭惟切，委畀寔隆。顧猥賤之非材，第忪慄而抱愧。重付眷

懷之難拂，用驅駑質而敬承。喜懼交馳，謙伏靡暇。敬竭燭火之見，仰助陽暉之明。於卷首則摘品而分章，至次編則總意而明義。證譌謬者三十有八，更乖誤者四十有三。雖始終品秩，猶未殫參校之全；而前後句音，尚不罄搜抉之備。第爲人世流傳之久，恐重民間疑惑之多。姑令大體之弗疏，故即小節而致簡。至如指摘譌舛，不敢如布縷之詳；抉剔幽玄，未獲若開條之悉。蓋慮多多爲語，乙乙必書，繁則取厭於翫閱之勞，演則賈疑於參味之審。其他更革，悉未周完。謹繕錄以進呈，乞矜容而閱視。儻有纖毫之裨補，願干明詔之頒行。或乞申命有司，再詳要義，庶免《三傳》散《春秋》之誚，及無九師微《易》道之譏。臣良劄抉肺肝，玷塵聰眷，併丐哀原冒昧之責，俾得服勤職守之卑，誓竭金石之誠，上荷海嶽之惠。臣良下情無任，瞻天望聖，悚慄戰懼，俯伏待罪之至。謹具表奏聞，伏候敕旨。

年月日 臣良表。

恭準批答云

詳奏及閱所上校正經文訖。卿仁念粹和，文華煥燦，精效參詳之思，審加訂證之勤。豈徒謬語之復真，抑且妙義之抉奧。矧襟懷之溫厚，故文字之清醇。灼識情誠，重勞精思，宜下玉宸內殿收貯，及頒詔諸天，從此誦持；並可命南洲及諸洲演化衆真照此傳行，毋得褻慢。外賜爾九光寶節、八景珍輿，以旌勞績，切宜祇受，副此眷懷。故茲批答，想宜知悉。

月 日 下

林少華受，
蒼汝嘉付。

誦經感應

經中感驗，自上古隋唐以來古今事實，舊嘗備載藏本。續略摘數事，附于卷後，以證此經功德不可思議。

陳瓌

隋時會稽人。擢第入金門集，釋褐任長城尉。自少誦此經，每至厄難，多獲助。至開元中，自會稽江行之東

陽，大雨。與二十餘船同發，乘風掛帆，須臾，天色昏黑，風勢益壯。至界石竇上水擁波擊前，二十餘船皆壞。瓌急念此經，流中忽有一物，狀如赤龍，橫出扶舟，因得達岸。俱得活誦經之力。

銀山老人

饒州人。所居採銀戶逾萬，俱是草屋。延和中，天火發，屋皆燼，此居火不及。時州牧問老人：有何術法？答云：奉道年深，日誦此經不闕。

慕容文遠

隋人。病亡七日，欲殮，忽縮一足，遂蘇。云被一人追入一城，見王者問：卿在生有何功德？文遠答：貧家無力可修功德，惟一心念《玉皇經》。王稱善曰：此經欲得聞乎？遂延文遠上殿，設一金牀，令誦經。忽有玉女，頭翠鳳冠，服紫霞衣，手指文遠陽間所誦經本，跪言其前，令分明讀誦，畢，忽不見。出門唯有追吏隨行，登一高山，見城郭極高峻，煙火接天，黑氣溢地，哀叫之聲不忍聞。叩頭求去，使者乃

引回家，見形卧牀，鬼吏自後推之，冥然復活。

寶德玄

麟德中爲奉使，過揚州，渡淮船，見一人形憔悴，引一小童坐地上。德玄曰：天晚，別無船來，何不同行？遂至中流，見本人有飢色，與食，濟之達岸。德玄上馬，同行十里間，問：君欲何往？答曰：我非人，乃東嶽鬼使，往揚州追大使寶德玄。德玄驚怖，下馬拜曰：我即是。德玄涕泗請計，鬼甚愧云：公容載設食濟急，柰何？汝急誦《玉皇經》一百部，當來相報。德玄曰：世無本。鬼使曰：鉢洲靈仙觀道士尹嗣玄有正本，可急索誦。言訖不見。德玄遂回，令人求經本，晝夜不斷續，誦經一百部。因晝卧，夢見前鬼使來喚，至一城殿門外，使曰：且立此，當白王。使既入，德玄於外遙聞王怒云：爾何故漏泄吾事，爲他作計？令左右驅決其使，使出，袒以示曰：此乃爲公致此。引入見，王問曰：公有大功德，筭未盡，人間秩滿，當生天界。

召使送回。德玄問使者云：我將來官爵如何？答：汝從此可改殿中監，六十四至左相。言訖辭去，覺後果如所言。

司馬喬卿

唐時河內人。永徽間爲揚州戶曹，丁母憂，結廬寫經。廬側生芝草，綠莖朱蓋，日滴汁一升，食之味甘。經畢，母於座中語云：得汝追悼之力，今可生天。

李脩

唐顯慶中，丁父憂，發心寫此經三部答劬勞。纔一部了，筆間有五色圓光之炁。經畢，筆無所損。每聞異香座前，時有花墜。後失筆頭。經半載，夜因見地上有金色光彩，示之，乃向所失筆頭，自然光彩不壞。經之功德，孝誠所感，父得超升。

呂文展

唐開元三年任閬州。信道，誦此經萬卷。年衰牙落，向經懇請，牙復生如舊。時亢旱，刺史令祈雨。誦經一遍，隨獲霽然。又苦霖潦，別駕復令祈

晴，立霽。又一夜誦此經，見屋內光明若晝，有王者數人，與諸仙衆長跪合掌，禮拜稱善。文展大驚，下座回禮云：文展無道法，得聖賢如此恭敬，罪當萬死。王者云：我等皆天人魔王，適向諸天，見此人間有光照燭，故尋光化身下降，云珍重而去。出《金匱靈文》。

（丁培仁點校）

090 高上玉皇本行經髓

經名：高上玉皇本行經髓。原不題撰人。據卷末《傳經源流》稱，乃元代至正四年（1354）廣西柳州道士劉處源路遇老翁傳授。經文刪減三卷本《玉皇經》而成。一卷。底本出處：《正統道藏》洞真部本文類。

道言：昔元始天尊在清微天中玉京金闕七寶玄苑玉皇宮殿陞光明座，與無鞅數眾宣說靈寶清靜真一不二法門。是時玉皇尊帝與諸真聖清齋建節，侍在側焉。於是玉帝知時欲至，即於會前舉六通力，放大光明，徧照諸天，一切境界皆大震動，十方無極俱同瑠璃，下燭下方，是諸世界，一切人天，咸臻道氣。當是之時，酆都鐵圍，即時破壞，三惡道苦，一時解脫。

爾時玉帝即分其身，徧散十方諸大天宮，自然化現，白玉爲京，黃金爲闕，七寶玄苑大光明殿具光明座，幢節旛蓋，異寶奇花，徧布是處。

爾時玉帝即以所分其身，徧於是處，普爲十方演說清淨解脫之道。說已，即以神通，不動其所，移接天人，皆令得至清微天中玉清聖境元始會下。是諸眾等，不覺不知，普來集會。時諸大衆，稽首瞻仰玉帝化身，忽睹天尊勝會，踊躍歡喜，一時作禮，歎未曾有。

爾時高虛清明天主與諸天眷屬御八景鸞輿、九光寶蓋，奏玄歌妙樂，詠無量洞章，散天寶花，噴天真香，飛步遊空，來詣道前，稽首長跪，白天尊言：賤臣懈怠，後會法筵。今日吉慶，建此法橋，幽顯凡聖，普霑聖澤，放大光明，現希有相。臣等千劫良因，九天運會，今日大吉，咸仰玄功。以偈讚上帝曰：

金闕玄穹主，高上玉皇尊。妙相冠諸天，慈光燭三界。真聖妙道師，天人依仗師。大乘垂法語，真一指迷途。

功德若虛空，讚揚無窮盡。

爾時天尊告四衆云：是帝身即道身也，非常體也，汝等親近是帝，生尊重心，注想尊容，稱揚名號，然後汝等咸蒙護度。

爾時天地始祖五老上帝稽首長跪，白天尊言：伏聞高上玉皇慈念蒼生，普放神光，照燭法界，六凡四聖，普叨道蔭。切以自昔元始，天地未分，日月未光，是生玉帝，故得二儀分判，三景發光。恭聞帝號，稱說難言，莫可尋詳。臣即命鑄金爲簡，刻玉爲章，寔靈文之妙德，乃天地之玄根。惟願哀憫，使依玄科，按法以傳。

於是天尊普告真聖云：今三天盤運，皇道氣暢，真道宜行。乃命五老上帝與諸真聖，上詣太玄玉都寒靈丹殿，紫微上宮洞陽玉館，披九光八色之韞，雲錦之囊，出靈寶金書玉篆文曰：太上彌羅無上天，妙有玄真境，渺渺紫金闕，太微玉清宮，無極無上聖，廓落法光明。寂寂浩無宗，玄範總十方。湛寂真常道，恢漠大神通。玉皇大天尊，

玄穹高上帝。

是時五老上帝得是經已，還詣元始天尊前，諮以禁戒之儀，遜謝不逮。

道言：是帝號也，元始之妙言，玉皇之真誥，至真妙文，神應自然。乃知天真貴重，至聖上書，斯文隱祕，不得窺聞。有得之者，勤行修奉，尅至神仙。於是玉虛上帝白天尊言：願爲四衆及未來世持是經人，說利益事。

爾時天尊告玉虛上帝言：若有三界十方無量國土，或兵戈並起，疫氣大行，水旱蟲蝗，凶年飢饉，是其國君當發慈悲，爲其黎庶徧請道流，清淨嚴潔，爲轉此經，當得國土清平，五穀豐熟，黎庶安泰。此經所在之處，常有十方至真侍衛供養，持是經人獲福無量。又若持是經人造作長幡，書帝名號於其幡上，被諸風吹，所指方面，一切衆生皆霑勝利。又若持是經人書帝名號在一切有聲物上，或是道場，或以戲擊，或被風觸，是聲出時，一切衆生聞是聲已，所有罪障悉得清靜，何況受持。當知是人即是道藏，功德身也。

爾時天尊謂玉虛上帝言：今我略說，未盡其妙。若廣說之，凡流邪見，疑惑不信。是經功德，窮劫難言。

爾時玉虛上帝聞說是已，心生歡喜，瞻仰慈顏，稽首贊歎，而作頌曰：九天之上，謂之大羅。玉京金闕，雲層峨峨。中有天帝，仁慈惠和。至道無敵，降伏衆魔。天寶靈符，玉律金科。神仙億萬，幢旛衆多。聞者罪滅，永出愛河。

是時玉虛上帝說是頌已，是諸天衆異口同音，歎未曾有。於是天尊告四衆云：凡人持誦此經，稱揚帝號者，皆道根深重，宿有善緣。此經尊妙，普度無窮。但精心恭奉，家國安寧，保命度災，掃諸不祥，能碎鐵圍山，竭苦海水，破大地獄，拔重罪苦，降暴惡魔，護諸國土，能除一切重病，能解一切惡毒，能離一切惡人，能滅一切惡獸，能摧一切邪道，一切諸天，皆令降伏。其餘功德，說不可盡。爾時四衆聞說是已，歡喜踊躍，稽首敬禮而退。

高上玉皇本行經髓

傳經源流

南嶽總仙上真司命紫虛清真元君二十四代嫡孫，安成玉源仙派上清三洞五雷經錄清微明元使劉處源，元至正四年七月內，自廣西柳州路雲遊至海北。八月十五日晚至化州路石城縣地面一郵亭，闕無人煙。至夜半，風清月白，展轉不寐，遂行望月。不覺至路傍，見石上坐一老翁，厖眉皓首，跌坐。處源至前，謁而問曰：此去化州路程幾許？翁曰：半日可到。方今徭賊橫行州郡，殺擄官民，生靈橫夭，深可哀憫。行止宜乎謹慎。處源謝曰：多蒙訓益。然生死由命，不容易耳。汝何年庚？處源告其生年月日，翁視諸掌曰：汝命數當有瘡癘、劫賊、刀兵、水溺之難，幸子有濟人之功，亦不免此一難。處源再三告曰：願示祈禳之法。翁曰：但至誠誦《本行經髓》，雖見難，不傷大命。處源曰：予入道三十年，未遇《經髓》，惟《本行經》亦常持誦。

恐難遇經寶，有幸禳解之方。翁曰：幸我佩帶斯經在此。吾已心識經句，就當以經本授汝。遂於懷中出一黃素囊，取經授曰：可專心持誦，廣傳世人，讀誦獲福無量。吾乃毗陵道士也。汝記吾名。言訖，起身而行，路傍三步，冉冉乘雲而去。處源再拜于地，恍惚不見。處源徘徊於石瞻望，不覺天曙，見石上有坐跡，及昇天腳跡儼然。十六日午至化州，在城石龍縣攀龍坊龍母山下陳宗武家安下。間有廉州知事黃一龍，字雲從，乃吳川人也。維時權石龍縣事，會中詢其昔宿郵亭之名曰仙界鋪也。處源曰：因何而名仙界？雲從曰：古有一仙坐郵亭之側，路傍石上坐跡足跡，印證人世。此仙或隱或降，人間罕逢。處源悟于心曰：豈非神仙之再示，傳是經乎？二十十五日身患瘴熱，大重。連日徭賊行劫，聲息不絕。處源憂患交集。九月初一日子時分，瘴熱昏瀉，恍惚見一金甲天神喝曰：賊已至，急避之。予覺精神稍爽，身熱清涼。遂盟天誦經，

訖，倚枕就床而坐。天色已曙，忽聞風雨驟至之聲，予驚呼同宿者江德潤曰：賊至。處源佩經出戶，城內外男女紛然奔走，予亦奔至江岸，見男女交雜上船，予讓之。先舟中化州知事張思立呼曰：先生，賊追至矣。可急下水來。予回顧賊至，止隔二丈許，鎗弩並施。予乃投水，而身自浮流一里許，江心得舟人吳日明手援上舟，解衣盡濕，而經冊不濕。處源拜謝天地水曰：荷再造之深恩。予生不能浮水，豈非《本行經》力，神靈默佑，使處源入水不溺，遇劫賊刀兵而不傷？噫，仙真之報不妄，命分難危苟免，乃知《本行經》力不可思議。處源不敢淪沒，遂告盟天地，鍔梓印行十方，以廣其傳，使有緣者咸臻道炁，共證玄功者。

（丁培仁點校）

091 高上玉皇心印經

經名：高上玉皇心印經。撰人不詳，約出於唐宋間。歌頌內丹修煉法訣。一卷。底本出處：《正統道藏》洞真部本文類。

上藥三品，神與氣精。恍恍惚惚，杳杳冥冥。存無守有，頃刻而成。迴風混合，百日功靈。默朝上帝，一紀飛昇。知者易悟，昧者難行。履踐天光，呼吸育清。出玄入牝，若亡若存。綿綿不絕，固蒂深根。人各有精，精合其神。神合其氣，氣合其真。不得其真，皆是強名。神能入石，神能飛形。入水不溺，入火不焚。神依形生，精依氣盈。不凋不殘，松柏青青。三品一理，妙不可聽。其聚則有，其散則零。七竅相通，竅竅光明。聖日聖月，

照耀金庭。一得永得，自然身輕。太和充溢，骨散寒瓊。得丹則靈，不得則傾。丹在身中，非白非青。誦之萬徧，妙理自明。

高上玉皇心印經

（曾召南點校）

092 高上玉皇本行經

集註

經名：高上玉皇本行經集註。
簡稱《皇經集註》。明全真道士周玄貞撰。匯集宋金元明諸家《玉皇經》註，並附《玉皇心印經》註。十卷。底本出處：《萬曆續道藏》。

皇經註解卷之一

皇經集註啟讚序

天猷副元帥和應善天尊製

原夫大道無刑，妙萬物而資始；至真罔象，攝群心而自歸。機若洪鍾，扣之立應。邈哉上聖，至誠遂通。恭惟《本行經》者，玄皇之秘言，穹昊之樞要。浮黎真境，紀談授道之初；紫微

上宮，顯露緘藏之跡。實諸天之隱韻，乃大梵之仙章。八角垂亡，本由於宸翰；千真列衛，普度於人靈。年劫孰究，世數莫知。蓋大地衆生迷謬，喪失真源，自壞刑體，耽惑情慾，不能洗滌，聖文遂隱。今日崑山玉顯，巨海珠分，獲睹瓊文，伏增驚歎。所謂幽囚重繫，慕妙義以薦原；痼疾沉痾，仰德音而頓愈。昏衢惠炬，溟渤舟航，保國寧家，濟生度死。金編玉軸，浩渺難量。非慕真風，曷契斯理？聊叙大要，以化未萌云耳。

高上玉皇本行集經前序

道本無言，諸經皆真聖唾迹，但因言顯道，文亦聖賢之所不廢。自三才分，名教立，理本一致，謬妄者或歧之，歧之非是也。元始坐照於諸劫之先，當時至運會，諸真問玉帝行因，遂說是經。迺法品最尊、靈文第一，自來經書無有及此者。真文隱奧，不事奇麗，梵對而旨自難窮，諸聖所不能言，思議所

不能到，此經括盡明若掌。臣張仲事文中古，供職於周，祇承上帝，即聞此經，願終寶持。帝偶較人間功過，錄臣仲在忠孝之途，命掌化九天，編輯此經。經中玄蘊，益得飽味。惜世觀經者，不能體聖意，契玄旨，謬刊訛傳，言韻或誤，遂分洞玄、高上二名，各執私見以傳習，大悖說經之意，甚至膠柱。狂誕之徒，或不信此經，或以爲因襲他典，或無知強解，皆不知是經之尊，而罪福報應不可逃也。其過何可言。臣仲不忍盛典之失傳，惜塵俗之愚謬，誤犯無知，不聞大道。奏承帝命，使仙真解經說義，流傳凡世，作窮經之關鑰，爲人道之梯階。庶聖經法航，可濟久溺之流；玄宗妙藥，易醫積沉之病。聞經悟道，永無妄議；應機識真，終免輪沉。三千大千，界界悉太和之域；從劫至劫，代代爲樂利之場。求道必得，無願不成。是經功德，斯無負矣。謹序。九天開化文昌梓潼帝君臣張仲頓首百拜。

原道

南極遐齡老人臞仙撰

臞仙曰：稽夫道教之源，昔在混茫始判，人道未備。天命我道祖軒轅

黃帝，承九皇之運，秉六龍以御天，代天立極，以定三才。當是時也，天地尚未昭晰，無有文字，結繩以代政；無有房屋，巢居以穴處；無有衣裳，結草以蔽體；無有器用，汗尊而杯飲。我道祖軒轅黃帝，始創製文字，製衣服，作宮室，制器用，而人事始備。今九流之中，三教之內，所用之文字，所服之衣裳，所居之房屋，所用之器皿，皆黃帝之始制，是皆出於吾道家黃帝之教焉。且夫老子謂，生天、生地、生人、生萬物，必有所生者，曰吾不知其名，強名曰道，強字之曰大，故曰大道，其教曰道教，世方有道字之名。以是論之，凡言修道、學道者，是皆竊老子之言，以道爲名也。豈非老氏之徒乎？又若老子所謂玄之又玄，爲衆妙門。玄妙二

字，又皆竊之爲名，用之於經者，是皆用老子之言也。又若《莊子》書曰：有大覺而後知聖人。此大覺二字，乃莊子所立之名，徽宗取之而封金仙。其經皆用之，是皆出於吾道家之書，黃帝、老莊之教也。

皇經註緒前序

道之一字，三教同尊稱之。迺妄誕狂流，目道爲二乘，是不知道也。玉帝，三教同尊事之。盲徒或稱爲天主，議其不尊，是不攷玉帝本行根由也。帝修德無量，功成不毀，位至尊，名最勝，統萬天，包三教。御三千大千，歷劫自如。儒家稱爲上帝，佛家號曰燃燈，道號玄主，尊貴無倫。睹是經，則知帝妙行，可破千古之疑，萬種之惑。惜不知者，未契經文，猶有妄議，不能了悟，增罪愈深。豈識人生本於道，宰於上帝，明心於聖訓。若輕帝慢天，毀謗經文，皆不明大道，是背本忘親，不達生成之自也。臣崑慨此已久，故序

於經註之首以示戒。純陽警化孚佑帝君臣呂崑頓首百拜序。

皇經集註再緒前序

道之有經，如天之有日月，國之有典章。睹日月而面牆之弊可免，遵先王之法而過者未之有也。則崇信真經，豈非入道之準的乎。況此經元始親傳，玉帝諸神承宣，三教最上品，大聖祕密言，在在宜尊，劫劫當重。但無言之道，此經已作文具，又何用註解哉？然經以文言，自得道者觀之耳。未得入門，正深借於此矣。不然渡河無筏，焉得到岸？嗟嗟，舍經求道，非也；執經爲道，亦非也。以心觀經，以經驗心，心融神會，此天寶靈章，固在我性分中。真明，不至泥文矣，奚有二病哉。長春輔化明應真君臣丘處機頓首百拜。

皇經集註前四序

道之大，玉帝之尊，《皇經》聖玄奧，臣震知之已久。世多昧而興妄議，將以道可離，天可褻，聖經可輕耶？豈知道有經，即性有此身；天有帝，即身有天君耳。無幻身，則性無所附，而妙不彰；非天君，則身無主，而形爲虛。身心不可無，則帝恩可不報，經功不可信哉？但信經非徒以文，惟神會以心耳，真得不忘，則妙果成矣。雷霆大元帥臣鄧天君頓首百拜恪序。

三讚

臣鄧天君稽首言：

讚 大哉至道，無宗上真。
道 卓爾三教，惟此獨尊。
讚 皇矣玉帝，三教無倫。
帝 沙界浩劫，永皈至尊。
讚 皇經盛典，微妙甚深。
經 三教括盡，法品最尊。

皇經集註初纂前序

宣聖不言神，而祇事上帝；儒者諱談玄，而敦尚心學。上帝固儒家之不敢慢矣，卒無觀道經，會玄旨，融三爲一者。豈意專立門耶？抑行道而不暇耶？吁，亦隘矣。事不在於徇名，道惟貴於實益。玄經非矣，何以言道；是矣，又何殊於儒，而可拘拘哉？臣洪先幼習孔訓，嘗及玄典，恍若有得，未敢輒是。迨長捷龍頭，居金鸞坡，得備覽三教書，益知莫尊於道，莫深於玄。三教語莫勝於《皇經》，如菽粟布帛之不可少。奧意難規，諸仙註不可不傳。因寄迹方外。虔輯成卷。惜弱軀日羸，未及刊布。後遇山東濟南隱客，周雲清氏，講玄經，修《道藏》，遂托友人天拙子記愚言以付之。明萬曆十三年冬，前狀元方隱臣江西羅洪先叩序。

皇經集註纂序

道之難言久矣。臣玄貞。蒙爾蠢質，草莽下土，何足知道，而修玄藏，集《皇經編註》耶？以蚊負山，徒見其不勝任已。但大道不遺於卑陋，下學亦可以知言。玉經雖玄，諸仙明解。適羅太史付愚，不彙入藏，是秘天寶；參入，又於見未安。懼劣質管見，不能聯仙旨，融註意，嚼飯旁付，令人嘔噦，使道味至趣，爲某調亂，則罪益甚矣。嗚呼，述者之明，世亦希覩。臣愚陋而僭述者之事，宜無功而取罪也。然志在行道，罪我之議，孔子不辭。愚何人，斯敢避罪而不述已成之論耶？若重道英流，觀某管見而憐之，繼爲發明，以宣此經之義，是編爲不徒矣。謹序。明萬曆十五年，講修道經臣山東周玄貞百拜。

皇經集註謄錄序

行道揚名，以光先人。世所謂忠以成孝，古今相襲之道也。臣靜粹，幼業儒，雖知天帝之尊，行道不在功名，寔知所未逮矣。後從玄師周雲清修《道藏》，供書務，觀《皇經註》，廼知三教一理，性道無二。此經直指玄要，悟此則道盡。遂僭序卷首以自勉。明萬曆十六年夏京都奉道臣王靜粹叩書。

諸義攷目

道源攷

道本無象無名，孰究其源，奚從而攷。自元始分化，太虛孕妙有，道之秘彰，名因以立。真一含三，三教峙焉。有無終始，不外五行。劫劫相生，聖聖相承，皆道也。縱有跳出三界，不在五行，亦不免爲成道之人耳。固道之所由顯，道家之名，所自來矣。故尋經源先攷此。

經源攷

經以載道，度世慈航，諸經皆聖真法言，無非至理。但此經演自元始，化本玉帝。元始爲三教之首，玉帝爲萬法之宗。此經至玄極妙，獨冠三教；又爲諸經之王，浩劫常存。演從無始，秘之玄天，韞在玉笈。字非凡品，廣長一丈，光徹無量。天真皇人，應時按筆，書傳世間。此經之所由宣布。故續道源以繼攷。

玉帝萬法教主聖祖玄師出處世

系攷

師以度世，破迷拔苦，傳道授經，開來繼往。大道玄師，統三教，包萬法，居天中之天，爲聖中之聖，無始無終，本莫窮其自，在萬象之先。但道妙分真，現生光嚴妙樂國中，迺往昔劫中化顯也。世人觀天道陽明，陽主施，其機常張，尊帝曰張大帝。迷徒不達此理，妄以今北直隸真定府行唐張氏族，爲玉帝之後。豈知行唐張族，迺張果之支裔，張仙之後也。奚可混作一論哉？此姓氏世族之攷耳。若論世系，

玉帝爲大道之首分，浩劫之古祖，焉有死生姓名耶？若玉帝聖后、聖子、眷屬，皆化光嚴太子時宮眷。帝復登昇，宮眷悉證道耳。要之，帝后宮眷非實女身，皆天至真。爲度群生，顯化女身，經已言之。即佛成道，妻子證聖也。目玉帝爲道祖，累劫衆生萬類，皆天地之生意，道脉之支分。孰非玉帝之眷屬統系？若大羅宮眷證道後，皆天真聖身。如文殊掌無垢世界，龍女成道而化男身，義同。今之僧道世人，不觀此理，妄以爲玉帝有宮眷，有輪迴，爲一乘果。豈知諸天可盡，三清境大羅天無盡；諸天帝輪迴，玉帝不輪迴。蓋玉帝迺道身，道無窮，玉帝豈有窮乎？信乎，玉帝最上一乘諸佛之師，萬天之王，宮眷皆道化之妙意矣。玄系之略若此。學者勿妄論，請詳是攷。

刊經功德攷

太古經無紙筆，方策記之。蒙恬、蔡倫造紙筆。載經書後，高士刊板印記，功德又加倍。世之迷徒旁門，不知恬、倫受福於兜率天，以茲一人有地獄

之報。二人之遊冥府，從太乙救苦天尊、冥主地藏菩薩，執經入地府，化度邪說罪人耳。二人豈有地獄之苦哉？功德甚大，刊經演教之品也。

持誦施經講註實益攷

持誦講解，心要至誠，一無染着貪妄，功德如經中語。印經施捨，功德又大，以其廣布法品。若輕經、謗經，污損經典，罪亦深重。勉之、戒之，勿負聖賢之教。

玉帝聖號同異攷

玉帝聖號，崇自浩劫前，中古復尊上，重稱讚耳。世主好道，感玄恩，各就所見聞、所皈依。事與時會，功以世顯，隨其彰著，人人共睹聽者，敬上諸神之號，以定稱謂。玉帝有四：一太微玉帝，漢武帝上太微垣星主號也；二梵天玉帝，漢宣帝上天市垣帝主號也；三焰華少微玉帝，漢哀帝上先天定位號也；四紫極玉帝，漢光武上後天乾號也。皆非此玉帝。此玉帝號昊天金闕無上至尊自然妙有，彌羅至真，玉皇上帝，又曰玄穹高上玉皇大帝。

是帝宰諸天，永不毀淪，世不詳考，謬謂帝即帝釋，不知玉帝名號，各有不同。其四玉帝，俱屬高上玉帝統御。今言四帝天皇同列者，亦非是玉帝。達天者詳之。

玉帝御蒞推極攷

葛仙翁曰：世界之天，所見皆同。儒家言一天地，一上帝。道教言三十億萬大法界，界有三十六天，天各有帝，俱屬高上玉帝統攝。釋教言三千大千世界，界有三十二天，界各一玉帝。三教之論若殊。然言一天者，天外言太虛，稱其不可窮，言三十億萬。自是之外，亦言不可思議。言三千大千者，自此之外，亦言無盡量。故儒言順帝之則。又曰聖希天。天體無窮，至元會運世，此理亦在。是以上帝為不變遷也。道言高上虛無，真帝不毀；佛言真如自在，永不退轉。是俱言玉帝無毀淪也。故言一天者，非遺大也，舉總名而言之，與玄、釋不一矣。言三十億萬，三千大千，非謬說也。析分數而言，與儒者相同矣。至於釋言

各一玉帝，一界各一極也。道言共此玉帝，衆界同一無極也。曰太虛，曰不思議，曰無盡量，皆知道不變，玉帝常在耳。苟以世界分而謂玉帝殊，豈以無極之理有二乎？或以元會遷而上帝毀，豈無極之理有壞乎？知道不壞，則玉帝常在。信矣，毋持魔說以謗聖。

玉帝清微天界攷

王重陽曰：清微，天之最上玄微處，即道家所謂種民天，儒家所謂沖漠之表，蒼蒼不毀，釋教所謂不退轉之地。今禪之雜文內，誤言玉帝在須彌山頂，迺日月天四王天，或有毀壞，惟彌勒內院為不退處。又言彌羅垣，又言彌來園，此三箇異名，是道經無上元君分出，即彌羅玄真境玉帝所居清微天也。其日月四王天，蓋太微玉帝之居，非此大天尊高上玉帝也。故道經言：玄谷山頂有帝君，上禮玉皇大天尊。玄谷山，即禪家須彌山，日月天主，管理此天之神。即今帝都京兆尹也。是以釋經言如來說法，帝釋張蓋，即此時狀元及第。金殿傳臚，禮部舉

觴，京兆尹張蓋，以示朝廷旌賢之意。邪流遂以張蓋之帝釋爲高上玉皇，是以張蓋京兆尹爲皇帝也。其謬甚矣，惟訛謬若此。斯雜文中，言崑崙山有八處。不知方向雖有八極，八極總有一西北，西北乾首崑崙，儒家所謂天柱地維，即道之玄谷山、釋之須彌山，豈有八箇之理？世人訛言已久，故因攷清微天界，併言而戒誤論者。

玉帝尊次攷

劉海蟾云：玉帝，在道教即三清之化。道家先三清者，先虛無而後妙有，所謂無極、太極，非有尊卑之殊。在釋教即燃燈古佛，顯化釋迦佛身。禪家先佛而後玉帝，即外國尊其主而後中國皇帝之義也。若攷道之尊處，《金輪經》云：玉斗玄尊命駕，神遊上極，前行五星爲使者，後以釋梵作威儀。釋梵，仙佛菩薩也。帝信三清與佛者，顯身度衆生使皈道也。世流妄分乘位，不攷源流，以玉帝爲次尊，是世人大於帝王者矣。甚至以三清、佛尊比太上皇，又悖玉帝先後顯化之

意。而以異姓異號擬父子，其罪尤甚。噫，世不能無玉帝，猶生必有宗祖、父母也。謗上帝而別立門戶，是舍宗祖、父母而自尊也。奚可哉？

玉帝號稱利益攷

藍采和云：人知尊上帝，不稱玉帝寶號。儒者或言誦之非是，不知大孝終身慕父母，非孟子之言乎？慕父母而心誠，則爲孝子；稱帝號而心誠，永無過行，豈不爲乾坤肖子哉？踐形惟肖，則天地皆歸，利益豈不大乎？

皇經利益攷

張紫陽云：有帝王之興，必有帝王之制，守王制而過者，未之有也。況《皇經》心印，迺道要心宗，體之則爲至聖，豈止免過哉？今人不信利益，惟體會誦持未誠耳。智者思之。

帝經校錄功過攷

鍾離子曰：人物之生本於道，皆自天帝而分真。故善則德動天，福自至，即貧賤，而安樂勝於他人，是真福堂。惡則自作孽，天降殃，即富貴而凶咎，是活地獄。禍福有定，隨人善惡；

天人交應，捷於影響。迷徒不信，故功格言：真誦《皇經》一部，爲千種功德，即升天堂。真誦者，內外總一，言行合道，不在口上念經，惟在心心實善。善乎。王靈官曰：何勞妙手圖吾像，但願君心合我心。能心合上帝，則德福並懋，迺真誦善功。其餘持誦經文，戒口制心。尊信論歲月，雖有福德，因其善之大小而應，是又次矣。過格言：不信此經，墮入邪道，以心不合道，遂作邪人也。又言：毀謗真文，身墮地獄。不信者惟聞經中功德，信之不及，尚爲小過；毀謗則廢天章。心作大業，凶咎無邊，淪於陰惡，罪不可活，故墮地獄途。又言：詆帝毀聖，廢神居，裂真經，頑惡無忌，永受業禁，禍及七祖。毀謗則口訕靈章，言冒天威，故罪在自己。詆帝裂經，縱惡不悛，身爲不善，遺臭無窮，虧體辱親，雖孝子慈孫，百世不能改；己身罪業，豈有出期；祖親之咎，又何能赦？不然，國家設法，禁罪人可矣，有夷三族、滅九族者，何也？以罪犯過重，故延及親族。惟

若此，則爲法網雖延，其餘或邪視經典，或誦置不虔，或持念訛慢，或妄意裁度，或是此非彼，或優彼劣此，隨其過之大小，又有一定之報在矣。嗚呼，帝之經當今之法也。不信王法，律有明章；不遵盛典，豈無天條。惜人身難得，至道難聞，父母生我，其勞苦同。有德者福祖親，即今世登甲科，封贈顯親也。有過者禍祖親，即今世子弟犯事，罪坐家長也。人身同而善惡異，親恩同而福業殊，人何不爲善而甘作惡，徒遺累親宗哉？經功過格言此，見真經在人心上，純善則經功自有。上智行自合經，不在口誦。中智者因經見道，下愚則語之弗信。上智不常有，下愚亦不多，中人既廣，則教化之功，信不可缺。觀是經者，豈可不體玉帝慈悲度世之意，而視爲泛常耶？

皇經集註義略攷

石杏林云：《皇經》言道之真，吾性分固有之，宜不須解。世人多慮，資有高下，偏見者廣，諸仙解是，非能盡說玄旨。姑備後人之折衷耳。

皇經同異攷

張子房云：此經本無二名、高上靈寶之分，後人穿鑿，隨意增減字句，牽合文意，殊失本旨。今攷高上靈寶，出自各仙真稱揚語，後人誤執爲二。茲據玄都定論，錄傳世間。後學鑒此，定志默體，或遇刊寫傳講差處，從公考校。其外添文句字畫，皆訛誤也。達者勿泥執焉。

皇經集註刊傳疏文

大明講道經修玄箴嗣全真弟子山東小兆臣周玄貞，誠惶誠恐，稽首頓首，齋沐百拜，奏：

伏以道妙無爲，每因時而著見；人心有覺，宜隨地以積功。臣玄貞一介微質，三才末品，慕妙法以皈玄，本儒行而會道。一睹帝經，勝獲珍異，即逐字以精研，冀因文而了悟。但聖典無註，體認惟難。臣貞用發衷虔，博方解義。緒纂仙聖格言，彙入道藏函部。緣三卷之真文，用集序次；敷五品之

祕論，以列篇名。卷編爲十，幅計六百，總列一百八章，大略十餘萬言。千聖心法，睹冊昭然，浩劫玄宗，舉目如在。雖未能獨窺上聖之蘊奧，亦庶使衆觀最盛之真文。寸勞既效，良緣若存。涓吉朝而虔刻，資善信以協成。預奏疏詞，上干玄鑒，增君民清淨之福，赦小兆僭妄之罪。使諸界多方，盡爲十七光明之照徹；絕今傾古，悉被三十大願之陶鎔。人物俱登重玄，冥陽永霑法利。庶臣玄貞之誠，少伸萬一矣。謹奏。

經註名義序次攷

經本文有作一卷者，從本傳，象太極也。分三卷者，象三才耳。今註作十卷，象十極之義，道數成於十也。分五品以象五行，合五行、四象、八卦，則得十七。皆太極之分。故帝於十七光明，天以生，地以成。玉帝此經，即地之曲成萬物。地數三十，故帝示三十種功德。帝德超出十極，故具十號。

修億萬劫，故周萬德。今註六百幅，象火記六百篇。一百八章，從帝千八百戒。十萬餘言，象帝十萬妙行玄光也。至於所謂《皇經纂》，恐下愚不能全契聖文，舉大要以詔入耳。知此義，又何有不同之旨？

觀誦講授經典戒義

凡觀誦諸經，或講明授受，先齋明整衣，肅容請經置淨几上。端坐定志，善惡兩忘，一乘不立，沖妙虛明。然後從容展卷，或默觀，或持誦，或發明，或教習，與帝終對越，至誠無息，方為守戒。

抄寫經戒

凡抄寫諸經，規儀與觀誦同，心正筆正，非欲字好，即此是道。

經名同異辨

謹按抱朴子云：高上者，種民之上，盡天之極，其高無對，即佛家所謂不退轉之地也。玉皇者，聖中最尊，神中最貴，諸佛聖師，萬天皇帝主，故尊稱曰玉皇。呂純陽云：道高無倫曰皇。上帝仁孚浩劫，功超列聖，盡善

盡美，稱讚難窮。位乎玉清，宣元始之化，迺號玉皇。韓湘云：本行者，述玉帝成聖根本，歷修妙行。集經，集元始五品之妙言合為一經，示後人修行之正路耳。管見云：惟天蓋高，玉帝所居之天，位接玉清，又超諸天，故曰高上。人見玉帝之尊，以為絕德，人終不能及，不知聖道無二，我與至聖齊肩。帝之尊，帝之妙，行成之也。故天樞張上相傳集是經，欲人希聖成真。故明旨云：《玉皇本行集經》欲人觀經了悟，歷考良因，追蹤至聖，以成上真也。其後又稱曰：《太上洞玄靈寶經》蓋言大不可量，高不可極，故曰太上。闡先天道德之秘，為萬世文字之宗，洞明三景，顯露玄機，故曰洞玄。玄靈之蘊，為天人億代法寶，故曰靈寶。要之，經以明道，道屬我身。人能盡性至命，了悟此道，探本躬行，可以入聖矣。

信經論昇沉德業辨

人自太極生化，天堂地獄，經詳言

之，世固未信，豈虛語耶？死雖歸空，趣不盡者，魂有執業。伯有為厲，子產信之，夫子不以為非。地獄豈無？清淨還造化舊物，天堂亦有。但福不可徼得，業不可倖免。天堂地獄，惟人造。若信二說之名而不修德，是自求禍也，雖日言果報，亦何益之有？

凡誦經者，有淨心等諸咒，今不錄。因前已教人心同於道，是誦真咒矣，故不載其文。

《皇經》原本首載三十六聖號，從天上三十六之義。今經止載十誥，何也？十號十極，從帝稱用之耳，寔不以繁簡而為去取也。觀者詳之。

高上玉皇本行集經註解

此義迺洞玄靈寶對註者，後人勿疑。

長跪禮奉

此經係元始闡玉帝妙行之義，故誦經者長跪虔誠禮奉。

仰啓三清境，無上三境尊。

知大道之高，三清之尊，按誠企慕，皈身、皈神、皈命，上達真心。仰瞻

啓告於玉清、上清、太清。三清境界，至尊無上。玉清聖境元始，上清真境靈寶，太清仙境道德，三境道祖大天尊。

仰啓大羅天，無上玄穹生。

呂純陽曰：玉帝所居，為三千大千世界天宗，永無退轉。至高無比，故云大羅。玄穹主，穹窿蒼穆，諸天都教主。

仰啓三清界，侍宸諸真衆。

張紫陽曰：侍，旁列也。宸，高玄不可窺見聽聞之界。諸，衆也。諸真衆，先天九宸、後天仙聖，一切神佛、菩薩、阿羅漢、金剛，皆在焉。

妙道難思議，

至妙大道，最上一乘，不可以心思，不可以言議，難以思議而得。

造入資玄門。

張子房云：造入，由真知力行進入也。資玄門，道義之門。衆妙玄玄難入，漸進悟入資玄。即孟子所謂居之安則資之深，釋經所謂徒聞思修，流入亡所也。

妙經抉音訣玄蘊，

抉，決也，挑出之意。玄蘊，玄奧難測。此妙經自真界中挑出神機，是抉玄蘊。

導引塵迷趣。

元始說妙經，抉玄蘊，導引塵俗迷人，使出苦海，脫其業趣。

臣今淨三業，

臣，看誦經者自稱也。三業，身業、口業、心業也。淨，虔誠，永絕此業也。

口誦及心持。

誦經者自言誦此經真誠。口中誦，真心持受也。

惟願大慈悲，開受臣所請。

悲，一本作尊字。悲字為是。誦持此經，惟願元始玉帝諸真垂大慈悲，開慈顏，受臣所祈請。若作尊字，不能承前三啓意。

慈光燭卑賤，聰聽聆音聲。

諸聖大慈光，燭照臣卑賤誠心。神聰聽聆祀誦音聲，願臣諷誦時，響徹十方界。

願臣諷誦經時，法音響徹十方界，十方聽信大法，即響徹也。成就一切願，如經所稱述。

願臣悟經修真，成就一切善願。如

從此漸進修，成道事諸聖。

從此漸次進修，成大道，事諸仙聖人。

至心皈命禮

誠有未至，不為至心，少有追悔，不為皈命。諷此經，永誠不改而參持，故云至心皈命禮。

玉清聖境，

元始尊大無比，天中法王，位冠仙佛，其居永不毀壞，云玉清聖境。

清微天宮。

解見後。

鬱羅蕭臺之中，

景上之極，天中之天，神光芳鬱，蕭然真清。故言鬱羅蕭臺之中。

森羅淨泓音弘，玄深不可窮也之上。

天有萬象羅列，深奧難窮，玉清在諸天上。故言森羅淨泓之上。

現有為之梵相，

元始天尊為三教宗，顯化教人，其妙難窮，是現有為億梵妙相。具無極之神通。

具無極量大神通。一云，元始迺無極大道，故云然。前說為是。

敷演真玄，破無有色空之礙；

敷宣廣布，演說發明至真玄宗。破世間無有色空等障礙。無者，以無為宗；有者徇生；色者執有；空者，不脫無趣。元始說此經，明示真玄，不屬三觀，不落兩際。明言直指，如如見成。故破無有色空之滯礙，使皈道妙。

拯提趣類，絕智愚高下之分。

拯救提拔一切情識業趣諸類出塵，不拘古今聖愚，皆可修道。是絕無智愚高下一切分別，真一不二妙法。

妙用難窺，靈機罔測。

至聖妙用無方，難以窺視，玄靈道機，不可測度。

大悲大願，大聖大慈，無量度人，元始天尊。

大悲，憐世心切；大願，願化無窮；

大聖，聖中至聖；大慈，濟度無盡。無量度人，無限量也。元始句，解見後。

至心皈命禮

此是言誦看經者，真心頂禮至尊，今人口念此句者，非也。

上清真境，

景上玄清，至真妙境。

禹餘天宮。

自始青而太白，玄光神化妙界，永不毀，高大無比，神運無疆。經言元白禹餘天宮。

紫微瓊臺之中，

妙境難測，永不動毀，故言紫微。非北辰紫微垣。瓊臺上清宮光，萬寶莊嚴，云瓊臺中。

玄都玉京之上。

上清，在太玄都白玉京之上。一言在高天玉京山之上，亦通。

接元始虛皇之統系，

系，下記切。繫也，繼也。靈寶體元行化，故上接元始虛皇道統世系。

超西那玉國之根苗。

經攷西那玉國在陝西，西方白帝生處，靈寶在諸聖生化之先，故言超出西那玉國根苗。不可以元白作白帝也。一云，超當作紹，言天尊為西那玉國根苗，非也。

入黍米珠，盡挹真玄之精粹；

天尊入黍米玄珠中。即儒家所謂九弄太極、佛悟正法眼藏也。挹，獨徹此道，如世人握奇珍。飽至味也，故云。盡挹真玄精切華粹。

在香林苑，屢談秘要之筌蹄。

天尊在上清妙香寶林玄苑中，屢次談說玄秘真要之筌蹄。道本無說，經為修行徑路。即取魚之筌、捕兔之蹄，不可終執，故說經為筌蹄。

妙德難思，神通莫擬。

天尊妙德難以思致，神通莫可比擬。

大悲大願，大聖大慈，無量度人，

解見前。

靈寶天尊。

始青至太白，元始再彰妙化。居上清，靈運無方，大道法寶，傳之不窮。為靈寶天尊。

至心皈命禮

太清仙境，大赤天宮。

三清境天宮本一，以玄光大著，妙無窮盡，故言太清仙境。元白散霞，赤祥遍覆，永無毀淪，故曰大赤天宮。非專言色之赤紅也。

巍巍金闕之高，渺渺重霄之上。

太上所居巍巍不動，最上至大。無比倫，金光不毀。玄闕之高，渺渺難窮。永居九宸九重九霄上。一云，冠三十六天重霄上。

降生於無量數劫，

太上歷劫行化，無有量數，不可窮探，大道玄宗，是降生於無量數劫。

說法於萬二千天。

太上歷來化遍三千大千。此言說法萬二千天，太上說法宮有萬二千天界也。

五千祕言，融三才之妙道；

道有五千餘祕言，融貫天地人三才妙道。

八十餘度，接六趣之衆生。

八十一化，接引天人魔鬼獄畜六等

趣衆生。或云，接六欲中滯眼、耳、鼻、舌、身、意六趣衆生。又云接有、無、色、空、能、所六趣。或從拯字，拯救悟道成真，意亦是。六趣難脫，太上垂慈教化，拔濟神人鬼物出塵，故亦作拯。

聖德崇高，玄功廣博。

太上聖德，尊崇隆高，玄功普廣博大，深厚莫窮。故言玄功。大悲大願，大聖大慈，無量度人，解見前。

降生天尊。

太上顯化無量，慈恩莫窮，生生不已，故云降生天尊。

至心皈命禮

妙有真境，彌羅上宮。

上宮，玉帝聖父宮名。曩音向示現國王之身，

曩，昔時往劫也。昔顯示化現光嚴

妙樂國王身。

即根本帝尊之質。

即根本萬天聖帝慈尊之體質。

始相湛寂，

聖父，道化宗始，妙相湛然常清，寂然不動。

實至玄至妙以難言；

湛寂始相，實至玄遠，至神妙，而難以言議。

嗣位繼傳，妙無等無倫而相踵。

嗣光嚴國君位，繼國王宗傳，其德無與同等而相倫類者。踵繼先業，德福彌昌，故云妙無等無倫而相踵。

聖父之慈悲父，至尊之最上尊。

玉帝號衆生慈父，位至尊。聖父，至尊，指玉帝言。光嚴國王生玉帝，故言聖父之慈悲父，至尊之最上尊。

稱讚難窮，皈依莫盡。

王生玉帝，功德永著，故稱讚難窮，皈依無盡耳。

大悲大願，大聖大慈，光嚴妙樂國王聖父天尊。

此聖父指光嚴國王，以其生至聖也。

至心皈命禮

妙有真境，彌羅內宮。

內宮，玉帝宮深邃處，聖母居之。故曰內宮。

慈顏烜春日之和，

聖母慈善容顏，烜著光明，如春天日色之太和。

懿範凜秋霜之肅。

懿淑恭美，身範凜烈，似秋日嚴霜之威肅。

純全梵炁，先天地以素存；

全備虛無梵氣，妙體預存於天地先。

化現妙身，歷后妃而示應。

化現聖母妙身，歷光嚴國君后妃，應生帝。

具一炁胚胎之始，

具真一梵氣。顯化胚胎之始，胚，形氣初立；胎，形氣稍著也。

寓帝身生化之殊。

寓寄玉帝道身，生化祥瑞殊異。

萬化祖根，衆生慈母。

聖母誕玉帝，分萬化，統衆生，誠萬化祖根，衆生慈母。

大悲大願，大聖大慈，寶月光皇后，聖母元君。

至心皈命禮

紫金金闕，白玉玉京。

紫金闕與黃金，非二說。玉帝京闕，神光妙寶無二，常御者淨土。色尊為黃金，宴息之所。紫金闕也。金玉重文者，讚文自當若此說。

住妙有之境中，「處玄真之天上」。

常住妙有無迹真境中，永處太玄至真上天之上。

功成道備，故妙相卓冠於諸天；

普度功成，至真道備，故妙好光相，

卓然冠出於三千大界一切諸天。加冠於首曰冠。玉皇萬天教主，故冠諸天。

諸天。

心廣體胖，故慈光徧燭於三界。

性天廣大，妙體如如，心本廣、體本胖也。人不能，故無光明。玉帝成道，心如太虛之廣，道身自然，斯慈光照諸三界。

位尊而上極無上，

位尊無比，故云上極無上。

道妙而玄之又玄。

玉帝之道，高妙難窮，是玄之又玄。

真聖宗師，天人依仗。大悲大願，大聖

大慈，

解見別章。

穹蒼聖王，玉皇大天尊。

穹蒼聖主，諸天宗王也。此號讚玉帝之尊。

至心皈命禮

光嚴國內，妙樂土中。

解見後註。

聖母凝神夢於虛無，

聖母夢道君抱嬰兒付已，遂生玉帝。

是凝會神異之夢於虛無中。夢本幻中之幻，故云虛無。然祥異特著，故云神夢。

云神夢。

道君授玉質於恍惚。

道君降授玉帝寶玉質付聖母於恍惚渺冥中。

慈愛和遜，

仁感惠愛，溫和謙遜。

弗貪萬乘之尊榮；

萬乘，大國出車萬乘者也。玉帝捨王位，是不貪萬乘君位之尊重榮華。

忍辱仁柔，不憚億劫之修累。

大忍耻辱，仁愛柔弱，不憚億劫之修

德累行。憚，畏難也。十萬曰億。

劫解見後。
功高無比，德重難踰。

功行超倫，故高無比；恩德邁種，故重大難踰過。

大悲大願，大聖大慈，現無量功德之身，玉皇大天尊。

此號讚玉帝功德之大。

至心皈命禮

尊居帝位，高處天宮。

尊居玉帝位，高處清微大天宮。

徧遊於一切白玉京中，

徧遊周歷一切世界大天宮白玉京也。

普現於十方黃金闕內。

普徧廣現於十方一切大天宮黃金闕也。

定而能應，去來自在以無拘；

大定而能順應。或去或來，妙用自然，得大自在，未嘗拘拘。去來伸屈，翕散始終皆然。

合而可分，變化圓通而莫測。

翕合而可殊分，神變妙化，圓活大通，活潑潑地，莫可測度，變化圓通。

即佛云信手拈來，無不是道，儒家云左右逢源也。

演清淨解脫之道，

演說真清真淨，大解悟超脫之道。

濟沉迷憂苦之徒。

濟度沉淪迷惑憂悲業苦之徒。

自然而然，非識可識。

帝妙化自然，非人間識性可測識者。

或以可識識字作誌字看，非是。或作解識看，亦不是。

大悲大願，大聖大慈，現清淨自然之身，玉皇大天尊。

此號讚玉帝聖德之純。

至心皈命禮

昔爲王嗣，苦見音現玄功。

昔劫初爲光嚴二嗣，苦見無量玄深功化。

三千餘劫之修行，有如一日；

三千二百劫修真行道如一日。

億萬生靈之拯度，廣及十方。

拯拔濟度億萬生靈，廣及十方一切世界。

雖法身由胎臟之胚暉，諒聖體由道原之變化。

玉帝顯化，生自聖母，法身聖體，雖由胎胞臟神之胚基暉生。暉音運，形化之意。諒此聖體，寔由大道宗原之變化生成也。

不壞不滅，杳亡杳存。

終不壞，永不滅。杳若亡，寔妙有；杳若存，却虛無。

大悲大願，大聖大慈，現神明堅固不壞，真空無上法身，玉皇大天尊。

此號讚玉帝聖果至真常住也。

長跪懺悔

長跪，俯伏地上，按誠盡恭。或云屈膝時久爲長跪，非也。懺，自陳己過，願永滅此惡；悔，懊恨前非，願自改圖，即罪人自首也。

臣等自從無始劫，

臣等，看誦經者，率同善人而言。自從無始劫數以來，無始劫，世數無窮，不可知其本始也。

無明煩惱覆真心，

人性本明，因事物動心，自己遮蔽，不能反觀內照，起了妄念，故曰無明煩惱。因無明心起，煩亂恨惱，傾喪

善心，故曰覆真心。真心常在，雖無喪失，因無明煩惱，遂昏暗蔽錮，如物被覆蒙不見也。去了，自露本真。常行殺盜與邪淫，

常行，不但專行殺生偷盜邪淫的事。凡有殺心、盜念、淫亂之思，不能斷盡意識，皆是常行惡事了。此身三惡業也。

兩舌妄言並綺音倚語，

或常搬說是非，兩頭弄舌；或無根造端，而妄說言辭；或萋菲售奸，文飾說詞，巧言亂聽，而為綺語，不據實論。

誹謗大乘真正教，

或不聞大道，謬言毀論，誹誦儒、道、釋大乘正教。

鬥亂親朋離間人。

鬥不是相毆，或妄言鼓人爭心，亂親朋情分，離間阻隔人家和氣。此上三句皆口四惡業也。

貪嗔癡暗縱三心，

或欲得無厭，貪求不已，忿怨懊惱，嗔恨不休。或迷惑泥執，癡滯不改。

貪、嗔、癡暗縱三心，有以暗字作一病，過去、見在、未來言三心，皆非是。

喜怒哀惡增七慢。

劉朗然云：遂意生歡喜，感觸生忿怒，投中生溺愛，違意而憎惡，連上三心共增為七慢。一慕浮華，不求大道，為狂慢；二恣肆惡念，不信罪福，為悖慢；三沉迷幻妄，不皈正法，為褻慢；四樂縱凡情，不親正人，為傲慢；五匿怨妬橫，不畏法典，為怠慢；六縱情恣慾，不保身體，為惰慢；七厭惡不輟，不登善地，不敬神明，為侮慢。或以喜、怒、哀、懼、愛、惡、慾七情為七慢，皆由喜怒哀惡而增貪嗔癡三心，不可入七慢中。此說不可從，依劉朗然說為是，觀者詳之。

歷劫罪根難記憶，

歷來劫數所造惡業罪根，難以考記憶想。

多生業垢莫能量。

多生世世愆業，歷垢污染，莫能稱

量，不知多少。

皈依上聖大慈悲，

皈依至誠，永久歸向也。依因依仰、賴仗上聖大慈悲心力，默佑永滅罪過。悲或作尊字，太拘了。

發露真心伸懺悔。

發露真實善心，仰伸懺罪悔過誠意。

萬劫千生諸罪垢，

萬劫千生，略舉數而言歷來諸罪業垢污之孽。

願從懺悔悉消除。

願從懺悔之後，永不造業，夙愆盡消散除去淨。

將此身心奉上真，

將此見具身心永皈依奉祇承上聖至真。

惟願罪根悉原宥。

惟願歷來罪根，悉蒙聖真原無知情由，盡為赦宥。

至心發願

以至誠心發大誓願。

願眼常睹玉毫相，

願眼中常睹見聖真白玉毫光妙相，

儼然如在。

願耳常聞說法聲，

願耳中常聞聖真說法妙聲，一誠之動有真聞。

願鼻常嗅眾妙香，

願鼻中常嗅聞聖真法身眾妙真香，得洽梵氣。

願舌常讚無上道，

願舌常讚無上妙道，非聖真之法言不敢言。

願身不染邪淫穢，

願生生身清，不染邪淫穢惡，非聖真之法行不敢行。

願意常存正信心。

願我心意常存至正誠信之念，永無邪妄欺覬之私。

發願上報四重恩，

天地蓋載，日月照臨，皇王水土，父母生身，為四重恩。

發願下濟三塗苦，

願濟色累天塗，愛累地塗，貪累水塗，心、神、形，三重苦。

廣運慈悲憐一切，

願廣運我本等慈悲，憐恤一切。一云，願帝運慈悲。

廣行方便度眾生。

願作如是功德，廣行大方便，化度世間一切眾生。

仰惟玉帝大慈悲，

解見前。

加護願心悉成就。

玉帝加護，使我願心、一切皆得如意，悉能成就。

發願已竟，

完也。

皈依三寶。

道經師。

玄蘊咒

重玄秘蘊，大梵仙咒。

大哉元始，

大哉，大不可量。元始，解見後。

無量度人。

解見前。

演清淨教，

解見後。

登引天真。

登進接引天真。一云昇座接引，太拘。

玄座說法，

道身常住，光徹十方，座非凡座，凌虛御極。空浮轉法，是玄座說法。

寂然無聲。

玄玄漠漠，寂然無聲。

玉帝放光，

解見後。

喜慶難言。

喜慶難以言語形容。

是為心傳，

是此真經，廼教主至聖傳心要典。

亦曰天根。

此經為天道之玄根，非言地雷復也。

大圓滿咒，

解見後。

瑤章洞文，

碧瑤天章，大洞靈文。

集以成書，

集元始之秘言，諸真之請明，以成玉帝之經書。

敷落神真。

敷布落普神真，以流聖教，語落典章
即此意。

臣今東向誦，

東向坐誦此經。

願與天齊并，

願齊天永遠真誦此經。

存亡俱證果，

存亡悉證道果。

永度愛河津。

永出愛河。衆生恩愛最難割，真苦

惱之津，誦經令一切永度愛河。

注想尊容，

想玉帝尊容。

稱揚寶號，

稱玉帝寶號。

至心皈命禮太上

註見前。

彌羅無上天，

太虛最上玄冲，彌羅無極，至上之
天。

妙有玄真境，

玉帝天宮，有玄象瑞光，非凡象幻
假。永不壞，微難窮，云妙有玄真

境。

渺渺紫金闕，

渺渺紫金瑞光玄相之金闕。

太微玉清宮。

太微，非日月天太微垣，迺太上玄微
玉清宮，玉帝所居之宮。玄瑞紫炁，

金光四十億萬里，巍巍如如，永不毀

淪，絕無塵染，諸天不能及，故云太

微玉清宮。

無極無上聖，

道高無極，位尊無上，至德大聖。

廓落發光明。

恢廓無際，碧落重玄，發最大無量光

明。

寂寂浩無宗，

雖著大光明，冲漠難窮，默默無聲，

寂寂不可識，浩浩然無有根宗。

玄範總十方。

道體法身，巍巍蕩蕩，為神明之宗，
萬天之主，浩劫聖祖，是玄範總統十

方。

湛寂真常道，

湛然寂然，常清常定，真常不易之大

道。

恢漠大神通。

恢恢無量，漠漠無朕，最大神通。

玉皇大天尊，玄穹高上帝。

玉皇非一天之尊，萬天之主，三教之
宗，最上無極大天尊，玄虛蒼穹高上

帝。念此十句聖誥，當一句一拜。

如不能逐句拜，先一拜，將誥全念。

後九拜，只念玉皇大天尊玄穹高上

帝亦可。禮完，端坐誦經。

大元帥馬靈官云：此經法中王，

神人鬼物，無往不利。世間或男或女，

不拘貧賤富貴、不識字者，但能敬此

經，聞此經，女轉成男，人得福壽。或

印造施捨，或勸人持誦，功德無量。但

要至誠，不可希望疑怠。此經所在，諸

神護之。人聽吾言，神亦永佑。勉之，

勿負良緣。

皇經集註卷之一

① 卷題原缺，據本書文例補。

皇經註解卷之二

文昌開化帝君張校
純陽警化帝君呂閱
長春輔化真君丘編
雷霆大元帥鄧天君訂証

皇經集註目錄

本經三卷 一萬二千三十六字。

上卷 中卷 下卷

五品

清微天宮神通品第一 係上卷。

太上天光明圓滿大神咒品第二

玉皇功德品第三 俱中卷。

天真護持品第四

報應神驗品第五 俱下卷。

本經集註十卷 十萬餘言。

首卷 諸真序、前序；附攷義、管見序。

二卷 三卷 四卷 俱上卷註。

五卷 六卷 七卷 俱中卷註。

八卷 九卷 十卷 俱下卷註。

高上玉皇本行集經卷上

清微天宮神通品第一

祖天師云：清微天宮，超絕三界，塵染悉淨，虛玄明妙，微不可窮。居三清境，是大天宮，玉帝居也。元始演經，御此妙界，至聖妙用，運化無方，不可測識。經演此義，為最上品，非神智妙慧不能明了，故曰神通品第一。愚按古義云：妙化不測之謂神，周貫無遺之謂通。迺五品之冠，三卷之宗。丹臺契此，全經可曉。

神通品一章

爾時元始天尊

爾時者，無極分景之初，太玄開化之始，萬聖良緣妙際，此經將演之時也。元，大也，首也。始，初也。萬聖闡化，肇端於元始。故曰元始天尊。

在清微天中

①清微天，解見前。

玉京金闕

①紫清白真人云：玉帝所居，白玉為京，黃金為闕，非世金玉，神通妙化，碧天瓊琅，莊嚴宮城。故曰玉京金闕。

七寶玄苑

①白真人云：七寶者，碧玉、瑤階、琉璃宮、虬文壁、白玉城、丹闕、金色徹照光，迺號七寶。一云玻瓈、水晶、珍珠、瑪瑙、珊瑚、琥珀、碑磬。玄苑，重玄秘苑也。

玉皇宮殿，陞光明座，

①張子房云：元始時臨御玉皇殿，陞大光明玄聖之寶座。

與無鞅數衆，宣說靈寶清淨真一不二法門。

子房云：元始登座，無量真聖來集，故曰與無鞅數衆，宣明玄靈妙寶，清淨無染，至真玄一秘妙，無間無雜，不二之法門。十方集說云：人之元神，性命之宗。是大天尊，清微天界，身固有之。玉京金闕，七寶莊嚴，人人本具，而性命陰陽神氣精又身之七寶。則琅庭玄苑，天人一致。

天君泰然，則玉皇光明之座可陞，百體從令，凝神會道，即天尊御座，與無鞅真聖宣靈寶清淨真一不二之法門也。然道無形迹，了悟明徹，秘臻妙境，若大路然，入之有自矣。故曰法門。

神通品二章

是時

①是元始陞座之時。

玉皇尊帝

②尊帝，其崇無比，故云然。

與諸天真、飛天大聖、無極神王、靈童玉女九千萬人清齋建節，侍在側焉。

子房云：與，同也。諸，衆也。玉帝同衆天仙真人妙運助化，昇度神通，飛天之大聖、三千大界、無量之外諸天地無極方之神王，少陽梵氣、應感侍啓之靈童，少陰梵氣、宣化傳奏之玉女，大計九千萬之神人。不露神光，歸真元始，清齋持建寶節，侍列於元始光明座之傍。天猷副元帥云：人身有真主元神，靈通不拘。亦有飛天大聖，神氣扶衛一身。無

間隙處，亦有無極神王，少陽之玄光，少陰之靈運，亦有靈童玉女。心同於道，則陽剛大數，亦云九千萬，身神朝元。清齋，無貳爾心；建節，身無惰儀。管見云：人與天地一般，當清明不雜。元神御極之時，果如顏子之心齋，如法家之持幢，唱恭無二，則從今天君而道得矣。

神通品三章

于是

③于是，就此際會也。

玉帝知時欲至，即於會前，舉六通力，放大光明，遍照諸天無極梵刹，一切境界皆大震動，十方無極一切世界，俱同瑠璃玻瓈，無有隔礙。

④梓童云：玉帝知道開玄光，文明將啓，演法傳經之時欲至，即於盛會前，彰舉六通之法力，放普照最大之光明，遍照無量天，無窮極諸天帝神真所居之玄梵宮刹、一切神御之境界，皆大震驚而竦動。盡十方無極量一切仙佛之世界，俱同瑠璃玻瓈之寶，光明瑩徹，盡照畢見，無有間

隔滯礙不見之處。張紫陽云：六通，視通、聽通、神觸通、神會通、風神通、預照通，即佛家所謂天眼等六通也。梵刹，仙帝神居，妙麗天上，不依階塵，未嘗毀壞，巍然不拔，凡目難見，故曰梵刹。一切境界，各神所居之境。其境之界，一切世界，不止人間諸界，天境亦謂之世。瑠璃雖有形光，而乘物畢見；玻瓈之寶，無有漏脫，而物無不見。玉帝光明，射盡諸界，幽闇悉輝，豈有隔礙。以如字言者，恐人不省，故比喻而論耳。管見云：人性光明，本無不通，以元神失主，故有隔礙。或聞不見，或見不聞，或知不言，或言不知，或蔽人已，或惑先後，茲不能六通也。若了徹性命，元神時御，則普照天人，表裏洞觸。紫府丹臺，黃庭玄界，身神故址，本有天垣，皆光耀見輝，無有遮滯，盡被光明，豈非玻瓈瑠璃之載物無隱障耶？雖然，道固本明，明之非易，未知不可強，已知不可惑。不先不後，了悟實難。人

能如玉帝，觀時至而顯光，復日新而常泰，則大光明終不晦，道其永彰矣。

神通品四章

十方聖衆，並乘五色瓊輪、琅輿碧輦、九色玄龍、十絕羽蓋。

雷祖云：十方，四正四隅及上下也。聖衆，十方真聖神衆也。睹玉帝所放光明，並皆乘駕五采文色瓊玉之輪，琅秀華輿，蒼碧寶輦，九色華光玄龍，十絕無倫之羽蓋。白玉蟾云：五色，青黃赤白黑也。輪，車之兩輪。輿，車也。輦，帝王車駕之總名。九色，青色、赤色、黃色、白色、黑色、紫色、碧色、太玄色、金光明色。玄龍，有龍光象，不見形骸。十絕，十極所無，神奇絕倫，靈鳳祥鸞之羽蓋。道經云：羽蓋，即高柄羽扇。一云神仙帝真輦行時，有瑞羽法節以為之蓋。後說尤妙。管見云：人秉五行金木水火土之元靈，各有法寶，仙真道成，諸寶擁隨法駕。人能默朝上帝，效法於天，身中

神集，正氣呈秀。瓊玉輪、琅玕真、碧寶輦、九氣靈色玄化之神龍、十絕無儔之羽蓋，昔在一身中矣，豈獨天地神聖有哉？噫，惟真得者知之。

神通品五章

麟舞鳳唱，肅歌噤噤，靈妃散花，金童揚煙，讚詠洞章，浮空而來。

虛靜天師云：聖衆駕行，有麒麟導舞，鳴鳳和唱，嘯聲和雅，其歌噤噤。天靈妃御，散布瓊花；隨侍金童，輝揚祥煙，讚唱歌詠玄洞寶章，同護神駕，浮凌虛空，而來帝京。十方人云：神帝行駕，有靈童、采女歌隨，麟舞鳳唱，侍衛童女舞唱，效麟法鳳也。故曰：嘯歌噤噤。此說太鑿。神駕行有麟鳳，即今帝乘御看馬之類。況道經有云：天帝行時，龍翔鳳舞。蓋天上太和仙景，自有此意。又云，龍豹長嘯於山林，則噤噤嘯歌。為真麟鳳無疑。不然，舜帝作樂於岐山，何為鳳凰儀而百獸舞耶？觀經味此，當從前說。管見云：人能修道，默順帝則，禮元皇，

身中太和，天籟鳴唱，玄脉安適，雅如麒麟之舞，鸞鳳之鳴，噤噤可樂。陽精煥彩，陰華呈露，恍見靈妃散花，金童揚煙，秘樂玄韻，即天人讚詠洞章，對越元神。如憑虛御風，是亦聖衆浮空來帝闕也。此人人之同具，惟有志者驗焉。

神通品六章

是時梵天一切金仙、大乘菩薩、四衆八部，承斯光照，皆乘金碧飛雲玉輿，九霞流景，慶霄四會，三辰吐芳，飛香八湊，旋繞道前。雨衆妙花，如雲而下，遍覆會前。

子房云：此時諸梵天，一切大覺金仙、了悟大乘正道之大士、天神魔鬼之四衆、天龍八部，承此光明之照，皆乘金光碧色飛雲寶玉輦輿，所被九霞之服，流散妙景，以慶吉之霄。四衆集會，日月星三辰為之吐芳秀，散飛異香，八挺環湊，衆聖呈此秘妙，旋繞周折於大道之前，雨降奇妙天花，如衆雲之垂下，遍覆蓋盛會之前。麻姑云：梵天，最上寶林瓊宮，

凡世未見，隱妙莫窮。故曰梵天。

金仙，金剛不壞之仙。大乘菩薩，若觀音大士等。四衆，仙衆、將衆、男神、女神也。或亦分天神魔鬼，俱通。若云道俗僧尼，非也。蓋天上凡身難至，故不言此四衆。八部，神部、將部、天人天丁部、金剛部、龍王部、夜光女使部、修羅部、夜叉部也。九霞，碧霞、彩霞、紫霞、丹霞、雲霞、煙霞、瑞光霞、景輝霞、普運寶霞。九色玄光，流此異景，蓋衣之光。亦云神之隨形妙好，不專在衣被也。慶霄，云佳辰，亦云慶覲神霄也。四會，天良會、神吉會、時際會、緣湊會也。不專言四衆之會也。旋繞道前，飛香八湊之旋繞，亦云聖衆旋繞也。如雲而下，遍覆會前，妙花如雲之下，盡覆會前。或專言聖衆如雲而下，太鑿。管見云：人身之神甚多，元神弗御則衆神不呈靈。惟修真之士，默朝真主，萬神恭謁，靈府玄光，諸奇百妙，一一湊顯。元神會前，諸禎列瑞，如祥雲遍覆，我與天

上不二矣。

神通品七章

是時帝光遍照諸天，下燭十方無極世界，同玄都境。凡彼人間，上近九天，通接交連，至親至邇。凡彼下方無極世界，山陵坡坂，溝澗溪谷，緬平如掌。六合至邇，三境非遠。天寶臺殿，星羅人間。瓊瑰羅列，朗耀雲衢。七寶欄楯，以界道路。玉樹仙花，蒨燦珠寶，景秀丹田，芝草綿覆。

天真皇人云：是時玉帝之光，自此世界三十六天遍照及三千大界之諸天，下照燭盡十方無極量之世界，俱皆光明，同於玉帝所居玄都境界。凡彼各法界人世間，承此光照，無有隔礙，上近於九陽妙化之天。天地人間，通明相接，交互合連，極其親近。凡彼各下方無極世界，高大山陵，崎嶇坡坂，污下之溝澗溪谷，緬然平正，如人手掌。盡上下四方之六合，聯屬至近，三清境界，亦非遠。天上珍寶之臺閣殿宇，如星辰明密，羅布於人間，瓊瑤瑰玉，張羅

陳列，朗然光耀於雲空衢路。七寶妙成之欄楯，以分界道路。玉枝寶樹，仙瑞奇花，蒨燦珠珍之寶，妙景秀輝。丹田瑞芝靈草，綿結覆蔭。石杏林考義云：人王之居曰京都，玉帝之居，妙冠諸天，世所難見，故曰玄都。平時天清地濁，神靈人愚，若不連接，非親邇也。帝光照徹，神機妙聯，故上下連，神人親近也。九天，九上界三十六天，非止九也。山舉高大者而言。陵，丘大阜也。坡，地之失平者。坂，山嶺之崎嶇者也。深長曰溝。山夾水曰澗。水之流注處曰溪。山之虛曰谷。緬，坦平也。地有山水谷澗，本不平也。帝光覆照，妙意融溢，故盡各世界之地皆平。瓊，美石。瑰，玉類也。紛然並陳曰羅列。雲衢，天端之路。橫曰欄，豎曰楯，即世之排攔也。蒨，華光之顯輝者。珠寶，珠寶之實。丹田，玄都丹陛之田耳。管見云：人身有天地，陰陽之元秘不交，則上下間隔遠異。若元神御光，天輝煥

發，則地天泰、上下融，高下曲轉，並親邇妙合矣。身中本有之寶，妙顯神映，與天上何殊？丹田御神之地，奇景秀見，靈孕神芝，綿覆呈瑞已，欄楯仙花，何待遠求。

神通品八章

時彼下方，皆見諸天鈞天妙樂，隨光旋轉，自然振響。又復皆見鸞嘯鳳唱，飛鳴應節，龍戲麟盤，翔舞天端，諸天寶花，零亂散落，徧滿道路。是時凡聖駭異，幽暗開光，天人悅慶，踴躍懽忻。凡夫學士，盡得飛昇，仰觀劫仞寶臺，俯眄紫雲彌羅。是諸世界，一切人民，咸臻道炁；白首面皺，皆得化度；紺髮朱顏，少壯幼稚，轉增形容，光澤美好，苦惱痊平，普蒙解脫，安樂快然。天下歌謠，欣國太平。

長生大帝云：當彼帝光遍照之時，各世界下方人民，皆見各天鈞天上秘之妙樂，隨帝光旋轉繞動，自然聲振而音響。又復盡見瑞鸞歌嘯，靈鳳和唱，飛動聲鳴，悉應節奏，玄龍舞戲，祥麟旋盤，翱翔舞動於天端。

諸天上珍寶之花，紛零飄亂，布散降落，周遍充滿於諸界道路。此時凡夫聖人，皆震駭驚異，幽隱黑暗，盡開光明。天神民人，並皆豫悅喜慶，踴躍鼓舞，懽暢忻樂。無知凡夫、學道士人，皆得神遊玉京，飛昇天上，仰觀劫仞高隆諸寶之臺，俯眄紫雲覆映彌羅之界。是諸世界，一切諸人兆民，咸皆臻於道炁妙化之域。白頭皺面之老，盡得化度為紺黑之髮，紅朱之顏。少年壯夫，幼小童稚，轉增加華麗，形容光輝，潤澤粹美奇好。衆苦諸惱，痊泰安平。普三千大界老幼，盡蒙悟解超脫，安逸喜樂，心意快然。各天下皆謳歌誦謠，欣樂國運之太平。雷門使者云：鈞天妙樂，金為八音之首。上梵玄韻，不毀之金元。諸韻諧和，無亂無毀，聲律之宗。一云，不調自勻，世所希聞，故曰鈞天。又云，大造為洪鈞，道化妙運，自然太和，天樂之妙，是大造之化，故曰鈞天。踴躍懽忻，手舞足蹈而喜也。八尺曰

仞。天之寶臺，歷衆劫難毀，非可磨消者，故曰劫仞。仰觀，舉目觀。俯眄，低首顧視也。紫雲彌羅，黃老寶境，非俯視者對寶臺言，若有俯仰之義。紺，深青揚赤色。紺髮，即今言綠鬢。管見云：人有陰陽，身分上下，上炁常清，下氣常濁。惟氣間而不和，則上妙不見不聞，而衰損弱虛，遂乘以患。人既符大道，會元秘，輝妙景，則真聞秘音，真見玄化，鈞天雅奏，麟鳳龍鸞，悉顯奇矣。瓊花飄瑞，周徹美觀，陰陽氣承佳鬱，神若驚駭。一切幽闇光明，上下和暢，即天人之踴躍懽忻矣。陰消陽復，妙意昇玄，是凡夫學士盡昇也。上瞻碧寶之臺，俯顧通玄之境，國富民安，氣和神泰，衰者壯，平者泰，不足者有餘，易筋換髓，終保太和，周身順熙，快此妙化。非老者返少，少壯增好，天下歌謠，欣國太平之義哉。吁，此實理也。達者味焉。

神通品九章

當爾之時，神風遐著，萬炁揚津，天震

地裂，枯骨更生，沉尸飛魄，皆得復形。酆都鐵圍，長夜九幽，即時破壞，地獄苦魂，化生諸天，三惡道苦，一時解脫。時諸罪衆，以斯光力，得生十方諸大天宮。

魏伯陽云：當天下歌欣太平時，帝德神風，遐遠鼓著，妙有萬炁，揚太和津。乾發生機，陽剛行健，天震玄輿；坤開成運，陰柔效順，地裂靈幽。已枯之骨，更復迴生，沉滯之尸，煥飛之魄，皆得復形，無拘無散。冥府酆都，大鐵圍山，大鐵圍城，冥冥長覆，九幽黑獄，即時破壞，無復暗蔽獄禁。諸地獄中，受苦幽魂，俱化生諸天。地獄、餓鬼、畜生，三惡道苦，一時解脫，業冤永除。時諸亡獄，受苦罪衆，以斯玉帝玄瑞，道光燭照之力，得生十方世界，玄霄之上，冲漠之表，諸大天宮。愚按：鼓萬物者，莫疾乎風。帝化玄通，神神無盡，遍徹法界。蒙受者，不識不知，故曰神風。一炁有景色，無實形，奚云揚津？炁之所通，帝德默

運，太和洋溢，浹洽津濡，故曰揚津。一天震，非言雷，陽德亨也。出乎震以施生。一地裂，非崩裂，地道卑而上行，陰定陽復，露成育之妙，不閉塞，而地藏發泄，故云裂。一枯骨更生，非朽骨再起，心死形稿者。悟道知真，回陽換骨，人中之仙，枯骨再生也。一魄在人身，樂人死，享祭祀，生不明道，塵識染累，神離形死，魂消魄散。或自執，或墮罪獄，煥飛魄精，幻變漂淪，惡孽飛魄。復形，魂靈魄聚，不致漂沉，驚禁罪苦、一切冥業。一酆都鐵圍，嚴固難開，悉由罪魂自障蔽。帝光玄照，一燭罪滅。不見天日，長夜九幽之獄，悉開光明；酆都鐵圍，即時摧壞破盡，獄苦罪衆，得生天上。三惡道苦，亦即解脫。彼時承光罪衆，仗此道力，生十方大天宮。夫人之生，神具形全，肖形天地；陰陽五行，性無不備。本太和貫徹，清淨無染，至知誘物化，認假為真，塵勞染著，攀援妄想，一有執恃，牢不可破，欺蔽日久，無

復開明，喜怒憂思悲恐驚情，倏臨驟懼，心無定見，忙忙不止，私欲苦心累身，語之不省，即沉尸飛魄，酆都鐵圍，黑獄幽閉也。若絕欲忘私，使天君泰然，冲和澄徹，鼓巽風，周太和，全浩然，洽道脉，即神風遐著，萬炁揚津，陽施陰受，交泰回陽，消無量之苦，除不盡之塵，破歷劫之迷執，脫暗昧之業趣。即天震地裂，枯骨更生，沉尸飛魄復形，酆都鐵圍九幽即時破壞也。陰消陽長，欲盡理還，易濁為清，精氣化神。脫五苦而融五氣，默朝元宮；淨三業而證三元，上登紫府。即地獄苦魂，化生諸天，三惡道苦，一時解脫，罪衆時承光力，得生諸天宮也。生世間者，思之寶之。

神通品十章

爾時玉帝即分其身，徧於諸大天宮，令諸天宮自然化現，白玉為京，黃金為闕，七寶玄苑大光明殿具光明座，幢節旛蓋，異寶奇花，徧布是處。爾時玉帝即以所分之身，徧於是處，白玉京中、

黃金闕內，七寶玄苑大光明殿光明座上，普爲十方演說清淨解脫之道。

鐘離帝君云：彼放大光明時，玉帝即分化法身，遍及於衆大天宮，令各天宮自然化現。白玉京城，黃金闕庭，七寶莊嚴玄苑，皆如玉帝所居。大光明玄殿，備具大光明寶座，玄揮法幢，節旛華蓋，珍異妙寶，奇麗天花，遍布滿各大天宮之處。爾時玉帝即以妙分之身遍在各大天宮，神化玉京金闕玄苑之中，御大光明殿，陞光明座上，諸神座俱有光。元始玉帝演法寶座，其光尤妙，至大莫量，最神難言，妙勝佛家法王座。故帝化身陞此座上，遍爲十方世界演說其真清真淨、悟解超脫之道。演，演明、陳其義也。管見云：人之元神，靈通不拘，無所不到，本同玉帝之妙化；紫府丹臺，本同天上之神宮；瑞芝靈藥，本同天上之寶花。人惟牽於世利，元神失主，遂不能周流徹貫，觸處呈靈，喪我清靜之真，不得解脫之道。若保真合道，默禮

神王，則靈運普通，周身遍滿，即玉帝分身遍諸天宮。凡身達妙，至寶呈奇，珠樓、寶殿、瓊宮、瑤臺，即天上金玉京闕七寶玄苑也。神宮丹臺，即光明殿光明座也。氣和脉暢，光動霞揚，即幢節旛蓋。神芝之秀，又同天上奇花也。元神御，宰丹臺，敷靈顯秘，即玉帝以分身遍各天宮，同時登座說法也。吾之真性，歷劫不壞，無二無雜，無拘無間，本清靜不染，脫落自然，大明不昧也。能神御敷靈，則遍一身皆玄化。周三千無拘我，明了因緣，不昧實際，表裏瑩徹，窮神達化，即玉帝演解講明清靜解脫之道，教化各世界也。達者味之，自識此義。

神通品十一章

時化玉帝，各以無量天真大聖、妙行真人、靈妃玉女侍列左右。是諸玉女，顏容姝妙，端麗奇特。天珍異寶，莊嚴身相，言音清徹，衆所樂聞。是諸玉女，其身復出微妙解脫自然之香，是香芬馥，周徧諸天極妙樂土及諸大地一切

福處。

王母云：爾時遍諸天宮化身玉帝，各以無盡量天上諸真神通大聖、靈運變化、妙行莊嚴之真人、靈通仙妃、護聖玉女，侍立分列於左右。此衆玉女，顏面形容，姝美奇妙，端正華麗，神奇特邁，天珍神異之寶，莊嚴身之形相，言語音聲，清明通徹，大衆所樂聽聞。是衆玉女，其身邊復發出玄微神妙、大解脫自然之馨香，此香芬芳鬱馥，周遍充滿於衆天宮、極神妙快樂之淨土，並遍及衆大地世界一切福會之處。考義云：妙行者，人有諸善，不假強為，功德不窮，本於自然而成真人，則神通莫量，故曰妙行。靈妃玉女，陰梵妙氣變化之神，拱衛帝真，凡天上神女皆如是稱。無欲無累，與魔女不同。德功俱備，貴美尊靈，純潔永無間雜，故曰靈妃玉女。非專言帝后。是諸玉女，是此也。顏容姝妙，姝美也。端，莊正也。麗，華澤也。奇，神妙罕見。特，超絕衆美，世無

比倫也。天寶莊嚴身相，天上妃女，玄光神化，妙寶莊嚴，其體其容，世所未見。言音清徹，言，言語。音，音聲。清，聲語分明。徹，通遍周聞也。微妙解脫自然之香：妃女了悟，得大解脫，玄機難窮，神妙莫量，不待造作，自然馨香。且不知其香從何而生，故曰微妙。是香芬馥，芬，香美氣布揚也。馥，鬱然馨香盛著也。周遍諸天極妙樂土，周，悉及也。遍，廣被也。極，甚也。各大天官，侍衛玉帝化身之玉女，香不止及一處，皆遍及各世界諸天，甚妙無苦樂土。大地，盡山河世界而言。福處，有世界則有生成，故曰福處。或云恭敬精信，然後得聞異香，各世界承玉帝光，皆生信心，得遇靈妃玉女妙香，故曰福處。此亦通。

六道一切衆生，聞是香者，普蒙開度。所謂天道、人道、魔道、地獄道、餓鬼道、畜生道。若諸天道，一切天人，或有能聞是此香者，五衰四相，永得消除，轉增天福。若諸人道，王臣、兆庶，

或有能聞是此香者，即得人天長壽之樂，身或滅度，乃得脫殼屍解之道。若諸魔道，一切諸魔，或有能聞是此香者，安處天宮，鬥戰之苦，各得休息。若諸地獄道，一切罪魂，或有能聞是此香者，離地獄苦，得淨土樂。若諸餓鬼道，一切餓鬼，或有能聞是此香者，即得飽滿，無飢渴惱。若諸畜生道，一切畜生，或有能聞是此香者，脫畜生苦，得智慧樂。

救苦天尊云：六道中一切衆生，聞是靈妃玉女自然之香者，普皆蒙受開化拔度之惠。六道衆生，所謂各天上人道、世界人天道、諸魔道、冥府地獄道、窮魂餓鬼道、業報畜生道，四種民天下一切諸天界之天人，或有能聞是靈妃玉女自然之香者，五衰四相之苦永得消滅除去，轉增益天福之樂。若大地一切世界諸人道中，帝王臣宰、兆民衆庶，或有能聞是此自然之香者，即得留形住世，享人天長壽之樂。身或入滅超度，即得脫殼無拘、屍解仙化之道。若

諸世界各天、諸魔道中，一切魔王、魔民、魔女、諸魔精類，或有得聞是此自然香者，安然附處天界別宮，爭鬥戰伐之苦，各得止休寧息。若諸世界冥途、地獄道中，一切有罪之魂，或有能聞是此自然香者，即能脫離地獄之苦，得生淨土樂地。若諸窮魂餓鬼道中一切餓鬼，或有能聞是此自然香者，即得飽味滿腹，無有飢渴惱恨。若諸畜生道中一切業報畜生，或有能聞是此自然香者，即能脫離畜生之苦，得生智慧聰明之樂。薩真人云：六道，道猶路也，在六般途中受輪轉，故曰六道。首言天道者，天有三十六稱，最上四天，號曰種民，七寶九宸諸天仙所居，佛家云不退轉之地。種民之下，有四崇秘天，佛家云四梵天也。崇秘天下，有四忘象天，佛家云四禪天，即無色界也。忘象天下，有色界十八天。色界十八天下，有欲界六天。一世界有三十六天，各世界俱同。四種民天，虛無妙有，妙化玄神，永無毀

淪，止有上聖真仙御居，並無天人，不在天人道數。四崇秘天，塵染方淨，略化未神，未臻大乘。雖冠人道，大劫亦不能免。無色界、色界、欲界。諸天人，天身高大，形如白銀，不依日月之照，自有光明。日月天天人身高五里，其上漸加，至於百數，由旬之高，由旬四十里。道經云：踰舍也，衣六銖二錢五分重之天衣，頭有自然珠冠，目不舜，頭不俯，立不倚，眼無淚，身無困憊。若不悟大乘，天福受盡之日，珠冠碎，目瞬雨淚，身屈形憊，五般衰弱，四不美相見矣。若承自然之香，精信恭敬，悟其妙香之由，頓契大道，不從外聞此香，遂得了悟，是曰能聞。五衰四相，永得消除。永，終也。終免衰相之苦，轉增天福。轉轉進益，天福無窮，不退盡也。人道不同，有陰陽老少，有貴賤貧富，有聖賢智愚。不得大道，壽算不長，死之甚難，屍不能化。若各世界，帝王宰臣、大小臣僚及兆庶諸民。千萬曰

兆。庶，衆也。兆庶盡人民而言，極語其多也。若能承自然香，了悟大道，亦能善聞馨妙，即得人天道無拘礙長壽之樂，縱或滅度，亦必妙脫軀殼，屍解仙化矣。脫殼，或坐脫立亡，或投胎奪舍。屍解，或此已死，又顯身於世間，屍魂並去；或假死而上昇。若諸魔道，魔類不同。若唵嘶囉與天帝爭衡，鬥亂天宮。修羅究逆等。一切魔途，或好戰爭，或作幻厲，居處不安，常無休息。此魔等若聞自然妙香，能悟道真，則改邪從正，居處安然，守其素位，在天別宮，不樂紛爭，鬥亂戰伐之苦，各得罷休止息。鬥戰苦者，鬥亂必傷，戰伐必殺，互勝互敗，交為寇讎，所以云苦。各得休息，神雖不侵魔，為魔所亂，亦必應變伏魔。今魔聞香悟妙，安處不爭，神亦無事，神魔悉安，故言各得休息。諸世界地獄，不止一名，曰酆都，曰血湖，曰血硤，曰寒冰，曰火車，曰刀山，曰劍樹，曰愛河，曰剗心，曰鐵床，曰風刀，曰鐵

狗，曰銅蛇，曰鑊湯，曰鋸解，曰碓磨，曰剝剔，曰泥犁，曰拔舌，以及三十六獄。一切受罪之魂，本難離地獄囚刑之苦。若聞此自然之香，即能了悟，遂得超脫，出離地獄諸苦，得生清淨樂土。諸餓鬼、歷劫窮魂久繫鬼籍，或細頸大腹，或首大腹猛，或咽喉蔽塞，或食炭吞煙，或餐鎔銅，或啖鐵丸，累世不聞漿水，不遇飲食，餓餒渴痛，雖常憂懊。若諸世界，如是餓鬼道中一切餓鬼。聞此自然之香，即能悟道，則道味充腹，即得飽滿，消除飢渴，開明喉咽，永無餓惱。諸畜生道，卵化濕更蠢動皆是，不專言禽獸也。畜生者，雖畜養於天地之間，無有智慧，業報多苦，雖苦難脫。各世界一切畜生，若聞自然妙香，即能悟道，則得此解脫，業報即盡，脫離畜生之苦，得聰明智慧之樂。畜生非無知，不能言道，不能體道，形異神殊。或豢養乘御，或漁獵殺食，投陷阱，充庖厨，茹毛飲血，皮骨悉盡，最苦難言。聞香

即得智慧，皆帝光法力也。管見云：上兩節俱一意。人身元神，總御陰陽，真聖妙行，靈妃王女，皆所有也。神氣精血，太和之中，本有妙香，解脫自然，微妙難窮也。氣之偏正，非狂愚自分，亦有六道，惟天君不泰，則為五行所拘；念頭不斷，紛紛擾擾，為陰陽所制。是亦受六道輪轉者也。睹己身六丁玉女之美，聞太和解脫自然之香，明徹大道，使元神常煥，即睹帝光而仙化者也，永脫塵凡，不為身拘，是亦永脫六道之苦矣。達者味焉，自識兩節之意。

神通品十二章

爾時諸生天罪衆，既得生是勝天宮已，緣承慈光攝受之故，便得覺悟，各各明了罪福因緣，與諸眷屬，作天伎音計，其倚切。藝也。一本作伎字。之豉切、渠紀切，與也。伎字當從。樂，來詣帝前。是諸衆等，各各含悲，俱發聲音。臣等前後經千劫萬劫，不見三光，常處黑暗，三惡道中，多受苦惱。伏蒙上帝方便放光，愍救我等，皆生天上。是諸惡業，悉皆滅盡，

無諸繫滯，皆得往生，仰朝上帝，各到道前。是諸生天一切罪衆說是語已，稽首復位。

葛仙翁云：爾聞香脫化時候，諸地獄餓鬼等途、一切生天罪衆，既蒙自然妙香，得生是最勝天已，因承玉帝大慈光明攝受之故。攝，接引保持也。受，接引魂神，召之皈真也。帝放慈光，妙化真香，攝受諸罪衆，即便得覺悟大道。覺，知其所以然也。悟，徹通也。罪衆覺悟，脫其三惡道趣，各各明通了徹，深知罪福因緣。夙根曰因。有因則有果。由來曰緣。有緣則有業。罪衆既明罪業福德因果緣故，與諸親眷屬類。與，同也。罪衆，或魔或鬼，或業畜，各有親黨統屬。既生天明道，與眷屬舉作天上伎藝妙樂。天伎，以藝字解者，言其妙無不通耳。來詣帝前，詣，至也。是諸生天罪衆等，各各包含着悲的意思。俱發聲音說：臣等前前後後經歷大劫小劫，千千萬萬，不見日月星之三光，常處陰黑幽

暗之地，墮於地獄、餓鬼、畜生三惡道之中，多受罪苦悲惱。伏蒙上帝，伏，鞠躬俯伏地下也。蒙，承受仰被之意。言伏蒙，以卑承尊，當作是言耳。後凡言伏蒙，倣此。蒙上帝普行方便，放大光明。方便者，普著道妙，令人得便益，故曰方便。慈光既放，憐愍救拔我等，皆得生於天上。是諸惡苦業報，悉皆除滅了盡，無諸牽繫滯絆，皆得往生諸天，仰朝玉皇上帝。各得到元始至尊大道之前。是諸生天一切罪衆說是言語已畢，稽首復歸原侍立的地位。愚按：人秉陰陽，與天地本來相同，溺於利欲，污陷真心，長惡不悛，以報應轉輪之事為無，是不知罪福因緣。故妙和真意無有，蔽於塵俗之網，貪嗔癡妬，狂亂悲喜，嗜慾求名，不見了期，是常處黑暗，如地獄、餓鬼、畜生之在三惡道中也。晝夜熬煎，亦與諸罪衆多受苦惱一般。是即惡業不盡，有繫滯不得生天之罪衆也。元神御，天光發，則一身陰氣、雜意惡

趣皆復正氣，而昇九陽境界。知善惡凡聖之關，捷於影響，報應昭然。即泄太和之韻，呈靈秘，禮元皇，是即生天罪衆承帝慈光攝受，各明罪福因緣，與諸眷屬作天伎樂，來詣帝前也。陰氣消，雜念忘，惡趣淨，易惡為善，皈神皈命，悔悟懲創，自知作惡不祥。不悟大道，如同面墻坐井，寔無所見。蔽於參三貳二之途，遂多憂懼。惟元神御瓊臺，降真引靈，妙發玄輝，化陰全陽，了脫塵凡，永無牽累，心同於道，默朝上帝。是即罪衆含悲，自言累劫憂暗之苦，伏蒙帝光愍救，免惡業，無繫滯，往生朝上帝而到道前也。此本天上至神妙化。近取諸身者，以道本在身，欲人反觀實踐耳。故稽首復位以上四句，不復贅言。達者詳焉。

皇經註解卷之二

皇經註解卷之三

嗣漢五十代天師大真人張國祥校
狀元方外隱江西吉水羅洪先閱
山東濟南小兆臣周玄貞集

神通品十三章

爾時玉帝出大妙音，普告十方諸天聖衆：汝等諦聽，此諸罪衆，曠劫以來，縱無明性，造十惡業，六塵徧染，三業縈纏，肆意任心，曾無覺悟，陰罪陽過，日積月深。背道違真，順邪棄正，舉心運念，動結愆尤。遂使命過之後，身落三塗，不得解脫。若非今日，遇是法筵，何由出離？

紫微大帝云：當光明攝受之時，玉帝發出大妙音聲。大妙音者，清徹響明，遍及三千大界，一切皆聞，至妙絕倫。故曰妙音。普告諭十方各世界諸天帝、聖真神衆云：汝等諦聽。汝，爾也。諦，詳審真聽也。玉帝教諸聖衆諦聽已之訓，遂言此諸三惡罪衆曠劫以來。曠，廣遠也。

罪衆從歷劫以至此時，縱放無明之性。性本靈明，縱情恣慾，狂惑悖亂，任意想為，不復本然靈覺妙體，故曰無明性。造十惡業障。十惡者，身三惡業，殺生、偷盜、邪淫；心三惡業，貪、嗔、癡；口四惡業，兩舌、惡罵、綺語、妄言。十惡積愆，遂致業報，故曰惡業。六塵徧染。六塵者，眼、耳、鼻、舌、身、意六根不淨，謂之六塵。或云，財、色、名、食、睡、自便私心，共為六塵，亦通。身之內外，皆受塵污，無些清淨，故言徧染。三業縈纏。三業者，身、口、心之三毒惡業。或云，往因夙業、見在愆業、未來冤業，亦通。縈，旋也。纏，約縛之意。積業重累，若繩鎖縛人，不得脫身者，故曰縈纏。肆放意思，不知收斂，任從心志，不知點檢，縱情為惡，曾無知覺悔悟之期。人不見聞，自己獨知，幽隱過惡之陰罪。衆所聞見，不能掩飾，錯誤不改之陽過。日日漸積，月月益深，背了大道，違逆不從真理，順從邪途，棄

捨正道。舉起心意，運發念頭，無誠正之功。隨妄動之機，結成憊愆過尤，遂使命終亡過之後，身落地獄、餓鬼、畜生之三塗，不得解悟超脫。若非今日遇此妙法會筵，何因由得出離業苦哉？愚按：人身神氣，分陰陽清濁。任陰趣，縱濁惡，順邪念，棄真意，故釀成愆惡，難脫業苦。積惡之久，不知其業報由來，所以不覺悟也。元神定居，妙意震敷，周身承靈，默契重玄，陽長陰消，謝愆滅罪，與道合真，皆由妙覺大悟，識愆罪之緣因耳。古人以致知為入門，良有見矣。况人性無二說，善惡皆由心。無明性即法性也。故遮蔽為凡，了悟為聖；聖狂之分，間不容髮。人能攝情歸性，命定神靈，達理欲之幾，知塵惡之自，頓脫業苦，默契重玄，即玉帝出妙音告十方縱性造惡之因，業類遇法筵而出離三惡道也。若以無明性為累，離此求真，是分二途，則不得會一達妙矣。學者玩之，自知超凡之要。

神通品十四章

爾時諸天化身玉帝即以神通，不動其所，移接天人，皆令得至清微天宮玉清聖境元始會下。是諸眾等，不覺不知。是時天尊及會眾等，見是十方玉帝化身，普皆來集天尊會前，如無邊明鏡，照諸影像，互相容入。時諸大眾，稽首瞻仰玉帝化身，聖中最尊，增長清信，益加志樂。心無退轉，起大堅固。

天皇帝云：爾大慈光明遍攝受之時，各大天宮化身之玉帝即以大神通，巍巍不動。其所攝受神光妙移，接引諸天諸人，皆令其得至清微天宮、最上玉清之聖境、元始道祖會下。玉清者，尊貴無比，大清靜虛秘之天。聖境者，至真所御，虛無妙有，諸神未易至，不退轉之地也。元始會下，非大神聖、際良緣者，不得覲承瞻仰。當演經時，諸天人俱至，迺玉帝神移慈接，使令得至耳。是諸天人大眾等，不覺不知其因何自，而幸至元始會下也。是時天尊，乃元始天尊。或以為各天帝，非也。

元始當此時，及會下大眾等，見盡十方玉帝化身，普遍皆來集會，在元始盛會之前，顯列不礙，如無邊量眾大明鏡，照諸眾等形影體像，互相含容無礙，攝入無遺。此時諸大眾五體投地，頓頽稽首，瞻視快仰玉帝神化之身，聖真中最尊崇者。玉帝為諸佛聖師，萬天帝主，故曰最尊。增長清潔誠信之心，更益加篤志慕樂，重道皈真，必志不改而後為誠，必真喜樂大道而後為皈依也。大眾快睹玉帝之妙化，心悅誠服，故曰益加志樂，傾心皈依。無退毀轉移之意，起大堅固服膺之誠。心有退則不堅，心有移則不固，不堅固，非清信志樂矣。惟瞻仰玉帝，心無退轉，則是發起最大堅固不改毀之真志，永皈依大道者。愚按：人之神氣，清濁同源，妙化無二。心不同道，雖導引搬轉，終非正途。故神不凝，靈不見，不能秘化呈奇耳。若元神凝真，妙攝眾有，俾默朝真帝，會神玄宮，真如自在，不假作為，即眾化身玉帝神通不

動，移接天人，至清微天元始會下也。氣精玄會，默順帝則，不識不知，元神運靈，照身衆妙，不拘不漏，即大衆不知覺，神昇上界。元始及衆見帝化身咸集，如大明鏡，衆光彰照，諸像互相容入也。氣精投神，會秘皈真，無染無偽，快樂自如。一得永得，不毀不淪，即大衆瞻玉帝化身，知其最尊，增清信，加志樂，無退轉心，起大堅固也。學者密體之，自見其妙。

神通品十五章

時諸天人邇得生天，忽睹天尊勝會道場，清淨第一，無爲功德之所莊嚴，踊躍歡喜，一時作禮，歎未曾有。爾時十方諸化玉帝俱復一體，坐法座中，法筵清衆俱願欲聞玉帝本行修證，未敢議問。

張果云：玉帝化身普集之時，諸天人近邇得帝慈光，神昇太玄，得生清微天上。忽然睹見玉帝大天尊，最勝良會，大利益道場。勝會者，凡人之聚見曰會。會上若有限的利

益，則不可言勝會。元始演玉經，玉帝顯慈光，各法界衆等普集，神鬼人物永霑大利。開三教之泰運，揚萬法之玄宗。廼法筵之最良極佳。歷劫諸會，難與比對，功德最上，永無毀淪，故曰勝會。會上元始讚玉帝之德，傳至真之法，最上一乘，普度世間了悟，故曰道場。此勝會道場，絕無塵染，虛潔妙明，是清淨第一。玉帝之妙化，出於自然，普濟永利之玄功，不假作為，沙界蒙恩，永劫被澤。玉帝未嘗有心，元始未嘗着意，萬天讓功，諸佛讓德，良緣妙會，功化普彰，真無爲功德之所莊嚴。天人睹此，快樂無極，真不知手之舞之，足之蹈之，而踊躍歡喜。一時法會大衆五體投地，作禮稱歎，言自歷劫來，未曾有此妙化勝會道場也。此時十方世界諸化身玉帝，俱還復作一體，坐在大光明法座中。法筵會上清淨之大衆。言清衆者，此時乘帝光，上昇夙塵頓消，絕無染着，故言清衆。大衆見玉帝之化身顯於

各大天宮，一切世界，悉被光明。今在元始會前，復為一體，分化不見其不足，一體不見其有餘，倏分倏聚，神妙難窮，不知何因。有此神通，衆等念是，俱願欲聞玉帝根本行持、修真證聖之由，未敢擅議請問。愚按：人之一身，神氣滋衛，脉絡貫串，表裏相附，虛靈妙應，動靜互根；本一分而萬，萬歸一源也。人惟氣拘物蔽，貪圖妄想，則明者昏，靈者滯。間有學道濟世，而小智私仁，矯假功德，恩惠有窮，豈足言道。若善始不善終，善作不善成，或勉以支分，強作把柄，或聚或散，雖若靈通，亦非道妙。果能真知了悟，公溥明通，寂感悉定，並無將迎之擾；靈運默會，不假推運之勞。道機妙存，人心退聽，濁而返清，滯而返靈，獨覺真得，怡然快樂，脫拘蔽，妙日新，即諸天人生天，睹天尊道場清淨迥超，無爲功德莊嚴，躍喜作禮，歎未曾有也。斂萬歸一，天君御極，即十方化身玉帝復一體坐法座中也。若

清衆願聞帝行，未敢議問，則說經根因，固不可作己身言也。學道者秘會之，則妙理自見矣。

神通品十六章

於是天尊普告四衆言：往昔有國，名號光嚴妙樂。其國王者名曰淨德。時王有后，名寶月光。其王無嗣，嘗因一日，作是思惟：我或作帝字讀，或作朕字讀。此王自言。不可作帝字。過去前劫。亦未嘗稱朕字。還作我字讀爲是。今將老，而無太子。身或崩歿，音木，亡也。社稷九廟委付何人？作是念已，即便敕下，詔諸道衆於諸宮殿，依諸科教，懸諸幡蓋，清淨嚴潔，廣陳供養，六時行道，徧禱真聖。已經半載，不退初心。

星主大帝云：當清衆欲聞玉帝修證妙因之時，於是元始天尊普遍告法會下四衆言，往昔過去浩劫前，有國都，名號稱作光嚴妙樂。其國君王名號淨德，其王有皇后，名號寶月光。其王無繼嗣儲君。嘗因一日間，想念此事，作是思慮圖惟，自言我今將至老死，而無有太子。己身

若或崩歿亡去，天子為天下主，不敢言死，稱之曰崩，如山崩大變也。社稷九廟，委託付與何人？社，土神；稷，谷神。國以民為本，民以土谷養生為天。社稷之神廼至重者，故君有天下，必言社稷九廟者。有國必有太廟，始祖、繼始祖傳已支之嫡祖，三傳之祖，繼三傳之祖，太高祖，有天下之高祖，曾祖，祖父。始祖在中，其後左昭、右穆分列，共為九廟。人以宗嗣為重，況國君有天下，又大不同。故王慮無太子，社稷九廟無託。作此想念已竟，即便傳下敕旨，詔諸道門清衆，於各宮廟神殿中，遵依道法，祈禳諸科教品，懸諸花幡寶蓋，齋明盛服，肅建壇場。內外始終，恭虔不亂，極清淨威嚴明潔，廣多陳設供養品物。於白日六時辰中，行香演道，遍歷官廟，禱祝仙真神聖。已經及半年之久，王益虔誠，不退悔始初立道場祈禳之心。愚按：人生此身，性得天地之理，形得天地之氣，得父精母血，有此身體。

得日月照臨之光以為明，得皇王水土以為生，得聖人之制以為守持，得先知先覺之師友以為進益。有道，則位天地，育萬物，入聖超凡，生死無拘。無道，則萬事瓦裂，遺臭不止，釀成業愆，報復不已。成聖，則身滅理存，與道同久，即子孫相繼，祭祀不輟。為凡，即無子息，絕祖祀也。聖凡之等，相判若此。凡聖之關，相去幾何。人能知身之關係若此其重，知生我不偶，莫負此身，知四恩之當報，識五常之非輕，盡倫理，明庶物，涵養用敬，進學以知，厚重堅固，聞善必行。晝夜點檢，善保始終，不愧屋漏，無息至誠，與天地合德，日月合明，四時合序，鬼神合吉凶，俟聖不惑，無一息少懈，生順死安，還造化舊物，身後澤名，彌久彌光，即光嚴國王祈太子，行道不退心也。

神通品十七章

忽從一夜，寶月光皇后夢太上道君與諸至真，金姿音資，態也。玉質、清淨之儔

音酬。駕五色龍輿，擁耀景旌，蔭音印，陰覆也。明霞蓋。是時太上道君安坐龍輿，抱一嬰兒，嬰兒當作金容字讀。身諸毛孔放百億光，照諸宮殿，作百寶色，幢節前導，浮空而來。是時皇后心生歡喜，恭敬接禮，長跪道前，白道君言：今王無嗣，願乞此子為社稷主。伏願慈悲，哀愍聽許。爾時道君答皇后言：願特賜汝。是時皇后禮謝道君，而乃收之。皇后收已，便從夢歸，覺而有娠音辰，姓也。懷胎一年，于丙午歲正月九日午時，誕于王宮。

廣生帝君云：光嚴國王祈嗣，不退初心。忽然至一夜間，王妃寶月光皇后夢見太上靈寶大道君與諸至聖真人，金光姿容，玉潤體質，清淨神光之儔侶，乘駕五色龍載之輦輿，擁簇光耀妖景旌節，蔭罩明輝霞光寶蓋。是時太上大道君安然坐在五色龍輿中，抱一嬰小神兒，其兒身各毛孔內，放出百億萬祥妙之光，照映王之各宮殿，作百寶莊嚴之景色。法幢旌節在前導引，浮凌虛空而來。

是時月光皇后見道君抱此神兒，心生歡喜，恭敬迎接，盡禮長跪於道君之前。或作道路前，非也。上白道君言：今臣國王無有繼嗣，願乞求此聖子為本國社稷之主，伏願道君著大慈悲，哀憐愍恤王之無嗣，聽臣之請，許降此子為後。彼時道君答皇后言：願特以此子賜汝。是時皇后盡禮，上謝道君，迺將此子收之。皇后收子已竟，便從夢中歸來，遂覺腹中有孕。懷胎一年，于丙午歲正月初九日午時，誕生玉帝於光嚴妙樂國王宮中。愚按：人之生也，有氣質形體，則有倫理性命，身任綱常之重，生負參兩之責，高大光明，靈通自在，身非委形，生非輕易。本金質玉相，清淨不染也。惟暗昧貪妄，輕慢天寶，不能會神妙，孕玄靈，漫喪吾家至珍，委此身於無用，縱少知自愛，而見道弗明，用功非實，詐善揜惡。多金質其外，而敗絮其中。遂使一己之身不能自保，天爵良貴，厥美弗彰，何以踐形盡性，使我之真

主不類哉？若悟生死之玄根，契天人之秘要，洞曉陰陽，深達造化，認宗祖，識父母，見生我之在坤，明種我之在乾；融金液，純玉煉，得妙於恍惚，會玄於渺冥，以虛無之神神，孕妙有之真真；結靈胎，產聖子，俾生我者不虛，長我者非徒，金筋玉骨，脫化形神，已枯復榮，永延未艾，即寶月光皇后夢太上道君，與諸真清淨之儔，抱聖兒賜后為社稷主也。夫人一也，悟則仙，不悟則亡。能識月光皇后祈子之義，可以悟道矣。

神通品十八章

當生之時，身寶光燄音焰，充滿王國；色相妙好，觀者無厭。幼而敏慧，長而慈仁。於其國中所有庫藏，一切財寶，盡將散施，窮乏困苦、鰥音官寡孤獨、無所依怙、飢饉音謹癯音龍殘，一切衆生。仁愛和遜，歌謠有道，化及遐方，天下仰從，歸仁太子，父王加慶。

無上元君云：當玉帝下生之時，身放百寶光燄，充周遍滿於光嚴王國。容色形相，奇妙美好，觀看者永無厭

棄之心。幼而童稚時，聰敏智慧；漸長成時，慈悲仁德。於本國中倉庫府藏所貯一切財物寶貝盡將發散施捨，盡將字意施捨不拘多少，無吝惜心，若將盡散了一般。如作將財盡捨，是不顧君親國家了。玉帝生知，安行之至聖，豈有此太過之事？讀者詳之。帝施庫藏，非繼富貴者，與那無財力貧窮窘乏之人、幽閉無奈、危困苦楚之輩、無妻之鰥夫、無夫之寡婦、無父之孤子、無子之獨民、無母靡有所依賴者、無父靡有所瞻怙者，當谷不熟之飢年，菜不熟之艱饉，或疾病衰瘡、傷敗殘廢之等，一切艱難衆生，皆受玉帝賑恤惠濟，且又恩德出於至誠，非徒外為。仁厚慈愛，溫和謙遜，天下被其澤，感其德，皆稱歌誦謠，美其有道。自畿甸達之要荒，功化及於遐遠之方，天下瞻仰景從，歸服仁德之太子。歸，猶與也。《論語》云：一日克己復禮，天下歸仁焉。蓋求道即得，效本速大。玉帝生而神異，長大

慈仁，天下有不歸心哉？自是帝德既著，四方悅服。他日聖明至治，從今為太子時已見。故其父王不但生帝之時歡悅，觀今日太子有道，心上益加喜慶。愚按：人生天地間，有此身，則有正真生氣，有正真生氣，而後可以為人。此真氣在天地則為妙理，在人身則為浩然。真氣玄靈，光明自在，照徹古今，并包法界。人具此義，本無困苦艱危，取人厭惡也。但降之在天，棄之在人，繼善成性之真，視為泛常不急之務，不能全正理以孕真靈，養妙機以成神化，暗蔽不明，嗔妬不道，貪利圖名，聚斂不已，不慕道德，不恤貧困，傲慢自賢，招集謗毀，是害正氣，餒浩然，自陷於凡愚，不能入聖也。若保全太和，凝融秘意，聖胎露寶光，神嬰發妙景，漸演玄神，靈化無礙，泥塗勢利，塵視寵榮，以我之有餘，助人之不足，濟人利物，惠遍羣生，任劫運之昇沉，而功德無盡，盛德神化，永著仙名，法界浩劫，悉被慈恩。天神

人悅，供服至德。迺乾坤肖子，出世奇人，父母亦增光而嘉樂。是即玉帝生成之神異。長而慈惠至仁，天下歸仁。父王加慶也。

神通品十九章

當爾之後，王忽告崩。太子治政，俯念浮生，告敕大臣，嗣位有道。遂捨其國，於普明香巖山中修道，功成超度。斗母云：當妙樂國太子有道，天下歸仁之後，國王忽然告崩大行。太子即位，治一國之政事，俯念浮生。俯念，下視己身而思念也。浮生，人生在世，如天上浮雲，水上浮萍，難以常在，故曰浮生。帝既念此，因告命勅諭本國卿相大臣，將大寶傳賢，嗣緒君位於有道者。一云：欲大臣嗣承此位，有道行善。意亦通。託位於賢人，遂棄捨其國，隱於普明香巖山中修習大道。普明香巖山，按古史，迺東海石頭山也。他山中玉帝遺迹皆闡教之所，非香巖山故址。帝既入山修道，行滿功成，超出凡世，度生天上。愚按：人在世間，如

過隙白駒，空中雷電，倏有倏無，不能自保。貴為天子，富有四海，被龍衣袞，玉食萬方。一捐賓客，盡為幻夢。下此而位極人臣，田連阡陌，又不足言。況富貴希覯，貧窮夥然。且醉生夢死，耽迷不悟。所以行道者罕聞，矧作仙人哉。人能悟身猶寄旅，生似蜉蝣，頓出塵障，懇覓重玄，明徹實踐，不求速效，時至自化，行成名仙。先人雖沒，亦藉聖子之至名，不亡矣。非妙樂太子捨父位修道，功成超度哉？噫，人身有崑崙山，老陽消盡，一陽復生，離種種邊，密修至真，久而仙化，又希仙之意，亦類帝行。當味之。

神通品二十章

過是劫已，歷八百劫，常捨其國，為羣生故，割愛學道。於此後又經八百劫，行藥治病，拯救衆生，令其安樂。此劫盡已，又經八百劫，廣行方便，啓諸道藏，演說靈章，恢弘正化，敷揚神功，助國救人，自幽及顯。過此已後，再歷八百劫，亡身殞命，行忍辱故，捨己血肉。

如是修行三千二百劫，始證金仙，號曰清淨自然覺王如來，教諸菩薩，頓悟大乘正宗，漸入虛無妙道。如是修行，又經億劫，始證玉帝。說是語已，法筵清衆異口同聲，歎未曾有。

許真君云：玉帝初捨王位修行，過是劫數已後，經歷八百劫，常作太子。每捨其國，為度化羣生故，割斷六親恩愛，學修道真。劫數有大有小，六十載為微塵劫，五百載貞元會運為羨數劫，三千年為閏置劫；一萬八百年為小劫，十二萬九千六百年為轉輪劫；劫劫延積，經至萬數，迺為大劫。八百劫，莫拘小大，但言其永久，大約八百劫數耳。於此割愛學道，諸劫已後，又經八百劫，施行藥餌，療治病疾，拯拔救濟苦難衆生，令其安康快樂。此劫數盡了，又經八百劫，廣多行大方便，開啓諸道藏法品，演說玄靈寶章，恢擴弘大正教道化，敷布振揚神聖經功，輔助國家，救拔人民，自幽微以至光顯，彌大彌光。一云自幽及顯，自幽冥及

陽世，盡天上、地下、人間悉被其澤。意亦通。過此等劫數已後，再歷八百劫，亡沒其身不敢惜，損殞其命不暇顧，惟行含忍耻辱，不嗔報，大有容之因故，喜捨己之血肉，只是捨財物，人之施財如割血肉。玉帝前劫，忍辱喜捨，捨了家財，雖至貧寒危困，外侮來加，人不堪其憂，帝絕不知覺生退悔，是即亡身殞命，行忍辱，捨血肉矣。一云，苦人所難苦，而後成人所難成。帝成至聖，捨血肉之事，亦須有之。然聖人化度愚俗，無所不可，分身妙變，體實未嘗毀也。觀者神會，勿泥文辭，則善矣。自八百劫割愛學道，以及行藥治病，說經普度，忍辱喜捨等。如是苦修妙行，已歷三千二百劫，方始位證金仙，成不毀之果，號曰清淨自然妙覺法王如來，教化諸菩薩大士，頓悟大乘正法真宗，漸次入於虛玄真無神妙大道。如來字意，人生有性，萬善備焉，其來也，齊肩仙佛，本廣大光明。暴棄者不能全天之所賦，

本來真如，剝蔽已極，遂作凡業。玉帝前修，捨妙樂王位之後，又歷三千二百劫數，功化無邊，永無退轉，不拘不染，大覺法王，範圍天地，曲成民物，不過不遺，視體受歸全者，又迴出萬萬，是云如來也。如是等大修行，又十萬劫，方證萬天教主玉帝之位。元始天尊說是言語已，法筵會上清淨大眾異口同聲稱歎，言自來未曾有此大聖妙行也。愚按：人之生也，身有陰陽，念有理欲。陰陽互根，迭為消長；理欲貞勝，不容並立，欲動則陰凝，理純則陽盛，盛而達化，妙入神神。惟所措而咸宜，無所施而不可。本純陽為上善，柰怠者之弗能。玉帝憫是，大闡妙義，捨王位不一而足，歷八百劫，為羣生捨其國，割恩愛，學大道，此妙行最大不窮矣。況身之元神，御靈臺，宰五官，役使百執事。六欲七情，恩愛最重。能欲盡理還，攝情歸性，剝盡沿華，獨會玄秘，又天君之棄位學道也。行藥救生，令其安樂。玉帝又

歷八百劫度世矣。人之塵勞幻想，鑿喪真意，甘至老死，終不能悟，為世大病。能以元神精氣三品上藥，凝秘結靈，迴陽換骨，生而不罔，死而不亡，又內景行藥救生之義也。演經助國，利益幽顯，帝又歷八百劫矣。人之會玄達秘，妙變陰陽，位上仙，濟鬼物，身亦有默轉真經利冥陽之義也。亡身命，捨血肉，帝歷是又八百劫矣。人之心不動，捐濁質，身亦有殞命忍辱捨血肉之義也。從劫至劫，虔修不改，清淨無染，妙化自然，使人人了悟，功無限量，亦如玉帝從三千餘劫至億劫矣，則未曾有之妙可希。

神通品二十一章

爾時衆中有一玉女，名曰夜光，從座而起。嚴整衣冠，從容雅步，長跪道前，白天尊言：臣宿或作夙字。昔何幸，仰侍御前，親奉供養，已經億劫。三清境界，金闕玉京，寂淡逍遙，快樂自在，嬉遊聖域，餐音參，吞嘗味也聽法音，未曾見此希有之事。

鬼谷子云：當爾清衆稱歎玉帝之時，侍列衆中，有一玉女，其名曰夜光，從其座位中起來，嚴肅端整身上衣冠。座時衣冠雖然潔肅，起來益見其端嚴，故曰嚴整衣冠。從容雅步，動履安恭，長跪於道祖之前，上白元始天尊言：臣夜光宿命昔劫，曾有何因，幸得瞻仰侍列，在天上帝主御前。或以為夜光云，在三清界，又問玉帝神光之由，當作元始傍玉女。非也。天帝常朝三清界，說經時，玉帝大光不常見。故玉女云然，以是為天帝侍女無疑。玉女侍御前非一次也，親自欽奉供養，已經億劫十萬之久。三清玄境妙界，黃金闕，白玉京，寂然清淡，無事逍遙，快美喜樂，得大自在，嬉喜神遊。至聖界域，餐味聽聞妙法音聲。以餐字言者，清微天真聖秘音皆最上一乘妙理，有無窮之味，非易覺明。玉女雖神，初作聖流，豈能明了？故聞法音而詳味之，若吞美食而審味也。是以言餐聽、餐法音。迺玉女指平昔言，非

今日聽元始語也。若作今日看，失文意本旨。夜光夙居聖界，久在御前，大樂然。聽法音，衆妙無不備見，見衆妙無不契悟，如玉帝之普放慈光，變現攝受，聚散自如，生化祥異，浩劫修真，功德無量，教成聖流，了悟最上。博觀歷劫，遐鑒前代，未曾見此希奇無有之事。愚按：人身

陰氣，即仙女也。玉質冰骨，光容雅度，本自有者。但塵染濁污，蔽垢已久，正陰梵氣，陷為穢念惡行；六丁陰神，翻做無常餓鬼。思慮種種，終日營營，食息靡定。舉動張皇，不能朝上帝，供玄元。肆意輕馳，貪愛華麗，以名利自縛，以塵勞自累，不得逍遙快樂，隨輪迴昇轉，墮凡世無休。不聞正道妙法，日嗜情慾，動有羣魔，□有妙化，致使難逢。若純陽秘變，孚化陰精，皓魄露妙光於無窮，玉質顯神化於不匱；周身所有，悉為至靈；化機從容，妙蘊瑩露，靜禮元始，默朝上帝。性道常明，人心聽命。丹臺紫府之界，七寶五明之

官，寂寂空明，疏逸快樂，神遊玄境，耳味瓊琅，為希世之奇觀，真未有之勝事。即夜光玉女從座起，整衣冠，雅步跪道前，白天尊，問夙因，請明玉帝妙化希有之事也。夫陰陽理氣，人所同有，得道者，陰機作玉女神通，無道者反作業趣，則修真之事，誠不可不明。

神通品二十二章

不審向來光內所現十方諸天，變現聖境，皆有玉帝應化法身，天真大聖、妙行真人、靈妃玉女以為侍衛。是諸玉女，相貌端嚴，形體姝妙，出衆妙香，無與等者。復蒙玉帝神通移接，今皆普集在清微天。未審今此玉女以何因緣，得證如是無上色身？恩惟聖慈，示以未悟。

南華帝君云：夜光玉女自言久居上天，聆玄論，未曾見玉帝妙化。若今日者，遂言不審向來大光明內所現出十方諸天，變化顯現聖真境界。變或作遍字，亦通。皆有玉帝妙應神化法身，諸天神仙真大聖、妙行真

人、靈妃玉女以為侍列護德。是諸玉女色相容貌，端正威嚴，形影體質，姝美奇妙，出衆妙神異之香，無復與之等倫者。復蒙玉帝大神通妙移慈接，衆侍衛隨帝光，今皆普遍來集在清微天上。不審今此侍衛玉女以何妙因良緣，得證如是無上色身。無上色身者，玉女妙化色身，超絕一切，無與比對耳。蓋世有六道，地獄、餓鬼、畜生三惡道，無美色矣。人道色身本為精血之聚，氣散神離，其穢難言。況生也，有衰有老，有病有苦，則美皆夢景。故身曰幻，不可言無上色。外此，魔道一切魔女，雖容顏奇妙，具五通，能變化，業滿報來，終為自患。何以言無上色身？惟此靈妃玉女奇顏勝儀，冠絕三界，天香妙化，不衰不凡，非世所得觀，迺無上色身，寔夜光玉女所不能測其故也。恩惟至聖慈悲示以未悟之義，使夜光得知靈妃玉女體貌端姝香妙之理。愚按：世界福業，一切由心造。心統性情，性無不具，陰陽

妙化，人人固有。不脩道，同陰為幽趣，腐尸朽骸，輪業之根；悟道脩真，則陰亦身之正氣，六丁呈妙，靜

煥天光。玉女真香，身妙用也。周身玄通，丹臺瓊樓，六陽秘境，真王時御。法體廣化，攝虎御龍；煨玉液於玄宮，列女青於座右；會丹靈之秘寶，浮妃嬪之清香。亦帝光現十方天境。有玉帝應化法身，聖真玉女侍衛，以神通移居清微天耳。夫人人有性，具陰陽，含衆妙，身與天同。靈妃玉女之神通妙範，宜聞見者悉知，何夜光玉女成聖侍帝，尚未悟耶？蓋脩證有品階之崇卑，而聖體由道源之變化，成何品之果，則有何品神通，惟聖知聖，惟賢知賢，一毫不容假借。靈妃玉女以天至真，神化救人，則光範玄顏，正妙真香，宜夜光之未知。夜光未知，以初證聖身、等階不同，非退托故言者。噫，靈妃玉女尚不易知，則帝光神化又豈能測？夜光尚不能知，他人又豈知哉？聖凡一性，人與玉帝比肩。

至於知之尚不能，何以成聖耶？人宜思之，勉之。

神通品二十三章

爾時天尊謂夜光玉女言：汝固初入聖流，雖有智慧，未能明了。此諸玉女乃自往昔無量劫中，修諸妙行，具解脫門，同清淨信，同清淨解，同清淨念，同清淨行，同清淨身，同清淨心，同清淨意，同清淨果，同清淨報；同大慈心，同大悲心；覆護衆生，如母撫念、愛於赤子。奉戒專一，冥心大道，清齋弘誓，千萬劫中，尊奉玉帝。

冲虛帝君云：爾夜光祈聖慈開未悟之時，元始天尊，謂夜光玉女言：汝固初得入於聖流。汝，爾也。聖流，與聖人同行列，作一流類也。既為聖矣，宜無不知。柰初入聖流，雖有睿智聰慧，尚未能大明了徹。此諸侍衛玉帝之玉女，非一旦有此神通也。乃自過去往昔無盡量劫數中，修衆妙行，全具大解悟超脫之門，歷劫無染，永不退正信心。玉帝夙修，常清淨信矣。諸玉女往劫妙行，亦

同此清淨信也。不着色象，得大解脫。玉帝夙修，常清淨解矣。諸玉女往劫妙行，亦同此清淨解也。真念無生，脫盡諸趣。玉帝夙修，常清淨念矣。諸玉女往劫妙行，亦同此清淨念也。妙行莊嚴，永無過動。玉帝夙修，常清淨行矣。諸玉女往劫妙行，亦同此清淨行也。道以物身，不染邪穢。玉帝夙修，常清淨身矣。諸玉女往劫妙行，亦同此清淨身也。心即道、道即心，湛然無住。玉帝夙修，常清淨心矣。諸玉女往劫妙行，亦同此清淨心也。無內外，無將迎，絕意忘機。玉帝夙修，常清淨意矣。諸玉女往劫妙行，亦同此清淨意也。位乎上清，永不退轉。玉帝證聖，得清淨果矣。諸玉女往劫妙行，亦同此清淨果也。浩劫推崇，功德莫量。玉帝至尊，得清淨報矣。諸玉女往劫妙行，亦同此清淨報也。仁周沙界，惠孚浩劫。玉帝具大慈心矣。諸玉女妙行，亦同此大慈心也。萬有羣生，悉加矜憐。

玉帝具大悲心矣。諸玉女妙行，亦同此大悲心也。玉女大慈悲，心同玉帝。其實云何？覆蓋保護衆生，如慈母撫育惜念，恩愛赤心之幼子；且奉持玄戒，專篤誠一。或云，欽奉心、嚴戒心，精專純一，故冥心誠皈大道。意更妙。諸玉女皈大道非暫然，清淨齋虔，弘大誓願，千萬劫中，歷來欽奉尊敬玉帝。愚按：人有正信心，自然解悟，念斷行純，身無所染，心清意淨，證果獲報，必得至真。能大慈悲，嚴持妙戒，對越上帝，歷久不回，則上仙可至。世人惑邪見，雜念僻行，身不能修，心擾意亂，果報牽纏，皆以不慈悲、弗信道也。故夜光初入聖流，尚不能悉諸玉女妙行，則與之同行，益難矣。意，道人人有也，善反之，則玉女之妙行在我。

神通品二十四章

此諸玉女非實是女，皆天至真，爲度羣生，現玉女身。是故身色神通，智慧隱顯，變化與帝同焉。爾時夜光聞是說

已，心得開悟，稽首歡喜，默然復位。

關尹子云：此侍衛玉帝、往昔無量劫修諸妙行之玉女，非真是女身，皆天仙至真，爲化度法界羣生入道，遂化現玉女之身。惟其爲至真之化身，身素非女，是故身色、神通、智慧，隱顯變化，非淺鮮也，與玉帝同焉。凡人莫不有身，色身幻體不能分化，難以與玉帝同身。至於變身之魔鬼，身爲矯障，又不足言。上有天人，或五里，或數里，或一二由旬，或百億萬丈，或在天宮，或見冥界，或著人間。一顯於此，不能他化。或著聞見，不能妙度，拘一處，限一時，皆非最上妙化法身。諸玉女化身遍見一切世界，聚散自如，卓絕倫類，是身與玉帝同。有身皆爲色，色不妙好，或美而罔終，皆非色於帝同。諸玉女化身妙色，端奇美好，隨在全彰，永無變遷。是色與帝同。天人魔道，皆有神通，神化有限，通非六運，是神通不與帝同矣。諸玉女神化無方，悉且六通，是神通與帝

同。神人皆有智慧，有隔礙，未明了，或假體照，不能妙會，非智慧與帝同。諸玉女徹照無遺，預通無礙，是智慧與帝同。知神通者悉善隱，隱有遺跡，非與帝同也。諸玉女散則還於太虛，不但芥納須彌，是妙隱無迹，隱與帝同。有隱則有顯，顯非大光，未與帝同也。諸玉女妙現清微，神見各界，是顯與帝同。有神通智慧隱顯，是能變化。變化若假作爲，非與帝同。諸玉女妙變無心，神化自然，是變化與帝同。此時夜光聞元始說諸玉女現化語意已竟，心中便得開明覺悟，知諸玉女妙化因由，稽首作禮，歡悅喜慶，默然忘言，復歸本位。愚按：人身陰陽，非判然二物，自一而二，陰以孕陽，陽以生陰，本至根也。修真成道，六丁陰神化見玉女，妙變。奇機與元神玄靈同功。此陰化呈靈，豈獨坤質，迺乾體孕育，陽光梵炁之化耳。況天上神真變化無定，教度衆生，各有權宜。應以男身，即現男形；應以女

身，即化女體。劫運甚久，世界紛然。應以女身度者，不可限量。此天上至聖神真化諸玉女以度羣生，其身色、神通、智慧隱顯變化，非神人所及，與玉帝同。夜光雖朝三清境界，夙聞法音，初入聖流。此大神通至真妙行，宜其未知。雖然，聖凡同性，則法身一般，有普濟之心，傲至真之行。諸玉女同帝神妙，在吾身矣。故夜光聞說，了悟歡喜也。達者詳之。

皇經註解卷三

皇經註解卷四

嗣漢五十代天師大真人張國祥校
狀元方外隱江西吉水羅洪先閱
山東濟南小兆臣周玄貞集

神通品二十五

爾時高虛清明天主與諸天眷屬馭八景鸞輿，九光寶蓋，奏玄歌妙樂，詠無量洞章，散天寶花，噴天真香，飛步遊空，來詣道前。承天尊玉帝威神之力，是諸寶花即於空中化一寶蓋，蔭覆大眾，無不周徧。

赤松子云：爾夜光玉女復位之時，高虛清明天皇帝主與本天諸親眷屬類，或作別天主眷屬，非也。清明天主與眷屬來時，各駕八景輝明鸞輿，九霞光耀寶蓋。八景，一作八寶妙景，一作八卦神景，一作八色光景。大抵天上神輿，周八方之景，備八節之和，故云八景。奏太玄歌神妙之樂，詠無量功三洞寶章，遍散天寶奇花，噴著天真妙香，飛步凌虛，遊空

而來，敬詣道前，承元始天尊玉帝威德神通之力，此衆寶花，即於虛空中化一寶蓋，蔭庇覆蓋法會大眾，無有不周徧處。愚按：人之修真，朝上帝，禮元皇，默轉真經，清虛神光，後朝玄境時呈秘妙，瓊花結彩，周覆衆妙。皆虛皇秘引，元神慈接。即高虛清明天主後至法筵，呈妙樂，御靈輿，所散天花，仗元始玉帝威力，成寶蓋覆衆無遺也。有志者，觀此典而神會之，則天上景化，一身具之矣。

神通品二十六章

是時高虛清明天主見此希有，稽首長跪，白天尊玉帝言：賤臣懈怠，後會法筵。今日吉慶，值遇法橋，幽顯聖凡，普霑聖澤，放大光明，現希有相，上照諸天。四梵六慾，一切樂土諸真聖衆，睹此光明，悉皆雲集。下照下方無極世界，同玄都境，近接九天，靈風奏樂，宮商相和，激朗雲庭，皆成洞章。一切衆生，咸臻道化。酆都鐵圍，長夜九幽，一切地獄受苦衆生盡承光力，皆生

諸天，得受快樂。今日所散天寶奇花旋結成蓋，徧覆法筵。大會諸衆盡承斯光威神之力。臣等千劫良因，九天運會，皇道蕩蕩，正法興隆，今日大吉，成仰玄功。

火帝真君云：是寶花成蓋、徧覆大衆之時，高虛清明天主見此希有之事，稽首長跪，上白元始天尊、玉皇大帝，自己謙言，卑賤下臣，懈惰怠慢，後期遲會於法筵。今日吉辰慶霄，值遇尊聖慈濟法橋。橋者，世人建之，以濟水津，免徒涉。但凡世橋梁，須木石構成，且所濟有限，易於損壞，如長江大河湖海皆不能濟。至聖經功法力，濟浩劫，周沙界，不假作為、形迹，潛移默轉，秘化神通，使人出愛河，離慾海，免血湖，祛洪災，永久不毀，故曰法橋。幽而冥途，顯而陽界。聖智凡愚，普同霑濡至聖恩澤。玉帝放普照大光明，現希有神妙相，上照各界諸天，四梵六欲等天，一切快樂淨土，諸仙真神聖衆等睹見此大光明，悉皆雲合集會。

雲之合也，倏忽滿空，不知何來。聖衆速集如雲，故曰雲集。其光下照下方無極量世界，俱同清微天玄都境界，近邇神接聯九宸上天。光中靈風，奏天妙樂，如宮調商音相和。凡樂宮商等五音，雖分清濁，別五行，天然之妙，或未易有。帝天靈風，妙和自然，不啻凡樂，是宮商相和，激揚朗震於雲庭，皆成三洞寶章。下方諸世界一切衆生，咸臻集大道玄化。酆都獄，鐵圍城，長夜九幽，一切地獄受苦衆生盡仰承玉帝大光明法力，皆生諸天宮，得受快樂。今日臣所散天寶奇花旋繞結成華蓋，徧覆冒法筵大會諸衆，盡仰承天尊玉帝大光威德神力。臣清明天主等，非止一世之幸，遇此希有，千萬劫中，多修良因，又值九天嘉運聚會，皇天至道蕩蕩坦平，重玄正法興行隆盛。一云，元始開化，演最上法，皇風沕穆，大道平平，時無旁門外道，適正法興隆之際。意亦可。今日慶霄，是大吉辰。諸界神人、一

切羣生咸得仰賴最玄功化。一云，咸欲仰希玄功，俯陳道要，亦可。愚按：人身雖小，包羅天地，萬有悉具，衆妙渾涵，清虛靈氣，分司六陽，亦有高虛清明天主。若元神失御，玄化未呈，則趣溺恩波，機沉苦海，洪津巨浪，滔滔靡岸，何以免淪沒，拯昏墊也？惟一人浸淫，遂淪胥陷溺，誤已誤他，固不足論。其滯於小乘，惑於旁徑，行潦無源，難免枯涸，又不足道。間或濬靈源，接道脉，浸浸幾化矣。而自屯其膏，恩澤不降，又非大成耳。故有證四梵六慾之果，不達九宸七寶之境，或受人中福報，或作獄主魔王，甚至沉三惡道，淪九幽界，可哀莫大焉。是以靈化不彰，妙韻不露，真經失轉。瓊花無彩，由不作良因，不信正法。茲不能聞蕩蕩平平之道，而仰被玄功也。能凝玄神，奉天君，清虛明妙之靈，後機隨發，則通達曹溪，吸盡西江，融會金液，誕登道岸，苦海業坑，永得消滅，超絕六慾，高出四梵，普會

萬神，照徹幽界。靈風鼓真，妙韻絕品，真經默轉以無停，萬有蒙恩於不匱。酆都破圍，九幽開光，地獄化天堂，罪衆生淨土。一身陰濁，悉變陽明；瓊花霞彩，蓋蔭衆妙。實虛皇之靈，元神之力也。非積修素養，正法篤信，何以聆皇道休風，得仰玄功哉？噫，此身之妙真也，視清明天主後至法筵，慶遇法橋。稱聖化，揚玄功，謂道濟天地幽顯者同矣。而修良因，廣妙行，不求速化，妙本自然，又證聖真訣也。學道者味之自得。

神通品二十七章

是時，

①是法會聖衆咸仰玄功之時。

高虛清明天主，

②解見前。

以偈讚玉帝曰：

③清明天主。以偈語讚玉帝曰。

金闕玄穹祖，

④祖，一本作主字。攷經意，玉帝為天主，諸佛師，御黃金闕，為玄都穹蒼宗老，故云祖。或作主字，是但以

天帝言矣。高上玉皇尊，

⑤解見前。

妙相冠諸天，

⑥諸天神人。皆有美相，或衰毀有窮，或神通有限，隨各居之天，變化不能相兼，色相容顏，未甚超絕。玉帝隨形妙好，無量無邊，色相奇妙，獨冠諸天。

慈光燭三界。

⑦大慈光明，照徹上天、下地、人間，故云普燭三界。

真聖妙道師，

⑧真一至聖神妙大道玄師。一云，玉帝之行，真聖玄妙，道宗尊師也。

天人依仗師。

⑨玉帝為天人教主、萬神之君、上天神聖。世間人民皆宗依，仰仗功化，是天人師。

大乘垂法語，

⑩道法三乘，分上、中、下。又有最上一乘，不依階級，高超三品，並包無遺，是為大乘。諸神法語，各隨智

見。大乘希聞。玉帝垂教，明示真宗，徹上徹下，該括諸品。羣生蒙誨，悉得超脫，是大乘垂法語。真一指迷途。

⑪玉帝以真宗玄一妙理，指明開悟迷途，此直指單傳，使人不落旁門小法。即指人以大路，使之不陷邪徑也。

功德若虛空，

⑫天下之物，皆有窮盡。惟虛空歷劫若是，再無改移。玉帝大功至德，無量無邊，如同虛空，不可窮極。諸神聖非無功德，或遠或近，或小或大，可以隨分比擬。玉帝功德，無有比倫，故若虛空。

讚揚無窮盡。

⑬玉帝功德如虛空，稱讚難窮，皈依莫盡，讚揚無窮盡，盛德不可名稱矣。黃石公云：高虛清明天主雖後會法筵，真見玉帝妙化，神景奇觀，仰慕不已，遂以妙演偈語，讚揚玉帝。昔宰我、子貢、有若善稱述推尊孔子，為智足以知聖人。今清明天

主稱玉帝功德如虛空，讚揚無窮盡，其他讚再無如是之切盡者，即幸我、子貢、有若之知孔子矣。此偈可以謂之知言。愚按：人身元神，浩劫不改，四體真主，萬有之宗，妙冠六陽，慈護三元，一己真師，神氣攸賴。靈照光通，法音最上，直破迷途，示我周行，妙體玄功。德之所被，與虛空等。讚揚何盡？人不能反觀內照，會此真宗，一身之至德，不識玉帝功德，又豈能知經功利益，無怪其不秘悟實體也。清明天主仰玉帝功德，以妙偈讚，固對揚天休，亦詔人迴光耳。果能契本真，知道力，法天不私，與帝同功，自不惑他岐，弗喪天寶，至聖可希矣。志士勗之。

神通品二十八章

是穹蒼主，浩劫之尊，妙見妙知，無等無倫，湛寂真淨，杳亡杳存，上聖上靈，大神通，光明藏，大丈夫，開化人天，教導無窮，大慈大悲，流煥法輪。爲度羣生，是號玉皇，穹蒼真老，妙圓清淨，智慧辯才，至道至尊。開度衆生，故放是

光。爾時高虛清明天主說偈讚已，靜默而坐。

魏伯陽云：高虛清明天主皈揚玉帝功德，不但有十句之讚，言此玉帝，是穹隆蒼穆聖主，浩劫之至尊。凡劫之有數，或億或兆，皆不可言浩。玉帝歷來作萬天教主，經歷劫運，不可數計，廣大深遠，難以尋窮，故云浩劫之尊。其遐照無遺，神通妙見，徹明無礙，大覺妙知，再無與之同等，與之比倫相類者。瑩徹虛明而湛然，巍巍不動而寂然，不二不息，其道至真，無染無淪，其德至淨。杳若亡，非真亡，迺虛無自然；杳若存，非執存，迺妙有無心。杳若存亡，不可明見，難以測論矣。仙佛諸神咸尊玉帝，是聖中最上。萬神靈通，無如玉帝。是最上玄靈，神化六通，超絕一切。誠大神通，普燭久照，光潔不淪，愈出愈有，無滅無晦，真光明藏，藏畜大光明無窮也。至尊莫如道。玉帝法道自然，最大難量，莫有止極。允矣大丈夫，世賢以

成身成性，正己物正，範圍天地。為大丈夫玉帝化天地，生民物，不見其始，莫有其終，聖中最尊，神中最大，丈夫孰甚焉。開明孚化諸人諸天，教成啓道，無有窮盡。覆愛萬有，憫念衆生，永無限量。信大慈大悲，轉流煥明法輪，俾不滯不隱。煥或作轉，太拘了。為化度羣生，是以稱號曰玉皇。穹蒼之真元老大尊，神妙圓通，真清真淨，大智大慧，妙辯難窮，才施不匱，至道莫量，至尊無比。今開化拔度衆生，故放是大慈普照光明。彼時高虛清明天主說此偈讚已，寂靜默然復坐。愚按：人身元神即上天玉帝，號曰元皇。又曰真主，又曰玄宗，又曰祖真，又曰天君，又曰性宗，又曰真宗祖，又曰法性，又曰妙明真心，又曰正性，又曰玄靈，又曰真師，又曰玄光，又曰大柱杖，又曰法王，又曰妙寶，又曰真根，又曰佛性，又曰真種，又曰丹元。一身真主，靈妙絕倫，明蘊無窮，開化陰陽，神智莫盡。慈恤衆妙，周應明

通。最尊最貴，化機不窮。默融精氣，以孕真靈。故真光時露，妙機生。善體此者，自產神嬰，與帝同功德，道化無盡矣。契清明天主讚帝之偈，方云真知實悟耳。不然，真妙弗得，帝化奚識。清明偈語，誦之若夢，何以得經功，獲實益？噫，性道在我，真妙自足。能會妙明真機，是實對揚玉帝休光者。

神通品二十九章

於是天尊復告四衆云：是帝身即道身也，非常體也；是無量功德之身，是清淨自然之身，是神明堅固、不壞真空、無上法身。威靈恢廓，名聲周遍，無幽不燭，神妙巍巍，難可稱焉。

赤脚大仙云：清明天主偈讚玉帝已，復坐默然。於此時元始天尊復告法會上四衆云：是玉帝妙化之身，即大道身也，非尋常形體也。道本無形，何以言身？蓋道雖虛無，無量無盡，化萬有，成始終，鼓陰陽，無間息，真虛而有實體，非徒空也。玉帝功德若虛空，與道同神，故云帝身

即道身，非常體耳。是無盡量大功德之身，是真清真淨自然不拘之身。功有限，德有窮，難言無盡。玉帝化一切世界，亘古不改，何有限量。着色象、有拘滯，非清淨自然。玉帝永無染着，得大逍遙，寧非自然。是神通光明，堅確永固，不損壞之真空，最上無比之妙化法身。天下之有象者悉壞，惟虛空常存。壞者非堅固，非神明。太虛既存，則空迺至真。玉帝之靈通歷世無損，玉帝之玄光浩劫不滅，不但至神至明，而堅不可磨，固不可破，永無毀淪，終久不壞。是常住之真空，不消散之妙體，是無上絕倫妙法身也。其威德靈光，豈易窮探，恢恢至弘，廓然極大，不可思議名號聲稱，洋溢貫徹，周遍十方。光悉塵微，無幽不燭。神通玄妙，巍巍莫量，蕩蕩難名，不可得而稱焉。愚按：人性靈明，神妙自在。三身足，四智完，浩然之氣，真一之精，萬善衆妙，何者不具？藐焉一身，參位責成，無間可息。本非常

體，迺道身，無量功德身，清淨自然身，神明堅固、不壞真空、無上法身。何世人恣縱，虛負此身，心累神馳，精耗氣散，性道不明。誰復至命，道要茫然，幻身空盡，枉過此生，存亡若夢，一無所知，何由達化？間有明德盡性，或不終保其成。所以人不能窮神達化，還虛成仙，與道合真。至名不毀，惟玉帝以道為身，功德無量，清淨自然，神明堅固、真空不壞、無上法身。凡初入聖流，一間未達，覩之不破，語之未悟，心思未通乎性命，不知其神之所以神，學術未貫乎天人，不知其化之所以化，委於天道之難知，希覲通玄之上士。元始憐衆生之久迷，言帝德之廣運，盡啓世劫之聾瞶，以證神化之玄功，真大慈深仁，欲衆生入妙，亦恢廓其威靈，周遍其名聲，光徹幽微，神妙巍巍，德難名稱。天尊之大願也。柰世域漂沉，人心陷溺，不能順帝之則，奚承元始之訓？噫，天人一理，聖凡同心，不能希聖希天，道法自然，誠有

愧於真經、大道、父母、生身已。有志者也。

神通品三十章

是帝非有為功德之所熏修。而帝昔雖下生人間，多劫行化，示大神通，而身清淨，未嘗不在金闕分身變化，應現隨方，利濟羣生，超昇道岸，普垂教法，開悟後人，依教奉行，登真成道。以斯功德之所莊嚴，是故光明常充諸天，神智妙達，莫可度量。

妙行真人云：是神妙巍巍、難可盡稱之玉帝，非有作為、勉然功德之所熏積修證。是帝往昔劫前，雖下降受生於人間，多劫廣行教化，顯示大神通。行化，如捨王位修行，割愛學道，行藥治病，演道弘化，忍辱喜捨，位證金仙，教度菩薩等劫。故釋藏記生佛之因，言自兜率天乘香象下降於摩耶夫人腹中，遂生文佛。是亦玉帝隨方設教之一化也。他如赴浮黎會，臨寶珠會，化士庶身，化道者身，隨遇著靈，普度不已，為諸天尊王，神通莫量。是多劫行化，顯示

大神通，而法身清淨，巍巍不動，未嘗不在黃金闕內。方元始將說玉經，帝放大光，即分身遍十方諸大天官。一切世界，上天、下地、人間悉睹光明，各獲利益，咸得快樂，共聞大乘。是分身變化，應現隨方，利濟羣生，超昇道岸。所著功德，非止一時一地，普遍垂示教法，開度覺悟後世之人，若能遵依教典，欽奉帝命，自可以位登上真，成全大道。帝惟以此最大上妙功德之所莊嚴，是故所放光明常充滿諸天，至神大智，靈妙通達，莫可測度思量，神智妙達，則大光明非徒爾，德盛而光妙也。莫可度量，則神智妙達非浮爾，道妙而神彰也。至是益見帝非有為功德之所熏修矣。愚按：人之元神，浩劫如故，大神光妙，未易名言，豈有心作為之所成哉？聞見覺知，行住坐卧，食息語默，應感酬酢，雖隨機呈妙，清淨本體，未嘗不御丹闕，即凝玄妙產神嬰，而真真如如，未始他離。千百億化，隨方利濟，誕登道

岸，廣宣靈蘊，開化後天。守秘持真，超凡證聖，萬化悉成，無果不就。以此妙行莊嚴，則一露玄光，充周莫禦，性道奇驗，寧可測度量計耶？視玉帝聖德神功，不假修為，難以量度者，不一致乎？惟成性雖均，而暴棄甚衆，使清淨正性為淫惑障蔽，如明鏡塵埋，光明不露，故妍媸不見，而妙意弗彰。果刮垢磨光，日新月盛，應感無心，真如自在。金闕紫府，永住元神。常應常靜，一無所擾。妙察則一以貫萬，顯行則順應無情。慈悲大願，永不退轉，萬妙莊嚴，難以數計。積修無邊，真光自普，功德不思議矣。吁，此道人所固有也，非有為熏修，亦非頑空可能，不有不無。善學者體之。

神通品三十一章

是身光明，皆具妙號。所謂大神通光，大慈悲光，大喜捨光，大忍辱光，大平等光，大柔和光，大自在光，大利益光，大如意光，大智慧光，大吉祥光，大解脫光，大歸依光，大功德光，大圓滿光，

大無礙光，無能勝光。

大慧真人云：是玉帝身所放大光明皆具上妙稱號。光號云何？所謂大神通等十七大光。玉帝普垂照攝，妙行積證，有大威神，具六通力，神通光嚴，遍燭一切。此光號第一也。次則帝具大慈，帝具大悲，慈悲無量，光妙弘明。大慈悲光，其二也。再次，則帝真喜捨，喜捨無量，妙光普明，大喜捨光，其三也。帝之累劫，又大忍辱，忍辱無邊，光明莫遏。大忍辱光，其四也。帝之前修，行大平等，平等不已，光明莫禦。大平等光，其五也。帝之往劫，又大柔和，柔弱安和，浩劫不改，普著光明，不可窮盡。大柔和光，其六也。帝德安安，超然自在，恢霽光明，終無窮極。大自在光，是其七也。帝仁浩浩，兼濟永利，利益不窮，法輝普煥，大利益光，是其八也。帝之普身，超證妙覺，清淨自然，法王如來，又億劫始證帝位，則最上功德，妙出無心，神化如意，如意光明，永無極已。

大如意光，是其九也。帝有大智，帝有大慧。智慧邁種，光明絕倫。大智慧光，為十種矣。帝本至善，永大吉祥。以是光明，徹燭無息。大吉祥光，廼十一矣。帝夙了悟，得大解脫，脫落自然，金光永煥。大解脫光，廼十二矣。帝同大道，妙法自然，永劫正信，不生退轉。十方後世，悉永欽承，皈神依道，永明不晦。大皈依光，光之十三也。帝普度無量，曲成不遺，功德最大，光昭不匱。大功德光，光之十四也。功圓道備，帝德圓滿，普光久麗，以其成功。大圓滿光，光之十五也。塵染夙淨，妙通圓明，神化無礙，帝光永昭。大無礙光，又十六號矣。神中最貴，聖中最尊，萬天主，諸佛師，浩劫法界一切無如玉帝。是故光明常充諸界，神化莫可度量。無能勝光，非大光明之十七乎？如是十七大光明神妙義，惟玉帝今見之，神通夫豈可量哉？愚按：人生世間，以正性為宗，故仙傳實際，以此為大光明種。但

真種悉具，而保真無人，故迷惑場中，須作修洗功緣。是以有一種最上良因，則有一等神妙光明。玉帝積修無數，妙行難窮，不止十七良因，何為十七大光明哉？蓋機多難悟，化繁道晦。帝十七光明，即佛現丈六身，而頂放大祥光也。況帝光上妙，一種超倫，孰能追蹤妙行，識十七大義乎？噫，是難能也，亦可希也。道本在己，怠則晦，精則明，勤修無為，不求速化，道自得之矣。

神通品三十二章

是故汝等欲見是帝而不可得者，緣以汝等尚於身口，不捨結習，煩惱行業。由是障故，不能得睹是帝慈顏。吾今為汝法會眾等宣示斷障之法，汝等大衆宜各奉行。時諸大衆不勝喜躍，各於至尊几前稽首作禮，俱欲願聞。

雷師皓翁云：玉帝放十七大光明，神通莫量。是故爾高虛清明天主等，欲真見是玉帝而不可得。所以然者，緣以爾等雖無塵染，證位天帝，上妙大乘未真了徹，尚於身口不

捨多劫結習、無明煩惱、凡行愆業，由是遮障之故，不能得睹見玉帝慈顏。結習，情慾塵凡。一切迷累本不可貪，因智慧不足，執想太重，識念一起，漸致染着，物交牽引，愈積愈深，作為結毒，致成習氣。如人以繩鎖挽結，一時難解。熏習舊染，一旦難除，惡種業根，本源未淨，習染物欲，或畜煩惱，或積愆行，或植緣業，煩雜靡定，惱亂未消，累行諸業，夙為障蔽。今雖統御梵天，尚未徹明，弗悉重玄，奚瞻最勝，不能即見玉帝，以是故耳。吾今為爾法會衆等，宣明顯示斷除障滯之法。汝等大衆宜各奉持躬行。時諸大衆，不勝歡喜踴躍，各於元始玉几前稽首俯顙，恭敬作禮，俱欲願聞斷障秘論。吾，元始自謂也。几，案也。愚按：人之生來，各有夙因。雖元會初開，太和之氣，而往劫修習亦難頓忘。故經以夙含業緣比之積毒，誠有見也。是以有喜緣者，則異域同心，為惡緣者，則對面千里。莫言

《道藏》功案、釋教錄記，或指為異端之論，即儒書中，晏嬰之沮孔子，先正歸之命。程、蘇大儒，分為蜀、洛之黨，此亦緣之不偶也。而相須之殷，不免於相遇之疏，今古同以為恨。則因緣之說，豈可盡廢哉？用是十識難盡，五蘊難窮，十有三徒，二十五魔種，七假三合，一切機括，誰復易逃。清明天主證帝位為尊神，雖脫塵染，浩劫夙積，未盡超融，境落高虛，號著清明。往昔善因，未脫虛無套矣。虛明妙有如玉帝者，豈能遽見。釋經攷菩薩行，尚有睹面不見釋迦如來，文佛演最上義，菩薩默默以聽，亦此義也。至聖豈易見，身口結習之障豈易消耶？然此理最難看，見帝，非面見；了知帝行，徹契帝德。如在孔子之門，真得宣聖傳授心法者，一機。心若孚，則時異世殊，其揆一也。神交心會，其見迺真。茲聰明顏子，尚未達一間；清明天主不能睹玉帝，又何疑？元始斷障之法，瑩明夙行，了驗

心宗，捍格既融，外有何障，自然親見玉帝矣。所以衆欲樂聞。吁，起障破障，一切由心。大通無碍，自己元神，對越不怠；口耳粗迹，弗為滯障，大道不在我乎？勉之。

神通品三十三章

天尊言曰：斷障之法，當生大慧，無起疑惑，無起貪嗔，無起媯慾，無起嫉妬，無起殺害，無起凡情，無起凡思，無起昏垢，無起聲色，無起是非，無起憎愛，無起分別，無起高慢，無起執着。

廣成子云：元始天尊因清衆請問無障妙旨，遂言曰：斷除障礙，得睹見玉帝妙化光顏，其道無他，當生神智大慧，篤信正道，無起疑貳惑亂之心。大道至正，真一不二，本無可疑惑。明不足以察具幾，遂至持兩端，無定見，魔知通從。既知大道在我，知明守固，勿貳以二，勿參以三，更何疑焉？不疑則無惑，道可從入。故斷障融淨結習之大慧，必先無起疑惑。求道者不可計功，亦不可以他求，嗔怒忿怨不平之心俱不可有。

斷障之次，無起貪嗔，心專於道，其衷自然。滋私長欲，妄念易生，纖毫淫逸嗜慾之意皆大亂真。斷障之三，無起媼慾。道無所不容，賢不肖皆吾之師友。若絲毫忌刻賢能，或厭惡庸愚，皆為大非。斷障之四，無起嫉妬，大道至仁，一不忍傷。若因逆惡，觸萌剪滅之心，背道亦甚。斷障之五，無起殺害。《陰符》雖言殺機，只是說能照伏邪魔，則至真自在。若秋天肅殺，而草木歸根，生機斂人，見天地之仁處，非世所謂殺也。又云：恩生於害。亦復其見天地之心意耳，非世所謂害也。大道無為，情識不用。一動凡意，其謬無窮。斷障之六，無起凡情。大道忘機，諸想須淨。一有塵思，其弊無邊。斷障之七，無起凡思。道本貞明，清淨無染。少涉昏昧塵垢，喪我至真矣。斷障之八，無起昏垢。道無聲臭。以聲色求之，去道遠矣。體道者，不惟外面聲色不礙，與世無干，道之影響畔岸，一切不求不執。

故斷障之九，無起聲色。道本大同。一是一非，失太玄之本真矣。斷障之十，無起是非。孟子雖云：是非之心，人皆有之。大智若愚，又何肯辨是非也。道無取舍。有愛惡則障真矣。十一斷障之目，一視渾忘，無起憎愛。理本無二，用智分別，則非道矣。斷障十二法，無起分別。見道分明，高出塵外，不屑世故。一生慢心，違道甚矣。十三斷障之法，無起自高輕慢之念。大道活潑，了不可得。斷前十三障，而道得矣。雖名得道，實無所得。一執任有着，則理障未除，為法縛矣。十四斷障法之終，無起執着。愚按：道之在人，本無障礙。惟世為事理二端所蔽，遂至失道。故元始慈示清衆斷障門品，歷示諸端，欲人奮志邁往，不阻於難。打脫事障，更出法檻，則玉帝光顏，以我之妙，明日與對越，有何不見？雖然，脫二障，人道之門也。了悟神化重玄，又在後論之。

神通品三十四章

凝神澄慮，萬神調伏，心若太虛，內外貞白，無所不容，無所不納。無令外邪亂其至道，牽失真宗，敗其靈根，盜其至寶，致爾萬劫永墮凡流，透入俗網，萬魔來攻，百千萬劫，不聞妙法，鬼神執誅，從生入死。是故汝等應當志心，善護真宗，無令喪失。如前所說，如是諸障，汝等各各當除斷之，身得清淨，超度諸難，是名道寶、持法棟梁。

劉海蟾云：元始示斷障之法，生大慧，絕十四業趣矣。其究維何？障斷蔽除，則神明慮淨。當默住元靈玄始，凝元神，澄徹諸慮，萬神和調而潛伏，心如長空太虛，內外貞固潔白。凡法界羣生萬有，無所不含容，無所不包納。且定見定守，終焉不渝，無令外面回邪，亂其至正大道，牽引喪失真正玄宗，敗其至妙靈根，盜其固有無價不壞至寶，致使爾等延積萬劫，永遠墮在凡流，徹透入於塵俗之網，萬種陰魔相接來攻伐。爾百千萬劫惑於魔業，不聞最上至

真妙法，鬼神乘機得以執持誅戮，從生途而入死地。是故汝法會衆等應當專志誠心，善自護持本來真宗，無令捐喪亡失，如前面所說。疑惑等諸多障礙，汝衆等各各當除滅斷絕之。諸障十四障，外邪生死等一段事意俱在內。既除斷諸障，身得真清真淨，超出昇度三界輪轉業罪灾厄諸多艱苦厄難。是斷障之法，名道之至寶，扶持正法之大棟梁。樓閣塔廟殿宇門舍，非棟梁則難構建。修道成真，入聖超凡，非斷障則難了脫。斷諸障則終免毀淪，正法大行。故天尊以斷障為持法棟梁。愚按：人之正性元神，清淨無染，萬劫不毀，好靜怡怡，未始不靈明，與聖真不二。若明明不已，玉帝神化妙光豈不親睹？惟諸慮嬰心，相襲不改。少知道者又冀速效，所以結習難盡，煩惱不捨，帝光難見也。若真明玄通，至健果決，知性命之為真，識萬有之悉假，始見道而忘物，繼行道而忘人，繼得道而忘我，繼成道而忘

心，繼樂道而忘趣。再忘忘以忘真，事理雙融，真假悉遣，不落聖凡相際，何須五位主賓。得之無得，守之不守，空而不空，不神而神，則夙習瑩淨，積業絕塵，細染盡滅，超入最上。不必默朝上帝，與帝同神；不必法道自然，而與道合真，何有於三乘，何有於諸品，聖中至尊，功德無倫？人皆可為，但根塵之淨，功玄而行妙，無作而無間。矯假者固不能脫；融之未至，化之未神，猶為入聖不優，若玄中地仙、釋教菩薩、儒家大賢以上者。今人求道，尚法至聖，毋以大乘為已足。

神通品三十五章

更當修奉是此經典，如近是帝，生尊重心，注想尊容，稱揚尊號，然後汝等得睹慈顏，咸蒙護度，普聞妙法，親奉供養，永無輪轉。

東華木公云：元始示大衆斷障之法，既云是名道寶、持法棟梁矣，又以持久服膺之義示衆曰：爾等清衆聞今正法，更當修持崇奉是此《玉皇

本行經》文典章。親誦此經，如近玉皇尊帝，生尊敬保重之心。知尊經則不褻天道，知重經則不輕天寶，永久尊重，則終無悖慢，大道自得。即《論語》所謂畏天命，畏聖人之言也。如近是帝，固非真睹玉帝；一時不能對越，則一時不能尊重矣。注意恪想玉帝尊容妙相，此道非徒專在於想像也，儼然如在，昭事上帝，斯與天地合德，而為至聖耳。稱頌宣揚帝之至尊徽號，然後汝大衆等得睹見玉帝大慈光顏，咸皆蒙受帝之護持拔度，普遍聞夫無上至真妙法，得以身親祇奉，供養是帝是經，永無輪滅轉移之失。一云，見此經典，聞此妙法，睹是帝顏，能親懇崇奉供養，則永出塵凡，不受輪迴轉生之苦。一說心永無退轉，兼採之更通。考疑云：儒書云，神不可以思致。道經云，神化無心任自然。佛經云，若以色求我，以音聲求我，是人行邪道，不能見如來。今言注想尊容，稱揚尊號，然後汝等得睹慈顏。元始

玄祖斯言豈欺我哉！此言不是意想思存，滯迹口耳。合德於天，孚神於帝，渾化相忘。故古人云，天威不違顏咫尺。敬恭而化，不覺讚揚之至。即儒書所謂言堯之言，行堯之行，是堯而已矣。佛家所謂法身入我性，我性同共如來合。道經所謂神與道合，則道與身一也。惟如此，然後聞

妙法，奉供養，無輪轉。若徒心存想，口稱揚，不能皈身、皈神命，冥心會道，則不可言真供養，焉得無輪轉？至無毀淪、不遷轉，則注想、稱揚、供養，非世俗之謂可知。愚按：人生性命於天，理無不具，惟陷於俗流，故沉於輪轉。若經綸天下之大經，能盡其性，是真修奉玉帝經典；能對越在天，即如近是帝。小心翼翼，祇事不違，是生尊重心。身代天工，口代天言，法天不私，帝真時御。是想玉帝容，稱帝號，得睹帝顏也。德惟一，動罔不吉，盡己、盡人、盡物，參贊化育，皈命投誠，踐形惟肖，至誠無息，悠久無疆，是咸蒙護度，

普聞妙法，親奉供養，永無輪轉也。噫，人之有道，須臾不離。道之有經，如行之有路，踐彼周行，行道者弗全不由此道何哉？此孔子有何莫由道之歎。元始言凡流不能見帝也。果味是經有得焉，自與玉帝齊肩矣。

神通品三十六章

是時四衆聞是說已，歡喜踴躍，歎未曾有。

天官大帝云：是說玉經時，法會四衆人等，聞元始道祖說《玉皇本行集經·清微天宮神通品》卷分已竟。聞帝生長之奇異，多世之修因，變化之無量，功德之難窮，神應之自然，法力之最大。侍衛玉女，化自天真。沙界浩劫，悉賴經法。明罪福之緣由，聆斷障之妙旨。十七大光明，洞之有基；億萬劫修真，述之有要。取法自在，入聖無難。慶塵業之已脫，幸七所之易入。悉皆歡悅喜樂，忻騰踴躍，同聲稱歎。今遇法會，良緣最勝，奇逢非偶。此會此聞，是帝

是經，茲時茲訓，歷劫以來未曾有也。或云，聞是說已，專指斷障之法言，太拘了。元始道祖說經時，《神通品》說已竟，非是說了後又說。雖分三卷五品，因慈訓隨示品類，故天真演經列三卷耳。若將終卷稱歎意同他歎言看，似為未詳。所以聞是說已，當兼承上說。看經者詳之。愚按：人身精神氣血聽命天君，妙心洞然，天籟發聲，怡然理順，油然而太和，手舞足蹈，快樂無方，得道忘機，舉世莫尚。身亦有四衆聞說，歡喜踴躍，歎未曾有之義也。但世溺利欲，了悟無人，入聖成真，不數見耳。若聞經默會，身具太和，心融神化，帝功不在我乎？

上卷分章攷義

元始天尊說《玉皇本行集經》，諸天真請問帝化根由，語雖不同，皆在一時，如何首卷分三十六章？說經固在一時，因問以答，各有不同。後不能明經旨趣，洞至聖玄訓，故諸天帝神真、五老帝君校錄於前，天猷繼輯

於後。文昌帝君、天樞上相各乘時有攷議評正，以首分繫曰《清微天宮神通品第一》，不分他品，以帝神通無倫，其居無上。元始此訓，諸仙佛不能言也。漢魏伯陽、唐呂純陽、元丘長春、明羅念菴議之甚詳，分為章註。首卷《神通品》得三十六章。非輕析真語，故使支分，從三十六天之義以立章。且截處有旨，意相統承，不至渙散。觀誦者能澄心滌慮，以體至聖說經之意，上真分章之趣，務使神與聖真相孚。會經血脉貫串，則三十六章又何分？說經之旨又豈不可得哉？但泥文者多，默識不厭者寡，或以經為無益，或得一句以為奇，或執一字以為病，別靈寶、高上之名，無心聆神會之妙，則因經不能悟道，反為文字障執，又惑之甚者也。噫，諸經至語，皆為心印。因文見道，得道忘言。玄穹祕論，悉我固有經綸，又何疑其難入，至於輕謗，一得輒幸哉？贅此首末，學者戒之。皇經註解卷之四 上卷三十六章終

皇經集註卷之五

嗣漢五十代天師大真人張國祥校
狀元方外隱江西吉水羅洪先閱
山東濟南小兆臣周玄貞集

高上玉皇本行集經卷中

右上卷《神通品》至聖天宮妙化。三教聖真皆不易及，故列第一，見傳此真經神化之自。

此卷首列《神咒品》，以經中秘法語。能度人錄仙、制星、制魔、制水、鎮五方、濟法界，故曰神咒。有神通而法語秘文，若是利益，斯繼神通而第二云。

太上天光明圓滿大神咒品第二

神咒品第一章

爾時天地始祖，五老上帝，稽首長跪，白天尊言：伏聞高上玉皇，慈念蒼生，普放神光，照燭法界，六凡四聖，普叨道蔭。竊以凡夫短景，劫運將終，正道宜行，以濟兆民，使修真之子，有期輕

舉，末代烝民俱獲壽考。

爾時，當元始天尊說盡《神通品》之時。天地開始之祖，五方五靈五老上帝。叩拜稽首，俯伏長跪，上白元始天尊言：伏聞高上玉皇大慈，憫念世間蒼生，普遍放出大神通無量真光，照燭三千大千、諸天諸地、一切法界。天、人、魔、獄、餓鬼、畜生等六樣凡品，以至最上一乘，與夫上、中、下乘四等，仙真、佛、神、志士之四聖，普遍叨蒙大道慈光蔭庇。竊以凡夫不壽，世景短促，法界劫運，將次告終；仙真正道，宜當傳行；以濟億兆之民，使希仙修真之子有了脫之期，得以輕身冲舉，末代烝民無有夭折，俱獲壽考。夫人生世間，命有定數，三教聖人皆蛻骨塵世。顏子大賢，三十二歲而卒。《皇經》雖有利益，豈能違大造之數，而使人長生哉？是不然。人之身可死，人之生理不死。道理不明，雖生世上，其心已死，偷生苟免，何足言壽？若明了道理，悟徹行成，還虛脫

化，則朝聞夕死，無復遺恨，即是長生。故《道德經》云：死而不亡者壽。孔子云：人之生也直。又曰：仁者壽。釋經云：若人了證涅槃，即見如來，是名金剛不壞。三教至人，不以死為死，以不明道為死；不以生為生，以了道為生。造化之數，雖生死難逃，可拘常人，而不可拘聖人。《玉皇尊經》演自元始，最上乘妙法，三教之真宗，萬法之玄訣，法界之慈航，生死之要關，成住壞空之秘旨，傾劫之機括，超證坦途，度世妙品，解結拔罪之津梁也。至尊若為慈演經文，烝民一蒙聖恩，承神光力，皆得皈依正法，不落邪徑，生死無愧，能令短命衆生而得長壽，是經神功有若此者。

陰音印。烝與蒸同。末代將終之劫。

神咒品二章

自昔《元始洞玄靈寶赤書玉篇真文》生於元始之先、空洞之中，天地未根，日月未光，幽幽冥冥，無祖無宗，無氣無

象，無色無名，無形無緒，無音無聲，混沌太無，靈文晦音，揜不明也，藹於蓋切，乍存乍亡；靈圖開化，玄象推遷，結氣浮空，乘機應會。玉帝真誥、靈寶秘篆、無上大不可思議神咒於是存焉。

天地始祖五老上帝言玉帝尊經之正道，能令末代烝民獲壽考，因何有此大功效。自昔《元始洞玄靈寶大赤天書》碧玉琅篇之真文，生於未立法界、元始本初之先，大空洞虛之中，兩儀不曾分，太極無極之先，天地未立根基，陰陽水火不曾肇孕，未有日月光明。混混茫茫，何所分別，幽幽冥冥而已。萬象未生，孰為之先，不見造化之元，是無祖無宗，玄虛太空，不見其氣，無有形象，無着見之色，無字稱之名，無形影，無端緒，無影響，冲然漠然，衆音何有，衆聲何有，無音無聲也。無涯無際，混沌太無。《元始洞玄靈寶赤書玉篇》之真文，靈秘文光，揜然雖不明見，藹然又著端倪，乍存乍亡，非有也，非無也，非有有無無，有而未常有，無而

未嘗無也。元始靈運玄圖。開張萬化，玄元妙化之象，推轉運遷，結妙梵之氣，遍浮虛空，乘玄運之機，應天人叨蔭正道宜行之會。玉帝寶誥、靈寶秘密天篆無上功德，不可稱量，大不可思議神咒於是顯秘著象，而妙法存焉。

赤書，玉帝真經、妙有之文，皆諸天太初梵氣結成，字文廣長一丈，色光赤煥，為丹天大赤金書玉篇。九天之上，皆碧瑤之篇，元始洞玄靈寶之文。寶霞玉潤，故云玉篇。生於元始之先，迺天地本初之先，非元始天尊之先。天地未根，非天地無生化之根，天地生於虛無。元始真文在三千大千未立之前，浩劫之先，故未見天地肇分之根，乍存乍亡，存而不可定其象，亡而未嘗滅其真。玉帝真誥、皇經妙典，慈濟無窮，歷浩劫而無量，遍三千大千而莫盡。諸天奉行，三教遵依，是傾劫法界之誥命也。靈寶秘篆，天書雲篆，非易聞見，

不可思議，不可以心思，不可以言議，言莫量也。於是存焉。玉經真文在浩劫先，非自今日存也，未乘機應會時。道涵太虛，夫有何形，孰從而見，雖存而莫知其存也。今正道宜行，靈文彰秘，神通光明，於昭炳顯。故云於是存焉。真經妙法之存，乘機應會，是難遇之時也。在斯會者，肯自負而不求法誨乎？

神咒品三章

故天地得之而分判，三景得之而發光，靈文鬱秀，洞映上清，發乎始青之天，而色無定方，文勢曲折，難可尋詳。元始鍊之於洞陽之館，冶之於流火之庭，鮮音先其正文，瑩發光芒，洞陽氣赤，故號赤書。靈圖既煥，五帝朝真，飛空步虛，旋行上宮，燒香散花，口詠靈章。是時天啓十二玄瑞，地發二十四應，上慶九天之靈奧，讚三天之寶明。神風既鼓，皇道咸暢。元始登命，太真按筆，玉妃拂筵，鑄金爲簡，刻玉爲書，五老掌錄，祕於九天靈都之館。玉女典

香，太華執巾，金童侍衛，玉陛朝軒，九天玉書，非鬼神所聞。

惟玉經真文、靈寶祕篆於是存焉。故太極生兩儀，清浮為乾，濁凝為坤，天地得之而分判。日曜輝，月呈華，星列張，三景得之而發光。真經靈文，鬱然浮其瑞光秀氣，洞然光映上清境界，發乎始青最上之天，而色無拘定方所。靈文光曜之勢，充周曲折，難可尋究測詳。元始天尊鍊此真文於洞陽重玄之館，鎔冶此經於流火大梵之庭，鮮其正文，光耀無方。鮮其大正妙有之文，瑩然騰發光芒。洞陽妙氣，溢丹流光，純然大赤，故號赤書。靈運玄圖，既煥光明，五帝朝元，至真乘雲御瑞，飛空步虛，旋繞行朝最上官闕，燒清淨自然真香，布散天花，口中讚詠靈文寶章。是時天不愛道，元辰獻祥，天啓十二玄瑞；地不愛寶，二十四氣，粹顯佳禎，地發二十四應。上慶九天之靈文奧旨，讚揚三天之寶章，昭明妙典，神通風教。既鼓度世之機，皇

道咸暢，大法普惠一切。元始登座錫命，太真上仙按筆以書，玉女靈妃拂蕩法筵，鑄不毀之金光，以為玄策秘簡；刻碧玉之玄霞，以為丹書。五方五靈五老職掌騰錄，秘藏於九天太靈玄都之館，玉女則典司天香，太華真人則執持玄巾，金童侍側，周衛瑤堦，玉陛朝軒。九天玉字丹書，非一切鬼神所能聞。

有天地而後有文字，傳諸經。今言《皇經》存而後天地分判。人聞此語，多疑惑不省。蓋道之自然，相循不息，迺為真文；道之不壞，迺為真經。元始在浩劫先，皇經之理已在。真文無字，妙化不窮。故天地自此判，三光自此開景也。此是實理，又何疑？文勢曲折。有以文字作支字者，非是。鮮其正文。有以鮮字作解字者，非是。瑩音盈，或作巽字、信字讀者，非是。玄經無象，何云金簡？玄光妙象，傾劫不毀，故云金簡玉書。玄文光瑞，潤麗尊嚴，故云玉書。

非鬼神所聞。皇經玄祕，鬼神不識，非常聞，非易聞，非凡聞能知者。

神咒品四章

故天寶之以致清，地秘之以致寧，五帝掌之以得靈，三光乘之以高明，上聖奉之以致神，高靈尊之以致真，五嶽從之以得鎮，天子得之以致治，國祚賴之以致平。實靈寶之妙德，乃天地之玄根。威靈恢廓，普加無窮，蕩蕩大化，為神明之宗。其量莫測，巍巍乎太空。是時元始革運，玄象開圖，靈文鬱秀，神表五方，分判天地，開化萬靈。此玄宗之寶，可得暫披於靈韞乎。加，益也。

九天玉書皇經，非鬼神所聞。妙法難聞若此，故天位乎上也，寶重此真經，得真一以致常清。地位乎下也，秘持此真經，得真一以致常寧。五方五帝掌此秘文，以得神通而成五靈。日月星三光乘此真經妙法，以崇高懸象著明。上聖至人奉持此真經，以至於聖不可知而神高靈。神部尊崇此真經，以至真聖之位。五嶽名山聖帝從此

真經之力，而不崩壞，以得安鎮。君天下之天子得此真經妙法，以致四海無虞之治。國家祚業賴此真經，以致安平。實靈寶真宗之妙德，乃天地之真宗玄根。此經天威靈通，恢然莫量，廓爾無際，浩劫法界，一切利益無盡。是普加無窮，坦坦平平，功化無象而無方，誠蕩蕩大不可量之神化，為神明之真宗，其功量莫可測識。無象無宗，巍巍莫及而太空。是時元始天尊革太混之運，玄光妙象，開闢靈圖，靈文鬱茂光秀，辨位化形，神表東西南北中之五方，分判上天下地，開化法界萬靈、一切品類。此重玄真宗秘寶，可得暫爾披瀝宸訓，開闢無上真宗之靈韞乎。披，一作披閱。

皇經道家語，本以脩證仙品，不言齊治均平。此云天子得以致治，國祚賴之以致平，何也？蓋以道化成，迺為治平，悟真宗，明大道，則不言而信，不動而變，無為而成，德盛化神，永利無疆。故云致治致平。妙德本無所得，不見施

與，自然功化無窮，故云妙德。若夫玄根，一切根皆有象；道生天地，雖有無極，太極生兩儀之圖，太極本無象。真者，見不得，言不得，畫圖不過假像教人。天地之根，有何實象？雖無實象，其實循環無盡，故曰玄根。威靈，三教聖神不敢慢，妙化無邊，故曰威靈。神明之宗，諸聖宗法。又云，千神萬聖從此出也。太空，不見其前，不見其後，恍惚不可為象，故曰太空。革運，或云革將終之運，非也。此經在浩劫先，是革太混運耳。神表五方，混沌本無，分辨方位，別中外，寔道妙化，故云神表五方。

神咒品五章

今皇道敷暢，澤被十方，仰觀劫運，真風宜行。臣心實欲使靈蔭八遐，風洒蘭林，寒條仰希華陽之繁，朽骸蒙受靈奧之津。《明真》有格，今當以行。仰對元慈，下伸丹懇，惟願哀憫，俯念蒼生。不審《靈寶玉篇真文》可得見授，

下教於未聞者乎？

玄宗之寶，冀暫披於靈韞。以今時大道敷布暢達，慈恩遍徹於四正四隅，上極下極，澤被十方矣。仰觀劫數氣運，正道真風宜當推行。臣心實欲使靈寶法惠蔭覆一切方所世界，盡八遐之遠，道澤惠風，蕩洒蘭林寶香玄苑。世間沉滯，異類傍門，天魔外道，有情無情，不聞正道者，皆蒙真經之濟。如稿然無生意之寒條，仰希和煦霑潤華陽之繁，滋已枯使榮，朽毀骸骨蒙受靈文奧典之津澤。明真上仙有度世金格，今當以行世間。仰對元始太慈，下伸丹誠懇祈，惟願聖慈哀憫，俯念蒼生，不審《靈寶玉篇真文》可得見授世間，下教於未聞者乎？

十方，非此個小十方，盡三千大千世界之十方。劫運，從劫至劫，終始相循，劫劫此真經濟世，非止一劫一運。八遐，盡三千大千之遠，不止言目前八方之遠。

蘭林，香寶華林。天地人物有此正理，皆有此林。人物昧之而不見。上聖真仙，此林寶光。風洒，惠浮此林，恩及一切，澤濟無方矣。

寒條，人物神鬼不明正法，如同稿木，聞真經了悟，是枯木再榮。朽骸，人物神鬼不知正道，雖生如死，聞真經超脫，枯骨再生。靈奧之津，迺潤澤之津。

明真，玉帝明封諸真。

丹懇，竭盡丹衷，懇祈至聖。

蒼生，以玄首黃髮，老而皓白，蒼然無恒，故言蒼。又云，蒼天所生之民。又云，蒼生，衆也。

靈寶，玉篇，真文，俱解見前。

見授，祈天尊傳授此經，下教法界一切神人鬼物，而度拔未聞此經者。可得見授下教於未聞者乎，迺謙疑未定，不敢執言，恐至尊妙法，不易傳授，故先懇祈，又作未定之詞，以見求之切而尊崇之至也。

神咒品六章

於是元始天尊撫几高抗，凝真遐照，觀時已至，普為時會一切真聖論定陰陽，推數劫會，移校河源，檢錄天度，選擇種人，指拈太無，嘯朗九玄，念無開聽於陳辭，有若閉礙音闕求真之路。是時五老帝君啓問不已，良久，元始天尊乃垂盼皆之容，慨爾歎曰：微乎深哉，子今所扣，豈不善乎。此元始靈寶之玄根，空洞自然之真文，生天立地，開化神明，施鎮五嶽，安國康民。靈寶玄妙，為萬物之尊，天啓玄瑞，靈應自然。

《靈寶真文》宜下教未聞。於是時元始天尊撫循玉几，即寶座，巍崇道體，高抗不俯。密凝至真，默張大智，遐照今昔過去未來，定觀開度之時已至，普為時會，六緣共際，諸法界皆當吉時佳會，一切世界天真至聖論定陰陽貞元之會，推生化自然之數、大小劫運元會，移校河源水帝，檢察攷錄天數期度，選擇脩因善種之人，指拈真玄太無，嘯咏朗吟九品玄章。念天地始祖五老上帝所陳

懇祈傳法之辭，若不開慈聽許，有若閉塞阻礙脩道求真之路。是時五老帝君懇啓請問不已，時過良久，元始天尊乃開慈顏，聖目俯燭，垂盼皆之容，慨爾嘆曰：微妙乎，淵深哉。子今時所扣問豈不善乎。此元始靈寶之玄根，空洞妙化自然之真文，生乾天，立坤地，開化諸世界一切聖真神明，施鎮東泰、南霍、又名衡、西華、北恒、中嵩之五嶽，安歷代之國，康平法界之民。靈寶玄微奇妙，為萬物之最尊。天啓玄瑞，地發禎祥，諸靈效應，皆出自然。

撫几，撫凭玄化玉几，非凡案也。高抗，非自高自抗。以巍然道身，玄範巍巍不動，故云高抗。遐照，有刊作想字者，非是。論定陰陽，推數劫會，上真至聖非拘於數。大道不容輕傳，時本自然。聖教無有強聒。移校河源，檢錄天度，下自諸水，上及諸天，一切世界，諸類羣生，皆度也。選擇種人，非止說於善類。教不揀擇，以真經

說與善類，則諸類皆蒙恩。指拈太無，道本大無，如何拈出。元始至尊，說此真經廼最上一乘、三教真宗，虛無重玄，令人聞之了悟，是云拈出。九玄，或作九九重玄，亦通。盼，分目開眸，垂光目際，故云盼皆。又云，皆，目睢也。盼或作盼，非是。元始至聖，如何稱天地五老之間為善，請問真經，知其利益時會，智見深遠微妙，故稱善。開化神明，道生諸仙神佛等。其餘解見前。

皆音姿，又音子。

神咒品七章

今三天盤運，六天道行，雜法開也，當有三萬六千種道以釋來者之心。此法運訖，三龍之後、庚子之年，雜氣普消。諸天慶會，吾真道乃行。今且可相付，當錄於上館，未得行於下世。玄科有禁，不得妄傳。子可詣靈都紫微上官，聽天音於金格，視俯仰於神王，然後當使得受天文，以總御元始之天也。盤，魯第切。

真經若傳，天啓玄瑞，靈應自然，今何時哉。三氣丹天盤更氣運，六六諸天一時道行。雜說小法，開度教化，當有三萬六千種門頭道理，以解釋來求道者之心。此法運化已訖，三龍，龍漢等三劫之後，庚子之年，貞元會運，雜氣普消，諸天慶宵時會，吾真道正法乃行。今暫且可以相付，當錄載於上玄天館，未得行於下塵凡世。玄科天律，例有禁戒，不得妄自輕傳。子可躬詣太靈玄都紫微上官，聽聆天音，旨宣金格，傳度期數嚴重之勅，視俯仰於仙神天帝、將吏天王，知此法典貴重利益。然後當使得受真經天文，以總御元始統化之諸天也。

盤音立。作塾字，非是。或作塾字，亦不是。

三天，青赤禹餘三炁之天。

六天，欲、色、無色、輕塵、細塵、輕染、細染等。天帝神人，大中小三乘演教，各品道行，雜說小法，開示化度。

三萬六千種道，人身有三萬六千

神氣，清濁強弱不同。有正信者，有邪見者，根器各別，學焉而得其性之所近，故有大乘，有小乘。是有三萬六千種道。

以釋來者之心，應來求道者之心機。一云，應當來之心機，各就相投相信者以受持。故了悟者，言渙然冰釋。是釋字無疑。或作擇字者，非也。

三龍，龍漢初、中、末三劫。一云，龍漢、龍康、龍徵。

雜氣普消，時將泰，妖氛息。

諸天慶會，諸天皆當吉時盛會。一云諸天喜慶法會。

玄科天律，有自然之禁。雖道不擇人，語非其人，褻天寶，且失言，所以三教聖人得其時，得其地，得其人，廼說法傳道。金格夜較玄格，功過等律也。

視俯仰於神王，仰視仙真、俯視天王神將。

總御元始之天，總領統御元始所化諸天。一云，視與示同。示俯

仰於神王，示仰承俯聽之義於神王，統御元始之天。統會諸天，近御法駕於元始最上之天。二說俱通。

神咒品八章

於是五老帝君，與諸真聖，清香執戒，徘徊雲路，嘯命十方，上詣上清太玄玉都，寒靈丹殿，紫微上官，受俯仰之格，乃知天真貴重，難可即聞，還乃更詣元始道前，諮以禁戒之儀，遜謝不逮。

聽天音於金格，然後得受天文真經。於是五方五老帝君與諸天真聖清著真香，執守道戒，周步雲衢，往還導度，逡巡徘徊雲路，嘯咏宣命十方聖神，上詣上清太玄玉都，天宮妙界，寒靈丹陛寶殿，紫微上清玄宮，受領俯仰之格。乃知天文真經尊貴嚴重，難可即得聽聞，還乃更詣元始道前，諮問以禁戒之儀，遜謝智見不及。

清香，廼性真天香、清淨自然香、無為正妙道德真香，非世焚香等也。

執戒，玄範巍肅，如對道祖。守天尊法戒，徘徊慈接無窮，玄光法駕，周命十方雲路之際。先儒云，天光雲影共徘徊，即此意耳。非世間逡巡往來不止之比也。

嘯命十方，嘯音笑，讀作勅。或作秀字讀者，非也。蓋肅然出令為嘯，非吟笑之義。十方，不言十靈寶，但言十方神部爾。

上詣仙真，朝元受法，玄光默昇，恭聆玄誨，非凡足踵躡踐登之義。寒靈丹殿，九天之上無聲氣，日月不能及，天光自照，廣而無量，清而寒肅，丹殿太赤玉光，故云然。紫微上官，紫霄之上，太微天中上清玄宮也。非日月天端、世所稱紫微垣之宮，太微垣之宮也。俯仰格，解見前。

難可即聞，非云難以即時得聞，但言難以聞而即知。一云，玄都掌經者，不使即聞，還廼更詣元始道前，更回來九天上謁元始至尊，諮以禁戒之儀。諮，解見前。請問

天律禁戒傳法受法之儀則。禁，禁令。戒，戒條也。遜謝不逮，非

謝不能守禁持戒，但謙遜言。身雖神真，法寶真經素未悟入，一時聞之，智見不逮，此正天地五老真知道法之尊處。非自限，止言不堪受此也。天下諸類皆有理，皆可聞道，故四靈之物各拔其萃。人為萬物之靈，神為出世之品，豈不能聞道乎？故顏子平日聆受夫子之教，不違如愚，相說以解。卓立之後，云雖欲從之，末由也已。文殊諸佛傳釋迦正法真宗一事，聞者馞馞。與此語義一般。持此經者識得天地五老委曲推尊經旨之意，則知道矣。

神咒品九章

是時天尊慈顏愍諭，靈關廓開，登命五老帝君開洞陽玉館，披九光八色之韞、雲錦之囊，出《元始靈寶赤書玉篇真文》，金書玉篆，微妙秘密，運御乾坤，《大光明圓滿大神咒玉章》，宣付五老帝君。是時五老帝君拜受已，及諸天

聖衆稽首禮謝天尊玉帝，仰奉道旨，按法以傳。

五老帝君與諸真聖既遜謝不逮矣，是時元始天尊大慈天顏，矜愍誥諭，靈關廓然開化，登命五老帝君開玄天洞陽玉館，披開九霞光八景色之韞、雲錦之囊，出《元始靈寶赤書玉篇真文》金書玉篆，淵微玄妙、秘密奧旨、運化統御一切世界乾坤、無量大光明圓滿大神通秘咒玉章，宣布付與五老帝君。是時五老帝君拜受此法已竟，及諸天聖衆稽首禮謝天尊玉帝，仰奉元始道旨，按此經金格正法，以傳諸界神人。

愍諭。愍，即大悲。諭，開誘也。或云當作和愉色，非是。

靈關廓開。藏經之天，丹靈玄關，廓然洞開。一說洞開聖衷，開心見誠。一說聖目流光，靈關廓開。俱通。

登命。登進五老帝君，使近前而親命之也。洞陽玉館，九天玄館，大洞無礙，永明無暗，非瓦石土

木，玄光妙景，虬文奇錯，碧玉之章，故云然。

九光，解見前。八色，太青、太赤、太黃、太白、太玄、葱蒼、碧玉、紫金等色也。韞，經之藏處，玄光無邊際，盡含於此也。披，開啓也。

雲綿之囊，雲霞天錦，道化自然光結，非天孫之織錦也。有底曰囊，經注於此。諸神不測，故云然。非人間布帛皮革比也。靈寶至乾坤等五句，俱解見前。

大光明，三教真文俱稱法寶，所在有光明。諸教經書，光明有限，惟此《皇經》法遍三千大千，傾劫不盡，故曰大光明。

圓滿，聖心慈濟無窮。力不能及，是有限量，有虧欠，故佛下不能化北極廬州，上不能化自在天人，難稱圓滿。《皇經》包萬法，貫諸乘，功化無量無盡。雖云道不瀆、不強聒，道化自然，諸類終始循環，無有不化於道者。故曰圓滿。

神咒玉篇，諸真法宗、諸神玄訣，度世要旨。諸教神通，皆不外此，尊重莫踰。故云然。一攷人性悟道，浩劫難忘，如囊注物不漏，悟入之初如囊口，故注經言囊。

天尊，有連上句讀者，言禮謝元始天尊；有連下句讀者，言玉帝為諸天之尊。後說可從。餘解見前。

神咒品十章

是時東方安寶華林青靈始老蒼帝所受神咒誥命：

東方九炁，始皇青天，碧霞鬱壘，中有老人，總校圖錄，攝炁舉仙。

右度人錄仙青帝秘文二十四字，書于九天玄臺，主召九天上帝，校神仙圖錄。

歲星輔肝，角亢鎮真。氏房星尾，四景迴旋。箕主七辰，正斗明輪。承炁捕非，掃除災羣。

右制星秘文三十二字，書於紫微宮東華殿，主召星官，正天分度。

東山神咒，攝召九天，赤書符命，

制會艷山，束魔送鬼，所誅無蠲。悉詣木宮，敢有稽延。

右制魔秘文三十二字，書于東華玄靈之館，主攝鬼魔，正九天炁。

下制東河，溟海水神。大劫洪災，蛟龍負身。水府開通，通徑百千。

上帝赤文，風火無間。

右制水秘文三十二字，書於九天東北玉闕丹臺，主攝東海水帝，大劫洪災，召蛟龍及水神事。

《東方九炁靈寶玉篇》真文，合一百二十字。皆太上無上大光明圓滿神咒空洞自然之書。一名《生神保真洞玄章》，一名《東山神咒》，一名《青帝八威策文》。

右玉皇誥命，以賜東方安寶華林青靈始老蒼帝九炁天君，令統御東方諸天諸地、日月星宿、名山靈洞、水府泉宮上聖高尊、真仙聖衆，一切威靈。符命所臨，如誥奉行。①

玉帝仰奉道旨，按法以傳真經神咒，其意云何？五老帝君，東方為首。東方木德。安寶華林青靈始老蒼帝

所受神誥命。

右東方九炁至攝氣舉仙六句，廼度世拔人校錄神仙青帝祕密靈文，二十四字，書于九天元臺，主召九天上帝，校神仙圖錄，皆仙梵祕言，不敢細解。

歲星輔肝至掃除災羣八句，廼制星祕文三十二字，書於紫微宮東華殿，主召木德星君，正天分度。

東方神咒至敢有稽延八句，廼制東方諸魔祕文三十二字，書於東華玄靈之館，主攝鬼魔，正東方諸界九炁。

下制東河至風火無間八句，廼制東方諸水祕文三十二字，書於九天東北玉闕丹臺，主攝東海水帝，大劫洪災，召蛟龍及水神事。

東方九炁靈寶赤書玉篇真文，合一百二十字，皆太上無上大光明圓滿大神咒，空洞自然之書，一名生神寶真洞玄章。一名青帝八威策文。以上不可解。故重書原文。

右玉皇誥命，以錫東方安寶華林青

靈始老蒼帝九炁天君。令統御東方諸天地日月星宿，山洞水泉仙聖，一切威靈，符命所臨，如誥奉行。如誥者，東方天地水。一切神祇，皆欽遵此命，無不奏行。此玄章悉天地人物大德青靈之祕，魔鬼喪膽，度劫免災，諸聖不敢違，故永鎮東方諸界。

神咒品十一章

南方梵寶昌陽丹靈真老赤帝所受神咒誥命：

南方丹天，赤帝玉堂，中有大神，號曰赤皇。上炎流煙，三炁勃光。

神仙受命，應會太陽。

右度人錄仙赤帝祕文三十二字，書于九天洞陽之館，主召九天神仙圖錄金名。

熒惑輔心，井鬼守房，柳星張翼，統御四鄉。軫總七宿，回轉天常，召運促會，正道驛行。

右制星祕文三十二字，書于三炁丹臺，主召星官，明度數，正天分。

赤文命靈，北攝酆山，束送魔宗，斬邪滅根。符教所討，明列罪原。

南山神咒，威伏八方。羣妖滅爽，萬試推亡。

右制魔祕文四十字，書于西南陽正玉闕，主制北酆，正鬼炁。

南河水帝，太伯龍王，神咒流行，普掃不祥，洪水飛災，止蛟召龍；開除水逕，千道萬通。敢有干試，攝送火宮。赤書所告，莫有不從。

右制水祕文四十八字，書於西南陽正玉闕，主攝南河水帝，大運交期，洪水四出，召蛟龍及水神事。

《南方三炁靈寶赤書玉篇真文》，合一百五十二字，皆太上無上大光明圓滿神咒空洞自然之書，一名《南雲通天寶經》，一名《九天無上之上咒》，一名《赤帝八威策文》。

右玉皇誥命，以錫南方梵寶昌陽丹靈真老赤帝三炁天君，令統御南方諸天諸地日月星宿、名山靈洞、水府泉宮上聖高尊、真仙聖衆、一切威靈。符命所臨，如誥奉行。

東方誥文，永鎮東方矣。南方梵寶昌陽丹靈真老赤帝所受神咒誥命云

何？

南方丹天至應會太陽八句，迺度人錄仙赤帝祕文，三十二字，書于九天洞陽館，主召九天神仙，圖錄金名。熒惑輔心至正道驛行八句，迺制星祕文，三十二字，書于三炁丹臺，主召星官，明南天之度數，正南天之分野。

赤文命靈，至萬試推亡十句，迺制魔祕文四十字，書于西南陽正玉闕，主制北酆，正鬼炁。

南河水帝至莫有不從十二句，迺制水祕文，四十八字，書于西南陽正玉闕，主攝南河水帝，大運交期，洪水四出，召蛟龍及水神事。

南方三炁真文一百五十二字，皆太上大光明圓滿大神咒，空洞自然之書，一名南雲通天寶經，一名九天無上之上咒，一名赤帝八威策文。

右玉皇誥命，以錫南方真老赤帝三炁天君，今統御南方諸天地日月星宿、山洞水泉、高仙聖衆、一切威靈，符命所臨，如誥奉行。

度人錄仙，盡南方一切世界。

制星，盡南方一切天。

制魔，盡南方天地人物一切魔。

制水，盡南方一切水帝神物。

以上制南方一切誥，盡一切世界之南方，歷浩劫，永鎮。三教大聖，亦不能違。

玄章，秘不敢解。

原文重記，示尊崇玄秘也。

以此制心，自得其秘。

以此虔誦默持，悉有至徵。

神咒品十二章

中央玉寶元靈元老黃帝所受神咒誥命：

中央總靈，黃上天元，始生五老，

中黃高尊。攝炁監真，總領羣仙，

典錄玄圖，宿簡玉文，催運上炁，

普告萬神。

右度人錄仙黃帝祕文四十字，書于

太玄玉寶玄臺，主召神仙玉簡宿命

總仙錄。

鎮星輔脾，迴度北元。魁魎主非，

截邪斬根。魑魎鯉魘，掃穢除氛。

魍正玄斗，明度天關。九天符命，金馬驛傳。

右制星祕文四十字，書于玄都玉臺，

主攝星官，正天分數。

中黃總炁，統攝無窮。鎮星吐輝，

流鍊神宮。勅攝北帝，遏塞鬼門。

剪除不祥，莫有當前。

右制魔祕文三十二字，書于玄都玉

臺，主攝北帝，正天氣，檢鬼精。

中山神咒，召龍上雲，制會黃河，

九水河源。不得怠縱，善惡悉分。

千妖萬奸，上對帝君，莫有干試，

太陽激熾。赤書玉字，宣告普聞。

右制水祕文四十八字，書于玄都玉

臺四壁，以攝中海水帝四泉之水，洪

灾湧溢之數，主召水神，止蛟龍。

中央一炁靈寶赤書玉篇真文，合一

百六十字，皆太上無上大光明圓滿

大神咒，空洞自然之書，一名保劫洞

清九天靈書，一名黃天大神咒，一名

黃帝八威策文。

右玉皇誥命，以錫中央保劫洞清玉寶

元靈元老黃帝一炁天君，令統御中央

皇天后土、日月星宿、名山靈洞、水府泉宮上聖高尊、真仙聖衆、一切威靈，符命所臨，如誥奉行。

中央玉寶元靈元老中主黃帝所受神

咒誥命：

中央總靈至普告萬神十句四十字，

迴度人錄仙黃帝祕文，書于太玄玉

寶玄臺，主召神仙，玉簡宿命。總仙

炁。

鎮星補脾至金馬驛傳四十字十句，

迴制星祕文，書於玄都玉臺，主攝星

官，正天分數。

中黃總炁至莫有當前八句，三十二

字，迴制魔祕文，書于玄都玉臺，主

攝北帝，主天氣，檢鬼精。

中山神咒至宣告普聞十二句，四十

八字，迴制水祕文，書于玄都玉臺四

壁，以攝中海水帝四泉之水，洪灾湧

溢之數，主召水神，止蛟龍。

中央真文一百六十字，皆大神咒自

然之書，一名保劫洞清九天靈書，一

名黃天大神咒，一名黃帝八威策文。

右玉皇誥命，以錫中央保劫洞清玉

寶元靈元老黃帝一炁天君，令統御中央皇天后土、日月星、山洞水泉、聖尊仙衆、一切威靈，符命所臨，如誥奉行。

度人錄仙，制星、制魔、制水祕文，俱不敢解。

此文握盡黃帝之祕，一切皆不能逃，故歷劫永制中央諸靈。

皇經集註卷之五

①案自「神咒品十章」至此處，原本有五版二十五行錯版。茲據《玉皇本行經》文及本書體例，擬補以上文字。刪去原錯版。

皇經集註卷之六

嗣漢五十代天師大真人張國祥校狀元方外隱江西吉水羅洪先閱山東濟南小兆臣周玄貞集

神咒品十三章

西方七寶金門皓靈皇老白帝所受神咒誥命：

西方素天，白帝七門，金靈皓映，

太華流氛，白石峨峨，七氣氤氳。

上有始生，皇老大神，總領肺氣，

主校九天，檢定圖籙，制召上仙。

右度人錄仙白帝祕文四十八字，書

于九天素靈宮北軒之上，主召仙炁，

舉仙道。

太白檢肺，奎婁守魂。胃昂畢觜，

主制七關。參總斗魁，受符北元。

右制星祕文二十四字，書于金關玄

窗，主攝白帝星官，正明天數。

赤書玉字，九天正文，攝召萬炁，普歸

帝君。

右制魔祕文一十六字，書于九天金

關之館，以攝六天魔炁。

西山神咒，八威七傳。符水上龍，

召山送雲。在所校錄，同到帝門，

輔衛上真，斬滅邪源。若有不祥，

截以金關。赤書符命，風水驛傳。

右制水祕文四十八字，書于九天金

關三圖之館，主攝西海水帝，及水中

萬怪惡毒之精，召雲龍，以防水旱之

災也。

西方七炁靈寶赤書玉篇真文，合一

百三十六字，皆太上無上大光明圓

滿大神咒，空洞自然之書，一名金真

寶明洞微篇，一名西山神咒，一名白

帝八威召龍文。

右玉皇誥命，以錫西方七寶金門皓靈

皇老白帝七炁天君，令統御西方諸天

諸地、日月星宿、名山靈洞、水府泉宮、

上聖高尊、真仙聖衆、一切威靈。符命

所臨，如誥奉行。

西方七寶金門皓靈皇老白帝所受神

咒誥命：

西方素天至制召上仙十二句四十八

字，迺度人錄仙白帝祕文，書于九天

素靈宮北軒之上，主召仙炁，舉仙道。

太白檢肺至受符北元六句二十四字，書于金闕玄窗，主攝白帝星官，正明天數，制星秘文。

赤書玉字至普告帝君四句十六字，書于九天金闕三圖之館，以攝六天魔炁。

西山神咒至風火驛傳十二句，四十八字，廼制水秘文，書于九天金闕三圖之館，主攝西海水帝，及水中萬怪惡毒之精，召雲龍，以防水旱之災也。

西方七炁真文，合一百三十六字，皆太上天神咒，一名金真寶明洞微篇，一名西山神咒，一名白帝八威召龍文。

右玉皇誥命，以錫西方七寶金門皓靈皇老白帝七炁天君，令統御西方諸天地、日月星、山洞水泉、聖真仙衆、一切威靈，符命所臨，如誥奉行。度人錄仙，制星、制魔、制水，盡一切西方之秘，不敢明解。

召山送雲，召山之玄靈真氣。或作止字者，非也。

神咒品十四章

北方洞陰朔單鬱絕五靈元老黑帝所受神咒誥命：

北方玄天，五炁徘徊。中有黑帝，雙皇太微，總領符命。仙鍊八威，青裙羽襪，龍文鳳衣。上帝所舉，制到玉階。

右度人錄仙黑帝秘文四十字，書于鬱單無量玄元紫微臺北軒之內，主召諸真人神仙圖錄。

北辰輔腎，斗牛衛扉。女虛危室，豁落四開。壁總七星，執凶糾非。却灾掃穢，明道動輝。

右制星秘文三十二字，書于天心北元玄斗中，主攝北方星官，正天氣。

北山神咒，激陽起雷。流鈴煥落，獲天振威。北艷所部，萬妖滅摧。

右制魔秘文二十四字，書于北方洞陰朔單鬱絕玄臺，主攝天魔北帝，制伏惡神萬鬼事。

九河傾訖，鳥母羣飛。蛟龍通道，水陌

洞開。赤文玉書，驛龍風馳。

右制水秘文二十四字，書于洞陰朔單鬱絕元臺，主攝九海水帝，制水中萬精，主召蛟龍興雲致雨事。

北方五炁靈寶赤書玉篇真文，合一百二十字。皆太上無上大光明圓滿大神呪，空洞自然之書，一名本命紫微元神生真寶明文，一名北山神咒，一名黑帝八威制天文。

右玉皇誥命，以錫北方洞陰朔單鬱絕五靈元老黑帝五炁天君，令統御北方諸天諸地、日月星宿、名山靈洞、水府泉宮、上聖高尊、真仙聖衆、一切威靈，符命所臨，如誥奉行。

北方洞陰朔單鬱絕五靈元老黑帝所受神咒誥命。

北方玄天至制到玉階十句四十字，度人錄仙黑帝秘文，書于玄臺北軒，主召諸真人，神仙圖錄。

北辰輔腎，明道動輝八句三十二字，制星秘文，書于天心北元玄斗中，主攝北方星官，正天氣。

北山神咒，萬妖滅摧六句二十四字，

制魔秘文，書于洞陰朔單鬱絕玄臺，主攝天魔北帝，制伏惡神萬鬼事。

九河傾訖，驛龍風馳六句二十四字，制水祕文，書于洞陰朔鬱元臺，主攝北海水帝，制水中萬精，主召蛟龍興雲致雨事。

北方五炁真文，合一百二十字，皆太上大神咒，一名本命紫微元神生真寶明文，一名北山神咒，一名黑帝八威制天文。

右玉皇誥命，以錫北方五靈玄老黑帝五炁天君，令統御北方諸天地日月星、山洞水泉、聖真仙衆、一切威靈，符命所臨，如誥奉行。

度人錄仙，制星、制魔、制水、盡握北玄之秘，故一切永不能違。

授五方五帝真文，永鎮一切世界，三教萬類，一切莫逃；永劫不壞，虛無妙有，祕不可窮；玄之又玄，神乎其神。吾身之五炁悉備是理。志士達人，徹性命之宗，得萬法之源，理數不能違。真經常在我，神咒功化屬此矣。

神咒品十五章

道言：是大神咒者，元始之妙言，玉皇之真誥，上清自然之靈書，九天始生之玄札，空洞之靈章，上聖之秘語，玉宸之尊典，成天立地，開張萬化，安神鎮靈，生成兆民，匡御運度，保天長存；上制天機，中檢五靈，下策地祇，嘯命河源，運役陰陽，召神使仙；此至真之妙。又神應自然，致天高澄，令地固安，保鎮五嶽，萬品存焉。

五方神咒妙化無窮，何也？道言：是大神咒者，元始天尊至玄之妙言，玉皇天尊至真之寶誥，上清玄都自然之靈書，九天仙境始生之玄文仙札，太虛空洞之靈章，上極無上至聖之玄言秘語，紫極玉宸之至尊法典，上成諸天，下立諸地，開張萬有妙化，總諸神，鎮萬靈，一生一成，億兆之民，匡輔統御劫運化度之秘，保諸天長存，上制天覆大生之機，中焉檢制五方五靈，下以策使地祇，嘯命一切水府河源，運化役使陰陽，召諸神使仙真，此大神咒，乃至真之妙文，

神化妙應，惟出自然。上位乎天，得一以清，高明悠久，是致天高澄。下位乎地，得一以寧，博厚悠久，是致地貞固。永安保鎮五嶽名山，一切萬有品類使永存焉。

道言，是五老上帝述道致讚述言，故稱元始玉皇云云，非元始自贊也。

妙言至靈書等，俱解見前。

九天始生玄札，稱手書曰札。《玉皇真經》無象無聲，大光妙音徹十方、遍法界，傾劫不毀，非手可書，皆自然之文；非言可傳，皆心印之妙。探之無始，在太虛罔象之先，故曰九天始生玄札。

玉宸尊典，天子所居為宸，元始為萬教至尊，居玉清聖境，玄化難窮，故曰玉宸。說此真經，各教經書皆不及此，諸聖諸神皆不敢違，天津金格寶之甚重，十方列聖衛之甚嚴，故曰尊典。

安神，令諸神不顯神通，安然無為。鎮靈，令萬靈不露靈響，斂其

威靈。

匡御運度，終始法界，掌持劫運，化度無窮，令其循環無端，不傾不撓，故曰匡御運度。

下策地祇，簡策旨命之也，非策鞭之策。運役陰陽，陰陽往來，道實主之，故云運役，非言役使陰鬼陽神也。

召神，攝召一切神。使仙；仙為上帝之賓，何以言使？元始說此經，迺三教真宗，諸神欽承，故云使仙。

天地有窮，萬類易盡，何言萬品存焉？從劫至劫，生生不窮，皆賴大道，故云萬品存焉。

神咒品十六章

玉帝昔授五老上帝。是時五帝跪捧其章，秘題靈都之館。天真皇人昔書其文，掌之於上清真境太玄玉都寒靈丹殿、紫微上官。累經劫運，而其文保固天根，無有毀淪，與運推遷。是大神咒混之不濁，穢之愈清；毀之不滅，滅之極明。大有之文，天真所尊，自光真

名，帝圖刻簡，昭示來生。斯文隱秘，不得窺聞。有得之子，保萬烝長存。勤行修奉，克至神仙，朝禮帝君。

大神咒，保天地山川萬品存焉。玉帝昔以此神咒授五老上帝時，五帝跪捧此寶章，秘密題此玄章於靈都之館。天真皇人昔書此經本文，掌之於上清真境太玄玉都寒靈丹殿、紫微上官。累經劫數元運，而其經保固天然妙化之根，無有毀壞淪沉，與元運相推轉移。是大神咒，混之終不可濁，穢之愈見其清，毀之終不滅，滅之則極精明。大有玄妙之真文，諸天真聖所尊崇，自煥天光，普張真名，應愛帝圖刻之金簡，昭示當來生生諸品。斯經文隱奧深秘，凡常不得窺測聞見。有得斯道之子，保萬烝長存不毀，勤行修習奉持，克至神仙，朝禮至尊帝君。

跪捧，長跪手捧寶章也。經在天，迺玄文，非世文。如何言手捧？天神拱捧，至敬之意。

祕題，讚而書錄也。天真皇人書

經文，皆玄光天書，金玉篇字，一丈之妙文也。

上清真境，靈寶所居也。經自元始天尊說，傳之者靈寶，故曰上清真境。

而其文保固天根，經之理，歷劫不壞，是保天然之玄根永固也。或以為保天之根，使其悠久，不可從。蓋元會之後，天不能長在，故知非言天之根。

與運推遷，劫劫長存。

混之不濁，雜法渾亂，正道常存，終不能濁此經。

穢之愈清，褻瀆此經者，天有罰，愈見其尊而清。

毀之不滅，痴邪謗毀此經者，此經終不磨滅。

滅之極明，無道之世，欲滅此經，則經法流通，大行於世，愈顯其明。

大有之文，歷劫常在，處處不無，非凡象，迺妙有。故云大有。或以為大有妙庭之文，太極。

昭示來生，將來之萬生，非一人之來生。不得窺聞，非至聖不知此經，常人但誦其文耳。邪魔不敢窺，下愚不能聞。

有得此經中道理之子，保吾之萬烝長存，勤行脩奉，自能至於神仙，而朝禮上帝也。或云，朝五老帝君，太拘了。一云。保萬化之烝長存，亦通。

此言經之明效。

玉皇功德品第三

功德品一續前十七章

爾時玉虛上帝，白天尊言：佳願慈悲普為四衆、帝釋等及四梵天王、一切諸天、一切諸仙及未來一切衆生、持是經人說利益事。爾時天尊告玉虛上帝言：快哉斯問，不亦善乎。汝以慈悲，愍念衆生，故請問於我。汝當復坐，吾為宣說。

當玉帝授五老上帝此經時，玉虛天之上帝，上白說經教主大天尊言：惟願至聖慈悲，普為世間四衆，及諸

天帝釋等，及三界之上四梵天、一切諸天、一切諸品仙人，及未來世一切衆生、持是真經之人說利益之事。爾時說經大天尊告玉虛上帝言：快心哉，斯問也，不亦善乎。汝以慈悲心，愍念世間衆生，故請問於我。汝當復坐，吾為宣說經義。

天尊指元始言，或指玉帝者，非是。

四衆，解見前。

帝釋，廼諸天帝，及釋教諸佛、菩薩等衆。或以為諸天主皆稱帝釋，亦是。若以玉帝為帝釋天主，此僧家之訛言。不故諸經妄以天主為玉帝，不知玉帝為萬天之宗，非止一天之主。釋經云，梵王帝釋為呈祥。蓋言天佛之宗，非敢言玉帝。僧人任私謬解，亦屬大過。故併及之。

四梵天王，三界上大梵天王也，非欲界下天之王。言梵天，則盡上界。不言種民諸天者，種民之上皆至真大仙，自然契此經，故不言

及。一切諸天，一切諸仙，自梵天之下，一切諸天帝神民、一切諸品僊。

說利益事，大道不言效，如何玉虛上帝請言利益？大道為天地人物之宗，本來皆有實益，於人有自然之利，天地四衆未知此經者不知其義，罔敢信從，遂輕大法，誤自己。大道恩慈，不忍世迷，故言利益以度人。柰何愚迷者尚云，此經亦微言眇論，何益於人。豈知此經生天地人物，不可須臾離者。處處人人當誦持，劫劫相循，有大利益，廼出自然，非徒欺人以效也。不亦善乎，非疑詞，廼稱其善問也。我，元始自謂也。汝，元始謂玉虛上帝也。復坐，命玉虛上帝復還聽經座位。吾，亦元始自稱。宣說，廣布為宣，告語為說。梵，扶之切。或誤作梵，非也。

此請經之誠、普利之心。

功德品續上十八章

天尊言曰：若有三界十方無量國土，或兵戈並起，疫氣大行，水旱虫蝗，凶灾饑饉，是其國王大臣當發慈憫，爲其黎庶遍勅國內，州縣鎮宰令諸道流，清淨嚴潔，于其觀內設大齋醮，六時行道，爲轉此經，當得國土清平，五穀豐熟，黎庶安泰。

元始天尊既命玉虚上帝復坐聞經，迺言曰：若有天地人三界、上下四正四隅之十方、無盡量一切國土，或動軍戰，而兵戈並起，或天灾流布，值疫氣大行，或年歲荒歉，而水旱虫蝗，凶灾饑饉，是其國國王大臣當發慈憫，爲其黎民臣庶，遍勅國內，州縣鎮宰，令諸道門之流，清淨嚴潔，于其觀內設大齋醮，白晝六時行道，爲轉此真經，當得國土清平，五穀豐熟，黎庶安泰。

或云三界，不可言天，恐與國土兵戈字有礙。不知天魔與諸天主爭衡，亦有鬥戰，各有分界，故知三

界言天地人也。

兵戈並起，只言各處兵起，互相戰爭，非言兵戈兩樣並起也。刀槍之屬，皆兵器戈戟也。此固不可言並起。或言兵作人，人戈並起，亦非正義。

或疫氣大行。天道安常，灾則稱變，疫氣大行。時癘之作亦灾異也。此經救除之。

水旱虫蝗，水溢旱乾，諸虫害禾，羣蝗傷稼，皆灾異也。

凶灾饑饉，歲不熟，民物不安則為凶。異常為灾，谷不熟曰饑，菜不熟曰饉。此皆灾異也。黎，黔黎；庶，庶民也。

遍勅。遍與徧同。

州縣鎮宰，或言州縣統鎮百姓之官，或言鎮為軍鎮之官。又言鎮為督撫，官之大者。皆是。

是其國王大臣，如是等地方之國王大臣。

道流，全真、正一、清微、靈寶等派道流。

清淨嚴潔，內外肅然，身心無二，衣壇整飭，恭敬莊嚴，終始如一。如是清淨嚴潔。

觀，觀也，神之所在，瞻者起敬，是誠大觀。故曰觀。

設大齋醮，齊內外，一衆志，齊其不齊為齋。祈謝神祇，酬報天地，合德於神，依科迓福為醮。

六時行道，非如今時沿途行道，不過依科迓神，轉經念道而已。或云，晝夜十二時，奇時動，偶時靜。

六時，當作子、寅、辰、午、申、戌。或云子至巳，一云白晝六時。俱通。轉經，心與道合，持真經，國土無厄艱，得清平。

稻、黍、稷、菽、麥，五谷俱豐熟，各國各界黎民無灾艱，永得安然定，泰然樂。

功德品連上十九章

若復有人入諸山林，遇毒惡獸，但能存想一念真經，山神衛護，猛獸自退，終不害己。若入江海，採寶求珍，值遇惡風，如法持念是此真經，風浪頓止，安

穩達岸。

真經之利，豈特消天災，豐歲年，令黎庶安哉。卒然之變，山水風波之厄，亦有不能害者。若復有人入諸山林中，遇毒猛惡獸，但能存想一念真經，不忘此寶章妙法，山神保衛佑護，猛獸自然退去，終不傷害持經入山之己身。若人入諸江海，採寶物，求珍玩，值遇惡風，漂其船舫，如經中誦受之法，持念是此真經，大風自息，波浪頓止，安穩達岸，持經人船終無傷害。

山林險阻，猛獸毒虫，勢不可近。一旦遇之，必至傷害。存想一念真經，不過暫與道合，如何猛獸便退？蓋人物之生，本一元氣，但分清濁全偏。天地之初，人物混處，泐泐然、穆穆然，一切毒虫惡獸原不害人。後人心漸假，去害虫獸，所以虫獸害人。人若常行好事，存好心，敬信真經，念念不忘，是大善人。入山林，自不遇毒虫惡獸。若平日庸常無有善功，入山

適然遇着毒虫惡獸，不貪生怕死，不惶懼不斯心，惟信正法，專一無二，操存默想，一念真經，心與道俱，山神衛護，毒虫猛獸自然退避。虫獸，道中之蠢物，性雖毒惡，好傷殺，各有所敬、有所畏、有所忌。是以鷲鳥尊鳳、猛獸朝麟、蛇蝎蜈蚣諸毒虫等畏鸛鶴鵠鵬，滅跡不施其毒。仙真達生化之機，明剋制之源，一咒語、一符水，尚能制虫蛇毒，解虎狼厄，返風回天，况《皇經》為萬法之宗，天地之祖。萬物生殺，係於天地，本於大道。一念存想此經，不懼虫獸，法寶光，諸神衛，虫獸雖蠢，性亦尊道，畏天懼神，自然退避。

攷證：

《易》云：履虎啞人，凶。子曰：暴虎憑河，死而無悔。此經云，存想一念，如法持念此真經，虫獸退，風浪息。《道德經》言：合於道者，鷲鳥不搏，毒虫不螫，虎兇無所投其角，藏牙伏爪，避不敢傷。人多疑儒道相悖，及攷禹過江，黃龍俛首而逝。劉昆守江陵，返風滅火，守弘農，虎北渡河。伊川過江，主敬風息。則知《易經》、孔子所言，無道妄行者也。《皇經》《道德》所言，尊經合道者也。經功尚可以脫獸趣，拔毒業，持經者豈行陸齊出毒哉。

功德品續二十章

若在軍陣，戈戟既接，兩刃相交，存心默念是此真經，是諸惡賊悉自退散。真經之利，豈但解虫獸風波厄哉？若在軍陣，兵器俱舉，戈戟既接，兩軍之刃相交，存心默念是此真經，是諸陣上侵我之惡賊。悉自退散。

攷證：

兵，凶器也。戟，危事也。冲鋒禦

敵，矢石之交，兵刃既接，如虎之鬥，勢不可解，存心默念此真經，不過心與道俱，如何惡賊便退？

兵法云：三軍可奪氣，將軍可奪心。默念真經，攝其神，視其魄，妙典神功，敵人喪氣，無殺心，無鬥志，格惡從善，自然退而散去。軍陣，非言萬二千五百數為軍，軍勢成列為陣，止言戰而陣成，相攻之際。

戈戟非重文，接與交，無大分別，不過順經文言兵刃相交耳。

存心默念真經，不為苟免殺伐，專心致志，寧死而不畔於道耳。

諸，衆也。

惡賊，或言惡指惡人，賊為賊黨。如此分者，非也。不過言惡逆之賊耳。

悉，皆也。

退散，退而自迴，散而各歸也。

解疑：

老君化胡，于闐國以兵圍之。

天帝居天宮，天魔舉兵以爭衡。

佛在舍衛國，欽利等六王爭叛。孔子化天下，伐木於陳，削迹於宋。

此皆大聖人。道身，法身。常轉真經，觀是若有賊害之者。其後老君布道光，于闐皈依。帝顯天光，天魔斂跡。佛運法光，六王歸化。孔子著德光，援琴三唱三和，匡人解甲。是自退散。

當攷賊多有誓不殺害善人者。善人多有臨危不死者。

或又疑宋徽、欽之好道，受辱漠北；梁武帝好佛，餓死臺城；以為經功不效。然三主之好道釋，但有虛名，非真好也。情欲未絕，不能以道治天下，故有此難。若真體道，正信經力，匹夫匹婦，亦可免難。若疑死難節義，不信經言，則謬矣。吁，稱完節，所以勸世；述經功，所以鼓舞人為善也。要之，經旨不外吾身性道，遇六根之賊作亂，一心于道，則六賊斂迹。由是遇兵，天為解難。老君

曰：甲兵不能害。觀音云：刀尋段段壞，理之必然者。語豈欺我哉？

功德品續二十一章

若在牢獄枷鎖之中，淨心定慮，存念是經，冤枉自伸，即得解脫。

此經利益，豈止令賊兵自退哉？若誤犯罪過，在牢獄枷鎖之中，清淨其心志，安定其念慮，存念是此真經，冤枉自然伸明，即得解脫。

攷證：

牢獄所以繫罪人。福善禍淫，天道之常。既犯罪在獄，便不能遽出，如何云存念是經即得解脫？夫所謂冤枉自伸。其人平日，必定是善的，或宿世冤愆，今生運限，或誤失過失，他人罣誤；或先亡連逮，救人被陷，一旦繫獄，俱是冤枉。不怨天，不尤人，素患難，行乎患難，絕無意想，是淨心定慮，存想真經矣。天相吉人，冤抑自白，不必分辯，自然伸理。不必曠日持久，天下無久屈之理，即

時便得解脫。

牢獄，繫囚曰牢；待對曰獄。今之監倉鋪廠，輕重之獄不同，大率止以罪人之居者為言。二字非有兩樣分別。枷鎖拘繫罪人，罹之者為有罪，迺變故也。

或云，牢字從牛，獄子從犬。不食牛犬，牢獄永免。不過令人不殺生，勿縱口，而以味招禍也。此經外之意，附記之。

經在利益，冤枉自伸，即平日有過犯罪時，悔過自新，絕無怨望，經力拔濟，久而不怠，亦必解脫。

文王，得道而聖者也。羑里之囚，脩《易經》而被宥免。

公冶長，希道而賢者也。縲紲之拘，尋亦得出。

徐神公、張紫陽，成道而仙者也。

昌邑之囚，三配之苦，以其篤脩至道，妙傳《悟真》俱得解脫。不惟聖賢，愚人若能除去雜念，永信真經，牢獄之厄自解脫。

解疑：

太古無罪人，無刑獄。

軒轅捕蚩尤，制桎梏，畫地以禁，刑獄之義起，三代後，刑獄之制全。

經在浩劫之先，元始說於天上。如何言牢獄？蓋劫劫處處，有善有惡，惡自有孽，獄之理已在。經包萬法，永利羣動，理無不具，預言拔罪之效耳。釋經云：念彼觀音力，枷鎖早離身。儒書云：君子懷刑。《大易》云：無妄之灾。何嘗不言獄？則知經非近世之言矣，迺無始玄章也。要之，一念理，則福堂；一念私，則業獄。慾妄滯而不除，一身業坑，牢獄在矣。孟子云：人之異於禽獸幾希。牢從牛，獄從犬。制字者有深意焉。今人與未來世，着力永信此經，劫劫處處，牢獄俱免。

功德品續二十二章

若為邪精鬼賊衆苦所加，如法持念是此真經，衆邪遠避，自然安穩。

玉經神功，豈但解牢獄厄哉？若為

一切邪魔精怪鬼賊、衆苦所加，如法持念是此真經，衆邪精鬼賊，皆遠遁避去，自然安穩無事。

攷證：

若為，即云如為也。

邪精鬼賊，凡不正者，皆為邪，通靈而逞妖異者為精，陰之靈者為鬼，傷人害物曰賊。或云，賊當作人之惡者。前段已云，軍陣惡賊，悉自退散。如何此賊字，又作人看？大抵邪魔妖精鬼怪乘間伺隙，因人之不正以入。其來也，不知何從；其去也，不知何歸。暗施殘害，令人不測，故曰鬼賊。上自天魔，下至土精、山魍魎、水怪異、木魅金精、火妖草異、禽獸之精、冰炭之怪、魑孽鬼靈，邪屬甚衆。

衆苦，拋磚擲瓦，驚雞弄狗要求祭祀，惱亂家宅。

或令人顛倒，精神恍惚，狂亂無端，奔走哀號，迷頑不省，戲跳嘔惡，咆哮淫孽，醉痴損喪，寢食不

安，日夜惶惶，生非平安，死有繫滯，是為衆苦。加，以殃來加人也。

如法持念是此真經。既云邪精鬼賊、衆苦所加，焉能如法持念真經？此云如法，非能易乃慮，一乃心，與道合真。誦此經，但依諷經之法，瞻拜禮誦，一切邪精鬼賊皆遠避去。一云，如法持念真經，令道人替被苦者念經，皆除衆邪遠避去，自然安穩，不待符水驅縛，藥餌告逐，聞經遠避，受苦者自然得安穩，無衆苦。

嘗聞祖天師以法伏諸魔。玄帝修真，滅諸精邪，治人鬼。薩真人闡道，除邪魔。老君伏天魔。佛梵咒降魔。先儒范文正公宿戰場，止聞小雞聲，鬼不為妖。程子伏大頭鬼，又任衆鬼移床，心如如不動，鬼皆潛伏。故云，道高龍虎伏，德重鬼神欽。如法持念真經，秘密法典，至聖真言，了鬼神覷不破之機，邪精鬼賊有不遠避者乎。

解疑：

要之，人身三尸、五窮、七魄、七情、六欲，雜念妄想，種種陰趣，皆邪精鬼賊。若了悟虛明，慧劍誅妖，欲盡，而邪精鬼賊遠避矣。

功德品二十三章

若人爲求嗣息，如法尊重、持念此經，帝勅天曹，明檢丹籍，九品之內，四果仙人，運應數合，降謫下生，爲其作子，才辯明慧，人中尊貴。

經功，豈但能伏諸邪哉？若人因孤苦無子，爲求嗣息，如經中尊重經典之法持念此經，上帝即勅天曹，明檢查丹書仙籍，九品之內，四果仙人，運應輪轉，數合臨世，降謫下生，爲其作子。與無嗣誦經之人爲子，多才善辯，聰明智慧，得人中尊貴之果。

求，祈祝禱神以求也。或令人，或自求。有無子息，命係於天，若不祈求。不孝有三，無後為大。不可不求，況人資血氣以生，凡有血氣者，皆可生育。或虧損陰德，獲

罪於天；或陽差陰錯，命犯孤寡；或胎中虛偏，或欲怒自傷，因而無子。人定回天，至誠感格，無不有子，故嗣息可求。

嗣息，繼續曰嗣。或云，嗣，系也，繼祖宗之統續，如系相接也。又云，嗣，司也，司傳家之業，繼口續冊也。息子以繼先，如人之喘息呼吸，相繼不絕也。且人之真息，生死之根，息住不絕氣。有子不絕祀，故云息。太抵息，自心也。有子萬事足，可以少息此心。故曰息。三教聖人皆有子。人何不

知子息之重？如法尊重，是重經。或云，自己尊重者，非也。

天曹，造命掌仙籍者也。九品，上三乘、中三、下三，共九品也。釋經云：九品蓮花為父母。佛、菩薩、圓覺、聲聞、阿羅漢、四禪，亦是九品。

四果仙人，須陀洹、斯陀含、阿羅漢、阿那含，降謫下生，仙佛以生

人間為下凡，故曰降謫。

才，才藝出眾。

辯，口辯超羣。

明無不照。

慧無不悟。

人中尊貴，非即為君、為相、為師，有德有道，為完人肖子，則尊莫尊乎道，貴莫貴乎德，天子不得而臣，諸侯不得而友，參贊位育，裁成輔相，萬代瞻仰，三界推尊。故曰人中尊貴。

如法尊重，持誦此經，或自己、或令人求嗣，雖有明效，不可計日指望，惟知尊經，首罪謝過，終始如一，對此經如見玉帝，至誠敬此法寶，則靈章神功，默運造化，回天易命，嗣息自有。世間功臣，猶得廢子。太善人信真經、轉法輪，為天地之功臣，寧不克昌厥後乎？若尊重此經，而嗣息不建，必其誠有未至，終始不能如法耳。世人勉之、慎之，自驗經之神效。

功德品續二十四章

若婦人臨難之月，如法持念是此真經，即得母子平安，生福德男女，人所愛敬。

經法神功，豈但可以廣嗣續哉。若婦人生產臨難之月，如法持念是此真經，即得母子早分，平安無事，生福相有德之男女，人所愛親而敬重。

女子已嫁夫家，則稱婦人。

臨難之月，當生產之際，性命所關，與死為鄰，故曰臨難。

如法持念真經。或未生產時，自己齋虔念經，或生產令人念經，即得母子平安，該生產之候，無有留難，即時降生，母無損傷，子亦順利，平坦安康，兩有所益。

福，富貴康壽吉相之人。

德，聖賢忠義、孝友、有德之人。

男女，或男或女，皆有福德。

人所愛敬，可親而不可狎，可近而不可玩，人樂就之、稱之、羨之，如是曰愛。然望之而畏心生，即之而怠心息，不言而信，不動而敬，

是曰敬。

解疑：

男為人所愛敬，可也。女如何為人愛敬？若福相全，德行好，不啼不戲，端重寡言，少動不嬉笑，少而老成，長而嚴潔，老死不變，人皆愛之如親戚，敬之如尊長。愛非有狎心，羨其福德，世之罕有也。

攷證：

母子平安。《詩經生民之章》贊姜嫄生后稷曰：首生如撻，無災無害。姜嫄有德，故首生如羊子之易，不災害，母安子亦安。

釋經云：母子早離身。

道經云：臨盆有慶，坐草無虞。

誦經功德，其應如響。

今《皇經》盛行世間，誦者亦有。婦人生產，或半產不及月，或災害，或危亡，或鬼胎，或妖異，或刑剋，母子平安者固多，不能兩全；或兩不利者亦有。或以為誦經未必有益，不知正法難遇。世人或

不知此經尊重、此經利益，不聞其名者有之；聞名不知重者有之。或虛敬而不持誦，或持誦而始動終怠；或脫落混淆，或怠污顛倒，字誤句差，解會失當，雖有懺謝之文，難得全經之利。皆人自誤，不遇經功，遂以為誦經無益，是為謗法。嗚呼，正法宜行，親恩難報。救難利生，學道者之急務也。若教化世人，敬誦此經，則母子安、庶難免，生善男善女，世間皆福德相，正道永流傳矣。功德最大。觀經者勉之。

皇經集註卷之六

皇經集註卷之七

嗣漢五十代天師大真人張國祥校
狀元方外隱江西吉水羅洪先閱
山東濟南小兆臣周玄貞集

功德品續二十五章

若為求官進職，爵祿亨達，貴遇人君，如法持念是此真經，即得職務遷轉，子孫榮貴，世世不絕。

玉經之利，豈但有益生產哉？若為求官進職，使爵祿亨達，貴遇人君，如法持念是此真經，即得職司事務，陞遷轉進，子孫榮貴，世世不絕。

求官，無官而求得官。

進職。進，陞進也。職位微小，營求遷轉陞進高位美職。

爵，命官為爵。

祿，俸給曰祿。

亨，亨嘉逸樂，貞吉悅利。

達，稱意遂心，謀望通達。

貴遇人君。出常曰貴，爵祿亨達，且得君行政，受人主之知遇。君

臣相遇，自古為難。貴而遇人君，則臣不虛貴，方為可達。一云，遇明君智主也。

是此，文非重，句法宜云爾。

職務，職有官守、職事，各有所司，故曰職。務，政務也。

轉，轉授美缺，或易閑散，作清要也。

子孫榮貴，或世官世祿，或廢子廢孫，安富尊崇，光前裕後，且榮且貴，世世不絕。雖非等天地，永世守，慶流後代，福澤綿達，相承不絕。雖數世，亦云久遠。若孔聖人之至德，祖天師之神化，子孫歷朝受封，是真榮貴不絕。

封爵詔祿，出自天朝官職，若不可求，資格相循遷轉，若不可謀，況文須讀書，武要知兵，學問功勳，假借不得，如何求進？夫官授有德，祿以養賢。大德者必得其位，必得其名。如法持念真經，誦法言，守聖訓，心與天合，動與道俱，是大善人。或以言揚，或以行舉，

無爵而贈官，無職而贈祿，或有官職而陞轉，此用賢之常理。以德招徠，若或求之，廣成、尹壽、巢由、嚴光，或為帝師，或為國賓，與之弗受，豈善人不可得爵祿乎。若漢之孔明，晉唐之旌陽、李泌、海蟾，皆修道而官者也。經云求官，又何疑焉？

要之，天爵良貴，吾身固有。超凡入聖，進德有階。神化登仙，歷劫不壞。《道德經》云：死而不亡。仙傳云：子生孫兮孫又支。夫道尊德貴，仙傳無窮。不慕世名浮利，修天爵良貴，由凡希聖，出塵登仙，永延不絕，是真能如法持念真經。

功德品續二十六章

若人欲求資財殷富，如法奉持是真經，即得財寶充溢，衣食自然，慶流子孫，傳之後代。

此經利益，豈止遂求官之謀哉？若人欲求家資財用殷富，如法奉持是真經，即得財貨寶玩充滿盈溢，衣

食豐潔，自然充裕，餘慶流及子孫，傳之後代。

資，用也。身家所需曰資。一云，資賴也，言人賴此利生也。與貲義同。財，財貨也。亦財用也。

殷，實也，充實之義。

富，家道極豐，財用充足曰富。

奉持。欽崇曰奉，持守看誦。

財寶。財，貨財之財。寶，貨貝也。

金銀、珠玉、珍奇、玩好、采帛，希有貴重之物，皆稱寶。

充，充足也。

溢，豐盈也。

衣食自然，不費心力，自然豐足也。

慶流子孫。慶，吉祥也。福澤綿遠，奕葉相仍，故曰慶流子孫。傳之後

代，不止及一世之子孫。代代相傳，

後人永享安榮之福。

解疑：

孔子云：富而可求也，雖執鞭之士，

吾亦為之。如不可求，從吾所好。

甚言富之不可求，如何此云欲求殷

富，如法奉持此經，即得富足，慶流

後代？是言富若可求。子夏曰：商

聞之矣，富貴在天。富雖可欲，有命

存焉，天實主之，如何可求？然富雖

有命，先儒云：富貴福澤以厚其終，

所以報有德。如法持念此經，口誦

天言，欽若昊天，是令德獲福者矣。

詩云：樂只君子，福履綏之。此之

謂也。

或又云，大禹聖者也，非飲食，惡衣

服，卑宮室，惟甘儉約。道家云，學

道須學徹骨貧。此言持經足以致

富，似以利散人者。禹之自奉儉，聖

人不私己之心也。道家之學貧，心

無物累也。求富可得，廼設言持經

之效。佛經云，所求如意，皆得滿

足。兩教法門，大開方便，福利無

邊，有求輒應，無願不成。若疑惑間

斷，始勤終怠，口應心非，無正信堅

固圓滿，心無至誠以感之，則雖求亦

不得矣。觀經者善體之。

嘗攷萬物皆備於我，本有不資而富

者在。柰何世人馳逐名利，競浮華，

嗜情欲，以假作真；貧者戚戚，不能

嗜情欲，以假作真；貧者戚戚，不能

持大道，誦真經；富者侈蕩，不能棄智利，奉法言，甘至老死，自喪固有之富？老君曰：金玉滿堂，莫之能守；富貴而驕，自貽其咎。戒人之逐外忘內也。今言求富持經之效，欲人改易求富之心以重經耳。噫，持經誠有效也。若無誠敬，且招愆矣。觀經者慎之。

功德品續二十七章

若人被諸惡星之所照臨，困苦床枕，如法持念是此真經，是諸惡星返降吉祥。

是經利益，豈但求富者遂哉？若人生命流年，被諸惡星之所照臨，困苦床枕，睡眠不安，如法持念是此真經，是諸惡星化凶為吉，返降吉祥。

赤松子云：生民熒熒，各戴一星。然星之所照，有吉有凶，吉則千祥，凶有咎徵。在三光之下者常避忌。

惡星，凶星也。如羅睺、計都、天破、天哭、天敗、天退等星是矣。

照臨，或生命分度，或流年值遇，或宅遇分野，當生當照，統屬分

臨。

困，所如不遂，鬱而不伸也。苦，或貧厄疾患，危迫切身也。

困苦床枕，只是困危無聊，卧不安席，伏枕不寧之意。一云，床枕有驚。

是諸惡星，所該者廣，凡天上凶星，命運宅遇當照，一切凶星是也。

返降吉祥，惡星照臨，多凶無吉。如法持念此經，靈章運化，凶曜呈祥，凡所被照臨惡星，不惟不見咎禍，返默錫福祉，降吉祥。

星之照臨，命運分野，本有一定。如何持經，惡星降吉祥？天人一理，上下相通，感應之機，捷於影響。宋襄公有君人之言三，熒惑退舍。不惟君也，孝婦含冤，而致三年之旱；賤臣叩心，而飛六月之霜，匹夫匹婦，皆可以感天地、動鬼神，但恐不至誠耳。一誠感格，片言可以孚神明，不言亦可以運造化；況真經為天地之宗，三

景得之以開光。如法持念真經，奉至聖之玄章，悉貞明之秘要，凶星散，吉祥生，返禍為福矣。

人一也，惠迪吉，從逆凶。《中誠經》云：星之照臨，吉凶惟人自召，作善則星光，大善則光顯；無善無惡，其光微；小過其光散；大過其光滅。惡星之臨，人有過，則惡報應；無過，則咎徵免；善則凶去福臨矣。傳云：一念之惡，為妖星厲鬼；一念之善，為景星慶雲。休咎之徵，係一念之善惡。真持此經，雖險災大難，亦當退去，而困苦床枕、適然之厄，有不盡消耶。太甲曰：天作孽，猶可違。亦此意矣。夫人能弘道，贊化育，若默轉真經，入神達化，則與天地合其德，與日月合其明，與四時合其序，與鬼神合其吉凶，斡旋造化，永超塵凡，且鬼神覲不破，生死不相關，星辰豈能拘限哉？觀是經者勉焉。

功德品二十八章

若人命過，應入地獄，注名惡籍，父母師長，夫妻男女，當為亡人持念是經，或安置道場，旛花供養，即得亡者鬼籍盡除，神生淨土，同苦罪衆咸蒙濟度，承斯勝利，皆生天上。

是經功德，不但免在生之咎，若人命過死去時，魂魄應入地獄，注其名於作惡之籍，其父母師長、夫妻男女，當為亡人持念是經，或安置超拔道場，旛花供養，即得亡者鬼籍盡除，神生淨土，同獄、同亡，同籍受苦罪衆咸賴經功，得蒙濟度，承斯最勝妙法利益，皆生天上。

命過，命過其數而死也。

應入地獄，或夙世今生有罪，應當入地獄，受罪報。地獄，若酆都、鐵圍、九獄、十八獄、二十四獄、三十六獄、七十二獄、無間等地獄。注名惡籍，注錄其名，在惡案簿籍中，以施報對也。父母師長，或亡者之父母，或其師傅，或其尊長。

夫妻男女，亡者或是婦人，或是男人，必有其夫其妻在；即夫妻不在，或有子孫，或有親屬之男女在。

當為亡人持念是經，其見在親屬。當為亡故之人奉持誦念是經。

或安置道場，或安立布置道場，遵道法，拔罪業，故曰道場。

旛花供養，旛，稱讚聖號不盡，書之長旛，懸竽端，以風四表，揚寶光。花，獻所有奇花，以迓聖神。上天揚法，有自然旛蓋旌幢，天花絢采，以彰休光。世間但以旛置道場，示莊嚴，迓神庥。供養。供，享獻也。養，以飲食供奉也。天上以清靜妙法為食，天厨妙供，惟道惟恭。今世之五供養、十供養，不過空五有、除五苦、禁五樂、去十惡、念十真、住十信，以敬共明神，欽崇正法，奉持寶章，是真供養。今但以飲食、花果、珍奇供之，而無恭敬之實，抑末矣。經所云供養者，是誠心天然之供

也。

即得亡者。鬼籍盡除，神生淨土。一轉此經，或立道場，即得使亡故者出幽冥，削黑業，鬼籍惡業，盡得除去，神生清淨樂土。同受地獄苦之罪衆一切咸得超脫，蒙受經法慈濟拔度。咸，皆也。承斯勝緣法利，皆生天上。斯，此也。夫天福雖有盡，一持念是真經，或立道場，即除亡人並同苦獄魂之罪，使生天上；若永遠奉持，功德豈有窮盡耶？噫，地獄無門，惟人自召；天堂有路，昧者難行。況生來正性，即帝真經，常持永念，地獄天堂，一切不染，永證玄真矣。方云善持經者。

功德品二十九章

又此經所在之處，當有十天至真大聖、無極飛天神王侍衛供養，持是經人當得自稱為正一真人。是人在處，自得十方至真至聖金剛力士潛護其人，如護己身。若出若入，遊行之處，百邪避路，魔鬼殄除，精靈伏藏，一切灾殃不

能侵近。是持經人命欲終時，更不見諸地獄惡相，即見天宮玉女持幢下迎，而生天上。如天福盡，下生人間，即得千生萬生中常爲國王大臣，聖賢慶會，國土清平，人民樂業，常得宿性通明。遵奉大道，展轉修持，至登道岸。是持經人獲福如是。

是經功德，豈但利益生死哉？又此經所在之處，常有十天至真大聖，無盡量飛天神王侍衛供養，是持經人當得自稱為正一真人。是人在處，自得十方至真至聖、金剛力士潛護其人，如護己身。若出若入，遊行之處，百邪迴避，持經人所走之路，魔鬼殄絕，除去精靈，潛伏收藏，一切灾殃不能侵近。是持經人命欲終時，更不見諸地獄惡相，即見天宮玉女持幢節下迎，而生天上。如天福受盡，下生人間，即得千生萬生中常爲國王大臣，聖君賢相，明良相慶，聚會一朝，國土清寧平定，人民安樂業，常得宿性通明，遵奉大道，展轉脩持，至登道岸。是持經人獲福

如是。

十天，十方諸天。

飛天神王，飛身遊護諸天之神王也。

侍衛，侍立拱衛也。

正一真人，至正無私、真一不二之人也。

金剛力士，兩教護法，皆來護持經人。

潛護其人，暗中護持經人，如護神明自己之身，見諸神保護之切也。

其持經之人或出或入，遊行之處，一切邪妖、魔鬼、精靈達避伏藏，殄絕除去。殄，絕也，盡也。灾咎

禍殃，不能親近。是人命終，更不見諸地獄種種惡相。

天宮玉女，一本作天官者，非也。幢，非旛非旌，大法幢也。下迎接

導上天耳。

千萬生爲國王大臣，世世尊貴，如佛千八世爲王世子，玄帝千世爲

王者之師。共安長樂，且宿性通

明，大智大慧，不昧歷劫良因。

遵守崇奉大道，反覆展轉，進修操持，至登道岸。道岸，得道，如濟

海岸也。佛云到彼岸。《大雅》

云：誕先登于岸。此之謂也。一

云畔岸。持經功德，時刻有益，或利生，或利死，或少或衆，或久或

近，隨願皆成，化誠神矣。必千生萬生，遵奉無二，展轉修持，始登

道岸。可見大成之難也。觀經者恒其志，可入最上。

功德品續三十章

又若有持是經人，若雨下時，起大悲心，如法向空念此經三卷一遍，其雨所霑，面所向方，一切衆生，五逆十惡、一切重罪，悉皆消滅；一切重病，自得痊愈。是諸衆生命終之後，不墮地獄，神生淨土，蓮花化生，何況持是經者。又若有持是經人，或行於道路，值大風起，吹是持經之人。觸身之塵，是塵所霑，一切衆生，一切惡業，悉皆消滅，更不墮於三惡道，當生天上。故知持經功德，不可思議。

此經功德不但利一身也。又若有持是經人，若雨下之時，起大悲度世之心，如法向虛空念此經上中下三卷，週完一遍，其雨所霑濡，面所向方隅，一切衆生，五逆十惡、一切重罪，悉皆消散除滅；一切重病，自得痊可安愈。是持經人所向方之諸衆生，命終之後，不墮地獄，神生淨土，不假淫穢，蓮花化生；何況持是經者，其功德詎可量耶？又若有持是經人，或行於道路，值大風起，吹是持經之人，觸身之塵土，是塵所霑，一切衆生，一切惡業，悉自消滅，更不墮於三惡道中，當生天上。故知持經功德，不可思議。

攷證解疑：

持經人無處不慈悲，非但雨下、風起，有大悲心，推言若雨下風起時也。甚言持經之效。大悲憐憫，衰矜恤念世間一切也。釋教云，婆心太切。《詩》云：哀此滄獨。又云，矜不成人。道經云：大悲覺世。持經者憫世人業苦，故起

大悲心。

五逆，不忠、不孝、不慈、不睦、不義。一云，不敬天地君親師，不敬三寶，不持戒律，不修德行，不明心性。一云，滋縱財、色、名、食、睡。

十惡，殺、盜、邪、淫、兩舌、妄言、綺語、惡口、貪、嗔、癡。一切重病痊愈。痊，安可也。愈，平愈也。

蓮花化生，佛家言，西方極樂世界，蓮花生人。道家云，青華長樂界，蓮花化生。又云，欲生因蓮花。言居世出世，不染一塵，妙法生生，無淫穢心。又如天地之初，自然化生成人也。儒者多以兩教為妄。伊尹生於空桑，獨非儒者之聖人乎？且人心如蓮，知蓮生，則心宗印矣。善哉，周子觀蓮，雖愛其處泥不污，亦必別有真見也。故為道學之宗。

三惡道，地獄、魔鬼、畜生。

不可思議，不可以心思，不可以言議。見功德莫量也。

夫道之濟世，真經利人，法雨浸濡，普潤一切，響徹十方，利盡法界。儒家云，有如時雨化之者。又曰，樹之風聲。又曰，不疾而速，所過者化，所存者神，民日遷善而不知為之者。故周公生，而無烈風淫雨，海外向化。人能終至道，持真經，無論雨水所霑，風塵所及，即風雨所不及，水塵所不霑，三千大千世界，永霑法利矣。故曰持經功德，不可思議。

功德品讀三十一章

是持經人，若經涉於江河淮海，沐浴其身，是身所霑之水，其中衆生，魚鼈黿鼉，一切水族，是諸惡業，悉皆除滅，盡此一報之身。命過之後，不復更受胎、卵、濕、化一切等身。是持經人口出一切言語音響，一切邪魔外道，聞者皆是清淨法音。是持經人若遇諸神廟，能為其神誦詠是經，是諸鬼神得聞是經，即脫鬼趣，登證仙道，恭敬是人，如奉是帝。

是持經人功德不但及於人也。若經

涉於江河淮海，沐浴其身，是身所需之水，其中衆生、魚鼈龜鼉、一切水族，其前世所造是諸惡業悉皆除滅，盡此見在一世報應之身。命過之後，得證妙果，不復更受胎、卵、濕、化一切等身。是持經人，口出一切言語音響，一切邪魔外道，聞者不知為世間言辭聲氣，皆是清淨法音。是持經人若遇諸神廟，能為其神誦詠是經，是諸鬼神得聞是經，即脫鬼趣，登證仙道，恭敬是持經人，如奉是說經之帝。

經涉。經，歷過也。涉，濟渡也。一云，徒身過水曰涉，如呂祖朗吟飛過洞庭湖，達磨折蘆過江是也。要之凡過水，不拘徒身舟船，皆曰經涉。江河海，皆注水之通名。淮，淮河也。

沐浴其身，以水澡洗其身也。其中衆生，水中一切生物。鱗者魚，甲者鼈、龜、鼉等。一切水生族類，諸惡業悉得除滅，盡此一報而已。死後不復輪轉畜業，若羽、

若毛、若鱗、若甲、若介、胎卵濕化一切等身。人雖胎生，此胎字不指人說，只言獸屬。蓋龍為水族之尊，尚稱業報，其下水族又可知矣。真持經人身口悉出金光，故言音所及，一切邪魔外道聞者皆是清淨法音。

為神說經，神脫鬼趣。神雖靈響，露威光，彰報應，尚有趣在。聞此真經，脫其識根，拔其趣意，所謂融盡宿習也。登證仙道，上證真仙之道也。

神與仙之分別等階。神雖有功德，而功勳顯赫俱在，雖大神亦然。即大賢未融形迹，與入聖而不優之類也。仙則空五蘊，淨九識，遣能所，融事理，雖分五品，比神鬼則高出矣。

夫聖人出，萬物亨，山不瀆，川不涸，鳥獸魚鼈咸若。持經人沐浴之法水，水族親霑，又不啻聖王之功化也。龍得法而高悟，法水均霑，有不超脫哉？此野狐之所以

得法復人身也。若說經度神鬼脫其趣，如薩祖師度王靈官，普禪師之度闍聖賢，令其欽神威，忘宿念也。故至今二聖之恭敬不衰。

功德品續三十二章

若人在世，不孝父母，不敬三寶，殺生偷盜，邪淫妄語，作種種極重罪業，將命終時，若有道心正信善男善女，於亡者未氣斷時起大悲心，于其頭邊念玉帝尊號七遍，或二七遍，三七遍，四七遍，乃至百遍、千遍，是其亡者生前所造諸不善業，悉得消滅，更不墮諸惡趣，神昇九天，何況受持是此經者？又若復有人自從往劫乃至今身，輪轉人天，漂沉世域，積千愆萬過，在於己身，若遇是持經之人，形影暫映其身，如為帝光之所攝受，或與同語，或聞其聲，如奉帝言道語之所慰諭，彼人罪障永得除滅。

經之功德，不特下及物，上及鬼神也。若人在世，不敬三寶，殺盜淫妄，作種種極重罪業，將命終時，若有道心正信善男善女，於亡者氣未

斷時，起大悲心，于其頭邊念玉帝尊號，或一七、二三四七，乃至百千等遍，是其亡者生前所造諸不善業，悉得消滅，更不墮諸惡趣，神昇九炁上天，何況受持是此經者。又若復有人，自從往劫，乃至今身，輪轉人天，漂沉世域，積千般愆尤、萬種過失在於己身，若遇是持經之人形影暫映其身，如為上帝道光之所攝受，或與同語，或聞其聲，如奉上帝法語道言之所慰諭，彼人罪障永得除滅。

三寶，道、經、師也。道為三教之宗，萬有之祖；經為度世津梁；師為人天眼目，不敬所以有罪。殺生、偷盜、邪淫、妄語，大犯者大罪，萌一念亦有罪。種種，非一端也，言不能盡記。正信，至正誠信，一無所為也。一七、二三四七、千百遍，或云，言道周天功化，亦是。不墮諸惡趣，有善根，無邪念，故不墮惡趣。輪轉人天，或人間天上之福。一

云，人中福為人天。漂沉世域，生死無常，如萍水浮漂，業趣難脫，似水中沉溺。世域，世間界域也。形影暫映，持經人形影，暫時照映造業人身，如同帝光之所玄攝神受。受或作授，言帝光授與者，非是。大抵光臨人，則肅然敬心無念，故曰攝受。我受其光之法利也。

同語聞聲。造業者或與特經者共語，或聞持經者聲音。道語，大道玄語。或云，道祖之語，太拘。慰諭，慰，善言撫慰。諭，教誨命令也。罪障除滅，一切夙世今生罪皆釋，往劫今生障礙皆除也。夫經之神功，存亡受益，利及一切，惟正信人有是功。可見以至誠心為本。利亡者，利他人如此，持是經者功德又豈可量哉？觀者勉之。

功德品續三十三章

又若持是經人造作長幡，書帝名號于其幡上，懸諸長竿，或在觀宇，或在家庭，是幡被諸風吹所指方面，一切衆生皆霑勝利，一切惡業悉得除滅。又若有持是經人書帝名號，在一切有聲物上，或鍾或磬，鈴鐸鐃鈸，一切道具法事之屬，或以道場，或因戲擊，或被風觸，是聲出時，或遠或近，一切衆生聞是聲已，所有罪障悉得清淨。

此又申言持經功德也。

長幡書帝號，長竿，俱解見前。

觀宇，觀中殿宇前。觀，觀也。神在無他心，惟一誠觀之，故神居曰觀。

家庭，家之庭前。

所指方面，風吹寶幡，所指方位面向也。

勝利，解見前。

鍾磬鈴鐸鐃鈸，皆法樂，金屬也。

一切道具法事之屬，除金、石、絲、竹、匏、土、革、木等樂，與有聲物，或一切道家所用法事之具。

道場，用法具鳴帝號，可也。戲擊如何亦有功？此戲非狂蕩耍戲，或演習法樂，或幼小無知者，或凡愚不知，誤鳴法器及有聲物，或閑時喜樂，鳴有聲物。

書帝名號，非帝之名。帝號歷劫不磨，廼常住大名，故曰名號。今讚佛云洪名聖號，亦此意。

風觸聲出，被風吹觸響物聲出也。遠近衆生聞聲，罪障悉得清淨。不拘遠近一切衆生，凡聞有帝號之聲者，罪障消除，悉得清淨。

攷證：

古人制樂，所以諧神人，和上下，况帝號為玄祖榮名，聞者肅然，法音一振，神功無邊。大舜作樂，百獸率舞，何況於人？

人聞兵器則威，聞戲具聲則嬉，聞琴則和，何況法音？

一切有聲戲具，無論也。法具樂器，所以敬共明神，齊一衆志。又書帝號，故聞者敬而罪滅。夫罪障所以報惡人也。聞法音，

善心勃然，故罪障悉滅，得清淨。今雷震一聲，聞者敬畏，可以作證。

解疑：

今世懸旛，及書帝號於法樂道具法事，共一切有聲物上者甚多，聞見者亦不少，罪障不除，何也？書號者非真有正信持經之心，聞見者以為故常，頑心不除，甚至輕慢，浪戲謗瀆，自無善心，何以釋罪。嗚呼，經法帝號，功德難量。先真持經度自己，則不動而敬，不言而信，更以帝號度人，自永利矣。

功德品續三十四章

又若有持是經人了悟生死，深入山林，修真學道，或時登臨，上山顧望，目所及處，山林溪谷，含生品類，有形無形，胎卵濕化，蠢動飛潛，種種物類，所有罪業，皆得除滅，身心清淨，命終生天；何況受持是此經者？當知是人即是道藏功德身也。此復申言持經之效。

了悟生死。生死事大，理最難明。依父母之精血，得天地之理氣，生也，所以生，不可知。精耗氣散，神去形枯，死也，所以死，不可知。未知生，未知死，雖能達事變，觀物理，明於言，不昧於行，未為了悟。若有持經人絕聖去智，除二障，斷諸惑，融宿性，成大覺，證三元，登最上，了悟生死根源，即佛家云徹悟也。

深入山林。昔人云：小隱居山。既云了悟，高山平地，總屬道場，修行何必入山林？大隱居市，理固有然。名山勝景，地靈人傑，真修者，雖無志於山林，幽山茂林，天造地設，以成仙境也。故逸人入焉。

修真學道。人生正性，至真無假，性道自然，不待學問，自情慾日滋，知誘物化，真者漸假，性道不明。了悟者於山中林下默加修持，以返天真，參學大道，了脫生死。《道德經》云：絕學無憂。此

云學道，何也？彼云絕學，絕學之名象意識。此云學道，學曠然無為之道也。夫佛家以了悟為最上。此云了悟，方入山脩真學道，則兩門之品階可知。

或有時學道人，登高臨水，遊歷勝境，上山四面顧視觀望，目力所及之處，若山若林，水溪澗谷。谷山之溝壑虛深曠空者也。

含生品類，含大造生意諸品諸類。有形無形。有形，已生者；無形，未生者。亦有生而不見形者。

若胎生、若卵生，若因水因土，汗下濕生，若無中生有，化生蠢動飛潛，大造之生，蠢然者物，含生運動，高而飛躍，深而潛藏，介飛潛之間走者，種種一切物類，所有今昔罪業，皆得除滅，身心清淨，無有繫累，命終悉生天上。脩真目望所及物類超濟若此，何況受持是此經者？當知是持經人功德難窮，即是大道玄藏，不可稱量，大功德身也。夫學道之人，心大慈

悲，無不仁愛，未見聞者，心不可見，目望所及，一切物類，念其蠢動含靈，俱有法性，一意慈悲，默然神度，救拔出世，故濟一切。有如是功德。儒書云，致中和，萬物育焉。又立靈臺，望氛侵，察灾祥，曲成萬物，裁成輔相。天地之所不及，使人物生死順受正命，返歸化源，又有何罪業？贊孔子者曰：當年不能窮其學，累世不能殫其蘊。聖不可知之謂神。今贊脩真學道者曰，道藏功德身。亦言其大無不包，深不可測，稱讚難窮耳。觀經者有得焉，方知是義。

功德品續三十五章

爾時天尊謂玉虛上帝言：今我略說，未盡其妙。若廣說之，凡流邪見疑惑不信，是經功德窮劫難言。

爾時，解見前。

天尊，元始至尊也。

謂，告語也，元始告玉虛明皇天之上帝言。一云玉清玄虛上帝。

今我略說，未盡其妙。今元始指

說經之時而言也。我，元始自己稱謂也。略說，稍說大略也。未盡其妙，未盡言道之要妙與夫最上功德也。

若廣說之，此經言持經功德，利人利物，利存利亡，利有形，利無形，利己利他，利天利地，亦云廣矣。猶云若廣說之，凡邪不信。此所言者，一世界人物，今昔天地存亡，若三千大千無量世界，從劫至劫，無量數劫，一未來世，一切未來世，無始之始，無終之終，若有知，若無知，若聞見，若不聞見，若思議，若不思議，若有盡量，若無盡量，一切功德，俱在是經，與持經者，若為廣布宣說其妙，凡流邪見疑惑不信。凡，凡世庸人；流，流俗之類。如同流水，不能拔萃也。邪見，偏邪之見，不正大也。疑，智見不央，兩可未定。惑，私意起，紛紛縈縈，是非莫知，雜亂無準見，故不信此經有無盡量之利益也。

是經功德窮劫難言，窮無量劫數，亦難盡言。一云，窮盡歷劫言不盡。大抵元始永在，劫數無盡，經功難窮，大道莫量，終是言不盡。夫大道無言，妙法無象，真經無字，可施可受，可見可聞，可言可得，皆第二義耳。故我太上化生無量數劫，說法萬二千天，歷度遐方，著經億萬，一化千七百年，譚經九萬餘度，猶云吾不知其名，強名曰道。孔子繼往開來，啓蒙萬古，廼曰無知也。釋迦佛說法四十九年，譚經三百餘會，著經律論三藏，且云我今略說，無力說盡。顏子卓立，心齋坐忘，亦云雖欲從之，未由也已。此經為萬法之宗，其功德果然說不盡，最上功德。說也說不得。說了，人亦明不得。故儒家之無為而治，道家之真玄功德，佛家之身命布施，西來正義，皆不可以言傳者矣。善乎，斷輪之妙，得心應手。莊子，三教之宗匠也，故六合之外，存而不論，

六合之內，淪而不議，非不能言，言易起人之惑，不如無言。即夫子罕言命，性道不可得聞之意也。佛氏廼言許多世界景色，分諸事理，姑不論其茫茫無稽，即有所據，言不能盡者尚多也。從其教者以為佛說人所不能說，妄以為高，不知佛生外域，殊俗異類，要荒小固，環之者衆，釋氏就其見言之，中國不知。妄云佛見之廣。試觀中華，百里不同風，燕、越、秦、齊、山川風化，不徧歷者不能知，況西域之遠，可詳攷耶？即有史冊，亦風聞雜記，寧保無差乎？人好異者多，不究是非，使佛果周知，如何所著經典不造唐文入中國，三番譯，廼成章耶？既不知唐言唐文，所言者必其所鄰之國，或效莊子之設喻言道，亦有之矣。人不細攷，謬言高下，何其好異之過也？噫，不言諸界，不茲人之惑，略言功化，以啓人之蒙，示真意，顯正法，此道之所以為實益

也。學者尚悉心究之。

功德品續三十六章

于時玉虛上帝聞是說已，心生歡喜，不勝踊躍，瞻仰慈顏，稽首讚歎，而作頌曰：

九天之上，謂之大羅，玉京金闕，雲層峨峨。中有天帝，仁慈惠和，至道無敵，降伏衆魔。天寶靈符，玉律金科，神仙億萬，幢幡衆多。聞者罪滅，永出愛河。是號玉皇，穹蒼真老，妙圓清淨，智慧辯才，至道至尊，三界師，混元祖，無能勝主，四生慈父，高天上聖，大慈仁者。十號圓滿，萬德周身，無量度人，拔生死苦。

爾時玉虛上帝說是頌十號已，諸天聖衆異口同音，歎未曾有。

此言聞經欽受喜慶之義。

于時，于天尊說此經神咒功德品已竟之時。

玉虛上帝聞是說已，心生歡慶喜悅，不勝歡騰踊躍，瞻仰玉帝慈顏，稽首讚嘆，而作頌美之辭曰：九天之上，謂之大羅，玉京金闕，

俱解見前。

雲層峨峨，峨峨，巍然高峻也。大羅金闕，法雲祥光，層覆無極，峨然巍崇，峻廣莫量。采和云，玉京宮闕高嵯峨。

中有天帝，金闕中有萬天教主之玉帝。

仁慈惠和，大仁大慈，至惠至和。惠，不是愛利，歷劫生化，人物各足，無所不與，故言惠。至道威德無敵，降伏一切衆魔。

天寶靈符，諸天寶崇玄靈真符也。一云寶作珍奇，不可從。玉律金科，玄戒天律金格也。

神仙億萬，侍宸聖衆，百千萬億，法幢寶幡以為儀衛，衆多莫量。聞名號法音者罪盡消滅，永出愛河。衆生萬有，諸業易斷，惟愛難割，歷劫漂沉，未能頓出，永出愛河，業根斷矣。

是號玉皇，解見前。穹蒼真老，玄穹無極，蒼空莫量，無始真老。

妙圓清淨，奇妙圓滿，真清真淨。

智慧辯才，大智大慧，妙辯宏才。

至道至尊，至道無極，至尊無對。

三界師，天地人三界之宗師。

混元祖，無始之先，天地未分，世界未有，帝真長在，歷劫真宗。故

曰混元之祖。

無能勝主，三教萬法，一切聖人無

能比肩，皆以為主。故云無能勝。

四生慈父，四生，胎卵濕化。皆賴

帝德，以生以成，善始善終，並以

道濟，故曰四生慈父。

高天上聖，諸天無如大羅天高，諸

仙諸佛無如玉帝尊，故曰高天上

聖。

大慈仁者，大慈大仁，無盡量者。

十號圓滿，自穹蒼至仁者十號。

玉帝行德神功，皆周完圓滿如此。

萬德周身，帝德無邊，此云萬德周

身，約言也。

無盡量度人，拔一切生死苦。

爾時玉虛上帝說是頌及十號已，

諸天一切聖衆，異口同音，歎未曾

有。聞此妙法，聖號至德，歷劫難

逢，故聖衆同稱歡，未曾見此希有也。一云，歎世間未曾有此。夫帝之功德若此，以億億劫脩證始之，觀經者大悟真脩，斯不愧矣。

皇經集註卷之七

皇經集註卷之八

高上玉皇本行集經卷下

天真護持品第四

護持品一章

爾時昊天上帝聞說經法，從座而起，長跪帝前，白言：惟願聖慈普爲大眾及諸天人、持是經人說利益事。

于時玉皇上帝，興方便意，開利益門，宣玉匱科，傳靈寶法，告於昊天上帝曰：汝今諦聽，當爲汝說受持功德，扶危拔苦，利益存亡，神妙之事。衆真稽首，俱發聲言：臣等今日幸聞湛然常住之法，莫不上福諸天，徧周三界，三塗五苦，咸得消滅。惟願慈悲愍臣等故，演斯妙義。

諸天聖衆既稱歎神咒功德品及帝號功德已，當爾之時，昊天上帝，昊大高玄天帝，非時稱昊天也。聞天尊說經法。從自己所居之座而起身，向上長跪玉帝道前，奏白言說：惟

願至尊聖慈普徧爲一切大眾，一云諸天聖衆聽聞經者。一云世間大眾，天上本無世人，經廣度三界浩劫。二說俱是。及諸天天人，持是經之人，宣說經法，一切利益之事。于時玉皇上帝興方便，拔度一切之妙意，開永利大益之門，宣玉匱寶科。此經皆玉笈琅函，珍藏上天，故云宣玉匱科。傳玄靈妙寶大法，告於昊天上帝曰：汝今諦聽。汝，指昊天上帝也。諦，專聽見諦之意。當爲汝說受持此經功德，匡扶一切

困危，救拔一切苦厄，利益生存死亡神妙之事。衆真稽首，俱發聲言：臣等今日幸聞湛然常住之法。人性靈明，不垢不淨，無成無壞，不昇不沉，本自湛然常住。知誘物累，自取滅亡，漂沉輪轉，盲昧不明，不能湛然常住。鬼有趣，神有識，報盡復輪，亦不能湛然常住。今聞經法功德利益，宿性得融，根塵淨盡，拔業識，除罪障，堅固圓滿，是聞湛然常住之法，曠世奇逢，豈不幸乎。此法

功力，莫不上福諸境諸天，徧周三界。解見前。三塗，天塗，地塗，水塗。五苦，色累苦心，愛累苦神，貪累苦形，身累苦魂，華境苦精。咸得消滅。惟願至尊慈悲愍臣等故。愍，矜恤憫念也。演斯妙義。

夫此經爲最上妙法，故有如是功德。昊天上帝，不求妙旨，而請利益，非以效故人。此經一言一畫，亦無量法寶。知其效而真心奉持，斯無負說經之慈悲。

護持品二章

玉帝告曰：若有衆生孝養父母，恭敬三寶，竭忠於君，不殺不盜，不媼不妬，不嗔不恨，不驕不詐，奉戒持齋，冥心大道，生尊重心，持誦是經，我即勅下，周流法界，徧傳十方無極世界，勅命東方東華帝君青騎、神仙兵馬、無鞅數衆，悉令下降，覆護受持是此經者；勅命東南扶桑大帝與其部衆神仙兵馬、無鞅數衆，悉令下降，覆護受持是此經者；勅命南方朱陵大帝赤騎、神仙兵馬、無鞅數衆，悉令下降，覆護受持是

此經者；勅命西南太華元老與其部衆
神仙兵馬、無鞅數衆，悉令下降，覆護
受持是此經者；勅命西方皓靈皇老白
騎、神仙兵馬、無鞅數衆，悉令下降，覆
護受持是此經者；勅命西北皇天上帝
與其部衆神仙兵馬、無鞅數衆，悉令下
降，覆護受持是此經者；勅命北方紫
微帝君黑騎、神仙兵馬、無鞅數衆，悉
令下降，覆護受持是此經者；勅命東
北冲虚天君與其部衆神仙兵馬、無鞅
數衆，悉令下降，覆護受持是此經者；
勅命上方天皇帝、崑崙蒼老黃騎、神
仙兵馬、無鞅數衆，悉令下降，覆護受
持是此經者；勅命下方來和天君、名
山大洞神仙兵馬、無鞅數衆，悉令下
降，覆護受持是此經者。

玉帝告曰，持經，非徒口誦也。若有
世間一切衆生孝順事養父母，恭敬
道經師三寶，竭力盡心，上忠於君，
不殺生，不偷盜，不淫慾，不嫉妬，不
嗔怒，不怨恨，不驕傲，不奸詐，奉受
道典清淨玄戒，持守真正齋素，不怠
忽，不躁急，坦然澹然，默任自然，棲

神養靜，法天凝真，冥心合於大道，
欽若昊天，祇奉道法，生尊崇珍重之
心。一云，自己嚴敬不苟且，奉持誦
詠是經。我，玉帝自言也。當作朕

字讀。即勅下周流諸世間一切法
界，遍傳十方無極世界。勅命東方
東華帝君青騎，南方朱陵大帝赤騎，
西方皓靈皇老白騎，北方紫微帝君
黑騎等神仙兵馬。東南扶桑大帝，
西南太華元老，西北皇天上帝，乾方
也。東北冲虚天君，上方天皇帝，
此非勾陳天皇，迺司天之神。佛云

帝釋天主也。崑崙蒼老黃騎，下方
來和天君，名山大洞，與其部衆神仙
兵馬、無鞅數衆，悉令下降，覆護受
持是此經者。覆護，保重護持也。
持經者敬奉帝言道語，合德，與天與
道合真，是大道身。道之所在，神人
共崇，故帝令十方聖衆覆護。然必
於忠孝恭敬戒淫殺盜妄者。持經以
德行為本，冥心於道，道自歸之。或
云，道流出家，不近君親，以為不忠
孝。不知道門玄戒極嚴，守持操脩，

不敢犯戒，虧體辱親。至誠堅固，先
報四恩，何嘗忘君親、不忠孝哉？故
許真君著《淨明忠孝經》，以見道之
真忠孝也。

護持品三章

勅命十方一切金仙、四衆八部、及諸眷
屬，悉令下降，覆護受持是此經者；勅
命十方天真大聖、飛天神王、三官四
聖、二曜九星、北斗南斗、東斗西斗、中
斗、二十八宿、周天衆星、金剛力士、神
王等衆，各與部衆，悉令下降，覆護受
持是此經者。

勅命十方世界一切金仙。金仙，諸
佛、菩薩也。四衆，非世人四衆，陰
陽神衆將卒四衆也。
八部，解見二卷。
及諸眷屬，四衆八部之姻眷屬類也。
十方天真大聖，十方諸天衆真大聖
也。
飛天神王，解見前。
三官，天地水也。
四聖，天蓬、天猷、翊聖、佑聖。
二曜，日月也。

九星，金、木、水、火、土、月孛、紫炁、羅喉、計都也。

北、南、東、西、中，五斗。

二十八宿，角、亢、氏、房、心、尾、箕、斗、牛、女、虛、危、室、壁、奎、婁、胃、昴、畢、觜、參、井、鬼、柳、星、張、翼、軫，周天衆星辰。

金剛力士、神王等衆，一切將部也。

各與其部下等衆。

攷證：

經是帝勅，朝命所頒。三公、四相、兩京九卿、羣有司、百執事，貴戚異姓，億兆蒼赤，罔不欽奉。

玉經有衆神之覆護受持者，帝命旌賢、輔有德也。人身有三元、四象、二氣、九宮、五行及二十八宿之度數，周天經緯，水、火、真志、大慧、操修、力行、妙法、善功，與衆神等，故人之一身，身體毛髮，皮肉血髓，筋骨神氣，精華經絡，輔我正性真氣，命寶存焉。夫正性真氣，即帝真經，三萬六千神氣，八萬四千毫孔真光，即十方仙

真、金剛力士、星曜神王部衆。《消災經》云：即有天真衆聖、金剛力士各百億萬衆護衛是經，即此意也。夫經不在言語文字，真意在吾心。神不在十方世界，而在吾一身。持心修身，不在誦讀披閱，而在一誠默運，至誠無私。

精神氣全，聖可學，天可希，道可入，動罔不吉，神其佑之。三藥耗，一真喪，自己之神衰氣弱、精不充徹，與天違逆，神豈佑之？噫，人一也，君子修之吉，小人悖之凶。故經云，覆護持經者，則知天福有德矣。帝德無疆，經利最大，惟人之敬受何如。

護持品四章

勅命降魔力士、四天門王、五嶽四瀆、及諸名山、四海九江、十二河源、山林川澤，一切主者，悉與眷屬，覆護受持是此經者。諸險惡處，令得安穩。勅命所在一切土地靈官、并溝渠等神，及一切諸大力鬼王，皆令覆護受持是此經者。

十二河源，今紀十三名，有二水共源者，故云十二河源。

勅命降魔王、天丁力士。

四天門王，東西南北四天門王也。

五嶽，東泰、南衡、西華、北恒、中嵩也。

四瀆，江瀆、河瀆、淮瀆、濟瀆之神也。

及盡世界一切諸名山。

四海，東、西、南、北四海。

九江，洋子、錢塘、漢陽、潯陽、混同、錦江、湘江、烏龍、鴨綠等，一切江也。

十二河源，黃河為世界之脉，若崑崙、禹門、星宿海、火墩腦兒、及尾閭、發瀉河水等根源也。一云，論黃河之源，崑崙有九井、七泉，不止十二。十二河源，蓋禹疏九河，及汝、漢、淮水、泗水，為十二也。九河，徒駭、太史、馬頰、覆釜、胡蘇、簡潔、鈎盤、鬲津、汝、漢、淮、泗為十二河源。黃河，則河之總神。若涇、渭、沂、汶、溱、洧、滹沱、與洽、弱水等，及一

切諸河，皆河之屬也。

山林，盡世間山林。

川澤，盡世間川澤。水流曰川；澤，水澤也。

一切主，山林川澤主者之神。

悉與其眷屬。覆護受持是此經者。

諸危險艱惡之處，令其無虞，而得安穩，指持經者言。

帝之勅命所在，一切方所土地之神，一切感應靈官。

溝，無水注曰溝，或山或土。

渠，有水曰渠。等神，自溝渠之外，凡一切小神也。

及一切諸大力鬼王，皆令覆護受持是此經者。

帝經法旨，諸仙寶崇，諸佛受持，諸天奉行，諸神欽仰，諸人誦讀，魔鬼自伏。實惟山得以鎮靜，水得以流長，所以衛護惟嚴也。持經者既為諸神之護，又烏可慢哉？一慢，則過深罪重矣。善乎，孔子曰：小人不知天命而不畏也。狎大人，侮聖人之言，知此為小人。觀斯經，尚戒勉

之。

護持品五章

令諸魔外道悉皆懾伏，潛形遁跡，高飛海外，遠避他方。如是山林社稷祠廟血食之屬，一切鬼神，當自消滅；五方行病瘟疫鬼帥、諸惡鬼神、并風王水怪、孽音業龍妖神、土精水魅、盡自消滅；五虛六耗、夢寐乖常、野道咒咀、蠱毒之類，皆自消滅。是持經人心欲願者，一切如意，皆得滿足。懾音轟。

令諸魔外道，諸魔，天魔、地魔、魔王、魔民、魔女。

外道，淫辭邪說，僻行雜法，旁門小術，私技三千六百、九十六種、三萬六千等是也

令，勅命禁令剿除也。

悉皆懾伏。悉，盡也。

懾，驚畏心服也。

伏，收斂歸伏也。

潛形遁跡。潛，藏也，藏其形象，不敢顯露。遁，逃避也，逃其影跡，不敢停止也。諸魔之形雖外若妖艷，幻象奇美，真態實阻，不可見人。此經真法，

破鬼之膽，碎魔之心，諸魔難逃其鑿，心畏法言玄律丹勅，自不敢留，恐露醜質。外道之言，欲以亂真。正道行而邪說息，大道尊而傍門廢。帝命一宣，自不敢容。

高飛海外，魔行無跡，可以飛言。外道人耳，何以言飛？格心易慮，向化忘私，高騰海外，即俗語言，魂飛天外，魄散九霄耳。

遠避他方，不敢居其故地也。

如是山林社稷祠廟血食之屬，一切鬼神，當自消滅。山林，解見前。社，土神；稷，穀神。祠，司也，祀也，神之司臨，祀而祝之也。廟，朝也，妾神於廟而朝祭也，血食享牲醴之祭者也。以上鬼神，皆宜祀者也，如何令自消滅？神邀祭祀，必為不直；民謠鬼神，必為不正。故薩真人收伏王靈官，改禁城隍；西門豹守濟州，投巫於水，以禁河神。况邪有假神以感人，人有崇邪以誑俗。故胡穎經略廣東，毀幻佛而殺妖蛇，杖僧人以脫愚俗。今云一切鬼神消滅，奉經旨，不

你禍福，安然無威聲也。五方行病瘟疫鬼帥。諸惡鬼神、惡鬼神，非行病鬼帥，廼世之厲鬼強神也。并行風之王，水中之怪，作孽暴龍，妖異邪神，土精木魅，盡自消滅。五虛六耗，精神氣血身五虛，六脉衰耗。夢寐乖常，魂魄不寧。一云，五虛六耗，如天哭破敗，喪門、太歲、大耗、小耗、飛廉、空亡、黃旛、豹尾、九竅、赤口、白舌、惡厭神殺凶星、作禍神鬼之屬，一切辱事，野道邪法，呪詛妖語，或呪或誓，及蠱毒魔昧之類，皆自消滅。是持經人心欲願者，一切謀望趁心如意，皆得滿足，無有違逆。夫道德之士，鬼神欽重，凶邪盡消。祥桑之死，梓潼驅瘟，旌陽伏蛟，祖天師伏魔，薩祖禁鬼，皆有明效。噫，王彥方烈士也，盜願刑戮，不令彥方知，則驅魔伏外道，誠有德之必然者。但人之三尸、五累、七情、六欲、九識，下惡為害，欺不能正己，伏邪除凶。人能正心進道，斬三尸，除五累，情欲盡，識惡除，已願盡而外邪消，凶散吉臨矣。

護持品六章

或有未能遵依科教，修崇齋醮，但能清淨持戒，專一信受，尊重敬慕是此經典，並同修齋；護持淨戒者，是人功德坦然無礙，自在逍遙，號人中聖，德慧長新，同諸真人。

能如法受持經者，功德莫量已。或有未能遵依玄科教典，修崇大齋醮，但能清淨無染，持戒專一，持守道門戒律，或五戒、八戒、十二可從戒、十八戒、二十四戒、三十六戒、七十二戒、百二十戒、百八十戒、三百大戒、女冠六百淨戒，專心致志，持此戒品專一，堅固無二，信受尊重，信受奉行，欽嚴尊重，誠敬仰慕是此經典。或作但能清淨持戒，專一信受，尊重敬慕讀者，俱是。

並同修齋，護持淨戒者。未能遵依科教，修崇齋醮、清淨尊經之人並同修齋醮者，功德一般。諸神敬佑，護持是淨戒者。一云自己清淨專一，護持所守淨戒。是人功德，坦然無礙。坦，平也。

寬，廣也。心有二，則功德不實。戒不持，於功德有玷。心身清淨，持戒專，信受切，尊敬經典，心無染，心無二，無有虧欠繫繫，功德真實，自是坦然。又有何礙？

自在逍遙。人性生來，無拘無困。客感物累，忙忙苦苦，無復自如，焉得快樂。清淨正信，無復物累，得大自在，常樂逍遙。

號人中聖，不惟為逍遙之人。消淨正信，高出人儔，號人中聖人。

德慧常新，習與智長，化與心成，聞見真而智慮融，物累忘而性真湛。德日新，慧日明，是德慧常新。

同諸真人，清淨正信者同持經得道諸天真人。

夫所謂清淨持戒，專一信受，尊重敬慕，非有計功之心，為人之意，無所為而為，絕無虛假間斷。即孔子所謂造次終食，顛沛無違。即《中庸》所言無入而不自得。莊子著《逍遙》之旨，海蟾著《快活》之歌。佛家所謂大自在，儒典所謂日新，溫故而知

新，皆自然之效也。豈有所假借，又豈有勉強襲取之義哉？

噫，清淨正信，雖不依科教，脩齋醮，有是自然功德，可見道旨玄科，惟在實體經義。科教齋醮，普法品以演道化耳。陳希夷諷《度人經》成道，蓋真持經旨耳。今之齋醮無明效者，有盛儀，無真修也。若清淨正信，更脩齋醮，則功益大。無齋醮，有真誠，功亦神。若無真誠，則齋醮皆文具矣，寧無過乎。

護持品七章

爾時昊天上帝聞是說已，即於帝前稽首歌曰：

大哉至道，無形無名。渺渺億劫，黃道開清。神清朗耀，九炁吐精。玉虛澄輝，太霞高明。玉皇開化，溥度天人。三元道養，二象攝生。朽樹故根，已枯使榮。蠢動蝸息，長生化形。懷胎含孕，俱得生成。亡者命過，魂歸三清，魄受鍊度，南宮飛昇。今日大吉，皆得光明。五帝鑒映，普告萬靈。天神地祇，及諸河源，五嶽四瀆，及諸名山，洞

玄洞虛，洞空洞仙，無極大聖，至真尊神，無窮無極，溥監度生。惡根斷絕，玄都記名。衆真班列，咸聽帝言。經是帝勅，保誦持人，至度道岸，無使災侵。我奉帝命，一切咸聽。

爾時，解見前。

昊天上帝聞是說已，指上護持功德言也。

即於帝玉帝也前，稽首歌稱讚詠歌也曰：

大哉至道，大莫可量，至不可及也。無形無名，不見不聞，名亦強稱。渺渺億劫，無始無終，歷劫無數，一云十萬曰億，要之舉大數言，實無數耳。黃道開清，吉時慶會，天道開通。神清朗耀，神風永清，朗耀光明。九炁吐精，融、炎、演、昊、景、道、混、洞、浩等九炁也。吐精，黃道開死慶消，九炁呈輝，吐精炫瑞。玉虛澄輝，玉光虛明，澄然清輝，一云玉虛天呈輝。太霞高明，太玄霞光，大高至明。玉皇開化，開度教化。溥度天人，溥，遍也。盡度一切天上地下人。三元道養，天生、地成、人教化之，爲三元道養也。二象攝生，乾坤造化，生成人物。終始宰制，故云二象攝生。一云陰陽陶鑄爲二象攝生，俱是正論。朽樹

故根，朽，壞也；故，死也。已枯使榮，枯槁也。已乾枯，使再發榮。蠢動蝸息，長生化形，蝸飛蠕動蠢類，生不夭折，俱得脫其本形。懷胎含孕，俱得生成，人物胎孕，不傷不墮，俱得安然，生長而成。亡者命過，魂歸三清，死者不經地獄，皆歸天上。魄受鍊度，南宮飛昇，死者七魄受大慈真人鍊度，魂神飛上南宮。今日大吉，指說經時言。皆得光明，人物咸濟，幽暗開光。五帝鑒映，五方五帝照鑒光映。普告萬靈，遍告一切鬼神。天神地祇，及諸河源，五嶽四瀆，及諸名山，洞玄洞虛，洞空洞仙，玄虛空洞，一切仙帝神佛將鬼。無極大聖，至真尊神，無窮無極，無盡量也。普監度生，溥遍監臨，度化群生。惡根斷絕，永除人物惡根。玄都紀名，玄都丹臺，紀功德名。衆真班列，朝班侍列。咸聽帝言，玉帝言也。經是帝勅，此經是玉帝勅旨。保誦持人，保護誦持經法之人。至度道岸，登升道岸。無使災侵，一切災難不侵。我奉帝命，奉玉帝命。一切咸聽，一切人物鬼神皆德也。此申全經功德。

護持品八章

于時昊天上帝說是歌已，告大眾言：此玉皇妙法語、諸聖秘密言，路絕道斷，微妙難思，巍巍大範，為神明之宗，保鎮國土，拔度生死。爾時昊天上帝說是語已，法筵清眾咸仰道言，溥得開悟。

于時昊天上帝稽首稱讚玉帝，既說歌已，告諸天仙真神將等大眾言：此玉皇妙法語。諸仙聖皆有法語，大而可量，傳而有限，或可知其始，知其終，或利生而遺死，或利人而遺物，或鬼神可識，或邪魔不伏，或無知無形，不能普濟，非為奇妙。今是經功化無窮，威力莫量，一切獲益，非常品也。迺玉皇妙法語，諸聖真秘密玄言。元始說經，如何云諸聖、諸至真聞受此經，皆寶重不敢輕洩。故曰諸聖秘密言。路絕道斷，最上一乘。法非常聞，修真要路，入聖周行。情欲幻妄，到此拔根。愛念凡思，無復滋蔓。輪迴轉生，一刀兩段。故言路絕道斷。

一云，七聖皆迷，人所難行，亦是。微妙難思，深微玄妙，神不可以思致，難以思入，人心思所不易到也。巍巍高大，妙範仙章，為神明之真宗心印。一說，言玉帝道範，為神明宗師。太拘了。保鎮國土，拔度生死。

爾時昊天上帝說是妙法，至拔度等語已。法筵，法會華筵。清眾，清淨聖眾也。咸仰道言。道言指玉帝言。或以為仰昊天妙法等言。溥得開悟，盡得悟也。

攷證：

夫子之言性與天道不可得而聞也。《文始經》云：聖智造迷，鬼神不識。佛在靈山說法，菩薩馱馱着耳聽。玉皇法語，路絕道斷，微妙難思，有何疑哉？為神明之宗，鎮國土，度生死，亦自然之效矣。

解疑：

天下無道外之人，亦無人外之道。

人物幽明皆道也。人性全真，萬物皆備，一切化育，世界始終，皆吾性之真也。

玉帝道身也，經為道旨也。惟道則全功神化，妙本自然。人與同性也，寧不可以持經耶？知道在身，一心體道，生生世世無二，則聖真在我已。

護持品九章

於是天尊而說偈曰：

玉帝功德大，玄理極幽深。生於浩劫前，運化於古今。我今說妙經，愍念諸有情。此誠極妙法，功德中功德。名號最上乘，無比為第一。大光明王尊，威德世希有。能破暴惡魔，皆令心降伏。能滅極重罪，皆令得清淨。若人聞是經，或聞帝妙號，稽首生恭敬，一切罪消滅。十惡四重罪，五逆於父母，信心一稱名，隨聲盡消滅。保護人天眾，四相與五衰，三塗極重苦，人間凡厄難，凶年饑饉喪，毒藥及魘魅，刑獄與冤家，軍陣鬥戰苦，山林惡道中，虎豹豺狼眾，江海毒龍類，迅雷風雨雹，

水火及盜賊，蠱毒中心腹，失志發狂亂，蛇蝎毒惡蟲，邪魔凶怪神，伺求人便者，由持是真經，普皆自散滅。惡病久纏綿，夢寐亦不安，非理欲殘命，殄滅不為殃。緣遇是經故，安穩得自在。所有希求願，財寶及富貴，以此經功德，如意皆稱遂。神威自在仙，諸天十一曜，三十二天主，二十八宿星，靈妃玉女等，天神及地祇，三界虛空神，江海諸龍王，水火及風神，宮殿與宅舍，山林樹木衆，溝渠井泉神，由持是經故，一切皆擁護。衣食常自然，子孫臻富貴。出言人希聞，所至皆推敬。若為求男女，持誦此真經，帝詔下天曹，落籍天仙人，降謫生其家，為其作男女。顯貴人崇重，七祖得超昇。光大慶門戶，延及父母親。吉祥常熾盛，灾障不能侵。是故我今說，大衆宜諦聽。慈悲度一切，皆令達上清。凡音續

於是法筵清衆開悟，時元始天尊說偈語曰：

玉帝功德大，玄理極幽深。生於浩劫前，運化於古今。我元始自言也今說妙

經，愍念諸有情，功德中最上功德，無比妙法，為第一玄機。大光明王尊，光明無量，覺王至尊。威德世希有，玄威妙德，世間無有。十惡四重罪，四重罪，一云魔、獄、鬼、畜。一云雷擊、灾疫、盜賊、刑獄。五逆於父母。孟子所謂五不孝，惰四肢、博奕飲酒、好貨財、私妻子、從耳目之欲，以為父母戮，好勇鬥狠，以危父母。一云不恭信孝順守禮，為五過。信心一稱帝號，隨聲滅罪。五衰，珠冠碎身屈、頭俯、眼泪、鼻噴、身無光、天衣敝、影露、神運不靈通。凡數運會遇也。冤家，前業冤相遇也。迅，疾雷也。雹，冰雨也。伺，暗候人空便為害。非理欲殘害己者，殄絕止滅，不為禍殃。東西南北，四八三十二天主。持經人出言玄妙，人所希聞，所至處人皆推心敬服。七祖、父、祖、曾、高、傳支之祖、開林之祖、立姓之祖為七祖。熾勝，大光顯也。慈悲度一切，皆令達上清，大羅界也。此偈元始著玉帝玉經功德，令人欽持也。

護持品十章

於是天尊普告四衆：凡人持念此經，受誦帝號，皆道根深重，宿有善緣。此經尊妙，普度天人。但精心恭奉，家國安寧，保命度灾，掃除不祥。天子王侯得奉之者，致國太平，凶寇自夷，邊域不爭，兆民歌唱，普天興隆，運推數周，正道當行。有得之者，天真敬重。寶之祕之。

於是元始天尊普告四衆：凡世間一切人持念此經，受誦玉帝寶號，皆道根深重，即儒家所謂資稟清且厚，佛家所謂根器好。

宿有善緣，夙世往劫，廣植陰德，預有良緣。蓋至道難聞，法會難遇，慶宵難逢。有歷世不聞正法，有聞而不信不悟，不周完，不蒙實益者。皆根器之淺，緣分之薄。今值法會，聞正法，蒙實益，皆是歷劫脩持，道根深重，宿有善緣。

此經尊妙，普度天人。但精心供奉，精誠恭敬，尊奉此經，家國安寧，保命度灾，保命延生，度灾消厄。自古

聖賢，有生有死，災厄常有，何云保命度災？蓋保天命而全正氣，素患難而日坦然，生順死安，吉凶無二，是持經之保命度災也。

掃除不祥，經法所在，凶厄潛消；吉人天相，災難永除，無有不祥。

天子王侯。天下之君曰天子，曰皇，曰帝，周則稱王。近世稱藩封一國之君曰王，分符世臣曰侯。古之侯分封百里。

得奉之者，得奉此經者。致國祚享太平，凶寇自夷。夷，平也。國有道，內順治，外威嚴，凶人賊寇不作，自然夷平，四夷來王，天下晏然，邊域不起兵爭。兆民衆庶，歌謠唱樂太平。普天下興隆，富庶又安。運推數周，貞元會運，推還時數，已周一運，正道當行於世。有得經法，湛然神化之道者，天真敬重。寶之，祕之。此經尊重，寶之可也。普度天人，迺云祕之，不幾於私天道哉？蓋大道雖然普濟，不信者不可輕傳。佛之正法眼藏，不妄示人。孔子

曰：中人以下，不可以語上也。上達必由心悟。輕之則為褻天。經云祕之，觀者慎之，自知經義。

報應神驗品第五

應驗品續十一章

爾時慈悲度厄真人、尋聲救苦真人、濟生度死真人、萬福護身真人俱從座起，越班而出，俱白天尊言：若諸末世凡夫，雖宿有善緣，得遇是經，被諸邪障所隔，本末疑惑，不信是經功德。如是之人，見在、未來、於諸地獄得何罪報？惟願聖慈，說其報應惡趣之苦。

爾時慈悲度厄真人、尋聲救苦真人、濟生度死真人、萬福護身真人、俱從所坐座上起，越班而出，越衆神班次而出，俱白天尊言：若諸末世凡夫，雖宿有善緣，得遇是經，被諸邪障所隔，己之邪見、人之邪說，偏性拗妄，事障、理障、一切隔礙，本末疑惑，始不能信，後不能悟，上下扞格，不能融通，終始本末不得徹契，本末疑惑，不信是經功德，如是之人見在、未來、今世、未來世也。於諸

地獄，得何等罪業報應？惟願聖慈天尊說其報應惡趣之苦。人物業識，各有意趣。或善或惡，輪沉難脫。大聖至真，融宿習，拔根塵，淨識業，絕諸趣，障執盡脫，不受轉迴，無諸罪報。大賢菩薩，小仙小聖，神將鬼靈，善者以作福為趣，惡者以作業為趣。善者無論，惡者自沉業獄，報應種種，欲出無門，欲免無計。報盡轉生，捨此入彼，業緣牽累，復迷不悟，歷劫顛倒，相循不止。此等業趣，實可憫憐。四真人上乞天尊，說其報應惡趣之苦。迺大慈悲度世心切也。

兩教言報應，儒者以為不然。太甲曰：天作孽，猶可違；自作孽，不可活。傳云：福善禍淫。又云，天人之應，捷於影響。何嘗不言報應哉？夫子曰：君子懷刑。又曰，畏天命。故自不為惡。道義悅心，自無他趣。歷朝於鄉飲禮射，而講讀律令，教兆民，惟格人非心，匡翼其善心耳。兩教之言報應刑獄，無非

拔其業趣，使為大善也。噫，惟聖人神道設教而億兆服。玉帝功德最大，故經明示報應，拔人惡趣，不為詭眾。若自不修真，但以禍福眩人，是欺眾也。觀經者絕欲成真，免一身之惡獄，而後可以濟世度人矣。

應驗品續十二章

是時天尊謂四真人云：若諸世間，剛強暴惡、不善眾生，終日竟夜，對諸道像，無恭敬心，出誹謗語，是罪當墮五無間獄。若得值遇是持經人，設諸方便誘引開導，如是之人。能滅惡心，信向是經，彼人罪業淨盡無餘。

是時元始天尊謂慈悲度厄等四真人云：

若諸世間，剛強暴惡，姓勇行粗者，不善眾生，言行不善一切眾生。終日竟夜。竟，亦終也，盡也，盡日盡夜。對諸道像，諸神聖像，無恭敬心，出誹謗語。誹，以言非之也。謗，以言毀之也。是不敬道像，誹謗神聖的人。其罪當墮五無間獄。五獄冥司大獄也。非聖者無法，故墮

此罪。試觀誹謗妖言之陽律，則知謗神之罪。若得值遇是持經人。值遇，彼此時候，適相會逢也。

設諸方便救度之法，誘引開導。慢神謗法之人業根深重，一意執迷，無有信心。持經人大慈悲方便，啓誘接引，開發化導，顯彼良心，生其善念。

如是慢神謗法之人，能滅自己一切惡心，信向是經，信心皈依，專向是經。彼人罪業。彼，指慢神謗法之人，所在罪業淨盡無餘。業消罪滅，報對悉盡，永免冤愆，不入轉迴，常清常淨，惡報永除，再無不了之業也。無間地獄，業若難消，一心信向真經，惡根立斷，諸塵盡滅，有何牽繫，根塵立盡，業淨無餘。

夫神德經功，利益最大，兩教甚言罪福，切示慢神謗法之罪。儒者每戒諂瀆鬼神，豈儒不敬神、不尊經哉？《詩》云：無忝爾所生。張子云：不愧屋漏為無忝。又曰，存心養性為匪懈。兩教所言，敬

神尊經，使其存心脩行，無愧於天地神明，尊信法言，體道成真也。儒者言不媚神，戒其邀福妄瀆耳。事天，畏天、希天，尊先王之法言，對越駿奔，嚴敬不苟，儒與兩教一也。若祭無益，敬不足行，天命不足畏，此敝言也。儒者亦切責之，寧獨二氏乎？噫，善惡敬怠，一切由心。能絕情欲，去智識，空五蘊，除五累，則不在五行中，天地不能拘，五無間獄又何遭哉？佛云，稱佛名號，火坑變作蓮池。孟子云，誦堯之言，行堯之行，是堯而已矣。則真善功效立見。

皇經集註卷之八

皇經集註卷之九

應驗品續十三章

又若有邪見愚執惡人，睹持是經，生諸惡逆，偏眼邪視，乃至起一惡心，發一惡言，妄生謗讟持經之人，其罪深重。命終之後，墮大地獄，永無出期。

不惟慢神謗經罪重。又若有邪見愚濁、執迷惡人，睹持誦是經者，目見曰睹。生諸惡逆，有不信心。故不知經為道語法言，持之利益，阿慢輕忽，厭惡謗毀，生諸過惡悖逆，偏眼邪視，不喜見經並持經人，無有正眼定觀，偏眼邪視，輕藐憎厭，乃至起一念惡心，發一句惡言，妄生謗讟持經之人。讟，譽毀也。持經作善，本不可毀，邪執惡人不知緣業罪福，不知持經之善，妄自生謗毀讟詈之言，加持經之人，其罪深重。命終之後，終，盡也。墮大地獄，無間獄也。永無出期。永，終也，長也。妄謗正法，業根深重，故墮地獄難出。

夫識見一也。見之不正則為邪。人一也，執迷不悟，則為愚、為惡。心一也，生惡念則為逆。眼目一也，偏眼邪視則為過。一念至微也，起一惡心為業根。一語無幾也，發一惡言為罪本。君子成人之美，嘉人之善，持經者當稱讚也，妄生謗讟，是自作孽。人生本無業，自惹其罪深重，是大可哀。命終，是還造化舊物也，固無拘。迺一謗法，墮大地獄，死亦不安。其過如何永無出期。天心仁愛，上帝好生，惟神正直，不淹没人。今罪者無出期，豈天拘之哉。孽自己作，定業難逃。欲除己業，還須自信，至善不回，業根脫矣。噫，刑獄天討，法本無親，慈父不能庇其子，孝子不得私其父。至公者神，豈消自致之業哉？信經向法，自懺前業，如世人出首信誠，免其罪犯也。

人生世間，聖愚無二。即不能出言有章，聲為律，幸勿出訛言而為惡

口，不能行無過動。身為度，幸勿行惡事而造身業。不能心無妄想，守至真，幸勿起惡意，造心業。不知大道，勿謗道；不能解經，勿非經；不能持誦，勿謗人；不明鬼神、生死、因果，勿起毀言。一心正信，久自明道，漸成聖真，又何罪業之有？

應驗品續十四章

至若在世男女，得遇是經，不生敬仰，穢手污觸，葷口讀誦，床榻不淨，便將安置。或誦是經，講習俗語，共同戲笑，以為常典。如是之人，命過之後，墮無間獄，永無出期，殃緣九祖，受考艱都，累及子孫，害纏後代。是人於地獄中歷無量劫，受大苦惱，縱遇聖教，累承救拔，罪惡小減。又遇上聖殊恩，得離地獄，生餓鬼中，歷千萬劫，不聞漿水之名。鬼報得盡，生畜生中。畜生報已，若生人中，復生邊夷外域，而復女身，貧寒困苦，癱殘百病，受無量苦，人所憎棄，求生不生，求死不死。輕斯經故，獲罪如是。

此甚言慢經之報。不生敬仰，不敬

重仰慕也。穢手污觸，不淨之手或請捧經卷，或披閱指點，污觸輕犯此經。葷口讀念誦持，食五葷、五辛，三厭之口也。床榻不淨，卓几牀榻、座器不淨，便將此經安置供放。或誦是經，與人講習俗語，共同戲笑，以為閑常書籍典章。是人不能自惹罪報，禍殃緣及九祖。始祖、四昭、四穆，為九祖。受考艷都。考，考察過失也。或作拷掠之拷。此即小鬼犯事，罪坐家長之義。累及子孫，害纏後代。積不善之家，必有餘殃，受大苦惱，罹大罪苦，煩惱無限。

遇聖教累救，罪惡小減，即蒙經功法功減。遇上聖殊恩，上帝恩赦也。得脫離地獄苦報。餓鬼千萬劫不聞漿水之名。餓鬼腹大，咽喉微小，飲食難下。黑獄羅剎，不見漿水，亦不聞名。生類莫蠢於物。鬼報盡，生畜生中，其業尚在。人世雖一，中國難投，男身難得，生邊夷外域，而復女身，人中之不美也。

貧寒困苦，貧賤凍餓，困苦艱難。癯殘百病，衰損殘廢，百病縈纏。受無量苦，言不盡之苦。人所憎惡厭棄，求生不得安生，求死不能即死，皆以輕慢此經之故。獲罪業如是之重，亦可哀哉。

夫人生，參天地為三才，此身貴重，親賴以繼，光前裕後；道賴以傳，所係匪輕。一慢經法，殃及己身，緣祖先，禍後代，受業報，何其愚之甚也？又觀三教書，言男女法性，無有分別，在在處處，皆為樂土。《中庸》云：富貴貧賤，夷狄患難，素位而行，無入而不自得。今言外域女身，病難之體，為人憎棄，何也？蓋無分別，皆自得者，道也。分等類，言罪福者，報也。報應明，人斯為善矣。嗚呼，人一也，皆可為善人也，尚勉力進道，勿造業，而為人所憎。

應驗品續十五章

又復有人，初雖信受，後復慢易，善惡童子，上奏三官，黑簿書名，青編減算，身歿之後，拘閉幽牢，往復三塗，無由

解脫。或於見世，受種種病，疥癩癰疽，以為果報；憂悲苦惱，日夜相煎。或身被橫惡所加，或牢獄繫鎖，或非命自害，毒藥所殘；或被虎狼毒蛇之所噉食，或為冤債之所牽引；或行山林，值遇惡人，被他屠割，推落崖岸；或被邪精魍魎之所殘害，或值水火之所焚漂，或被刀兵之所橫誅。輕斯經故，橫喪天年，獲如是果，獲如是報，可不悲歎？可不痛歎？

此經法利，不特全不信者有罪也。又復有人，初雖信受無疑，後復怠慢輕易，善惡童子，紀錄世人善惡之童子，上奏三官，黑簿書名。黑簿，錄過之簿也。書慢易經典之罪。青編減算，紀功青篇，減慢易經者之算。身歿後，拘閉幽牢，刑獄囚繫。往復三塗、苦累無由解脫。或於見生今世，受種種疾病，疥癩癰疽惡疾以為果報，償其惡業。憂悲苦惱，日夜相煎，愁困日夜熬煎。或身被橫逆禍惡所加。或牢獄繫鎖。或非命自己殘害。或毒藥傷殘。或被虎狼毒蛇

之所噉傷啖食。或為冤家債主之所牽引受害。或行山林，值遇惡人，被他謀殺屠割，推落崖岸，以傷身命。或被邪精魍魎之所陰殘損害。或值火焚而水漂。或被刀兵之所橫誅。輕斯經故，橫喪天年，夭橫折喪，不得善終。獲如是業果，獲如是報應，可不悲歎，可不痛歎。既悲哀其苦，又痛惜其愚，此見天尊之大慈也。

證疑：

夫後一慢易此經，罪報無窮，則尊道信經，貴有恒也。久道化成，經功全驗，盡被其德，領其效矣。人惟無恒，始勤終怠，無怪乎罪業之及也。抑自古及今，不才者間出，不持經，不聞經者甚衆，獲罪厄患者每有，豈皆盡慢經者耶？蓋經以言道，不信道而無德，即慢經者也。無德有罪，即慢經之罪也。欲尊經消罪，當進道修德。

應驗品續十六章

汝宜殷勤，依此奉行，勿生邪念。若諸念不生，萬緣頓息，塵沙惡業隨心消

散，一切灾魔自然殄滅。此經功德不可思議，是誠無比最上妙法，諸經之王，有大利益，非人勿示。

天尊謂真人云：慢經之罪報應如是。汝等宜殷勤懇切，依此經法奉行無失，勿生一切邪念。若諸雜念不生，無善念，無惡念，無無念無無念，萬緣頓息。空五累，除九識，離四象，絕百非，空萬有，忘一無，外緣、內緣、業緣、福緣、空定妙緣，宿世、今生，攀援未來，一切斷絕，悉盡根塵，塵沙惡業，隨心消散。世上塵，恒河沙，不可稱數。如是衆業，隨信經心，悉皆消散。一切灾魔，自然殄滅。諸灾，諸魔，自然殄絕除滅。此經功德，不可思議。是誠無比最上妙法。三教，萬法，一切無可比。此誠為最上妙法。諸經之王，兩門之經，儒之書，皆不及此。為三教諸經之王。有大利益，非人勿示。道雖人人可學，不信不敬者不可傳，非人勿示，非重道之人不傳示也。

解疑：

儒者不教自暴自棄之夫。佛不度無緣之輩。道法最尊，豈強不信之人哉？噫，信心進道之基，真志成聖之要，不信不可以授經。人當至誠勵志，以為受經入聖之本。應驗品續十七章

若諸天人，五衰四相，輪迴侵逼，能捨除妄想，受持是經，坐招自然，天福益固，身度三界，與道長存。此經至尊，不宜妄示人矣。若諸天人，欲界六天，尚有欲樂。色界十八天，常有色象。無色界四天，以空定為樂。大梵四天，知空知無，雖無冀樂，靜福有數。諸天之外，最上種民四天，無輪迴成壞。以前諸天，等義不同，在種民下，有成有壞。五衰四相。五衰，解見前。四相，非人、我、衆生、壽者，福相盛衰，德相盛衰，分四相也。一云生、壯、老、盡為四相。一云，不威儀、不神通、不快樂、不精健為四相。輪迴侵逼，欲、色、梵、無色三十二天，久暫不同。其天人福盡，轉生人間，皆有定數，故云輪迴。

侵逼。能捨除妄想。逐緣妄生，或想福，或想慧，或想壽，或想空，或想定，或想上昇，或想轉降。言所不盡，心所不窮，皆名妄想。捨除雜念，一緣不生，空空無無，是捨幻念。除妄想，坐招自然，天福益固，不待思求，自然坐致。欲界、色界、無色、梵界，皆自所居，而得超脫。永不輪轉，無毀淪，得大堅固，不入輪迴。身度三界。能出欲界，於色界，及無色、梵界，天地人，出三有象，高度上霄玄境。與道長存。與道合真，浩劫長存。觀天人寶經之效，則世人可知矣。勉之。

應驗品續十八章

是此經典，無與等、無能勝，是大威德，大神咒，能令一切枯稿便生枝葉，花果茂盛，能除衆生極重苦惱，能令短命衆生而得長壽。此經功德不可思議，歎莫能盡。

不信經者業如是，天人信經效如是。是此經典無與等，一切諸經諸法皆出其下。無與等倫，無能勝，一切諸

經法利皆不及此，無能勝者。是大威德，或除邪，或輔正。功德不能相兼，不名威德。今經法除邪滅罪，扶正成真，是神功妙德，恩威莫量，故云威德。大神咒，解見前。能令一切枯稿便生枝葉，花果茂盛。諸草，諸木，奇花，異菓，瑞芝，靈香，凡榮秀生類不能暢達茁育，一切乾枯稿損，此經便令復生枝葉，花萼果實，暢茂繁盛。能除衆生極重苦惱。此經消諸業，利人之生，拔諸罪，利人之死。除魔難，保人快樂。歷劫冤愆，終身煩惱，最重苦冤，累世難消者，此經便除其根。能令短命衆生而得長壽。世人之生，七十甚希。此經保命延生，能令世間夭折短命衆生益筭延年，而得長壽。或云，顏子亞聖，年止三旬，是道德無益。何云經功延壽？蓋死而不亡者壽。卓爾見道，顏子不死。經云延短命之壽，蓋令衆生見道，死而不亡也。此經功德，不可思議，歎莫能盡。稱歎不盡也。噫，寇公忠義，枯竹成

林；田氏孝友，稿荆復生。聖人在上，比屋可封，死生快然。會大道之全，功德無類不及也。觀經者勉焉，自有最上功德。

應驗品續十九章

若不宿植道本，廣種福田，乃至經名尚不得聞，何況得見是經？

此經功德無盡矣。

若不宿植道本，本猶根也。君子務本，本立而道生，故云道本。一作道種，非也。宿，夙也，預也。植，立也，樹也，種也。道本，漸次進修，入道根本。道經云：大道無名。精修則成。孔子云：下學而上達。佛經云：從聞思修，入三摩地。三教皆重學問，為成道本。然道雖頓悟，須假漸修，實非一蹴能盡。若不宿世今生，預加修習，先植道本，廣種福田。福田，積功有效，如種田等，故曰福田。外功，則脩宮觀、寺院、庵廟、堂祠、塔閣、社宇、橋梁、道路，行藥治病，助國救人，符濟，祈禱，廣嗣，利生，除邪，去難，拔苦，拯貧。

內行，則慈悲，喜捨，忍辱，和光，普惠無私，堅固圓滿。粗行，則施財物衣食。秘行，則念道思真，絕欲養神，積精累氣。入聖超凡，種種不一。無量福田，皆廣種之。種世田者，時歲旱澇，人事不齊，或不成收；種諸福田，小則小成，大則大效。陰德種種，若人不知，若說不盡，功德無量。若不種諸福田，乃至此經名號尚不得聞。無德無福，不聞經名。經云，正法難遇，此之謂也。何況得見是經。見此真經，即為道眼。無德無福，經名不聞，焉能得見？夫人之分量不同，承受亦異，有福無德，富貴而愚；有德無福，清貧而聖。德福並懋，祿位壽名。若遇正法，知見了脫，非歷劫脩習，功德無量，不能至是。佛會百萬，正法付之迦葉；孔門三千，一貫付之曾參。道門法衆，億萬萬萬，繼太上心法，文始而已。觀者勉之。

應驗品續二十章

蓋是經依三洞真格，八萬劫一傳，此清

都至真上聖所寶，祕於玉京金闕，甚為微妙，難可得遇。如宿有仙骨，當為九天真仙之人，得遇斯文，承斯緣故，後當齋金寶從師告盟受之，方當承機應運，乃可付焉。不得輕泄，敬之、慎之。

此經非輕傳也。依三洞真格。洞真，洞玄，洞神，此三洞品，載天律金科。真格，自然之數。八萬劫一傳。經八萬徧元會運世之劫。一云，人生於寅，盡於酉。八時，共八萬六千四百年，計大數八萬餘年。每年生長成收一次，亦謂之一劫。沙，塵數也。八萬劫一傳，此經普轉大法，非常遇也。前說近是。此清都至真上聖所寶。上清玄都。祕於玉京金闕，非云玉帝之居。迺太玄寶藏帝經之閣。甚為微妙，讚經難可得遇，不易遇此經。如宿有仙骨，宿世進脩，有成道分，骨相合仙。當為九天真仙之人，九炁天真上仙品。得遇斯文，得遇此經文。承斯緣故，承此當作仙遇經之良緣。後當齋金寶從師告盟受之。非但齋持世財金寶，

告天立誓受經，獻至誠無私，永劫不改之心，盟心天日，如白日青天，無有點塵，是真金寶，不毀者也。方當承機應運。方，始也，始當乘機會、應時運。乃可付焉，乃可傳付此人。不得輕泄。泄，洩也。不得輕易泄漏經旨，言不傳非人也。敬之、慎之。尊敬此經，不可輕忽，慎守此經，不可妄傳。噫，知此經之重，人當脩良緣，以為受經之地。既受，永劫不可輕也。寶之、勉之。

應驗品續二十一章

於是天尊重宣此義，而說偈曰：設使江河水，波浪能生蓮，慈烏毛能白，如經故難遇。設使龜生毛，堪採為衣服，夜月能消冰，如經故難遇。設使蚊蠓足，堪構為橋梁，能載一切重，如經故難遇。設使黃口雀，能啣諸大山，擲之他方界，如經故難遇。設使一葉舟，力能載崑崙，浮度於大海，如經故難遇。設使諸水蛭，口能生巨齒，其大如象牙，如經故難遇。設使蓬蒿葉，能覆無鞅界，蔭庇崑崙山，如經故難遇。

設使烏梟類，同樹一巢棲，啣食共反哺，如經故難遇。設使兔生角，堪用爲梯磴，上窮有頂天，如經故難遇。設使鼯鼠等，緣於兔角梯，至天能食月，如經故難遇。設使驢顏唇，色如蘋婆果，復能作歌舞，如經故難遇。設使蠅蟲等，能飲鍾石酒，迷荒而沉醉，如經故難遇。

於是元始天尊重宣經功之義，而說偈曰：設使江河水，波浪能生蓮。江河水深，涵流巨浪，不能生蓮。慈烏毛能白，如經故難遇。烏鴉生來純黑，不能白。今言烏白，江有蓮花，以見絕無，甚言經之難遇。龜本無毛，月本太陰。今言採龜毛爲衣，以夜月消冰，只是以絕無者，見經之難遇。至於言蚊蠓足構橋梁，載諸重，言黃口小雀啣諸大山擲他界，言小舟載崑崙神山，度大海，水蛭生象牙之齒。蛭，水蝗小虫也。蓬蒿葉覆無量界，廕崑崙山。烏梟同巢，共食反哺。烏梟皆惡鳥。兔角爲梯上天。鼯鼠步兔角梯，至天食月。驢

顏唇，如蘋婆果色，復能歌舞。蠅蟲飲鍾石酒，迷荒沉醉。以上皆事之所必無，理之所未有。歷歷言之，以見經之難遇。夫大道人人有，真經個個全。愚人蠢物，皆有正性，悉可化度，何至如此類所絕無者，擬經之難遇，豈終不傳耶？蓋法品不同，此經最上，傳之者未必如元始之真，受之者未必契玉皇之秘。扞格偏執，全經難曉。或不聞不見，或徒聞徒見，功德實效，語之茫然。未獲全益，信乎其難遇矣。不畏難之難，至誠有恒，經功自遇。

應驗品續二十二章

爾時天尊宣說偈已，普告四衆：世間若有持是經人名功德身，一切有情，被其蔭故。持是經人名神通身，一切吉祥，咸臻集故。持是經人名清淨身，是諸惡業，不能侵故。

爾時元始天尊宣說偈已，普告四衆。普，徧也。四衆，解見前。世間若有持是經人，名功德身。有利於衆爲功，有益於衆爲德。利人利物，曲成

不遺，名玄功妙德之身。一切有情，世間動植，凡有生之屬，雖土木金石，情性精魄在者，皆有情。故一切有情被其蔭故，三教聖人，普度永利。覆冒曰蔭。持經者，利己、利他、利人、利物，若有知、若無知，普惠共濟，一切被其慈蔭。持是經人，名神通身。人雖至靈，無有神通。經中妙法，至玄至神，大通無礙，持是真經名神通身。一切吉祥，咸臻集故。三教聖人，永成不壞。咸，皆也。臻，至也。集，萃聚也。持經人爲己則順而祥，爲人則愛而公，爲天下國家則無所處而不當，自致之福，千祥攸萃。天不愛道，地不愛寶，人服其化，物效其靈。一切吉祥皆集也。持是經人，名清淨身。不染謂之清，無累謂之淨。持經人萬緣俱息，一疵不存，名清淨身。是諸惡業不能侵故。三教聖人，有難無害。侵，逼害也。自作之業，天降之殃，宿業今愆，先亡連逮，時歲之咎，命運之滯，星居觸犯，魔鬼侵凌，人言

物厲，一切干傷，是諸惡業皆化凶為吉，不能侵凌。夫有道之士範圍天地，曲成民物，福履禎祥，天保勿替。吉人天相，無災無害，真功德神通清淨身也。人亦有身，而非功德神通清淨，亦不真持經耳。勉之，自可以證其功效。

應驗品續二十三章

持是經人名威德身，天魔異道不能攝故。持是經人名無等身，上帝遙唱，萬神敬故。

持是經人，不但名清淨身也，名威德身。解見前。天魔異道，諸天魔王，魔鬼魔女，陰暗魔鬼，及阿脩羅，唵嘶羅，魑、魅、魍、魎、精、邪、怪、祟，世人詭誕，外道旁門，妖孽、艷、異等不正道。不能攝故。攝，招伏親服也。魔異侵入，人迷服不覺，云攝。如佛門阿難，被摩登伽女攝入淫房，鞠愛撫摩，幾毀戒體。今持經人了明心印，無私無為，默持真經，法力周完，道高德重，威德赫奕，不可稱量。鬼妖喪膽，精怪亡形，一切邪

魔，豈敢侵正。故天魔異道不能攝。阿難非不持戒，一念動於摩登伽女，是未悟心宗，持經間斷，故伽女攝入耳。若非佛《楞嚴經》力，焉復全體。此《皇經》諸經之王也，受持威德，寧不萬倍於他經哉。持是經人，不但名威德身也。名無等身，無等倫儔類之身。吉真。持經者最上無與比。即釋經云，一切無如佛。儒書云，夫子之不可及也。猶天之不可階而升也。上帝遙唱，上帝，非玉帝也，諸天上帝也。遙，遠也。唱，樂世有進道之人，天音宣贊也。一云，謠唱，是作歌謠之謠。於理未妥，不可從。蓋世間生男，萬神唱恭；生女，萬神唱奉。上帝好生，諸天稱慶。有道之人誠格天地，動鬼神，與天合德，諸天帝歡慶。但諸帝甚尊，與他神不同，但依所居天宮常御處，遙聞天音以慶，決非歌謠之字。不然，何此曰上帝遙唱，繼曰萬神敬故？萬神，非一神，所指者廣。一切諸神，雖有崇卑，皆重道典。遇真持

經有道之人，故無不敬也。夫人性剛明中和，比肩元始，本有大威德，無等倫也，惟不禁情欲，故邪入而神不敬也。吁，子夏賢者也，出見紛華勝麗而悅，非夫子真儒之教，焉能成高弟哉？人能一真無偽，永成道矣。

應驗品續二十四章

持是經人名堅固身，惡劫大難不能損故。持是經人名道藏身，口出語言，鬼神仰故。

持是經人，不但名無等身也，名堅固身。世人生死無常，轉迴不知。或小功小德，福緣身世，或小根小乘，果位有限；或明而未了，易蔽易欺；或行而未成，易得間斷；或度人濟物，分量易窮，身如萍燭，難當風浪，非堅固也。真持經者心不退轉，名堅固身，惡劫大難，不能損故。或小劫、中劫、大劫，元會運世，三界滅轉之劫，物絕人盡，地傾天壞，四輪相觸，五行並尅，水火風災，侵壞世界，萬象空，諸法盡，諸乘果，四禪界，三階九品，官神將吏，悉入轉迴，

蒙再造難。真持經者得大堅固，超出劫數，永不退轉。惡劫元運，宿業灾魔，意外大難，毫不能侵，貞達常變，億世如一，不能損也。持是經人，非但名堅固身也，名道藏身。藏，藏也，藏也。道無所不包，無往不善。道藏無有不載，無用不藏。人身雖有限，性無不備。但不盡道，所以不成道身。真持經人淵存海

含，法藏中包無量世界，故名道藏身。口出語言，鬼神仰故。答述曰語，自言曰言。人亦有言，鬼神不仰，蓋詞不誠，口過生，尤且不免，何以感人神、鬼神乎？真持經人言焉成信，出之有章，不躁不隱，不失人，不失言；或一言續千真之脉，或一言開萬代之傳，或一言拯人物之溺，或一語破死生之關，或一言盡天地之道，或一語括萬法之玄，或一言悉鬼神之情狀，或一語明劫數之升纏；一言而滅罪福，一語而露金丹。三教真宗，在經一言，人物共寶，鬼神所不識也。誰不欽仰哉？鬼神仰

故，云爾已矣。夫三教大聖人歷劫不退轉，言語天人所共崇，堅固道藏之旨可徵已。一持經者，何遽至是？蓋一得永得，理之實驗，人惟不真持經耳。真持如何？心齋為本，神化成之。

皇經集註卷之九

皇經集註卷之十

應驗品續二十五章

持是經人名慈悲身，六道衆生賴其善故。

持是經人，不但名道藏身也，名慈悲身。大仁大惠，濟度無窮，廼名慈悲。人惟物我異念，久暫殊心，不但普濟永利，有失慈悲；即有所惠有所度，有限難久，亦非慈悲身。故分人以財謂之惠，教人以善謂之忠，小惠私恩，非普濟也。真持經人非常身也，大慈身也，大悲身也。何以見之？六道衆生，賴其善故。世界之類，盡於六道。六道至衆。六道之衆，難盡濟度。一天道高高在上，其福清長，不見所生，奚云其衆？惟天雖高，猶有三界，欲、色、無色，俱有成壞，縱福有長短之期。除各天主外，信正道可久存。其諸天人，一切所有，天上品類，俱非常住，有始有卒，皆名衆生。二人道，人為萬物之

靈。雖贊化育弘道法，貴賤異位，男女殊形，夥然繁以庶，億兆林林，不可勝計，是名衆生。三魔道，天之魔王、魔民、魔女、精邪、怪異、妖孽難窮，是魔類衆生。四地獄道，五無間獄、九幽惡獄、十八大獄、三十六獄、七十二獄，冥塗苦惱，獄類一切衆生。五餓鬼道，陰艷溟瀆，大力鬼王，鬼使，足長首大，腹廣喉微，千萬劫中不聞漿水。如是餓鬼衆生。六畜生道，胎者，卵者，濕者，化者，羽、毛、介、甲，鱗、蟄、形色蠢然、泐然，畜業一切衆生，悉荷持經慈恩，超濟覆護。固天人之福，解人中之厄，除魔獄之淪，滅鬼畜之報。一界、千萬界、三千大千諸世界，六道一切衆生，除業增福，賴其善故。是云慈悲。夫語六道，則盡類矣。言衆生，則盡衆矣。諸界皆然。則無始前，無盡後，不可思議稱量者，皆賴此真持經之善矣。信乎，大慈悲也。噫，先自度而後度人，欲濟六道衆生，尚永持真經，以成至善而後可也。

應驗品續二十六章

持是經人，名大道身，出入所在無怖畏故。

持是經人，不但名慈悲身也，名大道身。道本無形，人身有象。人性備道之全，得天地之理，得天地之氣，若云道身，人人有道，人人不盡道，則父母生身，謂人之身可也。四大易散，云幻身可也。物而不化，云凡身可也。醉生夢死，云無知身可也。朝暮忙忙，甘至老死，云業身可也。不脩不學，輪迴難脫，云罪身可也。秋香易度，華表無多，云色身可也。男女殊形，老少異狀，云無常身可也。大限到來，六親難顧，云獨夫身可也。風雨寒暄，切迫肌膚，云受苦身可也。此世人無有道者也。真持經人得法成真，是道身也，非凡身也，名大道身。出入所在，無怖畏故。怖，驚憂。畏，恐懼也。惟持經人，名大道身，出則坦然，入則無累；或出或入，清淨脫洒，無不泰然；何憂何懼，凡其所在，無怖畏

故。

解疑：

儒者云：戒慎乎其所不睹，恐懼乎其所不聞。戒慎恐懼非畏乎？況喜、怒、憂、思、悲、恐、驚，七情在人，箇箇不無。此云，出入所在，無怖畏故，若於戒慎恐懼相反也。是不然。戒慎恐懼，遏人欲，存道真也。七情之具，見人性體用全備，欲人懾情歸性也。若怖畏之心，內見未定，生於外患，有所恐懼，不得其正也。故夫子云，內省不疚。夫何憂何懼？出入所在無怖畏，身與道一，觸處泰然，何畏之有？儒者云，見大心泰，與此互相發。夫持經者出入無怖畏，皆自然也，非強制也。強制，則告子之不動心，終非見道。自然，則夫子之不惑從心，孟子之不動心，皆與此經義同。善乎，兩教之言心學曰，如如自然，巍巍不動，神化之道具是矣。若勉強把捉，不需自化，持之不永。效之欲

速，雖不怖畏，亦非此經義也。

應驗品續二十七章

持是經人，名良醫身，善行妙法安樂人故。

持是經人，不但名大道身也，名良醫身。醫者，宜也。藥與病宜，除其故障也。世醫察形辦理，愈人之疾，拯人之急，以藥去病，利人之生，有神聖工巧之名。真持經人非世醫也，無凡醫也，不言海上之方也。金針默度，名良醫身。善行妙法，人生氣質，雜揉者衆，氣失其平，有生來之疾，有有形之疾，有無形之疾，有一身之患，有一家之患，有一國天下之患，有一世之患，有累劫之患。疾苦牽纏，相循無盡，父母所不能訓，聖賢所不能化，王法所不能禁，醫之無藥，救之無方。持是經人不詭異，不強瀆，妙用適宜，良法當可，不苦口、不逆耳，不違汝心，不累汝身，不強人以難，不詭隨以縱，善行妙法。安樂人故，妙法一行，聾者開聰；再則盲者目明；三則瘖者能言；四則跛

痾積速起行；五則久病痼疾，一時復形；六則髮白返黑，齒落更生；七則老者壯，少者強；八則婦人孕，鳥獸胎，已生、未生，皆得生成；九則地藏發泄，金玉露形；十則枯骨更生，皆起成人。消一切災，度一切厄。魔異冤債，永不侵凌；九祖六親，往劫、未來，人我安平，幽無對繫。物阜身輕，不但起人之沉痾，抑且消變於未形。誠勿藥而有喜，永保命以延生，非一方一技，安樂人一身之醫。天醫最良，衆生慈父，善行妙法，安樂人者矣。夫此經登真之大道，淑世之奇方。人人本有，自迷不悟者也。善持真經有得，宜濟世矣。何末代自私念起，稍得一二，不慈人物。如秦越肥瘠，兩不相關，始不教世，終以自快，暫明復蔽，不能成道，甚可惜也。噫，知經不度世，非也。不知強以為知，好為人師，妄自傳度，又大過也。能除二病，勉力了明此經，斯可以普度。

應驗品續二十八章

持是經人，名光明身，常為帝光所攝受故。

持是經人，不但為良醫身也，名光明身。人性虛明，無所不照，氣拘物蔽，昏掩其明。真持經人性天朗耀，心地開通，光明常顯，命蒂精融，如太虛之無雲，如日月之代明，浩然充塞，盛大流行。誠光明身，非污暗者也。常為帝光所攝受故。帝，玉帝也。帝光普照，無所不及。人自卑污，難以承受。今持經人履踐天光，丹耀金庭，宇泰定而天光發。上帝昭格，光映玄空，持經仰受，太和景明。帝光攝入，保護持經。持經蒙化，永保常清。光明交映，持經之人。信與天合德，日月合明。嘗聞天道下濟而光明，本無私親。人受天之明命，本大光明。然性本無染，心貴虛明。人貪欲樂，不能使靈臺無物，如日月薄蝕，雲霧蔽空。若不文其過，絕欲還理，一時之暗旋即廓清，四通八達，明者益明。天光

有不煥，帝光有不臨，未之有也。人乃自暴自棄，念頭營營，晝作夜息，心無少停。為者既妄，念復不清，與天相悖，故昧真經。稍然有覺，過成業生。罪報森然，輪受不輕。不能速改，以辭文之，則天不可欺，神不可瞞。人之視己，如見肺肝。此性何在，忍欺心若是也。所以天命之佑，帝光祥護，必在真持經修道成真之人。真持經名光明身，為帝光所攝受也。噫，人一也，明德同也。人何不持經盡道，克當上帝之心？

應驗品續二十九章

持是經人，名自在身，天宮妙境神能遊故。持經功德，說不可盡。

持是經人，不但名光明身也，名自在身。三灾、四殺、五行、六害、七傷、八難、九星厄、十惡業，一切無牽，永除業根。證三元，空五蘊，離四相，絕百非，除萬有，超載劫，真解脫大自在身。天宮妙境，神能遊故。是持經人，玄功如意，身得自在。凡諸天宮，一切妙境，碧路瑤階，虬墻彩

壁，玉京金闕，紫府黃房，瓊樓玉宇，閬苑瑤池，玄都上境，秘院丹臺，寶林香徑，神室絳宮，法橋錦檻，皓殿赭庭，及瑤草琪花，冰桃雪李，交梨火棗，丹饌瓊漿，道光玄瑞，彩霞雲祥，神輿法駕，法寶天人，諸品奇英，神遊定觀，悉歷勝遊，非常人所及。持經功德，說不可盡，甚言功德大也。

夫所言持經功德種種，人物幽顯存亡今昔，一切並利。邪魔伏，帝光臨，神遊諸天，尚言不盡，則功德無量矣。說經至聖又何如哉？噫，經功最大。當至誠永持矣。

應驗品續三十章

又若道士志人，能結壇誦經，着新淨衣，於夜半後闐闐字真形，作闐非也寂之時，獨處清淨室，叩齒九通，東向端坐，誦詠是經。於是時也，天真御几，玉妃拂筵，萬神班列，諸天臨軒，三界侍衛，五帝司迎。

持是經人名十二功德身，慈濟無窮矣。又若道士志人。道士，脩道入

玄之通名。志人，有志之人也。或作至人，非也。蓋得道成真，方名至人。觀經者，但以後有天真玉妃，萬神諸天，三界五帝，御班侍迎等句，以為當作至人看。不知經是帝勅，所在諸神供衛，遇持誦者，即愚夫凡婦，衰叟蒙童，神敬是人，如奉是帝。持經誠敬，福德無量。怠慢則咎殃立至。諸神侍迎，敬其持真經，不必至人，況結壇新衣，夜半靜室，叩齒東坐，此學者誦經之常規，非所以論至人，故知為志人無疑。能結道法，壇場諷誦此經，着新作潔淨衣服，於夜半後闐闐苟曲二音，大昧時也寂之時，獨處清淨室中，叩齒九通，面東向，端身定坐，誦詠是經。於是時也，於是志人如法清淨誦經之時。天真御几，諸天至真，臨御法几玄案。玉妃拂筵，靈妃玉女，拂清法筵。拂，蕩也。欽敬清肅之意，非拂逆之拂。筵，法席也。萬神班列，世間帝王勅令所在，羣臣班列。皇經為玉帝秘言，元始法旨，志人持誦，即讀宣帝

勅一般，萬神悉皆班列拱奉。諸天臨軒，一切諸天帝真法駕臨軒。軒，玄案也。三界侍衛，三界，天界、地界、水府界。三界諸神將吏、侍列護衛。一云，志人誦經。三界，當作天、地、人。然夜半靜室，定無人在。為天地水部三界無疑。一云，欲、色、無色三界，亦不是。五帝司迎，五帝，五方五靈五老上帝也。一云，五嶽尊帝也。以前有萬神三界字，中有五老，此當作五嶽萬神。三界中有五嶽，此作五老是也。經中有五老啓問，故開經，五老司迎道祖。司，主也，承也。迎，迓也。覲禮虛皇之義。一云，司迎，持經之神昇玄，亦是。夫觀誦經之虔，諸神備護，則不誠。諸神鑒報，必有之矣。見聞經者，當凜然恭持，不見聞者當惕然求遇。嚴若諸神之臨，不求應見之效。無思無為，密密持真，一身之神，森然永保玄真經矣。勉之勿怠。

應驗品續三十一章

又能閉目靜思，存想是經，不覺身處三色雲氣之中，俄見其身光明赫奕，上昇天宮，衆真下迎，心有所請，一切應奉，仙丹妙寶，隨意自得。宜當依科，冥心奉行。

不但虔誦是經，得諸神護，又能閉目靜思五蘊之害，色為第一。色之亂心，目實受之。奉持真經，身心宜淨，閉目以靜，心自大定。然道之玄微，非思不入，妄思又所以亂真。閉目靜坐，不見可欲，使心不亂，默嘿思索，密入深機，此誦經之大要也。今言靜坐者，兩目半垂簾，不全閉，恐作鬼窟活計，不知陰趣禱念，是曰鬼窟。若心清淨，閉目何害？時人心不決烈，閉目疑生，故半開眼，不着睡魔疑心耳。若善惡兩忘，無無亦無，真道自入，閉目何妨？垂簾之論，玄師防無志者魔惑耳。且半垂簾義，閉目不觀，內有真照，心法惺惺，光明不昧，如垂簾聽政，雖不觀看，當應者無不周知也。此修道之

機括，故論經而併及之。存想是經，此存想不是招攝經中景象功效，對此法品，如見玉帝，念道思真，不敢輕易。徒口誦經，靜存此心，密密研窮，經中至理。體之身心，云存想是經，不覺身處三色雲氣之中。雲氣蒸成於天地。思經大定，與天心合，念念真善，慶雲廼生，不覺身處青黃白三色雲氣之中。心身靜正，龍虎蟠旋，故有是三色雲。若修真成則五色雲擁，九霞光泛，又不同耳。俄見其身光明赫奕，上昇天宮，衆真下迎。俄，少傾時也。俄見身光煥發，盛耀炳蔚。餘解見前。心有所請，至天宮心有所請求。一切應當奉獻元妙寶，隨意皆得。一切應當奉獻元始玉帝仙丹妙寶，隨意請求，自然皆得。不可言求寶，應奉自身。宜當依科，宜當遵依科教。冥心奉行，解見前。夫經本人性之真，默悟永持可也。以存想言之，似落第二義。儒書云，恍惚不見之圖，儼然無形之視。又云，洋洋乎如在其上。豈亦

第二義乎？噫，上智者少，中人最多。若不操存，求不聞之亦式，焉能盡人合天，超凡以入聖耶？學者思之。

應驗品續三十二章

此經乃至三世金仙、十方大聖，皆從此經，依科修奉，故得超證無上妙道。是茲玉帝，諸天之師，衆聖之王。

此經不但持誦志人，當依科奉，乃至三世金仙，過去世，見在世，未來世。

金仙，金丹不毀，太玄真仙也。十方大聖，四正方，四隅方，上下方，十方靈寶尊神，至真無極大聖，皆從此經，依科修奉，解見前。故得超證無上妙道。進脩不同，成就各異。證道階品未至，不為無上。如神、人、地、鬼等仙，如欲、色、無色天神，如菩薩、聲聞、羅漢、佛乘，如化、大、美、信、善人、賢者等儒，皆非其至。如天仙、文佛、聖不可知，神、儒方名最上。金仙大聖，依科專奉此經，與帝真合，故得成最上仙，超脫高證無上至真妙道，不落諸天福德之果。

是茲玉帝。茲，此也。諸天之師，十三天，三十六天，萬二千天，三千大世界，一切諸天，皆從《皇經》而證大道。玉帝廼諸天之師，化成衆真者也。衆聖之王，諸仙，諸儒聖，諸佛，諸天，諸神，一切衆聖，脩讓其德，度讓其功，證讓其尊，浩劫欽崇。衆聖之王也。噫，人有天君泰然，則道可得。若不脩心了悟，與天合德，虛崇上帝，抑過矣。戒之思之。

應驗品續三十三章

是故凡夫值遇是經，精一修奉，乃至五帝輔翼，召使羣仙，御役神官，運導陰陽，千靈敬仰，萬神攝伏，百邪避路，羣魔束形，命過之後，即得南宮受鍊，飛步上清，逍遙自在，與道長存。

不特金仙大賢，從此經證道也。是故凡夫值遇是經，世間凡夫，因緣際會，值遇是經，精一脩奉，精誠專一，脩持崇奉。乃至五帝輔翼，五老上帝，不指五嶽，輔助其進脩，翼加其不逮。召使羣仙，御役神官。召使，令而使之。羣仙如命也，御役，制而

驅之，神官供役。經云：脩道志人，中可以役鬼驅神。雖凡夫精一持經，伏道法力，自能召仙役神，運導陰陽。惟精惟一，允持此經。自以幹運造化，開導陰陽，千靈敬仰，千靈恭敬瞻仰。萬神攝伏，攝，驚畏心服。伏，斂神默伏也。萬神攝伏，不待作持。百邪避路，百邪遠避道路，不敢觸犯。羣魔束形，諸魔束斂其形，不敢顯露。命過之後，解見前。即得南宮受鍊，南宮，朱陵府，度魂鍊魄之官也。受鍊，受南宮鍊度也。飛步上清，飛神步上清天界，此非上清境，但言昇天耳。逍遙自在，不經地獄，不受業報，無拘無繫，自在逍遙。與道長存，初受持經，雖非至真，精一脩奉，心契於道，無滯無牽，魂神清淨，不復毀淪，與道長存。此道典之所謂死而不亡，佛經之所謂一悟便了也。夫一凡夫精一持經，其驗如此，則知至誠之功效。雖下愚，亦可以盡道也，觀者勉焉。

應驗品三十四章

又復世間衆生得聞是經，心生渴仰，能於家庭擇清淨處，畫帝尊像，日夜虔度，晨香濟濟，香花燈果，尊重供養，稱讚聖號，瞻禮誦經，是人當得三十種上妙功德。

一者諸仙讚重，二者先亡生天，三者宿殃解脫，四者所往通達，五者無盜賊事，六者所求遂心，七者除水火厄，八者橫事潛消，九者夜夢吉祥，十者疾病不侵，十一者智慧聰明，十二者人見歡喜，十三者衣食豐盛，十四者子孫榮貴，十五者六親見喜，十六者門族和睦，十七者除三惡報，十八者轉女成男，十九者形容端嚴，二十者爲國大臣，二十一者生爲帝子，二十二者鬼神欽仰，二十三者得宿命通，二十四者諸神護念，二十五者九族受蔭，二十六者處世長年，二十七者有情賴善，二十八者魔王保迎，二十九者決超三界，三十者白日上昇。凡夫精一修奉此經，存亡大益矣。又復世間衆生得聞此經，心生渴仰，

如渴得漿，仰感極切，能於家宅庭堂，擇清淨處畫玉帝尊像，日夜虔度，誠破懇篤。晝夜不怠，晨昏滄濟，齋揚祇奉，早蛻鍊二，香花燈果，尊重供養，稱讚玉帝聖號，瞻拜禮誦此經，是人當得三十種上妙功德。

一者諸仙讚重，讚歎欽重。二者先亡生天，先亡安觀，悉生三界。三者宿世業殃解脫，永不牽纏。四者所往通達，向往進修，悉得通達。五者無盜賊事，永不遭此。六者，所求遂心。求謀盡遂。七者除水火厄難。八者橫事潛暗也。消。九者夜夢吉祥。十者，疾病不相侵，十一者智慧聰明，十二者人見歡喜，十三者衣食豐足，隆盛。十四者，子孫榮貴。子孫榮貴非必榮華富貴，賢而清不惡賤夭便好。十五者，六親見喜。十六者，門族和睦，十七者除三惡業報。十八者，轉女身成男。十九者，形容端正威嚴，二十者，爲國大臣。二十一者，生爲帝王之子。二十二者，鬼神欽服瞻仰。二十三，得宿

命通，宿業盡，命大通利。二十四者，諸神護念，護持讚念持經奉玉帝之人。二十五者九族受蔭，九族，高、曾、祖、父、己身、子、孫、曾、玄，一云，父三族，母三族，妻三族也。二十六者，處世長年。二十七者，世界有情，賴其善功，二十八者，魔王保舉迓迎。二十九者，決超欲色無色三界。三十者，白日上昇。諸仙昇化不同，非必白日肉身昇天。體同太虛，神遊玉京，是白日上昇。尊經敬帝，雖有此功，先要絕盡秘欲，不求效驗，亦不間斷，心與天合，然後有效，即無效，亦不害爲善也。若一覲效，非善傳帝經矣，觀者辯之。

應驗品續三十五章

爾時天尊復告四衆曰：此經功德，能碎鐵圍諸山，竭苦海水，破大地獄，拔諸罪苦，降暴惡魔，護諸國土；能滅一切惡鬼，能除一切重病，能解一切惡毒，能離一切惡人，能伏一切毒獸，能摧一切邪道，一切諸天，皆自尊敬。其餘功德，說不可盡。

尊經敬帝，功德有三十種。爾時，天尊復告四衆曰：此經功德，能碎陰、鐵圍諸山，淨盡宿塵。竭苦海水，迴頭登岸，苦海波乾。破大地獄，屏息妄緣。拔諸罪苦，絕斷業根，永無罪報。降暴惡魔，降伏剛暴猛惡邪魔，禁橫逆邪妄。護諸國土，悉使清寧，富國安民。能滅一切惡鬼，除滅兇惡陰鬼，除陰惡趣。能除一切重病，除盡諸染。能解一切惡毒，解除世諸惡毒，解身大嗔惡毒。能離一切惡人，或不相遇，或惡人見我，彼即遁迹。能伏一切毒獸，馴伏世諸毒獸。又脩真之人，陰氣化諸毒龍猛獸、巨虬獅子，各百億萬衆護我真經，令自馴伏，永護於我。能摧一切邪道，摧破世諸邪道，摧己邪妄迷執。一切諸天，諸界諸天。皆自尊敬，自然尊敬此經。其餘功德，說不可盡。解見前。

此經功德，消難消之變，除難去之毒，無所不化，無所不利，大方便、最上法品也。雖至聖之微言，實

性分之能事。勉之，則功自成。

應驗品續三十六章

爾時道場大衆、金仙菩薩、真聖眷屬聞是說已，歡喜踊躍，稽首敬禮，而作頌曰：

大哉至道，無宗上真。上度諸天，下濟幽魂。上無師祖，惟道爲身。丹臺紫府，金闕玉京，秘此妙法，溥福含靈，滅我萬罪，增我遐齡。萬神朝禮，魔王保迎。功德昌盛，黃錄書名，渺渺億劫，使我長存。于時會衆說是頌畢，稽首皈依，奉辭而退。

爾時道場大衆。道場，敷道之場也。

金仙菩薩、真聖眷屬聞是說已，說經已竟。歡喜踊躍，騰歡鼓舞之意。稽首敬禮而作頌曰：大哉至道，大不可量，至不可及。無宗上真，無本無始，最上至真。上度諸天，化遍於上。下濟幽魂，化徹幽冥，滯魄盡昇。上無師祖，無師無祖。惟道爲身。頌讚此經，以道爲身。丹臺紫府，太玄妙境。金闕玉京，解見前。秘此妙法，秘，珍藏也。溥福含靈，

遍福一切含靈。或以福作溥度。滅我萬罪，經能滅一切罪。增我遐齡，經能延年。萬神朝禮，欽重此經。魔王保迎尊持經者。功德昌盛，功德盛大，周遍悠長。黃錄書名，玄都仙籍，金簡黃錄以書其名。渺渺億劫，渺渺寥廓，遼遠億數多劫。使我長存，使持經有道者長存。于時法會真衆說是頌畢，稽首皈依《無上玉皇本行集經》，奉辭至聖而退。

高上玉皇本行集經卷下

玉皇心印妙經

當附此，不當書半板後。先列補闕纂，心印續後。

至心皈命

金闕玄穹主，主一作祖字。高上玉皇尊，至尊也。諸佛聖師，諸佛從此經悟道，故玉帝爲諸佛師。萬天帝王，統御萬天。演三卷五品之妙法，上中下分三卷，玉帝化三身，故經三卷。五品，神通、神咒、功德、護持、應驗等品。周十號萬德之洪名；窮

蒼真老至大慈仁者爲玉帝十號。經讚玉帝，萬德周身洪名最大真名。放十七大光明，大神通光，至無能勝光，爲十七大光明，玉帝光無量，稱不盡，就諸神之能稱者十七。示三十種功德。示人，以尊經敬帝，得諸仙讚重，至白日上昇，三十種功德。拔度生死，利益存亡，脫其業趣，增其福果。運化古今。化盡往古來今。一萬二千三十六字，即《易經》大衍之數。洞玄靈寶解見前高上玉皇本行集經。

夫此經探之無始，莫知其先；推之無終，莫知其後。大包三千大千，莫知其大；細入塵沙渺冥，不見其小；覆盡諸天，不知其高；利盡諸地，不見其下；福度一切人物，不見其繁；包諸法，括萬有，不見其雜。任劫數昇沉，無分無合；任化機推遷，無間無緒。消盡邪魔，不示神通；度盡迷執，不見勞費；化無窮，不恃功德；普仁慈，不拘品類。究之無際，稱之難窮。誠三教之真宗，浩劫之永寶。要之，爲吾性之固有，天命

之本然也。一切人物，至誠脫悟，全得經功，真得之基，存乎一心。因附《心印》。

皇經集註卷之十

玉皇心印妙經

此玉帝傳心，聖聖相承，以心印心，明悟了證，皆宗此旨。三教莫違，故云心印。

上藥三品，

最上妙藥有三品，即三般。

神與氣精。

非金石上術，靈芝玉屑，及外藥凡藥，乃元神、元氣、元精。凡藥可以愈疾，所及有限。此藥保劫度世，化濟無窮，一切莫此，故云上藥。

恍恍

似有非有。

惚惚，

似無非無。

杳杳

似遠非遠

冥冥。

似近非近，若不見聞，似有見聞。

存無守有，

秘存虛無，默守妙有。

頃刻而成。

上藥一得，立躋聖域。

迴風混合，

迴旋異風，混合百神。

百日功靈。

三月基就，功漸玄靈。

默朝上帝，

字泰貞定，秘禮元皇。

一紀飛昇。

十二年丹神飛昇。一云歷脫十二相

屬乃昇。

知者易悟，

真知者易悟上藥之基。

昧者難行。

愚昧者難行存守之義。

履踐天光，

字泰定，天光發，而足躡天根。

呼吸育清。

真炁往來，滋育玄清。

出玄入牝，

知天谷元神，而出玄入牝。

若亡若存。

不散亡，不强存，若亡若存。

綿綿不絕，

默默綿綿，終始不絕。

固蒂深根。

性根命蒂，妙培深固。

人各有精，

各人皆有至真真精。

精合其神。

真精妙合元神。

神合其氣，

元神妙合真氣。

氣合體真。

元氣妙合吾體至真。

不得其真，

不得身之至真。

皆是強名。

自云得藥，便是強名。

神能入石，

神入金石無礙。一云穿山透石無不

到之謂也。

神能飛形。

煉神還虛，身自飛昇。

入水不溺，

有道者水不漂溺。一云諸欲不染為

不溺。

入火不焚。

有道者火不能焚。一云怒妄不生為

不焚。

神依形生，

形成而神至，故云神依形生。

精依氣盈。

氣滿則精全，故云精依氣盈。

不凋不殘，

神氣精全，系無耗散，而不凋不殘。

松柏青青。

永無衰變，如松柏青青。

三品一理，

三品上藥，共根一理。

妙不可聽。

重玄至妙，非可聞聽。

其聚則有，

善存默守，妙聚則有。

其散則零。

妙意渙散，倏忽凋零。

七竅相通，

耳目鼻口真七竅，內為相通，一云，

七竅在內。

竅竅光明。

風雲發洩，竅竅光明。一云，各有天光寶明。

聖日聖月，

身之真陰真陽，永明不毀，故云聖日聖月。

照耀金庭。

光映丹臺紫府，云照耀金庭。

一得永得，

真得實益，永不毀淪。

自然身輕。

身輕回陽換骨還虛，非徒體健也。

太和充溢，

太和真氣，充滿洋溢。

骨散寒瓊。

黃中通理，骨竦神怡，畢落瓊琳，金

筋玉骨。

得丹則靈，

明藥得丹，易凡而靈。

不得則傾。

不得正丹，梁喪身傾。

丹在身中，非白非青。

非肺白，非肝青。

誦之萬遍，

默轉真經萬遍，非口誦也。

妙理自明。

此經妙理，召然明白。

無上玉皇心印妙經

回向懺悔文

回心向道，重誠懺其前愆，悔而自新，不作後過。

龍章鳳篆，已殫盡也歌詠之誠；鶴駕鸞輿，重冀望也鑒觀之惠。臣謹炷真香，丹誠天香也。重誠奏啓道經師寶，元始萬神，玉光會中一切聖真。恭望恩光，重垂證鑒。臣向來為某人某事看誦《玉皇本行集經》幾部，敬保某人某事云云所宣經典，罔敢不虔。其奈業力障魔，神志錯亂，所立根鈍，自然想來，脫略混淆，顛倒重叠，臨文徇意，字誤句差。乖清濁之正音，泥解會之邪見。事奪其志，心不在經。問對起居，斷絕隔越。久誦懈怠，因

事忿嗔。嚴潔或涉於垢塵，肅敬或乘以瀆慢。身口服用之不淨，衣冠禮貌之不虔。供弗如儀，處非其地，卷舒揉亂，墜落脫傷。不專不恭，大慙大愧。伏願慈悲憐憫，赦釋罪愆，庶使誦持得臻感格。所祈所願，如志如心。尚慮經中傳授或誤，刊寫多訛。其師其人，悉皆懺悔。仗道威力，願罪消除，常轉法輪，普度羣品。為如上衆，稽首稱念太上無極大道，至真三十六部尊經、真文寶符，太上三尊、十方衆聖、玄中大法師。玉經中無鞅數衆神仙，不可思議功德。

高上玉皇本行集經懺悔文

(丁培仁點校)

093 太上無極總真文昌

大洞仙經

經名：太上無極總真文昌大洞仙經。原題甘山摩維洞主校正。據序文稱，乃南宋乾道戊子（1168年）文昌君降授道士劉安勝，景定甲子（1264年）秋道士羅懿子重校正。歲在攝提格（1266年）繡梓宣行。係模仿《上清大洞經》及《靈寶度人經》編造。五卷。底本出處：《正統道藏》洞真部本文類。

太上無極總真文昌大洞仙經卷之一

九天開化主宰澄真正觀寶

光慈應更生永命天尊序

甘山摩維洞主太玄無上

上德真君校正

予之居事畎澮，忽於鋤下得一金像，詢之父老，曰：乃元始天王相。昔夏禹理水，冶金為像，以鎮方嶽，予香火奉祀，未嘗少懈，因海風翻浪，人力不可支，予為衆捨金像投駭浪中，由是風潮遂回，一境獲安。思憶之久，一夕沙磧中有光亘天，掘之，再得舊像，歸築宮安奉，同邦人共事之，積年靈感，不可勝紀。予考妣不幸死於瘟疫，予葬廬墓，培壅周隅，有三神人乃真定光，鬱羅翹，光妙音三真人葛巾羽褐芒鞋訪予，以《大洞經》一帙賜予，曰：晨夕誦之，必獲善果，於三才中，上可以資奉父母祖族魂靈，出離幽苦，中可以滅罪消災，延年益福，下可以庇族救人同獲保全，汝

可捨金寶拜吾三人，吾為奏傳。予即日依命設齋，貢金繒，奉師受之。爾後晨夕持誦不輟，屢獲靈感，因盛暑洪水齋浸考妣墳墓，予禮奉金像，誦《大洞經》，期以千卷為終，以保無虞。次年秋雨霖霖，傍谿湧漲，數流為一，予益恐，及水落視之，則墳前谿谷變成堅壟，廣一里餘，自是松楸無害。予嘗思父母死於疫疾，恨瘟鬼之害，切骨為讎，幽明路殊，力不能報，每旦夕勤誦《大洞仙經》，虔懇金像，願賜威力，以治瘟鬼。又三年，忽夢金像語予曰：《大洞仙經》汝熟記矣，《大洞法錄》爾未見也，今當授汝，以治邪魔，非惟可以契汝初心，亦可以佐天行化，助國救民也。袖中出書二件，予百拜受之。一曰《大洞錄》，二曰《大洞法》。既覺，此二書在枕前，因設齋置甌收貯，擇日出而閱之。讀至大洞天騶甲卒一萬人下度之句，忽風雷晝暝，金甲朱綬者無數，列於予前，俯而請命。一人執紅旗立於衆先，曰：願聽使令。予方恍惚，不覺厲聲謂之曰：吾要汝等往治瘟

鬼，此鄉某家合門病瘟，爲吾驅來！語畢，一持旗者，領百餘人入其家，俄頃執鬼使五人而出，有蒙虎皮者，冠雞雄者，貌若人者，若烏鴉者，若驢馬者，所執皆水火羽翼斧鑿之具。予怒而叱之，將滅其形，彼乃詞曰：弟子等歲運所生，歲炁所成，所遊有方，所病有人，陰譴至者受其災，天命絕者致其死，亦非弟子所敢私行。始自三官五嶽上奏玉帝，呈世人罪狀，由是帝命行下三官五嶽行病，年王案分給牒分遣，某等一依定籍施行，若蒙真官賜以寬貸，自後願遵約束，遇有行瘟，見真官符錄所在，即不至矣。予因依經法授以教法而去，閭里病瘟者，予與之符法，皆得全活，予因此法錄救人病疾衆矣，名聞遠方，士庶官吏踵門求治者，不可計數。予積玄功妙行，皆由持誦此《大洞仙經》，而獲《大洞法錄》，故能全收神效，立正除邪，濟生度死，消災延壽。其後冥冥中有大力鬼神、社廟英爽來求予誦經回施者，皆謝云：乘真官經力，增助威德遷神善籍矣。或有沉魂

滯魄不得往生者，託夢附形來求予誦經資薦者，皆謝云：乘經力已出苦趣，俱得更生矣，應遇天行時疫，侵染不止，但誦此經，行錄法中遣瘟符、絕瘟符、止瘟符、天騶甲卒已上收瘟食瘟吏、收毒食毒吏、收邪食邪吏、收炁食炁吏、收鬼食鬼吏、收殃食殃吏、收精食精吏、治病神醫吏、誅符破廟吏等九部，各領甲卒，及北方黑騎天官五億萬騎、蒼老麻姑金剛力士等收捕之，先牒年王，次申岱嶽，分委城隍社令，劄遣瘟疫使之，若拒正不伏退散，聞經不依盟約，然後奏而滅之。

夫大道尚慈，太清常善，上帝好生，推仁止殺，行經法錄者，不可循私苛暴，以招天譴。但以禮遣之，以經奉之，以法錄威之，以善功勸之，亦方便修行之捷徑也。行此經錄法之士，宜在詳酌，以立玄功，此經尊重，能解冤結，除冢訟，止譴罪，釋咒詛，解觸犯，安墳宅，寧軍府，息兵甲，止疫疾，祈風雨，降祥瑞，致蠶穀，保形命，庇族屬，救邦社，安邊陲，禁蟲虎，止旱澇，滅妖

怪，息群兇，安奉祀典鬼神，資薦先祖魂識，拯濟窮魂滯魄，皆可設齋誦經行道以禳謝之。其餘治病馘毒，有紫庭天醫神方，乃禹皇金后之餘恩及乎萬世，使人無夭橫之傷，時免札瘥之患，奉教之士，當尋訪受習，以取仙功。

予曩生吳會，以此經功，位證梵鎮如來，厥後誦持不替，證果太上不驕樂育天帝、澄真正觀寶光慈應更生永命天尊，由誦經之勤，遂獲上清之貴，可不深加尊敬而授之乎！得受誦者勉而行之，願同文昌一會中人齊登妙行。乾道戊子秋降于鸞臺，劉安勝捧。至景定甲子秋再降，重校正于鰲頭山摩維洞，金蓮石著儀壇，羅懿子捧。繼後歲在玄默攝提格菊月重九日，再降書于西陵桂巖衛生總真壇云：《度人經》、《大洞書》，諸經之祖，黍米珠、蒼胡寶，衆聖之源，斯二經者，同出而異名，生天立地，孕玄分元，非誣民惑世之言，乃入聖生神之要，主持造化，斡旋樞機，言無韻麗，曲無華宛，故爲玄奧，難可尋詳，真上天之所寶也。自無

極迄今，詎容缺焉。世人惟知誦《度人經》，而不知誦《大洞經》，蓋《度人經》予曾作頌以美其意，《大洞經》未之有也，今命侍化諸子繡木宣行，予亦當作頌以彰其德，庶幾觀者易曉，誦者易悟也。

叙經意

始自蒼胡檀熾音，結雲成篆度天人。
太玄道父親求授，下世方聞大洞經。

修真道

大地凡夫學悟真，僊源路杳實難尋。
欲知捷徑無差錯，口誦心持大洞經。

祈祿嗣

宗祖前生善力輕，今生祿嗣頗艱辛。
禱祈欲得如君意，何似勤看大洞經。

弭天災

日月無光苦併吞，星辰錯度紊天文。
上消天厄寧凡庶，至土同宣大洞經。

祈風雨致田蠶

旱魃爲災雨若金，蟲蝗水澇穀無成。
普教豐稔無饑饉，祈禱全憑大洞經。

化凡庶

工賈農商與四民，貪求不覺業隨身。

忙中好割閑心力，習誦文昌大洞經。

寧府庫息兵甲

府庫資財甚滿盈，兵戈永息樂昇平。
民歌有道圖長治，報國勤看大洞經。

安奉鬼神

社廟神祇與百靈，欲求陞擢蓋無因。
遷名善籍增威力，旦暮須聽大洞經。

薦先祖

眷屬宗親父母魂，久留地府不超昇。
欲思薦拔緣無力，齋戒勤看大洞經。

除冢訟

冢訟徵呼累後人，又兼譴罪在天庭。
生生世世遺殃咎，解止宜看大洞經。

解觸犯安墳宅

或爲營修與築墳，興工動土犯凶神。
致令宅宇多災咎，解息宜持大洞經。

除瘟疫

行病年王統五瘟，遍州歷里害生民。
保全鄰簇無傳染，嚴潔同看大洞經。

治疾病

月厄年災久染身，尋醫問卜與求神。
不能解離無門告，命道皈依大洞經。

拯濟沉魂滯魄

六類冤親男女魂，冥冥漠漠在幽陰。
普告受煉生天界，好與頻看大洞經。

解冤結

六道冤家結得深，冤冤相報幾時停。
欲令各各生歡喜，除是聽聞大洞經。

止咒詛

或爲爭財或爲嗔，一時忿怒叫神明。
結成鬼訟何時了，解雪無非大洞經。

息羣兇

疾病喪亡不離身，官災盜賊苦侵凌。
財消物散如冰雪，保佑當持大洞經。

滅妖怪

木石狐狸猴犬精，拋磚放火現人形。
作威作福求淫祀，殄滅宜看大洞經。

開心志啓聰明

士子儒生茅塞心，神童應對不聰明。
揮毫欲得如神助，先好常持大洞經。

保形命

如幻如泡是此身，氣精神裏好修真。
保全形命同天在，熟玩文昌大洞經。

戒富豪

莫恃家豪積萬金，天司奪祿易危傾。
有時正好修功德，割己刊行大洞經。

述應驗

一片真心達上清，感通得授自三神。
此身位證天尊果，只爲勤看大洞經。

普勸二頌

聽我重言大洞經，斯文玄奧果難名。
無邊功德莫思議，普勸凡夫不可輕。
元始天王說大乘，有緣方遇此尊經。
若能終始勤修誦，共作文昌一會人。

清河老人頌節要

三洞諸經貴玉音，文章錯落粲珠金。
攘灾辟厄生天地，度盡塵沙無鞅人。
大道施張結洞文，濟人利物極無邊。
凡胎欲作飛昇客，爲我清心讀妙篇。
道本無聲豈有言，聖人立法強傳宣。
求魚須是因筌力，獲得魚兒豈用筌。
元始初傳大洞經，一音初出衆知聞。
法燈自許時人續，不但天尊與道君。
神風靜默海無雲，天地澄閑四氣清。
若使一緣纔妄動，璇璣又是不停輪。
日吉時良好誦經，世間萬慮勿縈心。
濟人利物功成也，玉簡金書爲記名。
不無不有本純真，非色非聲絕等倫。

模寫形容難到處，玄中位象甚分明。
位極無无最上真，始乎龍漢迄于今。
不增不減爲清靜，是則名爲大法身。
諦觀符命自維宣，能釋幽牢罪苦纏。
返本還元扶起命，人人時刻得昇遷。
罪垢皆由心境昏，三塗五苦累形魂。
天光一洗根塵淨，仙化朝元禮至尊。
漸入無爲得道宗，一塵不染意圓通。
回眸下視三千界，萬法都來一箇空。
無影無形大法身，不生不滅號成真。
幾經劫石消磨盡，寂寂神光依舊明。
歷盡關山道路辛，這回金榜喜題名。
男兒志氣誰能禦，駟馬榮歸自在行。
學道須憑慧力多，清江毋或漲風波。
融心直入丹霞外，滿目戈矛奈我何。

九天開化本願經序

北府樞相集福真君作

此經乃太上金口宣說，無非爲救
末劫設也。自說經畢，即奉玉旨，付玉
宸內殿收貯。併勅下諸天演化，衆真
照此傳行。於是諸壇傳降，迨已八所，
獨紹熙靈應，鳩衆鋟梓，餘則謄寫轉誦

而已，鼎之民好善，優於諸郡，大帝開
化，莫甚於此邦，吾主香火，亦近十餘，
然純一不雜，終始無怠，惟文昌靈應，
頗嘉於此而傳降焉。且勉善信刊板印
施，今幸告成。噫！凡顯名青編而受
此經者，豈非欲生之徒，求免兵戈疫癘
之苦者歟！予謂受經未善也，必誦之
而後可，誦之又未善也，必行之而後
可。行者何？孝悌忠順公恕是也，孝
悌忠順公恕非難，亦惟曰安本分三字
而已。吾言如是，可以消劫，疑之信
之，吾何有焉。

持誦禮法

凡誦經，當齋沐，服清淨衣，入室
焚香，叩齒九通，心拜九天，存想元始
天王與諸高真，七曲大帝開化仙官，迂
臨法會，皆列虛無，然後念咒。

淨心口神咒

丹珠口神，吐穢除氛。舌神正倫，
通命養神。羅千齒神，却邪衛真。喉
神虎賁，伸炁引精。心神丹元，令我通
真。思神煉液，道炁長存。急急如律
令！

淨身神咒

靈寶天尊，安慰身形。弟子魂魄，五藏玄冥。青龍白虎，隊仗紛紜。朱雀玄武，侍衛我真。急急如律令！

淨三業神咒

身中諸內境，三萬六千人。動作履行藏，前劫并後劫。願身常自在，常住三寶中。當於劫壞時，願身常不滅。誦此神咒時，三業悉清淨。

解穢神咒

太一之精子，束井之華卯，流灌身體午，蕩穢除邪酉，淨如明珠子，潔如蓮華卯，化金光身午，步雲錦霞酉，登七寶殿子，為真仙家午。急急如九天開化主宰元皇上帝律令！

淨天地神咒

天地混沌，穢氣分葩。洞中虛玄，晃耀太元。三清玉勅，光映九衢。八方威神，使我自然。靈寶符命，普告九天。乾囉怛那，洞罡太玄。斬妖縛邪，殺鬼萬千。中山神咒，元始玉文。持誦一遍，卻鬼延年。按行五嶽，八海知聞。魔王束首，侍衛我軒。兇穢蕩淨，

道炁常存。

淨壇咒

太上說法時，金鍾響五音。百穢藏九地，羣魔護騫林。天華散法雨，法鼓震迷沉。諸天慶善哉，金童撫瑤琴。願傾八霞光，照我皈依心。早登大法橋，翼侍五雲深。急急如律令！

安土地咒

元始安鎮，普告萬靈。嶽瀆真官，土地祇靈。左社右稷，不得妄驚。回向正道，內外肅清。各安方位，備守帝庭。太上有命，搜捕邪精。護法神王，保衛誦經。皈依大道，元亨利貞。急急如律令！

五星神咒

五星列照，煥明五方。水生却災，木德致昌。熒惑消禍，太白辟兵。鎮星四據，家國利亨。名刊玉簡，字錄帝房。乘鸞扇景，飛騰太空。出入冥無，遊宴十方。五雲浮蓋，招神攝風。役使萬靈，上衛仙翁。

發爐

無上三天真元始三炁太上老君，

召出臣等身中三五功曹、左右官使者、捧香驛龍騎吏、侍香金童、傳言散花玉女、五帝直符直日香官，各三十六人出。默想出者嚴裝關啓，此間土地里域真官令臣焚香誦經之所，金童揚烟，靈妃散花，三界真聖交集軒前。伏願某誦經之後，真炁周流，上以保全宗社，安奉帝王，禳兵戈水火之災，除疫病旱蝗之厄；中以祝延永命，保佑合門消九星八難之迤，免五苦三災之累；下以證道。次祈人民異姓，乘經法而萬福興隆，山澤含靈，感聖功而咸超道岸，庶使某疾患不侵，災殃掃蕩，思真慕道，延想丹華，滌慮澄心，以祈輕舉，濟人利物，立功為先，凡有所祈，克獲通感，天上天下，咸丐聞知。願得太上十方正真生炁下降，流入臣某身中，令臣所啓，速達無極大道三清上聖、昊天玉皇上帝、梓潼神文聖武孝德忠仁王、救劫大慈悲更生永命天尊御前。

集神咒

元始大真，五雷高尊。太華皓暎，

洞朗八門。五老告命，無幽不聞。上御九天，中制艷山。下鎮河海，十二水源。八威神咒，靈策玉文。召龍致雨，收氣聚煙。日月五星，北斗七元。合明天帝，敕下太玄，宣威三界，不得稽延。諸天諸地，諸水諸山。玉真所部，溟泠大神。仙王遊宴，大帥仗旛。天丁前祛，金虎後奔。獲天猛獸，羅備四門。所呼立至，所召立前。赤書煥落，風火無間。攝籙應命，金馬驛傳。

太上無極總真文昌大洞仙經卷之一

太上無極總真文昌大洞仙經卷之二

甘山摩維洞主太玄
無上上德真君校正

祝香

伏以祥風澤雨，鍾靈秀於五香，大德至仁，鑒精誠於一縷，可通無際之際，是名非烟之烟，憑此氤氳，普伸供養，一志惟恭，萬神遙鑒。願開金鑰，仰讚瑤章，伏願寶光分敷，梵音朗徹，死者受生，生者受度，無願不成，天之所覆，地之所承，有緣悉證，啓請有頌，謹爲舉揚。

各發無上至誠心，願入文昌祿嗣會。
皈依三寶諸祖師，惟望慈悲常攝授。

仰啓三清境，無上三境尊。元始大法王，大慈真教主。玉宸大道君，太玄真道父。仰啓大羅天，無上玄穹主。仰啓三清界，侍宸諸真衆。蒼胡頡寶珠，所結大洞經。妙道難思議，玉章生萬神。大慈元始尊，金像出地戶。化

現三神人，葛衣贈金寶。夢中袖二書，籙法並相授。變化顯文昌，隨願隨靈應。臣今淨三業，永斷血尸根。奉符入玉京，稽首黃金闕。一心頭面禮，元始大法王。惟願大慈悲，開受臣所請。願臣默想念，合符帝一前。越度仙黃庭，俱躋大漠外。七祖斷玄滯，受事會玉皇。願臣諷誦時，百靈皆會集。音徹通萬天，流響達九地。成就一切願，如經所稱述。從此漸進修，成道事諸聖。經筵諸孝友，金石矢初心。一禮一稱名，皈依七曲主。注想始青天，先天長壽母。注想紫雲巖，文昌真國土。後天慈父母，化現桂香宮。孝子及慈孫，列仙侍慈容。願受真信禮，放大如意光。隨心隨夢應，嗣祿互儲祥。願我侍慈親，生生榮鶴髮。願我逢聖時，步步榮寵渥。願我處生方，隨念如意光。願我善緣熟，學道早悟真。願我業垢空，惟心達淨土。普與人天衆，量緣證善果。金石一真心，真心皈帝君。諸聖諸天尊，心香同讚祝。願與諸經生，一心皈命禮。

至心皈命禮

玉清聖境，清微天宮，鬱羅蕭臺之中，森羅淨泓之上，現有爲之梵相，具無極之神通，敷演真玄，破無有色空之礙，拯提趣類，絕智愚高下之分，妙用難窺，靈機罔測，大悲大願大聖大慈無量度人元始天尊。

至心皈命禮

上清真境，禹餘天宮，紫微瓊臺之中，玄都玉京之上，接元始虛皇之統系，超西那玉國之根苗，入黍米珠，盡挹真玄之精粹，在香林苑，屢談秘要之筌蹄，妙德難思，神通莫議，大悲大願大聖大慈無量度人靈寶天尊。

至心皈命禮

太清仙境，大赤天宮，巍巍金闕之高，渺渺重霄之上，降生於無量數劫，說法於萬二千天，五千祕言，融三才之妙道，八十餘度，接六趣之衆生，聖德崇高，玄功廣博，大悲大願大聖大慈無量度人道德天尊。

至心皈命禮

紫金金闕，白玉玉京，住妙有之境

中，處玄真之天上，功成道備，故妙道卓冠於諸天，心廣體胖，故慈光遍燭於三界，位尊而上極無上，道妙而玄之又玄，真聖宗師，天人依仗，大悲大願大聖大慈穹蒼聖主玉皇天尊。

至心皈命禮

股肱佐漢，家世相韓，掉三寸舌而爲帝者之師，受一編書而作人中之傑，身不勞於汗馬，功已著於丹書，向遇黃石公，即根本神仙之地，後從赤松子，乃飛昇大有之庭，眷隆上相之尊嚴，位正天樞之鎮重，啓三洞真經之詳，演膺九光寶節之榮，褒萬古敷揚諸天贊重，大悲大願大聖大慈校經主宰、道高聖邁上上大德尊天帝法主道君天尊。

至心皈命禮

北上太虛無上常融天、寂虛玄梵境、太乙真慶宮、真玄上聖九天遊奕使、左領天罡北極右垣大將、太極真宗太玄慈父靈通大妙仙、八威九光聖執乾元帝、心印秉陰靈斗極符、總玄武右弼司判、左領聖府院、誓斷妖魔，救護羣品，匡扶劫運，統攝萬靈，威德無邊，

神通浩溥，巡遊十洞，檢察諸天，福佑孝忠，勦除孽害，至聖至神至帥鎮天真武治世福神、玉虛師相紫皇天乙真君、玄天仁威精微上帝金闕化身天尊。

至心皈命禮

甘山福地摩維洞天中，有老人一烝根紫微之應化，上朝金闕九華，通碧落之生芒，說六章經陶凡煉聖之文，贊萬壽觀復古通今之化，扶持人極，發越地靈，道大難名，功高莫議，大仁大孝大聖大慈儲福定命九天丈人、大玄無上上德真君，玄真萬福天尊。

至心皈命禮

本來南土，上泝蜀都，先獲黃帝九鼎之丹書，後事老君，兩度於玉局千軸得修行之要，一時成吐納之功，法籙全成，受盟威品而結璘訣，正邪兩辯，奪福庭治而化鹹泉，德就大丹，道齊七政，大悲大願大聖大慈三天上相玄都丈人、扶教度人天師、正一輔元體道沖玄神化靜應顯佑真君、六合無窮高明大帝降魔護道天尊。

至心皈命禮

永平柱史，唐代易玄，得異術以全神，脫塵囂而馱役，主光華之大法，悟萬有之真機，適骨常仙，留馬躍入淵之跡，恕心決獄，致鼠飛穿牖之祥，受赤龍丹號碧梧子，大悲大願大聖大慈、三天次相九炁丈人、丹琳大帝、隨機演化天尊。

至心皈命禮

誕生漢室，錫號晉朝，惟布炁以降邪，曾吞虎而救世，管玉霄洞清之法，傳玄壇內教之經，掌雷府刑判都督府便宜之事，領天師職升紫微天右相之班，判洞陽宮主混元教，大悲大願大聖大慈無極真元清皇上帝、九天保冊司命天尊。

至心皈命禮

德彰巴峽，跡隱渝江，幼題金榜之姓名，親授玉階之冕服，止殺應霜臺之夢，現威變日表之容，悟最上乘以勸善，大師而友助，究真常道，假恭天觀主，以講磨膺仁濟之褒，嘉表神功之莫測，鎮國祚復興之地，開蜀民再造之天，恩被羣生，德隆百世，大悲大願大

聖大慈璧山顯應真人清明河童天帝。

至心皈命禮

聖祖母十月初五日誕。

始青天上元命化，初一炁未漓，含七曲真元之粹，九天肇始，包三光精體之全，鸞機無兆朕之可名，鶴質仰清高而莫議，先天先地之慈母，不古不今之婉容，陽回十月五日之春，教演三綱五常之祖，壽綿長壽，形賦元形，載觀本行集之跋經，莫測始青天之證道，大悲大願大聖大慈七曲初劫賦形長生壽母太極元君。

至心皈命禮

聖父二月十一日誕。

桂香寶殿，文昌上宮。道體混成，含九十餘生之化，真元未露，儲三萬六千之精，開後天不老之鸞書，奉青霄莫測之態夢，神父之大慈父，至人之上善人，脉壽三綱五常之根，心包百行萬善之體，皈依莫盡，稱讚何忘，大悲大願大聖大慈七曲聖父、顯慶慈祐仁裕令德王玄初大帝、證果長壽王菩薩儲真衍慶天尊。

至心皈命禮

聖母七月初七日誕。

桂香內殿，文昌輔宮。淑質春和，含太真之淑氣，清光秋湛，蘊七夕之清輝，包龍像於未漓，隱鸞機於不露，劍泉之大慈母，蓬萊之上善人，產萬世之綱常，生九天之名教，皈依莫盡，稱讚何忘，大悲大願大聖大慈七曲聖母、昭德積慶慈懿恭惠太后、證果寶光菩薩嗣慶儲祥元君。

至心皈命禮

元皇天帝二月初三日誕。

桂香寶殿，文昌上宮。九十六生，種善果於詩書之圃，百千萬化，培桂根於陰隲之田，自雷杼炳靈於鳳山，至如意儲祥於鼇岫，開人心，必本於篤親之孝，壽國脉，必先於致主之忠，應夢保生，垂慈憫苦，不驕帝境玉真慶宮，現九十八化之行藏，顯億千萬劫之神異，飛鸞開化，在在建壇，助國救民，人人被德，功存乎儒道釋教，職盡乎天地水官，威靈不可度量，功德果難思議，至仁至孝，不樂不驕，大聖大慈大悲大願

神文聖武孝德忠仁王、安樂不動地遊
戲三昧定慧王、菩薩證果迦釋梵鎮如
來救劫大慈悲更生永命天尊。

至心皈命禮

聖后五月初三日誕。

桂香內殿，文昌輔宮。懿範冰清，
掬九天之霽月，仁心春粹，扇七曲之家
風，婉儀入侍於親闈，慈淑天全於母
道，上下一堂之和氣，古今萬世之春
臺，應夢儲祥，因心演化，大仁大孝大
聖大慈七曲聖后、恭順淑應德惠昭懿
皇后、證果定應菩薩冲和洞妙元君。

至心皈命禮

聖長子三月初三日誕。

桂香內殿，文昌輔宮。聖德慈祥，
一念嗣家聲之脉，神功顯著，九天寬帝
父之心，戲綵雲巖，詳無體無聲之禮
樂，問安月窟，傳有典有則之箕裘，錫
五福於生生仁孝之家，榜三元於奕奕
詩書之裔，因心立教，應夢儲祥，至仁
至孝至聖至慈聖長子嗣德履孝王、演
化清微天帝、文昌衍慶真君。

至心皈命禮

聖長婦八月初一日生。

桂香內殿，文昌輔宮。淑質春柔，
粹婉容於侍問，真心玉潔，儼懿範之清
高，相成震長之家聲，默識兌和之闡
則，教流愷悌，化洽冲和，應夢儲祥，因
心錫慶，至仁至孝至聖至慈聖長子婦、
善助顯懿循孝夫人、元真妙洞真妃、文
昌靜應天君。

至心皈命禮

聖次子正月初一日生。

桂香內殿，文昌輔宮。父子一家，
全克孝克慈之道，君臣千載，盡止仁止
敬之心，模範人天，本綱常而立教，準
繩世道，根詩禮之趨庭，幹蠱於陰鷲之
天，福謙於行藝之圃，因心演化，應夢
儲祥，至仁至孝至聖至慈聖次子、昌德
立孝王、演化妙成天帝、文昌司祿真
君。

至心皈命禮

聖次子婦二月十八日誕。

桂香內殿文昌輔宮。孝德謙柔，
稟一元之淑質，真心坤順，婉七曲之閨
儀，五婦嶺前揭問安之華典，三潮水上
流積慶之清源，應夢儲祥，因心演化，

至仁至孝至聖至慈聖次子婦、助順惠
懿克孝夫人、玉真洞應真妃、文昌嗣慶
天君。

至心皈命禮

懿孝公主四月十六日誕。

桂香內殿文昌輔宮。蟾魄凝祥，
根父天之慈愛，鸞心斂福，陶母德之雍
和，霜姿雪質之清，不物於物，春風秋
月之抱，自天其天，內觀萬境之空幼，
得九天之道，心清莫議，德婉難名，至
仁至孝至聖至慈聖女、淑真妙靖懿孝
公主、洞元真人、文昌萬壽天君。

至心皈命禮

聖長孫七月初三日誕。

桂香內殿，文昌輔宮。凜凜天姿，
道矩肅家聲之粹，挺挺風烈，仁聲流化
治之新，雷霆間發於春和，人人開悟，
雨露旁周於天表，物物生成，應念儲
祥，炳靈應夢，至仁至孝至聖至慈聖長
孫、紹應昭靈至孝侯、寶華圓滿天君文
昌積慶真人。

至心皈命禮

聖長孫婦正月二十八日誕。

桂香內殿，文昌輔宮。聖質天姿，

粹出春風之抱，仙標道矩，豁開秋月之清，四世一堂，印印閨儀之雍肅，百行萬善，天天家慶之精詳，應夢炳靈，隨機演化，至仁至孝至聖至慈聖長孫婦、淑應昭孝夫人、玄真靜素文昌積慶天君。

至心皈命禮

聖次孫十月十三日誕。

桂香內殿，文昌輔宮。談笑春風，字字仁心之發育，動容和氣，言言家法之流傳，子承聖子之心，根培陰鷲，孫繼神孫之體，果證真仙，應夢儲祥，因心立教，至仁至孝至聖至慈聖次孫、承應宣靈順孝侯、祖德妙清天君文昌襲慶真人。

至心皈命禮

聖次孫婦七月二十三日誕。

桂香內殿，文昌輔宮。玉質金姿，父母熟栽培之地，恩光化日，子孫綿嗣續之天，生根榮陰鷲之根，內資相警，休命續衣冠之命，婉出相成，應夢儲祥，隨機演化，至仁至孝至聖至慈聖次孫婦、惠應體孝夫人、真元育粹文昌襲

慶天君。

至心皈命禮

文昌佐神、太一真官天順真君、三茅司命真君、文班左司主祿獨孤大王、武班右司主嗣英惠忠烈翼濟福安王、雙松報喜太尉、桂祿二籍仙官、仙童玉女、飛鸞從駕，天聳地啞侍駕左右，三仙北府贊佐碧玉醮筵、雲雷雨部、諸仙列聖、輔道一切真宰。

禮讚已周，依光懺悔：

七曲慈尊真教主，慈父慈母同我生，子生聖子皆孝慈，孫繼神孫盡慈孝，一家和氣天無盡，萬世春臺月有光，慈光普照諸天人，細入微塵滿天地，我生同得乾坤體，一似文昌始劫時，聖非自聖凡自凡，流浪至今方覺悟，願逢七曲慈尊教，惟忠惟孝惟慈心，不以口業傲神人，不以身業累父母，不以意業欺天地，不以心業禍子孫，願從孝行與陰功，種種力行諸方便，懺贖多生諸罪垢，皈依元皇大慈光，求嗣求祿求生方，不求諸人求諸己，惟我文昌七曲師，歷劫待人存恕法，

願放一種如意光，憫念衆生真懺悔。懺悔已周，次當發願：

父母願同長壽果，龜齡鶴髮映慈光，己身願拜大吉祥，仰事俯育無苦惱，子孫願嗅雲巖桂，嘉與己身同發榮，父慈子孝一家春，光明無負慈尊教，願蒙七曲親提接，指引登真入道門，捨生受生正遍知，盡未來世俱圓滿。

發願已周，次當讚頌：

桂香殿上仁孝主，教雨周流洗業根，業根化作桂華香，善本種成長壽果，一家骨肉無煩惱，七曲子孫同護持，普願今世與來生，紫雲巖前成道果，步步心心帝左右，生生世世天主張，骨凡身換形可灰，一點真心自金石。

發如是願者，是日爰有本貫弟子某

稽首元始天王、千真萬聖，持誦大洞仙經，丐賜赦過宥罪，改禍成祥，惡根斷絕，進道無魔，祖先父母早度南宮，獲生中土，眷緣衆生，均賴陶鎔，災殃殄滅，所伸凡懇干冒天威，願冀感通，曲從所請，伏願香火使者領茲丹懇，普爲關聞，稽首皈依：

三清應化天尊，
玉清普化天尊，
太乙救苦天尊，
天樞上相法主道君天尊，
終劫濟苦天尊，
消災解厄天尊，
雷聲普化天尊，
玄真萬福天尊，
斗府天曹列位星君，
三元三官大帝三百六十應感天尊，
定光澄明普度天尊，
紫清介福天尊，
更生永命天尊，
無量度人天尊，
普天懺罪天尊，
十方靈寶天尊。不可思議功德，當願衆生心開悟解，受持轉誦。

元皇全號

金闕上相檢校太師、混元內輔三
清上宰大都督府、都統三界陰兵行便
宜事、管天地水三界獄事、收五嶽四瀆
真形虎符龍券、總諸天星曜、判桂祿嗣
籍、上仙英顯元皇真人、司祿職貢舉真

君、洞照通真先生、編修飛仙列籍、掌
混元造化輪迴六道救苦救難慈尊、玉
清內境清靜道真、身現紫雲巖、手持如
意杖、統御萬靈溥濟諸苦大仁大孝大
聖大慈無上不驕樂育天帝、都統混天
誠心接物萬天教主、隨願慈應天尊、九
天定元保生扶教輔元開化文昌度人主
宰、長樂永佑靈應大天帝君、掌五湖四
海總十二河源水府運使定慧王、菩薩
證果迦釋梵鎮如來、澄真正觀注祿定
籍、寶光慈應治世顯道、保安拔罪更生
永命、扶善濟苦消劫行化純一顯應天
尊。

太上無極總真文昌大洞仙經卷之二

太上無極總真文昌大洞仙
經卷之三

甘山摩維洞主太玄
無上上德真君校正

玄蘊咒

玄元始炁分，清華開洞神。靈風
迴太和，玉音攝流精。至哉本自然，誰
識此玄文。堅剛明一悟，倏忽超三乘。
寂寂無色根，永劫奚漂沉。胡能精修
持，究竟登玉清。

道言：昔在龍漢劫初，元始天王

出《大洞玉經》於高上大有玉清宮，演
太玄重玄玄一之道，命之曰《大洞仙
經》。元始天王始以太玄一音，流響玉
清，弘帝一真道，說大洞寶文，示九統
之法，傳九光之符，至士誦之，登齋修
行即得萬神歡慶，百靈護持，萬聖感
格，萬仙翕臨，可以飛度三灾四煞、五
鬼六害、七傷八難、九厄十惡，登仙入
聖，神生紫微，自然無爲，不係陰陽五
行六炁之所拘束，念念增長，趣入大

乘，弘之無窮，諸天下觀玉帝降鑒，飛天保迎億曾萬祖歷劫種親，遊爽飛魂，俱得更生，世胄接仙，長爲貴人，功滿道備，骨肉同昇，乘龍駕雲，上朝玉清。

元始天王嘯詠太玄，凝神遐想而說洞章：

高上洞元，元生九天。炁祖太無，宗風胤玄。玄曾絕散，四清撫閑。帝一上景，連衆攝烟。長契一運，七世投閑。託靈屬命，反華自然。泯邈流輝，六曜沉遷。陵範御暉，西華彰安。併編帝簡，盡得解源。胎田邃路，世發玉蘭。靈光八輝，混生萬神。

元始天王曰：

玉虛順玄歸，天晨金霄遊。朗朗生帝景，欸爾宴玉洲。左攝始童神，右命起恒符。明真煥九霄，三日映玄敷。干景併三衿，內有幽寥無。令我得長年，千劫始一周。黃籙保德仞，披錦入神丘。太一務命根，公子召合符。十迴度初心，得入大信根。

元始天王曰：

玉帝玄上藩，制命九天階。七覺

成道數，歡熙神風回。颺燦北停華，紫英唱東瓊。琳和九霄外，玉符徵太微。三素生泥丸，發曜金靈暉。老君牢張上，守衛死節機。十善生玄中，度厄而自然。

元始天王曰：

太冥絕九玄，洞景寄神通。玉帝乘朱霄，綠霞煥金墉。上館雲珠內，仰接玄仞峰。靈關太漠下，藹沫竟沖空。冥化混離坎，玄玄叔火王。瑋寂高同生，無極保谷童。圓塗無凝滯，綺合有九重。南披七祖根，西解累劫凶。體矯萬津波，神生攝十方。大歸反胎轅，三合乘天龍。

元始天王曰：

太微天帝宮，八浮入雲營。神宗理靈襟，龍山秀玉京。金房鬱明霞，九戶朗高瓊。黃庭涉北元，元父左回明。朱晶啓明師，幽寥登上清。四玄秉元禁，長保五帝城。

元始天王曰：

紫精太無中，三元上景衢。秀朗保太暉，眇眇扇帝敷。伯史啓三素，帝

靈登玉虛。慶炁育五雲，司命神明初。十華妙行仙，制魔生六明。

元始天王曰：

真陽帝賓老，受事會玉皇。滅魔除穢水，百司詣絳宮。逸宅丹玄內，五炁結十方。七轉司命至，三迴召仙公。泰山主鬼者，急校三官中。十德初成基，同飛七覺元。

元始天王曰：

太素三華炁，晨登廣靈堂。玉賓表玄籍，守命孩道康。徊風散萬魔，金符召廣鄉。輔衛地戶內，保此長生王。轉入十仙門，八景齊洞陽。

元始天王曰：

紫精毓華林，長暝太無外。玉房生寶雲，九扇胞胎內。帝賓奉五符，三光回紫蓋。蒼玉斌來生，衛此長夜會。五靈度符籍，九統合九光。三玄出太清，紫陽發萬生。玄精育九靈，元父結胎仙。

元始天王曰：

青靈扇八炁，鼓輪三華城。拔兆胞胎結，七世受福生。宿對滅五道，長

守帝一營。公子執五符，太一居紫房。三合地户下，拔命玉帝宮。少女郁墨子，衛兆七炁窗。拘制盟血液，盈滿五藏充。十真登黃房，帝子化金仙。白玉飛符招，引升龍臺天。

元始天王曰：

太上宴紫霄，五老輔玉根。太素拂眇景，合符帝一前。白帝皓鬱將，回金太霞鄉。度我死户下，拔出三途梁。十通由斯生，妙行由此興。洞明光景中，帝一真玄玄。

太上無極總真文昌大洞仙經卷之三

太上無極總真文昌大洞仙經卷之四

甘山摩維洞主太玄
無上上德真君校正

道言：爾時元始天王眉放青毫，頂旋紫炁，萬華寶蓋，浮羅覆形，玉光金霞，紆綯晃耀。玉宸道君太玄道父，稽首顛竚，願聽洞章，於是元始天王怡然嘯詠曰：

皇上超無景，輪轉九曜生。徊風混帝心，八炁運常寧。廣霞參神天，五帝散日精。液溢元中漠，血凝五華平。體寶圓珠映，流曜拔兆形。號爲壽逸阜，亦曰澄潛淳。俱濟三塗關，啓籍登太明。使子保仙真，七世披綠青。解禍冥途下，超福晨上靈。世世登玉鄉，累祖反胎嬰。洞觀無礙空，始通生因明。驪珠湛方瞳，內外洞照清。

元始天王曰：

玉宸九天司，太上大道生。常保景化內，九回鏡上清。解帶玉映室，乘

素入四明。携提日中王，併羽月晨靈。太一召天魔，帝君校萬精。拔過死積炁，越度仙黃庭。帝立三關上，八風舞神兵。左把福醴液，右提慶源餅。洞微無障玄，梵通生虛明。貫顙聞十方，豁落一切聲。

元始天王曰：

泰清浮絕空，三天寶神符。日中開五暉，青帝圓常無。捧籍登太明，受錄金華樓。五藏植玉根，魂魄一凝和。洞空清淨玄，炁通生清明。定和妙明覺，玄息自長生。

元始天王曰：

太極元景王，三天攝神生。紫素翳鬱仞，安來上華京。拔出五苦積，返胎七元庭。九玄解重結，累祖樂錦清。徘徊秀華下，俯仰要五靈。兆身昇玉堂，五神回孩嬰。俱躋太漠外，養素朝圓明。洞虛清淨和，華通引玄明。砥煉五牙珠，含善味長生。

元始天王曰：

皇初紫元中，暉光鬱霄明。三天煥九景，離合億萬生。披珠巾綠霞，上

徊寒童靈。拔出五苦毒，超身過始青。白素啓蕭仞，金門衛朱兵。七世積尸結，一化百散傾。受福東霞室，反胎朱火庭。洞靈清淨行，力通自沖明。淨真手握斗，足躡九元星。揮執天地關，精神生命根。

元始天王曰：

無英真上玄，玄元九素炁。寄頻携運珠，混化啓明日。正一左右仙，長扶靈虛室。兆有玉符籍，合仙得真炁。魂生太無中，魄亦五道會。世世解死戶，七祖無住滯。神風吹胞樹，根葉已斷絕。胎中種鬼殃，五符開地結。長爲神真王，應仙續萬世。洞真清淨身，道通自然質。真應化現相，不動住黃室。應化無方在，骨肉金玉寶。靜真明正道，至老長不易。

元始天王曰：

中央黃素炁，圓華玉壽靈。太張上玉門，伏雲三仞明。青景翳逸寥，携提太一精。帝女抱定陵，吟詠玉清經。五籍編紫房，五符入圓庭。七祖反胎宅，滅絕三途生。流風斷血滯，玄葉得

黃寧。洞玄清淨光，元命靈通成。性命宗本堅，孝道成明王。生根得太和，無爲登上清。

元始天王曰：

青精上華炁，太微玄景童。神化玉室內，飛羽逸紫空。日爲三衿交，奉符登帝壙。開關把金節，閉戶扣瓊鍾。滅魔三艷野，招靈上清宮。明出窮關陰，入精六合房。回老變皓形，還白返嬰童。洞源清淨光，津液具神通。咽液生萬神，神水華池融。湧升灌而潤，往來無有窮。通生道之源，天根常茂豐。

元始天王曰：

太陽化三晨，紫駟微玄下。元君保谷童，守胃塞死戶。金符煥北華，玉契拔七祖。帝真灌上生，斷我三途苦。洞明清淨光，帝心大玄通。宿命過去智，根本元由中。未來及他心，一切無礙融。洞源與洞明，萬道由通生。

元始天王曰：

太初九素炁，炁出華景中。法垣舞仙旗，逡巡五老公。天人名啓珠，執

籍歸紫房。元父左回明，混會太微童。洞清明智慧，太意朗元通。根塵悉消滅，有無皆虛空。妙行真一全，名大心神通。道備登玉清，位爲聖仙翁。

元始天王曰：

元始授太玄，蒼胡頡寶珠。檀熾鈞音妙，希聲徹太虛。九皇上真炁，四司大神王。飛霞散天日，凝渙六合房。上清朝玉虛，乘景晨暉中。三神號發紐，捧籍啓虛皇。逸錄登紫清，金符刻羽宮。頂玄蒼胡頡，弘濟登普光。運度玄中人，咽味生五芳。結集成胎仙，丹母金真陽。主伴合元範，太易生玄鄉。

太上無極總真文昌大洞仙經卷之四

太上無極總真文昌大洞仙經卷之五

甘山摩維洞主太玄
無上上德真君校正

道言：爾時元始天王以大洞高上混沌太無元天寶玉皇之炁，結一寶珠，命之曰蒼胡頡，曰：吾以此寶珠從道妙一，善貸生根，孕玄分元，誕始傳真，化生諸天，凝成萬炁，大哉至寶，惟我獨存。今爲玉宸道君重出斯寶，諸天帝王、天真大聖瞻望寶光，其光分敷百千萬億，結成《大洞仙經》玉文，凝而成雲，絢而成章，諸天帝王天真大聖，以清明識，以始通觀，以華舌通，齊聲宣詠大洞雲章，響徹萬天，流響九地，天界地界，水界神鄉，一切神靈，不離本坐，俱睹雲章，絢目仙梵，歷耳皆悉，百生障滅，萬劫塵消，三塗九幽，十方惡趣，咸承光音，所及十纏九結六染七塵，於是頃間一時解脫。是時太玄道父前詣蕭臺，再拜稽首，求受寶珠所結

《大洞仙經》玉文雲章，庶以導化人天衆生，俱免萬災，咸消衆罪，不沉惡趣，俱等一乘，弘是願言，殷勤啓請。元始天王命元神大聖玉宸道君具俯仰威儀，手付太玄道父蒼胡頡寶。

元始天王告曰：此蒼胡頡寶，與檀熾鈞音，若非太玄，可得求請，唯子慈深願重，可畀寶章。

元始天王曰：

天皇上真炁，三元乘晨回。法垣興朱霄，帝晶啓玉扉。拔尸命門內，解結桃康階。斂神保五籍，越轉入太微。單入而雙修，一曲水天開。海日自東生，元命生太初。

元始天王曰：

太一生元炁，日中司命童。煥然神光明，披霞昇帝壙。列坐震靈席，混合五日房。白炁育上生，青君安延昌。左携精上門，右抱合和嬰。我生日月華，友賓赤炁王。八景照泥丸，朗然洞房中。嬰兒爲赤子，混離生玉容。五道秀金華，位爲上清公。七祖斷玄滯，身得乘神風。徘徊玉清上，和樂反嬰

童。太始三炁周，真文肇生明。

元始天王曰：

元虛黃房內，中有黃寧童。左有堅玉君，右有帝昌皇。浮清翳神炁，蔚蔚虛靈容。青肝明輪子，開朗徹八窗。太一壽丘蘭，奉符入玉宮。拔我七世罪，回元期十通。混合帝一室，五老變孩蒙。太素梵行初，一善四金通。

元始天王曰：

太極主四真，凌羽逸上清。七轉召司命，太一揚威明。司錄促詣位，三舉登震靈。魔王來受事，仙官束鬼精。月中青帝母，號曰芬艷嬰。太張上五符，安來上玉名。混化六合內，洞房列火兵。太極五靈沖，橫文帝子賓。

元始天王曰：

斗中四真人，散花玉清臺。帝卿中玄生，一徇衆真來。香風扇三寶，五藏映清夷。蒼胡頡光華，檀熾鈞吉祥。太中六炁清，曲水襄天河。六度功圓成，五魔伐六陰。中結元始王，高觀六合庭。

元始天王曰：

晨中黃景炁，三秀登霄庭。滄臺飛羽輪，延迎道已成。司命奉帝書，號爲玄度卿。保生太霞宮，列賓館上清。命門合精延，守我身黃寧。左携元素君，右攝朱鬱靈。太和度七覺，點火生真文。紫華領胎仙，元命真中神。

元始天王曰：

金闕上景炁，十方暉紫烟。三命太一帝，五召太平神。七轉招嶽真，玉符告三官。拔籍三靈下，受生高上晨。太帝八靈王，一化回慶玄。桃君守六合，勒精衛泥丸。太清八景觀，十德真文宣。保子神中神，元命生自然。

元始天王曰：

太虛空無景，霞中有彭室。九雲合重扉，帝君靜幽密。八真合景君，上携女太一。雌雄混玉房，九變還得七。分形散六合，泥丸易分別。太真九光輪，十伶丿文結。保子元炁通，五炁理中韻。混一歸帝闕，永壽無終劫。變化飛上清，三千行超越。

元始天王曰：

太玄九炁上，烟回大暉間。神光

秀空峰，五道煥三天。駕景登絕霄，乘風蕩滯神。中一日運珠，理心入清閑。混合三五宮，累變億萬年。伐絕胞樹生，永斷血尸根。七祖散積滯，返華黑幽玄。萬炁生萬神，齊仙成仙王。太玄啓十明，妙行登十真。

元始天王曰：

上清絕霞外，八皇運九天。幽寥生帝宇，携此景中人。晨登太老寢，夕宴金華軒。羽節命太一，錦旗招萬神。堅我六府胎，伐滅胞樹根。解結生七祖，散禍寧九玄。赤帝丹靈峙，扶兆入玉門。月母靈素蘭，守閉死炁關。死炁自今絕，生津從茲延。萬神萬炁仙，超脫位真王。十真妙行全，太玄會明陽。無上大洞尊，一炁同龍光。

元始天王曰：

東華發始暉，高晨映上清。煥洞圓珠藹，朗朗紫曜明。七神回帝席，五老飛玉駟。太一景中立，司命攝萬精。汎然雲波間，寂盼泥丸城。七轉召三官，北君稽首靈。五嶽應炁到，拔死書長生。三舉震靈符，玄解大魔精。七

祖解血結，玄華保黃寧。

元始天王曰：

太帝九老京，校仙登扶桑。七轉召天帝，司命乘神綱。五嶽啓靈戶，傳聲大魔王。河海皆受事，立爾應會方。保符泥丸內，守神曰桃康。回明易死籍，記仙叔火王。拔絕三途疾，去禍生上英。七玄登朱室，兆身會玉堂。上友方盈子，下携理維藏。左攝明車君，右輔歸盛昌。混一玉京炁，化兆吉以昌。反嬰元命童，檀熾吉祥鈞。天一元根仙，自在光明輪。

元始天王曰：

玉清萬華宮，高仙藏帝經。主圖九天表，洞觀無中生。七轉召萬神，五嶽一來庭。三官招衆魔，司錄校所呈。拔籍重泉曲，記仙書上清。

元始天王曰：

玄洲絕三津，羽景太無庭。回霄飛垂漠，委化混萬精。五雲蔚絕空，七霞落圓明。朗朗幽寥子，梵昌濟黃寧。五老揮絳華，散香携玉靈。金質濯帝川，綠烟藹流瓊。神拔三塗積，仙胎結

兆形。上清玉皇師，玉宸大道君。與心絳宮神，飛澄太玄尊。

元始天王曰：

三真生太元，玉戶映晨華。太素洞元虛，丹林森朱柯。回神九重府，南昌發瓊華。百關納津液，停玄三秀阿。兆身騰玉清，七祖離幽扃。長保不終劫，萬世成仙家。位爲聖統尊，玉清大洞神。

元始天王曰：

西元九靈炁，金丹流雲宮。上極璇曜抄，暉景太霞中。動迴九天輪，靜沉八流綱。室有胎仙母，携衿太帝皇。玄一靈時生，三老素牢張。左把兆符籍，右携理神宗。同登琳龍闕，稽首玉清房。拔棄死滅根，養形三五中。七祖解尸結，受福明珠方。上證聖中尊，符化元炁王。

玉宸道君言：我師元始天王，授我此《大洞仙經》，其旨玄奧，修真妙門。初定通息，太和一千，中觀變真，離相消塵，元合五千，坐在立亡，大定全真，妙行通靈。初曰通炁，次曰通

神，終曰通靈，十通成真，道備登宸，超脫飛昇，過度三界，往來三清，證品太洞，天一帝尊，六度十通，萬行圓成，千和萬合，自然至尊。

太上無極總真文昌大洞仙經卷之五

（曾召南點校）

094 玉清無極總真文昌 大洞仙經注

經名：玉清無極總真文昌大洞仙經注。元朝道士衛琪撰，書成於至大三年（1311）。以圖書易學及內丹學理，注釋南宋道士所編《大洞仙經》。十卷。底本出處：《正統道藏》洞真部玉訣類。

玉清無極總真文昌大洞仙 經序圖卷之一

進經表

具位臣衛琪謹言：天命之性，有生鈞受於一元。道與之形，品彙皆同於五緯。恭惟皇帝陛下，道參穹昊，德合神明，長追太古淳樸之風，遠續曠世龐洪之緒，玉刻金編之簡，盡沐披行，巖

棲野處之徒，咸蒙拔擢，故感草茅之奮躍，仰干鼎鑊之寬原，敬獻《文昌大洞》一經，仰祝聖躬萬壽，恭願堯仁廣覆，誕敷文治之休，舜孝彰明，丕顯昌期之運。玉燭調而春生秋肅，璇璣斡而雲潤星輝，天地位，萬物育，化已極於範圍，日月照，四時行，誠遂贊於幽顯。臣琪干冒天威，下情無任瞻天望聖激切屏營之至，頓首再拜，奉表以聞。

至大三年九月 日臣衛琪上表

臣衛琪謹言：王化所基，古典載太妊太姒，國風所始，今人欽有娥有嫫。恭惟皇太后殿下，懿範柔和，婉儀清淑，志靜已參於乾造，德方誠合於坤文，鼓百姓之懽心，躋八荒之壽域，切念臣琪蓬萊隱迹，萍梗微生，稔知文母之承休，敢獻文昌而祝頌，伏願月華綉彩，法天象而統六宮，陰教敷明，體地元而育萬物，民子例覃於慈蔭，華夷均被於殊恩。臣琪干冒慈嚴，下情無任惶恐望恩之至，頓首再拜，謹言。

至大三年九月 日臣衛琪上表

序

經者，道之綱領也。夫道豈容言哉，上聖因言成文，因文演教，其所以經紀世道，類不可以測識，故凡經皆有難言之妙。近世學者方句評而篇註之，往往有得天人說經意，此大洞經之類是也，大洞自元始出，其言致玄總靈，超真歷劫，蓋所謂妙哉者。今中陽衛氏，乃能自出新意為之註釋，鋟以行世，見予京師，求所序引予觀之，詳乎而莫知其涯，真不可以測識也，抑聞演經之旨有萬遍，而道備者味之深也，今子於是蓋有得矣，苟明夫味外之意，則自萬遍而至無言，其為造元始闡域也無二道。皇慶壬子夏五月，特賜太素凝神廣道明德大真人、嗣漢三十八代天師、金紫光祿大夫留國公張與材序。

大洞仙經，蓋西蜀之文，中原未之見也。中陽衛君自蓬山來京師，示予一編，且求為序，引予諦觀之，皆世外之說。衛君以三教聖人有雜註於其

間，旨意深遠，苟不能貫通三教之書，未易觀也。獨雌雄混玉房一語，所註陰陽交媾之事，頗涉形跡，豈中陽曲爲今時而然耶！但恐不可對癡人說夢耳。且西方聖人有云：始從鹿野苑，終至跋提河，於是二中間未嘗談一字；吾夫子亦云：天何言哉，四時行焉，百物生焉；老聖亦曰：多言數窮，不如守中。由是論之，文字語言者，聖人不得已而因言顯道耳，苟得其道，尚何文字言語之爲哉！我作是說，中陽子以爲何如。至大四年清和月望日、翰林學士承旨資善大夫、知制誥兼修國史^①疇齋張仲壽謹題。

圖書未龜馬以前，五文開化，已見於靈寶之書。天道昌熾斯文，如善養元氣，浩然獨存，濁之而愈清，晦之而愈明，無絕續，無存亡，劫火不能焚，世變不能移也。蒼然而在上者，不有剛健中正純粹精爲之情性，則機亦息矣，所以運行形體情性於不息者，其主宰之謂帝乎。七曲老仙以功行道德，經

緯文章神而明之，大哉帝力，持是經籙，溥覺衆生，造化之樞，性命之源，主宰在是，自未始有形之先，暨四達無窮之外，寥乎廓哉，萬殊一本，千劫一途，以法眼視之，洞然而無礙也。吾之所謂太易太初太始太素太極，即元始所傳《文昌大洞》也，中陽先生衛氏洞測玄妙，句解字釋，本之以道學性理，參之以丹訣禪機，聖賢千古心法，透徹發露，更無餘蘊，洋洋在上有神司之，覽者幸毋忽焉。至大辛亥仲夏旦、集賢待制奉直大夫蜀叟趙炆拜手謹書。

文昌大洞經註序

切聞玄圃之玉，昆吾之金，照乘之珠，連城之璧，或出合浦，或產崑崗，有明月之稱，具衣光之號，卞和所抱，隋侯所懷，世人雖有聞而知之者，尤起愛敬願見之心，豈特所謂玄珠黍米、蒼胡頡摩尼珠，天人之所貴重者，今文昌大洞是也。人人有之，而自見不自貴，其取棄賤，故聖人演之以覺衆生，託法象以取喻，非有形跡者也，敷光炁以爲音，非有文字者也，至道無言，至真無

象，自混淪剖判，三才之理暢然，元化之體歸一，不知我之爲道，道之爲我，以後五行錯謬，炁運變遷，有生之根，或拘於宰制，於是三寶君復闡其始初之因，以示天人，謂兆之身皆吾之炁，兆之神皆吾之真，欲使人人咸知，悉見則復歸於我，而不爲炁運之所拘束，可坐致自然。因是元始重演三十六章之祕，該三千一百八十八言，以付玉宸道君，序結其始末之因，計九百單八言，以畀太玄道父，二聖法語，總計四千九十六言。於是至真無象，而聖迹益彰，真宰無言，而玄籍愈阜，範圍天地，曲成萬物，大哉至寶，真所謂乾始能以美利利天下。然三十六章以應四九金數，即自己金丹之道，上卷十章，中卷十章，下卷一十六章，三卷皆以五言爲句，共三十六章。章之上，復有大洞帝尊一章，以四言爲句，自不相侔，總冠一經之首。三卷各有序經，下卷終有結經，皆玉宸道君演說，方見一經之始末。周初，帝命三真人下傳吳會張通真先生，此經是也。以其時考之，蓋二


千五百餘年矣，所有茅山魏元君之派，號《上清大洞玉經》，蓋靈寶天尊所傳，比此經缺二章，多八十字。又有宋明帝時陸脩靖，以帝一、雌一、雄一三經，或三言四言，句讀長短不一，以附各章之次，故其章句頗多，其正經並同。

稽諸傳記，中載云：唐梓州王保和真人，奉帝命校《三十九章大洞經》，以付嗣師。又有宋真宗朝觀妙先生朱自英註，政和元年張商英進御劄子大抵相同，此經本一百二十卷，玉宸道君、太玄道父牛孳先生集其樞要，分其章句，三十六章為三卷，以便脩習。上則安鎮三十六天，下則統御三十六地，中以通人身中三十六宮神炁，豈非所謂天上三十六，地下三十六，太玄無邊際，妙哉《大洞經》乎！此經所載，皆天真內名隱諱，與人身中神炁相接，故在《度人》、《生神》、《黃庭》之上，是故內外互顯，上下交錯，蓋取諸人身一小天地也。人能存養自己神炁，吟詠寶章，則天真下降，與兆身中神炁混融，是曰回風混合，形神俱妙，與道合真。故致

長生之道，可以提挈天地，把握陰陽，鞭策風雷，驅役神鬼，偃息於流霞之車，眷盼乎文昌之台也。人徒知誦經亦死，不誦經亦死，豈有長生之理！殊不知誦經者，蛻脫幻軀，以即真體，謂之尸解，不誦經者，幻軀與真體一齊俱斃。其上根者，不言而喻，愚不肖者，雖提其耳諄諄焉命之，渺莫知其所以，況章句字義幽隱，非天人再世，其孰能知之。琪幼蒙義方，至於諸子百家，靡不攻考，至元己卯，時方弱冠，受誦此經，迨今三旬，惟恨文字訛謬，十本九乖，無所從正，每思幼小曾閱三藏，頗記一二字，而不敢擅自訂證，且天下經教，經大治化爐之後，不復有聞。比歲薄宦西南，嘗以此勸人，家至戶到，往往好讀，而琪以訛傳訛，中心少寧，近因浪走江湖，旅邸靜坐，默有所悟，輒將曩者註藁翻繹，以平昔所記三教經書，其間旨意合同者，隨句解釋，仍以《大易》所謂無極河洛、先天後天卦象，金丹火候、蒼胡檀熾，帝尊玄炁等，各列一十三圖，以冠經首，俾人一披便

喻，妄摭管見語意膚陋，惟恐貽譴天道，取笑大方，敬謁注生真君採訪使者冥干印可，方敢布露同志，誠非所以贊揚大經，庶幾純根小器有所發明也。龍集至大己酉東蜀蓬萊山中陽子衛琪稽首謹序。


無極圖



周子作太極以括《大易》，予演無極以總《大洞》，蓋太極者，已具形炁之謂，無極者，無聲無臭無象無名，惟理而已。周子亦曰：無極而大極，蓋無極一動而為陽，以生玄炁，屬水，故曰太易，生玄光，靜而為陰，生元炁，屬火，故曰元命，生太初，靜極復動，為陽，生始炁，屬木，故曰太始，三炁周，玄元始三炁周備，炁形質具，未始相離，謂之太素，靜而為陰，屬金，故曰太素，梵行初三炁為天地之根，萬物各極其位，謂之太極，動而為陽，屬土，總領

四象，故曰太極五靈冲，一動一靜，互爲其根，是以五太五行謂之五老，五符玉經云生於元始之先是也，天王復演太易之玄炁，結一○寶珠，即五行一陰陽也，陰陽一太極也，太極本無極也，故曰無極總真文昌大洞云。吾以此○寶光凝成萬炁，化生諸天，又以其光分數百千萬億，結成《大洞仙經》，即玉經生天立地，開化神明，又曰五炁結十方，萬炁生萬神，即五行順布，四時行焉。又《度人經》五文開廓，普植神靈，無文不光，等同萬神萬炁仙，即無極之真，一二五之精，二炁交感化生萬物，故文昌乃天地之祖，萬物之母，是以人人具一文昌，物物具一太極也。人能精修燥煉文昌大洞之道，究竟復歸於無極之中矣，虛無自然，人生自無中生有，至老復歸於無。

陰陽 奇耦 化生 天干 地支 以成 文昌 之圖



看無極圖，方知二炁五行所生之自二炁者，陰陽也，五行者，水火木金土也，因理而有炁，因炁而有文，文者天干地支也，陽動而生壬子，一數也，爲陽水，陰靜而生丁巳，二數也，爲陰火，再動而生甲寅，三數也，爲陽木，復靜而生辛酉，四數也，爲陰金，動而生戊辰戌，五數也，爲陽土，靜而成癸亥，六數也，爲陰水，動而成丙午，七數也，爲陽火，靜而成乙卯，八數也，爲陰木，動而成庚申，九數也，爲陽金，靜而成巳丑未，十數也，爲陰土。雖曰天干亦有陰陽也，甲丙庚壬戊爲陽干，屬陽，必動而成文，乙丁辛癸己屬陰，必靜而成文。地支亦有陰陽也，子午寅甲辰戌爲陽支，巳亥卯酉丑未爲陰支。五文已成，其名號曰五太，而經中再有五太，是爲十太，豈不貽識者所哂，蓋不知五行各具二炁，交感而方能生成五行，陽生之爲一太，陰成之爲一太，互相生化，以成天地之文，經云：真文肇生明，點火生真文，十德真文宣，橫文帝子寶，十佺人文結，皆以五文開廓，

故天地萬物莫不皆以之而生長。或曰：黃帝命大撓氏探五行之精而作甲子，豈在天地之先乎，其不知甲子先天地而生，此特因人而顯爾。天皇氏所起甲子十干十二支，先作攝提自寅上，今《爾雅》所載是也，後至庖犧氏作自甲上起，謂東方甲者，乃萬物始生木德之盛，故以甲始十干，陰陽二炁化生天干地支，在天爲天文，在地爲地理，仰觀俯察，探蹟索隱，推究源流，六十甲子爲天上六十位星辰，五行之炁所化八卦安鎮八方，今以六十甲子并六十四卦分布洞章，皆合妙道。

九皇上真炁，其文壬子，生天一之水，爲太易；

太中六炁清^③，其文癸亥，成地六之水，爲太中；

天皇上帝真炁，其文丁巳，生地二之火，爲太初；

晨中黃景炁，其文丙午，成天七之火，爲太和；

太一上元炁，其文甲寅，生天三之木，爲太始；

金闕上景炁，其文乙卯，成地八之木，為太清；


太素梵行初，其文辛酉，生地四之金，為太素；

太真九光輪，其文庚申，成天九之金，為太真；

太極五靈冲，其文戊辰戌，生天五之士，為太極；

太玄啓十明，其文己丑未，成地十之士，為太玄。


伏羲河馬之圖



經者數之體，數者經之用，凡脩文昌之道，不可不知數。蓋天地以數而運用，萬物以數而有生，數者，即太極中陰陽動靜是也。易曰：天數五，地數五，五位相得而各有合，天數二十有五，地數三十，凡天地之數五十有五，丹經曰東三南二同成五，北一西方四共之，戊己還從木生數，三家相見結嬰

兒，其文昌之謂乎。道即經也易也，易即數也象也，經云：以玄一之炁，太玄一音，弘帝一真道，又曰：從道妙一，善貸生根，孕玄分元，誕始傳真，化生諸天，原其起因，皆從一數。蓋玄炁一動而生水，次生土木，靜而生金火，從一至五，五行順布，又以六配一而成水，以七配二成火，八配三成木，九配四成金，十配五成土，此所以成變化而行鬼神。太極未判，此數混然於無極之中，是故天地人物生成也以數，敗壞也亦以數，而百姓日用而不知，至伏羲氏出，因河馬負圖，遂則而象之，以畫八卦。若知此數者，性命之道在其中矣，是以文昌咸備焉。故下卷言五太五行五老五符，生天立地，化育人物，莫非皆自九宮八卦中來，故宮卦是出乎二炁五行，蓋二五又起於太極無極而已。伏羲大聖人也，精思至道，玄感于天，泝天地之原，依盤古之化，得其身體髮膚，以為卦象。

大禹洛龜之圖



箕子作《洪範》，九五福：一曰壽，二曰富，三曰康寧，四曰攸好德，五曰考終命，凡人在世所願者五福，而不知所以進脩之道，當自洛書始，洛書之九宮，即《易》之用九，《文昌》之示九也。人能於此用意，則《易》之純乾，《文昌》之純陽，不約而會，故曰君子終日乾乾，自強不息，又曰綿綿若存，於此所謂求福不回也。洛書者，戴九履一，左三右七，二四為肩，六八為足是也。以節炁順逆，游行九宮，縱橫者皆一十五數，與河圖絡繹錯綜以成三才之道，誠經天緯地之數也。渾淪既判，萬物賴以生焉，至大禹因洛龜負出，象數始靈，禹以之理水叙九疇，箕子因之作《洪範》，文王因之而移易卦位，即太極之數也，故《文昌》云：示九統之法，傳九

光之符，皆以九爲用，蓋九爲純陽之數也，故經有三十六章，亦如乾元用九，無以異也，此三才之中性命根本，太易所謂易簡之道也，而人所不知，或流陰陽山水之家。欲求《洪範》五福，當窮究《文昌》九數而後可，上有九天，人頭亦有九宮以象之，地有九州，人身有九竅象之，斗有九元，人心有九孔象之，水有九河，人腸九曲象之。九數爲陽，人非陽不生也，禹傷鯀遭殛，精思冥想，欲復大功，故天授之以理水，皆合天地大造化之體用也。


伏羲氏先天八卦圖



河圖先洛書數千年出，是以伏羲得以畫先天八卦，即太極中所具五十五數是也。以此畫卦，似有次序，而先輩多以洛書九數爲河圖，是以劉牧因而授受，至今存焉。茲因《文昌》中探索，得合以十爲河圖，以九爲洛書，故

列其次序，無極之中已具此體，而秘蘊未露，始因伏羲時龍馬負圖而出，因而畫八卦，以一五七陽奇輕清之數，上而爲乾天，二六十陰耦重濁之數，下而爲坤地，謂之天地定位，乃太極生兩儀是也。以五數配一二三四，而爲老陰、老陽、少陰、少陽，是兩儀生四象也，以六七八九十交互配合而成八卦，曰一乾二兌三離四震五巽六坎七艮八坤，相對取象，曰雷風相薄，山澤通氣，水火不相射，縱橫皆九數，是謂四象生八卦也。是以人之頭圓象乾天，足方象坤地，身體象艮山，津液象兌澤，聲音象震雷，呼吸象巽風，血榮象坎水，炁衛象離火，豈非八卦皆備於我。故以易參同經旨，蓋《文昌》《大洞》之旨，尤爲幽隱，人或以爲難曉，不肯受誦，故今取諸經書中易見之意合之，庶幾善信男女，無問賢愚，悉皆省悟。天地未判，形如鷄子，中有渾沌氏，以清爲天，濁爲地，渾沌日長一丈，天地日開一丈，眼爲日月，身爲山，髮爲草木，津液爲水，名盤古。


文明王後天八卦圖



洛書後河圖數千年出，大禹得以理水，亦太極中之五行是也。蓋欲人順其性命之理則不汨之也，然則圖書止可以畫卦理水耶？曰：非也，實性命之體用也，先天後天，非圖書無以顯其體，而《大易》《文昌》，非先天後天無以著其用，故體用兼該，性命互顯，缺一不可，敬並書以示同志。經曰：八皇運九天，即八卦九宮也，八卦九章相爲表裏，故河圖洛書相爲經緯，先天先地已有之矣，文王因取河洛，紬繹而移位八卦，故以乾坤老陰老陽，已具三男三女，是宜退休於無用之位，故《易》乾於西北，移坤於西南，坎離陰陽正交於中宮，居子午正位，震乃陽交之初，故置之東方，兌乃陰交之始，故建於正西，艮巽陰陽駁雜而無交感，故位偏處一隅。而後天八卦周游於九宮之間，

五居中而寄位於二，曰二五同功，易帝出乎震，齊乎巽，相見乎離，致役乎坤，悅言乎兌，戰乎乾，勞乎坎，成言乎艮，而四時行焉，百物生焉，而易行乎天地之中矣。文昌與易，豈相□□，蓋人身一小天地，而文昌經緯於身中矣，人能純全而歸之，是無負於聖人之化育，則此經不為虛文矣。



九統之法



九光符者，乃混洞赤文九陽梵炁之所凝集成文，○初以始青之光炁開始青之天，凝太霄之宮於東北，次以太青之光炁開太青之天，凝青霄之宮於東方，次以始丹之光炁開始丹之天，凝碧霄之宮於東南，次以太丹之光炁開太丹之天，凝絳霄之宮於南方，次以始素之光炁開始素之天，凝景霄之宮於

西南，次以太素之光炁開太素之天，凝玉霄之宮於西方，次以始玄之光炁開始玄之天，凝琅霄之宮於西北，次以太玄之光炁開太玄之天，凝紫霄之宮於北方，次以太梵之光炁開太梵之天，凝神霄之宮於中央。九統者，以一帝統一天之事，故曰示九統之法，以會帝傳九光之符以集神，人初生，受九天炁方具形神，修行人九月功行圓，十月聖胎成，方可溫養，上真以九炁凝而成文，曰九光之符，以度人天，在法錄中具載，茲以神霄生神九天上統三十六天星曜，下統三十六壘土皇，中統人身中三十六宮，且三十六宮者，皆係上天布流真炁，灌注宮室，然後成人，《小救苦經》云：還將上天炁以制九天魂是也。三十六天三十六地，具在各章，今將人身三十六宮，分上中下三部以分布，凡人修誦是經，當須澄心默坐，存想自己心中三十六宮光明煥赫，宮中各有真人，放五色光芒，上接三十六天，下接三十六地，神炁凝集，上下相通，經所謂九統之法以會帝、九光之符以集神

是也。光炁凝定，然後調聲正炁，吟詠洞章，須以九遍為一過，誦訖一遍，回向上真并中下界鬼神，及自己祖先魂識，一一如意回施，略坐俟神炁稍散，徐徐離席，不可卒急，紊亂神光，鬼神呵責，誦經時不可言語，今開于後：



金丹者，乃人身中一點真陽也，與

天地同出，日月並明，泄之則成人，聚

之則為丹，經曰丹母，全真陽。真陽

者，鉛也，產在坤，為地，曰玄玄叔火王

者，汞種在乾，乾為天，故能奪天地以

為爐鼎也，曰携提日中王併羽月中晨

者，故能採日月為藥物也，曰冥化混離

坎、雌雄混玉房者，以黃婆為媒，歡合

木公金母、夫唱婦隨也，曰紫華領胎仙

者，十月聖胎圓成也，曰嬰兒為赤子

者，陽神突然現形也，混合三五宮者，

追二炁於黃道、會三性於元宮也，曰五

炁結十方攢簇五行也，曰太極主四真

者，和合四象也，曰黃庭涉北元者，真

陽上冲心府也，曰九遍還返七者，以易

卦進退抽添為周天火候也，曰體寶圓

珠映領玄蒼胡珠者，餌工夫金丹立

成也，曰舐煉五芽珠者，餌此金丹，則

證品大洞天一帝尊也。經中金丹語

意，不一而足，茲略舉梗槩。中者在中

之中也，非上下邊傍，佛氏云：不思


善、不思惡、正恁麼時，方見本來面目，

儒曰寂然不動，道曰念頭是也，不可聲

臭求，不可着體相索，常虛靈不昧，若

串其中，則此竅不明矣。

元始天王始以高上混沌太炁元天寶玉皇之炁結一寶珠命之曰蒼胡



經疑而成雲絢而成章三界鬼神咸承光音災罪解脫此經聚為蒼胡韻

昔薛幽棲註《靈寶經》，值仙人雙

子辨白先生二人相訪，談云，論道言及

五真遊神之妙，蓋謂此爾。五神在天

在人在物，皆主生化之事，若不得此神

主生生之運，則機亦息矣，故《度人經》

云：執符把籙，保命生根，出入華房八

冥之內細微之中，下鎮人身泥丸絳宮

是也，故《文昌》、《靈寶》、《黃庭》、《生神》



等經，皆具言之。五神散為萬神，聚則

復為一嬰兒也，萬神之名，不可一一備

載，茲略舉要，以便觀覽，在人精思冥

想，自然相感化現出自己身中，今開于


後：



夫人之身以萬炁凝而成形，萬神具而始生，既生，為嬰兒，純和冲粹，天理混如，即大洞帝尊之本體也，若修

《文昌》復歸於嬰兒，謂之形神俱妙。

王 炁 玄 化 符



嬰兒既成，化爲玄炁，謂之升入無形，與道合真，復歸於無極之中一〇而已，始知根源自此而生，自此而終。《大通經》云：真空無相，湛然圓滿者也。

玉清無極總真文昌大洞仙經序圖卷之一

- ①「吏」，疑當爲「史」。
- ②據前後文意，「四數」當爲「四數也」。
- ③據前後文意，「炁清」當爲「清炁」。
- ④□□，此二字，原書不清。

玉清無極總真文昌大洞仙經卷之二

東蜀蓬萊山中陽子衛琪註

發明經題

玉清者

玉清已有太易太初太始太素炁，形質具未始相離，則有大洞高上混洞太無元天寶玉皇之炁，以生元始，時號高上大有玉清宮，故大洞即太極也，時號龍漢上劫，《文昌》經所出之時也。

無極者

無極而太極，太極本無極也，五太已前，冲漠無眚，不可稱說，故曰無極。

總真者

乃總括天真地聖人神精魂六緯之姓名，蓋有是形，必有是炁，有是炁，必有是理。理者，天理也，純粹不雜，誠實無妄，釋曰實際，道曰真，儒曰誠，其實一也。誠者，天之道也，子思孟子發明已盡，既有此誠實之理，

必有主之者，即周子無極之真，二五之精是也。道曰杳冥之精，其精甚真，又曰真中有神，是以三才中各具此理此神以生。《莊子》曰：天地與我並生，萬物與我同體。此經包羅天地，囊括三才，無一處不實，故曰總真。

文昌者

文者，理也，如木之有文，其象交錯，古者蒼頡制字，依類象形。昌者，盛也，大也，言天地之文理盛大也，如伏羲則河圖之文以畫八卦，立三極之道。此經所以推窮三才中之文理性命，皆自二炁五行中出，故文昌星乃土炁所化，坤土之卦辭曰：黃裳元吉，文在其中也，艮土之卦辭曰：生萬物者莫盛乎艮，成萬物者莫極乎艮，故周子所謂陽變陰合，遂生五行，《度人經》云：五文開廓，普植神靈，而南上文華，光彩煥爛，故十四章云：南昌發瓊華，乃南極長生朱陵上帝南昌受鍊真人所治，見有上帝所賜注生真君八角玉印，所謂南

斗注生，不言文昌，而言南昌，蓋丹天世界文明之地，梵炁所化，是為南昌上宮，今南嶽衡山朱陵洞天，上應奎軫，始因奎壁垂芒，帝命主持斯文，壁位居亥，專主圖書，奎位居戌，專主文章，蓋奎宿有文彩，壁宿能藏書，昔嬴火之後，於屋壁得古文，故壁之於文，與有功焉，是以文昌宮有東壁圖書府。太微垣中，有南斗第五星文昌煉魂真君，又有太上九炁文昌宮，文昌上相次相上將等星，又有文昌圖流運以生化文物，是故天地之間，生成變化之道，莫大於此，故曰開明三景，是為天根，無文不

光，無文不明，無文不立，無文不成，無文不度，無文不生等語，實基於此。《易》曰物相雜，故曰文，是以《文昌》一經雜紐不貫，亦如易繫云變動不居，周流六虛，上下無常，惟變所適，又曰參伍以變，錯綜其數，通其變遂成天地之文，亦此義也，故文昌之在世者，乃教化之本源。大洞者

大者，雖天地之大不可加也，洞者，通也，萬物通有此理，即太極之謂，太極既判，天地人三才各極其位，所謂物物具一太極，故總而言之是曰大洞，即邵子所演，箕子所陳，《皇極》之道同義，經籙法皆有三洞，而大洞最高。

仙經者

經者，由也，萬物公由之正路也，儒《詩》、《書》、《易》、《禮》、《語》、《孟》、《春秋》皆經也，修道之謂教，故曰，仙經。元始因人之所稟賦各具是理，故修明品節，以為教化之本，使鬼神并人各返本源，就所稟受處修進，以為學道求仙之捷徑也，人能原始要終，反求諸其身，則天地萬物皆備於我矣。

文昌準易

題曰：《無極總真文昌大洞》者，似為倒持，有所不合，當依無極文昌總真大洞。無極者，即太極中陰陽動靜也，文昌者，五行也，總真者，乾道成男，坤道成女也，大洞者，化生萬

物也。經曰萬炁生萬神是也。故曰太極圖是一部《周易》，無極圖乃一部《文昌大洞》，已於圖中明之，雖然久則難變，恐貽衆疑，姑仍舊貫。且此《經》與《易》無異，《易》以乾坤為門，《經》以大地為主，門，用也，主，體也，仰則觀乎天文，俯則察乎地理，理亦文也，天文者，六十甲子日月星辰布列三十二天也，地文者，六十四卦配於三十六壘也，人文者，凝集三十六宮三百六十骨節中神炁也，即《度人經》三十二天外彌羅天清微天禹餘天大赤天是也，三十六地者，九壘土皇，每壘分四土皇，共三十六土皇，總治方輿衍而伸之，則乾之策二百一十有六，坤之策百四十有四，二篇之策共三百六十，以應周天太陽行度之數也，小而陽爻因之，凡陽爻皆三十六，以應四九金數也。今大洞首章四言者二十二句，計八十八言，另安於上以應無極，外五言正經三十六章，計六百二十句，每句當易卦一爻六十四卦，計三百

八十四句，應之以乾坤坎離四卦，計二十四爻，古人處之四正，非也，蓋乾坤為大父母，而生六子，坎離乃萬物之父母，生生之根也，當置太極之中，其六卦以三百六十爻分布於十二月，上應周天火候，餘二百三十六句，將二百句分布四正，以應四象，太易太初太始太素每方五十句，合得八句卦，每卦六爻，計四十八爻，外取二句以分卦之奇耦陰陽，而四象備矣，復取三十六句納於中宮，以應太極得卦六，所謂金入土釜丹鼎圓成，經計四千九十六言，即《易》變四千九十六卦也。以此解釋，則知《文昌》乃一部《周易》也。《易》有聖人之道四，《經》有聖人之道五，窮天地之原者，尚無極，保性命之正者，尚總真，究陰陽之理者尚文昌，神變化之妙者尚大洞，咀辭味之奧者尚仙經，乾坤毀則無以見易，陰陽隔則無以見《文昌》，《經》亦易簡之道也。君子所居之安者，《經》之叙也，所樂而詠者，章之辭也。顧不妙哉。其

餘觸類以長之，將以俟於方來。琪載拜。

祖師太玄道父牛孳先生發問啓請并集經，祖師九天開化元皇帝君，重修玄契并叙經，祖師文昌皇人玄聖道君主文昌圖并掌經。

《文昌大洞經》，以太玄道父為祖者，乃天上集經之師也，以元皇帝君次之者，乃此經初出流傳人間之祖也，文昌皇人次之者，乃幹運生炁、主持文物、輔佐皇猷之祖也。按《帝君內外傳》并《化書》及經叙，帝君於周武王乙巳歲，生於吳會，即今平江是也，受三真人《文昌大洞經》，後以看誦之勤，屢獲感應，受金像、法籙，行持救濟有效，遂證大洞妙行聖果。故作叙并玄契以開化天下，四海未嘗無之，然以累經兵火，或絕而不嗣者有之矣，今行于蜀，而蜀人深信者，以帝君在蜀為大神，自唐至今，累朝崇重，對王建廟，所以帝君專以此行化救人，其間亦多有因此得道者。要之，此經自周武王時流傳人

間，至今已二千有餘年矣，故其字或少有舛失，亦無足怪，尚幸累世至人證訂有次，誦者亦不必疑彼惑此，但至誠精一，行得一句亦可以為上仙，或謂與《上清大洞》不同，琪曰今三山皆有經籙，法亦各不一，況此乃《玉清文昌大洞》明達之士皆歸一道，識淺者固有異。

文昌勝會

文昌會上，有通悟禪師、波淪禪師、蜀中諸禪師，皆觀音菩薩化身，並與嗣祿道場，號曰心珠會，仍以帝君為主，每歲各師生辰，諸山釋子大作勝會，廣化香火，慶贊稱賀，官負士庶欽仰者比比焉，故凡二教經儀，多釋道混融互用。又有寶光天尊、圓通道場、敷座搖帝鍾彈梵語咒，九朝行道，亦有水陸科等，其間未喻者，或謂語意不純。非不純也，大抵道之一字，唯理是適，理之所在，其道大同，奚分於二教，唯其弗能推致窮極則生異見，是以疑惑，不能堅確此心，此心尚不能堅確，安能求道理於純一哉！矧大帝世稱碩儒，

刻意墳典，於晉太康中，舉家歸風洞登仙，累朝崇重，以爲斯文宗主，先遇太上賜丹，獲證道果，後遇釋迦授記，又證大乘，故於三氏門中，維持正教。今

皇元累降靈書褒崇，易靈應廟爲右文開化之祠，祠者國家之祠祀也，與諸神廟號不同，又加封輔元開化文昌司祿宏仁帝君，諸神中膺帝號者極鮮，琪蜀產也，蜀祠不在言宣，自訪海嶽，每至必訪靈迹，在在有之，吳山又最尤，是知香火之盛如此，其保安家國，利濟幽顯，其功用豈可量哉，又知文昌宮官屬總總井井，今將文昌家慶聖諱并誕辰開具，奉文昌香火者宜知之。

大帝累世諱：善勳、忠嗣、孝仲、如意、勳、浚。已上不忘。古名惡子，後去中下二字，唯諱亞，字靄夫，書詞疏者，切宜避之。二月初三日誕。

左司獨孤氏，七月十五日生，乃許旌陽後身，因斬邛州虜功，累朝封八字王，今掌文昌左班，領官屬一千二百人，封廣佑嘉應昌澤孚惠王。

右司李斌，八月十五日生，以破苻

堅功，累朝加封八字王號，今掌文昌右班，領官屬一千二百人，封英惠忠烈翼濟正佑王。

紫微垣文昌將相星君，太微垣文昌三公內座星君，少微垣文昌處士博士星君，文昌上宮周文憲王，大成至聖文宣王，太清九炁文昌君，太清紫蓋宮夫子君，東井清明君，清明了決吏，九奇宮五經孔炁君，文昌內侍六仙，白鶴蓬萊長壽桂花菊花桂香外殿如意四將，左右前後四金城文昌北府左右二丞相，左右二太史蘇黃二真人，御史呂真人，長史張真人，天簡註授司侯真人，隨機應感姚真人，逗機赴感秦真人，混一元皇君，北府統帥武經公，左金吾使吳將軍，右金吾使狄將軍，掌如意劉將軍，主管兵籍七聖將軍，木馬烽火快利巡獵鵬虎等將軍，鸞府省臺一百二十員大將，三十司諸靈官，監真宅監雷抒監邊疆將軍，文昌府左右通引判官採訪遊奕使、鳳凰山應夢土地真官。

具位臣姓某，謹炷心香，虔伸供養：

三清三境大羅高真三寶上聖金闕昊天至尊玉皇上帝，大洞祖師太玄道父牛孳先生玄天上帝，祖師九天開化主宰元皇上帝，祖師玄一真人鬱羅翹，玄二真人真定光，玄三真人光妙音，祖師東華大神方諸青童君扶桑山暘谷神王，祖師太素三元君。祖師青城山九天丈人儲福定命真君，廬山九天採訪使者應元保運真君。祖師太極真人安度明、徐來勒，霍山王元甫，鎬京杜冲，祖師申泰之，祖師西城總真王君王遠字方平，小有天王太素清虛真人王褒字子登，祖師南山司命夫人紫虛元君魏華存，女冠徐練師，周武穆公主，周惠抃真人，祖師三天左相保和真人王昌運，大洞嗣師王道淵，潤州太守唐若山真人，祖師全真達道真人張如珍，葆光襲慶真人張曇要，祖師楊大明，祖師銀青光祿大夫崇玄館大學士廣成先生劉元靖，祖師鄧欲之，祖師冲和見素真人施存，祖師楊太初，聶紹元，高雲舉，劉根真人，祖師天師真人薛季昌，薛幽棲，瓊瑤真人寶峰衛寶元字桂之，祖師

黃廬子，廬山王三一，南嶽彭蔡二真人，謝脩通，聶師道真人，祖師龔長慶、向子文、田虛應、俞靈瓚、陳與明、蕭靈護、蕭惟億、陳先生真人，龍虎山、茅山、閭皂山歷代祖師真人，歷代傳經傳錄傳道祖師真人，恭望真慈，俯降經筵，證明修誦，入意有茲願悃，控告上真，伏願垂光，印知修詠，臣某下情，無任戰慄之至，再拜以聞。

平坐存想法

謹出臣某頭面身中五臟六腑真炁，生炁神人一合凝集臣某身中，屯駐所居金房玉室，毋請散亂，急急如律令！

髮神蒼華太元君，腦神精根泥丸君，眼神明耀英玄君，鼻神玉瓏靈堅君，耳神空閑游天君，舌神通命正倫君，齒神鏗鋒羅千君，面部之神自相守，攝魂還魄永無傾，急急如律令！

心神丹元守靈君，肺神皓華虛靈君，肝神龍煙含明君，膽神龍曜英明君，腎神玄明育嬰君，脾神常在魂亭君，重樓一十二真人，五臟六腑身體精，皆在心內詠天經，晝夜存之自長

生，急急如律令！

九靈太妙白玉龜臺金真萬炁祖母元君，心中一真天精液君，字飛生上英，回風混合上真聖母中候元君，名啓珠，胃腕二真堅玉君，字凝羽珠，雌一帝真九光聖母，精血三真元王君，字黃寧子玄，斗中大女儔立蘭，肝中四真清明君，字明輪童子，斗中真仙少女郁墨子，脾中五真養兌君，字太昌子，斗中太一神君，字頻運珠，肺中六真上元素玉君，字梁南中童，大洞帝一太素尊靈父寧母精，腎中七真玄陽君，字真光，東方青帝彫梁際，膽中八真合景君，字北臺玄精，南方赤帝長來覺，泥丸九真帝昌上皇，字先靈元，西方白帝彰安幸上玄元父君叔火王，字左回明，北方黑帝保成昌上玄元母君高同生，字右回光，中央黃帝含神光紫素左元君翳鬱仞，字安來上，帝皇太一重冥空，字幽寥無，白素左元君啓明蕭仞，字金門上，九帝尊神日明精，字衆常生，黃素中元君圓華黃仞，字太張上，上玄九帝尊神君，諱明真，正一左仙仲成子帝

賓，字西華，三素老君罕張上，字神生道，正一右仙曲文一光堅，字琳和，玄一老子林虛夫，字靈時道，左目童子飛靈，字陽光，太微小童干景精，字會文子，右目童子晨嬰，字陰精，玉帝君逢陵梵，字履昌，靈胎中元真精魂，字元君，無英公子玄元叔，字合符子，胎中白炁君務玄子，字育上生，白元洞陽君鬱靈標，字玄夷絕結，中青炁君案延昌，字合和嬰，白元君朱晶，字明師，節中黑炁君斌來生，字精上門，白帝君彰安，字西華胞，中黃炁君祖明車，字神無極，太一尊神務猶收，字歸會昌，血中赤炁君混離子，字叔寶堅，中央丈人理明初，字玄度卿，太一精魂玄仞子，字盛昌，中央司命君神宗，字理靈襟，元君精魂保谷童子，字明天，日中司命接生君，字道靈，帝真精魂幽臺生，字觀上生，命門桃康君孩道康，字合延精，天帝精魂理維藏，字法運珠，月中桃康君方盈子，字運梁，司命精魂發紐，字慶玄，泥丸天帝三一君伯史華，皇一之魂上歸，字帝子，三一帝真肇勒

精，字中玄生，天帝紀魂照無阿，字廣神，絳宮中一丹元君神運珠，字子南丹，太帝精魂陽堂玉，字八靈君，絳宮中輔卿中光堅，字四化靈，天帝九關魂回祿道，字絕冥，命門黃庭元王君伯史原，肺部童子素明，字元英，黃庭君始明精，字元陽昌，九元真男拘制，字三陽，黃庭下卿歸上明，字谷下玄，九魂君玄精育日中王赤景，字翳逸，寥月母字靈素蘭，九魂神渾化歸三部八景神。三十六宮生炁君，照依八景運常寧，廣霞參神天註下，存想思茲不重贅。

謹集臣某身中五體真官、五臟六腑、七政九宮、十二神室、四肢五體、筋骨腦髓、皮膚血脉、九竅榮衛，一百八十靈關，三百六十骨節，千二百形影，萬二千精光，左三魂，右七魄，三部八景二十四神，身中三萬六千人神，吾是太上之子，元皇之孫，頭冠朱雀，足履玄武，左按青龍，右據白虎，使臣某心不受邪，肝不受病，肺不受姦，腎不受死，膽不受怖，胃不受穢，一身清淨，萬邪不干，吏兵導引，五神侍側，急急如律

令！

精思法式

凡欲持誦《文昌大洞經》，當以清旦人事未交之際，香湯沐浴，更服新衣，齋戒入室，然燭焚香，北面叙立，持咒灑淨，祝香告聖，叙意禮請，獻九分茶并果食隨意，如無茶，但淨水九盞亦可，務在至誠，不必拘執。然後面東安坐，朝取生炁，屏息定慮，毋得雜亂妄想，雙目內觀黃庭，空無所空，須是靜定。久之，即存肝中青炁，化爲青龍，立左肺中，白炁化白虎，立右心中，赤炁化朱雀，立前腎中，黑炁化玄武，立後，己身坐九色蓮花座，上下有九頭獅子乘座，三元將軍四聖元帥侍立。次思頭上天中三寶九霄生神上帝，放九道光芒迸射兆頭上九宮，并身中九戶。次想三十二天帝六十甲子本命星官，並垂光下燭兆身中五臟六腑三十六宮，下至三十六地土皇君湧泉至泥丸，通天徹地，虛明晃朗，一一分明。次存肝青炁化無英，肺白炁化白元，心赤炁化司命，腎黑炁化桃康，太一在頭，此

五神乃萬神之宗，故先存想。如道士朝元，冠服各隨方分服色，侍立左右前後。次存萬炁萬神，一一如法持咒，飭神心存口誦，事畢，即微微開聲誦經，不必羸炁哮吼，高聲唱叫，但在存想精密而已，此乃古仙持誦三洞經法，有侍經五帝玉童玉女護法，威神隨經匡護，不可輕忽也。所載經驗備悉，可以潛觀熟翫。或天真下降，或地祇鑒臨，或自己身中神識出現，如蕭唯億四獸現形，皆是存思精詳所致，好道之士各宜遵行。

文昌大洞仙經敘

九天開化主宰澄真正
觀寶光天尊叙并玄契

予生吳會，居事畎澮，忽於鋤下得一金像，詢之父老，曰乃元始天玉相，昔大禹理水，冶金爲像，以鎮方嶽，予香火奉事，未嘗少懈，因海風翻浪，人力不能支，予爲衆捨金像，投駭浪中，由是風潮遂回，一境獲免。思仰之久，

一夕，於沙磧中，有光亘天，掘之，仍得舊像，歸築宮安奉，同邦人共事之，積年靈感，不可勝紀。予考妣不幸，死於瘟疫，予喪葬廬墓，培壅既周，偶有三神人，葛巾羽褐芒鞋訪予，以《大洞仙經》一帙賜予，曰：晨夕誦之，必獲善果，於三才中，上可以資奉父母祖先魂靈出離幽苦，中可以滅罪消災，延壽益筭，下可以庇族救人，同獲保全，汝可捨金寶拜吾二人，吾爲傳奏。予即日依命設齋，貢金繒奉師受之，爾後，晨夕誦持不輟，屢獲靈應，因盛暑洪水瀰浸考妣墳塋，予禮奉金像，誦《大洞經》，期以千卷爲終，以保無虞。次年秋雨霖霖，傍溪湧漲，數流爲一，予益恐及，水落視之，則墳前溪谷變成堅壠，廣一里餘，自是松楸無害。予嘗思父母死於疫疾，恨瘟鬼之害，切骨爲讎，幽明路殊，力不能報，旦夕勤誦《大洞仙經》，虔禱金像，願賜威力，以治瘟鬼。又三年，忽夢金像語予曰：《大洞仙經》汝熟記矣，《大洞法錄》汝未見也，今當授汝，以治邪魔，非惟可以契

汝初心，亦可以佐天行化，助國救民也。袖中出書二件，予拜受之，一曰《大洞錄》，二曰《大洞法》，既覺，此二書在予枕前，因設齋置匾收貯。擇日出而閱之，讀至大洞天騶甲卒一萬人下度之句，忽風雷晝暝，金甲朱綬者無數，列於予前，俯而請命，一人執紅旗立於衆先曰：願聽使令。予方恍惚，不覺厲聲謂之曰：吾要汝等往治瘟鬼，此鄉張屯使家，闔門病瘟，爲吾驅來，語畢，一持旗者領百餘人入其家，俄頃，執鬼五人出，有蒙虎皮者，冠雄雞者，貌若人者，若烏頭者，若驢頭者，所執有水火羽翳斧鑿之具，予怒而叱之，將滅其形。彼乃有辭曰：元伯等歲運所生，歲炁所成，所遊有方，所病有人，陰譴重者受其災，天命絕者致其死，亦非元伯等所敢私，始自三官五嶽上奏玉帝，呈世人罪狀，由是帝命行下三官五嶽行病，年王案分給牒，分遣元伯等一依定籍行之，若蒙真官賜以寬貸，自後願遵約束，遇有行瘟，見真官符錄所在，即不敢至。予因依經法授

以教勅而去，閭里病瘟者，予與之符法，皆得全活。予因以此法錄救人疾疢衆矣，名聞遠方，士庶官吏踵門求治者，不可勝數，予積玄功妙行，皆由持此《大洞仙經》，而獲《大洞法錄》，故能全收神功，立正除邪，濟生度死，消災延壽。其後冥冥中有大力鬼神社廟英爽來求予誦經，回施者皆謝云：乘真官經力增助威德，遷神善籍矣，或有沈魂滯魄不得往生，託夢附形來求予誦經資薦者，皆謝云：乘真官經力已出苦趣，俱得更生矣。應遇天行時疫，侵染不止，但誦此經，行法錄中遣瘟符絕瘟符止瘟符，差遣天騶甲卒已上收瘟食瘟吏，收毒食毒吏，收邪食邪吏，收炁食炁吏，收鬼食鬼吏，收殃食殃吏，收精食精吏，治病神醫吏，誅符破廟吏，乃正一威猛九等將等九部，各領甲卒，及北方黑騎天官五億萬騎、蒼老麻姑金剛力士等收捕之。先牒年王，次申岱嶽，分委城隍社令，劄遣瘟疫使臣，聞經不依盟約，拒止不伏退散者，然後奏而滅之。

夫大道尚慈，太清常善，上帝好生，推仁止殺。行經法錄者，不可徇私苛暴，以招天譴，但以禮遣之，以經奉之，以法錄威之，以善功勸之，亦方便脩行之捷徑也。行此經法錄之士，宜在詳酌以立玄功，此經能解冤結，止譴考，釋陳咒，解觸犯，安墳宅，寧軍府，息甲兵，止疾疫，祈風雨，降祥瑞，致蠶穀，保形命，庇族屬，救鄉社，安邊陲，禁蟲虎，止旱澇，滅妖怪，息群凶，退消暗曜惡星，安奉祀典鬼神，資薦祖先魂識，賑濟窮魂滯魄，此乃文昌二十四種上妙功德，以應周歲二十四炁皆可設齋誦經，行法以禳謝之。其餘治病馘毒，有紫庭天醫神方，乃禹皇金后之餘恩及乎萬世，使人無橫夭之傷，時免札瘥之患，奉教之士，當尋訪受習，以取玄功。予證果太上不驕樂育天帝澄真正觀寶光慈應更生永命天尊，實由誦經之勤，遂臻上清之貴，得受誦者，勉而行之，願與同文昌一會中人，齊登妙行。謹叙。

元制誥

上天眷命皇帝聖旨，維明有禮樂，

維幽有鬼神，妙顯微之一貫，在天爲星辰，在地爲河嶽，形功用於兩間，矧能陰隲於大猷，必有對揚於懋典，蜀七曲山文昌宮梓潼帝君，光分張宿，友詠周詩，相予泰運，則以忠孝，而左右斯民，炳我坤文，則以科名，而選造多士，每遇揀於菑患，彰感應於勸懲，貢舉之令再頒，考察之籍先定，賁飾雖加於渙汗，徽稱未究於朕心，於戲，予欲文才輩出，爾丕炳江漢之靈，予欲文治，宣昭爾濬發奎璧之府，庶臻嘉號，以答寵光，可加封輔元開化文昌司祿宏仁帝君，主者施行。延祐三年七月 日下

七曲聖號

金闕昊天太師、混元內輔三清上宰大都督府、都統三界陰兵行便宜事、管天地水三界獄事、收五嶽四瀆真形虎符龍券、總諸天星曜、判桂祿嗣籍、上仙元皇真人、天台丈人五炁君、司祿職貢舉真君、編修飛仙列籍掌混天造化淪洄救苦天尊，筆端無一事之不言，分身無一民之不救，九十五化之昭乎日月，億千萬劫之拯乎黎民，全忠孝之

大倫，示臣子之彝式，威光自在、道德無爲、南極長生真王、九天定元保生扶教開化度人主宰、長樂永佑十號圓滿慈尊、糾察三界禍福事、證果定慧王菩薩迦釋梵正如來、太上不驕樂育天帝、玉清內境清淨道真、身現紫微巖、手執如意杖，普濟諸苦，統御萬靈、都統混天、誠心接物萬天教主、隨願慈應天尊、大聖大慈大仁大孝、無邊無量至妙至玄九鳳闕右丞相，元皇上帝新冊輔元開化文昌司祿宏仁帝君、祖師澄真正觀寶光天尊。詩曰：天封并寵錫，元始昇真靈，數足三百字，功侔三洞經，真仙互傳誦，陰符莫與京，若人持念者，世代享亨榮。

十號圓滿尊號

澄真正觀天尊、寶光慈濟天尊、靈感慈應天尊、注祿定籍天尊、消魔護國天尊、慈悲應感天尊、淪洄救苦天尊、消劫行化天尊、隨願靈應天尊、更生永命天尊。

玄帝聖號

北方太玄湛寂天大梵龍阿境、天一長生闕、瓊瑤紫極宮、體道凝玄、變

真離相、化身萬億、普現諸方太極真宗
太玄道父、洞神金闕祖、普光弘濟尊、
靈通太妙仙、八威九光聖、執洞淵帝心
印、秉陰明斗極符、統玄武右弼司判、
左領勝府院大弘慈願變現威神、誓斷
妖魔、救護群品、匡扶劫運、保濟國民、
威德無邊、神通浩博、受蒼胡頡寶、持
檀熾鈞音、萬行周圓、神通滿證大悲大
願大聖大慈、紫極元皇玉虛師相、玄天
元聖仁威上帝金闕化身天尊。

文昌皇人聖號

太極上真九疑主宰文昌皇人玄聖
道君、東海廣桑山真君、闡猷大帝、興
儒盛世天尊。

鄭淵藪真人大洞經贊

讚嘆寶經 甲一
大洞真經本大乘，淵深蘊奧極玄冥。
十方三世諸仙聖，修習功成達始青。

具宣玄妙 乙二

三洞三乘未易涯，虛皇妙語絕纖瑕。
諸經萬法歸宗祖，解悟登躋浩劫家。

奉勸當世 丙三

帝王宰輔及公侯，州牧諸官與庶流。
富貴榮華無別事，總真大洞究玄猷。

誠諭三教 丁四

緇黃二教若殊途，聞禮聞詩君子儒。
咸可誦持真大洞，先天先地一虛無。

誘引勸諭 戊五

全真學道衆王民，萬法千門枉用心。
大洞仙經持萬遍，虛皇老子自知音。

善信男女 己六

世間文武衆曹僚，娼妓閭閻比比儔。
咸可率心持大洞，罪根削滅與神遊。

決定證果 庚七

大洞真詮異衆經，登仙入聖謁玄真。
饒經八萬塵塵劫，圓證虛皇無上人。

憂嘆愚俗 辛八

咄哉蠢蠢未明徒，豈識浮黎黍米珠。
大洞度人元一體，等閑平地達玄都。

方便勸勉 壬九

若欲修行達上乘，爭如大洞幾篇經。
盡心盡性修身法，悟得高昇大有庭。

因緣際遇 癸十

予因諸子毀斯經，述頌稱揚讚此經。

功德巍巍無盡藏，虛皇妙道本無形。

元皇大天帝大洞經贊

因由緣起 歲君

始自蒼胡檀熾音，結成雲篆度天人。
太玄道父親求受，下世方聞大洞經。

修真學道 立春一

大地凡夫學悟真，仙源路杳實難尋。
欲知捷徑无差錯，口誦心持大洞經。

祈祿仕保子嗣 雨水二

宗祖前生善力輕，今生祿嗣頗艱辛。
禱祈欲得如君意，何似勤看大洞經。

消弭災異 驚蟄三

日月無光苦併吞，星辰錯度紊天文。
上消天厄寧凡庶，至土同宣大洞經。

祈風雨致蠶穀 春分四

旱魃爲災雨若金，蟲蝗水澇穀無成。
普教豐稔無饑饉，祈禱全憑大洞經。

誘化凡庶 清明五

工賈農商與四民，貪求不覺業隨身。
忙中好割閒心力，習誦文昌大洞經。

寧軍府息兵甲 穀雨六

府庫資財甚滿盈，兵戈永息樂昇平。
民歌有道圖長治，報國勤看大洞經。

安奉祀典鬼神 立夏七

社廟神祇與百靈，欲求陞擢蓋無因。
遷名善籍增威力，旦暮須聽大洞經。

資薦祖先魂識 小滿八

眷屬宗親父母魂，久留地府不超升。
欲思薦拔緣無力，齋戒勤看大洞經。

除豕訟絕徵呼 芒種九

豕訟徵呼累後人，又兼譴告在天庭。
生生世世遺殃咎，解止宜看大洞經。

解觸犯安墳宅 夏至十

或爲營修與築墳，興工動土犯凶神。
致令宅宇多灾咎，解息宜持大洞經。

除瘟疫 小暑十一

行病年王統五瘟，遍州歷里害生民。
保全鄰族無傳染，嚴潔同看大洞經。

救疾病 大暑十二

月厄年灾久染身，尋醫問卜與求神。
不能解離無門告，命道皈依大洞經。

拯濟窮魂滯魄 立秋十三

六類冤親男女魂，冥冥漠漠在幽陰。

普教受煉生天界，好與頻看大洞經。

解冤結 處暑十四

六道冤家結得深，冤冤相報幾時停。
欲令各各生歡喜，除是聽聞大洞經。

稱嘍咒 白露十五

或爲爭財或爲嗔，一時忿怒叫神明。
結成鬼訟何時了，解雪無非大洞經。

息群兇 秋分十六

疾病喪亡不離身，官灾盜賊苦侵凌。
財消物散如冰雪，保佑當持大洞經。

滅妖怪 寒露十七

木石狐狸猴犬精，拋磚放火現人形。
作威作福求淫祀，殄滅宜看大洞經。

禁蟲虎 霜降十八

居處山林與獨行，蟲蛇狼虎每傷人。
尋聲迴避無遺毒，住坐留心大洞經。

開心志啓聰明 立冬十九

士子儒生茅塞心，神童應對不聰明。
揮毫欲得如神助，先好常持大洞經。

保形神 小雪二十

如幻如泡是此身，炁精神裏好修真。
保全形命同天在，熟玩文昌大洞經。

教誡富家 大雪二十一

莫恃家豪積萬金，天司奪祿易危傾。
有時正好修功德，割己刊行大洞經。

述古應驗 冬至二十二

一片真心達上清，感通得授自三神。
此身位證天尊果，只爲勤看大洞經。

普勸善信 小寒二十三

聽我重言大洞經，斯文玄奧果難名。
無邊功德莫思議，普勸凡夫不可輕。

收因結果 大寒二十四

元始天王說大乘，有緣方遇此尊經。
若能終始勤修誦，共作文昌一會人。

仰啓頌

仰啓三清境無上三境尊、元始大

法王大慈真教主、玉宸大道君、太玄真
道父、仰稽大羅天無上玄穹主、仰啓三
清界侍宸諸真、衆蒼胡頡寶珠所結《大
洞經》，妙道難思議，玉章生萬神，大慈
元始尊，金像出地戶，化現三神人，葛
衣贈金寶，夢中袖二書，錄法並相授，
變化現文昌，隨願隨靈應。臣今淨三
業，永斷血屍根，奉符入玉京，稽首黃
金闕，一心頭面禮，元始大法王，惟願

大慈悲，開受臣所請。願臣默想念，合符帝一前，越度仙黃庭，俱躋太漠外，七祖斷玄滯，受事會王皇。願臣諷誦時，百靈皆會集，音徹通萬天，流響達九地，成就一切願，如經所稱述，從此漸進修，成道事諸聖。

禮請頌

經筵諸孝友，金石矢初心，一禮一稱名，皈依七曲主，注想始青天，先天長壽母，注想紫雲巖，文昌真國土，後天慈父母，化現桂香宮，孝子及慈孫，列見侍慈容，願受真信禮，放大如意光，隨心隨夢應，嗣祿互儲祥。願我侍慈親，生生榮鶴髮，願我逢聖時，步步榮寵渥，願我處生方，厚生富財寶，隨念如意光，隨方躋壽域，願我因緣熟，學道得神仙，願我業垢空，惟心即淨土，普與人天衆，出離諸苦門，漸進漸修持，量緣證諸果，金石一真心，真心歸七曲，諸佛諸天尊，心香同贊祝，願與諸經生，一心歸命禮。

至心皈命禮

玉清聖境，清微天宮。鬱羅蕭臺

之中，森羅淨泓之上。現有爲之梵相，具無極之神通。敷演真玄，破無有色空之礙；拯提趣類，絕智愚高下之分。妙用難窺，靈機罔測。大悲大願大聖大慈無量度人元始天尊。

至心皈命禮

北方境內玄武位中。始從金闕以化身，終輔玉皇而斷惡，修真學道，功成於四十二年，拯世度人，澤被於千萬億劫，有祈皆應，無願不從，威德稱遂於乾坤，願力洪深於海嶽，功過必察，賞罰無私。大悲大願大聖大慈玄武助順靈應真君、玉虛師相玄天元聖仁威上帝、終劫濟苦天尊。

至心皈命禮

始青天上元命化初。一炁未漓，含七曲真元之粹，九天肇始，包三光精體之全，鸞機無昧，兆之可名，鶴質仰清，高而莫議，先天先地之慈母，不古不今之婉容，陽回十月五日之春，教演三綱五常之祖，壽綿長壽，形賦無形，載觀本行集之跋經，莫測始青天之證道。大悲大願大聖大慈七曲初劫賦形

先天長生壽母太極元君十月初五日誕。

至心皈命禮

桂香內殿文昌上宮。道體混成，含九十五回之化，真元未露，儲三萬六千之精，開後天不老之鸞書，本青霄莫測之熊夢，神父之大慈父，至人之上善人，脉壽三綱五常之根，心包百行萬善之體，皈依莫盡，稱讚何忘。大悲大願大聖大慈七曲聖父、顯應慈佑仁裕令德王、證果長壽王菩薩儲真衍慶天尊諱隆祖，二月十一日誕。

至心皈命禮

桂香內殿文昌上宮。淑質春和，含太真之淑氣，清光秋湛，蘊七夕之清輝，包龍象於未漓，隱鸞機於不露，劍泉之大慈母，蓬萊之上善人，產萬世之綱常，生九天之名教，皈依莫盡，稱讚何忘。大悲大願大聖大慈七曲聖母、昭德積慶慈懿恭惠妃、證果保光菩薩嗣慶儲祥元君戚氏，七月七日誕。

至心皈命禮

桂香內殿文昌上宮。九十五回，種善果於詩書之圃，百千萬化，培桂根

於陰鷲之田，自雷杼炳靈於鳳山，至如意儲祥於鰲岫，開人心，必本於篤親之孝，壽國脉，必先於致主之忠，應夢保生，垂慈憫苦。大仁大孝大聖大慈神文聖武孝德忠仁王、新册輔元開化文昌司祿宏仁帝君、澄真正觀寶光慈濟天尊諱亞，二月初三日誕。

至心皈命禮

桂香內殿文昌內宮。懿範冰清，掬九天之霽月，仁心春粹，扇七曲之家風，婉儀入侍於親闈，慈淑天全於母道，上下一堂之和氣，古今萬世之春臺，應夢儲祥，因心演化。大仁大孝大聖大慈恭順淑應德惠昭懿皇后、證果定應菩薩冲和洞妙元君先仲氏諱質正，五月初三日誕，後興唐公主李氏。

至心皈命禮

桂香內殿文昌輔宮。聖德慈祥，一念嗣家聲之脉，神功顯著，九天寬帝父之心，戲綵雲巖，詳無體無聲之禮樂，問安月窟，傳有典有則之箕裘，錫五福於生生仁孝之家，榜三元於奕奕詩書之裔，因心立教，應夢儲祥。至仁

至孝至聖至慈聖長子嗣德履孝王、文昌衍慶真君諱然明，石三月初二日誕。

至心皈命禮

桂香內殿文昌輔宮。淑質春柔，粹婉容於侍問，貞心玉潔，儼懿範之清高，相成震長之家聲，默識兌和之闡則，教流愷悌，化洽冲和，應夢儲祥，因心錫慶。至仁至孝至聖至慈聖長婦、善助顯懿循孝夫人、文昌靜應天君韋氏，八月初一日誕。

至心皈命禮

桂香內殿文昌輔宮。父子一家，全克孝克慈之道，君臣千載，盡止仁止敬之心，模範人文，本綱常而立教，準繩世道，根詩禮之趨庭，幹蠱於陰鷲之天，福謙於行藝之圃，因心演化，應夢儲祥。至仁至孝至聖至慈聖次子、昌德立孝王、文昌司祿真君諱懋陽，正月初一日誕。

至心皈命禮

桂香內殿文昌輔宮。孝德謙柔，稟一元之淑質，貞心坤順，婉七曲之閨儀，五婦嶺前揭問安之華典，三潮水上

流積慶之清源，應夢儲祥，因心演化。至仁至孝至聖至慈聖次婦、助順惠懿克孝夫人、文昌嗣慶天君韋氏二月十八日誕。

至心皈命禮

桂香內殿文昌內宮。蟾魄凝祥，根父天之慈愛，鸞心斂福，陶母德之雍和，霜姿雪質之清，不物於物，春風秋月之抱，自天其天，內觀萬境之空幻，得九天之道，心清莫議，德婉難名。至仁至孝至聖至慈淑真妙靖懿孝公主、文昌萬壽天君四月十六日誕。

至心皈命禮

桂香內殿文昌內宮。凜凜天姿，道矩肅家聲之粹，挺挺風烈，仁聲流化治之新，雷霆間發於春和，人人開悟，雨露旁周於天表，物物生成，應念儲祥，炳靈應夢。至仁至孝至聖至慈聖長孫紹應昭靈至孝侯、文昌積慶真人諱河，七月初三日誕。

至心皈命禮

桂香內殿文昌內宮。聖質天姿，粹出春風之抱，仙標道矩，割開秋月之

清，四世一堂，印印閨儀之雍肅，百行萬善，天天家慶之精詳，應夢炳靈，隨機演化。至仁至孝至聖至慈聖長孫婦、淑應紹孝夫人、文昌積慶天君李氏，五月二十八日誕。

至心皈命禮

桂香內殿文昌內宮。談笑春風，字字仁心之發育，動容和氣，言言家法之流傳，子承聖子之心，根培陰隲，孫繼神孫之體，果證真仙，應夢儲祥，因心立教。至仁至孝至聖至慈聖次孫、承應宣靈順孝侯、文昌襲慶真人譚淮，十月十三日誕。

至心皈命禮

桂香內殿文昌內宮。玉質金姿，父母熟栽培之地，恩光化日，子孫綿嗣續之天，生根榮陰鷺之根，內資相警，休命續衣冠之命，婉出相成，應夢儲祥，隨機演化。至仁至孝至聖至慈聖次孫婦、慧應體孝夫人、文昌襲慶天君郭氏，七月二十三日誕。

禮請已周，依光懺悔

七曲慈尊真教主，慈父慈母同我生。子生聖子皆孝慈，孫繼神孫盡慈孝。

一家和氣春無盡，萬世春臺月有光。慈光普照諸天人，細入微塵滿天地。我生同得乾坤體，一似文昌始劫時。聖非自聖凡自凡，流浪至今方覺悟。願逢七曲慈尊教，惟忠惟孝惟慈心。不以口業傲神人，不以身業累父母。不以意業欺天地，不以心業禍子孫。願從孝行與陰功，種種力行諸方便。懺贖多生諸罪垢，皈依元皇大慈光。求嗣求祿求生方，不求諸人求諸己。惟我文昌七曲師，歷劫待人存恕法。願放一種如意光，憫念衆生真懺悔。

懺悔已周，次當發願

父母願同長壽果，龜齡鶴髮映慈光。己身願拜大吉祥，仰事俯育無苦惱。子孫願嗅雲巖桂，嘉與己身同發榮。父慈子孝一家春，光明無負慈尊教。願蒙七曲親提接，指引登真選佛門。捨生受生正徧知，盡未來世俱圓滿。

發願已周，次當贊頌

桂香殿上仁孝主，教雨周流洗業根。業根化作桂花香，善本種成長壽果。一家骨肉無煩惱，七曲子孫同護持。

普願今世與來生，紫雲巖前長得道。步步心心帝左右，生生世世天主張。骨凡可換心可灰，一點真心自金石。信禮澄真正觀寶光天尊

文昌大洞經筵

平座讚 梵音唱

稽首虛皇天尊前 請誦洞經

凡欲誦經先淨三業

淨身業神咒

淨水洒頂，盥手，左手玉訣，右手劍訣。

身中之內境，三萬六千神，動作履行藏，前劫并後劫，願身常清淨，常住三寶中，當於劫壞時，願身常不滅。急急如律令！

淨心業神咒

傳手爐，嚙香煙一口，左手離訣。

大道降真炁，吐納煉五神，願使攝諸魔，心業常清淨，斷除萬種障，驅蕩一切殃，降伏諸有情，動念歸正道。急急如律令！

淨口業神咒

仍各飲水一口，左手坎訣。

口爲太和宮，吐納降真炁，時時誦寶經，日日餐法味，勿發諸惡言，莫起邪淫意，願滅罪苦根，常論正真義。急急如律令！

淨天地神咒

以水洒經筵內外，左手四正訣。

太一之精，東井之華，流灌一體，蕩穢除邪，淨如明珠，潔如蓮華，化金光身，步雲錦霞，登七寶殿，爲真仙家。急急如律令！

安土地神咒

左手寅訣。

元始安鎮，普告萬靈，嶽瀆真官，土地祇靈，左社右稷，不得妄驚，回向正道，內外澄清，各安方位，備守帝庭，太上有命，搜捕邪精，護法神王，保衛誦經，皈依大道，元亨利貞。急急如律令！

開經玄蘊咒

玄元始炁分，玄元始三炁初分。

清華開洞神。清明文華開啓大洞尊神。

靈風回太和，神風鼓動太和之氣。

玉音攝流精。琳琅之韻，玉振金聲。

至哉本自然，至哉之道，非勉強爲之。

誰識此幽文。誰能識認幽隱之文。

堅剛明一悟，人能勇猛不涉中小二乘。

倏忽超三乘。傾刻之間頓超最妙上乘。

寂寂無色根，寂然虛靜，不滯空色。

永劫奚漂沉。歷劫不昧，安能流浪。

胡能精修持，何不精進以成此道。

究竟登玉清。終登玉清聖境，一云爾身得長存

玉清無極總真文昌大洞仙經卷之二

①「□」，此字原書模糊不清。

玉清無極總真文昌大洞仙經卷之三

東蜀蓬萊山中陽子衛琪註

道言：昔在龍漢劫初，元始天王出《大洞玉經》於高上大有玉清宮。

道言，乃玉宸道君言說。昔在者，向來往古之稱。龍漢者，自一炁孕於空洞之中，太無之始，上無復色，下無復淵，混沌太虛，浩瀚流溟，七千餘劫，其炁周流，相去九萬九千九百九十里為一歲，言其炁，如龍變化莫測，故號龍漢，運推數極，三景開明，謂之赤明，梵炁彌羅，萬範開張，元綱流演，生天立地，開化神明，謂之開皇三劫分曉。按《大有金書》，天寶君生於龍漢元年，當年出書。靈寶君生於龍漢開圖，經一劫，至赤明元年出書。神寶君生於赤明元年，經二劫，至上皇元年出書。此三寶方有定名。而神王奏請云，數終甲申，洪流蕩穢，赤明以來，至上皇元

年，受度者二十四萬人，開皇以後，數至甲申，諸天選叙，仙曹空廢，當於三代取十萬人充其任，又舉一十二萬人充儲官，又於死魂中有善功者，取三十二萬人以充。甲申驅除之後，開大有之民。儒書云：堯以甲辰即位，至甲申，已四十年，然後有洪水之患，以此言之，《生神經》當出於唐堯以前，而《大洞經》先出於龍漢元年，元始當生出書之時也，故號龍漢劫初，而候上皇元年太上出書時，三寶各有定位，一再傳授靈寶，就席付與太玄，故下經叙云，重出斯寶是也。《真武經》載，龍漢元年說法，舉往昔開皇元年之事，然以開皇居前，龍漢當後，此乃諸真傳經之誤，當從《大有金書》，參透三寶所生之劫，并出書度人之時，其他未可盡信。又曰：天地之始有五劫，一曰始劫，二曰成劫，三曰住劫，四曰壞劫，五曰空劫。五劫循環不已，天地皆因此五劫而成始終。人與物亦然，東方曰龍漢，南方曰赤明，西方

曰延康，北方曰開皇，中央曰上皇，自子上起，三字為一劫，至戌亥為延康，以日言之為夜，以人言之為死也。六合之外，姑且存而勿論。且自天地分判以來，於六經中可考者言之，易有太極，是生兩儀，兩儀生四象，四象生八卦。兩儀者，天地也，四象者，四時也，陰靜陽動，故變焉，動靜有常，剛柔斷矣，四時代謝故化焉，變化不已，故有劫數，河圖洛書是也。二炁升降，五行錯綜，皆莫逃乎數也，大則劫，小則運，皆因年月日時，至微而起，時有刻，日有候，月有弦望晦朔，年有春夏秋冬，故積刻以成時，積時以成日，積日以成月，積月以成年，積年以成運，積運以成劫。自太極既判之後，又不知其幾劫運矣。粵自龍漢元年，化生天寶君，出書時號高上大有玉清宮，此乃元始天王之都，大洞尊神演說《大洞仙經》之始也。故為諸經之祖，諸法之王。諸經皆稱元始天尊，而《大洞經》獨稱元始天王，蓋尊之

至也，有元始上帝、元始天帝，隨所見而稱焉，非實有名，乃衆真強名之耳。經云：大道無名，因生育天地萬物，故有名。

演太玄重玄玄一之道，命之曰《大洞仙經》。

玄者，黑而有赤色，蓋北方陽動而生水，陽炁赤水色黑，故曰玄，太玄、重玄、玄一，蓋水炁之盛，故為天地之根，又玄為幽深曠遠之稱，諸經有玄之又玄者，因此而云也。太玄者，先有玄炁元炁，然後有始炁次第生長，故當敷演太玄之炁，重玄為玄一之道，號曰《大洞仙經》，藏中有三清《大洞經》一百二十卷，有茅山、龍虎山《玉經》三十九章。

元始天王，始以太玄一音，流響玉清。

蓋一者，萬化之本，萬善之宗，無一事不由心上起也。老子之得一，孔子之一貫，邵子曰：天向一中分造化，豈得是哉，天道一而已矣。太玄者，北方之正炁，兩儀奠位，以北為子。一音者，天一生水，而水為羽

音，言天地始生，自一數起於北方，一陽初動而生水赤^①，猶人之生，以一陽之精結而為胞也，陽動則變，故曰流響，非以金口宣傳，乃靈風振響，遂成洞章。

弘帝一真道，說大洞寶文。

主宰謂之帝，人心是也，凡為國家有九經，所以行之者一也，一乃誠也，無妄謂之真實，故曰弘帝一真道，故知《大洞經》即儒《中庸》也。帝一，乃大洞帝尊之號，有帝一、雄一、雌一，謂之三一之道，乃大洞之始也。弘，發也，大也，大發揚此道。說大洞寶文，欲令世人得一則萬事畢，若能主一無適，此道成矣。亦曰不二法門，此則名《文昌大洞仙經》，外有大洞骨髓，大洞演義，大洞玄契，按諸經註解，非敢專擅。

示九統之法，傳九光之符。

玄元始三炁各生九炁，是為神霄九帝也，故示九統之法以會帝，傳九光之符以集神，大洞之道，始於一炁而生三炁，三炁而生九炁，九炁而生萬

炁，結成萬天。止云九炁，不言萬炁，舉其綱也。人之萬炁具足，遂生萬神，天地以有萬炁而立，人身以有萬炁而生，若神離炁散，則人道幾乎息矣。此帝一之道，於斯為盛，用九示九，已於洛書敷陳，九天生四九三十六天，九地生四九三十六地，具各注下。

至士誦之，登齋修行，即得萬神懽慶，萬靈護持，萬聖感格，萬仙翕臨。

齋者，齊也，言潔齊心地，靜定安慮，毋使雜亂，古人三日齋七日戒，又曰齋戒沐浴，可以祀上帝，蓋齋者夷心，戒者防患，但得顏子坐忘之心齋，便是《大洞經》了。此言至士修習《大洞仙經》當清齋入室，除垢止念，靜心守一，內則萬神歡喜慶悅，外則百靈護持，上則萬聖感格，下則萬仙翕臨。《生神章》云：一唱萬真和，九遍諸天朝之類是也。經曰：人能常清靜，天地悉皆歸，天地鬼神未嘗助桀為虐也。

可以飛度三灾四殺、五鬼六害、七傷八

難、九厄十惡。

《斗經》具載甚詳，茲不重贅。為人在世，有諸魔難，若不精專至道，何以脫離煩惱。宗門有語云：磨刀石子損己利他，克己奉人也。

登仙入聖，神生紫微，自然無為。

《易》：無思也，無為也，正合大洞自然之道。一本云登仙入聖，悟矣。自己元神與諸天帝比肩，享受天堂快樂自在，豈有所為乎，皆自然之理也。昔唐楊泰明以儒登顯仕，為長安令，佐郭子儀幕府，後棄官入廬山結茅，一日採訪真君下降曰：太素三元君命我授汝九天太真道經，觀之，乃《高上大洞經》，泰明修誦不輟，至憲宗元和八年正月一日輕舉升仙，豈非經中登仙入聖乎。

不係陰陽五行六炁之所拘束。

六炁者，寒暑風雨晦明是也，天有六炁，降生五味，發為五色，徵為五聲，淫生六疾，按醫書：陰陽五行五運六炁錯紐於天地之間，順則致祥，逆則見凶，祥則聖人出，天垂甘露，地

產靈芝，五穀豐登，人民安泰，凶則天地閉，賢人隱，天變災異，山崩海竭，人民死亡，此皆為五六之所拘束也。修行人當脫五行之殼，離八卦之機，八卦屬地，專至道者除，地道法天道，故陰陽不能拘束也。

念念增長，趣入大乘，弘之無窮，諸天下觀，玉帝降鑒，飛天保迎。

即這念頭便是金丹，務欲乾乾不息，綿綿若存，若人一念不移，念念相續，逐旋增長，進悟大乘，以至上乘，弘揚此道，則諸天帝王下觀其身，上帝降鑒，飛天魔王保舉爾身。昔高雲舉誦《大洞經》，一日，採訪下觀，相與語善，後雲舉成仙，豈非諸天下觀乎！

億曾萬祖，歷劫種親，遊爽滯魄，俱得更生。

己身未度，先度祖先，況千萬劫前祖宗無數，遊蕩英爽，沈滯魂魄，咸得上生。晉代許旌陽、吳葛仙翁，皆以祭煉孤爽鬼神而沖舉成仙，蓋孤爽亦是千生萬劫曾祖父母。

世胄接仙，長為貴人。

世代子孫華胄，與仙相續，在世長久，得為貴人，如張子房之類，天師繼嗣，綿亘無窮。

功滿道備，骨肉同昇。

功圓行滿，道德充備，一家骨肉同時飛昇，如許旌陽四十二口骨肉白日拔宅之類。

乘龍駕雲，上朝玉清。

化自己之陰陽二炁為龍為雲，乘駕以騰空，上朝玉清聖境元始上帝，為三清侍臣。

元始天王嘯詠太玄，凝神遐想而說洞章。

元始吟詠太玄之炁而成音，凝聚神炁深思遠想，使神炁精詳，而後說是大洞寶章，謂如慮而后能得者也，說洞章者，非謂口談也，乃凝集神炁，炳顧於空洞之中成音。

高上洞元，

此章名大洞帝一尊神高上虛皇君，總冠一經之首，章中之字有數斷章取義，故略而言之。元始生於太無

無始之前，五太未露昧兆之初，一炁化生於空洞之中，無形無名，無炁無象，無色無光，周子所謂無極，一動一靜，一陰一陽，陽變陰合，遂生五行，即太易、太初、太始、太素、太極，今日大洞，即《易》之太極也。高上者，高高在上不可名言，即無極也。混沌太無元者，即元始之祖炁，生於混沌未分，空洞之中，太無之始，元者，始也，故號元始，或云混沌，亦通。今本無元字，當添置之，蓋元始謂之高上混洞太無元，靈寶謂之赤混太無元，老君謂之冥寂玄通元，總謂之三元，非天地水三元，乃生天立地之祖炁也。天寶者，元始號天寶丈人天寶君，玉皇者，非常所謂玉帝，玉以比德，以其性溫潤而勁硬，皇者，大也，元始以其本身至大至剛之炁，成立天地，開物成務，孟子所謂浩然之炁充塞天地是也。

元生九天。

元者，善之長也，蓋元為萬化之祖宗，今言元者，三元也，言三炁生九

炁，即生神九天也，天地萬化，自非三元所育，九炁所導，莫能生也。故三炁為天地之尊，九炁為萬物之根，人能修之，是與三炁合德，九炁齊并也，自此已往，生生不窮之道著矣。故《易》曰：天地之大德曰生。他本云：高上洞玄，必誤。

炁祖太無，

玄元始三炁，生於太無之前，合虛而生炁，炁生於空，空生於始，始生於元，元生於玄，故曰炁祖太無，此大道所出，自無中生有。

衆風胤玄。

一云宗風，非也。風，炁也，衆者，非一也，混沌太無元之炁，九萬九千九百九十億萬炁，赤混太無元之炁，九萬九千九百九十九萬炁，冥寂玄通元之炁，九萬九千九百九十萬炁，蓋萬炁根於九炁，九炁始於三炁，三炁歸乎一炁，故曰衆風胤玄。胤者，嗣也，繼也，續也，根胤出自玄炁，是名回風混合。

曾親絕散，

一云統散，誤也。既有所統，是有拘係，豈得散耶，人修本洞，則三曾九祖五族六親各遂生化，而無胎根結滯之病以阻隔之。

四清撫閑。

四清，四炁朗清也，蓋天地既判，四方廓爾，喻人祖宗滯識皆得生化，則無所殃連，故四方備守，安處無為，即得生天，快樂自在。

帝一上景，連衆攝煙。

大洞帝尊名帝一也，上乘玄景之龍輿，招神攝風以度苦爽，亦如靈風聚煙之說。

長契一運，七世投閑。

長遠契合嘉良運會，儔靈運良辰會同義，七世祖禰皆得投閑，致散良會皆得度世。

託靈屬命，反華自然。

一點靈光皆有投託，本命元辰亦有所屬，還返光華無虧無欠，不有勞費，故曰自然。

泯邈流輝，六曜沈遷。

泯邈，遠大貌，流輝者，精彩流布，靈

光備體，六曜，南斗注生之司，六府凝定無有變遷。

凌梵御暉，西華彰安。

玉帝君，諱逢凌梵，字履昌靈，又曰神丈人白帝君，諱彰安，字西華，人之肺腑安和也。

併編帝簡，盡得解源。

西華玉靈瑤府編修青簡玉籍，以奏玉帝，若修煉，則惡根地根魔籍鬼帳盡得解去。

胎田邃路，世發玉蘭。

上田泥丸，中田絳宮，下田炁海，胎息之所，道路深邃，黃庭之迴紫抱黃入丹田，世世生生發育玉潤芝蘭，《生神章》云耀玉葩同意，言人能存養下田，則精華遍體如玉階之芝蘭也，蘭者，取其清香，故《黃庭》云：體生光華，香炁如蘭，此下有丘蘭素蘭，同義。

靈光八輝，混生萬神。

自己一點靈光洞照八室，所謂八窗玲瓏。人之欲生，萬炁不備，萬神不具，終不生也。右件玉章天篆合八

十八字，總冠三十六章之首，三十六天地神明並備此章。

《玄契》曰：兆脩大洞太玄帝一洞章，誦之一遍，消一切罪，身神六根皆獲洞清，六天自降，群魔束首，萬炁齊正，得無礙門。

元始天王曰：文昌大洞玉章第一，一月生胞，金丹一還。丁丑、戊寅、豫、隨。

始炁生混炁，其色蒼，為東方九陽木炁，凝成天境，號鬱單無量天，劫號龍漢，此天精魂開陽之炁，主泥丸宮，帝真胞命元一黃演之炁生胞元。

高上宴紫清，

《文昌經》，古以此章為首，驗之《玄契》并經之數目，字相合，今從之。《上清大洞》一本以東華發胎暉為首，且中卷十章，諸本皆將前後互相換易，今以六根順列為叙，上卷體生神章，具受胞胎神炁為叙，庶幾覽者有所倫次。然寶章不特為受生者說，蓋修行人內鍊金丹，亦必因此月分次第行之，如婦人懷孕，牝雞抱卵，專心愛護，念念不忘，自初啓首，

以至十月聖胎完成，突然而見陽神，兩途而一轍也。人生胞元，《易》曰男女媾精，萬物化生。父精母血，憑虛交感，此乃太玄之炁生於太無是也，天一生水以為其根，先有西北壬水一生，與西南之丁火相合，謂之水火既濟，陰陽相感，會於元宮，懸附於脾，脾屬土，故萬物得土，自然化生，因之結胞，所以水土同胞於己，己為六陽純全之地，為乾屬巽，此乃回風混合之所，男左旋十月至寅，為三陽交泰，故生男，女右轉十月至申，為三陰全得否，故生女。故經曰：高上宴紫清者，高上太有玉清宮，乃元始所居，在紫清天，元始遊宴其上，幹運始炁，以生人之泥丸宮，次第生長，人之初生，先有鼻，故後生耳，古人云鼻祖耳孫，此生人之始末也。鼻貫於顙，故先得始炁生泥丸，次玄元二炁生中下部，人之生也，陰陽二炁五行而已，得炁之清明者為聖賢，得炁之重濁者為民庶，得炁之駁雜者為萬物，故下云五老輔

玉根者，言各炁之分數也，如東方九炁之類。輔玉根與五臟植玉根，同有揮絳華飛玉駢等，皆以五方降真炁，然後成人之神炁形體。

五老輔玉根。

所謂四玄稟元禁，長保五帝城，是五臟為一身之根，五神守之，故輔玉根，五子歸根，壬子木至庚申九數，是為東方九炁，戊子火至庚寅三數，為南方三炁，甲子金至庚午七數，為西方七炁，丙子水至庚辰五數，為北方五炁，庚子土居中央，是為一炁。東方青靈始老九炁天君，南方丹靈真老三炁天君，西方皓靈皇老七炁天君，北方五靈元老五炁天君，中央元靈元老一炁天君，輔玉根，言五臟之炁歸根復命也，精神魂魄意，乃心肝脾肺腎為根。

太素拂渺景，

太素即三素母，其神拂過遠景也。渺，小也，盡也，見三華炁注。太素者，乃隨品所證之妙果也，有太素清虛真人之號。

合符帝一前。

無英公子名合符，又將所執之符將合之於帝一前面，符節既合，受生無疑矣，合符又名玄元叔，主守肝臟之戶。

白帝皓鬱獎，

白元尊神皓鬱獎，主西方肺炁，又名白元洞陽君，鬱靈標字玄夷絕，以西方七陽金炁，主鎮申酉，下統兑官中守肺。

回金太霞鄉。

肺炁屬金，故回風混合入太霞之鄉，上有太白金星西方七宿，經緯天文，下鎮西嶽，分野中通人之肺腑，以注真炁。

度我死戶閉，

既度我以生門，當遏塞其死戶，人身中有三十六處生門，三十六處死戶，慶雲開生門，祥煙塞死戶，祥煙，真炁也。

拔出三塗梁。

欲拔出三塗苦海，當架玄津橋梁，若過三關，當架鵲橋，古人云，上鵲橋，

下鵲橋，天應心，地應潮，蓋與飛玄梁不同。

十通由斯生，

六度十通，萬行圓成，於是得長生久視之道，人以十月胞胎具足，萬神備體，然後降生，先因此胎根堅固，方至十通。

妙行由此興。

三千妙行因此興起，圓滿具足，人之神炁已布，日吉時良於是興起，而生金丹之道，修十大洞妙行，可證十大妙果。

洞明光景中，

在太陽道境，光景不凡，人之濯質太陽，方見光明境界，華景與光景同，古仙云：溫溫鉛鼎，光透簾帷，此乃光景洞明。

帝一真玄玄。

帝一者，大洞帝尊之名。人修金丹亦證此果，豈非玄之又玄乎，經有帝一雄一雌一，號三一之經，蓋帝一乃北方水數，玄亦北之色象，故雌雄帝一之真，至此玄之又玄矣。昔劉根

先生宦遊四方，為政有德，常修大洞帝一之道，即得玄化成仙。大凡天道流行，發育萬物，其所以為造化者，陰陽五行而已，莫不先有是理，而後有是炁，及其生物，則必因是炁之聚，而後有是形，故人物之生，必得是理，然後有健順，仁義禮智之性，必得其炁，然後有以為魂魄五臟百骸之身，周子謂無極之真，二五之精妙合而凝，人以初月受炁，結成胞胎，以至十月神布炁足，而後乃生，修煉金丹之道，一一如之，三百功圓，聖胎堅固也。

右件玉章天篆計六十字，上鎮太皇黃曾天，下統第一壘色潤地土皇君。

《玄契》曰：兆誦《文昌大洞仙經》，修行帝一真道，妙行方全，始證十通聖功，初積玄理幽深，常誦百遍，自然通炁，千遍不輟，通神通靈。正一科有自稱曰小兆真人臣某之語，是知玄契中凡云兆，并真人者自稱也。

元始天王曰：文昌大洞玉章第二，二月生胎，金丹二還。己卯、庚辰、壘、臨。

混炁生洞炁，其色赤，為南方三陽火炁，凝成天境，號上上禪善無量壽天，劫號赤明，此天精魂陽明之炁，主明堂宮，帝真胎命元洞明，紫戶之炁生胎根。

玉虛順玄歸

此乃二月生胎之徵，先令太一精魂，名玄歸子字盛昌，主管生育之事，玉虛即玉帝宮。人之頭有九宮，此其一也，第五章帝臨登玉虛，故知其為玉帝宮，又曰上方玉虛明皇天尊，仙傳有玉虛尊師赴南溟夫人并安期生之會，故玉虛者，隨所證果位而得名也，今玉虛乃太精魂所居。

天晨金霄遊

天晨，日也；金霄，黃道也，又曰雲漢。玉帝登殿時，太陽之炁旋轉於虛空，後云玉帝乘朱霄，如人陽精乍凝於空無中。

朗朗生帝景

天日遊行，霄漢朗朗，以生帝一玄景，龍輿又雄一神名也，蓋精為九，入光彩明亮，而欲生腦宮，後云駕景

發絕霄是也。

欵爾駕玉洲

欵者長生可馬^②名，姓栢成欵生，乘日光車遊玉洲，即玄洲，為兆身胎元九天司馬，不下命章，終不生也，欵爾，倏忽也。

左攝始童神

木王之炁，故有東方青靈始老青童君，又云太微小童名，在人之左攝，召青炁以主肝部三魂，始童乃初生之童子。

右命起常符

起常符，帝卿佐名也，西方有白帝君，主事在人之右，則命令白炁以生肺部七魄，陰陽二神侍立左右，運輔神炁也。

明真煥九霄

心玄九帝尊神君，諱明真，如日輪煥明於九霄之上，日月交合曰明，陰陽交會於空無之中，丹經云會二炁於黃道。

三日映玄敷

玄敷即玄圃，在西北崑崙之山，亦曰

北極，三日者，南方三炁，太陽帝君以真火照映北方之玄圃，此非既濟之道乎。古人有言，積分成寸，積寸成尺，尺寸不已，遂成丈疋，人自一時覺悟，勇猛進修，以至一日二日，乃至三日，則玄炁通暢，如《湯書》云，苟日新，日日新，又日新，漸洗以成吉人。

干景併生矜

一云千景，必誤，刀^③太微小童名干景精，字會元子，又諱矜視，水火既濟，陰陽交感，將有生育之兆，故併意矜憐愛惜。

內有幽寥無

上玄帝皇精魂名幽寥無，即太一也。此神為變化之主，胞胎之精，至人得此，可以為聖胎之根本，金丹以此為藥物。

令我得長年

能令人長生久視。虛靜天師云：道不遠，在身中，物即皆空性不空，性若不空神炁住，炁歸元海壽無窮，此謂長年。

千劫始一周。

一千劫方為一周歲，循環無窮，天堂有拂石之年，其於地獄受苦者，時亦不少，《度人經》禁戒，八萬劫一傳，《玉皇經》四萬劫一傳，《生神章》自非天地一開，其文不出，然則其受苦者，何時而出離，方悟正因也？見是經宜早省悟，以臻千劫長年之樂可也，是經亦無冒濫，傳受之責，人人有分。

黃籙保劫仞，

仞俗作軼，度深七尺曰仞，《書》云：為山九仞，《孟子》：掘井九仞。明真黃籙可以保制劫運，人既得受生，天上則黃籙書名，經云：黃籙白簡，削死上生，天地真宰聞人生則懽慶，黃籙書名其上，以為祥瑞，而人甘欲棄生以就死地，哀哉！仞者，高也，尖也，極也，蓋劫數之將極盡處，故以黃籙保之。

披錦入神丘。

丘，空也，大也，聚也，在崑崙之東南，四方高，中央下，故曰崑丘，在人

曰神丘，天谷也，或云玉枕，言幽寥披錦衣以入帝庭也，此乃陰陽之炁上貫於腦門也。下卷云：太一儔丘蘭同義，錦者，五色雜錯也，言五臟之炁薰染成文，謂之錦衣，又云綉衣，皆執法真君所衣之衣，執斧鉞行刑罰也。

太一務命根，

此章名太一尊神章，太一者，先天水之精炁也，天地未形，天一生水，此神主之，此神為長生之主，在人身中，形如嬰兒，不著衣服，長四寸，所謂大洞返胎始形之神也，名務猶收，字歸會昌，常守人玉枕下，人之初生，執符而混合百神，專掌人之命根，此下有十處太一字，事見中卷解註。

公子召合符。

左曰無英公子，名玄元叔，字合符子，太一召之，以符節相合同，則謂之真炁，乃能生人，不同，謂之邪炁，即當却之。

十回度初心，

即《度人經》周迴十過十回度人同，初心者，將信將疑之間，似有似無之際，故以十回數足得不退轉地，《傳》曰：人一能之己百之，人百能之己千之，果能此道，雖柔必強，若能以十回試初心，即此道成矣。蓋欲人下死工夫精進不退也，欲轉心至道者，當對高真上聖，發大誓願堅固初心。

得入大信根。

以《大洞仙經》開化引導，必使得入大定信，實無妄之根本，與物無違之謂信。蓋信屬土，土成數十，亦河圖之數也，此卷十章，有十回十善十方十華十德十仙十真十通等語，皆以足格言之，缺一不能成生化之道，蓋十為地數，取喻土能長養化有之義，信者誠而已，故以誠信為根本。

右件玉章天篆計九十字，上鎮太明玉完天，下統第一壘元德君。

《玄契》曰：誦之二遍，得入性根，善因不絕，仙籍書名，萬炁齊和，得定觀門。

元始天王曰：文昌大洞玉章第三，三月生魂，三還一返。辛巳、壬午、觀、噬嗑。

洞炁生浩炁，其色白，為西方七陽金炁，凝成天境，號梵蓋須延天，劫號延康，此天精魂始陽之炁，主上丹田官，帝真魂命元長靈明仙之炁生三魂。

玉帝玄上旛，

一云：玉帝有玄上之旛，制命九天之階，蓋多三字，大凡靈書玉章之屬，每一句只說約一字或二三字，如亶萋阿蒼四字說多少文義，如高上洞元一句說幾箇字義，章中皆有五言為句，豈得如此多加三字，必所傳之誤，太微玉帝有回黃旛命靈旛，以為攝召之具，欲使陽魂歸體。

制命九天階。

此旛旛制命出自九天之階，天不可階而升，故號令以旛旛，其貴重如此，天階言其等級次第，不可造次而升進也。

七覺乘妙道，

覺者即釋之圓覺妙心也，在天為七

星，布炁於人，名之曰心，降靈於中，名之曰神，賞監七覺神王之職也。七覺者，人之良能良知之心也，心有七竅，故曰七覺，言乘大道力，以落死籍注生名，七覺凡三見，同飛七覺元，太和度七覺，蓋人覺則為善，人不覺則為凶器，又七覺注在他處。

歡熙神風回。

歡者喜慶，熙者明亮，人身中之炁太和雍熙，則神明自來，一曰神風，一曰靈風，神靈皆自己之元神回風混合也。

飈燦北停華，

飈俗作颯，炎風暴至，又云巨焱扶搖，謂之旋風，又云日魂名停者，亭樓臺之屬，本亭字，後人作停字，留也，集也。

紫英唱東隈。

長靈明仙之炁，化生三魂，如善芽增長，紫英發達於東方仁德之地，飈燦紫英二神歌謠大洞寶章，上聞於九天也。

琳和九霄外，

正一左仙名琳和，蓋如琳瑯振響，聲徹九霄之外，如《語》：天將以夫子為木鐸。天人之間，和氣致祥，皆欲聲政洋溢也。

玉符徵太微。

玉帝以玉符召太微小童名干景精，令在左右，命之執回黃旛，使無英執命靈旛以召幽爽，《生神章》云：太微回黃旛。

三素生泥丸，

素者，純也，三素者，純而不已，泥丸者，頭有九宮，兩眉間入一寸為明堂官，太一居之，左有紫房，右有朱戶。却入一寸為洞房官，中有三真，左無英，右白元，中黃雲。却入三寸為泥丸官，萬神出入之所，皇老三素君名罕張主此官。入四寸為流珠官，五

寸為玉帝官，明堂上一寸為天庭官，洞房上一寸為極真官，丹田上一寸為玄丹官，流珠上一寸為天皇帝官，總謂之頭上九宮。皇老三素君生神於泥丸官，亦曰三田之炁青黃白也。

《黃庭》云：泥丸百節皆有神。三素

亦丹名，昔王先生煉三素丹，詔入中嶽得道。又周武穆公主周惠抃修三素之道，遇西靈聖母傳經，士女景慕者數百，自云世代亂，我將往，後百年再來，遂化去。

發曜金靈輝。

三素發泄金華，靈輝照耀上下，如人慧眼一通，無所不見，眼為五臟之華蓋，以表日月之明，黃庭眼神明曜英玄君。

老君罕張上，

罕張，三素君之諱，此生泥丸之神也，人之生也，自上天降炁，然後受父母精血，始形之初，自泥丸發仞，次第生長為完形。

守衛死節機。

誦之三遍，三魂自生，蓋三素君當守閉死炁關節機鍵，務令受生，下卷云，守閉死炁關同，蓋罕張字神生道，神職也。

十善生玄中，

人性之善，皆可以為堯舜，人無有不善，而人自流凶惡之地，以致其殃

禍。善惡報應之說，儒者或以為虛誕，又曰王維畫鬼神，以恐人不知，書中有云：作善降之百祥，作不善降之百殃。《虞書》曰：惠迪吉，從逆凶，惟影響，又曰滿招損，謙受益，時乃天道，《易》曰：積善之家必有余慶，積不善之家必有余殃，此聖人之所以訓人者，如此其諄諄，善惡報應之理，如此其昭昭，聖人何嘗不云？而但以汝未暇讀書講明之爾。人有十善，即生玄炁之中，顏子得一善，則拳拳服膺，禹聞善言則拜，蓋人能止於至善之地，謂如為人君止於仁，為人臣止於敬，為人子止於孝，為人父止於慈，與國人交止於信，則舉止進退，莫匪至善。

度厄而自然。

過度厄會，即得自然無為也。叙經云：飛度三灾四殺，以至自然無為，不係陰陽五行六炁之所拘束，至此諄諄章義。

右件玉章天篆計七十字，上鎮清明河童天，下充第一壘元德君。

《玄契》曰：誦之三遍得自在智，度一切厄，入玄上關，萬炁齊清入希夷門。

玉清無極總真文昌大洞仙經卷之三

①「水赤」，疑為「水者」之誤。

②「可馬」，疑為「司馬」之誤。

③「刀」，疑為「乃」之誤。

玉清無極總真文昌大洞仙經卷之四

東蜀蓬萊山中陽子衛琪註

元始天王曰：大昌大洞玉章第四，四月生魂，四還二返。癸未、甲申、賁、剝。

元炁生炁炁，其色玄，為北方五陽水炁，凝成天境，號寂然兜術天，劫號開皇，此天精魂太陽之炁，主洞房官，帝真魄命元碭尸冥演由之炁生七魄。

太真統九炁，

太真，太玄一也，即玄元始二炁^①生九炁，一云太玄九炁，上下卷九章云：太真九光輪，光即炁也，統九炁以生萬神也。

洞景寄神通。

洞陽之館為真仙煉魂之所，絳宮光景為神明寄跡之舍，通者出入無常，孔子操則存舍則亡，出入無時，莫知其鄉。

玉帝乘朱霄，

玉帝君乘朱霄之輿，以統御萬靈，朱霄，一名丹霄，一名絳霄，此名上田泥丸，有玉帝宮，總制人身之萬神，萬炁之主。

綠霞煥金墉。

墉者，築土壘壁以為小城，又曰堂中北墻也，言玉帝入城威儀，青綠霞帔，煥爛金城，中卷五章云披朱巾綠霞同義。

上館雲珠內，

自兩腎上夾脊透雙關入泥丸之時，惟一光明之珠。雲珠者，五雲之珠，五雲者，五臟所化之炁也，雲珠則玄珠宮也。

仰接無刃峰。

玉京山之頂上，玄虛無有尖刃，此言人頭直上，亦接玄虛無刃空洞寥廓之景，西北崑崙山有金城玉樓，人頭是也。

靈關太漠下，

靈關，三關，即上中下三田，冥漠無眈，虛曠幽玄之下，蓋上無復色，下無復淵之謂也。雙腎間，皆謂北陰

艷都幽陰境。

靄沫竟冲空。

真炁薰蒸上冲空洞之中，言人至大至剛之炁，充塞天地之外，無窮無極之所。靄沫者，皆祥煙慶雲之屬，冲者和也。

冥化混離坎，

人所不見則曰幽冥，故坎水離火二炁交會，故曰晦冥，變化者，混合水火之道也，丹經云：取將坎位中心實，點向離宮腹裏陰，故知水火乃道之真體也。伏羲先天水火，乃文王後天日月也，其名異而實同，仙輩云：此竅非凡竅，乾坤混合成，名為神炁穴，內有坎離精。卦名但提要而已，蓋坎離為萬物之母也，其他卦觸類而長之，無不全備，誦之者，六位已升，體變純陽，鍊化紫金，升入金門，六位者，六爻也，坤變乾至第六，為純陽全體，坎離乃文昌之要。

玄玄叔火王。

上元玄父，隱名叔火王，字左回明，玄父者，道父也，或云叔火生，考之

下卷十四章，作叔火王，今從，王字出《上清玉經》。

瑋寂高同生，

上元玄母，隱名高同生，字右回光，玄母者，道母也，瑋寂，牝門也。或云高同王，既上句為王字，此當作生字，守玄牝門。

無極保谷童。

結中二神精魂君名谷童，無極，無盡也，保，養也，又曰黃寧童。居於脾中宮戊巳上，掌水穀尅化之神，披黃裳，立黃庭中。

圓塗無凝滯，

一云無滯礙然，不如凝滯尤妙，圓塗者，乃真中之一竅，無凝滯者，三宮升降，上下往來不息之謂，道塗通則圓明。

綺合有九重。

真炁交合如綺羅之文，其勢錯綜混合，光景九重之厚，真仙朝帝，但見金光勃勃，不見粹容，人修真，鬼神唯見紅光。

南拔七祖根，

拔，一云披，亦可。南七，火也，披，拂也，拂取七祖根塵，必令清淨，則九魂遂生，九玄七祖皆在身中，自己清淨，彼自化生。

西解累劫凶。

西方屬陰，以肺魄主之，魄專引人情欲，以墮凶釁，非大洞解之，縱經千萬劫塵，无由解脫，以此拘制七魄，總領肺炁。

體矯萬精波，

矯，強貌，身體強壯，精炁潤澤也，矯強哉矯之矯，萬精波，乃北方之真水，化為真陽之炁，腎中起，上至泥丸宮，滴下心。

神王攝十方。

十方飛天神王，風生炁也，一云神生，誤矣。《生神經》：神王之職非小，而玉經令五老取俯仰於神王，即玉輔上宰之職。

大歸返胎轅，

既已返胎更生，大歸其所游之轅轍，即无飛爽浮游，轅，車名，取其運轉真炁不息之義，歸者，返本還源，胎

者，聖胎也。

三合乘天龍。

三變列位，三合成音，形神已備，乘龍而登，天龍字有五，天龍，龍山龍臺，龍光龍琳，皆同一義，天龍乃天帝所乘之龍。

右件玉章天篆計一百字，上鎮玄胎平育天，下統第一壘元德君。

《玄契》曰：誦之四遍，根塵漸墮，業網自解，劫還不隨，萬炁齊臨，得自在門。

元始天王曰：文昌大洞玉章第五，五月生五臟，五還三返。乙酉、丙戌、復、無妄，

炁炁生景炁，其色黃，乃中央一陽上炁，凝成天境，號波羅尼密不驕樂天，劫號上皇，此天精魂上陽之炁，主絳宮常真臟腑，命元五仙中靈之炁生五臟。

太微天帝宮，

太極中有太微，太微中有二十四真人，專主降神布炁生育之事，人有中墮而不育者，蓋由太微之炁不接，故難養。

八浮入雲營。

八識飛爽浮游，來入五雲之營，五雲，五臟也，皆有金房玉室，故曰營，經云：流響雲營，言炁運於五臟，成一部音樂也。

神宗理靈襟，

中央丈人名神宗，即心主也，言神明宗主，條理靈臺胸襟也，五神以心神為主，而四神次第降生，以生五臟，布五神。

龍山秀玉京。

龍，木也，在左為肝，神曰無英公子，又曰龍陽物也，變化莫測，言人之頭成形，陽氣秀盛，而顏色悅懌，仰接無刃峰同。

金房鬱明霞，

金房為肺臟，有神曰白元尊神，金華西方太華元老所主，金炁化成擁鬱明亮之雲霞，言肺炁甚威，薰蒸葱鬱之景。

九户朗高瓊。

心有七孔，以應七星，下有玄牝二竅，以應輔弼，故為九户之瓊瑤，明

朗而高，又曰頭有七竅，下部水火二竅，通九竅。

黃庭涉北元，

中央脾宮，《黃庭》云：脾部之官屬戊己，故曰黃庭，涉北元者，以其上通心竅，有黃庭內景外景，經上下四方，至此得中。

元父左回明。

三素三真上元玄父君，字左回明，守玄牝，元父凡三見，第八章云：元父結胎仙，中卷第十章曰：元父左回明，見前註。

朱晶啓明師，

朱晶，本名司命之神，守心右，白元洞陽帝君名朱晶，開啓日月三素之光，明師，一曰白素君，一曰陽精，皆有兩呼。

幽寥登上清。

太一名幽寥，人之腎水上升，與心火凝合，以上田為玉清，中田為上清，下田為太清，又曰，帝皇太一重冥空，字幽寥。

四玄秉元禁，

四靈，青龍白虎朱雀玄武，秉執元行之禁令，四天門王禁斷天門，魔鬼毋敢輒入，道家齋醮，清旦則有命魔法，以却不祥，迎真降聖，人之五臟具，四靈守之，三合、四玄、五帝、六明、七覺、八景、九光、十真，皆取十月聖胎堅固、脫爐換鼎之道，蓋以肝為青龍，肺為白虎，心為朱雀，腎為玄武。

長保五帝城。

心肝脾肺腎為五帝城廓，五帝：青帝曰彫梁際，赤帝曰長來覺，白帝曰彰安幸，黑帝曰保成昌，黃帝曰含光細。

右件玉章天篆計六十字，上鎮元明文舉天，下統第二壘剛色地土皇君。《玄契》曰：誦之五遍，永絕死炁，浸茂生根，萬炁齊生，得長生門。

元始天王曰：文昌大洞玉章第六，六月生六腑，六還四返。丁亥、戊子、大畜、頤

景炁生遁炁，其色碧，凝成東北天境，號洞元化應聲天，此天精魂元陽之炁，主中丹田宮，帝真靈府命元高

真冲融之炁生六腑。

紫精太無中，

紫精天在太無空洞之中，無色天界三清所都之境，在人則腦門是也。亦曰天谷，萬神聚會之所，太無者，無色無象。

三元上景衢。

三元者，混沌太無元，赤混太無元，冥寂玄通元，三炁在上景之衢，言人之炁自上中下田循環無窮，復歸於泥丸宮。

秀朗大寶輝，

大寶，玉帝位也，清秀光明，言人之玄珠烜赫，即蒼胡頡黍米珠，皆謂之大寶。天真貴重，有光明輝映，故曰大寶。

昭昭扇帝敷。

一云眇眇，遠大也，昭昭，顯著也，扇動也，言玉帝登大寶，而清光威燄扇動其中，亦如煉內丹，光燄迸射於中宮也。

伯史啓三素，

命門黃庭元王君名伯史，原即三一

神也，上一赤子，中一元皇，下一元王，又名始精字元陽，一名嬰兒，胎啓三素君。

帝臨登玉虛。

主宰之謂帝，人身非萬炁無以育萬神，然萬神之中心為帝王，心之所向，萬神聽命。登玉虛者，上泥丸宮腦門是也。

慶炁育五雲，

五色慶雲祥煙捧擁玉帝，東三南二同成五，北一西方四共之，戊己五為本生數，三家相見結嬰兒。五雲一曰五靈。

司命神明初。

司命乃宰制心宮之神，名理明初，心官乃神明之宅，初者，肇形也，心腑是也，虛靈知覺，人壽夭皆應修心，故曰司命。

十華妙行仙，

十方光華，妙行圓滿，證登神仙。十華，即青華、丹華、素華、玄華、黃華、瓊華、金華、綠華、碧華、瑤華，共為十華所修妙行。

制魔生六明。

六明者，六根也，在人則先生五臟，後生六腑，臟腑流通為六明之府，六腑者，膽、胃、膀胱、大腸、小腸、臍，通作六府是也。

右件玉章天篆計五十字，上鎮上明七曜摩夷天，下統第二壘皇德君。

《玄契》曰：誦之六遍，六天大魔永

斷鬼鋒，六根清靜廣明，發生萬炁齊光，即得度世，進登仙門。

元始天王曰：文昌大洞玉章第七，七月開心七

竅，七還五返。己丑、大過、坎。坎離無支干。

玄炁生融炁，其色黑，凝成西北天境，號靈化梵輔天，此天精魂正陽之炁，主元穀宮，帝真元府命元高仙洞笈之炁開心七竅。

真陽帝賓老，

《禮》：天子袒而割牲，跪以進匕。待三老之禮，所謂養老乞言，今真陽為玉帝賓老，又正一左仙名諱賓老，又名仲成子。

受事會玉皇。

每聚會於玉虛，以受玉帝之事，如真

陽之朝泥丸也，謂之默朝上帝，法用紫河車，自尾間搬運入腦，十二年成仙。

滅魔除穢尸，

魔王伏慝，滅馘妖魔，除其穢雜尸血之炁，陽炁既生，陰炁自滅，理之然也。魔者，諸天帝王皆是試驗人心有無堅固。

百司詣絳宮。

人丹田官謂之絳宮，即心府也，百關之神常詣此宮，以聽命令，蓋心為萬神之主，萬神朝其所主，萬事萬物之理在焉。

逸宅丹玄內，

安逸之宅在丹田之內，丹田上一寸為玄丹宮，在頭上，見元神聚凝萬炁，上歸逸宅玄丹之宮，練習陽神出入之門。

五炁結十方。

五方之炁，即東方九炁，南方三炁，西方七炁，北方五炁，中央一炁，亦如五臟之炁流通，遍滿身體內外，無所不至也。

七轉司命至，

七返九還，丹道成矣，司命至者，長生久視之道備矣。司命即心神也，又曰七轉召司命，七轉者，七陽金炁遇火成丹。

三回召仙公。

三合成音，所以召仙公，亦神仙中公侯伯子男五等之爵也，有太極仙公之類，今仙公者，即東華木官主司肝臟。

太山主鬼者，

太山主者管領鬼神公事，即東嶽聖帝是也，太即泰也，山在兗州，為五嶽之宗，故曰岱宗，屬東方木，乃為生化之地。

急校三官中。

校錄天地水三元三官官府中所有生死罪福，急者不疾而速也，三元官府百二十曹，每年正七十三會，考校不差。

十德初成基，

十德，中央之士數，主脾胃穀炁，以生津液。蓋十德為成全之福基，雞

有五德，人有十德，物類咸有一德。人之明德，天之所賦，人物之所稟受，無虧無欠，而情欲所蔽，所以昏昧，故元始欲令人修飾此道，以為全德之根，此謂知本在明明德也。十德，具在下卷第八章《玄契》中載，茲不重贅。

同飛七覺元。

悟則圓覺，不悟則凡夫。七覺者，心也，心之神，上通眼鼻舌七竅，故七竅開聰，七星朗明，與兆同升七元斗中。七覺者，識神也，一則生而知之，二則知而能見，三則見而能從，四則從而能習，五則習而能堅，六則堅而能成，七則成而不居，此謂之七覺也。人能行之，進登妙行，得成飛仙。

右件玉章天篆計六十字，上鎮虛無越衡天，下統第二壘皇德君。

《玄契》曰：誦之七遍，七元斗辰皇妃下降，為兆削落死籍，移注南宮，萬炁齊超，得飛仙門。

元始天王曰：文昌大洞玉章第八，八月八景生

神，八還六返。庚寅、離、咸。

融炁生炎炁，其色丹，凝成東南天境，號高虛清明天，此天精魂通陽之炁，主極陰宮，帝真華府命元真靈化凝之炁生三部八景。

太素三華炁，

三華，三部也，每部八節，又曰三華，即神炁精也。三素元母雌一之神，於子時聚下元，午時中元，酉時上元，三官升降。

晨登廣靈堂。

廣靈堂，心府也，以鷄鳴之初登朝絳宮，蓋陽炁初生也，三素元母亦劾奏罪福之神，呈世人罪狀，故侵晨誦經却之。

玉京表玄籍，

玉京山，諸仙版籍所在，人之修道，常以子時一陽初動，靜坐澄心，以朝萬炁，以避人神奏牘天上之罪福於玉帝前。

守命核道康。

桃康君守臍之命門，王叔和以右腎為命門，人之生死皆在腎，腎絕則命

脉絕。一本核作孩，誤。又，桃核合延生華芒。

回風散萬魔，

當其子時，陰陽混合以成帝一之道，故能除散萬魔，陽生而陰息矣，君子道長，小人道消之時也，乃回風混合之道。

金符召廣鄉。

以金符召於廣漠之鄉、極陰之境，使魂爽咸得受生。一本云：度鄉，可疑，廣鄉者，北陰鄴都也，腎部屬水，金能生水也。

輔衛地戶內，

呵護輔弼於地戶，蓋存下田以受生炁，《書》曰：顧諟天之明命是也，地戶乃下部命門，當愛惜輔衛之，不以色慾敗之。

保此長生王。

在天則有玉清真王長生大帝，專主生化之權，在人則存心保守我長生不死之王，即浩劫不壞元神，為聖胎根本。

轉入十仙門，

妙行觀門，仙有十種門者，無礙門、定觀門、衆妙門、希夷門、自在門、長生門、進仙門、飛仙門、飛神門、登真門之類是也。

八景齊洞陽。

八景八門皆身中所具之門戶，為神炁之所出入，又曰：三部八景齊入洞陽之宮，朱陵火府，玉眸煉質，黃華蕩形。

右件玉章天篆計五十字，上鎮太極濛翳天，下統第二壘皇德君。

《玄契》曰：誦之八遍，八景神生，八威神王疆護修真，四方八天注舉仙名，斬絕地戶，永斷惡根，萬炁齊明，得飛神門。

元始天王曰：文昌大洞玉章第九，九月九竅開通，九還七返。辛卯、壬辰、恒、遁。

炎炁生演炁，其色白，凝成西南天境，號無想無結無愛天，此天精魂萌陽之炁，主下丹田宮，帝真嶽府命元自然玄照之炁闡通九竅。

紫精毓華林，

紫精字凡四見，皆天名，至有訛舛，

今并解註。上卷一章高上宴紫清，下卷一章逸綠登紫清，皆元始所都之天。上卷六章紫精太無中，蓋紫精天，乃三元之炁凝而成天，有道君主之，名曰三元紫精君。此卷九章紫精毓華林，乃上清境紫精天，有毓華林，葉如竹，華如鏡，實如李，天人得而食之，長年不老而登上仙，古詩：紫精天上毓華林，絳實朱柯竹葉深，咀嚼繁英人不老，下觀烏兔換光陰，然非下界所能見也。在人則腎水黑，心火赤，二炁交媾，化為純陽，紫金精華成林，華茂果實，自己真人餐之，亦可致長生之道，如《生神章》耀玉葩黃華野森瓊林之柯於命門，《文昌經》亦曰：丹林森朱柯，皆同此意，以喻人之所養也。

長眠太無外。

眠者，一定不動之謂，如人睡而不去。太無者，虛寂中也，如布袋和尚陳希夷一睡數月，塵積遍體，蓋真息定也。

玉房生寶雲，

玉房，一云眉間，乃臟腑關節之竅也，自然生五色雲炁，蓋生炁則生神也，經有金房玉室、紫戶玉闕一時生神，同義。

九扇胞胎內。

九轉九還，丹道成矣，受胎九月，九炁合成，人道完矣，此一節謂八月已滿，進臨九月，炁滿神具，聖胎完全，待時而動。

帝寶奉玉符，

帝君奉吾符，非也，第六章有真陽帝寶老，蓋帝寶乃陽神，主祛陰邪，奉玉符而行事，如國之三老奉上命而正議也。

三光回紫蓋。

天上三光日月星，人之三光兩目與心，日月失度，星辰留伏，天地災變，目有所惑，心有所感，身體傾危。回紫蓋者，以其目不視惡色，耳不聽惡聲，收視反聽，則神全而炁凝，紫蓋無所不覆，故人以兩目為九竅之華，蓋光明也，日月星能照天地，雙目與心能顧一身，不令外物之所蔽。

蒼玉斌來生，

玳瑁者，石如玉也，所以亂玉者，今變而為真玉矣，節中黑炁君名斌來生，專主內明人之德。蒼或作倉，非，蓋青蒼之玉，謂有文縷生也，玉以比德，苟不至德，至道不凝焉，內有所蘊，光彩發泄於外，如玉之在山，草木無不沖秀，珠之在淵，江河無不澄湛，寶之在懷，面部光澤，身體康健耳。

衛此長夜會。

長夜會在絳宮，是為靈府，血所生之處，覺則長明，不覺則長夜，衛者匡救其惡也，不能愛惜者，冥冥長夜何時旦也。

五靈度符籍，

五靈者，即青靈、丹靈、皓靈、玄靈、黃靈也，度者，授也，五老授我長生之符籍矣，茅山《玉經》無以下六句，蓋止於此而已。

九統合九光。

九統之法，以會帝九光之符以集神，此乃回風混合之道，數遇九則陽已

盛，此陽純而不已也，《大洞經》自一炁生二炁，三炁生九炁，九陽為極之數，極則變，故變為三十六，所以此經三十六章，有雌一帝真九光聖母，專主生育之事，或曰：元經，必誤。統，紀也，上古九皇，時有九紀，出古典。

三玄出太清，

三玄，即三三九玄也，出太清者，下田也，外應北都羅酆，內應雙腎，言祖禰超出此界之外，則神升九天，永為真人矣。

紫陽發萬生。

紫陽玉匱乃注生之府，所以發越萬世生根，而萬神皆備，人無貴賤，一是出於紫陽發生，此生生之理永不息矣。

玄精育九靈，

玄精育乃九魂名，天以北為玄，人心為玄，九靈即心之九竅，九玄受生，即因九魂得育，方結胞胎，故濯質太陽。

元父結胎仙。

元父見前註元父，心之官則思亦意也，胎仙者，有炁而無息也，下卷云紫華領胎仙，《黃庭》云：琴心三疊舞胎仙，同義。

右件玉章天篆計七十字，上鎮赤明和陽天，下統第三壘石脂色地土皇君。

《玄契》曰：誦之九遍，九統帝會，九光神集，混合百神，與天齊年，八會游集，朝應九天，萬炁齊仙，得登真門。

元始天王曰：文昌大洞玉章第十，十月堅固形神，脫胎神化。癸巳、甲午、大壯、晉。

梵清景炁其色青黃白，凝成中央天境，號波黎答和天，此天中陽之炁，主中元黃庭宮，帝真冲和之炁，降神布炁，堅固形質，生於人道。

青靈扇八極，

東方始老乃發生之地，故扇動八極世界，八極，乃四正四維是也，八卦，乾坎艮震巽離坤兌，八門，開休生傷杜景死驚。

鼓輪三華城。

三華，神炁精也，城者，三華所居之地，青靈之炁鼓動發生意也，輪，舌神名，言人鼓動舌根，攬取華池津液，灌溉三田。

披此胞胎結，

披，一云拔，《生神章》云：斬伐胞樹滯，此意亦同，披，拂也，解也，解其胞胎結習之根也。《生神章經》云：胎結解根，即此義爾。

七祖受福生。

九玄七祖受此福惠而得生天，受用快樂，若能精進，修持不輟，升無色天，登不退轉地，竟陟上真大羅三境侍臣之位。

宿對滅五道，

《生神章》云：對盡大運通之，對除其宿昔之仇，對消滅五道凶惡之事。五道者，地獄、餓鬼、畜生、脩羅、禽蟲等，難得出離。

常守帝一營。

茅山於此分作兩章，雌一雄一帝一謂之三一道，今惟守帝一營寨，蓋尊大洞帝一也，藏教有雌一經雄一

經。

公子執五符，

左无英公子玄元叔字合符，乘東方九陽生炁，執把五靈之符，發育萬物，招集肝臟中九魂神，流布天下，人道生矣。

太一居紫房。

太一在頭，即紫戶也，人身中皆有金樓玉室紫戶瓊宮，紫戶者，泥丸之別室也，太一君居之，掌管列仙得道之籍。

三合地戶下，

三炁合德，三合成音，以生炁合於下元宮，地戶下是死戶也，乾為天門，巽為地戶，即下田是也，已於輔衛地戶下註。

拔命玉帝宮。

以人合生之命脉，拔出躋之於玉帝宮，在頭上腦中是也，玉京山有玉帝宮，上元所主，天仙所居，修道作善，人方到此。

少女郁墨子，

斗中真仙在人心，主掌壽夭貧富，

亦雌一之神也，乃仙女之屬，先天之真炁，能助天地而育萬物，體大道贊萬化。

衛兆七炁窗。

衛兆，乃道人自稱，曰小兆臣某甲也，七炁窗者，七竅心也，比喻窗牖，取其明明，即八窗玲瓏之謂，是皆善譬巧喻也。

拘制盟血液，

九元真男名拘制守，左耳下通於心，心主生血并液，拘制而盟誓之，使之不得為血炁所勝，邪炁相乘，咸歸正大爾。

盈滿五臟充。

人能精煉至真，不為色慾所損，則津血炁液，盈滿五臟六腑、三百六十骨節之間，充積強壯，顏貌悅懌，壽等松椿。

十真登紫房，

一云黃房，非也，紫房在腦中。十真，乃十華真人，自下而上升於紫房，即腦中明堂宮是也，見下卷太玄九炁上玄契。

帝子化金仙。

皇一之魂上歸字帝子，金者以庚辛白虎煉成還丹，餌之則變化炁質為金玉，故後章云：骨肉金玉，實此之謂也。

白玉飛符招，

白玉玉京飛符，見招至人，得此脫胎換鼎，飛化自然。《生神章》云：慶此嬰兒蛻，此十月胎完而生人之道，神仙脫胎也。

引升龍臺天。

相引上升龍臺之天，龍臺即龍變梵度天，言變化不測之謂也。如軒轅黃帝千口白日駕龍車而登天，晉代許旌陽輩，是皆乘龍駕雲上朝玉清，具在方冊，昭昭可考，乃自己陰陽二炁所化，成雲成龍乘駕而去，非由外來也。《玄契》所謂變化自然，但教十月聖胎完全，便可脫胎神化，命宗煉金丹，十月功圓為了當，性宗務參機，忽然於一言之下大徹大悟，便是了當，至於鈍根，三二十年不得悟道者，二者有頓漸之分，志於道者，不

可不兼有也。或謂道不足學，其不知三教本歸一揆，亦必極其至善之地方止，道曰：有物混成，先天地生，視不得見，聽不得聞。釋曰：圓覺真如，與生俱生，若以色見我，以音聲求我。儒曰：天生蒸民，有物有則，非禮勿視，非禮勿聽。此三教聖人之體也。道曰：真常應物，常應常靜。釋曰：圓陀陀，光燦燦，活潑潑，赤洒洒。儒曰：充實而有光輝之謂大，大而化之之謂聖，聖而不可知之謂神。此三教聖人之用也。釋無我無人，儒毋固毋我，是皆至當歸一之語，何滯而不通，何遠而不致，欲求最上乘者，當留意于此，不可執殺賺人性命也。

右件玉章天篆計九十字，上鎮玄明恭華天，下統第三壘帝德君。

《玄契》曰：誦之十遍，于形中元命結帝一真人，九和十合，體自洞真，能召制十方，御元回靈，萬炁成真，合德冥慧，玄玄無邊，變化自然。至此修行，名曰玄關，亦曰玄會，六度

十回，功滿道備，位登仙公，初心十信，次興十善，次發十華，次成十德，漸進十仙，遂化十真，六位已陞，妙行大全，形神炁煉，號曰真人。十信、十善、十華、十德、十仙、十真，謂之六位入衆妙門。

玉清無極總真文昌大洞仙經卷之四

①「三炁」，疑當作「三炁」。

玉清無極總真文昌大洞仙經卷之五

東蜀蓬萊山中陽子衛琪註

道言：爾時

此卷以六根并性命、精血、津液、手足等修證妙行，若六根清淨，不墮酆都六洞。所謂六洞者，紂絕陰天，泰殺諒事宗天，明晨耐犯武城天，恬照罪炁天，宗靈七非天，敢司連宛屢天。性命清淨，不墮五嶽地獄，精血清淨，不墮水府地獄，手足清淨，不墮九幽一十八獄，津液清淨，能生無英、白元、太一、司命、桃康等五神，共得十通妙行。《文昌大洞經》行於蜀者久矣，而蜀本尚有訛舛，蓋自來無人考驗諸實而板行之，字經三寫，烏焉成馬，且如經首，道言爾時四字，乃玉宸道君所叙，當時天王說經，如此起發因緣，亦猶佛經如是我聞，《論語》子曰之類是也。故不可缺略，當添置之。琪寧受專擅之責，

成全經旨。凡經皆有叙分，正宗分，流通分。舊本無此四字，是無叙分，當以道言已下為叙分，三十六章為正宗分，結經為流通分，且此經行於蜀何也？蓋元皇帝君始生於吳會，即姑蘇是也，獲受此經而證果為蜀神，仍將此經開化人天。元皇再生於丁未，帝命為南斗陽官，乃注生之司也，於是祈嗣者多禱焉，始知文昌即南昌也，詮德鈞物長養之職。按史記，景德末，樂學士為西京留臺御史，忽夢一人具冠服，稱帝命來召，樂遂往，俄見宮闕壯麗，因問使者，曰：此帝所也，既陞見，帝謂曰：汝主求嗣，吾為擇之，少頃，選一人至，帝曰：中原求嗣，汝往勿辭，其人頓首求免者三，帝曰：往哉！傍拱立者曰：此南昌赤脚仙李守微也，明年果生仁宗，是知文昌為嗣祿之司者明矣。此經每句主一事，人能行得一句，亦可作上仙，况全帙持誦，豈無報應乎。夫今世，有為黃冠，至老死不知有《文昌大洞經》之名者，有

見經中不言善惡報應之說而束之高閣者，有心雖好誦而不知義理者，且善惡報應未嘗不言，謂如拔出五苦毒，超形過始青，若無罪安到五苦，若無福安到始青，如此等類不少，其他諸經皆曰誦持是經，是經者其意果安在哉，蓋是經者指此心而為言也，若人不能謹持此心，欺謾恣縱，放僻邪侈，干犯非理，生則致於惡疾，死則委之溝壑蠅蚋，天地鬼神奚暇置之阿鼻無間以逐逐於考掠哉！佛書云：假使經百劫所作業不忘因緣會，遇時果報還自受，傳曰：禍福無門，惟人自召，豈非善惡報應哉！今將經驗比附於此，庶幾覽者起敬信心，逐一修習，以期登十仙門。若根器淺薄，亦得明了前境作尸解之道，尸解有五，水解者投水，火解者自焚，金解受刃，木解倚樹化，土解鑽山入石，玄女有修五解法可脫大難，避陰追遁他所，投胎奪舍。

元始天王眉放青毫，

大哉聖人之道，洋洋乎發育萬物，峻極于天，觀三教祖師垂世立教，未嘗偏執，而人強自分別，曰釋氏主性，道家主命，儒家主理，殊不知三者一而已，釋迦說法，眉放白毫，元始說法，眉放青毫，兩聖人示現相好，豈異致耶！蓋白毫西方金炁，雖是表性，命在其中，青毫東方陽炁，雖是表命，性在其中，性命之道相因以成人。《中庸》不云，天命之謂性，率性之謂道。上天賦與我者命也，我稟受而生者性也，凡言性，則命在其中，言命，則性在其中，故此中卷七章云：性命宗本堅，性命果何物也？以性言之，則曰仁義禮智，而四端五典，萬物萬事之理，無不統於其間；以命言之，則曰元亨利貞，四時五行，庶類萬化，莫不由是而出。此天理之灼然，而人以私欲蔽之，而不能克復本源之清淨，故聖人因人所稟賦而修明品節，垂世立教，俾人盡至誠之道，則本來面目復見于前，所謂惟天下之至誠，為能盡其性，至於

參天地，贊化育，如示諸掌。或曰：子註道經而引佛經儒書，得無過乎？琪曰：三教聖人，本以匡救人惡，欲人皆歸善道而已。故曰：天下無二道，聖人無兩心，如人入城，必由其門，至於長府則一也，門戶雖異，所致不殊，若人各極其志，何往不可耶！琪是以將典誥會同而釋之，奚罪焉！

頂旋紫炁，萬華寶蓋，浮羅覆形，

紫炁者，陰陽二炁合成為紫，以此示命元也，紫炁之中，化成萬華寶蓋，覆蔭法身，人之頭上，亦有華蓋而自不見也，經云：紫雲覆黃老，是為三寶君，正謂此矣。人能修道，則鬼神莫能窺其際，唯見紅光勃勃射目。

玉光金霞，紆絢晃曜。

如玉之光輝，金之霞彩，紆絢晃曜，爍射天人之眼目，如十七帝光是也，皆自身中出。

玉宸道君，太玄道父，稽首顙竚，願聽洞章。

洞經題下有太玄道父牛孳先生集，

至此方見玉宸道君太玄道父，玉宸乃靈寶太玄，人或以為太上，余亦疑之。正釋此，向夢故家廳事前群牛，又一牯見觸余，以杖禦之，中其左目，牛足着吾臉，予咬得一趾，驚寤。一日，偶見《實錄》云：太上八十二化身為玄武，號太玄，又《仙降》曰：牛者玄武之精，方憶《禮記》，牛曰一元太武，因知太玄牛孳乃玄帝也，前夢無虛。玄帝生於黃帝時上天開皇初劫，紫雲元年歲甲午三月三日，《真武經》云：甲辰，誤。至十五歲，童子學道修行，四十二年飛升於紫雲，五十七歲庚寅九月九日也，拜太玄元帥，永鎮北方。至上天龍漢二劫，殷紂無道，魔鬼流行，傷害生靈，毒炁上衝，元始命之收捕，有功，令復坎位，拜鎮天玄武大將軍。後於上天真化三年即嘉祐二年也，三清委玉帝考功，三官四聖位當亞於天帝，下翰林修撰玉冊，拜太玄為玄天上帝，因知此經在拜太玄時重出，本一百二十卷，太玄集此三十六卷，亦

三十六部尊經之祖，以便修習，亦猶《大度人經》上品妙首無異。顙竚者，仰望也，誠敬而已矣，願聽者，俯聽也，整齊嚴肅，主一無適，惟恐禮貌之不恭，俯仰之失節，所謂齊莊中正足以有臨也，道父之心，推己及人，所謂夫子之道，忠恕而已矣，豈不忻忻然有喜色而嘯詠哉。此下以六根并六洞官順取，庶不紊亂大旨。元始天王怡然嘯詠曰：文昌大洞玉章第十一，眼根洞觀，道眼始通。乙未、丙申、明夷、家人。

叙經，乃玉宸道君所叙經之因由緣起，謂之叙分；正經，元始天王所宣珠光之音，謂之正宗分；結經，亦道君結括一經之旨，謂之流通分。

皇上超無景，

眼之於色，為業甚大，眼見心欲，心動神疲，是以五臟之神，皆從眼漏，為第一根，眼竅通心，心乃神宅，眼既見，心必動也。皇者，大也，上者，高也，言道之大而高超，出乎無色之界，無色無光，謂之無景，經中景字

三卷，共二十八字，八景運常寧，八景齊洞陽，八景照泥丸，太清八景觀，四句同義。洞明光景中，太一景中王，携此景中人，炁出華景中，常保景化內，一義。太極元景王，太素拂眇景，赤景翳逸寥，洞景寄神通，太極玄景童，羽景太無庭，金闕上景炁，混一玉景炁，晨中黃景炁，同類。皇上超無景，太虛空無景，一類。乘景晨中暉，駕景登絕霄，一類。帝一上景朗，朗生帝景^①，二元上景衢，一類。八真合景君，千景併生矜，一類。三天煥九景，義別，字雖同而義各異。有以車輿冠服講者，有以旌珮節幢論者，有以光景炁色辯者，有以神真名字說者，諸經傳中，有景晨明霞之冠、之服、之節、之輿，不知其為物何如也，而以琪意度之，便如今時官，貴有七寶冠帽束帶鞍轡之類是也，《玉皇經》九霞流景，飛雲玉輿，同，今無景者，無色也，人能收視內觀，自到虛無自然境界。

輪轉九曜停。

一云九曜生，必誤，如日月停景、璇璣不行之謂也。人之一炁，在乎鴻濛混沌之始，而不能存育，以眼根所漏，今則既知而修，即超出無色之界，故璇璣玉衡一時停輪，以俟兆之所證也。在天則運轉機軸，以九炁化育天地萬物，惟北斗七元日夜循環，所謂璇璣玉衡以齊七政，在心則有七元運用，與天之九元同此不息之機也。是故為人終日乾乾，自強其志，以應天機也，曜者眼神明曜，眼光一定，則九竅俱息矣，詩云：子懷明德，不大聲以色，同義。

迴風混帝心，

帝心，即道心也，人心惟危，道心惟微，惟精惟一，允執厥中，蓋心之為物，湛淨虛明，如鑑之空，衡之平，所以為一身之主，包萬理，應萬事，雖鬼神有不能窺其際者，一動一息，莫不繫於其間，所以《大學》之道在正其心也。《老子》曰：五色令人目盲。人以物慾障其心目，不能見天地之化，故聖人立教，收視反聽，黜

聰明、離聖智為急務，若能存其心，養其性，則天地萬物森然見前。《孟子》曰：養心莫善於寡欲，人能寡欲，則得顏子坐忘之心齋，故聖人洗心退藏於密，欲道成也。此章以眼根修證，蓋眼有數說，佛經載，肉眼、天眼、慧眼、法眼、佛眼，蓋肉眼者，凡夫也，世人云俗眼是也。佛眼即道眼也，以常人之情，以俗眼觀天地，真人以道眼觀天地，道眼何在？必曰一心也，內而有五臟六腑，以膚體隔絕，外而有五運六炁，以天地隔絕，若俗眼觀之，皆不得見也，若以道眼觀之，則徹視表裏，九天之外，塵芥之微，無不洞燭也。迴風混合者，天地之炁相交，以成帝一真道三昧帝心也，人亦如之，以津為龍，以炁為虎，運轉之道，在此二物。《易》曰：雲從龍，風從虎，聖人作而萬物睹，理相近也。後九章云：帝心大玄通。昔俞靈瓚，河間人，受習大洞迴風混合之道，一行二十年，坐見天下事，然自晦不為異，貌常若三十

許，衣弊自若，人或問遠年近日事，對如目擊，人敬之，且曰偶然耳，非所知也，口不絕誦《大洞經》，或絕粒而飲酒，後忽登仙，是得回風帝心焉，人以雙目回光返照，則真炁隨而聚於元宮，謂之回風混合。

八景運常寧。

一云八炁，非也。以心為天，以腎為地，心腎相去八寸四分，天地相去八萬四千里，神風橐籥，故天地安鎮，人以真炁運動，故身體長寧。人之三部八景，自尾間至百會，三節為一關，三八二十四節，以應二十四炁。上部八景：腦神覺元子，字道都；髮神玄文華，字道衡；皮膚神通衆仲，字道連；目神虛監生，字道重；項髓神靈謨蓋，字道周；脊神益歷輔，字道柱；鼻神冲龍玉，字道微；舌神始梁峙，字道岐。中部八景：喉神百流放，字道通；肺神素靈生，字道平；心神煥陽昌，字道明；肝神開君童，字道青；膽神龍德拘，字道放；左腎神春元真，字道卿；右

腎神象地無，字道生；脾神寶元全，字道騫。下部八景：胃神同朱育，字道辰；窮腸中神兆騰康，字道還；大小腸神蓬送留，字道厨；胴中神受亨勃，字道靈；胸膈中神廣瑛宅，字道仲；兩脅神辟假馬，字道成；左陰右陽中神苞表明，字道圭；右陰左陽中神苞表明，字道生。在人常以紫河車搬運真精之炁，上升泥丸也，常，久也，寧，安也，使身體常安也。或曰八景八門，即遁甲所運也，昔施存事黃盧子，得《三皇內文》，乃八門遁甲，能行遁變化景之法，役御虎豹，晉永康元年四月七日乘豹登天，號冲和見素真人，乃八景明驗。

廣霞參神天，

天神一萬八千，人神一萬八千，共三萬六千，同理陰陽造化者也。《詩》云：神之格思。按青城丈人說，髮為青城君，頭為三台君，兩眉為紫極君，兩目為玄爽君，左耳為聰明君，右耳為決明君，鼻為天妙戶君，口為

牙門君，唇為玉戶君，齒為二十八極元士君，咽為校尉君，喉為九卿君，肝為絳宮君，肺為華蓋君，膽為長命君，心為丹田君，脉為紫帛君，胃為太倉君，脾為黃庭君，左腎為玄妙君，右腎為玄元君，大腸為食母君，小腸為導引君，腹為大道君，三焦為玄老君，左足為雷電君，右足為雲炁君，凡三十六生炁君，皆應於一身，通身相體，同滋識用。《易》云：陰陽不測之謂神，知變化之道者，其知神之所為乎，又曰：神無方，《陰符》云：人知其神而神，不知不神而所以神也。蓋神之為物，惟意所主，故廣大之雲霞參謁神天，亦名谷神不死，蓋泥丸為百神聚會之所，人身之神相聚會合於此，其聚也不疾而速，不行而至也，然神用藏於視聽，若不從眼耳之漏，則方可凝集也，故《度人經》云：下鎮人身泥丸絳宮，中理五炁混合百神是也，人身與天地無異，同此神炁。

五帝散日精。

今夫天斯昭昭之多，日月星辰繫焉，蓋神天之上，有日月，如人之頭有眼目。五帝，見上卷長保五帝城注，並同，此卷第三章云：日中開五暉，正與此句同義，蓋五帝者，青帝護魂，白帝侍魄，赤帝養炁，黑帝通血，黃帝中主，乃五行之炁。天有五星，地有五嶽，人有五臟，上下相應，但人恣一情之慾，如喜怒哀樂動之於中，發之於外，則本方之鬼神，十目十手之指視，是其所以，災祥禍福，莫不相應而至，所謂禍福無門，惟人自召，日精月華，若人服之，能令面色光澤，身體強壯，所以上卷云：慶炁育五雲，五炁結十方，五靈度符籍，盈滿五臟充，五老輔玉根。此卷云：血凝五華平，日中開五暉，五臟植玉根，俯仰邀五靈，五神回孩嬰，舐煉五芽珠，拔出五苦毒，兆有五符籍，魄伏五道密，五符閉地結，五符編紫房，五籍標圓庭，逡巡五老翁。下卷云：五辰號發紐，嚙沫生五芽，斂神保五籍，混合五日房，五道秀金

華，五老變孩蒙，太張上五符，五臟映清夷，五魔伐六陰，五炁理中韻，五道煥三天，五老飛玉駟，五嶽應命到，五嶽啓靈戶，五嶽一來庭，五雲鬱絕空，五老揮絳華，左把五符籍。如此等類，皆五行之炁，流通於三才中，為尅化生育之本，散日精者布陽和之炁，參贊造化發育萬物也，人常以日精之炁條理五臟，保合太和，所謂乾道變化各正性命也，五臟和則五典備，不為五神所劾，五嶽和則五星所照，五帝所奏，則五籍改注，豈有五運五道五苦之拘束哉！君子所不可及者，惟人之所不見乎！

液逸玄中膜

逸字七處，逸宅，壽逸，逸紫，空逸，綠逸，上清逸。寥，安也，樂也，天地以水運轉，循環無窮，故不朽壞，人以津液流灌五臟，是以不死，若津液一乾，神無所滋，形必壞滅。玄中膜，是北方之水幽在一層之內，人身中腎水亦在脂膜之內，津液血炁常使充滿，灌溉滋潤，則身體強壯，顏

貌光澤。
血凝五華平。

紫綠緋華，非正色，皆為外物，雖目擊華嚴富貴，天堂快樂，亦不足戀於心，五華者，青華、丹華、素華、玄華、黃華，言內自有華色，人以血炁滋養五臟，則玄珠自生，《黃庭》云：灌溉五華植靈根。五華既凝，化為四靈，備守中央。豫章道士蕭惟億字勉之，雲遊至江州廬山祥符觀，喜幽勝而樓焉，日誦《大洞經》，忽瞑目見四靈備衛，遂大驚悟，由是神采頓異，出言非常，忽自能詩，年九十餘，而白髮反黑，步履如飛，淳熙中辭衆坐化，有徐欽鄰師事惟億，後亦坐逝去。

體寶圓珠暎

《大洞仙經》之號曰蒼胡頡寶，而上中二卷不見，至下卷方顯言之。寶與珠一也，即身中一粒金丹是也，謂之摩尼寶珠，又曰黍米珠，玄珠，明窗塵還丹，神丹，玉壺丹，紫金丹，金液還丹，刀圭大藥，聖胎嬰兒，千名

萬號，不一而足，大非外料金石草木之比。蓋以自己神水華池、金晶玉液、朱砂水銀、真鉛真汞、龍肝鳳髓、姹女嬰兒，修合煅煉之所成也。故上卷云：秀朗太寶輝，上館雲珠內，中卷云：舐煉五芽珠，寄頻携運珠，下卷云：領玄蒼胡珠，友寶赤炁王，蒼胡頡光華，日中一運珠，洞煥圓珠藹，皆此義也。儒書所謂天地未判，形如雞子，寶之一字豈苟得，貴能應用無窮，隨心所欲，無往不備。至如世間亦有如意寶，人之所求，悉如其心，魏王有珠，前後照十二乘，隨侯之珠，卞和之璞，為世所珍，況天上人間，天堂佛國，龍宮海藏，豈無至真至貴之寶。今元始寶珠有二，《度人經》云：元始於大浮黎土虛空之中，懸一寶珠，大如黍米，元始先登，真仙後從，皆入珠口，不知所在。由此言之，珠雖小而容衆甚多，何哉？釋氏所謂芥子納須彌，微塵之中亦有刹土，蝸角之上能戰蠻觸，朱子所謂其大無外，其小無內，善財樓閣，

皆見彌勒，無量珍寶，以為莊嚴，及其一悟正覺，向來富貴皆在普賢身上毫竅之中，維摩丈室能容三萬二千獅子座，《玉皇經》云：十方天宮皆有上帝應化法身，說法既畢，俱復一體，何小大之不一，分合之有異耶！所謂散之彌滿六虛，斂之則不盈一掬，前輩謂看一部《華嚴經》，不如看《周易》一箇艮卦，誠如是也，蓋人收斂真元，寂然不動，則天地萬物森羅在前。《老子》云：致虛極，守靜篤，萬物並作。微塵可以包乾象，一真可以應萬方，六合之大不足以容其身，一芥之微尤可以騁其游耳。此寶珠，一曰蒼胡頡，一曰圓覺，一曰如意輪，又曰圓如金彈，色同朱橘，皆諸聖強名托象，無非化導未悟，魚兔既獲，當捨筌蹄而不用。

流耀瑩兆形。

道不遠人，常引伐柯之誚，人能弘道，當存責己之規，有諸己而後求諸人，有諸內則必形諸外，所以發輝流彩，瑩徹一身，所謂見於面盎於背，

潛雖伏矣，亦孔之昭也。夫微之顯，誠之不可掩，如此，人能以道自重，潔己避地，晦迹韜光，不求人知而人自知，不欲人見而人自見，可謂盛德。

號為壽逸阜，

壽逸阜，日精之名。人身中，精神光彩，自然享壽，釋云：若有人我衆生壽者，即非菩薩，大率壽非人間之壽也。人生百歲，七十者稀，何名為壽？若以此等見識，安知本來亘古歷劫不壞之壽相哉，此壽相充塞天地，量等乾坤，與萬物均齊，與衆生同體，露堂堂，赤洒洒，豈有限數拘束哉！

亦曰澄源亭。

欲升高必自下，欲登阜必自原，亦左右二眼之分，澄源亭，月帝之名，源澄而流清也，亭，古文如樓臺，諸仙所安集也。

俱滅三惡機，

三惡者，貪嗔癡是也，人能斷此，則不墮三惡道，得見三寶天君。機者，

動之微，吉凶悔吝繫乎此也，所以君子見機而作，不俟終日也。三惡道，地獄、餓鬼、畜生，此三者，極陰之地，難復人身也，故修煉純陽以滅其機軸，經云：請滅三惡，斬絕地根，同。君子戒慎乎其所不睹，自然滅惡機也。

啓籍登大明。

大明者，明四目也，一云大明，非也。坎水永隔於離明正照之境，故聖人南面而正天下，玉帝所居通明大殿，故人登仙，開示仙籍注名，然後朝謁玉帝也。後云：捧籍登大明，此則喻人以明明德為上，自己德性明白，不為色慾所蔽，即為大明之人，為賢聖，為真仙，皆欲不昧靈性為自任。

令我保仙真，

有天地，然後有萬物，盈天地之間者惟萬物，萬物之中，最靈者莫若人，而不能修省其身，以致墮三惡道。以《大洞仙經》修煉，至此方且滅其機，而登大明保仙真矣。一云使子保仙真，上之諭下云使子，下之告上

云令我，兩皆不妨大義。保我自己之真炁，為仙須要自保，人不能保我也。

仙綬披綠青。

玉帝賜青紫之綬，使兆披服以朝謁，謂之選仙舉進士，亦如人間登第，先授青衫，下章云：披朱中綠霞同，皆仙衣也。

解禍冥途中，

既已登仙籍，則禍沈九地之下冥冥之途矣，人間得官，則封妻蔭子，榮庇族屬，為一時之榮，人能冲虛，豈不貴重哉！

超福晨上靈。

諸法官能斷決疑異，雖無所養，死為陰鬼，取為陰官，四十九年一轉，人皆如之，若能內外交養，福慧雙修，即證仙道，以自己之真靈，受福於景晨之上，快樂逍遙矣。凡晨一十一字，天晨金霄遊，太陽化三晨，晨中黃景炁，高晨暎上清，乘景晨中暉，七晨回帝席，玉戶暎晨霞，超福晨上靈，併羽月中晨，晨登廣靈堂，晨登

天老室，不可以一槩論，當隨經義解釋。人不能閱藏教，而據他人所傳之本，而擅自更改經典者，愚懼其冥責莫逃，豈可不戒之慎之焉。

度世登玉鄉，

過度劫塵，登入玉鄉，玉比溫和也，太陽道境無炎寒之苦，四時如春炁之和，故曰玉鄉大羅，無日月故無晝夜寒暑。

累祖返胎嬰。

累世之祖禰玄曾，反胎更生，皆變嬰兒之形，謂之大洞帝尊示現人，或以為不載禍福，既無罪，何用救拔，為此經拔度者一十六處，可見念念在乎玄曾祖禰升度，方許己度，天王之用心至矣哉！今續類于此：南拔七祖根，七祖積尸結，七祖絕滯塞，七祖返胎仙，七祖斷玄滯，七祖散積滯，七祖生福堂，解結生七祖，七玄登朱宮，七玄離幽局，散禍寧九玄，九玄解重結，西解累劫凶，累祖返胎嬰，累祖落冤名，此等即《度人經》五苦八難、七祖升遷、魂度朱陵也。又

曰：為上世亡魂斷地逮役，人欲求仙道，當令身心清淨，清淨者，無染無著，不增不減，自己清淨，可作功德，感動天地，超拔祖先，廣度群有，然後自度己身，則無愧矣。

洞觀無礙空，

洞者，通也，即十通妙行也，以俗眼為觀，平聲，以心目內觀，去聲，上視九天，下視九地。中卷十章謂之十洞，此大洞之標題也，洞觀無礙空，洞微無障玄，洞空清淨玄，洞虛清淨和，洞靈清淨行，洞真清淨身，洞玄清淨光，洞源清淨光，洞明清淨光，洞清冥智慧，謂之十大洞，妙行妙果圓滿。

始通生因明。

《易》曰：懸象著明，莫大乎日月，日往月來則寒暑生，人無日月則道理不見，天無日月則冥冥長夜，故明字以日月二字合成，道眼始通，無所不見，雖纖塵如秋毫之末，無所逃遁。經云：聖日聖月照耀金庭，又曰：聖人以日月合其明，大人者內明而

外暗，常人內暗而外明，故隨事物轉移。

驪珠湛方瞳，

聖人方瞳，舜有重瞳，言人道眼始通，如驪龍領下之珠，明瑩透徹，若了達之士，通身手眼，觸著磕著何啻千手大悲。

內外洞照清。

表裏洞燭，清淨無障，是天與其鑑也，人能修大洞之道，仰觀九天之上，俯察九地之下，萬事萬物之理，秋毫無所隱漏，大洞金丹，須採鉛汞，古云：潭底日紅陰怪滅，鉛為陽炁，山頭月，白藥苗新，汞為陽精，以陽歸陽，則雙目如金星，能通乎晝夜之道，日用左目，夜用右目，以代日月之明也。

右件玉章天篆一百二十字，上鎮曜明宗飄天，下統第三壘帝德君。

《玄契》曰：真人得洞觀清淨，道眼始通，無障無礙，內外洞明，照見一切，能斬酆都山紂絕陰天宮惡根，地根魔籍鬼帳，常以天花飛香供養元

始天王，元始天王，即我歷劫不壞元神，非由外有。散花飛香，進登人仙。中卷十仙，

即胞胎魂魄靈元華嶽藏府元命是也，自一月生胞次第生長，已至轉入十仙門，已於中卷意根妙行全十真下注，法人必難省，今於修真書中取十仙以益之，人仙者，壽至百歲已上者，歷見人之世數，如老子九百歲，彭祖八百歲之類是也。

元始天王曰：文昌大洞玉章第十二，耳根洞徹，聖耳梵通。丁酉、戊戌、癸、塞。

玉晨九天司，

耳根者，但聞音聲，感動靈明，隨聲旋轉，為善為惡，頃刻有異，毫釐之差，千里之謬，所以舜好問好察，禹聞善言，盜跖喜聞為惡，紂樂聞音聲，皆耳之聽。昔有僧坐禪，有鴉噪其上，或問曰：聞乎？僧曰不聞，曰：何故不聞？曰：聞中不聞。以此觀之，聞亦未嘗不聞，但不留之於心。玉宸靈寶在九天之上，九天有三，自一炁生三炁，是為三寶，三炁生九炁，是為九天，乃生神之天，謂鬱單無量天之類是，又有八梵九天，始青天，太青天，始丹天，大丹天，始素天，太素天，始玄天，太玄天，大梵

天，亦謂之九天。又曰：高上神霄南極長生大帝，東極青華大帝，九天應元雷聲普化天尊，九天雷祖大帝，上清紫微碧玉宮太一天帝，六天洞淵大帝，六波天主帝君，可韓君丈人九天採訪真君^②，是為神霄九宸，掌生殺之權，發號施令，雷動風馳，故萬物莫不由此而成始而成終也，所以玉宸道君主之，在人中脘。

太上大道君。

道君者，有道之君也，昔靈寶降生為西那國王，天下太平，百姓稱之曰有道，道者蹈也，誰能出不由戶，何莫由斯道也，皆明德新民之事，自家及國，以至天下，皆能上行下效。《老子》曰：修之身，其德乃真，至天下之普。《中庸》曰：道不遠人。人之為道，而遠人不可以為道，修齊治平天下之大事，豈不由修身正心誠意，然後可以平治天下乎！然有道之士，務在濟世利人，桀紂無道，百姓罹禍，周文商湯拯民於水火之中，為解倒懸之苦，後世歌之為有道之君。

常保景化內，

《玉經》：天子王侯得奉之者，致國太平，故富國安民，強兵戰勝，外無寇盜之撓，永保社稷。持誦是經，專為國王帝主君臣父子安鎮國土，保天長存，喻人精炁充滿，身體強壯，無有邪炁所侵，自保壽康，故保持光景造化之內，毋使失墜，毋令外邪亂其至道，敗其靈根，盜其至寶。可保景化。

九回鏡中清。

九和十合如鏡之清明，洞見事物，《玉皇經》云：敗其靈根，盜其至寶，蓋不能得保守景化也，以致鑑不空而衡不平矣。昔陳與明得明鏡之道，修鍊十八年，以晉太康元年三月初一日飛升。又太康中，新野先生鄉人張如珍，遇神人降於室，傳明鏡洞鑑之道，曰夫燭物理者天也，鑑物形者道也，天之道以清，鏡之道以明，審而無差，形定於此，物應于彼，故川嶽之狀，鬼神之情，無所逃而隱也。天以清而容萬有，水以澄而鑑

衆形，若夫天清鏡明，澄心靜神，而得內外洞徹，則至道成矣。倘外役於物，而內勞於神，心神昏濁，不能澄清，則去道遠矣。此法吾受之於長桑公子，長桑公子受之於太清天帝，子若修之，能洞達玄通，遐照八極。夫洞真法中有四規之道，依四時而行，亦與此同。體古人所謂虛其室，白自生，定其心，道自成，信矣哉！如珍修之九年，徹見千里，無一物可隱，以梁天鑑十三年十一月十八日飛升，號全真達道真人，此乃九回鏡中清之旨趣焉。此經一句主一事，若人行得一句，即與道合真而為至人也。又有李士寧軒轅鏡之說，具在別傳。

解帶玉暎室，

玉暎室，乃上清玉宸宮，在人中脘，神室既解結滯，則如玉之輝映，《詩》云：相在爾室，尚不愧乎屋漏，恐懼乎其所以不聞。

乘素入四明。

素，空也，耳之於聲也，乘空素而達

四聰，肺都童子素明字無英，明者日月交合而成字，始制文字者，其知造化乎。

携提日中王，

日中司命接生君，字道靈，携提者，不暫捨也。凡言日者十句：混合五日房，三日暎玄敷，日中一運珠，日為三矜交，五帝散日精，日中司命童，日中開五暉，混化啓明日，飛霞散天日，海日自東生之類，日中真靈乃太陽之精，在人則坎中之陽，兩腎間一點明瑩者，日中王也，以子時建生。

併羽月中晨。

兩耳分陰陽，故有日中王月中晨，如祖天師鬱儀結璘之真訣，皆主宰日月之神也，携提併羽者，欲常提省接連不昏聩也，昔陳先生與楊太初遇真人聶紹元傳二景高奔之法，後得道飛升。《古詩》曰：聖人奪得造化意，手搏日月安爐裏，微微騰倒天地精，攢簇陰陽走神鬼。又曰：若人間我修行法，遙指天邊日月輪。又

曰：日月交合時，便是生身處，本來面目真，勸君勤照顧。經云：聖日聖月照耀金庭，日月合璧，乃月晦夜交合也，內丹於此下乎修合。

太一召天魔，

上卷略釋之，太一乃水精元之炁所化，天地之先，一數生水以成象，人生之前，一炁之精感化而成形，非水無以立天地，非精炁無以立人身。《老子》曰：天得一以清，地得一以寧，神得一以靈，萬物得一以生。所以太一為萬神之宗主，故能執符以召制六天大魔。《大洞經》中，凡言太一者有十，如上卷太一務命根，太一居紫房，中卷太一召天魔，携提太一真，下卷太一上元炁，太一儔丘蘭，太一楊威明，上携女太一，羽節命太一，太一景中王等。是太一之神，於五神中併而為一，是故五臟皆有太一，亦猶天地之間無處無水也，在大道中，謂之太一天尊，諸天謂之太一帝君，九天之中謂之碧玉宮太一天帝，專主水事，斗中謂之太

一，五福諸地謂之太一尊神，雌一女真謂之太一元君，在人謂之太一之神，隨處莫不皆有。太一居人腦中，人有罪福，小則太一簡閱奏帝，大則三尸奏事，重則三官鼓筆，所以太一乃人神之領袖也，得一則萬事畢。孔子曰：吾道一以貫之。人得一而生，既已生矣，復能守一，則此道大明，及至成全，一亦何在，識者宜盡心焉。僧問萬法歸一，一歸何處？《丹經》云：既至成時一也無，蓋欲人無所執著，欲求魚兔，須藉筌蹄，魚兔既獲，筌蹄可捨。又云：過河須用筏，到岸不須船，釋應無所住而生其心。

帝君較萬精。

帝君，一名七靈，一名逢凌梵，常守人兩眉之上，執符把籙，攝召六天大魔。《金書》云：太一執符，帝君品命，即此二真也。

拔遏死積炁，

《小救苦經》云：祥煙塞死戶，蓋魔王檢較鬼精，遏塞死戶，保舉仙人

也。《生神章》云：元君過死尸是也。以此為生生之命根。越度仙黃庭。

黃庭，中央仙庭，四方八面朝此，在人脾胃，主管穀府，有神曰黃寧童，消散尅化以滋養四靈，故越此庭則立三關已。

帝立三關上，

三關，天地水，亦天地人，上關泥丸，中關絳宮，下關炁海。亦曰三要，在易為三極之道，《黃庭》云：三關之中精炁神是也。

八風舞神兵。

《莊子》曰：汝聞天籟，而未聞地籟，汝聞地籟，而未聞入則^③，八風，八方神炁也，四正四維皆起思風和暢，則千真萬聖懽慶鼓舞，人身之炁暢快，則萬神怡然；炁一不和，脉一不調，則人神悲泣，人神悲泣，則將離去身體，神離炁絕，人將死滅，可不慎歟。即上開八門飛天法輪運轉精炁也。

左抱福醴液，

福醴，香美之酒，亦曰瓊漿玉液，蓋

一身之炁液，灌溉本源本根者腎也，腎炁上通於耳，兩腎居下，而腎之門戶在上，所以下實則上聽聰。福醴亦謂之水銀，神水、木液、黑龜精、赤鳳髓、金液、金華、玉池、金精、鉛汞，皆丹料之異名也，惜精以養炁，惜炁以養神，惜神以養虛，大洞之道備矣。

右提慶元瓶。

慶元瓶者，謂之玉池、華池、偃月爐，懸胎鼎，玄門、牝戶、黃庭、真土、金鼎，皆丹房之器皿也，二者缺一不可，故丹道成矣。

洞微無障玄，

洞聽隱微無有障礙，蓋洞微者，乃聖耳通之妙果妙行，此即六通之一也，人能修習，可洞聞九天之外，九地之下。

梵通生虛明。

虛明者，心也，自誠明謂之性，心者性之宅，得誠明之性，自然視思明、聽思聰，梵通是聖耳，無所不聞，無音聲可逃也。

貫額聞十方，

額，額也，上窮圓頂，下盡方輿，無不洞達也，十方，四正四維上下共十方，蓋自己梵通虛明，普徹上下四方，無不洞聞。

豁落一切聲。

一切大小音聲，豁落響徹，不逃聽，蓋同聲相應，無往而不聞也，如聾聵者，疾雷震山而弗知，豈可容易回其本性哉！人能六根六塵悉皆清靜，即能運六神通，得大自在，耳根在腎，多以色慾撼搖，精炁耗散，早致聾聵，須仗大洞招真致靈，返回神明，宣通開導，復全本體，方證洞微妙行。

右件玉章天篆一百字，上鎮竺落皇笏天，下統第三壘帝德君。

《玄契》曰：真人得洞微清淨，聖耳

梵通，無礙無障，內外虛明，聞一切音聲，能斬酆都山泰殺諒事宗天宮惡根地根魔籍鬼帳，常以丹果供養元始天王，結帶生核，進登鬼仙。鬼仙者，人死而英靈不昧，焄蒿悽愴昭明，能禍福於

人，如今天下州縣城隍土地、關羽、張飛之類是。

玉清無極總真文昌大洞仙經卷之五

①疑此處脫一字。

②此句疑有舛脫。

③此處字有舛誤，所引出《莊子·齊物論》，原文為：「汝聞人籟而未聞地籟，女聞地籟而未聞天籟夫。」

玉清無極總真文昌大洞仙經卷之六

東蜀蓬萊山中陽子衛琪註

元始天王曰：文昌大洞玉章第十三，鼻根洞空玄息炁通。己亥、庚子、解、損。

太清浮絕空，

玉清、上清、太清，謂之三清，在大羅之上無極之中，雖天真上聖亦所罕到，貴重莫極于此。下卷云：上清絕霞升，玉清萬華宮，釋氏所謂一體三身，先曰毘盧，次曰盧舍那，三曰釋迦，在人則上中下元是也，皆在一身之中，三者不可須臾離，鼻聞馨香，心所欲嗜，鼻竅通肺，肺主炁，炁必耗矣。昔有僧坐禪，聞香積之炁，心念曰必是齋供，或見天仙來請赴天厨供，僧於定中便去，日每如是，或日明，眼師見之，謂曰汝墮一廁中矣，僧不信，遂令再赴供，回，師取廁中一蟲殺之，僧方悟，以此觀之，鼻之於香，亦能引人為異類，不如香嚴

童子，聞香便悟其所從來，立躋果位，一般香炁迷悟兩途，可以謹之。太清仙境浮於絕空之中，乃人之下元也，謂之元始祖炁，人能存之，謂之大丹，回風混合，百日通靈也，下元或下丹田，即炁海，是一身命脉，神炁皆聚於此，若能愛惜存養，不為色慾所耗，則成丹。

三天寶神符。

清微、禹餘、大赤三天，乃三寶君所居，寶神符者，貴重大洞寶章鎮安天地，人之愛惜三田，貴重神炁，專以保固形命。

日中開五暉，

日中司命靈童敞闢五靈之房，光明輝映，照耀天地，亦如人之心神，光明煥赫，照徹三田，五臟百關九竅，無所不見。

青帝圓常無。

東方屬木，青帝主事，圓常無，蓋其名也，肝炁上升於東方歲星所鎮之地，保肝護魂於八冥之內，人與萬物均霑炁。

捧籍登大明，

文昌大洞玉章間有相同，前初一章云：啓籍登大明，今大明出於東方，故青帝乘明捧仙籍登玉帝大明之殿奏閱。

受籙金華樓。

既登仙，當於金華樓上祇受寶籙以入定籍矣，金華樓，乃肺筒十二重樓也，蓋鼻炁下通於肺府，故肺炁自重樓出。

五臟植玉根，

鼻之於臭也，得其正則五臟和，上天之五行各具其根，人之五臟亦各有根，玉以比德取溫潤也，根既溫潤，則枝葉敷榮，五臟溫潤，則精神外發。王叔和《脉經》云：智者能調五臟和，《黃庭》云：鼻神玉隴靈堅，又鼻為山根，亦取諸此，上卷五老輔玉根，蓋五老即五臟神也，互相發明俾易曉。

魂魄亦凝和。

《經》曰：還將上天炁以制九天魂，蓋陽魂為神，陰魄為鬼，若非和炁拘

留，則事為兩途，在人之陰陽和，則魂凝魄聚而有生，陰陽判，則魂升為神，魄降為鬼。《易》曰：精炁為物，游魂為變，故知鬼神之情狀，左三魂，右七魄，各安其位，自然凝定，其炁和暢於四肢也，精神魂魄意，乃大丹之母，豈非《度人經》本命之日誦詠是經，即得魂神澄正，丹經云：日魂月魄，若人知識者，便是神仙，子煉之餌之千日期，身既無陰那得死，學人當煉陰魄以助陽魂，則易輕舉。

洞空清淨玄，

空洞之中，外無纖塵可入，內無神炁可出，則凝和清淨，玄之又玄矣。洞空者，鼻觀之妙行，人當炁息清淨，不染香臭。

炁通生清明。

衆寶香中之馨炁透遠者，莫若乎腦麝也，然而係屬外物，不若自己五分真香，薰成道德無為，清淨自然，又不如夜光玉女所聞微妙解脫自然之香，最為殊勝，在人肺炁上通於鼻，則清淨純粹，無所駁雜，修習大洞帝

一真道，至此則香炁普薰，遍徹上下，無不周及，一切聞香皆得度。定和妙明覺，

一定不易，冲和於妙明覺地，則妙明之心自然納太和之炁，蜣螂推丸，象龜引炁，皆能羽化，釋氏云圓覺妙場同。

玄息自長生。

上天之載，無聲無臭，豈容以聲色笑貌求之，務欲闐寂無聞，自然有真聞矣，鼻觀之道甚大，謂之胎息，諸仙輩所說胎息之法，常以鴻毛置之於鼻之端，數息炁之出入，自一至十，十取百，百取千，千取萬，以致於一定不能往來出入者，或深淵下坐數日不出者，則饑渴永除，寒暑無畏，人有饑渴寒暑者，為元炁出多入少故也。昔蕭靈護遇至人傳胎息法，行之後，於弘道二年中秋日玄化，香炁滿室，後人多見之，雖死而不亡，豈非長生久視之道乎。右件玉章天篆六十字，上鎮虛明堂曜天，下統第四壘潤澤地土皇君。

《玄契》曰：真人得洞空清淨，玄息炁通，無礙無障，內外清明，香薰正炁，普徹上下，能斬酆都山恬照罪炁，天宮惡根地根魔籍鬼帳，常以信香供養元始天王，倣大成夔王，進登水仙。水仙者，因落水沈淵，魂魄不散，河澤岸際，出入隱顯，如屈原、郭璞、柳毅之類是也。

元始天王曰：文昌大洞玉章第十四，舌根洞虛，玄舌華通。辛丑、壬寅、益、夬。

太極元景王，

談玄論道，綺語妄言，貪愛滋味，皆舌也，所以舌根最重，人所當修。《易》曰，言行君子之樞機，自當言顧行，行顧言，不綦於味，恬惓為上，自有太和真炁下通絳宮，蓋心通舌也，太極未判，元景溟滓，既判之後，元景開明，蓋尊元景為王，經云：開明三景，是為天根，故太極為王，物物皆有太極。

三天攝神生。

三天，即玉清、上清、太清，攝神生，一云神王，非也，蓋三炁合德，九炁齊并，然後生神，上天有萬神，然後

人身亦有萬神。

紫素翳鬱仞，

紫素左元君，名翳鬱仞，字安來上，乃無英之別號，故後云白素白元也，紫素之炁障翳鬱絕之仞，仞杪也，尖峰之上也，人能潔素自守於頭上，自有此炁覆蓋，前上品第三章：仰接無仞峰，蓋指玉京山也，此三素者，後有黃素中元君，白素右元君，謂之三素老君，前後互顯其言，重複易喻。

安來上玉京。

紫素君字安來上，會玉京山，下卷第五章上玉名同義，元景王三天攝魂生神也，元者善之長，故為衆神之領袖也。

拔出五苦界，

五味令人口爽，五味者，酸苦甜辛鹹，嗜之者夭壽，又墮五苦界中，既已超上玉京，則必先拔萃而出類於三塗五苦，上卷一章拔出三塗梁，中卷舌章拔出五苦界，手足章拔出五苦毒，性命章絕滅三塗尸，精血章斷

息三塗苦，下卷八章拔籍三塗下，十

三章拔絕三塗疾。三塗皆誤，奈何久則難變。徒者役也，天徒諱可韓明，人徒興生轉，地徒獨隸遷，斷絕天徒界上尸道色慾門，免天官驅雷逐電之役，斷絕地徒界中尸道愛慾門，免地官擔沙負石之役，斷絕人徒界下尸道貪慾門，免水官連汲溟波之役。五苦者，度第一色累苦心門，免泰山地獄苦，度第二愛累苦神門，免風刀地獄苦，度第三貪累苦形門，免擔沙負石苦，度第四華競苦精門，免填海作河苦，度第五身累苦魂門，免吞火食炭鑊湯苦。修煉文昌大洞，當斷絕三徒，飛度五苦，三五共為八難，上經叙飛度五苦八難是也。

返胎七元庭。

七元，水池，陶魄之所，《北斗經》主司陰府，宰御水源，舌下左曰金津，右曰玉液，乃下灌於心，心有七孔，以應七元斗辰。

九玄解重劫，

七玄九祖，並解釋累劫重陰之苦，文

昌大洞回風混合修行帝一真道，能解上世萬劫，千生冢訟徵呼并復連冤對。

累祖落冤名。

累世祖禰削落冤債之姓名，咸得超升於上境，逍遙遊宴於秀華下，即《度人經》紫虛鬱秀宮，以候運周遷度升化也。

徘徊秀華下，

甘辛發散為陽，酸苦湧泄為陰，二炁屈伸華蓋下玉京，如華蓋覆諸天，人五臟肺為華蓋，徘徊者，逍遙遊宴之謂也。

俯仰邀五靈。

五靈即五老，見上卷末章注，古人云：行法無難，在乎俯仰之間耳，人能常常俯視五臟，仰呵真炁，則元神見形矣。

兆身升玉堂，

金馬玉堂，世間之貴，爾身得道，登升玉堂，乃玉帝宮，在頭上，五炁朝元蓋朝此也。《度人經》云：上遊上清，出入華房，同此。

五神回孩嬰。

五神者，左無英右白元太一司命桃康合延是也，回孩嬰者，皆化為嬰兒孩童也，修行至此，謂之大洞帝尊示現。

俱躋太漠外，

升入無形之外，上品第三章亦曰：靈關太漠下，蓋飛升於冲漠無眚之外，無何有之鄉，廣漠之野，故知前太真無疑。

養素朝圓明。

無肉謂之素餐，古人云：甘酒珍饈，伐性之戈矛，姪聲美色，破骨之斧鋸，善養素者，恬淡無欲，希夷養素也，朝圓明者，天象圓而光景煥明也。老君曰：人能常清靜，天地悉皆歸，以喻人能清虛淡薄，自然見其本來性天虛圓靈明也。圓明，即玄關一竅也，非心腎口鼻之屬，若知此一竅，則冬至在此，藥物火候沐浴脫胎並皆在此，古人云：玄關一竅子，天地大根源，契合五千字，妙通三百言，即此是也。亦謂之默朝上帝法，

昔張曇要，天真降授內養元和默朝上帝之道，行之十二年輕舉，上帝復賜混神合景之液，餌之，變化不測，賜號葆光襲明真人。經云：默朝上帝，一紀飛升，然不遇明師指之歸趣，則默朝之路亦荒矣。

洞虛清淨和，

食其時，百骸理，淡薄正炁停，人嗜辛辣耗真炁，嗜鹽醬人夭壽，凡有所嗜，皆傷五臟，不如食淡，精神爽，洞虛妙行也。

華通引玄明。

華舌一通，自然引取玄明之液，嚙之，以溉靈根也，舌神通命正倫洞虛者，乃修舌根之妙行也，不染五味為清淨。

舐煉五芽珠，

五芽珠，乃金木水火土五行之秀炁，青赤白黑黃五炁之正色，五臟之津液也，五炁朝元，化為精液，自腦中下降於絳宮，謂之五芽珠。《黃庭》云：存漱五芽不饑渴，芽者，肇萌也，未成叢林，人之五味除而去之，

自得天然道味之腴，餐嘸太和，則能生五芽，經曰：金飯玉漿，向求皆至是也。

含善味長生。

《傳》曰：人莫不飲食，鮮能知味也，善者，水善利萬物，人無有不善，水無有不下，味者，春酸夏苦、秋辛冬鹹，四季甘，若能隨時吐納本藏之味，津液下灌脾胃，則炁脉通暢，含英咀華，滋味善美爽快，體貌悅懌，手足輕便，自得長生久視之道。吐納五味之法，呼呵噓呬吹，各隨四季能去疾。

右件玉章天篆九十字，上鎮觀明端靖天，下統第四壘王德君。

《玄契》曰：真人得洞虛清淨玄舌華通，無礙無障，內外正倫玄明，池中神水凝酥，嚙味五芽金液玉漿，能斬酆都山宗靈七非天宮惡根地根魔籍鬼帳，常以法食供養元始天王，通一切味，結大米珠，進登地仙。地仙者，隱顯出沒，多在山洞天福地，人忽見之，如桃源避秦人并山中毛女之類是也。

元始天王曰：文昌大洞玉章第十五，身根洞真，真相道通。癸卯、甲辰、姤、萃。

無英真上玄，

修之身，其德乃真，蓋身體受觸志意轉移，身修則道立，人之有所親愛傲惰畏敬哀矜，皆不得其正也，子曰：射有似乎君子反求諸身。此章以身體言，無英乃東方青靈始老，在人身左，主肝臟，上玄元素號無英公子，諱玄元叔，字合符子，但凡人物皆得先受五真炁，然後生五神。

玄中元素炁。

《經》云：天上混無分，天炁歸一身。故元素君無英所乘之炁也，蓋東方元王九素之炁，生於玄門，陰炁生於牝戶，《大洞經》以炁為主，有是理，然後有是炁，有是炁，然後有是形，故元始初生，以混洞太無元天寶玉皇之一炁，以生三炁，三生九炁，以至萬炁，成天立地，開物成務，使天地鬼神各有攸司，井井不紊。人亦如之，自一炁生三炁，至萬炁備萬神具，然後乃生，自幼嬰兒至長，自老

至暮年，歸根復命，仍如一嬰兒，修此嬰兒，復歸於一，此大洞修行法門，成始成終也，所以末章絕句云：

符化玄炁王是也。《易》曰：同炁相求。蓋炁之相類者必混合也，今將經中炁字集之于此：上卷五行六炁，高上洞元炁祖太無，慶炁育五雲，五炁結十方，太素三華炁，中卷頂旋紫炁，拔遏死積炁，皇初紫炁中，玄中元素炁，中央黃素炁，青精上華炁，太初九素炁，玉皇之炁，凝成萬炁，下卷九皇上真炁，天皇上真炁，太一上元炁，白炁育上生，友寶赤炁王，浮黃翳神炁，太中六炁清，辰中黃景炁，金闕上景炁，五炁理中韻，太玄九炁上，萬炁生萬神，守閉死炁關，死炁自今絕，萬神萬炁仙，一炁同龍光，混一玉京炁，西元九靈炁，符化玄炁王，初曰通炁，共三十四炁字。大洞經以炁為主，有炁則能養神，有神則能養虛，果能虛靈，則合虛無自然之理矣。

寄頻携運珠，

寄頰，斗中太一之神，常幹運心珠，亦曰丹臺、靈臺、交梨火棗等類，亦曰夜明珠，其實心神名神運珠，能守乎晝夜。

渾化啓明日。

九魂神名渾化歸，冠通天之冠，衣青袍，履朱舄，執劍，常乘九炁青光，主人元陽，啓明日開青陽之館，降炁以為生根。

正一左右仙，

正一左仙帝賓，正一右仙琳和，二神共守鄂鄞二門，正一者心也，心正則身修矣，天之日月，地之剛柔，人之性命。

長護靈虛室。

虛明靈覺之室，即人心神宅也，欲長久扶衛，毋令外魔來攻，直使此身與太虛同體，包含法界，其大無外，其小無內。

兆有五符籍，

人皆有五炁五嶽符圖版籍，有此籍者，即得仙道，《玉皇經》：若人能佩五方真文五嶽符圖，入山修道，即得

百靈畏服。

合仙得真一。

真即《中庸》誠字，所以行之者一也，真一者，嬰兒也，言主一無適，誠實無妄，真者不雜，一者不二，得真一不二法門也。

魂生太無中，

三魂名胎光、爽靈、幽精，而每魂有從者二，總謂之九魂，九魂生於太無之中，神仙之道，從無生有，復有歸無，成始成終。

魄伏五道密。

七魄名尸狗、伏矢、雀陰、吞賊、飛毒、除穢、臭肺，共七，務養陽魂，伏陰魄，魂既生，魄當伏，五臟邪炁，道路遏塞，不復出也。

世世解冤結，

文昌大洞回風混合修行帝一真道，能解上世祖先萬劫，千生冢訟徵呼，復連冤對父母宗親，悉得消落，咸得超升。

七祖絕滯塞。

薛幽棲乃蒲州寶鼎人，開元及進士

第，弱冠調陵郡尉，秩未滿，有林泉興，遂拂袖入首^①城山，峨眉、鶴鳴，訪天師治所，後遊南嶽，修誦《大洞經》，弟子數百，日集左右，進玄微論，明皇稱賞，注《靈寶經》，專以煉度父母祖先幽魂孤爽，後得道升化，弟子數百皆得尸解，豈非先度七祖，方度己身！

神風吹胞樹，

《度人經》：神風靜默。神風者，出於乾坤橐籥，鼓舞生化者也，胞樹乃胞胎尸血，臭穢根本，神風即身中神炁，能拔死度生。

根葉已斷絕。

胞胎之根蒂枝葉，盡皆墮頽無餘矣，修習妙行至此，賴回風混合之道，披拂惡根地根，胞根胎結一齊拔去，我遺類。

胎中衆鬼殃，

胞胎之中，鬼神最多，陽神欲人之生，而有所依，陰鬼欲人之死，而有所享，與之為黨，故太微小童常持旂旛攝召其魂，降神而布炁，俾之生成

人，有未產者，衆鬼殃害也。凡修金丹，亦當愛護聖胎，昔魯郡人唐若山，先天中為尚書郎，連典劇郡，開元中出守潤州，有惠政，乃弟為衡嶽道士，與兄同受胎元谷神之要，常召入內，後求歸山，許之，若山至楊子江中，乘五色霧而仙去，其弟尸解，蓋善毓胎元者，不為鬼害，身登神仙，此經生死受賴其福難勝也。

五符閉地結。

五符，五老所受之符，天有五符，則長運生化，地有五符，則安靜和平，人有五符，則身體康泰，所以遏塞地戶之結滯。

長為神真仙，

仙為真仙神仙，仙有五種，曰天仙，曰地仙，曰水仙，曰鬼仙，曰神仙，此章以身根修證，蓋就此養彼，依幻修真故也。

應化續萬億。

既為仙道，當應化人間，接引群類，老君至尊至貴，猶且有八十二度降生，以其應接受度，千變萬化，何止

續萬億也。

洞真清淨身，

天下之本，係一人之身，五體百骸，係一念之主，儻失存攝，必作禍亂，欲修其身，先正其心，一念既正，榮衛自然調和，所謂志一則動炁，丹經云：磁石吸鐵，隔礙潛通，一念之間，萬炁萬神一時同會，此身地水火風結成，於此修持，則身外有身，前輩云：兩□^②一般無異樣，始知功滿出塵埃。

道通自然質。

《易》曰：苟非其人，道不虛行，道之在身，不可須臾離也。大道所通，自然體質，却非地水火風穢濁所結之身也。佛書云：惟有法身常住不滅，又曰金剛不壞身。皆天然之質也，號曰妙體，迎不見前，隨不見後者也。蓋湛寂真空，彌綸天地，而不知其終，範圍乾坤，而不見其始，乃吾自然之質。

真應化現相，

真常之性，靜而能應，故曰真陽，變

化示現之相也，如老子所謂三十二相好，千變萬化，散赴人間之請禱，所求如願。

不動住黃室。

其真身一定不移，所化之身，以應人心而已，如月之在水，千江同一，釋云不取於相，如如不動。黃室即黃庭也，中宮也。

應化無方在，

應化之身，無一方不在，千江萬水無所不見月，且千器萬器之水，亦皆有焉，唯隨其器量大小，其真應化現之相，亦隨人根器淺深耳。蜀梓郡人王昌遇，世為吏，後於江安遇落魄醉仙，自號玄黃真人，授以赤龍大丹，大唐太中十三年重陽日，登梧桐樹而仙去，賜號保和真人，帝命登三天左相，後政和間，化為鐵罐道人，貨藥梓市，與其孫王道淵言曰：吾爾祖也，帝命我校《大洞經》三十九章，今當付汝，又授以《回風合景混一成真飛仙上陽內禁秘錄》三卷，以此可知人既登仙，亦必化身下降，廣度人

天，其真身依然復在天位，亦如玉皇分身變化，未嘗不在金闕之類是也，即人身中萬炁萬神，聚則一，散則至十方。

骨肉金玉實。

骨肉與金玉同固，蓋文昌大洞回風混合之道，修煉極至，則骨肉同飛，蓋以南方真火煅煉白虎金精，以成金丹至道，譬如金之堅、玉之潤。傳云：德潤身，心廣體胖。丹以身為鉛，心為汞，二物交媾，可如金玉之堅矣。釋氏以為舍利子，火燒不壞，鐵擊不碎，蓋人身中精炁不散而成者。

靜真明至道，

誠身有道，不明乎善不誠乎身矣，至道者至善之道也，以寂靜真一，昭明此至善盡美之道，人能堅持，可以為上仙。

至老長不易。

雖至老朽不易此志，此為世人言，非上仙之道也，上仙則長生久視，死而不忘，蓋老者歷劫不壞，亘古亘今之

身也，此身先天地而不為始，後天地而不為終，卓然獨存，所謂本體也。釋唯有法身常住不滅，人多錯認四大假合為實相，一旦神炁離散，等於臭腐，委而棄之，畜獸不若也。

右件玉章天篆，一百三十字，上鎮玄明恭慶天，下統第四壘王德君。

《玄契》曰：真人得洞真清靜真應身相道通，長存化無量身，無方不在，法身常住玉山上京，應變自然，十方皆現自身，他身皆得自在，能斷酆都山敢司連宛天宮惡根地根魔籍鬼帳，常以天衣地裳供養元始天王，上下垂覆，進登神仙。神仙者，出入洞府，變化不常，忽住人間，改頭換面，人所不識，此乃四果羅漢、五通神仙之類是也。

元始天王曰：文昌大洞玉章第十六，意根洞清，大意元通。乙巳、丙午、升、困。

太初九素炁，

意屬中央土，脾胃為之宅，太初炁之始也，九素者九陽也，喻人之肇受父母之炁也。素字凡一十有三，上卷云：三素生泥丸，蓋指三素老君，諱

罕張，伯史啓三素，太素三華炁，太素拂眇景，此數句同義。中卷乘素入四明，義理不同，素啓蕭仞為白元君名，玄中元素炁，蓋指無英也。中央黃素炁，云黃老君太初九素炁九陽之炁始萌也。下卷太素梵行初，此指五太炁形質未離也，左携元素君左無英，與此中卷玄中元素炁同義，太素洞元靈，與太素三華炁同義，三老素罕張，與三素生泥丸同義，素空也，潔也，皆三田之真炁也，九素與三素不同，紫素、白素、黃素，乃三仞君之炁，即人之肝肺脾青黃白之三炁凝結是也。

炁出華景中。

此九素出於光華景界之中，以喻人之始傳於父母精血之炁，景者，色象也，胞胎始形，精神備體，燦爛閃爍迸射也。

法垣舞仙旂，

法垣一云法坦，誤也，乃紫微太微天市三垣也，又云垣墻也，城也，腦後為玉城，但修行人以之為默朝之路，

亦乃斗中太一之名字。舞仙旂，以旂旛攝召魂靈也，此章以意根修證，故生智慧，誠意而后致知也，下卷法垣與朱霄同，蓋斗中太一，乃招真致靈之神，人得之，真靈降神布炁。

逡巡五老翁。

逡巡，疾速之義，言疾催五老各布真炁，接引魂魄也。五老者，玉清吳極元老，虛皇靈光始老，玄華寶天真老，露渺太靈祖老，婆鬱洪京仙老，即先次五老之異名耳，蓋太極中五行之祖炁也。人得五炁，方能成形，丹得此五炁，方能成金液大還，即經云：天地得之以分判，日月得之以運行。

夫人名啓珠，

回風混合上真聖母中候元君王夫人名啓珠，又曰：夫人即泥丸神也，《黃庭經》云：泥丸夫人當中立，蓋雌一之神也，人或疑天上安得有夫人之名，殊不知天上人間，其實一也。昔晉武帝左僕射魏舒女名華存，字賢安，幼讀書，喜《莊》、《老》、

《春秋》三傳、五經百子，年二十四，父母迫令嫁禮，適太保公掾劉乂，字幼彥。女禮有行，時不獲已，遂為劉婦。逮子息已長，劉氏有繼，求為別居，時乂為修武令，夫人遂修大洞帝一之道，忽夜空中八音嘈獻，望之，旌旆自天而下，至室坐四真人，乃曰太極真人安度明，東華大神方諸青童君，扶桑暘谷神王清虛真人，小有天王王子登，夫人再拜求教與，夫人受道畢，託疾尸解，或見太一元君乘鸞輪來迎之，即東晉咸和四年也。位為紫虛元君，領南上司命，又加南嶽夫人，秩比仙公，即今上清大洞祖師也。是知天上亦有夫人之號，職等三品，乃女仙為之也。

執籍歸紫房。

夫人把籍入紫房，在腦後，亦名紫戶，面奏玉帝，言已召魂魄遂得生化也，經中多紫房，或曰黃房者，乃中央黃庭。

元父左回明，

上玄元父，即意神也，總統四象，見

上卷第四章註，行法經心想如猿猴，無有暫停時，若欲折伏者，當須誦大乘。古人云：攝心一處，即是善提道場，散意片時，便落衆生境界，蓋意乃五臟之中四神之首，上下中停為得中之地，人能晝夜照顧，省察提撕，毋令昏瞶，常惺惺地，百日自通靈。

混合太微童。

意神混合水火，則太微小童布炁降神，以生我身，此胞胎始凝之神也，丹則鉛生初始，當採之得法以煉玉液還丹。

洞清冥智慧，

《度人經》：冥慧洞清，《生神經》云：耽咀洞慧，蓋我之智慧七覺，洞徹清明，所謂物格然後知至，知至便有智慧般若是也。

大意朗元通。

一本無智朗二字，又一本安得獲二字？意，志也，脾所主，心所發，故心正而后意誠，所謂誠真意者，毋自欺也。《華嚴經》云：若有欲知佛境

界，當淨其意如虛空，《孟子》曰：志，无之師也。故在丹道為黃婆，以其能媒合五臟之炁，集而為一，金木間隔，非媒無以成就，青衣女子素練郎君，須使猿馬調伏，則龜蛇交合矣。大意一得通徹，朗明瑩淨，先劫後劫，無障無礙，悉知悉見，在道為十通，在釋為六通，在中界鬼神為五通，皆不離於中道，凡事得中，自能七通八達。

根塵悉消滅，

六根者，眼、耳、鼻、舌、身、意，六塵者，色、聲、香、味、觸、法，一切幻妄隨即消散，蓋誠意則無妄動之理。人無十全，但一根穎悟，相緣修證，則能滅六洞魔王之劫賊，即得六根清淨，六腑調和，不為六炁所拘，故六慾俱全為凡夫，六慾俱無為真仙，《度人經》有羸塵初淨，細塵未淨，故不能出於三界。

有無皆虛空。
有無二見皆歸空寂，蓋得中庸之道而行之，如惡惡臭，如好美色也，此

之謂自慊，古德云，虛空粉碎，方露全真。

妙行全十真，

大洞妙行三千圓滿，以全十真之道，不息則久，久則懲，以至成物成己，皆出此道。《大洞經》以修習妙行為上，結經云：六度十通，萬行圓成，然則六度者何也？合於下卷六章解釋，以字數多於中卷，故於此下註。上卷之九《玄契》曰：六位已升者，是所謂初心十信，次興十善，次發十華，次成十德，漸證十仙，遂成十真。一、初心十信者，起信心動，同信之機，念信不忘，為信而行，五信在中，記信金石，至信大成，善信能終，堅信進趣，方名正信。二、次興十善者，上卷之二云：十善生玄中。聞善則玄上貫顙，六丁洞光，視善則丹元方瞳，八史洞明，語善則通命含漱，五文王華，履善則挾就力通，地關生命，念善行善，至善不踰，住善保安，定善崇基，全成十善，但得十箇善字為是。三、發十華者，出下卷

之七，玄契十華觀門，謹按上卷經云：十華妙行仙，十通由斯生，乃河圖數也。五行成生，八卦成列，言天地人物皆稟此以生，既生已，復知之而修煉，貴使脫五行之殼，離八卦之機，即證登妙行，已見題下。四、次成十德者，卷下之八玄契、上卷之六經云：十德初成機，下卷之八經云：十德真文宣，用德合體，進德坦平，成德廣大，智德內清，惠德發光，明德圓華，靈德普應，玄德大方，太德自然，普德濟攝。五、漸證十仙者，出下卷之九玄契，胞仙、胎仙、魂仙、魄仙、靈仙、元仙、華仙、嶽仙、藏府中仙、元命神仙。六、遂成十真者，下卷之十玄契，上卷之九云：十真登紫房，中卷之十云：妙行全十真，下卷之十云：妙行登十真，下卷十一云：十真妙行全。精真玄珠，炁真玄力，神真玄通，性真玄一，元真玄妙，命真玄光，形真玄全，德真玄洞，道真玄應，令真太玄，此六謂之六度十通，六位已升，妙行大全。

名大心神通。

心中之神感而遂通，通則變，變則久，神能久駐，則天地造化豁然見前矣。世間一切事，皆從心起，心神既通，不隨物轉，意誠而後心正，至於天下太平，國安民富也，夫名豈不大乎，未有身不修而蚤有譽於天下者，詩云：在彼無惡，在此無射，庶幾夙夜以永，終譽神仙。傳載云：昔武昌人劉元靖，師王宗道，傳三洞經籙，常修回風混合之道，絕粒煉炁，而飲酒斗餘，寶歷初，敬宗求方士，監軍呂令琮起之。元靖曰：某有山妻穉妾，以牛肉為命，若以為術士，恐將軍有罔上之名，因請彘肩自刺，以蒜菹而食之，呂疑而起之，辭不獲已，登道至京，召於司政殿，問以神仙之事，語不契放還，會昌三年，再召入對，稱旨，敬宗拜授法籙，除銀青光祿大夫崇玄館大學士，賜號廣成先生，大中五年十月，雲鶴天樂羅浮空際，遂尸解，餘杖履而已。豈非名大心神通之驗乎，人不肯為，有為

之者亦若是矣。

道備登玉清，

智仁勇三者，天下之達德，知斯三者，則知所以修身，生知安行成功一也。洞經至此，可謂優入聖賢之域，道德圓滿克備，登上玉清聖境，修習至此，可出陽神於泥丸也。或云：宅舍壞，子曰：朝聞道，夕死可矣。玉清上境，乃人之泥丸宮衆妙門，投胎奪舍皆自此出入，人之死亦由是出去。

位爲聖仙公。

仙階聖位，當作仙公，前有五老翁，不應重當作公字，中卷十章，以眼耳鼻舌身意、津液手足、精血性命為主，因此地水火風四大假合，而有此幻妄之體，當依此幻妄修證真乘，毋使六根誘引於人欲之私，則不墮六洞魔宮，身飛六合之外，位證玉清仙公之果。釋云：如來說諸相，具足即非具足，是名諸相具足，如來說有我者，即非有我，而凡夫之人以為有我，大率不欲人之執着虛假以為實

際，自然超脫凡質，得證真如矣。昔日聶師道字宗微，世穎悟，事親以孝聞，受大洞經籙，深詣其精要，遇彭蔡二真人，又遇謝修通真人謂之曰：吾與彭蔡隱此二百年，適被東華君命主玉笥山地仙，兼清虛館，爾與我素有道緣，故來相報，汝宜善修，當有仙公之位，忽然不見，師道旋亦羽化，豈非仙公之徵驗乎。大元蓬州衛桂之，平昔修混合之道，常誦《大洞》、《靈寶》二經，《周易》手不釋卷，往來蓬山，居玉笥山，或日坐盤石上，俄有虎遶其傍，公略不顧，虎亦自若。又一日，忽如夢，入一巨穴，深邃數里，或明，有宮室，遇人謂曰：非君所宜來，可速出，遂登山，松竹瀟灑，鹿鳴鶴唳，人又語曰：時未至，姑暫還，後召復到，自後舉止不凡，至元甲午五月二十八日晡，聞人呼曰：帝命召，宜疾來，公矍然起行，至中道冉冉而逝，豈非登玉清證仙公乎。

右件玉章天篆八十字，上鎮太渙極

瑤天，下統第四壘王德君。

《玄契》曰：真人洞清冥慧大意元通，根塵斷盡，世法除滅，有無二累，皆悉空寂，全真妙行，得大心神通，能斬酆都山明晨耐犯、武城天宮惡根地根魔籍鬼帳，常以法財供養元始天王，施及一切，普令具足，成大富王圓滿十方進登飛仙。飛仙者，飛行虛空，乘雲駕鶴，形棲華表柱，朝起扶桑，暮宿咸池，如丁令威、徐子真等是也。

玉清無極總真文昌大洞仙經卷之六

①「首」，疑當作「青」。
②「□」，此字原書模糊不清。

玉清無極總真文昌大洞仙經卷之七

東蜀蓬萊山中陽子衛琪註

元始天王曰：文昌大洞玉章第十七，手足洞靈，手足力通。丁未、戊申、井、革。

皇初紫炁中，

或曰：人有六根，胡為又有手足等類，殊不知情欲一起，皆是根塵，即釋氏所謂五陰、六入、十二根塵便是，蓋手足之力，在乎養炁，神炁全和，耽樂五道，不知手之舞之足之蹈之也。皇初紫虛元君在紫炁之中，亦云紫戶，在玉京山後戶，或以紫炁為紫元，以其字相類，故傳染誤，人問十二菩薩曰：擔屎漢在乎負荷有力耳，手力者勇猛精進不退初心，遇大難不屈縮，即傳謂擇善而固執，二教謂堅持固守，非謂以手執持之也，足力者，真履實踐於步趨。

暉光鬱霄明。

其光暉映鬱明於重霄之上，人之手

執足行，無非正理，故有紫炁生腦而煥明，霄字有九：天神金霄遊，琳和九霄外，明真煥九霄，玉帝乘朱霄，法垣與朱霄，駕景登絕霄，三秀登霄庭，暉光鬱霄明，回霄飛垂漠。共九霄，而義不同，非特為霄，而蓋有冠佩車蓋之稱也，隨人所見而得名耳。

三天煥九景，

三炁生九炁，是為三寶九天，皆清淨太陽道境，景光煥燦長春不夜之天，手足頭名三關，以護九竅，務欲聰明光景。

離合億萬生。

乾坤其易之門耶，離合即闢闔也，《易》曰闢戶謂之乾，闔戶謂之坤，乾坤變通，則有生生不窮之理，其道炁離而復合。

披朱巾綠霞，

言皇初紫虛元君，頭包赤朱之中，身披綠霞之帔，上卷第三章綠霞煥金墉，一云六霞，錯誤，以音類而誤書字。

上回寒童靈。

寒童，乃青童君東方蒼龍之地，皇初紫虛元君恐其尸位而苟安，不能生育萬物，故回其靈於萬物上，使各得其所。

拔出五苦毒，

拔出三塗五苦之荼毒，前篇拔出五苦界，今日毒，蓋五苦界中，尤有五苦之毒在，謂火車寒冰嚴寒酷熱辛酸之炁。

超形過始青。

八梵九天，東方曰始青天太青天，此言人超度形神，使其越過始青之天，方至欲界色界無色界，方至四梵種民天，方至神霄九天，無上三天，子細歷數各天，動計數萬里，信知其不可階而升也，然而有道士，通達明了，不涉關津，不勞登陟，動一念之頃，可以直造圓頂之外矣。

白素啓蕭仞，

白素右元君名啓明，蕭仞即白元尊神開啓蕭臺之仞，前云紫素無英也，此名三素三仞，乃三神名，一云黃素，太謬。

金門衛朱兵。

西方七寶金門，其門森衛，皆朱兵也，此其以喻真火煉真金，而丹道成矣，此言白素右元君字金門上，兵衛森嚴。

七祖積尸結，

西方七炁之天，尸結陰凝也，所以七祖神靈結媾，其尸血之根凝積穢濁之炁，不得解散，以俟運通數合道炁流行。

一化百惡傾。

以真火一化金無重鑛，以陽消陰也，以道炁解釋七祖之尸結，使千邪百惡，一時消散矣，累劫祖禰，一時更生矣。

受福東霞室，

東霞室，一名青華長樂宮，太陽所出，仁化大行，萬物各得其所，故曰受福，前曰超福，如善財受記於福城，東是表命。

反胎朱火庭。

雖云受福東霞，先當赴南丹朱陵火府金液煉形，方可居之，藏教載，神

仙并人道不度南宮，不得升化在南嶽衡山。

洞靈清淨行，

人能證得洞靈清淨之道，功行方為圓滿矣，蓋洞靈清淨妙行，務欲精進，不染一切執着之想，若執着，則力不通矣。

力通自冲明。

得炁力通，故冲哲明達，剛勇強壯，此非常之力也，乃宇宙在乎手，萬化生乎身之力也，智仁勇之力，在人力行之耳。

淨真手握斗，

清淨至真，能以兩手握挽斗樞，非挾山超海、舉鈞扛鼎之謂，乃人為天地之盜，竊其炁以自奉，故得大壯大神通。

足躡九元星。

雙足可以踏躡北斗九元星，北斗本七星，外輔弼二星，故曰九元，經云：足躡北斗跨踞魁罡，皆在心存，非實以足踏。

揮執天地關，

以炁力通，故把執揮荷天地之關，天關地軸乃斗樞也，晝夜璇璣玉衡以齊七政，地軸三百六十，遞互旋轉以運風輪，以鼓載方輿，昔共工氏爭天下，怒以頭觸不周山，所以折其地軸是也，茲言天關，不言地軸，蓋總言之也。黃帝《素問·天真論》云：上古真人提挈天地，把握陰陽，獨立守神，故壽蔽天地，蓋同此義。此章言炁力通，蓋力在乎養炁，炁充則力充，炁衰則力衰，故在貴其炁，固其根，始得強壯，故能揮執天地之關軸，人之關在乎陰陽二炁也。

精神生命根。

精者神之本，炁者神之用，形者神之宅，故神太用則歇，精太搖則竭，炁太勞則絕，是以形之生也，以其有神也，神之有托者，以其有炁也，精竭則炁耗，炁耗則神離，神離則形死矣。比之於燭，燭盡則火不居，方之於堤，堤決則水不住。故精神者，一身命脉之所關係，可不慎歟，人所當厚。此章以力通為妙行，力者非手

執足行之力，即釋氏五力十力也，五力：信力、念力、精進力、定力、慧力。一是處非處如實力，二知三世報業力，三知諸禪解脫三昧力，四知衆生諸根上下力，五知衆生種種欲力，六知世間種種性力，七知一切道至力，八得夙命智力，九得天眼能觀一切力，十得漏盡智力，通為十五力，具載藏教，不可誣也。

右件玉章天篆一百字，上鎮元載孔昇天，下統第五壘金粟澤地土皇君。

《玄契》曰：真人得洞靈清淨手足力通，把握揮荷，飛步矯躡，往來指措，一切無礙，能斬九幽地獄惡根地根魔籍鬼帳，常以靈茶黃芽金藥供養元始天王，輪步九光，進登天仙。天仙者，修煉內外金丹，功行圓滿，飛行三十六天，遍觀天宮妙境，快樂自在，如鍾呂真人是也。

元始天王曰：文昌大洞玉章第十八，性命洞玄，元命靈通。己酉、庚戌、鼎、震。

中央黃素炁，

此經順性命之理以立三才，故三極之道各有攸司，若能窮理盡性以至

於命，則歸大道矣。故心生則性滅，心寂則性見，所謂成性存、存道義之門。黃素，黃老君名。此章以性命主意而言，故脾主中央戊己之土，其色黃，其炁亦黃，故《度人經》云：黃帝中主，萬神無越，中理五炁，混合百神。又曰：黃中治炁，總統元君，所以人之性命根本在乎脾胃剋化穀府，滋養四靈，則性命可以長保，在丹道謂之地魂、丹母、刀圭、黃芽、黃華、黃男、黃牛、黃庭、穀府、真土、黃婆、土釜、八卦爐之類是也，故五嶽、五嶽皆屬土。昔向子文，寶歷中，官衡州，遇龔長慶謂曰：吾師司馬隱元為委羽洞天仙官，人之功過，皆隸五嶽洞天，聞于九天使者。我師授我以中黃太一默朝上帝之道，吾今修之，子文告願從南遊，長慶止以不可，翩然而往，是知能修中央黃炁，其道可致神仙，此言黃素中元君圓華黃仞所主之洞章。

圓華玉壽靈。

圓華，亦名黃華，乃胃脘也，亦諱玉

壽靈，主剋化穀府之神也，能剋化穀府，則炁渾而有壽，天壽不二，皆在修積致之。

太張上玉門，

太張上，黃素老君之字也，玉門者，人腦中玉帝宮也，人身之萬神所朝，萬炁所聚，皆萃于此，一曰天靈，一曰天谷。

伏雲三仞明。

盡其心者，知其性也，知其性則知天矣。三仞者，三界之上渺渺大羅天也。故性命雙修者，登此三界之上，故伏五雲於三關之杪，則光明照耀。又三仞者，即青黃白三色之雲炁，蓋紫素左元君翳鬱仞字安來上，黃素中元君圓華黃仞字太張上，白素右元君啓明蕭仞字金門，謂之三仞。

赤景翳逸寥，

赤景，日也，逸寥，陰也，如月受日而光之謂月，咒云：芬艷翳寥，又日中夫人名陽中陰，如房日兔，兔四足為耦屬陰，日屬陽，故曰陽中陰畢月鳥，鳥三足為奇屬陽，月屬陰，故曰

陰中陽，遞相互取其理而名之，此言日中有夫人，亦如人陽神中有雌一，陰中陽，陽中陰，互換交感以成文昌。

提携太一真。

常提太一之真，太一者，乃水之元炁所化，常居人頭上，布流真炁，化為紫雲華蓋，蔭覆兆形，提携，常提省令惺惺地。

帝女抱定陵，

泥丸，雌一帝女，又曰斗中中女，常抱真陽精魂，名定陵，而誦《大洞仙經》玉文雲章，以接上天之真炁流注以生人道。

吟詠玉清經。

吟誦《大洞仙經》玉文雲章，如司馬誦《洞章》以生人之類，有衛房聖母監生大神，天神地祇同詠玉音，監護生育之事。

玉符編紫房，

紫房在天中之天，收掌符圖之所，注見前篇，即無英公子白元尊神，執符把籙齊到帝前者，皆同此義，乃生人

之理。

五籍標圓庭。

五方符圖版籍，皆紀得仙之名，圓庭亦名天庭宮，在腦中明堂上一寸，萬神皆聚於此，攝魂魄生人道，致神仙亦然。

七祖反胎仙，

七祖皆反胎更生而得神仙，人之生也，諸天稱慶，萬帝設禮，然後乃生，非不貴也，然人自取輕賤，不能保重也。

絕滅三塗尸。

《度人經》永度三塗五苦八難，同斷絕消滅三塗五苦之穢。尸亦三尸神，彭躄、彭踞、彭躓，在人身中，專奏罪狀於三府，三尸居人三田，每尸管三蟲，共九蟲，復管萬蟲，啞嚙身體，如《涅槃經》載，蟲皆有名字，該載不盡，人生陽道八萬四千諸毛竅中，皆生一蟲，人死則此蟲皆飛走，遠遁着物。

流風斷血滯，

流風者玄炁也，周流一身，所以斷絕

尸血，尸血凝滯，蓋得真炁方可流通宣布，其不得凝結滯塞，所以有生化之自。

玄業位黃寧。

其性命玄業，皆在黃寧，乃精血之神名，三生字黃寧，即中央脾土也，土得天地渾全之數，故生成之理始終賴焉。

洞玄清淨光，

脾胃調攝得所，自然清淨光華也，下云性命即元神也，古人云：常喚省主人翁，惺惺着休受人謾，又自應諾以警悟。

元命靈通成。

《生神經》云：胞元結長命，惡根應化消，蓋元命通靈，成就大洞帝尊也。此章理性命兼該，《語》曰：性與天道，不可得而聞也，子路有聞，未之能行。斯言過矣，三千之徒，顏子、曾參、子思、冉伯牛、仲弓等，皆稱德行，豈不得夫子性與天道乎！後之儒者談此為口實，不復考之《周易》、《中庸》等書微言奧旨，以究其

至極之地，便云我儒家無此等性命之學，良可耻也。《中庸》：天命之謂性，率性之謂道。《易》曰：窮理盡性以至於命。豈相遠哉！上天所賦與而我稟受而生者是。

性命宗本堅，

一陰一陽之謂道，成之者性也，又曰：自誠明謂之性，性猶命也，《書》曰：克明峻德。德，性也，釋教所謂福德，性宗本堅確。

孝道成明王。

《語》曰：君子務本，本立而道生，孝悌也者，其為仁之本歟，仁者人也，親親為大。昔虞舜時，太上下降為帝師，號尹壽子，教帝以孝悌之道，蓋上天有星辰主之，斗中真人號孝悌王，名弘康，字伯中，昔曲阜蘭公得此道，傳之媼母，媼母傳之許太史，皆證上仙。人世能修其孝悌忠信，即證此位，故始炁為大道，於日中為孝道仙王，元炁為至道，於月中為孝道明王，玄炁為孝道，於斗中為孝悌王。蓋綱常之道，倫理當然，非

外爍也，然而在上之人，寬柔以教，則孝悌忠信有可望於此，此若苛政急迫，則下之人應酬不下，奚暇治禮義哉。諺曰：禮義生於富足，盜賊起於貧窮，豈得已也，若能上行下效，自家及國，則普天之下，率土之濱，皆為忠臣孝子也。《詩》云：其儀不忒，正是四國。其斯之謂歟！昔田虛應字良逸，齊國人也，性樸拙，開皇時，官湖南，事親以孝，躬耕以盡子職，父母去世，乃受《大洞經》錄法於天師薛季昌，行誦不輟，後潭州旱，祈雨不應，召之使禱，良逸但蓬頭弊衣至郡，無言而雨，又久雨不止，良逸但默然岸幘而坐，雨即霽，唐憲宗遣使召，不起，而尸解，豈非因孝致仙乎。元蜀人姚文起，性好善，事母孝，年過五十而嗣未立，居武昌而游仕婺州，值元皇垂訓云：汝但誦《大洞經》，而後嗣可期，後文起誦至千卷而表散，次年生一男，名曰文昌保，豈非至孝之應乎，蓋《文昌經》言天地人三才之道，皆以陰陽

和暢為生生之根，若陰陽駁雜，則炁數乖戾，有生之根幾亦息矣，文，理也，昌盛也。

生根得太和，

天地之大德曰生，蓋根本滋生得太和真炁，此生生不窮之根本也，《黃庭》云：何不食炁，太和精和也者，天下之達道。

無為登上清。

《易》曰：無思也，無為也。蓋自然之理，大丹之道，無為而無不為，登上清境見靈實天尊也。脾炁上朝絳宮，皆太和之炁也，大抵中卷以六根取喻，釋云：不入色聲香味觸法，是名須陀洹，一往來實無往來，是名斯陀含，名不來是名阿那含，實無有法是名阿羅漢，此道家所謂四果仙人，佛家名四果阿羅漢，未到究竟不輪轉地，所以暫餐太和遊憩上清，終期成上乘果位，釋子不知命宗，稍見性，謂幻殼無用，不肯愛惜，只修沉空滯寂，不能性命雙全。

右件玉章天篆一百字，上鎮太安皇

崖天，下統第五壘人德君。

《玄契》曰：真人得洞玄清淨元命靈通，自天尊天帝、真人神仙、天趣神趣、人趣魔趣，及一切衆生性命宗本，一切大通，無礙無障，能斬五嶽地獄地根惡根魔籍鬼帳，常以神水靈液供養元始天王，滋潤玄英，進登真仙。真仙者，先在人世燒丹煉藥，救濟貧窮，

咒水書符，祭孤度爽，飛升如葛仙翁之類是也。

元始天王曰：文章大洞玉章第十九，津液洞源，津液神通。辛亥、壬子、艮、漸。

青精上華炁，

津液之在身，如水之在物，雖無可得乎，前輩云：涕唾精津炁血液，七般皆是屬陰物，雖然，非藉此無以滋養生根。

太微玄景童。

一云景精，乃太微小童名字，此章以津液主義，故以太微小童流布華景之炁，通暢百關，毋致津脉凝滯，所以易生也。太微，蓋經中有五，上卷云：玉符徵太微，太微天宮，此中卷云：太微玄景童，混合太微童，下卷

云：越轉入太微。蓋神九天之上，復有太微天帝、太微大帝、少微大帝等類。

神化玉室內，

窮神知化，德之盛也，身神凝結於心宅之內，乃透金貫石，入水不溺，入火不焚，亘古今胎佛母，亦謂之元始天尊在保守耳。虛靜先生云：欲要身中神不出，莫向靈臺留一物，物在中心中神不清，耗散真精損筋骨，神若出時急收來，神返身中炁自回，如此朝朝與暮暮，自然赤子產真胎。神化者，萬炁萬神變化也，玉室者，即人身中金房玉室，若能毓以天和，千日可以變化。仙集載，純陽真人遇一長者會賓，真人曰：予有一部樂，作一曲以侑酒，可乎？主人曰諾，真人取腰間一瓢，傾出十二女，各執樂器，二女持旌前導，連奏數曲，其音清雅，進退有節，真人曰此鈞天妙樂也，與人間凡樂不同，衆賓歡笑，酬酢以酒，真人復引瓢，接羣女入瓢，真人將瓢吞訖，曰：此乃身中五臟

六腑之神也，人炁和則神和，故為樂音。又仙傳載，仙人嘗聞腹中有音樂之聲，文昌大洞修習至此，身中亦有一部音樂，善養者亦聞知也，豈非下卷六章并第十四章云檀熾鈞吉祥乎，蓋此經聚則為蒼胡頡寶，散則為檀熾鈞音，務以陰陽炁和，然後乃可為音，文昌之道可謂盛矣。

飛羽逸紫空。

禽之制在炁，故神炁既煉，陽神現形，則羽翰自生，可以飛升逸樂於紫空之中。昔薛季昌，西蜀漢州人，世為官族，酷愛山水，遊青城，父母謂不遠可從行，後南遊桃源，遇正一先生於南嶽，授《大洞經法錄》，研窮真要，唐明皇詔赴京，問道德稱旨，賜天師號，後乞回山，上賦詩贈之，滿朝欽崇。一日謂弟子曰：今夕祝融峰有會，予被召當往，懼起凌空而去，不復回顧，此乃洞經逸紫空，魏元君自茅山乘雲至南嶽，虛空動計千里，雲至化為石，今存於南嶽山。日為三矜交，

矜字凡三見，上卷為首章，曰：干景併生矜，中卷八章曰：日為三矜交，下卷末章曰：携矜太帝房，皆同一義，蓋太微童子名三矜交，能生津也。又云：三矜，心中三神也，一曰靈朱君，一曰靈明君，一曰靈黃君，日與之相交也，與干景併生矜同義，日者太陽之精，內有三足鳥，在人為心。

奉符登帝壙。

太微小童既與心神交會，當奉符命登上玉帝之城，腦後謂之玉城，下卷第三章云：披霞升帝壙，同，即人玉枕骨是。

開關把金節，

持節方可開關，節，符契也，出入關津，當執符而行，至關則合符，稍有差異，同詐冒，金符銅符竹符，今日金節，又貴重。

閉戶扣瓊鍾。

但口眼鼻耳，皆謂之窗牖門戶，閉者，合也，塞也，瓊鍾，乃扣齒，左曰鍾，右曰磬，中曰鼓，故伐魔當扣鍾，

朝謁當鳴鼓。

滅魔三艷野，

三艷者，《伏魔經》所載艷都山，在天地間東北隅艮地，蓋艮為鬼門也，高萬里，分三層，上層齊天，號上元六洞宮，仙官所主，中層中元六洞宮，大魔王所主，下層下元三十七獄，四方三十六，中央一獄總其事，故因三元號三艷，以其曠豁故曰野，非魔王无以制禦六陰六洞冤，魔下皆係累世死軍敗將，強魂義魄，好勇鬥狠，殺心未散，結為群伍，或假忠臣義士廟食於人，或為瘟疫使臣荼毒於物，修行人當防警之，恐其害道，或化為美艷，戕人靈根，盜人至寶，故執符把錄，鳴鍾擊鼓，欲戰陰魔也。三艷在人雙腎之間，大率是極陰之境，《參同契》云：群陰剝盡始見陽和，仍須戰退陰魔，然後方見純陽，結集輕舉飛化，位為真人。

招靈上清宮。

攝招魂靈赴上清真境，即中元絳宮也，上天有招真致靈之符，可以攝召

天真地聖、三界鬼神魂爽，有此易得凝集。

明出窮陰關，

即下關腎府，人當出此陰關，進登陽境，乃腎炁朝心炁也，《丹經》：鉛遇癸生須急採。此乃北方陽炁一動，便立丹基也。

入精六合房。

六合者，天地之內也。《傳》云：六合之外，聖人存而勿論。具六根之身，亦謂之六合，即《易》之所謂周流六虛也。或云在人腦中，謂一身之神聚此，人死則魂魄據之，故枯體所在即靈，人之精，乘炁而行於四肢骨髓之間，故四肢健，及男女交媾，神炁聚於下元，精乘炁驟亦會於下元，人得秘固之術，則將聚於六合房，與神炁合成一團，復自腎間夾脊雙關入泥丸，謂之還精補腦，故下卷第八章云：桃君守六合，勒精衛泥丸，正謂此也。世多有之，謂之御女術，或云三峰黃谷子，一云房中術，一云黃河逆流法，今世往往有之，初不離海

底尾間也。六合有五，此中卷云：

入精六合房，下卷云：凝煥六合房，混化六合室，高觀六合庭，桃君守六合等類，衍文有云：制魔生六明，大中六炁清，五魔伐六陰，堅我六仙府等，蓋中卷專以六根修證，若能六根清靜，則六明發生，六炁清爽，六洞魔伐，六府登仙。

回老變皓形，

能令人身強體輕，駐顏悅色，復形如嬰兒之狀，故曰回老變皓形，髮白反黑，齒落更生者，世嘗見之，蓋修養至此妙。

還白返嬰童。

一云反魄還嬰童，必誤，蓋髮白返黑，齒落更生，如嬰孩之童，《玉經》：白首面皺，皆得化度，專炁致柔，復歸於嬰兒之性。

洞源清靜光，

洞源，洞淵水源，津液所出之處，清靜而有光華，老子曰：清者濁之源，蓋源清流長，則混混不已，不捨晝夜，循環無端。

津液具神通。

咽液之道，常以赤龍攪華池，令滿口，分作三咽，仍存一嬰兒於絳宮迎接下，一度謂之一通，至三十六通，謂之小成，三百六十，謂之中成，一千二百，謂之大成，如此日久，則精神光彩，故曰具神通。經中津液之義凡九：上卷云：體矯萬津波，中卷液逸玄中漠，左抱福醴液，津液具神通，咽液生萬神，下卷云：咽味生五芽，百關納津液等語，皆同理義。大抵人之津液，以流通關節、灌溉臟腑為上，而人或惡而唾之，則五臟枯槁，精神不爽，遂生他證，以至殞亡。

咽液生萬神，

神者本一心神而已，今分萬神者，蓋一炁生萬炁，所以有萬神也，天地亦一而已，其間日月星辰、風雨雷電，變化無窮，至如人，目視耳聽、口言手執足行，亦千變萬化，故能遇之善則吉，遇之惡則凶，養之則長存，棄之則死亡，所以有津液，然後萬神有所依養，無津液，則萬神離去不存。

神水華池融。

華池者，口也，赤龍者，舌也，以舌攪取神水，自生舌下二竅，左曰金精，右曰玉液，人有病，則舌枯，則神去，神去則人死。

湧升灌而潤，

水性就下，激而揚之，可使過類，神水本自下生，湧騰上升，灌溉五臟，則身體顏容，光澤潤色，亦如水之在天地間也。

往來無有窮。

自下而上，自上復下，三官升降，上下往來，無有窮盡，人之津液為炁所使，炁行則津液流注，炁滯則津液滯，故成疾。

通生道之源，

往來不窮謂之通，言津液上下通暢百關，滋潤一體，故曰道之源，《老子》曰：水善利萬物，故幾於道，水性柔順，故同道。

天根常茂豐。

天根，亦曰神谷，亦曰玄牝，《老子》曰：玄牝之門，是謂大地根。人身

以腎為本根，故曰天根，房色過者腎必損，腎損則精無所依，故泄，泄之太過，則炁無所歸炁散^①，炁散，則神無所主，故離，離則形體枯槁，亦摧殞矣。故修行人常使天根豐茂，愛惜精炁，存養得所，所以為一身命脉，故曰天根。

右件玉章天篆，一百一十字，上鎮顯定極風天，下繞第五壘人德君。

《玄契》曰：真人得洞源清靜津液，神通湧升，灌潤華池，神水往來，通生帝心一玄，是曰真中之神，長生大君，左生无英，右生白元，名異太一，司命冲靈，桃康合延，執符把籙，宗孝尚道，妙行全真，名曰真人，位證聖仙。聖仙者，曩日在世誅鉏凶惡，為民除害，功成道備，一家骨肉拔宅飛升。如許旌陽等是也。

元始天王曰：文昌大洞玉章第二十，精血洞明，精血神通。癸丑、甲寅、歸妹、豐。

太陽化三晨，

剛健中正，純粹精也，乃性之所寄，命之根也。寂然不動，實性命之所

關係，可不貴之耶。晨亦日之名，日為太陽，晨景車輿也。凡人修煉，以子為冬至，得復卦，蓋一陽初動於地下，當此之時，數座習定，除垢止念，淨心守一，令陽炁漸生漸長，至丑二陽，寅三陽，全為乾坤^②，如車輿之上升也。

紫軒徹玄路。

紫軒，日輪也，乃紫河車搬運陽炁已升入腦，玄路，乃雙關夾脊上入玉城關，至泥丸宮凝集，若出陽神，自此出入。

元君保谷童，

結中元真精魂名，元君即太一元君也，在頭，常遏死戶、開生門，令人長生。谷童，即黃寧童也，居胃脘，主消谷散炁，克化飲食，所以太一元君保此以為一身根本，俗諺：人無根本，飲食為先，既有飲食，無神主之，不得消化，元君謂之雌一，蓋女人為之女仙，得道皆號元君，最為極貴之稱。

守胃塞死戶。

死尸者，人所懼入也，精炁為物，遊魂為變，變則化矣，安能復生，離者不可復合，可不慎歟。谷童守胃脘，遏塞死尸，飲食既消，則人道生矣，《得道經》云：仍節飲食，祛遺尸鬼云云，或曰精血三真元，王君字黃寧，即結中元真精魂，保谷童子是也，故此章專以精血為主，修證妙行妙果是也。

金符煥北華，

金符玉契，皆真陽煉成，至真所寶，煥北華光華，煥爛燦暎，北方十方皆有華，故經有十華妙行，即肺金生腎水之徵。

玉契拔七祖。

一云披七祖，非也，蓋得真陽所凝之金符玉契，七世祖禰皆出類拔萃，飛升朱陵火府，陶魂鑄魄，然後方可仙化。

帝真灌上生，

節中帝真精魂名灌上生，一名嬰兒，欲人生天界，丹在念頭一動為帝真，故《生神章》云：結胎守黃房是也，

亦名幽臺生。

斷息三塗苦。

已於舌章五苦界下注訖，但三塗五苦之中，酆都太山泉曲十二河源地水界中，多少冥官獄吏，蓋由在世有英雄豪傑，剛毅勇猛，能決判疑異，伸曲就直，有大饒益於世務者，死則為善爽鬼，為地官選舉充地下主者，於三塗五苦、九幽地獄、酆都太山之中，取為幽冥官吏，冥冥累暗，處長夜之境，不睹三光，決異事斷疑訟，三百年一遷轉，此乃生不知道、不善，因以致如此受任幽祿，開絕生根，修文昌大洞上乘帝一真道者，遠離此等幽官冥職。

洞明清淨光，

洞達明了本來清淨之靈光，輔以津液，皆水炁也，故曰洞玄洞源洞明，蓋洞源比津字，洞明比精字，洞玄比炁字。

帝心太玄通。

得帝心通徹照見無礙，與釋氏菩提心同，儒曰人之良知良能是也，人能

反求諸身，收斂心神，凝集虛靜，自有通悟，釋云應如是住，如是降伏其心同義。大丹為汞，水銀也，下入鉛鼎，以文武火烹之，結成金液，或者以帝心為章題，奈七曲祖師《玄契》以精血為章題，故從之，蓋心乃血府。

宿命過去智，

宿命因緣，劫前劫後，過去未來，智之所知，無不了然，蓋得宿命通，故佛之六通，宿命通為最，其他神仙未能臻此。

根本元由中。

原其自根自本，皆莫由中道，正心誠意，格物致知，無外是也，中也者，天下之大本，由中及外，粹然純全，內本外末。

未來及他心，

《中庸》謂至誠之道可以前知，故釋云衆生若干種心如來悉知，又云過去心不可得，見在心不可得，未來心不可得，不可得者，不可住此境界也，具六神通者，方知此。所謂六通

者，天眼通，天耳通，他心通，宿命通，神境通，如意通，具此六通，可以知先劫後劫三世所得因緣業力果報之自。

一切無礙融。

三界十方，無礙無障，混融一身，所謂萬化生乎身，《莊子》宇泰定者，發乎天光，故有知見生，又謂得解脫，然後有知見。

洞源與洞明，

已前篇洞源言液，此篇洞明言精血，皆水之屬，人能以此修證妙行，乃得六通具足證果，不退轉地永無失脫之憂。

萬道由通生。

萬道萬法，皆從水生，通則無所不知，過去未來之事如指諸掌，故經多以十通由斯生，十通成真通，則變化自然。或者謂語意繁劇，琪曰：且天王說經，始因靈風振響，寶光成音，集光中之音，反復敷演，方成洞章，玉宸序次其始末，太玄編集，經三聖人，然後成書，一經聖人手，議

論安敢當，所以聖誥諄復，惟恐人天一語不能反正，故至再至三也，釋之者，不得不隨句命辭，雖前後委曲重，亦欲人於一句下信解不及，則再於一句下得悟，又何難焉。

右件玉章天篆，八十字，上鎮始皇孝芒天，下統第五壘人德君。

《玄契》曰：真人得洞明清淨精血神通，則生洞明帝心太玄真道，先劫後劫，三界十方，他我根源，過去未來，七通八達，備悉知見，能斷江海水帝祁波、水虎泉曲河源、地根惡根魔籍鬼帳，常以洞源金酒洞明法燈供養元始天王，生炁潤根，通明朗慧，妙覺大度，進登玉清上品上仙之貴。上

仙者，昔在人間修煉至真，已後白日冲舉，為玉帝保明，進大羅天，位三清侍臣，如張天師等是也。

《玉清文昌大洞經》，乃元始天王所宣，而人或問曰：天尊天王有異乎？琪曰：元始之號不一而足，有稱元始天尊，或云混沌自然元始天尊，浮黎元始天尊，元始上帝，元始天帝，元始一炁天君，或元陽上帝，

蓋諸天說法時，天人各以己見稱尊之而已。道本无名，非實有相也，志道據德之士，著名相，殫言語，是非道也，然未喻者不容隱，不得已著為書。昔天地未判，元炁始凝，形如雞子，中有混沌氏生焉，盤踞中央，自分清濁陰陽二炁于上下，頭乘乾天，腹盤坤地，混沌氏日長一丈，天地亦長一丈，如此九萬九千九百九十億萬劫，兩儀方定，以身中九宮之炁，上結九天，下凝九地，炁中之神王，九天，炁中之靈主九地，以心腎為坎離日月，五臟真炁為五星，九竅之精為北斗，以呼吸為巽風，以聲音為震雷，以津液炁血為兑澤，以身體為艮山，堪輿河嶽，似混沌氏形質，故崇卑不等，故有山崖峰嶺凸凹之不齊。混沌氏飛神昇化于九天之上，是為混沌自然元始天尊。身中蟲虱化為甲子十二相二十八禽，如子為鼠丑為牛，如角木蛟亢金龍之類是也，形居坤腹而光射乾首，是為星辰，須髮毫毛為草木，形化為土，骨化為石，

涕唾津液血尿化為江海河瀆，唯中和之炁集而為人，身長數百由旬，然人身尚未完，或為人首蛇身，或牛首人身，各以炁類相感，或飛行，或履地，上天下地，任有攸往，或相吞啖，無有鈐制，於是三皇氏迭生而治之，遂尊混沌氏為盤古先生，天皇地皇人皇即洞真洞玄洞神是也，是知天地人及萬物，皆是元始一炁化生，而物物具有元始，皆因元炁始生，故曰元始。唯人得其炁之最靈者也，豈不大哉！今人所生之質，皆肖混沌氏，故伏羲氏畫卦，體混沌氏之形，曰乾為首，坤為腹，巽為股，震為足，坎為耳，離為目，艮為手，兌為口，不以象之而直以為字，當知是體混沌氏明矣，皆一炁流傳並隸其子孫胄胤，豈不貴哉！世人多以酒色財氣戕賊元始，鑿破混沌，故天神演此洞章，令人吟詠，情性感召，元炁圓融，始相以合夫混沌自然元始之天，則欲壽得壽，求仙得仙，坐致自然，永為真人矣。中陽子衛琪稽首。

玉清無極總真文昌大洞仙經卷之七

①此句，疑當作「則炁無所歸而炁散」。

②「坤」，疑此字為衍文。

③「王」，疑為「主」之誤。

玉清無極總真文昌大洞仙經卷之八

東蜀蓬萊山中陽子衛琪註

道言：爾時

道者，真淨明妙，虛徹靈通，天地未判，父母未生，卓然而獨存，天地萬化，萬事萬物，無不混然其間，萬殊一本者也。《老子》曰：有物混成，先天地生，寂兮寥兮，獨立而不改，周行而不殆是也。在人為心，變化莫測，隨事隨應，靜而為性，動而為情，情逐境移，移而不止，化而為欲，心性情欲四者，同出而異名也。人能靜而守心，則本性自見，若逐情欲境界流而忘返，則汨於生死苦海，何由出離，故天人說經以道言者此也，玉宸道君演元始之妙音，故曰道言，守性為玉宸。

元始天王以大洞高上混洞太無元天寶玉皇之炁，註見上卷高上洞元句下，結一寶珠，

名曰黍米珠，又曰摩尼珠，註見中卷體寶圓珠映下，此第二節既知道之所在，即壁立萬仞，兩手放下，閉眼一跳，坐虛空中，上不頂天，下不履地，浩浩蕩蕩，渾無際涯，於混沌洪濛中自有所得，所得之妙，如病得藥，如夢初覺，如獲尺璧，如得寶珠，此乃玉皇之炁聚而成珠之時也，豈不樂哉！第三節既知樂處，逐處圓通，通身手眼，無有隔礙，纔到此地，不可執著以為自足，須是把他撇下。

命之曰蒼胡頡。

蒼者，青陽正色，胡者，大也，元炁光明正大，頡者，直上而勁，故下品十一章云：五炁理中頡，言元始以其至大至剛之炁，結成寶珠，而命稱之曰蒼胡頡。命者，天命之也，蓋天理流行，賦與萬物謂之命，人稟受以生謂之性。蒼胡頡者，性之德也，以其剛健中正純粹精神所發。

曰：吾以此寶珠，從道妙一，善貸生根。

寶珠非有象，乃人之性命也，《魯語》

曰：性與天道，不可得而聞也。豈下格小僊之所可與聞焉，蓋元始自稱曰，我以此寶珠，從天一生水藉以為根，以立天地。善者，水善利萬物，故幾於道，或曰：從道妙善一貸生根，必誤，一者道之子，道炁一動而生水，故一為天地之根，萬善之長。《老子》曰：夫唯道，善貸且成。善貸者，假借之而已，天地萬物，無非假此以為生成之根。

孕玄分元，誕始傳真。

孕玄者，包含太玄也，分元者，開明太元也，誕始者，發生太始也，玄元始三炁化生三寶君，父子相承，師資授受，故曰傳真。三炁，太玄之炁所生融炎演三炁，太元之炁所生旻景遯三炁，太始之炁所生混洞浩三炁，總謂之九炁，所謂三炁合德，九炁齊併。

化生諸天，

九炁各生萬炁，以生成四梵種民四天、無色界四天、色界一十八天、欲界六天，謂之三十二天。此下又生

八梵九天，與日月星辰羅列空界，《度人經》五文開廓，普植神靈。《易》乾道成男，坤道成女。二炁交感，化生萬物，自此已往，人物芸芸，蕃衍盛大，唯人最靈至貴，位乎其中，當體道法天以神明之。凝成萬炁。

此句當在化生諸天上，元始凝聚本身之炁，開演以成萬炁，方可化生諸天，《大有金書》：玉皇之炁九萬九千九百九十億萬炁。

大哉至寶，惟我獨存。

元始自稱，如《易》大哉乾元，萬物資始，至哉坤元，萬物資生。至大二字，惟乾坤當之，獨存，獨有也。今《大洞經》又在乾坤二卦之上，故謂之無極，無極而太極，《易》曰：太極生兩儀。兩儀莫位，混沌氏立，頂天踏地，混沌日長一丈，天高一丈，地下一丈，即元始是也。

今為玉宸道君重出斯寶，

《易》曰：苟非其人，道不虛行。元始久蘊此寶，待其人而後傳，玉宸道

君即靈寶天尊也，元始以此大道傳之與靈寶也。重出斯寶者，蓋元始於龍漢元年化生，當年出書者，出此書也，今為玉宸重出者，此經當在開皇以後一再敷演之耳，諸天諸地各有定位，孔子所謂天尊地卑，乾坤定矣，卑高以陳，貴賤位矣，《書》所謂五典有序。道經曰吾乃汝之根，亦此意也，亦猶乾坤坎離，始有四象，便有八卦，亘古布列，不知其幾劫塵後，至伏羲氏出，仰觀俯察而畫八卦，方且顯露，文王重爻，孔子繫辭，經三聖人手，始得廣大悉備，將以順性命之理，兼三才而兩之，此《大洞仙經》先天先地已有之矣，至是元始重出之，道有所待，豈可輕易，道君畀付太玄道父，亦經三聖授受，然後三界鬼神及諸人天，方知所生之自，蓋自乾知太始一元之炁也。

諸天帝王、天真大聖、瞻望寶光。其光分數百千萬億，結成《大洞仙經》。

真仙翹首仰望景光，分輝散彩，光華文縷，有百千萬億，無量無邊，不可

思議之光，結成《大洞仙經》。又《玉經》云：蘊發光芒，又載十七帝光之類，皆自己身之中靈光，所以能結成文章也，又如五方真文玉章，皆係天光神炁凝結成文也。

王文^①凝而成雲，絢而成章。

王^②者寶之至也，言其寶文凝結成雲篆，絢綵成文章，雲漢昭回。

諸天帝王、天真大聖以清明識，以始通觀，以華舌通，齊聲宣詠大洞雲章。

諸天帝王，如三十二天帝，釋氏以天王稱，道以帝者稱，諸天各有天真大聖，既見空中雲文玉章，各以清淨明了知見識認，以始通道眼觀睹，以玄明華舌通議，諸天帝王真仙萬口一辭，同聲唱和吟詠洞章。

音徹萬天，流響九地。

《玉經》云：流響雲營，又曰：六合至邇，三景非遠，同其音聲，響徹九天九地。前三品並不言地，惟一向說天道，至此方見有九地，蓋先陽而後陰也。九地者，九壘土皇也。一曰元德，二曰皇德，三曰帝德，四曰

王德，五曰人德，六曰地德，七曰里德，八曰福德，九曰昌德，此九壘也。每壘一重土、一重水、一重風。各有四土皇，分掌四方之域，號三十六土皇，各有土父母宗正令卿、丞長將佐二千石等官僚曹局，各以萬眾分掌機務，上有五嶽名山，總制綱權，每壘動計萬里，而天真在諸天高高之上吟詠洞章，其音聲下達地水二司，如此周徧可謂大矣，蓋以元始一炁周流通天地之外，無遠弗屆。

天界地界、水界神鄉，一切神靈，不離本座，俱睹雲章絢目，仙梵歷耳。

天界，上元天官所統，地界，中元地官所轄，水界，下元水官所管，三元各有攸司，主管鬼神及人天罪福，每年正七十三會，考較實非細務，故下云：三元乘晨回，太一上元炁，因知首章係上元九府四司也，諸天大聖為能宣詠洞章，其餘三界鬼神不動其所，惟能得見雲章絢耀其目，喜聞仙梵一歷耳根，頓悟大乘，蓋諸天人雖受快樂，終不悟道，今見洞章，

心所渴仰。

皆悉百生障滅，萬劫塵消。

清炁為天，濁炁為地，冲和之炁為人，而人自曠古以來淪洄其間，不知其幾萬劫塵，或為天人，或為鬼神，或為世人，或分男女，或入異類，千生萬生，出彼沒此，升沉潛躍，不知幾何，不可以算數譬喻，經云：百生萬劫。誠如是也。幸而今日得復神靈見聞妙理，敢不兢兢戰戰進修，以滅往者不知不悟之因，於是此心一悟，則前生今世一切過惡普皆消滅，鬼尚如是，人胡不然。釋云：衆罪如霜露，慧日能消除，慧日者一心也。

三塗九幽，十方惡趣，

三塗註在中卷拔出五苦界下。九幽者，東方風雷，南方火翳，西方金剛，北方溟泠，中央普掠，東北鑊湯，東南銅柱，西南屠割，西北火車，總謂之九幽地獄。諸天諸地真仙鬼神，既以各分尊卑職分，定位不紊，則必有刑憲賞善罰惡之司糾正，真仙則

有流金火鈴及雷神，謂之杖直繩法，鬼神則有天一北獄女青條律，地下考人之功過，則有三塗五苦九幽都諸大地獄，故十方三界羅列凶惡鬼趣，以治其事，考驗功過。

咸承光音，所及十纏九結六染七塵，於時頃間，一時解脫。

十纏者，十惡大罪，不孝父母，不忠君王，不敬三寶，殺生、偷盜、邪淫、貪嗔怒愚癡、綺語妄言、惡口兩舌等是也。九結者，負命、負財、負呵罵、負心、負人、負國、負鞭撻、負力、負恩義等類是也。六染者，即釋氏所謂眼耳鼻舌身意也，聲香味觸法是也。七塵者，喜怒哀樂愛惡欲是也。三界鬼神皆承仗大洞寶珠之光，檀熾鈞之樂音，所有夙世纏結染塵，咸於此時，頃刻之間並得解脫，所謂七年之病求三年之艾也。茲以人身言之，蒼胡頡者，即《度人經》之黍米也，人之一點靈光便是，化生諸天者，即人之五體百骸血榮炁衛也，諸天帝王齊聲宣詠者，即心念一動，一

身之炁血運轉流通也，萬天九地者，即人上至頂下至踵也，天地水三界者，即人三田也，障滅塵消者，乃炁體和暢也，三塗九幽者，即腎部情慾也，咸承光音者，心目所極也，一時解脫者，諸塵漏盡也，中田之上諸天真仙，即清明神識上部人神也，中田之下地獄鬼神，即下部人神也，若修清明，則此神化為真仙，若染情慾，則尸穢皆化地獄，一善一惡，不出乎一身，為鬼為仙，在反掌間爾。

於是太玄道父前詣蕭臺，再拜稽首，求受寶珠所結《大洞仙經》玉文雲章。

於是太玄道父慇懃前進，請受大洞雲章，須知此文章乃自己真炁所化，能養浩然者。充塞天地，周流六虛，化生萬物，上通泥丸，下達湧泉，熏蒸關節，煉成陽符玉文，及至成全，復化玄炁，歸于虛無自然矣。

庶以導化人天衆生，俱免萬災，咸消衆罪，不沉苦趣，俱等一乘。

忠恕為道不遠，夫子之道忠恕而已矣，道父之心，欲推己以及天下，故

令衆生皆與我一體，可謂用心普矣。導，一云道，非也。道父請曰：而今而後，庶可以導引開化塵世人天及諸衆生也，三界鬼神已得聞見，惟人天衆生尚未及此，故專為請受以化之，使之但得聞是經，免釋萬災千障、諸業衆罪，自今已往，更不沉淪惡趣，皆得升入一乘果位，三界鬼神元有仙職者，俱升一等，亦如人間恩例，普覃一體，故幽明普利，人能掃除一切根塵，萬事萬物一無所染著，是名一身清淨，一身清淨則多身清淨，多身清淨則一世界清淨，一世界清淨則無量世界悉皆清淨，豈有衆生災罪之說。

弘是願言，懇懃啓請。

道父發弘大願元始前，勤勞前進啓問請受寶章，三寶貴重，正法難遭，當盡禮。

元始天王命元神大聖、玉宸道君具俯仰威儀，手付太玄道父蒼胡頡寶。

元神大聖，或云八聖，訛謬太甚，殊不知三寶尊重，況授受之際，以心印

心，口傳心應，威禁至重，其孰能與之哉，以八聖而筵三寶之席，其不為火鈴之擲幾希矣。元神大聖玉宸道君當作一句念，蓋道君乃元始之元神也，如華嚴善財即釋迦之精神變化也，若以為八聖人在玉宸之上，則三寶何以為貴，道君老君在八聖之下，理必無此。具俯仰威儀，元始本為道君重出，而道父請受之勤，於是元始就席命玉宸傳與道父，遂具俯視仰望之禮貌，威者可畏，儀者可象，言其進退俯仰之節威嚴如此，則玉宸親手將《大洞仙經》蒼胡頡寶付與太玄道父，由此觀之，三聖遞相授受灼然可見，何從別有八聖焉。以人言之，太玄者，即兩腎間一點真陽元命也，前詣蕭臺者，乃升中央黃庭也，求受寶珠者，真陽合於祖炁也，元始命玉宸者，乃意以歷劫不壞元神會於元宮也，手付寶者，丹已成也。由此觀之，則修習是經，即是修煉金丹大藥，一體當反求諸其身，不可向外馳求以招譴。

元始告曰：此蒼胡頡寶與檀熾鈞音，若非太玄，何能求請，唯子慈深願重，可昇寶章。

元始重告道父曰：此經聚則為蒼胡頡寶，散則為檀熾鈞音，深為貴重，若非道父，誰敢求請，惟道父慈愛衆生之心甚深，救度衆生之願頗重，故可以昇付寶章，三寶師資授受之間，尤且諄切至再，保護至重，況下格小仙豈容易聞，切見世人輕傳竊漏，或生謗訕，豈無冥責者在焉，此以內言，若非太玄者，一點真陽可以成丹，故曰可昇寶章。

元始天王曰：文昌大洞玉章第二十一，天一生水，一玄妙行。乙卯、丙辰、旅、巽。

九皇上真炁，

九皇，天上有九皇，地下亦有九皇，星中亦有九皇，真仙亦有九皇，如近世張平叔等皆九皇真人，因較劫運之謬，謫降人間，《度人經》：本命日誦之，得九宮真人。皆是玄元始上真之一炁化生，即上卷所謂九月所受之九炁是也。又喻人頭有九宮以

應九天，身有九竅以應九地、九州。或以為九真炁，心中一真，胃脘二真，精血三真，肝中四真，脾中五真，肺中六真，腎中七真，膽中八真，泥丸九真，即生神九帝真炁，同出而異名，乃三十六官之總會所在。

四司天仙王。

四司，即四天王也，常以八節日，命三界四帝煉化學仙之人，東華宮青童主之，朱陵宮上元君主之，西華宮王母主之，北上宮玉宸君主之。亦喻人四靈也，故四靈金木水火也，土無正形，寄旺四季，辰戌丑未是，戊己乃中央真土，謂之天地土皇。又曰四司者，司命司祿司非司危，乃天上四司，經曰：天仙土者，必天上四司也，人之四司，眼司視，耳司聽，鼻司臭，舌司味，儒書謂之五官，視聽臭味皆欲得其正，不為邪炁所乘。

飛霞散天日，

天玄而地黃，散天日者，各現其正色也，蓋諸天各有日月星辰天真，飛霞

散彩，光奪天日，喻人四炁朗清，照燦元陽。

凝煥六合房。

凝，結也，煥，明也，言天真飛霞散彩，凝結煥耀於天地之間，喻人大丹成就，光明烜赫於上田，謂之六合房，即腦宮是。

上真朝玉清，

諸天真仙亦當整肅威儀，以朝玉清上帝，喻人修行以中為主，凝集四靈之炁，上升泥丸，謂之朝元，久之可致神仙。

乘景晨中暉。

景晨，日月之域也，於人乃兩眼是，此言乘日月之車輿也，言諸真上朝皆乘車輿，光暉煒燁。大丹之道，牛車鹿車羊車三車搬運，上通崑崙之頂，天真有景晨明霞之輿，後云駕景登絕霄，故知景乃車輿左右之日月也，暉者，光彩煥爛，言丹自黃道上昇之候，經云溫溫鉛鼎，光透簾帷。

五辰號發紐，

辰非北辰也，乃司命精魂君，名曰發

紐，即五炁五辰，壬子戊子甲子丙子庚子是也，謂之五子歸庚，亦謂之五老啓途，紐，關鍵也，五臟氤氳之炁發其關節，方得凝集於四靈，辰者，亦皇極之辰之元會運世也，循環天地之間源源不已，《度人經》云：旋斗歷箕，回度五常。五常，即五辰五行。

捧籍啓虛皇。

諸真各執版籍，言世人罪福，虛皇，即玉帝也，專一主管上方上界之事，以喻人真炁，自九關百節之中聚於泥丸。

逸綠登紫清，

紫清天，即玉清聖境元始所居也，逸綠，輿也，一云逸綠與回祿同，九關精魂名回綠，道字絕冥，此綠字作顏色字看。

金符刻羽宮。

金符玉冊乃紀神仙之名，羽宮者，蓋梵炁所化輕浮之宅，亦水為羽音之謂，大丹非金無以為體，故金為丹母生水。

領玄蒼胡珠，

諸真咸受五色蒼頡之珠，以喻丹成，萬炁凝聚，而領受百靈拱衛以侍之。蒼胡見中卷註，乃人之性命鉛汞所就也。

弘濟登普光。

弘，大也，濟，渡也，必令皆得其所，在人可以大弘利濟而登上普光明殿，聖人之用心无不普，必令上下咸得其所。

運度玄中人，

太易為玄炁，應度者，以劫數炁運論之，合道者當度。玄中人，如《生神經》云：應合得度者幾萬人。既以成道，當出世度人。

嚙味生五芽。

味者，舌下之津液，以應天之水，謂玄炁中人得漱咽灌溉之道，當生五芽珠也，即五臟之精華凝結五味，酥辣可咽。

結集成胎仙，

婦人懷胎在下田，與腎相對謂之胎田，男子常能存養胎息，凝結神炁，

故無饑渴寒暑之所撓，陽神出入，謂之胎仙。

丹母全真陽。

大丹之母，以純陽為之，若不尅化陰炁，不成丹也，謂之金鼎龍虎大藥，坤為母，經云：產在坤，種在乾。女子十六天癸降，男子十五天精泄，人之初生，為純陽之質，為乾卦，自十五泄精，至二十五，拆初爻為陰為姤卦，三十五，拆二爻為遁卦，四十五，拆三爻為否卦，五十五，拆四爻為觀卦，六十五，拆五爻為剝卦，七十五，拆六爻為坤卦，純陰也，陽爻消盡，則去死不遠。陰陽和合，本有生生不窮之理，人到中年，女男已具，便可止慾，煉丹母以全真陽復本性。

主伴合元範，

宗門云：賓中主，主中賓，如善財，參見五十三位善知識是，今以先天炁為主，以後天炁參之，元範，法度也，循合法度，規矩準繩而已。煉金丹，須慎言語，節飲食，省睡眠三者，次則厚鋪坐褥，解寬衣帶，端其身，

直其脊，唇齒相著，舌拄上腭，微開目，常視鼻端，八者不可缺一，合元範者此也。

太易生玄光。

太易在混沌之初，無極動而為陽，生天一之水、太玄之炁，故曰太玄。玄者，黑也，言水炁之初生而色黑，故曰玄光，乃先天一點靈明，是曰性，從虛無生靈，是曰神，神也者，妙萬物而為言也，未入殼子內，則上下與天地同流，既歸人身，各有所附，人無此靈，則頑然一物而已，神居泥丸。

右件玉章天篆九十字，上鎮太皇翁重浮容天，下統第六壘金剛鐵澤地土皇君。

《玄契》曰：太易一玄妙行息門炁通，初入性根，始於心地，次第生長，滋茂成林，蓋由斷疑，遂生信解，乃曰一度修證，一曲水天，行一百功，從聞入見，一和含攝，皆起初聞，由是天寶為之開光，黑帝為之通血，北斗落死，定名玄籍。

元始天王曰：文昌大洞玉章第二十二，地二生火，二元妙行。丁巳、戊午、兑、渙。

天皇真炁，

前云：九皇上真炁，今云：天皇，蓋天皇大帝在紫微垣勾陳宮，衆星所拱之位，故云星中之尊，總司天府星辰之事。又流珠上一寸為天皇官上真炁，皆自元始所生也，王弼云：實三元之胎祖，鼓舞裁成。正同此論，此乃混沌太無元、赤混太無元、冥寂玄通元所生玄元始之三寶真炁。

三元乘晨回。

晨，一云神，非。三元，天地水，三元各列百二十曹，主掌世人罪福，每年三會，考較簿籍，按《生神章經》並《三元經》、《三官懺》等所載，三元考較，實非細務，蓋三元上朝玉帝，奏人罪狀，乘景晨之輿，以喻人以三元之炁導養形神，所謂三元導養，二象攝生。《中庸》云：鬼神之為德，其盛矣乎。視之而不見，聽之而不聞，體物而不可遺，元亨利貞，屈伸往來，宰制萬品，莫不皆由三元也，屈

伸相感而利害生，罪福之報咸在是矣，雖係人之感召，然亦有鬼神司其分數也。

法垣興朱霄，

已於中卷十章解釋，朱霄，絳霄也，乃九霄之一，太丹之光炁開太丹之天，凝絳霄之宮於南方，法垣，紫微太微天市等。

帝昌啓玉扉。

泥丸九真帝昌上皇字先靈元，其時開玉戶以相待，炁隨神往，咸歸衆妙之門，禪宗云：別具一隻眼看，正謂是也。

拔尸命門內，

拔取尸穢之炁，令離命門，雙腎右曰命門，一身命脉之所關係，人不能貴其炁，固其根，貪愛姪慾搖動命門，死不遠矣。

解結桃康階。

解釋結滯根蒂於桃康之階，桃康乃真炁正神，即腎神字合延，又云玄冥字育嬰，人神之名，或一神而兩呼，兩神一呼。

斂神保五籍，

聚斂一身萬神，端以保守五臟，上以應五星，中以應五炁，下以應五嶽，皆有版籍存焉，乃註記世人得道之仙名。

越轉入太微。

太微乃南斗之垣，經由三界保舉，乃得入太微，皆自下而上，展轉陞遷，由太微而登三境，是為三清侍衛之臣。

單入而雙修，

以一身而入道福慧雙修，利及幽顯也，喻人存念一誠之明，參究一竅之妙，而先天後天之炁並為一家，打成一片。

一曲水天聞。

始因天一生水，而方得地二生火，故下曰海日，蓋水性就下而行地中，其聲響應于天聞者，不聞之聞，君子恐懼乎其不聞，人間私語，天聞若雷，況暗室屋漏之下，十目視，十手指，敢不恐懼！其獨鶴鳴九皋，聲聞于天，謂修行人靜極，則天上地下無

一聲可逃，悉知悉聞，或以聞為開。

海日自東生，

地二生火，故曰海日，蓋日出東海上扶桑山，喻人欲結胞胎，陰陽炁凝聚於己，六陽純全為乾卦，乾體具方得成形。

元命昇太初。

元命，元炁也，天地根於天一而至地二，形炁眊兆之始，人命根於精炁交感，真陽凝聚，方結胞胎，化太初欲形之時。論性不論炁，不備，論炁不論性，不明，蓋性神也，屬陰，命炁也，屬陽，修性不修命，不免宅舍易敗，修命不修性，雖千萬歲，終是不明妙理，故性命雙修為上仙果位。右件玉章天篆六十字，上鎮無思江由天，下統第六壘地德君。

《玄契》曰：太初二元妙行息門，通觀起性心動得性之機，念信不忘，守信不失，為信而行，夫五信在中，心和見和，乃曰二度二點火地行五百功，從見入觀，觀定則澄神，神澄則炁清，始名正觀二和含攝神目方瞳，

由是靈寶開長夜之幽，赤帝養通和之炁。南斗上生注記丹文。

元始天王曰：文昌大洞玉章第二十三，天三生木，三始妙行。己未、庚申、節、中孚。

太一上元炁，

茅山《玉經》無此章。太一見前注，前已兩見上真炁，今日上元炁，泥丸官亦謂之上元官，主司天府事，或曰元禁，無義。

日中司命童。

太陽宮中有日中司命接生君，字道靈，又曰司命靈童，以喻人心，屬陽，而司命者，心之神也，一名丹元，字守靈。此章言人心屬火，火生於木，母隱子胎，五行顛倒術，龍從火裏出，《陰符》云：火生於木，禍發必尅。木中生火，而反燎於薪，於事上有反害之禍，於丹道，木三火二為五，有變化機。

煥然神光明，

心為離明之象，神明之府，其靈光煥爛。修此《文昌大洞》，如指泥中珠，拂塵中鏡，吹寒爐火，復取其本然之

光明而已。

披霞升帝壙。

霞有五色，彤霞、丹霞、絳霞、朱霞、紫霞，皆陽炁也，此言心神披此紅霞，上升泥丸玉帝之官壙城也，註在前，字多互顯。

列坐震靈席，

萬神皆列坐席於震位，東方木德，乃發育生炁之地，帝出乎震，少陽之位也。下見二震靈，註至此，見坎離震三卦也。

混合五日房。

五日為一候，言精神混合於紫房，五日後方各還宮室，大丹之道，片餉工夫立躋聖地，此蓋言火候當以時日守之，抽添進退。傳曰：擇乎中庸，而不能期月守，回之為人也，擇乎中庸，得一善則拳拳服膺而弗失之矣，又曰：回心三月不違仁。人既得此竅妙，當力守之，則將終身，然何拘於一候也。五日，亦五帝散日精，日中開五暉等同義。《靈寶經》云：七日七夜諸天日月星宿一時停輪，此

皆以神炁凝集，陰陽混合於空洞之中，目不瞬、心寂定為是。

白炁育尚生，

胎中一元白炁君，名育尚生，字盛昌，一名玄歸子，後章云：右輔歸盛昌，《生神章》云：務玄育尚生，又云腦宮玉帝名字。

青君案延昌。

結中青炁君案延昌，字合和嬰，乘東方木德歲星之炁，流布正真生炁，降注人身及萬物肝部之中，以生三魂之精。

左携精上門，

節中黑炁君斌來生，字精上門，蓋青君携之，以生左目童子名飛靈，在頭為日，日有九色光芒，輝煌熠燿為九魂真。

右抱合和嬰。

白炁君右抱青炁合和嬰，合以太和之炁，以生右目童晨嬰，在頭為月，月有一十四曜精彩，清明瑩潔為七魄之真。

我生日月華，

人之兩眼如日月之代明，天地之心元不洞見，而天下豈外我耶，天道流行，化生萬物，凡有聲色貌相，而盈於天地之間者，皆物也，既有是物，則必有當然之理，而自不容己，是天生蒸民，有物有則，民之秉彝，好是懿德。天地萬物皆備於我，二炁備體，則雙目如日月之光華，金丹謂日月合璧是也。《參同契》：兩弦合其精，乾坤體乃成。又曰：晦朔之間，混沌洪濛，陰陽炁全，此日月交合之時也。呂仙曰：曲江上月華瑩淨，有箇烏飛。

友寶赤炁王。

友取和諧，寶取貴重，赤炁王乃心之神也，當愛護之，使安靜和平。或曰：友寶乃赤炁王之字，即靈臺虛明不昧之理。

八景照泥丸，

三部八景，乃脊梁三八二十四椎，歷其關節，上照泥丸，三部八景之神，內名隱諱，註在中卷，在人精思，神

明自來。朗然洞房中。

洞房宮在腦宮，元陽真炁自二十四節上升洞房宮，明朗洞照八室，至此下視六極之境，如在掌中，所謂三境非遼。

嬰兒為赤子，

下丹田之神名嬰兒，如初生之赤子，即我修此道，復歸於嬰兒，兒復化為玄炁，《傳》：如保赤子心，誠求之，雖不中不遠。

混合生玉容。

坎離交姤，水火既濟，陰陽混合，凝聚成丹，於元宮溫養得所，抽添得宜，自積于中，而形諸外，見於面，益於背。

五道秀金華，

五道即五行，具體於地，而炁行乎天，如人之五臟具於內，而五炁沖於外也，故五臟皆發秀。金華者，天中之山名也。

位為上清公。

當列位於上清真境，作仙公之貴，公

侯伯子男亦如人間五等之爵，上清中腕是也，萬炁一定位為中宮凝而成丹。

七祖斷玄滯，

七祖九玄有滯礙不得出離者，自此如刀割斷，一齊解脫，幽夜冥關，更無阻滯，同與飛升上境，證聖成真，快樂自在。

身神乘仙風。

一身之神飄然輕舉，如列子乘風而行，上古三皇時，人多身輕，飛行虛空，後世因食五穀甘味，故沉重不能飛行。

徘徊三清上，

優游於三清之上，位在三清，而遊宴可至三清之天，生能游神於三田，死則可以陞三清之境，在三十二天之上大羅界。

和樂返胎嬰。

《易》曰：乾道變化，各正性命，保合大和。蓋大洞至此，返老還嬰，和樂且耽也，頤養和炁，嬰兒自生臍腹之中，如懷胎狀。

大始三炁周，

太易太初太始，即太玄太元太始也，玄元始三炁周備，是為天地之根也，人生至此，炁已具備，丹亦如是，火候周備。

真文肇生明。

真文如五方雲篆，煉之於洞陽之館，治之於流火之庭，方始成文，天真皇人書之，以鎮安天地，此《大洞仙經》，元始以混洞太無之炁結成珠，珠光分敷百千萬億，凝而成雲，絢而成章，演成《大洞仙經》，其真文寶符肇明於此，人生至此五臟具也，謂之五文開廓，五神各守五臟精華故曰文。

右件玉章天篆一百二十字，上鎮上樞阮樂天，下統第六壘地德君。

《玄契》曰：大始三炁妙行觀門通，定記信金石，至信大成，善信能修，堅信進趣，方名正信，十信大全，意和則生炁延，志和則大美益，炁和則三炁就，乃曰三度中三真天數，分一千大功立，從聞入見，從見入通，由

是神寶為之制萬靈，青帝為之護魂爽，東斗注長生之筭，木公書青簡之名。

元始天王曰：文昌大洞玉章第二十四，地四生金，四梵妙行。辛酉、壬戌、小過、既濟。

元靈黃房中，

此章當以金為主，色黃，以應中央脾臟，黃房乃黃庭也，《易》曰：君子黃中通理，正位居體。正謂此，元靈即虛靈不昧是。

內有黃寧童。

精血三真元王君，字黃寧子玄，住黃房中，主管尅化水穀之府，披錦衣黃裳，坐金臺之上，周圍城郭，亦謂之太倉。

左有堅玉君，

胃腕二真堅玉君，字凝羽珠，守胃腕之左，主管胃炁水穀，滋養四體，令如金玉之堅，真炁如碧雲之色，下布太倉之府。

右有帝昌皇。

泥丸九真帝昌上皇，字先靈元，守脾胃之右，分散水穀，灌溉五臟肌膚，

俾之昌盛。一云帝昌童，必誤，不應重作童。

浮黃翳神炁，

脾炁屬土，土色黃，真炁蒸翳，陰下田之神明真炁，丹經云：名為神炁穴，內有坎離精。所以精炁神三者皆聚於此矣。

鬱鬱虛靈谷。

葱葱鬱鬱，覆蓋虛靈之神，保護容顏，此乃堅玉君帝昌皇之真炁，下注於脾胃之府，如此葱葱之盛，所以潤澤顏色。

青肝明輪子，

肝中四真青明君，字明輪子，受胃炁而雙目明朗，肝屬木，木色青，故曰青肝，明輪者，日月也，諸天日月為飛精，諸洞日月為伏根，人間日月為明輪。若吞明輪者為仙，服日月光華各有法，能澤五臟潤顏容，木屬東方甲乙之地，乃日月所出之門戶，地祇於此，旦望迎送鬱儀結璘之神。

開朗徹八窗。

日月所出，容光必照，況八窗玲瓏，

豈不明朗。一本作八聰，必誤，蓋八景照泥丸之類，言其光彩熙媚，照耀三部黃道。

太一儔丘蘭，

儔丘蘭，斗中大女名，又曰下脘神名，皆比喻也，如僧問西來意，曰庭前栢樹子，又曰濂溪窗前草，與自家意思一般。

奉符入玉宮。

奉太一之命，捧符執節，升入腦後玉帝宮中，呈世人罪福，凡初一、十五、庚申、甲子、本命之日，上奏人魂神問之所作。

拔赦七世罪，

超拔七祖之魂，赦宥愆咎，蓋魂神聚於泥丸，呈人所行善惡，首先超度七世祖禰，若人無善因，則累及祖禰受罪。

回元期十通。

《度人經》所謂十回度人，十通亦土之成數，回元即返本還元之說，期以十遍周過，可以度脫七祖九玄之幽魂滯魄。

混合帝一室，

回風混合於帝一之房，帝一室在玄關之中，或謂《大洞經》無倫序，互相參雜，難可尋詳，蓋此經以回風混合為目，故前後上下左右互換，實由珠光交映絢耀叢雜所以成文，不可以一槩論。昔鄧欲之字彥達，隱於洞靈臺，修混合帝一之道，每夜誦《大洞經》，或感魏夫人下降，告之曰：君有仙分，且誦經不倦，故來相訪，一日忽見三青鳥至，如鶴鼓舞飛鳴，移時方去，欲之謂門人曰，青鳥既來，朝會至矣，遂玄化成仙，豈非帝一之徵焉。

五老變孩蒙。

五老見前注，今以修大洞回風混合之道，皆變為蒙昧，為無知識孩提之童，五老者，五行是也，故曰老^③即五臟神也。

太素梵行初，

炁形質具，未始相離，謂之太素，修進梵行，未滿之初，火候未足，金丹未圓，梵行妙果方至第四，更宜謹

恪，精進毋怠。

一善四金通。

一者水也，善利萬物也，所謂五行不順行，虎向水中生，丹之道，天地生成之數，地四生金，名太素，水生金，子隱母胎，金為神性，居上丹田，是謂頂門，人呼為性門，性最靈，故性門未合，尚知前世事，及其合則不知也，寄體於心，以應萬事，人能知性門，可以修太素妙行觀門，化為金仙。

右件玉章天篆八十字，上鎮無極曇誓天，下統第六壘地德君。

《玄契》曰：太素四梵妙行觀門，通生初弘一善，精水沾濡，枯朽發芽，是曰精和，精和則神和，神和則炁清，炁清而和，故曰清和。四度克成四金，地數五百功分，由是太一以具神身白帝，以待魄元，西斗記名玉靈瑤篇。

元始天王曰：文昌大洞玉章第二十五，天五生土，五靈妙行。癸亥、未濟、乾。

太極主四真，

四真，乃太易太初太始太素也，太極

為之主者，以其五太至此方始得離，而各具其體，所謂物各有一太極，是生兩儀，兩儀生四象，四象即四真也，又有皇極為君臣民物，炁運為年月日時，數為元會運世，人為形體性情，天地人物莫不由此而生，在天則有太極真人、太極仙翁、太極仙官，掌管仙籍，徐來勒、霍山王元輔、西梁子王總真、安度明、鎬京社沖等，皆號太極真人，《玉皇經》中四真人與釋教《楞嚴經》之四真，其實一也，在人為心肝肺腎，為四真。

凌羽逸上清。

凌羽，奮迅其羽衣，以逸遊上清之天，古詩：刀圭入腹生羽翰。人服黃精，不食五穀，即生毛羽，可以飛空步虛而行。

七轉召司命，

七轉，七返九還也，丹道至是，火候足矣，可以召心中司命之神，與之同遊上清也。上清，即心府絳宮，萬神所朝之處。

太一揚威明。

太一在頭，明揚其威武，在人硬打塵勞，勿令睡魔陰邪之所侵撓。昏睡則精神散失，魔鬼欺凌，故為武備以鈐飾之。

司錄保儲命，

《度人經》有司命、司祿、延壽、益算、度厄尊神，同此義也，司祿神君主生不窮之理，所以保舉儲二之命，為大根大本。

三舉登震靈。

太極既判，天地定位，乃立東王西母為萬物之父母，今來司錄神君，常三舉其長子以主震器，俾不墜其緒，故知立天地之道，與皇極之道無異，誦之者，以此祝頌東皇千秋者。

魔王來受事，

得道之人，非魔王保舉不得過三界，既得過度三界，承奉玉音，令掌管機務，則向來遏截吾之大魔，必來拱聽受事。

仙官束鬼精。

《易》曰：精炁為物。言精炁聚則為

生，遊魂為變，魂升魄降為死，既死則為鬼。孔子曰：昭明焄蒿悽愴，此百物之精也。酆都有六洞官仙官，雖管魔鬼，亦係仙職，隸天官所治之府，故仙官將為修行人束縛其鬼精，不令返道敗德，此舉陽抑陰，則性圓而情滅，可以陞進三境，果證真仙。

月中青帝母，

一云日中，非也，青帝亦陽也，母者陽中陰也，亦離宮腹裏陰，後云月母寧素蘭，同義，日陽月陰，一合而生成萬彙。

號曰芬艷嬰。

此乃月魂名，號雌一之神，道經：月中桃康君，燦爛黃房內，月官仙方盈等語，皆同，天地以陰陽交，而生化之理具。

太張上五符，

黃素中元君圓華黃仞，字太張上，進五靈之符，安鎮天地，如人亦以五炁安鎮五臟也，此章應土，總統四象，故言五符。

安來上玉名。

紫素左元君翳鬱仞字安來上，玉名，玉字也，一本作安來生，太誤，蓋三素君玉諱白素，右元君啓明蕭仞字金門上。

混化六合室，

混化歸乃九魂名也，當混合變化於六合者，方輿所載，皆謂之六合八紘，在人則腦官泥丸，萬神所聚處。

洞房列火兵。

洞房即絳宮也，《玉經》：朱陵大帝赤騎神仙、兵馬赤童斬邪錄，役使火兵咒曰：開明靈童總御火兵，南方赤帝玉司君，治朱陽之臺，使火精赤丙之兵，總統上真之權，役丙丁之神，以行天德，使巳午之神，以正地炁，其實即心火也，用之正，則煉成金鼎大藥，用之邪，則起無明火坑黑暗地獄。

太極五靈沖，

五行全備則沖和，不全則戰剋，太極未判之前，五行混然其間，太極既判之後，四象各尊其位，而太極居中屬

土，所以寄形四象，託旺四時，今則太極五靈既以沖合，則無戰剋也。五靈者，水火木金土五行，五老五帝五嶽，在人為五臟，和合，五炁沖粹，五華自生，五體康健，至為真仙人。

橫文帝子賓。

帝賓，上卷見之，曰帝賓奉五符，又真陽帝賓老，蓋此神在人五臟之上，能入腦後玉帝宮奏人罪福。橫文者，五文也，即太極五行是也，河洛縱橫十五數也，此乃皇一之魂上歸字帝子，萬神之一也，在天則為帝子賓客，在人則為心之賓客，能糾正邪炁，降流真炁，以滋育萬神，縱橫有理。

右件玉章天篆八十字，上鎮皓庭霄度天，下統第七壘水制澤地土皇君。《玄契》曰：太極五靈妙行觀門思神，次興四善，五數居中，屬脾土，主意根，故曰思神，心之官則思，思索蓋出於意根，即洞清冥慧妙行，故天五五度五橫文即一也，總五方，共為十佺聞善，則玄上貫顙，六丁洞光，即中卷貫顙間十方，乃耳根洞微妙行。視善，

則丹元方瞳，八史洞明，即中卷驪珠湛，方瞳乃眼根洞觀妙行。語善，則通命含漱，五文玉華，即中卷舐煉五芽珠，乃舌根洞微妙行。履善，則扶就力通，地關生命，揮執天地關精神生命根手足力通洞靈妙行。一性初合五度，剋成五橫文，就天五太中五百功，成總炁中靈帝君，由是結元命形，黃帝中主，萬神衛屯，中斗大魁總監衆靈。

玉清無極總真文昌大洞仙經卷之八

①「王文」，疑當作「玉文」。

②「王」，疑當作「玉」。

③「故曰老」，疑當作「或曰五老」。

玉清無極總真文昌大洞仙經卷之九

東蜀蓬萊山中陽子衛琪註

元始天王曰：文昌大洞玉章第二十六，地六成水，六合妙行。甲子、坤、屯。乾坤無支干。

斗中四真人，散花玉清臺。

北斗位處坎宮，坎為水，四真，即前所謂四象，前曰上清，今日玉清，又一層之高，在人為腦宮。四真，在太極主四真註。燒香散花，旋繞步虛，此真仙之樂，身中香花真氣所發，不可泥象執著以為有物。玉清臺，即人之上丹泥丸宮是也。

帝卿中玄生，

泥丸上元帝卿諱中玄生，領括衆仙也。一云帝卿仲玄立，皆誤矣，一云三一帝卿肇勒精，字中玄生，二號即一神真。

一回衆真來。

中玄生起初一來時，衆真畢集也，意之所之，炁為之奔走，非敢後也，蓋

志者，炁之帥也，聽其役使，一真聚則萬真聚。

香風扇三寶，

香風拂拂飄扇三寶之上，以為供養也。三寶，即兆身中之三寶，若能精修存鍊，五炁薰蒸，則有香風外泄，亦由此《玄契》中云，常以天香天花供養元始之類同也。《天童經》云：金飯玉漿向求皆至，皆自己身中所，切勿外求。三寶即三田中神，香風即真炁薰蒸，扇乃勤搖之物，皆法於自然。

五臟映清夷。

上文皆說天上事，此一句却說身中事，蓋近取諸身，遠取諸物，此言天上有清夷宮，人當以五臟之炁映之。釋氏書云：五分名香以為供養，又誓堅此念以報佛恩。《書》云：黍稷非馨，明德惟馨，皆同此義。常見人以燒香插花，造作百味珍羞，以為供養，已謂作福德爾，殊不知一誠未盡，天地不享，及獲暴殄之過，冒瀆之愆，何如精鍊自己五分真香，供養

身中三寶，則自然五臟暉映，清爽平夷，豈有鬼神之害，又且福德最多，人何苦而孜孜向外馳求。

蒼胡頡光華，

有是炁而然後有聲，聲有上下之相應和，故為音律，靈風鼓動運轉遂成樂，只這一點靈光洞然無礙，暉映八表，在人乃一粒金丹積成於內，言語音聲發之於外，故六炁分明，六陰魔伏，《度人經》黍米珠，釋迦摩尼寶，其實一也，大丹曰龍虎大藥，須以真鉛真汞和合而成，方有光華煥燦。

檀熾鈞吉祥。

和炁致祥，元始所出之音聲，謂之檀熾鈞，《玉皇經》云：鈞天妙樂，秦穆公到天門，聞鈞天廣樂，唐明皇到月宮，聞霓裳羽衣曲，皆天樂也，如世間軒轅之咸池，堯之大章，舜之九韶，禹之大夏，湯之大濩，皆治世之音也。樂聲所至，吉祥所集，和之至也，妻子好合，如鼓瑟琴，兄弟既翕，和樂且耽，況天上之樂，豈不致瑞。所謂樂和則神和，神和則天地和，天

地和則五穀豐熟，國民安泰，豈鄭衛之徒可得致之哉！人之五臟安和，則語音清響，聞者皆是清淨法音。

太中六炁清，

太中，五太之外又有五大，以足十數，即河圖之數，是一本六炁分，蓋太中則五運六炁清而不駁，此接前樂和之意。六炁者，亦應地六成水之義，六炁在天地間生殺萬物，醫書甚詳，亦由人之所感召，寒暑風雨晦冥謂之六炁，或逆其炁則致疾疫，甚至死亡，修此大洞太中之妙行却之。

曲水襄天河。

前云：一曲水天聞，蓋天河注於東井，而循環於天地之間，古人云：水出崑崙，之下注出尾閭，復上，謂之天河，此天地之河也。人之河，自尾閭泝流而上崑崙，與天地同焉，黃河九曲，人腸九盤象之，呂仙云：曲江上月華瑩淨，有箇鳥飛，此與一曲水天聞，同在前太初章下，可以互看其旨。

六度功圓成，

六度萬行之功已圓全成就，以六應水也，六度六陰六合，皆成數也，人之進修圓滿，三千功八百行，亦可以為上仙。

五魔伐六陰。

五魔者，青天魔王巴元醜伯，赤天魔王負天擔石，白天魔王反山六目，黑天魔王監醜朗郁，黃天魔王橫天擔力是。

中結元始王，

四正四維，皆為太陽道境，方顯有元始，如人却盡陰炁，鍊成純陽，方見大洞帝尊示現，《生神章》：高結元始王，同一義。

高觀六合庭。

既結元始在中，仰可以觀見六合之內，亦猶人神可以內顧臟腑。張天師修行千日，能內顧五臟，外集萬神等類是。太中妙行以炁為主，有天地之氣與父母之炁混而生人，在胎中臍帶與母相連，母呼亦呼，母吸亦吸，既生，剪去臍帶，各自呼吸。炁藏于炁海，謂之命元，修命者修此

也。

右件玉章天篆七十字，上鎮淵通元洞天，下統第七壘里德君。

《玄契》曰：太中六合妙行觀門，念善行善，無礙無障，至善不踰，住善保安，定善崇基，全成十善，十華通榮，命同智合，曲水襄流，六度功圓，一千功成，自初至六，三千六百，滿證太勳，由是九天為子生真人，五帝為子伐六陰，旋斗歷箕而度天關，八景冥合而肇玄玄。

元始天王曰：文昌大洞玉章第二十七，天七成火，七覺妙行。乙丑、丙寅、蒙、需。

辰中黃景炁，

辰，日也，日中有黃色景光之炁，言初生之日也，喻金丹子時黃庭陽炁初動，則作用也，此鉛遇癸生須急採之時。

三秀登霄庭。

三躍而方登霄漢，以圓軸而輓上重霄，其難矣哉，三秀，乃天中山名，仙人呼靈芝為三秀草，乘黃景炁游太霄之庭。

滄臺飛羽輪，

東海蓬萊，有山曰滄浪，有臺亦名滄浪，得道神仙，乘黃景炁，駕羽車飛登此臺，入三秀山，歸霄庭宮，而領職任事也。

迎延道已成。

得道真仙、元辰真人佩帶迎延之符，乘鸞輪飛羽車，為逍遙之仙，此乃修習《文昌大洞經》之所致，非小仙之格也。

司命奉帝書，

主心之神，奉承帝旨告下十方，以保全生根為念，金書司命定算人之壽夭，皆由存心能善用其心，則可以稱壽者相。

號曰玄度卿。

中央司命丈人理明初，號玄度卿，專一守心絳宮也，人壽本百歲，以有善惡多少，故有神明司其予奪，少有八九十者。

保生太霞宮，

保生護命於太霞之宮，即絳宮也，此章專應火數，人為離明之象，屬火，

光彩輝霞，故曰太霞宮保生生之根。

列賓館上清。

羅列賓客之館於上清宮，亦絳宮也，蓋萬炁萬神所聚之處，古人云：一竅通則百竅皆通，一神集則百神皆集。

命門合精延，

命門右腎，其神桃康字合精延，七疊見之，一云：左曰父寧在，右曰母精延，亦曰大洞帝一尊神君之名，皆兩存之。

守我身黃寧。

桃康常仰望黃寧以承炁，蓋脾胃所得之水穀，散之於五臟六腑也，前黃寧以有註，乃精血三真之玉諱，亦可互見。

左携元素君，

無英之別字，見前註，乃火沼之主，即紫素左元君翳鬱仞字安來上，乃主保肝護魂，上應木德歲星，下主東嶽泰山。

右攝朱鬱靈。

白元調陽君，名朱晶字鬱靈標，乃水

池之主，見上卷朱晶啓明師注，又字玄夷絕中，通人之肺炁，下鎮西嶽華山。

太和度七覺，

七，火之成數，故引意相合，七覺者，天之北斗七元也，人之七孔心也，太和真炁通入，所以有知覺發生，文章煥燦，故下文言真文宣人，但能致中和於一身，吾身之天地位萬物育，則身外之天地亦位萬物育，終日圓覺而未嘗圓覺，凡夫也，仙云：何不食炁太和精，武當謂之太和山，釋氏七覺，支則曰：念覺、擇法覺、精進覺、喜覺、猗覺、定覺、捨覺，此亦謂之七覺，大抵只是人之先天先地靈明不昧之精神是也，虛靈知覺一而已矣，圭峰裴相所說甚詳。

點火生真文。

二點為火，地二生火，天七成之，結為南丹朱陵火府真文，即前所謂五方雲篆，冶之流火之庭，洞陽炁赤，故號赤書。

紫華領胎仙，

即經玉眸鍊質，黃華蕩形，紫華真人引領胎仙證登仙果，但經南昌鍊度，方可生天生世，仙凡一換也，此言十華仙。

元命真中神。

即胎仙也，又曰元命真人，《傳》曰：五十而知天命。然則天者不得聞道矣，元命者，元受天之明命，真中有神長生大君，即浩劫長存之神，先天地而獨存，歷劫運而不壞，圓明虛靜，妙有真空，此其體也，不疾而速，不行而至，千變萬化，應事接物，此其用也，唯以和氣養之，是為七覺妙行。

右件玉章天篆八十字，上鎮太文翰寵妙成天，下統第七壘里德君。

《玄契》曰：太和七覺妙行十華觀門

紫華天：一精通太无丹華地，二炁通凝玄青華天，三神通萬生素華地，四梵通十方黃華天，五始通太清瓊華地，六始通冥陰金華天，七始通太玄綠華地，八元通上清碧華天。九元通玉虛瑤華地，十玄通玉清混

洞^①。太无十華接空地居天中千行，始登點火赤混惠合冲真，聞合見合，合德變形，是曰玄中太皇，真中有神。

元始天王曰：文昌大洞玉章第二十八，地八成木，八景妙行。丁卯、戊辰、訟、師。

金闕上景炁，

金闕，乃三清所御之殿，一云金闕，必誤，梵清景三炁，乃清微天之妙炁也，此經欲召元神岳真三官，先以景炁為主。

十方暉紫煙。

言景炁遍滿，十方暉映成紫色煙雲，《黃庭》云：紫煙上下三素雲。蓋人之妙炁凝集而出於眼目，即水火之正色。

三合太一尊，

太一，按太史公書云，在紫微帝座，見上卷太一務命根注，三合者，玄元始三炁合德也，即前所謂梵清景三炁同義。

帝招太元神。

太元神，乃北方精魂名字，玉帝常以

招真符召之，問考較三官五岳所管人世罪福之事，即人之歷劫不壞之元神。

七轉召嶽真，

五嶽有五真人、五真君、五聖帝，其下分司列曹，管領生死簿籍。七轉者，攝召時以符搖拽，宛轉至七數，七為生數。

玉符告三官。

太一尊神以玉符告下天地水三官，人之元神凝聚，五炁循歷三官聚頂朝元也，人修習大洞之道，當去三官之籍。

拔籍三塗下，

令三官五岳，將罪人名籍削落於三塗五苦之下，赦除之，三塗五苦共為八難，人能離脫八難，方可有受生之兆。

受生高上辰。

人能修習《文昌大洞》之道，脫離五行八卦，煉煅身中鉛汞為丹，功行滿時，其真神自然超過三界，受生於高上辰極。

太帝八靈王，

太帝乃精魂，名陽堂字八靈也，王稱尊也，《生神》云：太帝號陽堂，字曰八靈君，亦曰八識神，八靈八景，木之成數。

一化回慶雲。

自此一變化之間，回取慶雲以開生門，丹經：夾脊雙關至頂門，修行徑路此為根。金丹火候在人參訪，不可臆度。

桃康守六合，

中卷入精六合房註，桃君乃腎神名，蓋宜懲忿窒慾，惜精愛炁，以為一身之主，性命之根，色念動時，存思桃康在臍。

勒精衛泥丸。

勒精蓋有自然之理，若以房中之術是炊沙作飯，縱蒸千劫，只名熱沙，不名為飯，《黃庭》云：腦神經根泥丸根。先師云：此精非姪慾之精，乃混元至精，玉皇口中涎，在人尋師問道，究其玄妙，饒君聰慧過顏閔，不遇師傳莫強猜，三一帝卿肇勒精，

當存此神運真炁入腦中泥丸六合。

太清八景觀，

妙行觀門皆去聲，內觀三部八景也，太清下田是也，《生天經》云：即引太和真炁，注想丹田三部八景，則在心目一注耳。

十德真文宣。

聖人仰觀俯察而畫八卦，以通神明之德，元始演大洞真文，以凝集真神，作成人之德，其揆一也。德者，人之所稟賦，性中之所有，發之為四端，蘊之為五常，所謂明德俊德。性為道之體，德乃道之用，故曰性之德也，合乎內外之道也。人有純全之德，則無過不及之差，乃天理至公至當。

保子神中神，

《度人經》云：真中有神，此令兆愛惜此身，如保赤子，回光返照，心目內觀，靜定久之，自然見真中之神，與之和合為一體。

元命生自然。

前二章云元命生太初，蓋人元命真

人始生之初，自然而然，非人力強為之也，此乃地八成木於東方，以表命元也。人之受命于天，自當保守固窮，毋為泛濫以危天命，則可，孔子聖人，飯蔬食飲水，顏子賢人，陋巷簞瓢，蓋安天命所謂樂，知天命故不憂，聖賢尚且如是，人而胡不為乎。

右件玉章天篆八十字，上鎮太素秀樂禁上天，下統第七壘里德君。

《玄契》曰：太清八景妙行，十德貫形，用德合體，進德坦平，成德廣大，智德內清，慧德發光，明德圓華，靈德普應，玄德大方，大德自然，普德濟攝，三千行滿，真文下敷，滿願成真，理合化合，德合道合，保子萬神洞耀八冥，由是中理五炁混合百神。

元始天王曰：文昌大洞玉章第二十九，天九成金，九光妙行。己巳、庚午、比、小畜。

太虛空無景，

太虛太空，了無一物，無光景色象，寂兮寥兮，人我兼忘。又肺神名皓華虛成，以應金方，蓋彭室帝君在太虛之中。

霞中有彭室。

綵霞之中，恍惚若有真神之宅，人身有三彭之室，即三尸神也，常以庚申甲子本命之日，上天奏人功過，一云靈中。

九雲合重扉，

九雲，一本九靈，蓋九陽妙炁擁閉其門，言九竅閉塞，纖塵不入，亦如君子退藏於密，括囊無咎，齋戒以神明其德。

帝君靜幽密。

太一帝君居處安靜幽密之地，蓋在人頭上，無所關撓紊亂則靜，《老子》曰：致虛極，守靜篤，萬物並作。全在靜定工夫。

八真合景君，

膽中八真合景君與肺神通暢，金木間隔，到此混合而金丹始成，此神諱北臺玄精，當存想青衣天尊像，守膽中間。

上携女太一。

提携太一仙女入泥丸宮，亦謂之太一元君，雌一神也，見前注。膽真與

太一交會於人之百會穴，又謂之衆妙門。

雌雄混玉房，

雌一雄一帝一謂之三，守之有法，在人參訪，蓋雌雄者陰陽也，混玉房，洞房中交媾也。《老子》曰：知其雄，守其雌。人或詫神仙安得有此，殊不知天父地母日陽月陰交媾以生萬物，《易》以兌女艮男相配為咸感也。《辭》曰：天地感而萬物化生，是以立人之道有五，《經》曰夫婦有別，又曰天下之達道五，夫婦一也，若夫正婦貞，所謂家齊也，家人之辭曰：男女正天地之大義，《傳》曰：夫婦之愚不肖，可以與知能行。蓋男女居室，人之大倫，孤陰獨陽，豈得成人道哉！但止於至善則可，君子之道造端乎夫婦，及其至也，察乎天地，《易》首乾坤而重咸恒，《詩》首關雎而戒淫泆，《書》記釐降禮謹大昏。神仙未嘗無之，劉阮之天台，柳元之海島，皆遇仙女，昔有隱者貸藥為生，聞樂工嫁女有姿色，索五百

千，隱者出七百貫，得女歸，後數年事畢，父母憶女往詣焉，山中樓觀甚麗，女夫迎拜，留數日，一飯不復飢，臨別以黃金五錠贈歸，後錢盡復往，不可見，唯空山爾，豈非神仙中夫婦乎。《丹經》云：休妻謾遣陰陽隔，絕粒徒教腸胃空。祖天師、葛仙翁、許旌陽，何嘗逐妻屏子然後成仙？金丹之道，須命黃婆媒妁，歡合青衣女子素練郎君，夫唱婦隨，陽唱陰和，十月聖胎圓成，嬰兒姹女突出現形，方顯雌雄混玉房之明驗矣，亦非世俗之所謂夫婦也。

九遍還返七。

乃天符火候也，十一月冬至行復卦，為一還，十二月臨卦為二還，正月泰卦為三還一返，二月大壯卦當沐浴，三月夬卦四還二返，四月乾卦五還三返，五月姤卦六還四返，六月遯卦七還五返，七月否卦八還六返，八月觀卦當沐浴，九月剝卦九還七返，陰符陽火，進退抽添，欲七十二候周天足數，至十月行坤卦，則脫胎神化

矣。一陽生於子，二陽生於丑，三陽生於寅，故三陽為三還，則陽已盛，故火生於寅為一返，至九月，火已墓故七返，足十月，火絕而燼矣。《崔公》曰：一年內，十二時，意所到，皆可為。又曰：勸君不用尋冬至，身中自有一陽生。以此言之，周天符火不容無，而不可執著也，至人傳藥不傳火，當求明師矣。

分形散六合，

《大洞經》至此以得陽神出入，分形散彩，游宴六合之外，乃天地之外，當演習去此幻殼，初出殼去，一里復回，勿令亂。

泥丸易分別。

出入一自衆妙之門，以分別去來，古人云：若人通得泥丸穴，何必區區煉大還，去而復來，候出入純熟，即投胎奪舍。

太真九光輪，

九乃金之成數，上皇太真即我之元陽正炁，生發九色光象之輪，以聚集萬神，即九光之符，九光以應天九成

金。

十隸丁文結。

隸者，古仙，名偓隸，堯時服松實而眼方，得道，丁只如《度人經》云十轉回靈一般，即五方五臟縱橫錯綜之真文，故《玄契》曰：含漱乃五臟之液也，丁字，《文昌大洞》之本文，不宜改易，如《靈寶經》宣婁阿耨，如《圓覺經》奢摩他三摩鉢提禪那之類，如可改，則譯經者必為漢語，當從古文。

保子元炁通，

保護兆身中玄元始三炁變通而不塞，人之血榮炁衛，務要流通，和暢則安樂，不染沉痾，若凝滯則別生他證，不保。

五炁理中頌。

金木水火土五行之炁，結為蒼胡頌，理，道也，中者，大本也，合而言之，德性命也，發出乎外，情也，發而中節，和也，和者達道也，達道達德一以貫之，故時措之宜也，五炁理中，頌文在中矣，頌直項也，又曰頌頌言

涵養，至大至剛之炁，浩然充塞天地，釋云金剛，又曰舍利子，皆同此意。

變化飛上清，

可以變化無窮，陰陽不測者也，以陰炁為玉女，化陽炁為仙童，彩雲龍鳳，皆自己身中出，可以乘駕飛入上清真境。

三千行超越。

三千功八百行，務欲圓滿超越，或有陰騭大功，一起救拔數千人性命者亦可，使當圓滿大勳，立躋三境侍衛之臣。人多以富貴聲色耗損精炁，一旦身體性命委而去之，雖妻子至親亦掩鼻而睥睨，曩時洞房花燭恩愛何在！唯獨隨業輪轉而已，又安望項負九光輪證太真之妙行。

右件玉章天篆八十字，上鎮太虛無上常融天，下統第八壘大風澤地土皇君。

《玄契》曰：太真九光妙行十餘捨觀雙修仙化，胞仙胎仙、魂仙魄仙、臟腑中仙、靈仙元仙、華仙嶽仙，元命

神仙，梵炁始炁，元炁玄炁，道炁中理，真人變真化神，三千行成，一含漱貴炁，自然十轉回靈，萬炁齊仙。十餘者，太真妙行，天一地二、天三地四、天五地六、天七地八、天九地十是也。一乃天地十餘之文章也，即人之五臟六腑精華玉液，故曰含漱貴炁。

元始天王曰：文昌大洞玉章第三十，地十成土，十明妙行。辛未、壬申、履、泰。

太玄九炁上，

太玄太元太始三炁在九炁之上，後結句云：太玄啓十明，妙行登十真，又曰：太玄都九炁丈人所主之祥煙生炁也。

煙回太暉間。

三炁合德，九炁齊并，合成雲煙，回轉於太虛之間。太暉者，宮殿名也，他本有作太虛者，必誤，此乃玄炁出於九炁上。

神光秀空峰，

神光寶光即靈光也，蓋無形可捉，發秀暉彩於長空杳冥恍惚之表，在人，則精神光彩，發秀於雙目，空峰者，頭面也。

五道煥三天。

五道即五老，煥明於三天之上，言朝謁上帝冠冕燦爛也，大丹三花聚頂，五炁朝元也。無上三天，即人身中三田宮。

駕景登絕霄，

乘景輿而上升、重絕霄漢，言人紫河車搬運崑崙之頂，前云乘景晨中暉，蓋同義。絕霄者，上無所維，下無所基。

乘風蕩滯神。

仙人身輕，又所服者六銖衣，所駕者飛輪羽車，皆可乘御風炁而行。蕩滯神者，三界之中剛風浩炁，五帝大魔統領諸天魔鬼，把截要路，若能大功圓滿，上帝鑒觀，魔王保迎，流金火鈴，五老啓途，方得上升，亦如修行人真炁強壯，慧力貫通，則夾脊雙關天柱玉城，自然開通，終無滯神。

日中一運珠，

終宮中一丹元君名神運珠，中宮常運轉，如日之寶珠，一云中有一運珠理，一云運一日中珠，不通。西王母

握固法，存心中有日如崇寧錢大，運轉如火之熱，下至湧泉，上至泥丸，經由三官，千日可以出神。日中司命接生君，中央丈人司命君，與神運珠，皆守心之神，心中萬神，此其大略也。

理心入清閑。

以正理此心念，使之清淨安閑，不為物撓，《圓覺經》：由澄諸念覺識煩動，《遺教經》：制之一處，無事不辦。一處者，澄清心念。前說天，此說心，蓋此心天心也，內修而外應，不一其內，無以制其外，不齊其外，無以養其中，內外交養，動靜感應，此大洞之本旨，道經只滅動心，不滅照心，亦同。

混合三五宮，

金水同源一五，火木同鄉三五，中宮戊己三五、四象五行交媾於中宮也。昔女冠徐鍊師、張惠明遇南嶽右英夫人傳道，行三五混合之法，咸得尸解神仙，人能行三五混合之道，自得脫離三塗五苦，升入三五天宮，

得天堂快樂自在，動經拂石之年，自此不貪快樂，進修真造上境。累變億萬年。

動經億千萬年，永無失墜，修天人之福，如箭射虛空，力盡還自墜，如修大洞金丹之道，直登究竟地位，豈有輪轉耶。

伐絕胞樹土，

此句當重說，蓋以胞胎為一大事，非此無以生化，此言土配合不謬，一黃演之烝結為胞根，附于脾，皆屬土成數。

永斷尸血根。

九玄七祖咸被道烝，解釋前世積滯之冤結，胞樹血根皆有深根固蒂之喻，得此大洞寶章之功，咸得伐絕永斷。

七祖散積滯，

人之上世有因相爭，結為陳咒於靈壇社廟，致連逮子孫塚訟徵呼，積滯幽扃，不得解散，今聞大洞玉章即脫。

反華生幽玄。

反回善芽增生，長育於北方幽玄之圃，乃天一所生之地，三才之始也，如人歸根於下元是也，烝海乃一身之所主。

萬烝生萬神，

人之烝以萬計，《孟子》謂浩然之烝充塞天地也，若不能貴固根本，耽戀酒色，烝漸隨散，至中晚之年，不及數千，所以神疲力倦，若知而存養，則萬神復為之生矣。仙傳載，廬山太平宮三一王先生，夢神人告曰：上帝令汝住金華洞天，賜丹一粒，還汝精神，復汝元烝，翌日遂化，故知人之得道，神烝不備不成仙矣。《傳》曰：身體髮膚，受之父母，不敢毀傷，孝之始也。父母全而生之，子全而歸之可也。人多以酒色財烝損傷身體，幽冥之中不逃譴責，何望神仙！

齊仙成仙王。

見賢思齊。既與諸真仙比肩而行，成就仙道，為諸仙推戴，故曰仙王，仙亦有王者之服，文昌仙職，至此亦

為極貴。

太玄啓十明，

太玄開啓十明妙行，以接度有緣。太玄乃三炁之祖，生育天地萬物，至此為足數，合十明妙行，乃得登十真。

妙行登十真。

十明妙行圓滿，則證登太玄真人之位。十明十真，地十成土之數也明矣，河圖至此為足數，六爻純陽為乾，屬金明，則識認一切境物如幻，一切事務如夢，理法如眼翳空華，有為如鏡中像，所以視聲色如寇讎，視軒冕如糞土，等生死如旦暮，故應事接物，鑑空衡平，方證太玄妙行。

右件玉章天篆九十字，上鎮太釋玉隆騰勝天，下統第八壘福德君。

《玄契》曰：太玄十明妙行十真：圓成精真，玄珠炁真，玄力神真，玄通性真，玄一元真，玄妙命真，玄光形真，玄全德真，玄洞道真，玄應全真。太玄十真，妙行梵行，諸天橫文，固根萬行，周圓六位，已陞妙行，大全

形成，炁精鍊化紫金長生無窮太玄真人。

元始天王曰：文昌大洞玉章第三十一，表乾兌二卦，其音同金。癸酉、甲戌、否、同人。

上清絕霞外，

上清在太清之上，故云絕霞外，人即絳宮是也。此章表乾兌二卦，乾象高高在上，故絕霞外，乾始能以美利利天下，不言所利大矣哉，《大洞仙經》普資萬有，而不矜其功能，他經則云持誦之者即得如何，是矜其功也，乾之體剛健純粹無有息時，人之學道，當乾乾不息，綿綿若存，永成。

八皇運九天。

八皇，八卦也，九天，九宮也，見前洛書數，茲不再舉。乾元用九天德不可為首也，元亨利貞乾之德也，故曰運九天，言自強不息也。八皇，老君運轉九天之上，即八靈王也，皇與王一也，天地之大，豈離陰柔陽剛二氣，二氣運轉無窮，豈離乎一元之會，故天地之大，萬理兼備，其為體一而已，一元之運，春夏秋冬，弦望

晦朔，未嘗一息之謬。《易》曰：觀天之神道，而四時不忒，聖人以神道設教。信哉，在丹道，謂之火候，以應太陽一年一周天，三百功滿可以吞服。

幽寥玄帝子，

注見上卷第二章，帝皇太一重冥空字幽寥無，又皇一之魂上歸字帝子，二神共守下丹田，存思法：幽寥黑帝子赤。

携此景中人。

幽寥、帝子二人能提挈此景中之人，乃自己法身歷劫不壞之象，得此提省常惺惺不昧，無私欲之蔽，無愛惡之侵。

晨登天老室，

子時夜半上升天老宮，天老帝君七星神咒經載，即人之肝臟，咒：日出東方，赫赫大光，此卯時真炁傳送至肝之時。

夕宴金華庭。

晚夕遊宴於金華之庭，人肺也，以表兌卦。一云金華便，必悞。酉時，真

炁傳送至肺臟，宴者飲金漿玉液，餐交梨火棗。

羽節命太一，

以羽葆之旌節命召太一帝君，見前注。太一在頭，執符以召內境萬炁萬神，神隨炁行，皆得聚凝，而朝太一帝君。

錦旛召萬神。

神也者，妙萬物而為言也，章中多有錦旛錦旂，所以招真致靈之具，方以類聚，物以羣分，是以羽節錦旛，各以其類。

堅我六仙府，

六府，大腸為尚書府，小腸為元陽府，膽為蘭臺府，膀胱為太和府，胃為太素府，三焦為無極府。聖人時乘六龍以御天也。天以六炁流通，宰制品彙，人以六腑和暢，捍禦外邪，故曰堅固兆身中五臟六腑之炁，固則成六仙府，散則為六洞冤魔，遞相殘賊，皆因情慾所撓，敗壞六洞天。伐滅胞胎根。

伐滅胞胎之根胤，毋使滋蔓，蓋此死根當盡去之，死根伐絕，然後得生根增長，蕃衍盛茂，即葱鬱成功德之林。

解結生七祖，

解釋七祖之結習，令上生天堂，享受快樂無為也。一云解結七祖生，有此顛倒錯亂？但令用心向善，自然七祖生天。

散禍寧九玄。

消散九玄之禍，令得安寧，六陰剝盡，九陽始成。《易》：夕惕若厲無咎。當一得永得，綿綿若存，禍自散失，深沉九地之下。

赤城丹臺女，

赤城，一云日帝玄洲赤城蓬萊海螯宮，在九霄之下，謂之初霄，丹臺紫府乃陽明之宮，多女仙之瓊館，楊太真之銀闕。按《山海經》，東海蓬萊山，扶桑山，方丈山、滄浪山，四山最高極大，下有三島十洲，一曰玄洲，二曰瀛洲，三曰祖洲，四曰聚窟洲，五曰炎洲，六曰麟洲，七曰流洲，八曰長

洲，九曰元洲，十曰生洲。此章下有玄洲絕三津，上有滄臺飛羽輪，校仙登扶桑，皆在東海境上，得道者莫不經由此處，脫蛻幻骨，拜職受服，然後上升天境，朝見三清至尊。

扶兆入金門。

乾居西北，屬金，為天門，故曰金門，此兌之少女仙，扶持我身同升入金門，一云符召入金門，必悞，世主之門亦曰金門。

月母靈素蘭，

兌卦為月，月神乃太陰之精，諱靈素蘭，或寧素蘭，必誤，正法月咒作靈素蘭，《斗經》云：主司陰府，宰御水源是也。

守閉死炁關。

月精常謹守下元，閉塞死炁。此四句皆雌一之經，丹臺女陽神欲人上升，寧素蘭陰神能為人遏塞死戶，注流生炁。

死炁自今絕，

既塞死戶，則死炁斷絕，孔子曰：未知生，焉知死。蓋大洞之道，知生知

死，亦如《易·繫》云：原始要終，故知死生之說。

生津從茲延。

求生之津涯可望而度也，釋曰：無生忍^③，既無生，安有死，若了無生，須求解脫，釋一切法縛，直得萬緣清淨，了無可得。

萬神萬炁仙，

雲行雨施，品物流形，故曰萬炁生萬神，萬炁仙即萬神歸之為一體，太極圖中化生萬物是也，乃天地生生之根。

超脫位真王。

乾道變化，各正性命，故超脫過越生死之關，則證品為大洞真王之位，前章成仙王，今次修習至此，為長生真王位。

十真妙行全，

十真者，誠實無妄之謂也，誠者天之道，思誠者人之道，至誠不息，不息則久，故得十真妙行，全備前章妙行全十真。

太玄會明陽。

九天之上，陰炁不侵，九地之中，陽光永隔，故令我身中太玄之炁，會於明陽之天，後章我身會明陽，同義者二焉。

無上大洞尊，

於此利見大人也，自己大洞帝尊出現，乃無極無上品之貴人，與天同其匹休永無墮落，此皆無色界上大羅天也。

一炁同龍光。

乾，陽物也，故以龍為喻，曰潛龍、見龍、飛龍等語，皆是元始一炁化生，若仁以行之修己身大洞，則與元始同炁合德乾健也，自強不息，兌，悅懌也，喜慶難言。修煉至此，陰爻剝盡，化凡質為純陽紫金之體，神抱炁，炁抱神，精神粹明，炁脉調暢，如夫婦之歡合，如子母之留戀，待時神化。

右件玉章天篆一百二十字，上鎮龍變梵度天，下統第八壘福德君。

《玄契》曰：己身精炁全命鍊化紫金六位，已昇妙行大全長生無窮太玄

真人，至此回光開度胎根，七玄九祖並解冤結，斷除債訟，閉塞死戶，應同炁同根蘇懋生津，延益萬神，同超真王，和合萬炁，妙行並全，皆號太玄會明陽天，我獨超出，證大洞尊帝一龍光，號無上玄通。

玉清無極總真文昌大洞仙經卷之九

① 疑此處脫「天」字。

② 「三五」，據上下文意當作「二五」。

③ 「無生忍」，按文意，當作「無生死」。

玉清無極總真文昌大洞仙經卷之十

東蜀蓬萊山中陽子衛琪註

元始天王曰：文昌大洞玉章第三十二，表震巽二卦，其音屬木。乙亥、丙子、大有、謙。

東華發始暉，高晨映上清。

判府東華方諸宮，亦救苦天尊所舍，蓋崇仁重生之地，有九龍符命拔度幽魂，發始暉者，初生一陽爻，如日之昇，高晨，一云青童君，名晨日也，日之升高，必映上清真境，言人真氣會於心府，而出自肝臟，方始傳送，午時至絳宮。

洞煥圓珠靄，

光彩洞耀煥燦於蒼胡寶珠之中，煙靄鬱勃，是皆取喻於心珠之炁，神光圓明，洞照八室，空其五蘊，靄然粹然之寶。

朗朗紫暉明。

朗朗也，日光生紫暉，而朗朗然明，又肝神龍煙含明君，此木應肝也，蓋

震巽皆屬東方之木，上應歲星，下主肝部。

七晨回帝席，

太陽神名七晨回者，上朝天帝之几席，蓋帝出乎震、齊乎巽也，少陽為震，升於巽，屬乾，乃六陽純全之位，故曰帝席。

五老飛玉輶。

上聖出入，必令五老啓途，羣仙翼輶，真仙及修行人亦皆如是，乃人之五炁所化。《度人經》：五帝侍衛，三界稽首，同。

太一景中王，

太一在頭上，為景中之王，見前注景中人。又曰：景中王，人當貴重，頭為一身之首領，故以此人神為王者呼之是也。

司命攝萬靈。

飛玉符輶攝召萬靈，皆乘巽風，故招神攝風，司命在心，總制萬神，心為雷之主。《雷經》云：心火不發，鄧君不鳴，肝神不怒，辛帥不靈，意神不起，使者不行。蓋肝屬震巽乙木，

而以心火發之，此擊搏之象也，故能收攝萬靈聽命。又震為雷，在人為音聲，巽為風，在人為呼吸炁，故以八卦表身。

泛然雲波間，

水會東南巽地，言此時真炁薰蒸，津液灌溉，而吾元神湧升也，二卦在先天相對，取象曰雷風相薄，故能鼓舞萬化。

寂盼泥丸城。

隨風巽，君子以申命行事，毅然作色，中天下而立，攝召三官五嶽，泥丸城闕在最高峰頂，寂者無聲，盼者顧視之。

七轉召三官，

七轉招真符命以召三官，在人則三田之神也，進退利武，人之貞，非威武不能，政不順，非風雷不足以警動萬物。

北君稽首行。

北方為首，啓行其五方，隨時而升元神，自腎臍中起，去歷遍五臟，而上登泥丸，其三關五臟之真，並隨侍而

行上升。

五嶽應命到，

五嶽隨應召命而至，五炁皆相感化而朝也，雷霆掌生殺之權，賞善罰惡之司，故雷動風飛，萬神畢集，豈容少延。

拔死書長生。

三官五嶽皆削落死籍，書上生之字，二象倒取得益卦，《辭》曰：君子見善則遷，有過則改。其斯之謂歟，在人力行之爾。

三舉震靈符，

上天有震靈符，主召生炁，制伏魔精。撓萬物者，莫疾乎風，鼓萬物者，莫疾乎雷，故雷主生殺之權，如雷水解百果草木能甲拆，是主生也，雷動風馳剪除禍亂，是主殺也。故此章上下句云：拔死書長生，玄解大魔精，示生殺之柄也，前太始太極章，震靈凡三見焉，並見前註詳解。

玄解大魔精。

巽戶為神霄府，乃風雷所出之地，能妙解六天大魔，不令惱亂，學仙之

人，震來虩虩，震驚百里，皆當恐懼修省。

七祖生福堂，

九玄七祖皆生天上大福堂中逍遙，此天人之福也，福盡，不自下生異類之中，修《文昌大洞》，乃上乘法門，到三清界。

玄華保養黃寧。

以玄華保養黃寧童於脾胃之間，使永無失墜，此長生久視之道也。二象合成恒卦，《辭》曰：聖人久於其道而天下化益，《辭》：天施地生，與時偕行。凡修大洞不拘時候，但隨所寓，一念不動，天地之炁，發生始於復，終於坤，一升一降為一周天，以一年之炁候攢於一刻之間，身中天地造化。

右件玉章天篆九十字，上鎮太極平育賈奕天，下統第八壘福德君。

《玄契》曰：七祖九玄上生天堂，億曾萬祖玄華齊生，內保黃寧種族俱升，皆注仙品，列籍南昌，萬世代族墓山塚訟考謫鬼帳，隨《大洞仙經》

一時和平，地根惡根削除落滅，興道為一，長生自然。

元始天王曰：文昌大洞玉章第三十三，表坎離二卦，既濟之道。太清仙境玄炁所化。

太帝九老京，

潤萬物者莫潤乎水，所以品類之衆，莫不皆賴以生，水由地中行，江河淮漢朝宗于海，皆有攸司，故扶桑大帝、東方九炁天君共治水府，乃為水府總會之所然，其論水之源生自北方，天一生之，地六成之，起於坎位，故此章以坎卦表之，《易》曰：水洊習坎，君子以常德行習教事。

校仙登扶桑。

檢校仙籍，應得道者上東海扶桑山，言人精炁生腎而傳於肝，以至心府，故下云：神綱精炁在人身，如水流行天地間。

七轉召天帝，

天帝即玉帝也，以元始之命召之，在腦中宮泥丸也，考校三界真仙并世人功過，莫不皆由三官五嶽呈奏玉帝。

司命乘神綱。

以表離卦，在人為心，以主心之神乘其神綱而上朝也。心為神宅，故有綱領，離乃麗明之象，故心神好明察理事。

五嶽啓靈戶，

嶽者即面部是也，靈戶者眼耳口鼻是也。開其靈則能制魔，閉之不靈隨魔轉也，五嶽皆啓敞靈局，以聽帝命。

傳制大魔王。

奉傳玉帝之命以制遏大魔，臍中皆北陰之府，陰邪所勝之地，故傳命以制遏，毋使妄動撓亂。魔者，眼耳鼻舌身意也。

河海皆受事，

今夫水一勺之多，鼃鼉蛟龍魚鼈生焉，貨財殖焉，河海之主魚龍之屬也，受事聽扶桑之命，自天一生水於坎位，以至成天立地，生賢生聖，皆由是焉。河伯海神水族神仙，皆稟受其本來合任之職事。如陶弘景為都水少監，郭璞為水監仙伯，又四溟

夫人多管水中女仙，人與水族混為神仙。茲以琪所歷江河淮海水府龍宮，西自蜀江，南自衡潭，西南自沅靖，三水皆會洞庭，下流漢江，會大別，至廬山，東南自吉贛會彭蠡，下流至儀真，見淮黃二河，自北而南會鎮江，下流崑崙山，東入于海。又自鎮江歷常蘇，秀^①入太湖三百六十頃，至吳山會浙江，又東南自福信江會浙，又自維揚沂流經淮過呂梁入濟，又自太山會于濟，又自濟沂流至臨清，入滹沱，東北會小直谷入于海，又自直谷沂流入京，沿程看瞿塘、洞庭、彭蠡、太湖，龍宮壯麗，又見馬當山采石金山三水府，豈得不受事於海。

立示應會方。

潢潦無根可立而待，江漢朝宗于海，亦各有時，丹經：天應星，地應潮，天上金生，地下水生，蓋每月弦望晦朔，海水隨為消長，每日一潮，自東海發軔，捲如雪山，過海口沂洄，經浙止淮西采石，東南止嚴陵灘，東北

止小直谷，日夜應會不爽。亦如人身中每一日一夜，血炁一朝於凶門，遇其潮時，即默然靜坐，凝定神思，但聞血炁自踵至頂，奔走湊理，蕪蕪之聲，如羣蟻相緣，五臟六腑轉動聲響，內外相應，見于四體，達乎聽官，久之，又徐徐散去，闐寂無聲，此亦修行之大端也。聖人運化，豈可託之空言，善譬巧喻，俾人易曉，近取諸身，遠取諸物，若未能遠觀海潮，但近聽血炁炁衛一萬三千五百息之潮，豈非示人應會方乎。

保符泥丸內，

樽酒篋二用缶，亦可與獻於王公，薦之宗廟，況所保符契，皆在乎泥丸之官，以待桃康乎，陰符陽火，皆聚於上元官。

守神曰桃康。

激而揚之，可使過賴，水生於腎，而搬運有道，則沂流於泥丸。桃康乃腎中之神，專一運陽精於腦後，以輔元陽，以成金丹。回名易死籍，

既得生生之根，則回改名姓於死籍之中，無過可書也，死籍者，黑簿也，人有過咎灾厄并死亡事，皆得具載其中。

記仙叔火王。

上卷第三章云：高同生，叔火王，今此止云叔火王，蓋雄一之經也，叔火王道父也，專掌列仙之籍，凡得道者系焉。

拔絕三塗籍，

《坎辭》曰：係用徽纏真于叢棘。蓋囚執之所，思過之地，如周文之羑里，太甲之桐宮也。今絕三塗，易死籍，豈非此義乎。

去禍生上英。

心中一真津液君，字飛生上英，主血液。《易》曰：坎不盈，祗既平，無咎，姑且去禍而未大也，削去灾禍之根，生上英華。

七玄登朱宮，

朱宮正在離卦上，七玄九祖進登朱陵火府，鍊化自然，蓋水火二炁交媾水火鍊度，葛仙翁玉陽宮皆以祭鍊

得道。

我身會明陽。

兆身朝會光明太陽道境，《易·先天》曰：水火不相射。此經以水火交而成道，《斗經》：水火乃道之真體，非此不能成生化。

上友方盈子，

月中桃康君方盈字運梁，上則友愛之，乃眷戀留連之意，上下二神互換，流運神炁，滋茂生根，毓養太和，以立四大。

下携理維藏。

胞中天帝精魂，名理維藏，字法運珠，守小腸水海，以分別水源清濁，順導發泄之功如禹功之大，在人宜善導精血。

左攝明車君，

胞中黃炁君，諱祖明車，字神无極，守肝正斗明輪同，人非萬炁萬神流注運用，則百骸五體四肢皮肉只是一塊頑物。

右輔歸盛昌。

胞中白炁君在右，諱玄歸子，字盛

昌，守人肺上，二神乃胞胎之中神靈，共守五臟之上，前章云：白炁育尚生，同此義。

混一玉景炁，

一云玉京，必誤。蓋左右陰陽二炁混合，如玉之景炁妙合而凝，以成兆之形，此炁呵之可以煮茗，含之可以乾汞。

化兆吉以昌。

欲變化我之炁質，俾吉俾昌，蓋得此道者也，雖愚必明，雖柔必強，君子順之吉，小人背之凶，非由外爍，我固有之矣。

反嬰元命童，

反我衰老之元命靈神為嬰兒之童，亦曰元命真人，修習大洞之道，鍊萬炁萬神，還歸一真如嬰兒之形，復化為玄炁。

檀熾鈞吉祥。

不孔笛吹無生引，沒絃琴操太平歌：先生年來窮到骨，何事欣欣樂天和，除非只是知音聽，不是知音莫與彈。

天一元根仙，

天一貴人出入丑未，而為水之元根，所以江海為百谷王以受水，實由天一生水，根源起於此，坎卦之義因茲著焉。

自在光明輪。

大吉小吉為日月所居之位，北斗擎羊陀羅主事之所，故北斗位處坎宮，名同月曜，輪轉光明亦青肝明輪之說，同明輪為日月為水池火沼。凡鍊度先鍊己，心為離火，腎為坎水，務要既濟，其法常令此心虛無，纖塵不入，一念不動，二炁相合，化為水火，在前亡魂自腎左出，歸池沼鍊化。

右件玉章天篆一百三十字，出於大赤天，下統第九壘洞淵無色剛維地土皇君。

《玄契》曰：至此無上乘門，兆身祖族皆證真仙，可以弘慈回度人天證。太清太極仙王真人

此四章乃三清玉帝四天，無卦象，亦猶乾坤坎離四卦無支干，乾坤大父

母，退居幽靜，坎離為萬物之父母，故貴重，三清退居無為，玉帝主事，俱當貴重，皆在無色之境，故不拘於卦象之內。人能修習文昌大洞妙行，亦當超出三界，直造三清玉帝之天，不為五運八卦之所拘束。五運即五行支干是也，八卦亦乃五行所化，乾兌屬金，震巽屬木，坤艮屬土，坎屬水，離屬火，修行人脫殼離機也。

元始天王曰：文昌大洞玉章第三十四，表坤艮二卦，同音屬土。上清真境元炁所化。

玉清萬華宮，

萬華宮乃玉清元始所居，皆金玉珍寶以為莊嚴，如華嚴之富貴無異。前云：看華嚴不如一艮卦，今萬華官者知其所止也，君子思不出其位，又君子素其位而行，無入而不自得也，以喻人安分守常，在至善之地，無偏執，不妄求，守天理之正，富貴乃自然之理，人皆可享萬華宮富貴。

高仙藏帝經。

坤有該載生化之理，《易》曰：坤以

藏之。高仙者，天真藏經籍之所，三十六部萬八千篇。佛經五千四十八卷一藏。自古帝王之制，天下皆有所藏圖書，如神農之連山，軒轅之歸藏，大禹亦曰連山，商湯亦曰歸藏，歷代寶之以為神器，上天亦有圖書，乃天帝所藏，以統御萬天，宰制萬品。

主圖九天表，

艮止於此，為文昌盡善盡美之道，君子敬以直，內義以方外舍之以從王事，此人臣之道也。高仙上聖主管圖錄於九天之上，幹運化機，生育萬物也。九天有東壁圖書府，奎宿主文章，居戌，壁宿主圖書，居亥，天帝命文昌皇人玄聖道君孔丘主宰，文昌生炁圖，流運真炁，生化萬物，輔佐皇猷，帝命登封：太極上真九疑主宰、東海廣桑山真君、闡猷大帝與儒盛世天尊。人或難之曰：是非孔子之道，大聖人豈可流於異教哉？殊不知在天為列星，在地為河嶽，幽則為鬼神，明則復為人，此特昭昭然

爾，況大聖人垂世立教，為萬世帝王之師，受累代封崇，享天下祀典，在天地人中豈無果位耶，今附於此，以俟明者證知。

洞觀無中生。

至哉坤元，萬物資生，人與物之生，從無而有，得坤之全炁，故曰坤厚載物，德合無疆。洞觀非可以眼觀，當以心目內注，自無中生有，非無為無，湛然常寂，不可向外馳求，妄以為有，如善財所見，盡在普賢身中，此道乃虛無自然，無可捉摸，但宜回光自照，故曰洞觀無中生。

七轉召萬真，

與七轉召三官同義，萬真即萬神，天有萬真，人有萬神，以天之真混人之神，以天之炁合人之炁，自然成道，豈不貴重。

五嶽一來庭。

坤輿艮山，五嶽為最，一撮之土，載華嶽振河海，一卷之石，草木生寶藏興，況五嶽在乎掌握矣，金丹謂之攢簇五行。

三官招衆魔，

三官即三關，號令一施，則萬天拱聽，志帥所在，炁為奔走，三關廓通，則三華聚頂，三才中，非三五無以宰制萬化。

司錄校所呈。

三官五嶽呈人禍福，帝命司命司祿重復較勘，方定其休咎。昔聶紹元好讀書，攻莊老，一夕夢入一城官府，嚴肅中，有朱衣按几謂曰：此司祿之所也，可自開籍看平生事云云。後受大洞畢籙，修混合返還之道，一日晨浴，有四鶴集于屋，村民見火起，奔之，紹元已化，非司祿較所呈乎！

拔籍重泉曲，

泉曲十二河源，乃水府之分曹也，掌人間生死功過事，柳元傳水府屬陰，女仙治事，在人即十二經絡是十二河源。

記名書上清。

此句下文，按茅山《玉經》有云：七祖解牢結，穢血悉沈零，反胎朱火

室，更受洞中生，伯史衛神軀，令我保黃寧。六句續前句，為一名曰三素老君章，其文義重叠，今依川本較正，續後十五句，隨前十句，二十五句依舊作一章，更不專擅紊亂添答，以疑人心，但依此行去，亦證上仙。

玄洲絕三津，

坤至柔而動有剛，至靜而德方，故方輿之內，玄洲赤城府，在東海之外，三島神山，玄洲十洲之一也，三津弱水三萬里，各有三關津人靡克，至今修金丹者絕此津涯，不歷關隘，一步便到家，古云：剖破藩籬即大家，修文昌大洞之道，不歷三界諸天二十五，有頓超無漏之鄉，方為了當。

羽景太無庭。

上乘羽葆，景輿登升，太無之庭遠在無色界之上，《傳》曰：德輶如毛，毛猶有倫。上天之載，無聲無臭，羽景有形，太無無色。

回霄飛垂漠，

回還於九霄之上，諸真車輦甚衆，碾消雲路，所以飛揚沙漠垂下，昔禹時

有鳥自丹州來，吐五色氤氳之炁，名曰憑霄雀，能羣飛，銜青砂珠，輕細，風吹塵起，名曰珠塵，如沙漠飛下，人得而服之，身輕不死，其此之謂歟。明了之人，不動脚根，一念纔起，直造圓頂也。一云飛重漢，字頗相類。

委化混萬精。

含弘光大，品物咸亨，此坤之德，人能收斂涵泳，與時偕行，與萬物同體，無一物不遂，生成委身，混融於萬物之精。

五雲鬱絕空，

五方五靈五色雲炁，靄鬱於絕空之中，五臟之炁，薰蒸於心腑，凝結成圓明之珠，彩霞暉映，即五色鬱勃，洞煥太空。

七霞落圓明。

七霞，七覺，一本云：一靈落圓明。一靈亦虛靈，心圓明乃心之神，此言七色雲霞光奪日月。《度人經》：璇璣玉衡，一時停輪。此數句言高仙與司命司錄三官五嶽同會之時，車

輿鸞鳳之衆，光景如此，蓋言人能凝聚萬炁，命元靈之神乘之，自下田至泥丸，萬炁凝萬神集，亦是落圓明也。

朗朗幽寥子，

臍下嬰兒朗朗顯現，二卦合德，謙卦彖辭盡之也，天道虧盈，地道變盈，鬼神害盈，謙尊而光，君子之終也。言人晦迹隱光，安守本分，不期著而著也。蓋得謙光之義，君子隱居，求志行義達道，自然名聞上下，蓋以幽寥隱然無形無聲之物，而朗朗顯明者，所謂潛雖伏矣，亦孔之昭之謂。

梵昌濟黃寧。

梵昌心神，黃寧脾神，言以心血濟養脾胃也，五行生克，在人運炁以合之，各有其道，謂如心病，運腎水以濟之，五臟皆倣此。蓋二卦反對得剝，《辭》曰：君子尚消息盈虛是也，黃寧，中官也，黃中通理，正位居體，美在其中，暢於四肢，發於事業，人之動容周旋，合道中禮者，盛德之至也。

五老揮絳華，

五老乃天地始祖，人之五老亦同一炁，蓋五神聚於絳宮，揮把丹華也，燒香散花，皆身中神識，絳華丹華一也。

散香携玉靈。

五老遍散五香，以薰蒸五臟靈明之神，上卷玉壽靈亦胃神，欲見此神，當一心注想，如猫捕鼠，眼睛不瞬，即得凝集。

金質濯帝川，

此即玉眸鍊質，黃華蕩形，以凡胎濁骨，今變為玉靈金質，前云骨肉金玉，實俾此金姿玉質，灌濯於帝一之川。

綠煙靄流瓊。

青綠之煙鬱鬱勃勃，如瓊玉之欲流，前云五雲鬱絕空，皆真仙陞降，祥煙瑞彩藹然粹然，洞煥空無之境，光景殊勝。

上清玉皇師，

上清官乃玉皇之師，蓋靈寶為玉帝之尊師也，玉清上清太清乃為三寶，

三清之下，玉皇為尊，玉皇即昊天玉皇上帝，乃萬天至尊，位亞三清，《天公經》：三清退居無為，玉皇治事。玉宸大道君。

玉宸道君靈寶天尊所居之宮曰上清七寶紫微宮，在太清之上，玉清之下，是為中元宮，三清即儒書所謂三皇也。

與心絳宮神，

虛靜先生云：瞥起是病，不續是藥，不怕念起，即怕遲覺。又古德云：若人靜坐一須臾，勝造浮圖七寶塔，寶塔終久化為塵，一念不生成正覺。蓋此心一念不生，立躋聖地，故曰飛證太玄尊。心者主乎一身，而其體虛靈，足以管天下萬事萬物之理，理雖散在萬事萬物之上，其用之微妙，不外人之一心。前賢有詩云：道通天地有形外，思入風雲變態中是也，靈寶與心神為一心，乃天心，非肉心也，神乃歷劫不壞之神，非祭祀之神也。《詩》曰：人心若與天心合，顛倒陰陽只片時，故曰玉宸與心神飛

證太玄，蓋天心不出於大公至正，無分毫所私，人心若能體而則之，行無私曲，一是皆以至正處己，則果證大洞太玄無疑矣。

飛證太玄尊。

飛昇證果太玄真尊之位。此下茅山《大洞》又云：神拔三塗積，仙胎纏兆形。多有此二句，蓋太玄三真人乃極尊之位，天地之外曰虛無，乃元始所居，號虛無自然，以其無心故虛，空盡故無，虛而能容，無則能化，故曰藏帝經，人能虛無，則神明自來，來則靈而久，故取坤艮，喻其能容且久。

右件玉章天篆一百三十字，出於禹餘天，下統第九壘昌德君。

《玄契》曰：至此，登上清真王太一真人。

元始天王曰：文昌大洞玉章第三十五，以表坎離二卦交媾之道。玉清聖境始炁所化。

三真生太無，

三真者，南方三炁天君，生於空洞太無之始，下云南昌，即文昌也，今衡

山上應軫宿，下鎮離宮，有朱陵洞天，乃三十六洞天第三也，人生從此鍊化，方許成人，又在人即精血三真元王君便是。或曰：三真即前太玄三真，又曰：太無乃太元字，多誤，此乃太無中太素君大洞玉章。

玉戶映晨霞。

大人繼明照于四方，夜初盡而日繼照，正大明出於東方之時也，南方位處離宮，名同日曜。玉戶者，鳥馭所出也，晨日也，暉映晨日之霞，亦早朝之謂也。南嶽山朱雀頂有日觀亭，天色清明早朝，登此亭觀日輪之出海，一出一沒，一進一退，有欲昇而不能昇，然後一躍而上，此處備悉。

太素洞元靈，

日月麗乎天，容光必照然於南方丹天洞陽之館，凡有得道，由此鍊形，方許飛昇帝庭。上卷云：太素三華炁，三華炁亦南方三炁，太素乃三素母，蓋主持鍊度之事，元靈名也，亦名罕張，蓋衡山有福地，名曰洞元靈

光天等壇，皆上仙得道之所，文昌鍊化皆在此處，故此洞章多言及之。

丹林森朱柯。

百穀草木麗乎土，以其南方赤色，故生長皆丹林朱柯，《黃庭經》：丹青綠條翠靈柯。醫書：南山多靈芝瑞草，餌之皆神仙。

回神九重府，

還神於九重之府，蓋朱陵火府九陽梵炁結成，今南嶽山勢亦九向九背，以應陽數，此言修習之徵，心府現出光景。

南昌發瓊華。

燥萬物者莫熯乎火，故以南方火德增助太陽，以麗品彙，俾各遂其生。南昌受鍊司，乃鍊度之所，得道者無不經，名洞陽宮，有流火池黃華水，皆發生瓊瑤英華，《度人經》：修誦是經，皆即受度飛昇南宮，同此，言人心府神宅如此之盛。南昌即文昌也，元始以符圖真文鍊之洞陽之官，故曰文昌中有不死之神，長生之君，司命司祿延壽益算真君，《度人

經》：南宮南昌皆與此同，即今南嶽衡山是也。元炁上連熒星，太陽炎老君所治，其中主夏炁長養萬物，天下萬神，常以立夏日升此赤石玉闕謁炎老君，受天玄符，各還四方，以行夏令。赤帝玉司君諱景度，如知其神，存念九年，致長生之藥，丹霞飛雲，下迎兆身，而升玉清。雖然如是，而南嶽相去數千里，豈得人人親往以觀之哉，但人身亦有一衡嶽，知此則文昌鍊化之司不遠矣，道不遠人，在身中，在人參訪，造詣真實，不可臆說強為。

百關納津液，

世界皆以水為潤澤之物，故能生育萬物者水也，以此表坎卦為至當之議。人有一百八十靈關，三百六十骨節，一千二百形影，一萬二千精光，三萬六千根源本始，八萬四千毛竅，關鍵中咸生津液之潤，人無津液則枯槁云亡，天地得水而覆載，萬物得水而生成，其實一也。

停玄三秀阿。

藏隱玄根於三秀之卷阿，南嶽名太虛小有之天，《古詩》云：小有洞中三秀草。即靈芝是也，山有五芝，餌其上者得仙。

兆身騰玉清，

己身已證上仙，故能飛騰遊宴玉清聖境，朝見元始上帝，先賢多有骨肉同飛者，然此肉身皆蛻藏名山，惟神可去。

七祖離幽局。

幽局，水府泉曲河源也。身未得道，七祖未免沉墮幽局，既已成仙，當先度本宗祖禰出離幽局也，即地水二司幽都。

長保不終劫，

永保無盡之劫塵。大洞一經乃最上乘，大非下格小仙所可擬議，修鍊至此，永無退轉，豈可與天人之果同日語哉。

萬世承仙家。

《玉經》云：世世不絕，長為人君，千萬劫中，永遠承繼，上仙之家，天下名山，皆有異姓繼承仙位，唯張天師

嗣今已四十代。
位為聖統尊，

繼天立極，位為聖統之尊，於人中，此大人之事也，正如大洞帝尊，總統萬神，最為極貴之尊位，仙人至此，世亦罕有。

玉清大洞仙。

稱號曰玉清大洞神，最為尊榮，此坎離交媾而真體完全之時也，有大洞尊、大洞神，其實一也，即自己本命元辰是。上火下水，有交媾之道，人徒知火炎上、水潤下，而不知抑心火升腎水，為生生之理，火大燥水大濫則死，在靜寧一心，屏絕萬慮，則化紫金光，見於目為徵，非按摩存想。右件玉章天篆七十字，出於清微天，下統第九壘昌德君。

《玄契》曰：至此，登玉清聖王天一聖君。

元始天王曰：文昌大洞玉章第三十六，表兌艮二卦，悅而止也。彌羅天境梵炁所化。

西元九靈炁，

此章表卦先兌而後艮對取也，兌正

西之卦，故九靈太妙白玉龜臺金真梵炁祖母元君，即西王母，主管女仙，居閬苑極高之地，九靈真炁所成也，已經億萬斯年，誦此經者，祝延后妃嬪主遐筭齊王母之壽，婉儀同拂石之年。

金丹流雲宮。

大丹以金為母，流雲宮入泥丸宮也，流雲宮亦王母之居，昔申泰芝字廣祥，其先洛陽人，因守官湖外，世居長沙，一夕於祝融峰頂遇真人傳金丹火龍之術，鍊之有年，功行俱備，而能乘虛游神，隱顯不測，唐明皇夢，請為國師，後飛昇為真仙，此金丹之驗，因此於前立金丹大藥圖。

上極旋曜杪，

杪者，末也，盡也，崑崙閬風王母所主，故高與天齊，高上窮極璇璣七曜之顛。此句下，按茅山《玉經》，有暉景太霞中，運回九天輪，靜沉八流剛，室有胎仙母等四句，不在蜀本中，姑略之以俟後之君子，或補添亦可矣，大率經錄法各從其所傳宗派，

不必拘滯同異，量較多寡，以取奇特。

携矜太帝房。

矜大微名諱干景精，又諱三矜交，又曰矜子，矜天衣也，提天衣而登太帝房，此乃太微大帝，亦九魂名，即中央黃庭。

玄一靈時生，

玄一老子林虛夫，字靈時，道通導玄炁，俾之靈通變化。結經曰：初曰通炁，即太玄之炁也，貴使鼻息玄炁凝定也。

三老素罕張。

三素老君名罕張，上卷二章云：三素生泥丸，老君罕張上，同義，《黃庭經》云：三老同坐各有朋，亦與朝廷三老同義。

左把五符籍，

言三素老君，左則執五靈五老符圖，版籍神咒誥命，叱咤不祥而開黃道，上真遊宴並神仙得道者，皆以五老啓塗。

右携萬神宗。

兌，悅也，順乎天而應乎人，先民犯難，民忘其勞死，此人極之道，人之得道，左提右挈，萬神並歸掌握之中，一任驅役。

同登龍琳闕，

《易》曰：六位時成時，乘六龍以御天也。《大洞經》至此謂之六度圓成，相與兆同登龍鳳琳琅之宮闕，謂之選仙舉進士。

稽首玉清房。

上元泥丸宮，修行至此，金丹已成，當脫胎換鼎，神化自然，稽首而朝謁王清。元始於洞房之中，請受仙職充仙官等。

上證聖中尊，

證品大洞天一帝尊，聖中最貴極品地位，永無淪墜矣，此三境至尊之前金闕侍臣之位，難同三界有漏之因所可擬。

符化玄炁王。

良，止也，止於至善極盡之地。傳曰：上天之載，無聲無臭。人能修習至此，抖擻迨盡，歸之○無極。符

者，陰符也，以陽火鍊化陰符為玄炁，位證玉清，初以精炁毓神，遂成嬰兒，又以嬰兒鍊成陽符，又以符化為玄炁，此所謂昇入無形，與道合真也。釋氏云：凡所有相皆是虛妄。又云：不可以具足色身見如來。又云：若以色見我，以音聲求我，是人行邪道，不能見如來。如來，我也，若以聲色隱障，則不能自見本來真佛，大率此經以知命見性為了當，在人堅守。

右件玉章天篆六十字，出於彌羅天，下統第九壘昌德君。

《玄契》曰：至此道備，位登聖尊，形化為雲符，符散為玄炁，炁聚為真形，炁藏為真炁，觀之則為玉符，聽之則為玉音，不可思議，功德洪深，視之不可見，聽之不可聞，搏之不可得，玄玄至道宗，《大洞仙經》，至此大通。

結經

玉宸道君言：我師元始天王授我此《大洞仙經》，其旨玄奧。

靈寶天尊說，我師元始天王授我此《大洞仙經》，其旨玄奧，靈寶尤言玄奧，人豈易知，若非內外雙修，凝靜自然，洞觀無礙，則何以探蹟索隱，鈎深致遠，此經乃天真隱諱，與人神同。

修真妙門：

修道之妙行觀門，先自持戒而後習定，戒定既立，則習炁以收神明，息炁凝聚則神明自來，神明來，則慧光發生，以為了當。

初定通息，

《圓覺經》云：無礙清淨慧，皆以禪定生，人若不靜定，安能慧光發照。又《法華經》云：在於閑處收攝其心，安住不動如須彌山，又曰：定水澄清，心珠自現。古人云：探珠宜靜浪，動水取應難，故曰禪定。儒曰：靜而後能定，蓋心靜方定而後能慮。此三氏理歸一，胎息法，少飲食，不言語，心中默數，注在鼻觀。

太和一千，

心若一念纔動，則不謂之太和，不和

反生他證，直要一念不動，方謂之和，仍數其炁，至一千數足為一通，一千通為圓滿大和。

中觀變真，

自己於內觀中能變化我真昇天入地，往來無窮也，觀中觀者內觀也，功行既滿，乃能內顧五臟，外集萬神，可以變化。

離相消塵。

與此身別無關涉，他自他，我自我，所謂離種種邊也。釋氏云：若人以七寶滿三千大千世界以用布施，不如持此經，乃至四句偈，而此福德勝前福德，按《金剛經》四句偈有二，前云：若以色身見我云云後云：一切有為法，如夢幻泡影，如露亦如電，應作如是觀。《老子》云：大象無形。又曰：大道無形。孔子曰：神無方易無體，寂然不動，感而遂通。精詳三教聖人垂世立教，至于窮極，其實一也。此經者此心也，若以此心窮究四句偈，則此身皆屬幻妄假合，有為之法，皆是虛設耳，若能於

此趁逐，得見本源，須要兩頭放下，與之剛崖血戰一場，一日命根瞥然斷了，方是到家的漢，所謂離相消塵。古人云：森羅萬象體，不掛一絲頭，誠哉是言也。

元合五千，

收拾太和，圓滿五千，其數雖多，從一而起，所謂磨磚作鏡，利杵成針，至此方見工夫，圓滿具足，不缺絲毫，曰工夫不到不成丹。

坐在立亡。

坐則有，立則無，復歸乎杳冥恍惚之間，無聲無臭，無思無為，何有聲音笑貌為哉！道經云：坐脫立亡，同如普化和尚搖鈴上天。

大定全真，

若自心炁大定，永不出入，則無饑渴寒暑之所撓，兵甲不能傷，毒蟲不能螫，水不能溺，火不能燒，視不見，聽不聞，近不見前，隨不見後，方謂坐在立亡大定全真也，雖天地鬼神莫能窺測，至今世間多有古德坐禪不欲出定者，如蜀中縉雲滴水、江南普

庵四祖，皆在世目擊道存，此乃大定全真也。

妙行通靈。

妙行者，上卷十仙十門，中卷十洞十根，下卷十華觀門，八卦六位妙果，皆曰大洞妙行。通靈者，妙行純熟不已，自然通達靈妙。

初曰通炁，

始學胎息，令炁炁出入各知其數目，若數炁閉至一千二百息，亦謂之大胎息也，古葛稚川之大胎息法，即《圓覺經》分別念數。

次曰通神。

二則我元神與萬神交會，真炁相合，則神變莫測矣，非所以通外神，乃邪鬼變化為妖為魔，必敗道德，不可交通，切忌，隨他去。

終曰通靈，

程子伊川釋《中庸》前知曰：如蜀山人董五經之徒，亦能前知。此特小事爾，至極處，則一點靈明湛若水鑑，天地造化，吉凶悔吝，無不見其中，善與不善必先知之，皆《中庸》至

誠之道，佛書所謂解脫知見，儒書云：物格知至是也。美在其中，而暢於四肢，發於事業，皆是自己神炁通靈，非自外至者。

十通成真。

予前夢牛觸，蓋亦自己本命元辰也，滄山云：安在滄山二十年，只看得一箇水牯牛，若落路入草去便牽出，若犯人苗稼便鞭撻，如今看得露炯炯地，趕亦不去。予亦守欄三十餘年，方始見牛，其勞不易，自初定通息至十通成真，豈容少間，一處通，逐處皆通，神鬼有五通，佛具六通，天仙具十通。

道備登宸，超脫飛昇。

功滿道備，證登紫宸，脫去凡骨，真神飛昇。古人雖云拔宅飛昇，骨肉同飛，然此凡濁胎質，非可入見帝前，須是藏之名山，或投海外，惟此一真，飛神御炁，方得過度三界，上朝玉京。釋云：不可具足色身見如來者，亦此義爾，如玄帝藏金骨於武當山之類。

過度三界，往來三清。

三清在三界之上，渺渺大羅之天，雖高在上，可以往來，修大洞者，渾不經由三界也。

證品大洞，天一帝尊。

大洞帝尊在諸天之上，當兆所證所登之位。天一，即太玄，此乃上真上仙之可證。

六度十通，萬行圓成。

六度萬行，六位十通，圓滿告成，無虧無欠，須是一關一津，逐一打破，透過方見真如。

千和萬合，自然成真。

《度人經》：九和十合而迴風混合之道，專以和為貴，若能千和萬合，自然成真仙之道。但前三品，凡云真者，誠實無妄之謂也，人能反身而誠，樂莫大焉，蓋人之所賦，皆全德之天真，而至年長，為物欲之障，所以琢喪本源，逝水滔滔而不知返，故元始天王，玉宸道君，太玄道父，三師父子，啓迪良因，設為答問以救度之。而此經乃三寶玄奧，義理幽隱，

難可尋詳，琪因就章句之次，輒以膚見略筭筆舌，誠不自揣，以平生所學，得之於心傳口受之間者，盡以附之於此，其文雖曲直不一，性命互顯，然其大綱不過安天理，守本分六字而已。或曰：泄漏秘語，其罪莫大，琪曰：寧甘伏受，欲使圓蓋之下，方輿之內，凡見聞者咸依《文昌大洞仙經》修證，上以贊聖人之萬壽，繼天推堯舜軒黃，下以福黎庶於八荒，易地皆禹稷顏子，人人共德，物物同仁，琪之願也，又奚畏焉，臣琪頓首再拜謹書。

《玄契》曰：大洞仙經，元始天王為玉宸道君演，玄披元極始通梵自天及人俾獲成仙，真要文也，學士誦之，悟入登仙，鬼神誦之，悟入登真，凡夫誦之，悟入長生，幽魂聞之，魂魄更生，永度死厄，上生天堂，枯朽老病聞之延津，嬰孺神童聞之聰明，上士得之飛騰玉清，位為聖尊，與道合真。

玉清無極總真文昌大洞仙經卷之十

①『秀』，疑當作『流』。

②『王清』，當爲『玉清』之誤。

(曾召南點校)

095 大洞經吉祥神咒法

經名：大洞經吉祥神咒法。撰
人不詳，約出於宋元。一卷。底
本出處：《萬曆續道藏》。

一百大吉祥檀熾鈞音神咒

元始善巧清和開諦法門一百大吉

祥檀熾鈞玉音神咒：

普光弘濟尊，太玄真一心。

大洞丹泓効，清和吉祥音。

始始始三炁，吉祥檀熾鈞。

梵音大梵炁，吉祥檀熾鈞。

天音淨妙音，吉祥檀熾鈞。

帝心三昧音，吉祥檀熾鈞。

玉音芳華彩，吉祥檀熾鈞。

虛音道光師，吉祥檀熾鈞。

無音妙通玄，吉祥檀熾鈞。

道祖內音宣，吉祥檀熾鈞。

太一元皇音，吉祥檀熾鈞。

上音妙行音，吉祥檀熾鈞。

金音無等音，吉祥檀熾鈞。

九靈玉母音，吉祥檀熾鈞。

東父神音華，吉祥檀熾鈞。

伊音洞淵尊，吉祥檀熾鈞。

滋洞靈音悲，吉祥檀熾鈞。

騏音洞空香，吉祥檀熾鈞。

輪音大龍光，吉祥檀熾鈞。

風音八和神，吉祥檀熾鈞。

翻音洞觀華，吉祥檀熾鈞。

臧音洞明燈，吉祥檀熾鈞。

凝除天帝音，吉祥檀熾鈞。

猊音洞玄水，吉祥檀熾鈞。

霄明太華香，吉祥檀熾鈞。

核音洞微果，吉祥檀熾鈞。

抽音洞靈芽，吉祥檀熾鈞。

炁泓効中音，吉祥檀熾鈞。

洞源金醴漿，吉祥檀熾鈞。

瓊瑰玄膺味，吉祥檀熾鈞。

饋歛金飯音，吉祥檀熾鈞。

洞虛黃元糧，紫珍八和饗。

吉祥檀熾鈞，緇音大明輪。

吉祥檀熾鈞，檜伉音法財。

洞清無盡資，驪珠吉光禍。

吉祥檀熾鈞，觚斝元母音。

洞真天帝衣，黃裳紫光裙。

吉祥檀熾鈞，樞嶮金母音。

吉祥檀熾鈞，蓮艘婆景音。

吉祥檀熾鈞，盤音紫光裙。

吉祥檀熾鈞，機音大圓通。

吉祥檀熾鈞，龜音妙天花。

吉祥檀熾鈞，猷音鳥龍飛。

吉祥檀熾鈞，光音大真如。

吉祥檀熾鈞，寶月清宸音。

吉祥檀熾鈞，岑日慧明光。

吉祥檀熾鈞，晶羅頡力音。

吉祥檀熾鈞，注音太原譌。

吉祥檀熾鈞，磨音慈父章。

吉祥檀熾鈞，星斗晨皇音。

吉祥檀熾鈞，彫薺妙香音。

吉祥檀熾鈞，蘅薇太玄香。

吉祥檀熾鈞，內香中帝香。

吉祥檀熾鈞，清景玉宸香。

吉祥檀熾鈞，真香洞神香。

吉祥檀熾鈞，神音太清謠。
 吉祥檀熾鈞，妙門真之香。
 吉祥檀熾鈞，氣母襲華香。
 吉祥檀熾鈞，聖音天寶皇。
 吉祥檀熾鈞，真帝靈音生。
 吉祥檀熾鈞，仙王神寶音。
 吉祥檀熾鈞，師寶玄中音。
 吉祥檀熾鈞，歌周音大明。
 吉祥檀熾鈞，劾音姿晞陽。
 吉祥檀熾鈞，驃音玉華涼。
 吉祥檀熾鈞，象音上德音。
 吉祥檀熾鈞，初音大吉祥。
 帝心檀熾鈞，冥寂玄通音。
 吉祥檀熾鈞，深音高觀王。
 吉祥檀熾鈞，應音南長生。
 吉祥檀熾鈞，清和妙化音。
 吉祥檀熾鈞，傲睨音八華。
 吉祥檀熾鈞，福音壽仙王。
 吉祥檀熾鈞，稟無清帝音。
 吉祥檀熾鈞，慶雲始老音。
 吉祥檀熾鈞，阿奔流吟音。
 吉祥檀熾鈞，郁麗菩育鈞。

吉祥檀熾鈞，答慶大梵音。
 吉祥檀熾鈞，明上回玄音。
 吉祥檀熾鈞，吁負龍羅音。
 吉祥檀熾鈞，洞浮生玉音。
 吉祥檀熾鈞，空靈澤洛音。
 吉祥檀熾鈞，緣羅雲飛音。
 吉祥檀熾鈞，那育魔羅音。
 吉祥檀熾鈞，鏡攬運容音。
 吉祥檀熾鈞，廓奕神纓音。
 吉祥檀熾鈞，禪猷白元音。
 吉祥檀熾鈞，婆尼宛藪音。
 吉祥檀熾鈞，梵萌蕭嶠音。
 吉祥檀熾鈞，易遯無極音。
 郁竺宛首音，吉祥檀熾鈞。
 延由自辨音，吉祥檀熾鈞。
 品首扶蓋音，吉祥檀熾鈞。
 長桑栢空音，吉祥檀熾鈞。
 瓊育上玄音，吉祥檀熾鈞。
 陀羅合雲音，吉祥檀熾鈞。
 飛天沙陀音，吉祥檀熾鈞。
 瑛鮮和中音，吉祥檀熾鈞。
 碧落浮黎音，吉祥檀熾鈞。

保真惡奕音，吉祥檀熾鈞。
 洞妙恢漠音，吉祥檀熾鈞。
 人心擇那音，吉祥檀熾鈞。
 大洞無量音，吉祥檀熾鈞。
 玄功三千圓，妙行八百齋。
 貴品生芝英，丹碧靈寶輝。
 圓滿證十通，舉形昇三微。

大洞經吉祥神咒法

(曾召南點校)

096 元始天尊說梓潼帝君應驗經

經名：元始天尊說梓潼帝君應驗經。撰人不詳，約出於元代。假託元始天尊為梓潼帝君說衆生罪緣，勸人改惡從善。一卷。底本出處：《正統道藏》洞真部本文類。

爾時元始天尊，在鬱明天宮玉京山內，結成五色彩雲之蓋，領諸天仙衆，日月星辰輝煌晃曜，山川鬼神拱手讚嘆，咸曰：吾等生居混濁塵凡之世，希遇天慈，廣爲開悟。時梓潼帝君雍容進步，再拜帝前，長跪而言：弟子從劫劫中，萬失本身，謫在蜀地，念下凡受諸雜劫，或生禽獸之中，或處蠻戎之內，富貴有別，貧賤有殊，受水火刀兵之災，罹輪迴生死之苦，不知有天地日

月星辰，毀謗教門，不敬三寶師資父母，致令生雖快樂，不免墮五趣三塗，劫劫輪迴，不知覺悟，見此等人民，受報非一，今遇天尊下臨，願爲宣說，以開愚昧。

爾時元始天尊即現毫光，輝耀萬里，諸天仙衆，暨諸天上地下水瀆獄司神祇，各居瑠璃五色之內，以聽宣法。

元始天尊曰：奇哉，帝子憫念衆生，說是因緣，心爲開悟，陰陽遷迭，日月推移，星辰流伏，地土崩裂，皆屬上天變遷。凡民受天地中生，稟陰陽炁，五行成就，二炁結成，不知人身難得，中土難生，嫉妬貪婪，未知懺悔，致受兵戈疫癘，水火災殃，悉皆由也。臣從前稽首告天尊曰：民受災禍，竟莫憫聞，何以解謝？天尊凭几而言：汝居昊天之上，齊太乙之尊，名高南極，德被四方，掌混元之輪迴，司仕流之桂祿，六籍並考，五嶽具聞，念此凡民，當爲救濟。天尊即說讚曰：

於是元始尊，座居瑠璃內。憫念衆生惡，三塗從五趣。茫茫不知覺，常

同日月晦。不知稟五行，星辰爲遷運。時有梓潼君，從座宣慈愛。分身行變化，筆中顯三昧。解襪並開門，玉京幾宣對。下觀世間人，受苦無耆艾。不覺不知悟，今爲汝懺悔。衆生聽指迷，五嶽無罣礙。輪迴司救苦，地獄無馳背。福禍並通傳，吉凶先與暨。好生奉大道，慈悲爲除害。永開仙教門，依教永爲最。

又頌曰：

桂祿籍汝司，文章爲汝全。若要登仕徑，賴汝爲衡權。善惡是禍福，通達在因緣。把筆爲直書，榮枯豈偶然。有福必有報，無善亦無偏。諸天稱曰善，何由得昇遷。

於是元始天尊說是經畢，謂梓潼帝君曰：汝居西蜀之中，鳳凰山上，顯靈凡土，俱有象成，察九十四化之行藏，顯億千萬劫之變化，掌救苦之一職，司禍福於四方，聆吾片辭以裨寸善，尚加謹畏以答慈悲。梓潼帝君即爲跪謝，重白天顏而作禮：臣今逢慈憫，誓願濟人，筆根無一事之不書，分

身無一民之不救，同爲大道以感好生，尚冀天顏以開方便。於是諸天仙衆，各生讚嘆。重白天尊，願將付與世人讀誦，以釋災禍。

天尊曰：善哉善哉，誦之，則百福來臻，子孫榮慶，終身顯達；謗之，殃及九祖，禍延汝身。於是天仙等衆，即說讚曰：

寂寂玄玄爲人道，昏昏杳杳是凡愚。今朝得睹天尊教，凡愚從此免嗔癡。

說是頌畢，諸天仙衆、梓潼帝君再拜天顏，作禮而退，信受奉行。

元始天尊說梓潼帝君應驗經

帝君聖號

混元內輔三清內宰大都督府，都統三界陰兵，行便宜事，管天地水三界獄事，收五嶽四瀆真形虎符龍券，總諸天星曜，判桂祿二籍，上仙英顯元皇真人，司祿職貢舉真君，預編修飛仙列

籍，掌混天造化輪迴，救苦無礙寶光純一天尊，九天定元保生扶教開化主宰，長樂永祐靈應大帝。

（曾召南點校）

097 元始天尊說梓潼帝君本願經

經名：元始天尊說梓潼帝君本願經。撰人不詳，約出於元代。假託元始天尊為慈濟真人及梓潼帝君等演說，勸人正心修身以消除劫難。一卷。底本出處：《正統道藏》洞真部本文類。

靈寶消劫正心開化章上品

爾時元始天尊在清微天宮黃金闕內，會諸天帝君與無極聖眾，昇玉華寶座，放大光明，照諸世界，觀諸眾生遭值劫運，受無量苦惱，宛轉塵寰，輪迴生死，慨爾嘆曰：民哉，民哉，誰使而然哉！是時有一真人，名曰慈濟，從法座起，越班而出，長跪道前，白天尊言：賤臣不德，仰叨道蔭，得離斯苦，昨睹玉皇尊帝檢校圖錄，推定劫運，勅北

陰黑煞、多目原厲，及諸天魔王等眾下巡人間，興動兵戈，流布瘟疫，殺戮生民萬萬億數，俾諸世人，靡有遺類。今觀眾生，父子兄弟，夫婦男女，肝腦塗地，號泣悲哀，莫能相保，繼以天灾大行，鬼現白晝，間獲免彼，終莫此逃，未審此諸眾生曠劫以來，造作修種，何所違戾，而獲是報？可不悲歟！可不痛歟！伏願慈悲，示以未悟。

天尊告曰：此諸眾生，自往劫來，不敬三寶，不孝父母，邪淫貪愛，姦詐嫉狠，造種種罪惡，日熾月滋，是故玉帝論定劫運更變世人，雖可悲痛，亦其自取。

爾時慈濟真人暨諸聖眾，各各稽首，而白天尊言：臣等即是思惟，心大不忍，戚首蹙頰，力不能救，惟願天恩發慈悲心，開方便路，垂一金臂，援其焚溺，庶使人道不至類絕，臣等敢冒死謹言。

於是天尊撫几高抗，澄神默坐良久，答曰：邇者蜀有大神，號曰梓潼，居昊天之佐，齊太乙之尊，位高南極，

德被十方，掌混元之輪迴，司仕流之桂祿，考六籍事，收五嶽形，歷億千萬劫，現九十餘化，念念生民，極用其情，是以玉帝授之如意，委行飛鸞，開化人間，顯跡天下，蓋此末劫實未可除，若欲消之，此神其可，吾當為汝等召之，俾救度末世，勿使類絕。

于時慈濟真人及諸天聖眾，再拜禮謝復位。於是天尊命持幢玉女，向不驕樂天下之者三，忽梓潼帝君擁五色雲霞之炁，自西北至，雍容雅步，再拜而前，白天尊言：今日吉慶，興此法筵，臣貪於行化，以至後會，恭望天慈特賜原宥。

天尊告曰：夫民受天地中生，自陰陽內化，五行範體，二氣結形，而不知人身難得，樂土難生，乃貪婪姦詐，莫知紀極，以至劫運，適逢兵戈競起，疫癘流行，水火焚漂，悉皆由也。今諸帝君、天上地下無極聖眾，咸請於我，願消此劫，故特以昇汝，汝其勉之。

爾時梓潼帝君拜謝，奉旨欲退。天尊重告曰：帝子，此諸末劫，運數浩

大，汝今消之，何道而可？梓潼帝君復再拜而前，白天尊言：臣自劫劫中萬火本身，謫在蜀地，兢兢惶惶，懼不稱職，方切思過，乃誤天恩，臣謹惟消除此劫，先正人心。爲人子者，訓之使孝，爲人臣者，訓之使忠，訓兄弟以友恭，訓夫婦以和順，訓居上者，使待下以情，訓治事者，使處心以公。率而行之，或者可以少弭。

於是天尊乃垂盼皆之容而稱嘆曰：奇哉，帝子憫念衆生，說是因緣，心得開悟，若諸世人推行不已，則可以消除劫難，興國太平，人享高壽，物遂本性，五穀豐熟，歌謠滿路。一或反之，則兵戈疫癘，頻仍相藉，橫尸遍野，枯骨成山，而人類絕矣，子其勉之！於是梓潼帝君拜謝，復擁五色雲霞之炁，自西北而退。爾時慈濟真人聞是說已，歡喜踴躍，即於座中以頌讚曰：

堪嗟爾衆生，姦詐復貪嗔。營營日滋熾，擾擾不知懲。致遭末世劫，人類將沉淪。於是元始尊，憫念諸有情。欲救末劫苦，爰命梓潼君。筆中顯三

昧，秩秩先正心。塵迷能導引，福祿總來并。

爾時慈濟真人說是頌已，四衆歡喜，異口同聲，嘆未曾有。

雲寶消劫正心靈應章中品

道言：元始天尊在玉華座上，收斂光明，澄神默坐，瑤壁輝映，真氣包絡，鐘鼓畢奏，神風交暢，道意微密，暄然如春，一切金仙，四衆八部，幢幡寶蓋，侍在側焉。爾時元載孔昇天主濟沉拔罪真人，東岱嶽府君，各從座起，長跪道前，白天尊言：臣等往劫何修，獲預法會，親炙道語，心竊欣感，然臣等愚蒙，聞是經說，心雖歡喜，終竟未達。切謂人心不正，致罹此劫，自非天尊垂大金臂，放大光明，展大神通，勅諸巡世神祇，各令復位，則或者他道，似爲未急，今大劫已至，運難豐浩，而九天開化，方正人心，臣恐其緩，伏望天慈，示以未悟。

於是天尊浩然長嘆，而告諸真衆曰：嗟乎，汝等尚未達理之本耶？夫人之生，善性根焉，孝悌鍾焉，四端具

焉，五行範焉，忠信胚焉，和遜傳焉，所謂人也，非比草木禽獸之爲類，凡形肖人似，皆一同之。及世道淪降，人心不古，機巧姦偽，貪妬狠亂，種種不善，踴躍爲之。是以見三寶而不敬，對三光而無禮，呵風罵雨，怨天尤地，待父母如同路人，視兄弟如見仇敵，責人常詳，待己每恕，見人有善者掩之，不及則毀之，無所不至，見人有惡，喜而慕之效之，惟恐弗勝。富貴者，驕奢淫佚，傲慢賢能，泄瀆師長，昂首闊步，視貧賤如履草芥，不知修種，不行陰鷲，暴殄天物，中市網利，了不知止。貧賤者，諂諛貪嗔，怨咎鬼神，不知前世因果，不能安貧守己，邪淫偷盜，犯分干禮，終莫自悔。是以惡人滿世，邪鬼橫行，讒慝交進，謗讟並興，政治乖舛，人民困苦，山川告匱，鬼神不寧，怨氣鬱結，上薄太空。世道至此，寧得不變，所以檢校圖錄，運合數周，推此大劫，日月薄蝕，陰陽乖戾，魔鬼巡世，亂民迭興，兵戈疫癘，頻仍不已，命苟彼逃，終不此免，枯骨成山，流血若水，殄滅

人類，勿使遺種，若欲救之，豈易爲力。吾故命梓潼帝君開化九天，飛鸞救世，俾諸世人，洗心滌慮，咸臻善道。爲子而能孝其親，爲臣而能忠其君，爲兄弟而克友克敬，爲夫婦而克和克順，居上待下者必以情，臨政處事者必以公，不貪不妬，不姦不僞，習此不已，化成天下，則鬼神欽仰，天地寧謐，老者可以得壽，少者可以得養，國土可以清平，五穀可以豐熟，末世可以返古，豈惟末劫獨不消乎。吾若放光垂臂，雖可救之，然人心不正，其何能久，故不若人心既正，大劫自除，諸巡世神祇，方欽仰畏避，豈敢肆毒，汝等各宜諦心恭聽，勿生他慮。於是元載孔昇天主濟沉拔罪真人，東岱嶽府君，皆歡喜作禮，默然復位。

爾時天尊復告四衆曰：我今再剖因緣，汝等各宜諦聽。人爲萬物靈，心爲一身主，沉沉靜靜，不愆不慾，不雜以僞，無慮無思，發而爲言，溫和慈讓，發而爲行，中正端直，其於親，不期孝而自孝，其於君，不期忠而自忠，其於

兄弟，不期友敬而自友敬，其於夫婦，不期和順而自和順，不厚責於人，不徇物以私，率性而行，舉皆中道，何者容心。故其國清平，其人安泰，其世上古，今末世凡人，勉強遵守，不遺不戾，心心不退，念念不忘，其獲福亦可如是，豈以大劫持此而不消乎！於是天尊而說偈曰：

靈哉一點，不擾不驚。無思無慮，至聰至明。天理昭著，善性根成。

一雜以僞，五體摧傾。自然歸正，百福來并。敬之慎之，大衆齊聽。

於是天尊說偈已，諸天真衆、無鞅神仙、嶽瀆神祇，歡喜踴躍，嘆未曾有。

靈寶消劫正心報應章下品

爾時保和應化真人，即於道前拜首而言曰：未審此經消劫之外有何功德，伏望天慈爲四衆帝釋、諸天神仙、嶽瀆祇靈、天上地下及未來一切衆生，廣說利益。

於是天尊告保和應化真人曰：善哉，若諸國王帝主、宰輔大臣奉持此經，推充此道，躬行不替，教化天下，自

然風淳俗厚，政善人安，五穀豐登，萬物熙遂。若諸世人，平居無事，至心沉慮，精加轉誦，自然父母長壽，子孫榮貴，家道昌隆，身體康健，凡有所求，種種如願。若復有人，或入山林，或入江海，遭遇惡風，逢值毒獸，但能懺悔，存念此經，自然山神衛護，河伯維持，猛獸自退，風浪頓止。若復有人，或在軍陣，或遇冤家，但能懺悔，存念此經，自然惡人善解，凶器不逢，終不害己，安穩如常。若有婦人，或臨產厄，或求嗣息，但能懺悔，存念此經，自然安穩平康，生福德男女，聰明智慧，爲人尊貴。若或有人爲諸神廟轉誦此經，是諸鬼神當脫鬼趣，轉增天福。又有道士至人，善男信女，開闢靜室，更著新服，畫九天主宰真像，香花燈果，淨水供養，滌去凡思，端心正坐，持誦此經，是其左右一切鬼神等，或有聞者，即離鬼趣，登證仙果，一切餓鬼等或有聞者，脫飢渴苦，受度南宮，一切畜生等或有聞者，脫畜生苦，復歸人道，一切草木承此經者，已枯使榮，轉更茂盛，飛潛

動植，胎卵濕化，一切有情，咸臻道化。又此經所在，及持是經人，當有十方飛天大聖、救苦真人、金剛力士、神仙兵馬、金精猛獸、無鞅數衆，常來擁護，一切功德，說不可盡。

於是保和應化真人稽首白天尊言：此經功德，衆咸聞之，若諸世人，或有疑惑不信，妄生誹謗，不擇淨案，便將安置，不持齋戒，便將轉誦，未審此諸罪輩，當得何報，伏願天尊再示未悟。

爾時天尊言曰：噫，子今所叩，豈不異乎！此經功德，不可度量，其報應亦不可具述，若諸世人敬持遵奉，疑惑誹謗，獲罪獲福，各有輕重，若廣說之，凡流邪見反啓疑貳，我今說經，止救末劫世人，疑信一聽自然，性命禍福，豈可戶曉。但願世人，事親者當爲心孝，母爲面孝；事君者當爲心忠，母爲面忠；處兄弟則當心友心敬，母面爲友敬；處夫婦當心和心順，母面爲和順；待下者母面似至情，而心實不情；臨事者母面示至公，而心實不公。

若能遵行此道，則雖疑惑誹謗，猶信也；若不能遵守此道，則雖齋戒敬誦，猶不信也。善者積善，惡者積惡，積之既久，天地神臨之質之，禍之福之，皆自然也，吾何言哉。於是保和應化真人及諸天仙衆，同聲稱讚而說偈曰：

大哉渺渺玉星中，推較河源俱此切。殺戮生民億億衆，頂禮至尊難可說。於是天尊發慈悲，九天開化普俱雪。但教心地長清淨，疑信從教衆生竭。我今稽首悉辭尊，萬萬生靈毋誑滅。

爾時保和應化真人暨諸仙衆說是偈已，稽首天顏，作禮而退，信受奉行。

誦經已畢，洗心長跪，依先懺悔。七曲慈尊真教主，慈父慈母同我生。子生聖子皆孝慈，孫繼神孫盡慈孝。一家和氣天無盡，萬世春臺月有光。慈光普照諸天人，細入微塵滿天地。我生同得乾坤體，一似文昌始劫時。聖非自聖凡自凡，流浪至今方覺悟。願尊七曲慈尊教，惟忠惟孝惟慈心。不以口業傲神人，不以身業累父母。不以意業欺天地，不以心業禍子孫。

願從孝行與陰功，種種力行諸方便。懺悔多生諸罪垢，皈依七曲大慈光。求嗣求祿求生方，不求諸人求諸己。惟我文昌七曲師，歷劫待人存恕法。願放一種如意光，憫念衆生真懺悔。懺悔已周，次當發願。

父母願同長壽果，龜齡鶴髮映慈光。己身願拜大吉祥，仰事俯育無苦惱。子孫願嗅雲巖桂，嘉與子孫同發榮。父慈子孝一家春，光明無負慈尊教。願蒙七曲親提接，指引登真入聖門。捨生受生正徧知，盡未來世俱圓滿。發願已周，次當贊頌。

桂香殿上慈悲主，教海周流洗業根。業根化作桂花香，善本種成長壽果。一家骨肉無煩惱，七曲子孫同護持。普願今世至來生，紫雲巖前長得道。步步心心帝左右，生生世世天主張。骨凡可換形可灰，一點真心自金石。禮訖，隨意啓祝，回向。

元始天尊說梓潼帝君本願經

（曾召南點校）

098 梓潼帝君化書

經名：梓潼帝君化書。撰人：不詳，約出於元代。記述梓潼帝君生平及顯靈事迹。四卷。底本出處：《正統道藏》洞真部譜錄類。

梓潼帝君化書序

化有二理，有變化之化，有教化之化，自無入有，自昔爲今，以幼壯爲老死，以老死爲嬰稚，此變化之化也。三綱五常，是非邪正，上以風動其下，下以獻替其上，此教化之化也。今吾所降前後九十七化，元命者，序太始也。流形者，本太質也。生民者，明性習也。易俗者，變夷禮也。稽古者，覺後知也。奉真者，遵道法也。寧親者，報劬勞也。幽婚者，戒苟合也。淵石者，

重有子也。馴雉者，誠感通也。回流者，護先塋也。降瘟者，顯錄驗也。好生者，習醫業也。天官者，醫業成也。薦賢者，公道開也。格非者，和聖賢也。榮歸者，知止足也。敦宗者，念本支也。歸寂者，遇釋法也。君山者，喜幽清也。感生者，不能忘情也。奉先者，思繼志也。孝友者，繼絕緒也。沔水者，杜讒慝也。白駒者，冀留賢也。舉雛者，忘私憾也。恤孤者，敦友義也。慈訓者，傳內觀也。盡忠者，堅臣節也。棲真者，屈雪山也。山王者，始護蜀也。刑賞者，罰淫而舉孝也。存褒者，憫無辜也。回風者，罪狂夫也。明冤者，恤無告也。苴邑者，滋生齒也。拯溺者，善賢侯也。雨穀者，惡私心也。曲雨者，惠小民也。殞賊者，旌孝婦也。北郭者，誨求嗣也。返火者，敗奸計也。平苴者，現陰佑也。費丁者，賤勇力也。石牛者，惡好財也。五婦者，諫重色也。顯靈者，不忍蜀之亡也。大丹者，遇聖師也。巴都者，嫉賊汗也。婆娑者，明天性也。戒龍者，和

鄰祇也。鳳山者，尊所生也。魚腹者，矜老苦也。口業者，彰惡報也。東郭者，懲巧僞也。牛山者，分善惡也。天威者，戒逆婦也。尚義者，貴同氣也。旌隱者，厚士風也。佑正者，高烈女也。殺生者，遠庖厨也。酷虐者，戒害物也。憫世者，念黎元也。咸陽者，奉帝命也。邛池者，報父母也。解脫者，謂冤不可成也。仁政者，悟前非也。幽明者，戒欺暗也。籌帷者，償宿業也。如意者，大有爲也。丁未者，兆命佐聖也。水漕者，司天澤也。桂籍者，司文衡也。孝廉者，濟太平也。感時者，悼王化也。神扶者，顯八公山也。誅暴者，戒汙吏也。明經者，顯先聖也。護聖者，顯大功也。明威者，戒士夫不欺也。濟順者，奉帝保民也。濟迷者，懲不信也。忠顯者，佐皇國也。聖治者，歌太平也。標忠者，濟時也。興國者，忠良也。止足者，辭王旨也。訓逆者，誅不孝也。戒欺者，正名也。誅悖者，勸孝也。真元者，拯難也。拔苦者，悼亡也。福瀘者，平夙冤也。昭

明者，見畢工也。摩維洞天者，顯後化也。放生者，戒殺魚子也。弭蝗者，拯救萬民苦也。是故聖人神道設教，始有天人相因，人神共理之化，要其所歸，不過垂世立教之大端也。

延祐三年春，中書因太常定議，根予自周歷晉之出沒，原古迄今之事業，錄予爲忠國孝家益民正直祀典之神，閱予舊封神文聖武孝德忠仁王，崇褒爲輔元開化文昌司祿宏仁帝君，因子靈應廟額，表曰佑文成化之祠。徽號益彰，汗顏愈熾，每思所以裨益公道，輔治皇元者，其跡淺陋，不足稱述，聊以予所化之實，自爲一書，以答綸音之萬一。允以道業誨人者，謂之教，躬行於上，風動于下，謂之化，風化之源，在乎風化之主，考其事之美惡，則知化之所由，淳朴既衰，民心不古，刑政極而鬼神化焉。蓋天下之民，淪綱毒法，道于朝典者，必受冥誅，古今昭昭，綽有常憲，故官府治民，神祇理世，一也，要在明教化，示斯民遷善遠罪耳。奈何幽明殊塗，隱顯異勢，聲跡既不能相

接，雖有教化令典，將何舉而示民哉。此冥冥中理世尤爲力之難也。予素知此義，故曲爲神人交接之術，與承職百靈共白于帝，作飛鸞闡化之法，筆降人間，爲幽明通貫之理，仰蒙帝意，仁愛下民，允從奏議，故予往歲已曾宣傳化跡，其事雖若自侈，此身作爲之實，然化跡之傳亦顯教明法，示人遷善遠罪之微意，其於淑人心，善風俗，力挽頹波，捨此則何以哉！比者，欽蒙上帝誕降嘉命，賜以二十一司官屬，明具所職，俯治下方，一則俾贊襄天府生成之功，一則俾密資聖朝平治之隆也，疊承寵光，罔敢逸墜，孜孜弗逮，于茲有年。矧予《化書》九十七帙，布在人間久矣，濫觴于腐儒之手，以魚爲魯，以根作銀，珉珠混石玉者衆矣，不訂炤以示人，彼將曰好事者附會妄誕尚鬼神耳，羣疑之中，得貞確端懿之士某等，爲吾反覆辨校南北二本，式質鬼神，予命之曰：比者南本則匪辟實多，北本經予親校，事實詳明，斷自丁未化前，更定舛訛，桂籍化後，刪改繁亂，予又增及

甦民化，科舉化，爲九十有九，姑虛其文，以存後意，俾正校者梓木傳行，以示來哲，庶無疑妄。人之言曰：聖人神道設教，九經並明日月，博雅君子，代不乏人，典明教化，猶不能家喻戶書，何區區《化書》之帙，能砥柱于中流耶？嗚呼！其亦不思而已矣，化之所存，道之所存也。居官者覽予化跡，若是之嚴忠廉幹濟之心，未必不凜凜也。文人儒士觀是化之終始，知赫赫之若臨，未必不祇懼修省。農工商賈雜家者流，聞千百載之駭聞，欺心者獲天誅，口業者被神戮，善有賞，惡有罰，未必不寒心竦毛、遷善改過。習釋道者，知劫運果報之昭昭，未必不全其心而蹈其矩，奚啻頑夫廉懦夫立耳。鄙夫之言曰：子不語怪力亂神，何怪神之多多？此非時中之人斯不可語上也，斯守白公之信也，予之匡人于修齊治平之途，非左道之術耳。斯化也，雖不能與天地立心，與生民立命，與後世開太平，識者未必不知予心之輕重也。若夫予之神在天下，若日月之運于天，

予奪嗣祿職掌，文衡天下，小大事端，靡不該括。吁！回風返火既行之于往，雷勵風飛不能行之于今耶！咨爾天民，體予至意，立仁義于詩書之圃，策忠孝于廉讓之鄉，共躋仁壽，同樂太平，幸也。否則，恭行天罰，及悔何追？予忝膺重寄，恐負天子寵光，故此爲叙。

吾先奉玉帝敕，授以如意飛鸞墨跡于天地之間也，救末劫，爰命梓潼君也，今吾之九十余生之化，故命于勿于堅重校勘此文，今已周矣，請命於吾，親跋于後耶。

九十余生闡化機，扶生拔苦拯災危，證果梵迦如來藏，再出神文福他時。吾孝友也勿堅二生，吾文已就，重出斯寶如意持之萬里，古語云：千鍾馬金厥有名，一朵雲生脚下登，三天高臺入地去，一枝消息泄春靈。此中造化藏千里，可否人生在此中。二生知機否？緣事將成信有時，人能弘道復何疑。不因百尺樓工畢，爭得多生事跡垂。

典實任從譏銜耀，始終庶可見云爲。從今又被人間世，傳出清河百詠詩。

梓潼帝君化書卷之一

元命第一

混沌初分濁與清，東南分野景鮮明。中含太一氤氳氣，吾已潛符造化精。獨占辰宮雙女上，兼司火德五行情。率然自馱居荒落，脫蛻終期道果成。

吾本吳會人，生於周初，迄今七十化矣。

流形第二

遁跡靈巖不記秋，日光開閉自剛柔。吞霞滿腹無飢渴，養息潛真任去留。數足轉形歸孕乳，時來隨分事王侯。會稽勝地堪揚化，張氏生身世屬周。

予方遊人間，忽至會稽之陰，見一隱者，年五十許，具香燈，仰天而祈。時中春丙夜，天文煥爛，張翼二宿昭然在上，俯而聽之，隱者姓張，適符列宿，予於是生焉。

生民第三

北堂一夕夢吞珠，隱隱襟懷震肅初。厥月誕彌延穀旦，靈光克滿耀籟廬。

儼思不與羣兒戲，嗜學仍於百慮疏。耆舊相逢每相許，謂吾他日是鴻儒。

張氏出黃帝之子，名揮，始造弦矢，張羅網，世掌其職，子孫因以張爲姓，顯於吳。

易俗第四

吳因泰伯遺風後，一變民情似島夷。剪髮務從安澤國，文身將以禦蛟螭。性情不願隨時俗，冠履惟思習禮儀。始也親朋嫌矯飾，終焉鄉里翕從之。

予之鄉，剪髮而文身，蓋便於入水，而習成夷俗也。予既成童矣，心所不樂，乃尋冠履，自習禮文，內外莫不以予爲異。及其久也，從予而化者，十有七八焉。

稽古第五

三吳僻處在天涯，文物無稱少麗華。帝典未嘗傳遠裔，皇文那得到農家。幸因膚使傳縑素，頓悟卑情識制麻。從此一方絃誦美，區區風教已堪誇。

予鄉距京周甚遠，文物無稱。一日，有耆舊謁吾父者，口誦唐虞大訓數篇，曰：有中國使人傳此，予好之，就

彼習焉，隨口記授無遺，於是邑人願學者從予習之，皆以予爲師。

奉真第六

寂寂茅茨晝掩門，行人稀到水邊村。深耕偶得黃金像，久瘞猶纏紫葛根。不忍鉅鎔虧體質，聊將焚獻度朝昏。送歸海嶠禳災疹，一境生靈賴庇恩。

予之居事畎澮，忽於鋤下得一金像，頂冠如崇山疊聳，被服如霞綺舒麗，紺眉月面，儼然慈祥，憑几巍座，荷花爲臺，高尺許，重鈞餘。初未知爲何神，詢之故老，或曰元始天尊像也。昔夏禹理水冶金爲神，用鎮方岳，豈此像之類乎。吾家素貧，雖迫於衣食，而不敢起鉅鎔之心，一日，海風翻浪，遠邇奔駭，非人力可支。予謂衆曰：家有金像，得之儻來，今爲衆捨之以祈海，若泊于安息，乃率衆乘高以像投狂瀾中，俄然風止潮迴，一境獲免。邑人以是爲德也，皆以糗糧布帛見謝，拒之不能，自是温温然家道苟合矣，異時記憶投像之所，蹤跡之，沙磧有光，掘出舊像，仍載歸，築宮室安奉，邦人敬事之。

寧親第七

母氏劬勞歲月深，風寒暑濕久相侵。醫巫診視皆無效，針灸頻仍殆不任。剔股和羹償宿願，吮疽出血本誠心。分明夜聽天神語，一紀延生表至謀。

予既冠，母氏六旬矣，少時勤於織紉，飲食失時，嘗致疾疹，逮此衰暮，重之以六氣所淫，遂成大苦，疽發於背。始以巫覡祈禱，中更醫工，砭劑月餘皆不效，予不離卧內，日夕省視，未嘗解衣而息，計窮矣，乃爲吮疽，出大膿血，疾少間，醫曰疽根附骨，未易出也，越三日復吮之，忽覺口中充滿，吐而視之，有膜如綿纈，膿乳如米粒，母氏漸安。而以病欠食，少復成羸瘵，醫曰此痼疾矣，以人補人，真補其真，庶可平復，予因夜中自剔股肉，烹而供之，忽聞空中語曰：上天以汝純孝，延爾母一紀之壽。翌日勿藥，果符神言。

幽婚第八

婚對由來不等閑，此生期遇是前緣。靈骸不朽如相待，清夢重遊豈偶然。嗣子已堪傳後業，芳魂俄復掩重泉。

壯年頓絕陰陽事，衆議稱予骨是仙。

吾少也賤，性靜而寡合，年逾冠矣，未有室家，非特良媒之不至，抑亦予無好迷之心也。嚮因母氏嬰疾，以未見孫息爲恨，予亦有不孝之憂。一夕，夢至林麓，孤塚巍然，旁有一門，一女子靚粧而坐其中，顧予而語曰：君非張善勳乎？予訝其以名見斥也，請其由，女曰：妾與君雞犬相聞，乃仲氏也，曩者，妾之叔父與君家會，談君之美，以爲好學尚禮，古君子也，議以妾歸於君，吾父以君貌寢而難之，然妾之慕君心已一矣，後許於鐘安孺，鍾富家子，而清議無聞，妾心恥焉，由此得疾而終，今三年矣，妾之來此以君之故，君曷爲我圖之。予悸而悟，月餘再夢如初，暇日因與友人儀堅成縱步尋幽，忽至一所，宛然夢中境也，方告吾友，共訝之，塚中人出呼予爲郎，蓋夢中所見者也，儀實仲之舅家，因走告仲氏之父母，迎女以歸，卒爲婚姻云。

淵石第九

春光淡淡景遲遲，春水溶溶淺且漪。

羅綺岸邊搖倒影，神仙衆裏悟前知。白文細篆成淵字，青石圓形似小龜。生子立名符感兆，貴知天與自無私。

仲氏婚三月，鄉人士女已嫁而未孕者，相與臨神潭摸石，得石者宜男，得瓦者宜女，蓋舊俗也。仲預遊人中，吾母謂仲曰：潭水靜深，黝然莫測，宜從上流淺處求之，仲方徘徊，潭中忽起花沫如吹，仲以手捫之，得一石，大如雞卵，六出如龜狀，青而白，文隱隱如淵字，意感而有孕。既生子，名之曰淵石，方齠齔，仲忽告予曰：吾兒真如君耳，宜善視之，妾與君世緣盡矣，語畢而逝，予乃不復再醮。

馴雉第十

天摧地裂情堪擬，荼毒無門救二親。負土培墳酬怙恃，寢苦枕塊益悲辛。黃泉路隔嗟何及，白雉情傷亦自馴。禮制三年情罔極，節哀于以率中人。

予年三十有六歲，在作噩疫毒流行，人無免者，鄉邑蕭條，路無人跡，予父八十有五，母七十有三，盛暑中，皆得疾，同日而逝。於是自持畚鍤以營

大事，乃於路傍倚廬枕塊，以終三年。常有白雉一雙，棲於林上，每遇祭奠，飛鳴而下，俯仰咿啞如欲言者，及終制而去。

回流第十一

壘築墳崗不憚勞，何期平地發波濤。松楸欲變無何有，棺槨猶憂不可逃。大洞仙經除厄難，真金聖像鎮鯨鰲。秋霖已霽湍流息，喜見平田廣且高。

予考妣墳岡，去居之南止百餘步，蓋一時忽遽，卜之云吉，自以爲便於省視，初不遑他恤也。葬之五年，墳西三十里，洪水暴發，平陸成溪，以墳爲岸，水源不竭，勢頗峻急，吾心懼焉，欲改葬之，無及矣，乃齋戒守墳，日夜誦《大洞經》不輟，併取家藏金像而嚴事之，泊於無虞。次年秋雨霖霖，傍溪湧漲，數流爲一，吾益恐，及水落視之，則墳前溪谷變成堅隴，廣一里餘，自是松楸無害矣。

降瘟第十二

雙親之死爲瘟災，切骨銜冤痛且哀。生續恩隆情不匱，幽明路隔憤難開。

神兵執崇明中現，法籙傳真夢裏來。落筆成符救民瘼，豈容五鬼暫徘徊。

予之二親皆死於瘟，時暑嬰毒，荼苦滋甚，每念瘟鬼之酷，恨之切骨，而幽明路殊，力不能報，心嘗怏怏焉。比因墳岸回流，實自《大洞真經》金像之力，於是益勤持誦而敬事之，洎獲陰祐以治瘟鬼。又三年，忽夢所事金像語予曰：《大洞仙經》爾熟記矣，《大洞法籙》爾未見也，今當授汝，以治邪魔，非惟可以契汝初心，亦可佐天行化，助國救民也，袖中出書二，予百拜而授之，既覺，書在枕前。其一曰《大洞籙》，又

一曰《大洞法》，因開籙書讀之，至天驕甲卒一萬人度之句，忽風雷晝暝，金甲朱綬者無數，列于予前，俯而請命。三人持紅旌立於衆先，白予曰：願聽使令，予方恍惚不覺，厲聲謂之曰：吾令汝等治瘟鬼，此鄉某家闔門病瘟，爲吾驅來。語畢，一持旌者，領百餘人入其家，俄頃，執鬼使五人出，有蒙虎皮者，冠雄雞者，貌若人者，若鵠頭者，若驢頭者，所執者，水火羽翼斧鑿之具。予

怒而叱之，將滅其形，彼乃有辭曰：弟子等歲運所生，歲氣所成，所遊有方，所病有人，陰譴重者受其災，天命絕者致其死，亦非弟子等敢私，若蒙真官賜以寬貸，此後願聽約束，遇有行瘟，見真官符籙所在，即不敢至矣。予因依法授以教勅而去，閭里有病瘟者，予與之符法，皆得全活。

好生第十三

風寒暑濕因天變，飲食興居病在人。黃帝脉經詳子母，神農藥性辨君臣。撫摩針灸隨輕重，補瀉推移有故新。但得天民無橫夭，勤勞不恤此心真。

予以法籙救人疾疢衆矣，遠近之人踵門求治者，不可以數計，其有染瘟病者，著邪祟者，受瘧痢者，逢殃魂者，遭鬼擊者，兇神者，惡氣者，一一全活。然有臟腑冷熱虛實之不齊，飲食起居勞佚之各異，或因喜怒哀樂而感於內，或因風寒暑濕而受於外，此皆岐伯神農氏之學，非道家法籙之事也。人有懇於予，而不能全其生，予實赧然不足，於是講究脉理，翫味藥性，討論五

行之勝，復習熟九針之法，迎隨勤苦六年，始達其妙，自是天命未絕者，無橫夭矣。

天宮第十四

作善家庭祇自憐，不期聲譽乃喧傳。名聞王國心無愧，位列天官事有緣。六氣和平方晏粲，萬民疾苦易安全。當年稱職吾何力，君相明良化使然。

予活人衆矣，聞於君上，方以砭劑爲事，而又爲京周所知，駟召至都，既以國君所薦，又歷試之，以予爲醫師，掌萬民之疾苦，隸於天官，予甘心焉。於是教戒徒屬，使勤其業，蓋成王之世也，時其王畿豐稔，六氣和平，民少扎瘥之疾，良由上德之所致，使予得以稱職焉。

薦賢第十五

人之有善如吾有，已達仍思未達人。大智潛心能創物，妙方治疾可通神。推賢汲汲誠無隱，自代區區意本真。奏徹宸聰蒙上賞，驟陞諫列作臣鄰。

予之屬，有瘍醫公孫智叔者，賦性慈悲，而記問詳博，深明百藥之性味，

創造丹砂、雄黃、礬石、磁石、石膽，爲五毒之劑，其說蓋取丹砂養血而益心，雄黃長肉而補脾，礬石理脂膏而助肺，磁石通骨液而壯腎，石膽治筋而滋肝。外療瘡瘍之五證，內應五臟，拘之以黃整，熟之以火候，藥成傅瘍無不神效，乃以其法著于世。則予自以爲不如，而彼居予下，因舉智叔自代，使兼予職。無幾，上躬不豫，鬢有疽生，一夕訶潰厥，勢危殆，以前藥傅之，應手而差。於是智叔始有醫師之命，以予直情無隱，所薦得人，宜膺上賞，遷爲司諫。

格非第十六

太醫活國利非輕，暝眩輸忠政乃成。形迹相忘疑自釋，樞機不密禍由生。微言忍使彰君惡，削藁何妨隱直名。但得聖朝無過舉，不辜榮祿是真情。

王若曰：咨爾善勳，直情無隱，朕念良醫活人，大醫活國，今實爾言路，以旌汝賢，汝其以救疾之心救正吾失。嗚呼！惟良藥苦口而利於病，忠言逆耳而利於行，爾往欽哉，毋易所守！予

三辭而後受之。既預七人之列，日近清光，雖君相聖明，無大過失，而予愛君憂國之心，一步趨，一食息，未嘗少懈也。成王幼沖之時，聽政于周公，及親政事久矣，嘗有不平之語，予恐左右得以乘間也，每以君臣始終禍福幾微爲戒而諫，草屢焚人無見者，故公之東征，雖有四國流言召公不悅之隙，而終能保全，蓋予亦少有力焉。

榮歸第十七

十年廝仕拋桑梓，一旦榮歸復里閭。嗣子叩童驚弁服，田園蹊徑訝丘墟。遊仙夢覺空勞擾，涉世情疏自卷舒。

再識北窗春睡美，任從鷄喚五更初。

予在京周十年，久違桑梓，倦翼思還，每念怙恃無恙，時身在草莽，及所天既失，乃受榮祿，雖食稻衣錦，何樂之有？一日，見周公鷓鴣之什，惻然有感，於是起歸歟之興，告老乞骸之請數上，始從其欲，公卿士夫設祖席東門之外。既歸，里人迎候，予乃自近郊舍車而徒，鄰曲以予爲榮。

敦宗第十八

宗人本是一根生，貧富誠難較重輕。祿廩倘來何足吝，親朋至此若爲情。死生並與周婚葬，俊秀仍須爲作成。他族聞風喜相倣，三吳漸有義莊名。

張有數族，居多貧婁，予歸之後，徧求訪之，幼者已壯，少者皆老，生死榮悴，惻然可驚，其貧不能自振者猶故也。於是興起義莊，以淵石主之，貧困者周給之，病者醫藥之，男女成長者婚嫁之，子弟俊秀者教養之。他族聞風，翕然相倣，義莊滋廣，習俗成美矣。

歸寂第十九

聞說西方大聖人，苦空寂滅以爲真。行歌自信浮雲喻，坐想徒勞夢幻身。得訣坦然超彼岸，忘言聊以谷吾神。從茲始悟歸根理，南北東西任屈伸。

予之在朝也，聞方外之言曰：西方之國，有大聖人古皇先生者，不言而自化，無爲而自理，以慈悲爲主，以方便爲用，以齋戒爲常，以寂滅爲樂，視死生如朝暮，等恩讎如夢覺，無憂愁忿憤之情，蓋知浮生不久，求於無生者

也。予嘗慕之，及辭榮而歸，道逢隱者，行且歌曰：朝陽之暎，觸石生雲，初焉髣髴，已而繽紛。隨風而出，蕩漾無垠。俄變化以歸盡，杳不知其所存。伊仕者之利祿，忘其勞而駿奔。忽暮景之見迫，向大限兮逡巡。將投足於幽趣，爲異類兮芸芸。予聞之始也，駐車而留聽，少焉憑軾以敬禮，終乃下車而泣謝，謂之曰：適聆妙理，深契愚衷，願惠格言，以度殘喘，乃於通衢百拜而力懇之。行歌子仰天而嘆：指予以心印，授予以正訣，曰：此西方大聖古皇先生歸寂法也，子能念而習之，可度生死，死而不亡，證無量壽果，終於彼岸，則可成正覺，中道而廢，則猶能擇地而處，可爲神仙。予授教焉，於此塵緣既畢，百慮頓灰，時丁灑秋會，集親友留頌而逝。頌曰：秋風瑟瑟，秋月白白，吾得之真，知身是客。

君山第二十

君山一境最清幽，鶴馭徊翔爲少留。
湖景昏明從晝夜，林光疏密任春秋。
無身不顧千年藥，有道誰貪百里侯。

極目煙波供受用，飽聽欵乃看夷猶。

予既遷化，將往西方，適至洞庭君山之上，愛其勝境，因少留焉。于時上無君相臨制之威，下無血屬係累之念，超然物外，獨往獨來，水光山色，四時可愛，吟風嘯月，此樂何窮，追思前事殆一夢耳。方且仙遊，勝侶朝夕往還，不聞塵境之勞生，但見洞天之真逸。久之有二青童自天而下，敬宣帝旨，以予爲君山主宰，兼洞庭水治。

梓潼帝君化書卷之一

梓潼帝君化書卷之二

感生第二十一

神識君山歲月遙，洞天深邃絕塵囂。
偶嗟涕泣無從出，已覺悲魂不可招。
奪舍投胎緣未足，拖泥帶水恨難消。
玉壺不肯藏春住，漏泄陽和見柳條。

予在君山久矣，一日春水初生，湖口有大舟艤岸，刲羊醞酒呼號而祭者，甚罄哀婉清切，予聞之不覺情感，迫而聽之，一婦年三十餘，體有金光，三酹而祝曰：良人不幸得罪於君，遠竄南荒，死於瘴癘，家鄉萬里，旅櫬言歸，日月不居，行將卒哭，重念家無兼侍，堂有二親，有子在腹，未形兆朕。若山川神靈察我夫君以忠獲罪，憐我姑嫜暮景無依，今臨蓐有期，爲垂陰祐，使得一男子以續張氏，則妾之性命雖不保，猶無憾焉。予在雲路中不勝其悲，涕泗從出，忽身墮婦懷，懵然無覺，久之，聞人語曰：是兒是兒，予開目視之，身在浴盆中，蓋已生矣。

奉先第二十二

厲王監謗衆心離，先子忠言履禍機。流彘早知將易位，逆鱗悔不聽防微。錄孤聖澤曾無間，美謚英魂更有輝。徑陟諫垣承世職，人言有子可傳衣。

皇考諱無忌，歸葬河朔，母黃氏，慈祥明辯，篤于教訓。凡乳哺偃息寤歌之次，必以詩書言語，誘習鄰兒，與予嬉戲，則以泥土繒帛，結束設像，以爲古人稱揚故事，或爲君臣朝會，或爲父子告戒，或爲師徒訓勵，或爲朋友接陪，每事指陳，俾予曉習世故。十歲，使就外學，名予曰忠嗣，追先志也，既長而冠，王父平子字予曰仲。母氏嚴三加之禮，西序答拜，因泣謂予曰：爾父曩事厲王，爲保氏，掌諫王惡，而王性多忌，恥聞其過，諫者必誅，久之，至於監謗罪，死者衆，道路相語以目，人不堪命，百姓離怨，乃以疏告王，願王改行，除誹謗之令，以通下情，王不聽，於是流於番禺，既而不祿，天下冤之。今王仁政，詔先朝臣子死以非辜者，咸錄其後，汝其往哉！予乃詣京師，登肺

石以自明，有詔追復皇考官，謚之曰獻，法曰忠必告上曰獻，仍以予爲保氏，奉先臣之職，宣王之時也。

孝友第二十三

長兄不幸身無後，同氣由來本一枝。母氏悲傷情有感，楸陽立繼理爲宜。北堂既慰慈親念，幽壤終爲死者知。喪禮盡於王父母，揚名孝友顯當時。

予兄允思，不幸早世，弗及見之。予年既壯，有二子，長曰然明，次曰楸陽，楸陽早惠，見憐於曾大父，長至之前夕，家廟祭奠，予母哭之哀，言亡兄絕世，予請以楸陽繼之，俾承其後，以慰母心。王母趙氏八十而終，王父以哀廢食，莫亦不起，予以孫承子服，斬衰三年，哀毀盡禮，聞予中外，時以孝友稱予字而不名。

沔水第二十四

猗歟吉甫氣飄飄，勳望才猷冠聖朝。經武緯文心固美，征西伐北地方遙。鎬京飛語興讒謗，沔水聲詩託諷謠。君宰相歡功烈盛，賴予忠諫息言妖。

王有賢臣尹吉甫，文武兼資，縉紳

所慕，國家中更版蕩，四夷交侵，及王即位，北伐西征，以復文武之境。吉甫任專鉞之命，惟予與王居，吉甫居多，略而忽細故，王之左右多不悅者，於是讒譖迭興，王亦未免於疑，方其在京，有飛語聞上，予爲多方解釋，意猶未明，予爲歌沔水之什，王聽之，泊吉甫歸，功烈既成，君宰膠固，中興之績，視少康高宗爲優焉。

白駒第二十五

聖慮憂勤既有初，一朝德色沮嘉謨。賢才遞去嗟黃髮，詩什形容詠白駒。束帛自茲通下國，羣英俄復集東都。皇家招隱興王化，良自忠言勸用儒。

王以大業克濟，普覃異恩，陞予爲大夫，于時四方無虞，玉心^①少怠。一日，師氏韋仲將誅章方上，天威肅震，實韋于理。於是道德之士，老成之人，有翻然而去者，予心憂焉，乃作白駒之詩，以爲譏刺，勸王留意賢才，寬容受諫，使在位者無去志，已去者冀其來歸，隱迹者期於願仕。詩聞於上，上意感焉，於是詔告在外，責躬悔過，復韋

之職，束帛弓旌，日遣無虛，未幾，清議歸美，士風藹盛，天下復見成康之化矣。

舉讎第二十六

先君飲恨在黃泉，在禮讎家不共天。已死風成無所及，後人温叔乃爲賢。只知所舉惟才日，豈憶無辜被譖年。上亦昭情知此事，何妨中外任喧傳。

先人之死，蓋出於南風成之譖，朝之所悉知，終天之痛，予亦未忘，風成死久矣，有子名温叔，有才而賢，嘗以國子隸業於韋師氏，予以問韋，謂予曰：風成之子好學無厭，語言可法，容止可則，當今貴遊子弟中未有也。天道難知，不意風成青蠅之行，有子如此，蓋瞽鯀生舜禹之比，他日必爲大器。予雖有不共戴天之隙，而聞其善行，心嘗悅之，予既升大夫，保氏闕人，詔許舉所知以自代，予薦温叔，王聽之，卒善其職。

恤孤第二十七

壽夭前途不易知，仲將方艾遽傾危。一身永逝嗟無及，五女皆孤益可悲。

納采問名如父在，執羔奠鴈及婚期。死生不變論交日，泉下幽魂亦展眉。

師氏韋仲將與予爲聯事，相知且久，一日，官車夙駕出于虎門，仲將欲有所陳，既前而却，忽偃于地，衛士掖而起之，蓋已奄奄矣，歸而告殂。韋氏無子，唯女五人，長者以寡而歸宗，次者及笄而未聘，幼者已十五，韋以忤於王，暴卒禁中，既無卹典，五女何依，予爲備禮而嫁三人，其二幼者寄養于司諫高之量家，俟其長也，納爲然明、楸陽之婦。

慈訓第二十八

守志當年正妙齡，期頤耳目尚惺惺。緣深不惑旁門法，心著常持內觀經。花落花開根永在，月圓月缺體空靈。臨終切切垂慈訓，證位仙階達杳冥。

母氏早年守寡，享壽百歲，而視聽不衰，蓋由平日常持《內觀經》，紬繹意義，晚有所得。一日予方朝退，趨而過庭，呼予而坐，兩孫侍立，喟然歎息曰：吾與汝因緣相際，得爲母子，汝且華顛，吾老可知矣，我念人之在世，生

滅無定，暫來還去，如虧盈月，如開謝花，今世之生，乃前世之死，前若無死，今何以生，今身之死不明，後日之生豈保，若解知身是妄，直須謹守真常，但能性定命堅，所謂曠劫不壞，有功行者超升上境，無惡業者不失人身，忍於夢幻之中，莫結冤讎之果，吾將永逝，勿用深悲，臨別之言，切須專聽。語畢，儼然隱几而逝。後再以童女得道，乃生天上，是爲妙慧真人。

盡忠第二十九

奪哀變禮從王事，爲感君恩念舊臣。切諫區區還不聽，忠懷歷歷竟虛陳。青宮本乏元良德，白首羞爲諂媚人。盡節龍泉吾不恨，尚憂周道寢沉湮。

予有齊衰之憂，上旨奪情，辭者再三，不得已而從，事禮之變也。王即位之久，倦於政事，一一勳舊，如尹吉甫、召穆公、南仲、方叔，或以病廢，或以物故，惟予爲老臣。上初以宮涅爲太子，予力諫之，不能移其愛，卒立之，及王棄社稷，嗣王親政，淫酗暴虐，予又諫之，王以予侍先朝之舊，且憾前疏，怒

形于色。予乞骸家居，一日，有使賜酒，予拜受之，飲畢有後命，予雖盡忠於國，初不以一死亂吾之真，然尚憂周道不振，有失文武之基緒爾。

棲真第三十

再出頭來事愈多，幾回歡笑幾悲譎。忠誠憂國嗟無及，直語逢嗔可奈何。遠望松楸增白髮，悔貪祿廩受丹科。雪山一境非塵世，來此棲真得也麼。

予生於斯世，而堅守古道，既有言而不用，又獲罪焉，魂無所歸，情猶不已，哭于宮闈者三日。王聞之，以予爲妖，乃命庭氏率其屬以弓矢望聲而射之，予無身矣，射予何爲。於是望故家而覩甚，辭王國以遠遊，一意西方，歷岷峨，背井絡，蜀之西陲有山名飛越，予以先世生於吳會，與越爲鄰，俯而察之，名同俗異。又望西極一山，高廣殆百餘里，盛暑之時，積雪凝寒，非塵境也，山神白輝曰：此名雪山，往昔多寶，如來修行於此，八年得道，又西極真人久住于此，因而證果，大夫仙風凜然，曷留于此。予聽而止焉，無幾，帝

有旨，以予爲雪山大王。

山王第三十一

北違京鎬千餘里，西望岷峨萬點山。榮辱已拋羅網外，是非不到水雲間。力誅白虎遺星石，匣鎖青龍瑩月環。南面稱王朝百里，有煩帝旨爲重頒。

予方留雪山而被大仙之命，旋有旨，以蜀門旺化，乃反鶴馭而來東北，見萬峰青單，絕境可愛，久之，山神公元長等五人來謁予曰：某等職隸于斯，近見真官神鋒峻嚴，日有光芒，聲效之音震響巖谷，豈天人乎？此間自武王伐紂，微盧彭濮諸國之長，佐蜀君主，大軍北向，寔經于此，逮今三百餘年，路僻人稀，未有貴顯者來，真官勢焰如此，幸示其來。予告之實。山神曰：某等亦獸人間，遊於斯者也，此山隸蜀帝所治，名之曰劍嶺。其勢北距終南，西接岷峨，南通邛徠，東挹巴蜀，廣袤周而殆千餘里，此山爲要地也。自山王白峰圭託孕爲蜀王太子，且百年矣，居未有王，真官既聖人之裔，清明在躬，積德累行，忠孝全節，神遊於

此，行藏有數，宜少休焉。兼劍嶺之下，近有白額大獸，千餘歲矣，負此山隅，以人爲食，真官既嘗爲天子大臣，則山川之神皆嘗所治者，又玉音來此，自可號召羣靈，呼吸變化，役遣幽陰，驅除此虎，亦助天好生之事也。予信之，乃矯宣帝旨，召集千里之內山川鬼神，咸來聽命。謂之曰：帝有玉旨，以白虎害人命，吾爲此山王，董爾衆靈誅滅之，用命者世享血食，否則天有威刑。衆曰：唯謹聽令。予乃仰觀周覽，現相變化，自見身與山等，拔一孤竹，叱化長劍，屏翳號風雨師清道，揮刃一呼，響振山谷，虎亦怒氣成雲，目光出電，跳梁反復，吾身當之，衆力併前，斃於刃下。又於血汗中，獲一圓石，狀如墜星，公元長識之曰：此虎威也，予佩之，百神攝畏。功成，因奏帝，先陳矯詔之愆，次及均功之語，帝因以予爲蜀北門山王。

刑賞第三十二

幽明政治雖殊異，平直存心理則同。孫滌銜冤堪雪恥，宜肩力孝未酬功。

嚴刑不恤答魚背，保奏終期徹帝聰。
小大神靈皆敬畏，清明天地蕩皇風。

予既即真爲諸山之王，凡所部山川，水旱豐凶，妖祥功過，皆得預聞，而平治之。青黎山神高魚生部民孫滌女方婚之夕，魚生悅慕，因拘其魂而亂之，爲鄰封白池龍神所察，予覘之，與女俱訊，既伏其辜，歸其魂，女乃甦，鞭魚生背三百，黜其職。山下有故孝子吳宜肩，嘗爲父疾，刺血寫《楞伽經》四卷。壽終五年，未有所受，予爲保奏，以代魚生，帝報曰可。自是小大之神，咸知敬仰焉。

存褒第三十三

褒侯以女媚幽王，王寵褒兮壞紀綱。
黜子屏妻天所馱，誅良虐善鬼爲殃。
岳靈遷怒情雖快，褒國平民理可傷。
奏達上穹符允報，遺黎仁壽遂延長。

幽王始娶申侯之女爲后，賢而有子宜臼，嫡且長，仁孝之風見於岐嶷，及褒侯以嬖進，遂寵嬖而疏后，尋以嬖有子，乃廢申后，以嬖代之。嬖生子，王名之曰伯服，意謂伯者，上無長也，

服者天下咸服也。於是逐宜臼，立伯服爲太子，大臣諫者九人，悉族之。穢聞於上帝，俾西嶽爲孽，以警於王，山川鬼神從而不寧，三川皆震，山摧水壅，勢皆逆流。嶽神者，蓋白帝白拓矩之降靈也，從而遷怒，移檄漢沔，褒斜山神欲埋褒邑，褒與蜀接境，予訝其太甚，即上奏，言褒侯固不足卹，國人何辜，請赦之。有旨言：金天之神擅檄所治，薄責之。褒邑之民免於埋壓，厥後犬戎伐周，棄漢沔褒邑之地於蜀，皆帝意也。

回風第三十四

惡人行惡自招凶，孝子嚴親意不同。
爲食成讎情已甚，回風反火勢方雄。
滿懷俠氣猶能吐，刮面狂飈訝自攻。
留與世人爲鑒戒，要知聰直現神通。

劍嶺之南，民李轅孝於母，薄暮有客投之，轅方烹鷄具食，客以爲相館，喜形色，言少頃，食至，乃脫粟飯也，客不舉匕，轅曰：家有老母，病起思肉，適之司晨不及供客矣，客赧然，揚袂而起曰：汝以予爲未嘗食肉耶，不揖而

出。夜闌上風縱火，以燼其居，時方歲寒，草木黃落，煙焰蓬勃，勢不可嚮，轅負母而出，向天呼號。吾適遊其上，大不平之，因吹氣成風，使虐焰自反，客執燧猶在手，燎其眉鬢，欲走而迷，顛仆火中，僅脫其命。訊之則曰：某俠士蒲光度也，今夏緣都人士女浣花嬉遊，有友因醉而觸良家，爲人所辱，濱死，某以解紛之故，投入水中，幾欲不救，訴於有司，於是亡命，周流半載，昨實餒，甚心怨於子，方蕪草時，如有人叱之，火及子家，而爲風所讎，今即死矣，不作無名鬼，因告之，語畢而殂。

明冤第三十五

須知人命重於山，莫把疑刑作等閑。
毛氏喪身尤未雪，良能濫死豈容還。
騰魂附體明冤獄，執賊求情伏巨姦。
義敏一言其利博，享人血食免慙顏。

踰劍之北三百里，龜山之下，民何志清有男無方，娶魚山侯釜之女，逾年，釜得疾勢急，女告於姑，請以歸寧，許之，與其夫偕往。至中途，記憶奩篋中有黃銀耳璫二垂，欲持以隨，備父急

難，行速而忘之，欲歸以復取，則日西矣。俄無方之弟良能，踵後而呼，携耳璫至，曰：婆有不豫，遣我呼兄，且令附嫂所忘之物，兄嫂至姻家，則兄可先歸，婆已顛望矣。無方曰：弟與嫂行，吾將歸以省母氏，無方既別，移時，侯氏悔曰：妾家不十里可到，無勞叔相從也，良能信之，遽與嫂別，既還而夜深，翌日，侯訝其女已約而來遲，遣人逆于路，乃見女死而無首，釜疾革而亡。其家告於所治，何氏以幼子而鞠之，月餘獄成，良能自誣，別兄之後，逼嫂以非禮，不從而殺之，其首不存，殆爲虎豹食之矣。將就戮，良能怨泣，龜山之神義敏來告，予察之得實，蓋有強賊牛資妻毛氏，有所忤資，路逢侯，劫而逼之，取侯之衣與毛相易，毛與侯年相若也，梟毛之首，携侯以歸。予爲追毛之魂，附資之體，藉資之口，吐毛之詞，自陳而得實，資赴於理，女歸於侯，良能免焉。

苴邑第三十六

合靈最貴莫過人，不易修持得此身。

既會胞胎當愛護，却緣衣食使沉淪。伊予幼幼情何異，天地生生本自均。從此一方風俗變，刈蘭凶釁免傷神。

劍北里里折而東之，兩舍之餘，有邑曰苴，饒地濟人貧，編戶有子，甲則蓄之，乙則或否，至于丙丁，則不舉矣，蓋嗇於衣食，以便目前，而不恤其後也。張千十富室也，租其田而食者八十餘家，授田之日即有約，舊有男子，力能耕穫者留之，厥後所生，斷不容留，率以爲常。千十有二子，長者有廢疾，不任事，次子三歲有癩，醫卜巫禁，皆不能治，禱邑之神公孫掌，十日不解，掌告於予，請救之，予從焉，詢其所以致殃之由，蓋前後租民，不舉之子四十有奇，冥漠無歸，共爲祟焉。予夢其妻李氏且言之故，李氏雖言之，千十不悔。予乃遣功曹荀明傳予之言，使幼子言之，曰：棄人之子猶吾子也，愛汝之子猶他子也，汝貪人之力，惡人之冗食，以耗其穀，今四十餘命迫於汝，子行且死矣。千十自怨自艾，叩頭出血，請命於予，予爲戒之，使改其行，千十

從之，其子乃安，自是一邑之人重惜人命，生齒漸蕃矣。

拯溺第三十七

秋雨霖霖久不休，三江相合勢同流。鏡潭壅溢深無極，城雉傾摧急可憂。白馬遺黎誠善俗，黃高仁政乃賢侯。栢堅一喝波濤息，誰謂驚湍敢敗舟。白馬之邑，有民八百餘所，都當三江之口，秋雨霖霖，三月不止。東北二谷與江俱漲，咽於靈崑峽口，卒不能泄，波濤泓浸，居民昏墊有魚腹之憂。邑神栢堅來告曰：白馬小邑，舊爲民屬，今附庸於蜀，邑侯黃高仁而愛人，乃者天作霖雨，害其粢盛，三江環合，邑人之命不保。予以封疆所治，與堅俱行，既至，則水勢壅溢，比常十倍，民人擾擾，若蟻移穴，城雉所存，十有五六，幼者携持而不達，老者棄置而待斃。于心閔焉，於是以栢堅傳帝旨，敕水潤下，俾安故流，今所謂喝河神者是也，自是一邑之人，數千之命，免於沉溺之患矣。

雨穀第三十八

人言陰德如何種，舉事先存爲衆心。
許氏賑飢將竭產，羅家閉糶不容針。
積而能散天之道，富乃成貧鬼所侵。
一死一榮端有謂，蒼蒼造化意何深。

巴西大邑，富者百有一二，貧者力作度日，蜀帝初立，歲大荒歉，帝雖奉養菲薄，勤心爲民，而德馨未著，餘殃未衰，巴西之民死於阻飢者尤甚。邑有富農羅密閉糶，而義士許容竭產賑貧，來者無窮，力不能繼，終日炷香祈天請祐。邑靈和來孫以告，予奏上帝，有旨取羅密所蓄之穀，凡五千斛雨之，予乃敕喻風師發羅之屋，穀隨風旋，自空而雨，各以色聚，徧於郊衢，一邑之人無不飽飫。羅之蓄藏，一日而盡，邑人感許之惠，往往酬還，幸羅之灾，從而稱快，蜀帝以容爲邑佐，密聞之自縊。

曲雨第三十九

苴郊之北巴江西，中有龍山險可躋。
民質素來全孝敬，歲荒久已望雲霓。
曲施嘉澤成秋實，免使遺黎病夏畦。
自此遷居來者衆，老人扶掖幼提携。

苴邑之北，巴江之西，有龍山焉，

龍山之下，所居民三百戶許。蚕帝之初，全蜀亢旱，邑神蘇公長不忍遺黎死於歲凶，引咎自責，曰：臣所部民少壯力作，老者休息，非不孝也，征徭不憚，未嘗敢怨，非不忠也，春耕夏種，冬祭天地，非不敬也，視田之美，晝以方隅，許爲粢盛，既有所收，不敢先嘗，非不順也，有民忠孝敬順如此，而旱暵爲灾，曾不我遺，是臣之罪也。吾爲達天聽，有命許地祇自理，予乃併苴饒之工，借巴江之水曲施雨澤，三日而止，一萬^②有秋，邑人名鄉曰嘉澤，他居有遷來者漸衆矣。

殞賊第四十

孝婦劬勞爲養姑，水清一志念元夫。
鉛華不御從人訝，針指爲生乃自娛。
禮葬哀深方復祭，愚民白晝輒穿窬。
不惟正節蒙神祐，兼示貪殘被鬼誅。

漢水之源，孝婦曰楊靚中，衣冠之後也，適寒士雍有章，有章早世，靚中矢言不復他適。及囊篋罄空，家無兼侍，姑老且病，媒灼日至，靚中曰：人

之所慕，色與財爾，妾家貧素，方丁大禍，今好速之心不已，意者以妾年齒未衰，氣血尚盛，身無惡疾，唯此爲速爾，妾豈忍棄臨年之姑，忘結髮之夫，革面而事他人乎！針指小巧，素所不汙，爲人縫緝浣濯，粗以自給，妾與姑老甚不得已，則待姑百年，改卜未晚也。乃自斷髮喪面，不御鉛華，以婦功自給。如此六年，姑死，禮葬之，三日復祭，里人助者百數，有賊乘其出，踰垣啓鑰，盡携所藏，靚中未知也。家有土地白致一，與邑里正神康潮生欲治之，適會予來褒中，就以此報，予遣陰兵三十人，執賊于市，舉揚所竊歷告于人曰：此節婦楊氏之物也，當還之，已而舉手向口，自嚙十指盡而死。

北郭第四十一

人之嗣續貴非輕，只在心田種果成。
欲速區區還是拙，招尤累累豈能平。
栽培卉木姑爲喻，周卹孤窮俾用情。
貢子承家號神保，乃知報應自分明。
蜀都北郭民王尚忠，富而無子，行年四十，心憂而計，速廣求妾媵，終無

所出。又取本宗之子以爲繼紹，然資性險急，妾媵小不如意，則鞭笞之，轉易之，養子有違教訓，則復逐之，用心愈急，爲計愈疏，歲月因循，行將半百，於是大設供具，延請羣望覲祝，巫覡月餘不已。予因化一居士，語之曰：栽

植桃李，既培壅之，又灌溉之，日月未久，剔其枝葉，以冀速長，復移其處，加以糞壤，時令未至，撥其根莖，視其堅否，見其種植，枝葉潤茂，又復取之，棄其舊土，又復移易，用心過勤，終不成實，可謂智乎？曰不可。予曰：汝之求嗣，何以異此，吾今勸汝，寧汝心身，改汝前行，寬人之力，容人之過，婢妾可蓄者留之，不可者嫁之，宗人子既捨所生，呼汝爲父，堅汝初志，略其細故，汝室有子，勿萌棄心，脫人之死，濟人之急，周人之窮，恤人之孤，一志行此，聽命于天，若此三年，當有善報。語畢，而隱形不見。尚忠信之，以爲神告，厥後嫁婢一十三人，所養二子皆爲娶婦，指授別業，使爲久計，葬貧人父母五十餘喪，成貧男女八十餘婚，三年

之內，果獲貴嗣，名曰神保，長而克家焉。

返火第四十二

兄弟從來本一支，如何鄰壤便相關。苴侯邀利情難測，蜀主淳宗自不疑。烈焰亘天方可畏，雄風刮面返遭危。空中明語垂端的，始信神祇不可欺。

蜀王魚鳧，有弟葭萌，封之于苴，是爲苴侯，久之，苴遣使求賄，蜀王不應，於是遣人焚蜀府庫，火勢孔熾，予聞之，命風師返火，明言苴之無道，須臾，苴之行人皆死於火，自是苴蜀交攻者三年，竟不勝蜀。

平苴第四十三

苴侯立國號葭萌，不念魚鳧是弟兄。戈甲相侵民橫死，封疆密邇氣虛爭。更因信使談形勢，現出神兵示重輕。葭邑一朝心伏羲，免教塗炭及黎氓。苴蜀既交惡，干戈相爭者久矣，蜀王厭之，遣莊蘇議平，苴侯不聽，莊蘇因言蜀之兵衆，手指西隅，予因現神兵而警之，苴疑其襲己，遂乞盟焉，使者言之于王，王爲予立廟於都之北。

費丁第四十四

生前直道雖罹禍，身後遺靈恥括囊。君寵五丁忘武備，予方三狄抗封章。只知運土增妃墓，不信談兵拒敵疆。謂我妖言何足較，從而毀廟又奚傷。

武都山精化爲女子，色美而豔，蜀中所無，有聞於王開明尚，王見而悅之，納以爲妃，無幾物故，王念之不已，築墓使高，以示不忘。武都長人費氏五丁從而媚王，以大力故，負武都山土增壘之，不日墓與山齊，王名之曰武楷山，謂妃死而懷土也。既而王親信之，寵用之，日侍左右，曾不暫捨，王亦多力恃勇，既得五丁，自謂空拳可以格戈戟，奔走可以敵車騎，於是不修邊備，至撤亭障，罷烽燧。予既爲之神，享其血食，且彊秦接境，慮有不測，乃化一文士，自稱北都張生，叩闥上書。其略曰：臣聞專德者昌，專力者亡，昔者堯舜禹湯之治，天下在廷之臣，姓氏昭然，未有以力爲專者，但匹夫之勇不可爲恃，絕人之伎不足以威敵，飛廉惡來無救於商辛，羿射鼻舟竟死於非命，

近世三狄，長大多力，卒加誅勦。今邊隅費氏昆弟五人，初無道德，以力爲任，王以其身相長大而賢之，乃不修武備，臣以謂費氏之力，一可當十，以至百人，爲敵力無施矣，若以置諸臺阜，列爲僕御，俾其保股肱執射馭，奔走從事則可，若以爲折衝鄰國則不可，要其所比，不過赤白長狄三者之如也。臣願謹先王之慶基，嚴疆秦之邊備，無以匹夫之勇而弛三軍之令。王不悅曰：汝諫吾謹武備，而謂吾養材士，是欲獵而廢鷹，警賊而廢犬也。予力辯之，時五丁在前，怙王之寵，欲來見辱，予乃隱而不見，五丁以予爲妖，又曰：此殆北郭張仲子也，於是毀予廟貌，予亦不較焉。

石牛第四十五

巴蜀相攻蜀富強，秦人貪蜀巧思量。非干孝惠興謀善，自是開明用意荒。礪石爲牛山下立，鎔金作糞尾邊藏。好財不聽忠臣諫，鑿路興兵致後殃。周室寢微，諸侯互相侵伐，巴蜀交際，秦與蜀鄰，惠王用司馬錯計，啓謀

吞蜀，而蜀道險甚，行兵無路，乃於秦蜀之境，鑿石爲牛，形製既大，置於草中，又鎔黃金爲餅，置之尾下，如此者五所，陰使人伺之，月餘，金餅爲人取去，旋復置之，所取既頻，蜀王知之，使人臨蒞之，數月得金千餘斤。乃命五丁開鑿險路，興兵五千，率挽石牛以歸。方發兵日，予復化形爲儒者，以仲弓子長爲名，詣闕請見，予乃上疏，言開路非便，獲金非利，王笑謂予曰：天不愛道，地不愛寶，吾以社稷之靈，石牛黃金自入吾境，黃金至寶也，可以富國，可以強兵，可以寬民，先生疑鄰國之詐，誠過計焉，豈有捐金數千而設詐乎？先生少遲之，石牛行且至矣。予仰天而呼，潸然出涕，王以予爲不祥，左右掖予出，予從而隱焉。

五婦第四十六

秦人貪蜀志并吞，險路開成入蜀門。尚恐石牛彰詐計，更將宗女許新婚。不思大國難爲偶，將謂誠心有所存。逆耳固知辭枉費，忍持緘默負君恩。石牛既歸，秦王曰：此用之開路

則可矣，若牛歸而無金，則吾計敗矣，乃復遣人與蜀約婚，曰：秦與蜀鄰，親仁而善鄰，理之常也，吾有宗女五人，請嫁蜀王，王其納之。蜀王大悅，予聞之嘆曰：彼強國也，此物奚宜至哉！王乃遣五丁迎秦女於境上，王方日備千乘，候于北郊，以伺音容。予乃於衛士中現儒生相，自陳上疏諫之，王怒曰：汝非北郭多口張仲子乎，讒言見侮者三矣，敕左右兵之，予乃現忿怒之相，衛士驚潰，予獲免焉。

顯靈第四十七

忠懷不忍秦侵蜀，力諫吾君反被嫌。怒相本期鄰敵畏，大身俄爲玉音潛。路迂七曲行方徹，山壓羣靈命盡殲。從此一隅知敬仰，劍南聲勢已炎炎。五丁既迎秦女以歸，蜀人萬衆，小大歡悅，蓋昧於禍機，以非爲是，以弔爲慶，衆人之常見也。予乃於劍嶺之陽，化大身相，橫截於路，意謂秦女畏駭，可以回轅，秦蜀之人觀者駭異，武於饒饒中聽有玉音，若曰：天之所廢，不可以興，蜀王是也，天之所興，不可

以廢，秦王是也，子誠忠矣，如天命何？予乃收縮。會五丁識之曰：此必吾北郭神張仲子也，予將搏而食之，萬衆呼聲，震動山川，五丁逐予，予乃經山腹，行路成七曲，將入洞穴，爲丁所及，持予甚急，予不得已，化身百倍，任其搖拽，尋以首穿山頂，回光反顧以震盪之，山隨身動，五丁與秦女俱至山下，山摧勢迅，於是五丁五婦皆陸沉焉，爾後蜀并於秦，吾亦無憾。

大丹第四十八

老氏中原馱甲兵，西昇甘作化胡行。雲間車騎排千里，所在神祇送十程。殺命心公冤自釋，吞丹志一體斯輕。乾方不是潛身處，却住坤隅慰衆情。

予以蜀亡，社稷變置，百靈廢祀，血食無歸，神遊崆峒，聊以休息。忽雲衢中，旌幢車騎過者三日，山靈相謂曰：景象如此，殆有聖賢經過。已而老氏將左右二真人，自東而西，予列拜于西嶽所部諸地祇中，西嶽有令，諸地祇皆拜送十程，予在翼護數。一日，請問懇于老氏，真陳往昔在蜀功過，老氏

曰：大道之行，天下爲公，爾既公於心，三諫於蜀，爾之功也，五丁五婦雖死於汝，以公存心，亦非過也，既有功於蜀，今國號雖秦，而井邑仍蜀也，爾宜永享蜀祀，以慰斯民。乃命徐甲取囊中藥一粒，授予曰：此大丹也，汝宜餌之，大者與道合真，丹者與心爲一，爾後五通具足，非汝夙昔之比，中原擾擾，吾甚馱之，今將入西域行化，三百年後，西方之教法盛行，當來中國，爾宜信之。予敬受焉。

巴都第四十九

大凡臨事莫欺心，心鏡纔昏禍即侵。巧計受珠誇倖械，厲聲決獄逞胸襟。鞭笞二百難輕恕，受痛三旬可自斟。廟貌焚修非所望，祇將直道報知音。

秦既并蜀，使張儀虜巴王而取其地，因以巴都爲郡。久之，巴都守相伊庭儀，以太守疾攝事，郡民張威家奴萬真，投井而死，獄威月餘，威不任箠楚，誣服曰，實威殺而投之，蓋萬真先有所犯，威嘗撻之，不三日，真竊其貲，欲逃他所，爲威所覺，真臆度不免，乃自盡

其命，實非威殺之也。獄成，威之子聞之，以大珠百枚，遣人獻於庭儀，庭儀謂用事者曰：汝醫者，別日但以小篋作風藥來，雖在客前，無忸怩也，其家甚喜。至日，候門獻之，庭儀適會客十餘，方具酒肴，醫者至，且延之坐末，酒三行，醫起以獻藥爲言，伊受之，方入中齋，旋悔之曰：事有不明，恐招謗議，命出之，封提如故，伊復命醫者，開篋取藥，猶恐事泄，分獻衆客，翌日以威之欵伏辜，卒陷大辟。威之子行哭於市，仰天呼冤曰：還有神靈察此冤抑否？予見之，夜迎庭儀及威之父子，醫者魂爽訴之得情，庭儀曰：珠寶某取之，篋中之藥，乃素所備者，珠方入而易之，既受其珠，復畏太守知之，故不敢易其欵，予命鞭庭儀背二百，明日所訊之人寤，言皆同，方共訝之，俄聞庭儀疽發於背，號呼月餘乃死。威之家爲予立廟，一郡之人，從而見敬。

婆娑第五十

人之生子要尊親，自幼劬勞育汝身。冒姓固知羞所問，所生寧可棄其貧。

官中被罰情難忍，夢裏遭笞痛亦均。一旦冤人成父子，鄉邦風俗可還淳。

巴蜀二郡之境，有山曰婆娑，山神轅安行來至巴郡渝水之上，見予曰：某之所治，居民勤而信，孝於祖禰，敬於鬼神，事無大小，占之龜筮，云吉乃敢行焉，山王嘗總蜀神，今巴蜀黔漢，列爲四郡，秦人視之一槩爲蜀，某之所治，王曷臨之。予以非公事，不欲輕往。一日，安行又至曰：某之治，有民俗省之也。符之生日時皆惡，乃祖忌之，命勿舉，其父平叔不忍棄，乳養于外，三歲正旦，拜諸孫中，翁乃大怒，詬其子曰：汝欲以此命凶之子殺我耶？平叔提携而出。適友人周寧之相遇於途，且告之故，寧之曰：我未有後人，今請養之，他日，吾室有所出，則還君之姓，平叔與之。自後周日益富，袁以家禍連綿，貧甚，及周有子，而前約不復講矣。寧之既亡，平叔時往訪符，或告之急，則亦相濟至于數四，平叔私許以爲符實己子，且嘗念我，乘間爲符言

其始末，會符之弟來，適聞平叔之語，叱平叔出，明日投牒於官，以平叔之言不直，笞之，平叔炷香于頂，以告於安行，且言子敢笞父，安行知其詳，念非符本心，未有所裁，王爲決之。予乃與安行偕往，夜夢於符，見己之初生及王父不舉之語，及乃親乳養之事，夢未畢，哭而起，欲自決，又以形於公牘牽制於弟，隱忍間，予復夢中責其不即聽從，笞之百下，符既覺，達旦不寐，明日拜于袁氏之門，謂平叔曰：符不早悟，爲大人遺體，令神來見責，撻我幾死，今悔矣，且周氏自有子可承祭祀，符已不願預其家產，唯吾父之從。鄉人知之，以符爲賢，周之子筮乃分家貫與符，任其歸宗，袁之夫婦老且有託焉。

梓潼帝君化書卷之二

梓潼帝君化書卷之三

戒龍第五十一

周既爲秦九鼎遷，諸龍聽命海神前。輒因爭道宣餘忿，不顧殃民有重愆。指石爲盟心可信，仰天設誓語無偏。從茲岸澗耕桑者，無復橫流浸漬年。

青衣之水，自西而東，與岷江相會，秦既并周，九鼎西遷，諸山之祇會于嶽靈，諸川之龍朝于海若，所以聽革命而效靈祉也。二龍俱東，相值于江，合之中流，爭先以行，氣不相下，鬥於江淵，二水俱壅，波濤橫湧，民居其澗者，千有餘家，一日浸漬，奔避無及，怨苦之聲，達于四境。予適見之，先遣陰兵萬衆，障其狂波，予造水中解紛，謂之曰：維新之命，易我舊德，餘忿不忘，百靈皆然，何獨二君？今以爭道而鬥，禍及居人，向非吾兵障流，則此邑之民，靡有子遺矣。且上帝好生，後悔何及。二龍曰：敬受教令，既遣俱行，且約歸而成之，及朝宗回日，予與之尸

①「玉心」，疑爲「王心」之誤。
②「一万」，疑爲「一方」之誤。

事，仰天設誓，指東西二大石，叱之使起，須臾兩石峙而立。予復戒之曰：二江之龍，言歸于好，天地爲質，斯言不渝，若二石合而爲一，則今日之盟可寒，決別而退。

鳳山第五十二

千重肌肉受胞胎，十月懷耽豈易哉。情實片言違主意，羈縻兩紀受身灾。不因夢裏騰魂出，爭得山邊避雨來。子母如初天理在，晚年甘旨且相陪。

果山之隅，富人王基，五旬無子，一日醉飽形言，睨其妻曰：人之欲富者，生有衣食之養，死有祭祀之歸也，今富而無子，安用富爲哉？妻安氏亦巨室也，生平不字，性嚴而妬，聞以自愧，乃出粧資，買柳氏女以奉良人，逾年有娠，安喜甚，旦夜焚香，祝于天地，每以王氏嗣續爲請。知柳有娠，即以己之衣飾與之，至於防護飲食寢處，無不經意，臨蓐之月，前期擇女醫以爲備，既分免，果得男子，大喜。兒之乳哺襁褓，大小便利，皆自洗濯，視其子猶己生也。夫君賢之，子百晬，名曰宜

壽，亦安之意也。尋別召乳婦專飼養之。或語柳曰：吾與汝主客也，汝至吾家，飲食受用，與吾無異，蓋以吾兒之故，爾兒將周晬矣，吾將擇媒嫁汝爲良人妻也。柳乃號泣曰：非所願也，願與宜壽相處，死而後已，安不悅曰：汝欲與我爲代耶？尋撻之，即易其衣裝，食以粗糲，視之如犬豕，呼則以畜名之，力則辛苦畢責於柳。宜壽三歲，一日走投柳懷，相向而泣，柳曰：我以兒故，飢寒苦力無所恨也，邇來月餘不見兒面，兒憶母否？宜壽亦哭之，聲聞于外，安往視之，奪兒出，持挺箠之甚苦，時當寒月，盡褫其衣，夜屏之外，詰早，呼里胥而逐之。基以重傷宜壽之心，勸留之，安曰：我與此畜勢不俱存，今欲以此畜爲妻，則我且出，必欲留我，則無容此畜，儻移時而不決，則我且求死於君前，基不能拒，與柳所服裙釵，俾携而爲貨，安氏奪之。柳以久於飢困，憔悴骨立，鬢髮童禿，身肉枯黑，人無取焉，乃行於城郭，窘食自養，適王之族有徙居通川者，挈柳偕行，年

餘，安知之，貽書詬責，又被逐焉。既無所向，乃以薪水力作，糊口於人。厥後兩周星紀，宜壽父母皆死，已亦有子十歲，名知微，或告其妻康氏曰：我家生理頗豐，諸無不足，惟我所生，不知存歿，日夜愁苦，我今三十，而已華髮，伊此故也。即以家務委其妻曰：善視吾子，我將訪母，見而後歸。乃出而北行，凡遇井邑，觸處徘徊，淹留道塗。俄爾經歲，宜壽每出行路，哀哭摧毀，日惟一飯，菜米而已，誠動幽明，所至祇靈爲之感格。巴梁二江相合之地，有鳳凰山，予徜徉焉，見一老嫗負薪行烈日中，揮汗不已，憩於松下，南向長號曰：宜壽、宜壽，吾兒健否？母困極於此，兒安得而念之。予聞之有所不忍，呼里域獨孤正而詢之，正曰：是王宜壽之所生母也。時宜壽久外，其家促歸，已返中途，予爲夢之，宜壽自見所生在家之日，苦樂之詳，及路中相見之處，明日大喜曰：神明告我，子母相見有兆矣。乃復北首，所經山川道里，皆夢中境也，行三日，到鳳山之下，方

炊，暴雨忽至，行人莫進，良久，一村婦負薪而入，見宜壽揖之，宜壽心動，詢之，乃其母也，迎而歸之，柳年八十而卒。

魚腹第五十三

生身為女已卑微，況被狂夫掠賣之。飲泣父親成瞽廢，積憂母氏似迷癡。異鄉苦樂誠難測，一命存亡不可知。直待咎元彰報應，臨終方悔得便宜。

蜀土之生民，二男四女，故其俗以女為卑。涪水之源，富民任盈年老無嗣，惟一女，愛之，名寶珠，年十五，隨鄰伴遨遊蠶市，燈下稠人中迷路，為惡少咎元誘之，父母重賞尋訪月餘，已為元所賣於夔子矣，父哭之失明，母義氏心氣成健忘。如此十年，百計求之，了無音耗，盈聞七曲之靈，乃肘行膝步，號泣見投，願一見珠而死。予閱之，乃敕八功曹將三百陰兵，方圓千里四外求之，或見珠於夔之魚腹，負汲而哀，詢之灤龍，乃得其實。予乃夜夢於盈，自七曲而南，沿流下之，直抵夔門，見女與語，女亦夢見其父，既明，盈謝而

去，使人相之，蓋如夢中所行，乃見焉。珠初為人婢，主母惡之，而箠撻過甚，又轉他家，前主倍取其傭，又三年，復為鄰子詐欺曰：爾父求汝，令我與汝來，又轉之他家，如此前後四主矣。珠今在張白家，主母忌人有孕，而珠寶懷之，恐得罪，欲赴於江。而如有人難之，父聞珠聲音，目乃有見，俱詣其主，贖身以歸，母亦疾愈。咎元者老矣，予乃遣功曹監治之，日撻三百，凡月餘，抉其兩目，乞丐於市，自陳曰：寶珠之失身，元之罪也，今為七曲張主治我良苦且死矣，逾年而殂。

口業第五十四

人生口業報非輕，莫把邪言作課程。妄語以虛為實事，綺辭增百作千名。血隨砂石流無已，罪積陰司貫已盈。犁舌不須求地獄，眼前公案甚分明。

龜城之民祝期生，有口才而習下人，有生相不具者譏笑之，妍美者亦疵毀之，愚昧者輕侮之，智能者亦評品之，貧者鄙薄之，富者亦訛謗之，官僚則播其陰私，士友則發其隱曲，至有門

地才具出己之右，無可議論者，則曰乃祖微人也，乃父鄙人也，或曰其母家工商也，其妻家駟儉也，或曰厥弟不良也，厥子不肖也，凡所知識，皆不逃於貶刺之中。此猶細故也，人小有過惡，則既傳揚之，又增飾之，以無為有，以一為十，以疑似為端的，以偶然為故犯，以不得已為優為，以錯誤為情實，至於面折之，眾辱之，又從而告訐之。非特待他人如此，雖己之族黨亦不免焉，目其父母為頑嚚，目其兄弟為管蔡。非止於身為之也，或教人興訟，已則解釋之，或教人詛罵，已則辯證之。所習既久，不知其非，中年得舌黃之疾，使人砭刺出血，勢少間，不數日，又作，尋復治之，大約一歲之間，疾五七作，每作不下出血一二升，率以為常。一日，因與其徒話鬼神幽明之故，言天之雨陽之不時，地之豐歉之不一，鬼神之受人祭祀，祖禰之邀人奠酌，皆訶罵之。予適與江瀆會語，聞其多口，予方竊笑之，里域真官虞奇叔曰：此特萬分之一耳，因備舉而詳言之，予乃遣功

曹謬其操持，使自以手探舌出，以爪犁之，涎血淋漓，如屠狗彘，流溢於地，觀者千百，使自宣其過曰：人之口業不可作也，如此月餘，舌枯不能食而死。

東郭第五十五

工作雖然爲得財，也須擇術自量裁。減輕添重由心造，提後推前以意猜。業熟雙眸皆瞽廢，藝精五指盡傷摧。三年陽責人爲鑒，寧免鞭魂死後災。

蜀郡土薄水淺，民生其間，率皆慧黠有智數，多機變，巧於求利，闐闐之徒，雖一錢物皆有贗僞。東郭人黎永正本攻輪輿，馱其作重而貨遲，乃改業治斗甬，尋又治權衡，逾年，人有欲深斗重秤爲矚者，倍取其直而與之，其欲減勺爲升，減合爲斗，省銖爲兩，省兩爲斤者，亦如之。永正又能作空中揆絲之秤，折底隆梁之斗，小民不顧報應者，以爲便於日用，往往求之，一日，司察神糾奏，有旨：以爲用之者固非，而作之者尤甚，俾所在神祇陽警而陰理之。予乃遣里域神段彥夢撻永正，雖悟未悔。既以聲名漸彰，求者愈衆，貪

其工直，夜以繼日，使其目力昏暗，以致矇瞽，年方四十，妻棄而他之，二子生而亦盲。又以久業於此，不欲頓廢，既已失明，別無生理，乃至以手爲目，揣摩廣狹，臆度長短，鋸斧釘鑽，冒險施用，左手五指朝傷暮殘，膿血甫乾，肌膚未平，尋復被苦指節零落，不能執持，行哭於市，人既識之，皆無所卹，飢寒切體，如此三年，使自暴白其過而死，二子相繼以殍，由是所用之者，因少戢焉。

牛山第五十六

積善須逢善果圓，惡人還值惡因緣。公平苟信無凶報，慘刻蘇珍惹禍愆。但種稻梁先滿地，莫憂荆棘後參天。諸君試看簷頭水，滴滴相承不肯偏。

蜀郡涪鄆二水相會旁有牛山，山之阿，井邑繁衍，邑之吏苟信、蘇珍所居比鄰，而每事相反，信以公恕，珍以深刻，信以廉節，珍以貪墨，信以倜儻，珍以陰謀，信以推誠無隱，珍以匿怨深中，信以語言必信，而不輕諾，珍以脇肩諂笑，而無情實，信奉母以孝，而教

子以嚴，珍待父不敬，而縱妻犯上，信少求而儉用，珍奢費而無餘，信和同上而下而無怨言，珍以己律人而少許與，信掩人之過而省言，珍發人之私而多口。鄉里公私皆以信爲賢，以珍爲鄙，且忌珍之敢爲而不能與之較。歲終，邑人大集會，酒間，鄉老周同舉手示衆曰：秦有二水，曰涪曰涇，一濁一清，皆赴于河，發源既殊，波蕩不反，三尺童子見水之色，皆能以涇涪名之，蓋以清濁取之也。在人亦然。方語未畢，珍乃面頸俱赤，投袂而起曰：苟君是涪，珍是涇矣，珍與苟信聯事而切鄰，珍之所爲，惟信熟知，今信播揚珍惡，使鄉老於廣衆中以水比喻，珍將報信以明心，信實未嘗以告人也。自爾，珍每見信必眦睚之，雖禮文相接，而中實仇敵也，又嘗教其子明能伺苟之子儀真之便，且將殺之。次年春，祈蠶行樂，明能與儀真並行江際，且語且笑，明能有惡心，而儀真未悟也，乃恃力推墮儀真水中，儀真急挽其衣與之俱墜，出沒於浪花間。予與諸龍君皆預供神之席，

因敕二江龍拯之，鄴涪二君雅知二子之詳，乃携儀真近岸，而轉明能于淵，會珍見之，褰裳而往，復取儀真擠焉，旋爲儀真牽挽而入，觀者如堵，呼哭騰沸。予不平之，乃使鄴龍曳珍之足沉焉，儀真得無恙，珍之父子皆溺，萬人兩兩相謂曰：孰謂龍天八部有私乎？信與珍禍福不在於此日也，蓋信之善果已熟，而珍之惡業方盈焉。

天威第五十七

婦人植性固多偏，孝養勤誠豈易全。宿業雖應雷斧禍，今身幸有事親緣。巨天虐焰俄回息，捲地威風急變遷。馬氏焚尸支氏免，乃知輿議合於天。

鄴邑民支祖宜，其妻喻氏，年二十五，有姑黃氏，八十病目無所見，性褊急，喜潔難事，而喻以少年勤廉恭順，能逢迎之，三年無間言。其夫因酒，誤人仆墮兩齒，求免刑責，入財自贖，以喻隨貨入之，喻無悔。一夕，夢里域追逮責曰：汝前生爲比鄰牟容之妻，年三十病殯殍逾年，汝之姑七十餘，煮糜供汝，汝以口苦厭食，嫌其太頻，哭而

叱之者數四，及臨死之前一日，對姑呼天曰：年七十者不死，我方三十而使之死，天不平乎！汝家司命聞之于天，帝有旨令焚汝尸，而汝氣已絕，事未之行，案牘仍在，凡三十年爲一世，今當結絕，汝宿業所應者，死於雷斧之下，來日俟之，以汝今生且孝，故先期告汝。喻驚而寤，中夜坐而號泣，良人有

家幹出外未歸，姑曰：汝以吾子破汝家貲，謂終身不可償耶？喻曰無之，凌晨沐浴，新衣拜其姑曰：新婦三年事姑無狀，今請假暫歸，恐不測，身死不復來歸，婆好將息。姑訝其言不倫，歸別其父母，所言如初。自炷香立於屋南大木之下，仰天而祝曰：新婦之死宿業當爾，有所不辭，重念夫貧姑老，晚年失婦，誰爲供事，一也，父母自少小教訓，今被天誅，爲父母之辱，二也，身有孕已七月矣，萬一得男，支氏有後，三也，今一事皆不可避，獨支氏無後爾，乞少延三月分免而死。時大暑中，陰雲晝昏，風雷交至，里域爲予言之，予知其心，乃爲奏之，有旨：取里

中凶逆者代之，富人張實妻馬氏，淫悍悖逆，事姑嫜無禮，制其夫如奴隸，予即遣里域同雷火神治之，俄喻氏無恙，而實之妻焚焉。

尚義第五十八

昆義由來一父生，至親安可使無情。李華待蔚真堪尚，雍滌欺源太不平。折臂輿情知顯報，表閭公議得嘉名。因令薄俗成淳厚，鴈序怡怡免競爭。

壩水之瀕邑吏雍滌，有弟源亦仕于官，每爲滌所窘，源以長上事之恬如也，滌源同娶梁氏二女，家私微芒必較，久之滌源爲仇讎，妯娌爲冤對，雍之父母弗能制也，乃議析居。欲留源之房，滌不許，俾源夫婦出一物不與，責以歲時供奉，無幾路逢源，窘以不拜，箠之既傷，復訟於鄉大夫，詰其詞理，滌乃不直，滌之妻造源之門，曳乃妹出，亦箠之曰：法存長幼，終不立幼而答長也，鄉議不與之。儒家李華父，晚景有爨婢出一子，臨終囑華曰：汝以爲子，華泣對曰：是兒母雖賤，華之同氣也，他日華教養之，使之成材，昭穆

有序，天可質也。厥後名之曰蔚，尤鍾愛之。既長爲名士，爲之娶妻，華有子彌明，先生於蔚十歲，自蔚甫能言，使彌明拜之，及長，禮待次其父一等，華與子及蔚均爲鄉人所舉，達之太守，上之春官，論定以彌明官之，彌明失言於蔚，華乃撻之，彌明伏羲，尋以家貲盡付於蔚曰：吾弟主之，彌明自有祿養矣，鄉人以爲賢。秋社集，予在祭焉，鄉人以雍、李相況爲薰蕕，滌聞之罵，坐復曳源擊之，予不平焉，乃使直事紵其臂而折之，滌妻尋亦疽發于手，如此三年，公私俱廢，生事寥索，父母相繼而亡，滌與妻乞丐而死，鄉人以爲不義之報，郡守旌華之閭曰尚義。

旌隱第五十九

世情習俗最移人，日用塵勞喪本真。守道牟君天所佑，輕身蘇子鬼猶嗔。至言傳誦爲規範，廟食興崇致免輪。蜀士始尊中國教，俗儒一旦變真醇。蜀自秦并之後，中國文物之盛，先王大道之化，漸有習之者矣，而淳厚之風未振，鬻浮之徒競起，予恐傷風教，

有意欲化之。一日，巴郡宕渠士人牟麟好學不厭，而樂於教人，守道廉退，非有大故，不出戶庭，歲時起居，有受謁無出謁，貧甚而未嘗怨尤，郡守溫瑀辟請爲從事，既不起，丞于宸往邀之，接語移時，所談皆安時順便，善身避世之語，宸欲致守之意而辭不得達，卒罷之，宸以告瑀，瑀嘉其節。蘇尚功者，嘗學於麟，未終其業，開門受徒，以師自任，而性好奔競，足跡不少安，求請省問，奴顏婢膝，爲麟薄之，或以麟辭達之者，尚功踵門而辯之，麟亦自以爲嘗教誨之，猶執先覺之義而語之曰：死生有命，富貴在天，子夏之言也，求之有道，得之有命，求無益於得，子輿之言也，子之所爲，吾實恥之。尚功自恃少年拳勇擊麟，予適見之，乃化一儒士，爲之解紛，顧衆而語之曰：人之壽夭窮達，有命在焉，非人爲也，奔競無恥，不知命者也，命之所無，求之何益，以常求之，偶有所獲，以爲求則得之，求益於得，是不知道者也，苟不知命且不知道，則所守既喪，放辟邪侈，至於

不正不忠不孝，皆由此也，二子所爲冰炭，君子小人之所以分也。觀者駢闐，或問予曰：爾爲誰？曰：予所謂張仲子者，衆驚愕相視間，予隱形不見，自是遠邇聞之者，若尚功之徒改行有醇厚之風焉，渠人爲予立廟。

祐正第六十

謀他財賄已非宜，況復萌心苦見欺。正女一言祈響報，吉人盡室免傾危。俄驚縲紲皆離體，尋使兇強總磔尸。福善禍淫天理在，非予受祭報其私。

北都富室智金禮，中春修祀，一室盡醉，暴客王才者，約其徒三人謀劫之，是夜未央，推戶直入，縛全禮家男女良賤九人，婢妾七人，唯全禮之妻與二女容繫之，既取其貲，將亂之，全禮之妻惶懼乞憐，幼女舜華年十五，與其姐舜英抱母而泣，才欲逼之，華罵曰：餓賊犯吾家，張神君未知汝也。語畢，其家司命崔瑄，與智之祖禰告急于予，予乃遣功曹輔興，領陰兵百人治之，所縛全禮以下繩皆自解，盡執其賊，翌日

告於里正，聞于郡，悉誅之。

梓潼帝君化書卷之三

梓潼帝君化書卷之四

殺生第六十一

蠢動含靈皆有命，貪生畏死與人同。因思骨髓脂膏味，俾在砧刀鼎鑊中。不顧冤魂隨影響，只知滋味美喉嚨。杜章享盡前生福，業果成時報不空。

卽有杜章，望帝之支也，生於富貴，父母好宴樂，會集以爲常，凡烹割之事，章躬親之，及長，身任門戶厨饌無虛日，膾炙方離口，刀杙已在手矣。後以灾禍相繼，家道零替，無以爲生，爲人屠劊以就口食，所取人財名過命錢，又以飲啖兼人，饕餮成疾，方且飽滿，尋復中虛，而性嗜肉味，日常不足，及以罟取魚，以弋彈雀，所見飛走，皆萌殺心。中年生五子皆無指，口累所迫，過命之貲，不足度日，悽惶無聊，尋有癩疾，肌膚破裂，膿血流潰，見者掩鼻矣。自以飢火所燒，復受疾苦，投井自盡，爲人執之，極口辱罵，於是仰天呼冤。予見之，訝而問里域主者、孫洪

叔言其詳，且言此人祿盡而命長，尚餘五年，予既知其造業之由，又復閱其受苦之酷，且歲方遙，惡其日夕怨怒天帝，乃遣功曹易其心志，使以手揭瘡皮以自食之，又以指點膿血吮咀求味，宣言於人曰；毋作殺生業，以我爲戒，如此逾年，以準未盡之數，念斷而死，諸子皆殍焉。

酷虐第六十二

公孫武仲處心廉，鞭撻諸胥失大嚴。資水賴恩還縱吏，酷民誅取却無厭。化身戒勵誠惟一，改行寬平利可兼。裁抑有餘增不足，吏民兩邑惠俱霑。

牛鞞邑令公孫武仲治己以廉，而待人恕，左右之人小有過失，答一二百，蒞邑逾年，而胥吏無全膚，吏怨之。資水邑令賴恩性貪沓以苞苴爲常，日用飲食，歲時衣裝，取給於胥吏，而民事造庭者，無問曲直，悉付之狴狀，恣吏誅求，意足乃已，吏意未厭，則遷延歲月，置而不問，民怨之。予以一邑之吏民被苦，乃化身爲蜀郡丞長孫義，行諸邑觀風俗，劾仲之虐吏，賴恩之酷

民，一令叩頭乞免，予戒勵之，尋隱而不現。後知郡丞初無行邑之事，二邑咸以爲神而敬信之，武仲改而忠恕，恩亦變而廉潔焉。

憫世第六十三

周室隳頹爲不仁，蒼姬一旦變嬴秦。慘刑暴吏無和氣，詐計窮兵又幾春。不忍中原罹此禍，願開方寸濟斯民。上天有旨垂俞允，雨後乾坤又一新。

予嘗仕於周，以忠盡命，血食於蜀，未幾，蜀入於秦，已而周喪天下，皆嬴氏矣。秦任刑法，視民如草芥，秦衰而干戈又起，中原塗炭于斯久矣。予以久處靜境，思以拯斯民之苦，乃飛章上聞于帝，從之，若曰：白帝子遊人間久矣，而暴於殺伐，今已遣赤帝子代之矣，汝以本司火德，今當應世，以爲赤帝子之後，予受命焉。

咸陽第六十四

護持全蜀幸優游，應世情牽強出頭。被譖不成膺繼統，殺身空與結冤讎。封王緣薄終何益，報母心酸未肯休。那得身爲率然相，盡吞諸呂快幽憂。

予之懇于上天，將以化身援天下於塗炭之中，躋斯民於和樂之地，無何，帝命以予爲赤帝子之後，玉音可畏，予不敢抗，靜而思之，非所望也。俄有九天監生大神，逼予受生，於雲霄間下視咸陽火秦之後宮闕鼎新，漢帝方與戚姬昭語，監生逼予曰：此所謂赤帝子者也，今爲漢帝矣，予縱目間，爲監生大神所擠，墮於帝側戚姬之懷，恍然而覺。帝以予生骨相相肖舉止可喜，名予曰如意，予雖提孩中，而本志尚堅，語言顧盼尤愜帝意，帝尤鍾愛，每以予兄爲不類，薄之，晚年欲以予爲太子，既不果，帝萬歲後，卒爲呂氏所殺，予母之死，尤被酷毒，予深怨之，方冥冥間見母受苦時，思得復爲率然之相，盡吞諸呂而後已也。

邛池第六十五

恃勢凌人不可爲，無辜母子被誅夷。銜冤入地至極矣，不共戴天良是之。諸呂後身同一邑，雙親乞命在斯時。海波平陷四十里，還我當年受百罹。予自罹呂禍之後，神遊冥漠，又無

職守，嘗蓄宿憤，思欲報之，已往修積，不復問焉。雖諸呂死拘幽冥，造業深重，歷年甚多，逮再生亦久，遂訪西海之濱，有邑名邛池，邑令呂牟，呂后之後身也，邑人多呂氏，蓋宿業相尋，諸呂造業之黨也，萃於窮荒。予母夫人亦生於彼，復爲戚氏，以前身享福太過，生此而貧悴，所嫁張子，年老無嗣，夫婦以芟刈爲業，一日野外相顧而語曰：生身窘甚，辛苦自養，暮年力衰，將不免於溝壑，今六十而無子，是天將殺之耶？乃相與割臂出血，瀝於石凹中，以石覆之，拜天而祝曰：人皆有子，惟我獨無，今氣血薄少，不能施化，願此石下倘使動物生焉，亦遺體也，予識母氏心惓惓焉，一念感之，從而寓止。明日二老復來，揭石視之，血化爲蛇，金色寸長，予所爲也，母收養之，逾年，頂上出角，腹下生足，能自變化，每天欲雨，予爲助之，身既長大，腹量寬邁，見羊豕犬馬輒食之，邑令有馬，色潔而駿，牧於水際，蹄傷吾末，因拘而啖之，馬蓋呂產之報身也。邑人皆知

予，詳訪於予家而不獲，逮予父母於囹圄，責以三日求予，無狀將見殺焉，次日，予化儒士謁令解之，令曰：張老夫婦家養妖蛇，食人六畜久矣，今又食吾馬，吾將殺之，爲民去害，張不見聽，是彼自爲妖也，今必戮之。予曰：物命相償，宿業所致，遇彼吞噬，亦非偶然，今君爲畜而殺人，豈令尹之事乎？令叱予使退，予復語之曰：君有死氣浮於面顏，宜善自愛，他日無悔。語畢，予隱形不見，令之左右皆以予爲妖，予乃奏天稱冤，陳以前世子母無辜死於諸呂，今適逢之，願與之較，辭上而未報。因變化風雷，呼吸雲霧，白晝而暝，一邑之人，相視而語曰：汝頭那得爲魚，至以手相捫頭面而泣，一夕揚海水以爲雨，灌注城邑，圍四十里皆陷，予以身載父母而出焉，時孝宣之世，今所謂陷河者是也。

解脱第六十六

嗔恚之心莫易生，此心生處是無明。只知直理堪平訴，不待琅音輒徑行。謫受大身遭熱惱，填還冤債慰羣情。

世尊一語消餘業，却得當來面目成。

予前以呂氏冤對，奏帝未報而擅行之，雖一時快意，宿憤頓消，及心定意平，良用深悔。翌日玉音荐降，以海神晁閔劾予擅用海水，陷溺平民五百餘戶，以口計之，二千餘命，除里域所具予前身仇對八十餘人，半在城隍，半居附郭外，其餘生齒，皆係天枉，帝命賜譴以予爲叩池龍，而奪其神職，且使天吏監臨，不得予預雨澤，羈囚於積水之下，連年旱虐，水復爲泥，身既廣大，無穴可容，烈日上臨，內外熱惱，八萬四千諸鱗甲中，各生小蟲，呬嚙不已，宛轉困苦，不記春秋。一日晨涼，天光忽開五色雲氣，浮空而過，中有瑞相，紺髮螺旋，金容月瑩，現諸勝妙，希有光明，山靈河伯，萬衆稽首，讚歎歡喜，聲動天地，復有天香繚繞四合，天花紛委，隨處生春，予乃耳目聰明，鼻觀通徹，心清口潤，聲音發揚，仰首哀號，乞垂救度。萬靈諸聖誠衛先後，咸謂予曰：此西方大聖正覺世尊釋迦文佛也，今以教法流行東土，隨教化身，將

往中國，爾既遭逢，宿業可脫，予遂起改悔心，生悲愍念，身自踴躍入天光中，具陳往昔報應之理。世尊答言：善哉帝子，汝於向來孝家忠國，作大饒益，又復憫世生護持心，因果未周，仇敵相爭，以人我想肆興殘忍，遷怒于物，業債當償，今復自悔，欲求解脫，汝於此時，復有前生冤親之想，與夫嗔恚愚癡念否？予聞至理，心地開明，內外罄然如虛空，住無人無我，諸念頓息，自顧其身，隨念消滅，復爲男子，聽佛宣說，得灌頂智，得大辯才，得神通力，得圓滿相，龍天八部皆大欣悅予皈依焉。

仁政第六十七

嗔業焚和障最深，堅持忍鎧莫容侵。瘡傷爾體猶吾體，痛切他心似我心。吏既不欺終幹蠱，民知相愛自甘臨。清河薄譽緣斯得，歌詠惟將和舜琴。予既離惡趣，即得善生，受形於趙國，爲張禹之子，名勳，既長，爲中正所推，爲清河令，寬明自任，人不忍欺，待吏如僚友，視民如家人，吏有失謬者是

正之，弛慢者勉勵之，鹵莽者教誨之，貪饕者廉察之，詭詐者詰難之，不用誥詔者免去之；惟曲法戕民，以白爲黑，事干人命者，使自理之，辭窮心盡，然後付之於法。其初情可憫者猶宥之，佚出之罰，予所自當，不敢辭也。民有爭財賄者以義平之，爭禮法者以情喻之，爲賊者使償其貨，傷人者使庭拜其敵，姦及殺人者付之於法，其本心可恕者猶出之，容惡之謗，亦不敢辭焉。以一方之內，雨暘以時，蝗蝻不作，偷賊相戒而入境，姦邪革心而改行。爲政五年，怨懟不聞，四民爲之歌曰：吾有師，師嚴而不慈，教我恕我，張君能之。吾有友，友信而不戒，親我正我，張君是賴。我有親母，恩掩於義，張君似之，柔而不制。我有親兄，責敬於情，張君似之，和而不爭。後爲太守，責以趨進，予解組焉，時章帝元和之末也。

幽明第六十八

盡心於道，道斯存，篤志求仁，仁自成。性定乃能通晝夜，神全方可治幽明。

林宗愛子存公議，帝旨傳言無隱情。三紀辛勤效功績，不妨陰鷲相羣生。

予以先世善政有成，福業滋茂，天年甫盡，即遂有形，於順帝永和間，載生斯世，所謂張孝仲者，猶不忘於故稱也。復爲郭有道所品題，雖不登顯仕，浮沉里閭，而上帝有旨，俾予日應世務，夜治幽明，凡人之屈抑冤枉，陰德隱謀，予皆知而籍之，以至鬼靈邪祟，無不預焉。如此三紀，幽明兼濟，人鬼交利，予有功焉。

籌帷第六十九

襟懷有武且兼文，一寸心田萬象分。寶運將開司馬氏，兵謀聊贊鄧將軍。出奇問道行吾計，盡瘁沙場佑帝勳。史氏簡書還闕逸，何妨籌畫事無聞。

予以善功世修，漸復神職，而命債未償者，猶不吾置，復生於河朔，少負氣節，眼見世變，嘗以功名自期，乃爲大將軍鄧艾見知，辟請爲從事，凡所舉謀，予必預焉。及伐蜀之年，予爲行軍司馬，勸艾以間道出奇，以省鋒鏑之禍，入蜀深境，遇諸葛瞻，許以封王琅

邪，瞻不之聽，至於交綏，瞻之中堅，予所當也，或有流矢星飛，集於予體，瞻方就擒，予欲營救之，而創甚矣，蓋向者叩池未償之報者也，可不戒哉！

如意第七十

帝手何年自執持，玉京一旦賜於台。指揮行陣陰兵出，顧揖仇讎惡意移。利器尋常爲伴者，舊名時復自呼之。從茲所向皆如意，三界神靈孰敢欺。

予既滿前緣，詔詣玉京，洗除惡籍，鼎新神位，俾予永福坤維，帝又以所執之杖賜予，帝旨若曰：資爾孝仲，萬靈之雄，忠孝全節，世資爾功，賚汝斯杖，無所不通。又曰：此如意也，予以杖契宿名，欣然受之。

丁未第七十一

越裳五畔金山邑，越嶠南邊近海涯。醉眼醒看新日月，閑心忙愛舊煙霞。元辰司命專丁未，趙國中興顯故家。火德佐王千萬祀，始從今日拜其嘉。

予以寶杖自隨，無適不可，因念前身西海之隅，復經從焉，越裳之西，越嶠之南，兩越之間有金馬山，勝境清

絕，張老夫婦，予累生之父母也，於是生焉。時晉武帝太康八年，歲值丁未，二月三日夜子刻，以甲子考之，則其時已屬辛亥矣，帝命以予爲丁未陽官本命元辰焉。

水漕第七十二

夢裏爲龍爲帝王，多生習氣未能忘。笑他酒饌修淫祀，書我官銜牒水鄉。風雨聲中奔衛子，桑麻陰下舞商羊。職司全蜀幽明事，七曲遷居道路長。

予以成長妻男具而孝敬不衰，見鄉人以旱祈雨於土木，予笑之，蓋予嘗夢有報矣。一日，水際自書官銜移文海神，乃見使者告予：以有形以來，自周爲人，迄此顯化七十三矣，乃呼予爲運判，促上白驢，風雨聲中頓失鄉地，入大穴中，宮庭明敞，父母以下血屬皆在，一夕雨澤大作，徧全蜀之境，蓋有旨以予總護全蜀幽明之事焉。

桂籍第七十三

儒家桂籍隸天曹，得失榮枯數莫逃。夢契真誠題義顯，榜隨陰德姓名高。封妻廕子由寒裔，曳紫腰金自白袍。

爲報難窗無寐客，勉心文行莫辭勞。帝以予累世爲儒，刻意墳典，命予掌天曹桂籍，凡士之鄉舉，里選大比，制科服色，祿秩封贈奏予，乃至二府進退，皆隸焉。

孝廉第七十四

經術談王辯異同，孝廉特地起遺風。江寧神璽皆天命，日麗重光顯帝功。馬化已知興晉室，蛙尊誰謂屬劉聰。跨驢直入西涼地，遊戲隨機現六通。

予慕釋氏韜光禪寂，建興中，憫戎狄窺伺朝綱，非命世英雄弗能反正，會元帝建策南渡，綏撫江左，而白麟玉璽見於江寧，臨安日有重輪，皆中興之象，予改日作儒士，跨一白驢，往河西應孝廉謁張軌焉。

感時第七十五

擬陪鄉士獻能書，喜遇姚萇古亦無。欲激頽波專號令，敢據忠節委均輸。不堪狙詐爲三俊，笑倚鴻圖應一呼。興盡先期歸蜀地，輶車枉駕訪吾盧。

予建興末，作儒士謝艾，跨驢入西涼，張軌以予爲主簿，張重華嗣位時，

石季龍使將麻秋侵寇不已，涼州震動，府司馬張耽言於重華曰：議者舉將皆推夙舊，且韓信穰苴皆非舊將，盡明公之舉，惟材可任，主簿謝艾兼資文武，委以專征伐之事，庶幾可也。重華召艾問以計策，艾曰：耿弇不以賊遺君

父，黃權願以萬人當寇，乞假臣數千人，爲殿下吞之。重華大悅，以步騎三萬人令艾討之，麻秋率大眾以禦之，艾乘輶車，冠白帟鳴鼓而行，秋望而怒曰：艾年少書生冠服，如此輕我也，命黑稍龍驤三千馳擊，左右大擾，勸艾去，艾不從，下車踞胡床，指揮處分，賊以伏兵發也，懼不敢進，秋軍乃退，艾乘而擊之，俘斬甚衆，秋乃匹馬夜遁。季龍聞而嘆曰：吾以偏師定九州，今以九州之力困於重華，真所謂波有人焉。繼而往關中與姚萇爲友，欲激頽波，以正風化，奈何縱暴之君競起廢弒，然萇雖少而多謀略，又況宿有契好，故作密友。久之，予賦處凡世，思歸蜀峰，約萇曰：苟富貴，無相忘。後萇以龍驤將軍使蜀，至鳳山訪予，予禮

待之，假以鐵如意，囑之曰：「麾之可致兵，莫疑予，予爲之一麾，旗幟蔽天，戈盾戎馬萬餘，列之平坡，今試兵坡是也。」後莫以苻堅死，即帝位號秦焉。

誅暴第七十六

禍福之機本在人，只爭現報與前因。貪汙賄利欺君命，剝刻脂膏虐下民。推貨王仔生犢尾，刷錢馬諤化猪身。從茲警悟堪爲戒，一念纔虧即有神。

予仕晉之後，兼治幽顯，時蜀之導江王仔者，永和中任帥幕吏，被檄督推課鹽於潼川，而王躬詣井所，召民強與約，率令倍差認課，當取五千斤者，倍取萬斤，又約來年所輸不滿額者，籍其家，王仔知其不能如約，窺欲没入之，使官自煎，既復命，帥以鹽數倍增喜之。予聞其苦民，故陰治之，是夕，帥馮遷夢王仔來謁，而公裳下有一尾，方驚寤，有婢亦魘，及甦，言適王使者來，公裳下有一牛尾出，再四言其推利貪汙之故，令生蜀之屬邑田家廷，翌日遣人訪之，果如所夢。又益昌馬諤者，同爲帥屬，每出部邑督錢，惟以多爲貴，

不問額重虛實盈縮，必得爲期，且以此自負，蜀人苦其虐，號曰馬刷。或以王君牛尾警之者，馬曰：「正使見世尾生，亦何必問。」予聞其暴虐如此，聞之上帝，繼而病卒，七日之中，其家作薦復，聞棺中有聲，意其再生，亟開棺視之，則已變爲一猪矣，急掩而葬之，時天氣晴爽，喪車方起，大雨如注，送者皆不可行，及墓次，水已溢矣，此可爲汙吏之戒。

明經第七十七

銅川著筮久潛心，道學儒宗已陸沉。天假仲淹重振鐸，文追孔氏復鏗金。儒風欲繫唐虞化，大雅全排鄭衛音。董氏庶幾顏氏子，升堂窺見室之深。

予久處穹昊，帝以中國道衰，欲王化之，復行故命，予生銅川家，知隋運將終，吾道未濟，退居河汾間，修先王之業，制禮以節情，作樂以和俗，恢刑政以防其非，崇祭祀以介其福，祖述周孔，取則軻雄，九年而成經也，其於五常之教，於小子何述焉，復以禮樂之學，付之董常，惜其不一用於太宗之

朝，悲夫！

護聖第七十八

漁陽鞞鼓叩長安，此日明皇幸劍關。若聽九齡攄諫論，豈勞七曲重躋攀。不因儒士爲親謁，安得鑾輿返遠還。萬里橋邊迎禁蹕，誰知虛位紫霄間。

予自汾陽傳道，馱於死生，再奉帝命輔唐室，故命長子淵石生於清河氏之家，即九齡。明皇時，李林甫之譖毀肅氏，而帝賴之以不易，至於議論風生，首登七寶山，坐有文場戰師之雄，應制走丸之辯，後漁陽之亂，明皇幸蜀，鑿劍嶺而觀中原，歎曰：「吾聽九齡，不至於此也。」予因至萬里橋，以儒士謁帝。帝曰：「卿非北郭張生乎？」予曰然，臣聞元載孔昇天，虛位久之以待陛下也，帝默然。後肅宗收復京都，韋見素迎帝歸闕，封予爲右丞相，而予密衛鑾輿至咸陽，帝移大內安頤，遂辟穀，張皇后進櫻桃蔗漿等，悉不食，常玩一紫玉笛，自吹數聲，有雙鶴下徘徊於庭，帝謂宮愛曰：「吾奉上帝命，居元載孔昇天，令具湯沐，復就寢而升化

矣。

明威第七十九

影響昭昭理可尋，往天豈與物交侵。
眼根所著無非色，身業居多莫匪淫。
四舉不沾天子祿，一生虛負狀元心。
李登狂妄終除籍，感報徒嗟罪障深。

唐李登者，年十八，鄉貢首，自後凡十年一薦，名愈下，年幾五十，不第。一日，齋戒詣葉靜法師，且告曰：登自十八歲叨冒鄉薦，凡經四舉，不登一第，何罪至此，幸法師入冥，為某勘當此生如何？法師語之曰：蜀之梓潼，有神曰北郭生，掌文昌主貢舉司祿之官，必能知之，吾當為汝叩之。一日，上章道過治所謁予，法師曰：士人李登者，某年月日時，凡四舉不第，此人果何如？予命一吏示籍，對曰：李登初生時賜玉印，十八歲魁薦，十九作狀元，五十三位至左相，緣得舉後，窺鄰女張燕娘，事雖不諧，而繫其父張澄於獄，以此罪展十年，降第二甲；二十八歲後，侵兄李豐宅基而奪之，致刑于訟，以此又展十年，降第三甲；三十八

歲得舉後，長安邸中淫一良人婦鄭氏，而成其夫白元之罪，又展十年，降第四甲；四十八歲得舉後，盜鄰居王驥家室女慶娘，為惡不悛，已削去其籍矣，終身不第。法師辭退，以是語登。登無以對，一夕愧恨而死，後之士夫可不戒哉！

濟順第八十

綿綿唐祚欲傾摧，叛逆陵遲陷北臺。
逼脅乘輿臨草莽，爭驅甲冑走塵埃。
天恩昭顯精神會，帝道重宣雨露來。
桔柏津前新應詔，虬銜誰信作良媒。

唐乾符中歲荒，河南為盜者甚眾，尚君長伏誅，尚讓等推黃巢為主反，長驅江陵，渡江為患，入河北，攻河南數十郡，次陷洛陽，破潼關，僖宗播遷入蜀。巢犯闕，巢遣朱溫等攻鳳翔，至潼關追僖宗，乘輿夜遁出鳳翔，予以儒服見帝，帝夜行馬馱，予以所乘騎奉帝，帝乘之，予捧足攏馬，密布綵雲，衛帝騰空，彌明露雲微綻，令帝下視，見鳳翔軍與巢軍戰于龍虎阪，若蟻陣也，帝曰：此何所？予曰：此乃空際，帝驚

歎曰：卿非北郭生張孝友乎？我非卿豈料生耶？予奉帝至劍南複道，帝疲甚，欲少憩，命予股以枕之，熟眠，林葉風聲，帝忽躍起曰：巢兵至矣，擊鉦近也，予曰：非也，乃林葉風聲。久之，從駕宿衛始及，訝帝行之速也。帝至桔柏津曰：我有一女，乃興唐公主，最神慧，奉卿箕箒可乎？予曰：臣幽也，何敢奉承？帝曰：勿固辭，遂封吾順濟王，親至廟奠獻，解劍為賜，仗予剿賊，後宋文通等斬巢，送首成都，帝還闕，則興唐公主從而殂矣，予命兵迎公主歸七曲焉。

濟迷第八十一

救世乖訛物理衰，神人淆混化塵微。
庸愚指我為妖妄，蒙昧嗟予擬是非。
匝地亂雲多雨潦，亘天烈火示光輝。
孫譙始信英靈著，從此寰中顯福威。
五季中，進士孫譙者，性尚剛介，不與羣居，詆斥佛老，著《無鬼論》，自隴之蜀，過祠下，侮辱無禮而去，抵於山陰，天忽昏晦，風雨如撒，行者不可進，欲投邸而不可得，遂呼曰：此乃北

郭生張君，如果有靈，則指涯涘如何？予令佐神舉火一二示之，譙尚笑曰：廟奴誑我，再呼曰：神既在，何不爲我止風雨，使我能抵于平陸如何？予笑曰：子所過神祠必狎侮，指以爲妖，笑以爲誣，今悔之何及也，予示之以炬火數百，山川明朗，可容行李，須臾風雨頓止，翌日留記于廟焉。

忠顯第八十二

熙熙天祚福皇朝，叛寇生羌亂蜀妖。均唱勃徒凌郡縣，順連賊伍結蕪蕪。卒呼勇義陰兵力，箭貫膚腸意氣豪。木馬汗流如密報，天恩依覆下參郊。皇朝均順之亂，主帥雷守忠祝吾助神兵，遂入蜀，至利州，爲賊堅壁固壘不下，其裨將王吉大呼，語賊曰：吾奉天命剿賊必矣，可降，而賊以勁弩射之貫腹，其人歡呼自若，封之以藥而無恙，帥亦如之。朝廷封予英顯王，而功奏上天，即證定慧王果焉。

聖治第八十三

太平風化樂唐虞，致治馨香等太初。率服四夷明德教，莫安百姓法規模。

挈衷頓領知賢相，錯節盤根見大儒。子含輔成元祐政，著書猶用鑑寰區。

皇朝一祖四宗，垂拱太平，予奉玉音，以次子文明生于司馬氏家，名光，盡誠於館，著古今歷代史以鑑於世。輔宣仁聖烈皇后，擁少主不出簾帷而天下治，當時庶政聿修，咸謂德合天地，道通神明，因積仁累德，凜凜乎庶幾周召之烈焉。

標忠第八十四

藝祖開基妙若神，我今遜德不勞兵。終南翊聖曾全壁，汾晉西祠已結纓。寇氏澶淵平虜力，真皇東作福基成。此回又是忘形久，笑指朱崖道一征。予以世態之變，居寂久之，而符生於皇國開基之初，即寇準也，後澶淵之役，立仁考之功，予與焉，至於以予爲誣，議予涉海至崖，悲夫！

興國第八十五

朝廷中否甚傷情，事業班班可訪尋。政在平江扶大寶，兵虧陝右本天心。便宜坐使兩蜀靜，陞陟恩流三峽深。要識此回神異處，樞中全體土無侵。

予紹聖丁丑，託化張浚，立一世之英表，平江復辟，至聖天子垂統四十餘載，至富平之敗，非浚之失，乃天也。隆興甲申，浚死，葬于衡陽，其子杓欲更葬于蜀，既啓棺視之，威容儼然如存，合郡士夫觀者如堵，以手加額者衆，因從而掩之，倘非予神化，安有此也。予生領天子之權于蜀，掌職文昌之命于天，其功績不忝矣。

止足第八十六

玉策褒稱賜寵光，尊隆師傳總元綱。積功唯喜修天壽，被命寧辭抗帝章。蒞事惟勤居太極，貢賢是任主文昌。錫民五福期康乂，非特區區一雨暘。予隆興之歲，奉玉音加秩，若曰：文昌者，教化之本原，實傳列聖之業，儒士者，道德之淵藪，宜據一德之忠，播告諸天，亶孚有衆，惟文昌司祿主者，職貢舉真君，衛民少傅靈應帝君張某，德被萬物，威形四方，粵自有生，顯從浩劫，順考古道，鑒觀人文，照臨並日月之明，發生佐乾坤之化，是以教耕稼而民人育，每裁制而自優，修禮樂而政

事康，果猷爲之不謬，干戈載戢，陰陽常和，水土既平，休祥時格，託之庶務，試以諸難，皆濟濟以可觀，每多多而益辦，昔自水漕令蒞台衡，尚持救苦之心，誓拯倒懸之念，厥有成績，巍乎難名，察乎九十餘化之行藏，命編羣冊，著以萬二千端之行節，豈曰空文，顛則持而危則扶，惡以懲而善以勸，生民允賴，惟乃之休況，復恢龍漢之圖書，闡鸞臺之典則，欲分身而顯化，率諸聖以混融，萬梵開張，三界均利，宜加峻位，俯叶輿情，名躋南極之尊，禮絕星聯之上。於戲！躋三階而下太乙，久彰應物之符，斂五福而錫庶民，式賴師言之左，誰其能者，汝往欽哉，可特加金闕昊天太師糾察三界禍福事。予辭表略曰：滿盈之懼，上瀆瑩聰，溫厚之辭，時紆訓誥，意敢懷於不敏，欲猶冀於必從。

中謝伏念臣德薄位尊，言輕行寡，徒以效誠之決，未懷引退之私，茲遇盛時，重叨異數，豈不侈高上之賜，其亦畏至窮之災，恭惟天尊上帝，道善貸以且成，明容光而必照，護以小疵之失

察，其由中之言，方將曲致於施仁，夫亦何嫌於遷令。再三辭遜而受之，兼司四方禍福，所以分身應化焉。

訓逆第八十七

密承帝旨下蒼旻，昭示塵寰禍福均。燮理權衡明察訪，幹旋綱紀運經綸。外臺執法專生柄，蜀部觀風秉化鈞。雷震中江王氏子，斲棺只爲逆亡親。

予被命遷師相之職，專生殺之柄，採訪善惡悉便宜也。乾道中，蜀之中江王千者，初其父母自買香木棺，以備身後，王易以杉木，已而又貨之，易以株板，及亡母，則又留株板欲自用，但市松棺，斂母而葬。予於旬日將王以雷擊死，倒植其屍，或走報其子，急往哭而扶屍仆地，日正中，忽雷震擊其子於五里外，泊復回見父屍，依前倒植，凡兩瘞皆震出，遂棺上斲一竅，以竹而掩之，姑免震焉。

戒欺第八十八

爲人貪暴莫如廉，祿筭乘除理灼然。楊震四知名莫掩，子文三已節尤堅。存心勿謂陰無報，失職那堪又減年。

試把徐謙形夢感，黃金特地障前緣。

乾道中，新都丞徐謙者，被檄充勘官，將道經宿徐氏家，主人前一夕夢神人謂曰：明日有徐侍郎宿汝家，宜善遇之，神人乃吾所遣佐神也，至晚，果有徐從政踵門，遂具盛禮。及回，復夢曰：徐子此回受人五百金，枉七人命，天曹已減三十年壽，官止此矣，徐氏遂不復相接，丞公深訝之。抵暮，遣蒼頭語以夢中之事，丞公愧形于色，回任及替舉主改秩，未及命而卒于邸中，年三十四。初傳其死，鄉人未之信，既聞其事，莫不惜其用心之欺焉。

誅悖第八十九

子職須知奉二親，養生送死禮宜遵。遺骸暴露如羈旅，逝魄浮游未掩真。餘子徒勞從孝行，春秋責備在賢人。羅生感夢還鄉舍，方悟陰愆速此身。

梓潼縣羅鞏者，入于上庠，過子祠，默禱於予，一夕，予夢告之曰：子已獲罪天曹，宜急還鄉，前程勿須問也。鞏懇曰：鞏平生操守，鮮有過失，願聞罪由。予曰：子無他，惟父母久

不葬耳，鞏曰：家有兄弟，何獨歸罪於某？予曰：以子習禮義爲儒者，故任其咎，餘子碌碌不足責也。鞏既悟悔恨，治裝回鄉，同舍驚問，鞏以夢告，則未及家而卒焉。

真元第九十

物有潜通信可知，幾回利濟惹閑非。觀風隴蜀存真寂，掌籍南昌應化機。曲意爲民除塚訟，忘形救物拯萎微。從茲願化昌黎後，別有精玄示福威。

紹興庚戌，予遊神察訪，附鸞抵涪之樂温，會龍門韓申之叩予符訣，救其孫坤臣之危疾。予令治病功曹應感，更生以申之宿契所遇，予遂付以符籙。

拔苦第九十一

苦海滔滔浪接天，生來死去各前緣。爭看妄想空花裏，不覺枯骸腐草邊。孔聖殤童因立教，周文葬骨豈知年。皇穹委任司民苦，惻隱之心亦空焉。

予以上帝篤好生之德，而天下多遺骸暴露者付予誘收也，且古史曰：枯骸不知年數，尚感文王之葬，童子結伍以衛魯國，猶存孔子之殤，然今人不

念葬其父母，況於他人而有惻隱乎！予以救苦之功，而陞證安樂不動地，游戲三昧如來果焉。

福瀘第九十二

煙橫瀘水碧漣漪，殺業誰知會遇時。山寺劊身徒憤憤，岳靈未報且遲遲。倘存忠厚佛三昧，不到仇連李萬兒。張信復歸王吉手，彼冤此報罔踰期。

紹興中，瀘帥張孝芳者，爲卒伍張信等所謀而致叛，信爲同伍張昌殺之，瀘遂平定。此乃紹聖中秭歸鄉一僧，俗姓廖名慧覺，居山院蓄資甚厚，集衆作斷瘟水陸，繼而茶寇李萬兒者，率衆欲劫之，初不知其僧設奔於四垣，遂盡陷之，惟李萬兒數人，僧與其徒劊而食之。後李萬兒圖報其冤，岳靈曰：汝報之未可，此人有爲衆作福之緣，未艾更一生可也，惟汝尚有所殺，王吉必報汝也。自是僧慧覺生清河家，即芳也，萬兒乃張信也，吉即張昌也，其報昭然，予遂與英烈統理神衛瀘而平焉。

昭明第九十三

自從太極肇羲皇，神性隨機雲水鄉。

九十四迴彰變化，三千餘行露微芒。雙峰爲建立初宅，七曲重遊參宿方。聊附飛鸞明此意，出書示訓藉揄揚。

予以真元拔苦，後天命荐隆位，登金闕，逍遙紫虛，遊神訪察，寓鸞顯化，示以道德仁義之教，變其偷薄鄙詐之風。忽功曹奏涪陵郡之樂昌運騰里人楊思作文昌星席，予拉崇應爲降福民，朱章感諸真共集，因覽山川之秀，有雙峰者，真神仙窟宅氣宇，予遂爲有君玄初大帝，化建寓室，而韓震巽亦樂施田焉。予遂請于帝，立昭明應化鸞臺，以示四民休徵，今祠已落成之久，爲樂昌之美觀，蓋於吾香火莫非夙昔契，且世人亦知予父玄初大帝尊號，宜益加敬焉，故畢工書之，以示後之士夫云。

終親第九十四

古來喪不過三年，暮死朝生宜吉涓。祭葬克終營馬鬣，哀矜盡孝卜牛眠。風雷感激施甘澤，稼穡重蘇起大田。埋王佳城寢苦畢，神龍輔佐產英賢。

予昔在蜀，栖真於摩維洞，天旱蝗三載，有四境城隍同日申到。蜀民無

知，停柩經年，暴露考妣，血尸衝穢，上天見怒，鎖諸龍潭，早損禾苗。民失秋望，欲望真君眷憫，蘇救生民，予化一居士，隨門勸化，急作窀穸，遂與青源真君射洪真君議，檄九江龍王克沛甘霖三日，已往復蘇多稼，民大悅。時玉帝大怒，九江龍王擅行雨事，追斬龍族，予又化一秀士，普勸龍王龍女及諸生民，不斷音聲誦彌羅御誥，不計萬數，未經三日，祥風瑞氣藹于金闕，奉命特赦龍王之罪。自後孝子順孫，既喪考妣，不敢停柩，克終大事，事親終矣，陰陽和，風雨時，福貽後昆，芝蘭挺秀，壽富康寧。

放生第九十五

濕化卵胎都是人，只緣貪戾著真情。螟螟抱母懷春毓，蠢蠢凌波逐浪生。陽序放魚延紀壽，冲元活鱗慶前程。遞相勉諭放生命，福蔭循環世代榮。予念一切衆生皆有佛性，凡食牛肉者，上天有太牢星，地下有太牢山，專治食牛之人，受苦萬劫，殺牛之人，萬劫無赦，多遭疫癘而死。至若猪羊

犬豕、羽毛鱗介、濕化卵胎，皆受父母生成，因差一念，見出萬形。仲春禁覆巢，此月令之戒也，弋不射宿，孔子之戒也。凡好道修真之士，肥甘不足於口，三寸舌根而已，何如不自殺，不教他殺，不見聞殺，隨喜殺，享此五般淨肉，可以無大過矣，何必貪諸口腹。昔李冲元好食鱗，予知其情，感夢化一阜嫗告冲元曰：我腹中有五千子，我死，子亦死矣，儻能更生，獲福無量，冲元信而捨其鱗，後不復再殺。又陽序一巨商耳，予知其詳，化夢形之曰：子明年當死，若救得十萬生命，可延一紀之壽，序曰：大限既至，何可活十萬生命？予曰：可放魚子，則有報驗，序覺之，大書市肆，遞相勉諭，及不惜己財，贖魚卵投放水中，月餘，予再形夢曰：子救十萬生靈已足矣，可延壽一紀。後子孫世代榮昌，信不誣矣。

中興第九十六

駭聞仙樂奏宮商，大道中興踵後芳。道德五千消劫運，乾坤億載福金湯。黍官景運重宣化，藥笈靈文再闡揚。

正一玄科振寰海，永延皇祚壽無疆。予遊宴玉京，怡真靜默，每念龍虎嗣漢三十六代天師，乖於紹聖，遂托形宗演，果受玄恩。蓋以劫運未消，教風怯振，所幸道德五千文一脉存焉，茲又夢符仙種，立爲三十七代，與棟受命于先朝皇帝，親沾灑翰，頂受師號，中興玄化，衛國衛民，榮祝帝堯萬壽，子禹孫湯，股肱惟良，保劫度齡，民安鴻雁，正一科教由是而興焉。

弭蝗第九十七

隨方分化楚城邊，興利除殘本自然。螟螣害苗農告病，鸞機應念表箋天。肅將雷電彰誠意，無復蟲蝗滿大田。神化昭昭難自泯，因人感事續餘篇。

予自君山主宰，兼洞庭水治，以至蜀門旺化，神遊附鸞于世有日矣，開慶已來，予嘗以荆楚間禱祭魔法，枉所傷害，諂求餘福，鬼毒流盛，而真道未行，有意化之。遂面奏天庭，分命月鸞，開化月峽，予乃隨機應化，以祿嗣應人，以符藥濟世，以吉凶避就之理，示人進退存亡之機，廣正大公平之心，潛消鄙

詐漏慢之習，福善禍淫，惠吉逆凶，陰驅潛感之間，泛應曲當之際，亦有聞風而化者。但以月鸞主司杜南強，常以吾化，體出自然，真常應物，不尚表暴，以驚世疑俗，又以隨寓應酬，多失紀載，越六七年矣。咸淳乙丑，峽境妖蝗，農民告病，糾察具報，以郡守陳順武翼赴聚英集真壇，請表箋天，願弭蝗灾消殄。予遂呼里社詢之，乃云：郡民多於溪澗，或於山澤，撻取蚌蟻，漁獵魚鼈，甚至斷剥蛙鰲，供應主需，枉殺螺蟹，以給口累。百千之命，不供一飽，億萬之靈，始克一飧，是致積累物命，冥漠無歸，氣化生蝗，復害田稻，以絕民命，此蓋物命相償之報，而人未知之也。予因戒敕里社，俾以方隅護度物命外，具錄郡守爲民之誠，深致民食之請，具奏于天，欲得行下田祖秉畀炎火，以去螟螣之患，又請肅將天威，以彰郡侯皈叩鸞化之誠。帝以予奏懇切，特賜俞允，於是陰雲晝合，電雷以風，蝗即盡弭，一郡有秋，農夫胥慶，官吏立予專祠，以彰神貺。咸淳丁卯，春

旱不雨，農業失時，萬民咨嗟，戶口渙散，峽之郡丞程生叔光，以太守赴京，攝行郡事，深致其憂，於是重立玄功，自破己俸，一再禱祈，峽之神祇皆爲感格，以告于予，予以開化分野，有所不辭，又以程生誠交念孚，幽顯貫徹，爲宣九天之命，敕五龍之水，曲施雨澤，數日而足，自是農耕不失，而民業始安。及至夏秋，蟲蝗復作，間爲苗害，蓋以向者戒敕里社，俾護物命，後緣以峽民未知神化，殺傷之俗，循習猶舊，餘殃未除，而乖氣感召故也。而程生於不睹不聞之間，悟有感有應之理，密奏投誠，假托歸叩，予遂達其詞旨，示以未悟，錄其真懇，飛章奏聞，夜雨天一之水，雨洗冥漠之靈，晝赫秋陽之威，一去蝥賊之害。於是因人感事，呼鸞載筆，書弭蝗之化，警殺生之人，附于化籍，播本宣傳，于以彰郡丞至誠贊化之功，于以挽回氣化以成歲熟之效，庶聞之者足以戒焉。是歲秋七月既望，再書于侍生安節野人杜南強所事之鸞壇。

梓潼帝君化書卷之四

①「問道」，據下文，當爲「問道」。

（曾召南點校）

099 清河內傳

經名：清河內傳。撰人不詳，約出於明代。假託文昌帝君自述家世生平，並附宋元加封文昌聖號及行祠記。一卷。底本出處：《正統道藏》洞真部譜錄類。

吾本吳會間人，生於周初，後七十化，累爲士大夫，未嘗酷虐吏，性烈而行察，同秋霜白日不可犯。後西晉末，降生於越之西、嶺之南兩郡之間。是時，丁未年甲子辛亥二月三日誕，祥光幕戶，黃雲迷野。居處地附近海，里人謂清河叟曰：君今六十而獲貴嗣。童稚時，不喜嬉戲，每慕山澤，往往語言若有隱顯，書誦羣書，夜避衆子，自笑且樂，身體光射。居民祈禱，則予嗤而訕，長嘯曰：土木而能衣人之衣，食人之食，享之而有應，謗之而

有禍，我爲人而焉無靈乎！自後夜之怪夢，或爲龍，或爲王者，天符，爲水府漕，自怪而不甚信，爲吉兆。後三農愆旱，膏澤無甦，舞雩祝神，恬然無驗，予思曰：夜寐怪夢治水府，今久當驗。夜往水際，以夢中官銜牒河伯，而驚魂尤恐忸怩不能，忽爾之間，雲四合，風雷震，一吏稽首予前，曰：運判徙居？予曰：非我也，我乃張戶老之子，名亞，後緣水府得達，故字霈夫。吏曰：奉命促子。予曰：家人如何？吏曰：先到治所。予惶惶未決，吏揖，上一白驢而去，俛首里閭，風雨聲中，頓失鄉地。到一山連劍嶺而撐參宮，星也若鳳凰之偃下，有古湫，引吾入一巨穴，門有數石筭，吏曰：民之祈禱，祝此石而有應，名雷柱。吾方褰衣入穴，吏曰：君記周室爲人七十三化，陰德傳家而迄今否？予方大悟，若夢覺也。吏曰：君在天譜得神之品，於人世鮮有知之者，晉不日有中興之兆，君可尋方而顯化。予曰：謝天吏響報也。入穴則若墮千仞之壑，近地而足不沾，若騰

身虛空。有王者之宮，有禁衛，予遂入。果一家悉都其間，改日作儒士而往咸陽，講姚萇之故事《清河內傳》，焚香者切記。

天封聖號

金闕上相檢校太師，九鳳金闕左丞相、混元內輔三清上宰大都督府、都統三界陰兵、行便宜事、管天地水三界獄事、收五嶽四瀆真形虎符龍券、總諸天星曜判桂祿嗣籍上仙元皇真人、司祿職貢舉真君、編修飛仙別籍、掌混元造化輪迴救苦天尊、玉清內境清淨道真、身現紫雲巖、手持如意杖、統御萬靈普濟諸苦大仁大孝大聖大慈都統、混天誠心接物萬天教主、隨願靈應天尊、九天定元保生扶教開化主宰長樂永祐英顯靈應大帝、定慧王菩薩證果迦釋梵正如來、澄真正觀注祿定籍、寶光慈應救劫大慈悲更生永命天尊、隨願靈應天尊不驕樂育天帝。

宋制

勅：朕惟孝悌之至，通于神明，則生爲孝子，歿爲明神，信矣。神文聖武

安福忠仁王，夙著孝行，炳靈西蜀，禦患救災，七曲名山聞天下，而士之發策決科者皆歸焉。有孝有德，徽號允昭，邦人有請，宜復其舊，祇承休命，大庇吾人，可依舊封神文聖武孝德忠仁王。

景定五年三月二十九日。

聖父聖母加封制

勅：記曰：祭有十倫，見事鬼神之道焉，見父子之倫焉，則今之奉祠于神，而併及其父母，尚古意也。靈應廟神父顯慶慈佑仁裕王，神母昭德積慶慈淑妃，篤生聖子，宗主人文，爰自劍之鳳嶺，妥靈藪之龍山，有司推本其由，率籲甚切，茲頒祭澤，並有徽稱，尚先王教孝之意，可特加封神父顯慶慈佑仁裕令德王，神母昭德積慶慈淑恭慧妃。

咸淳五年五月 日。

神后加封制

勅：蜀居坤土，好率善以事神，邦有常彝，惟從夫而爵婦，茲因郊霈，申錫恩榮，靈應廟神后助順協應德慧昭懿妃，端靜其儀，正直是助，並侑龍山

之祀，聿闡鳳閣之祥，錦綬有華，曾俾八徽之極，嘉章疊寵，載更二美之名，永副德儀，明褒陰施，可特加封恭順淑應德慧昭懿妃。

神子加封制

勅：神長子嗣德王，次子昌德王等，昔蜀太守二子，有功烈于井給，銅梁之間皆在祀典，然則裕父功以作民怙，其來尚矣，爾等廟食于西，世濟其美，斯文幸慧，厥有靈光，郊壇告成，並衍徽號，曰孝爲本，從民欲也，尚期居歆，服我成命，可特加封神長子嗣德履孝王，神次子昌德立孝王。

神子婦加封制

勅：神長子婦善助顯懿夫人，次子婦順助慧懿夫人等，序神之長幼，載諸禮經，見神之先後，紀於史傳，爾等席神陰德，廟食一隅，自西徂東，厥施甚溥，並進美號，同彰淑靈，可特加封神長子婦善助顯懿循孝夫人，神次子婦順助慧懿克孝夫人。

神女初封制

勅：淑真妙靜公主，朕稱秩元祀，

敬恭明神於其父子長幼之序，亦既均施爵賞矣，有女其姝，立侍左右，疏封湯沐，實昉于今，尚緣情起義之意，可特封神女懿孝夫人，神婿恭列侯。

神孫加封制

勅：神長孫紹應昭靈侯，神次孫承應宣靈侯，長孫婦淑應夫人，次孫婦慧應夫人等。朕惟劍之鳳嶺，夔之龍山，所以鍾靈而衍秀者，易地皆然也。乃祖乃父，俱有功烈于民，若孫若婦，朕何愛封爵而不與之乎，可特加封神長孫紹應昭靈至孝侯，神次孫承應宣靈順孝侯，神長孫婦淑應紹孝夫人，神次孫婦慧應體孝夫人。

元加封寶詔

上天眷命皇帝聖旨：維明有禮樂，維幽有鬼神，妙顯徵之一貫，在天爲星辰，在地爲河嶽，形功用於兩間，矧能陰騭於大猷，必有對揚之懋典。蜀七曲山文昌宮梓潼帝君，光分張宿，友詠周詩，相予泰運，則以忠孝，而左右斯民，柄我坤文，則以科名，而選造多士，每禦救於菑患，彰感應於勸懲，

貢舉之令再頒，考察之籍先定，賁飾雖加於渙汗，徽稱未究於朕心。於戲！予欲人材輩出，爾丕炳江漢之靈，予欲文治昭宣，爾濬發奎壁之府，庶臻嘉貺，以答寵光，可加封輔元開化文昌司祿宏仁帝君，主者施行。

延祐三年七月 日。

元加封廟額

中書省部太常禮儀院，定擬七曲山靈應廟神文聖武孝德忠仁王，靈異正直，士大夫所共崇禮，朝廷加錫恩數，禮亦爲宜，然神明封爵之隆，莫尊於王，褒稱之美，莫盛於神，文聖武孝德忠仁之號，神備有之，可謂極矣，夫爵已極則無以復加，號已盛則無庸改作，若爲稽其舊記，因以佑文成化之名，施諸廟額，斯足以式彰明神，對揚景運備秩至文，昭示無極矣。

告諭二十一司文

竊以天開泰治聰明，衆拱于文昌帝命，百靈德聚，實敷于渙號，皇極既明，泰階既平，年穀屢成，兵革永清，茲可謂追三代之軌轍矣。久以坤維之神

降，弼輔清朝，粲然東壁之星明，勃興道術，孝友忝膺重，寄俯治下方，每思不稱上帝之委令，常念弗任神職之峻重，邇蒙嘉寵，錫以官班，二十一司屬，各有攸存，千億萬民心，寧無所繫，比則播理于冥冥之內，遠邇弗遺，今則傳揚于赫赫之庭，爪牙布露，衣冠濟濟，相貌堂堂，咨爾羣臣，無譁聽命。爰念端委廟堂而共理，惟二三賢，苟力挽頽波之有人，賢十萬衆，卿等貫古今之清哲，邁宇宙之英雄，忠孝灼天，真後凋之松柏，文武經世爲相濟之鹽梅，久膺不世之威，實負干城之傑，有嘉茂績，敢緩疇庸，雖官吾佐貳之司，實稟于上天之命，聰明正直，毋俟贅辭，分九職于申臺，肅行糾劾，署六卿于北府，專隸舉賢，非夫有令聞廣譽，施諸身識，前言往行，蓄其德則何以助我，佑文成化之績，亦不能儀輔元司祿之班，凡錫福勸善者宜錫，勸者必周，罰惡懲欺者當罰，懲者毋避，金籍注祿，考其實績而敷恩，春源注嗣，原其初心而定賞，貢舉定桂陰鷺孝行者，首選以呈都督，

官吏作德益民者，高甲其第，掌握田蠶而無慝，主領財賦而莫私，主握兵馬幽明之理不殊，主掌雨暘豐歉之機當謹，主典商賈之功罪，主掌道釋之善尤，井井有條，彰彰不紊，天簡注授，實掌人間之生死，飛鸞闡化，乃關世運之盛衰，掌百工技巧者，雖小事必錄，提轄雜流者，每一事必嚴，雪冤平枉，俾天民之得伸，徵劾鬼盜，令天下之寧戢，文昌靈應司，朝奏應夢之不爽，大都督府內，出納總裁之可權，列職分班，各有攸計，上應九天之喉舌，下孚萬國之懽心，惟時舊弼之良，久籍勳勞之著，往聯華于佐府，仍侑食于新庭，駕江瀆之奧區，控岷峨而坐鎮，俾進司于環列，庸增峻于徽章，惟既厥心，乃克有濟，茲者銀蟾皎皎，玉漏遲遲，萬籟寂而庭戶無聲，四方靜而塵囂絕影，虬旌豹節，已臻廟食之儀，龍券虎符，益耀褒崇之盛，欽承休命，挽一世之澆漓，祇勵於猷，還上古之淳厚，往綏爾職，毋負上帝之寵光，罄瀝丹忱，拜揚天子之休命。

行祠記

前渝州刺史廟食璧邑太原趙延之撰

帝君儲精，列宿降自有周。姓張諱仲，字孝友，輔宣王中興，沒爲明神，累朝咸有大功，尤孜孜以忠君孝親，扶植斯文，化淑民心爲任，舊封神文聖武孝德忠仁王。逮聖元仁宗皇帝設科取士，延祐三年春，中書因太常定議，改封廟號，榜曰佑文成化之祠，是年秋，特頒詔旨，褒封輔元開化文昌司祿宏仁帝君。詔若曰：光分張宿，友詠周詩，相予泰運，則以忠孝，而左右斯民，柄我坤文，則以科名而選造多士。又曰：予欲人材輩出，爾丕炳江漢之靈，予欲文治昭宣，爾濬發奎壁之府，然後人益信。夫神之性本所自，與夫翊贊名教者，實昭彰乎國家祀典之不可誣，而趨向敬慕，改行迪德者，猶川會雲滄之不能已焉。神棲劍門，住蜀爲周遊睠顧之地，是有大造于西也，而成都廟貌未嚴，東西二三其祠，不足稱邦人敬在意。天曆改元，星聚于奎，三月甲子，延之自古渝携侍生出鳳山至成都，

縱觀盤桓，慨增舊感。蜀爲多士之林，由張君陰鷲，炳靈掇拾，科第雄飛當代者，迭相踵武，況事神以誠，古俗相尚，王公大人賢大夫士，欲宏其祠而未能，予既知之，得無情哉，故因人所欲，陰相成之，具計遂侈，非興大衆舉大事，一爲春秋譏。後至元二年，前奎章閣大學士翰林學士承旨知制誥兼修國史銀青榮祿大夫中書平章政事魯國公趙世延，告老還成都，不忘舊德，則拳拳於張君，甫下車，先侍生而卜焉。予因以建祠事告公曰：積歲存心願莫之遂，若相神庥，敢披肝膽以勤。六月甲寅，遂卜其事，步城內外，擇異處焉，得西南之雄、坤文之維、地勢之元，公侯之宅之尤者，祠事始定。公自爲疏若干，以鳩其資。四年春王正月，前四川行省參知政事趙成慶，欲蔽厥謀，以畢宏規，三月己丑，戶部侍郎萬嘉聞來會蜀，賦威行愛立理王事暇，天誘其衷，召侍生以下，予具張君出沒之機斯文喉舌，桂祿權衡，及建祠之事以報，侍郎忻然拜曰：蜀有省憲，明當圖之，越

三日，謀及上下，衆願樂從。夏六月朔旦，予命省掾王也先，卜花左右其事，疏至，未越月，省憲官暨賓佐掾屬，下及有司羣吏百有二十餘人，皆割俸以助，幾五百餘緡。冬十月上吉，命千戶侯靖元亨集、太師秦國公之孫，河東翼萬戶侯劉壽安，捐直五百緡，而易其第，祠事始成。其地爲深丈者七十有三，橫左右者半折而曲深，於是來工師整上下，燔屏榴翳，爰墜乃塗，作遠門于外，峙小門于中。二十有五日，具食合樂，侍郎偕參政率百官，以導帝君入焉，十有一月朔，迺仍正屋揭廟額，表佑文成化之祠，迺更廊廡以司左右贊佐，迺位糾察以嚴尊卑陟降，聚德有堂，侑食有所，耽然而輪奐備，屹然而規模壯，不淪於陋，實敞虛曠，豐約得宜，惟稱是適，回視二三，不可同日語矣。嗚呼！神物憑依有時者耶，事關興廢者耶，主盟勝槩者，趙相也，速成其圖者，侍郎也，晨夕劬躬拮据卒徒者，侍生楊世仁也，不避勞勤往來走役於其間者，王鈞、王壽永、何善慶焉。

五年春二月，士夫之賢邦人之良木贊佐，以實侍衛，嘉慶位十有三，咸爭趨而樂成，堂堂冕服，以中居而立侍拱之者，今肅政廉訪使趙成慶完焉。緣古及今，自劍門至州邑，率廟而祀之，京師陝東亦或祀之者，咸敬張君之功，未若今之盛也。帝君文昌之主也，人心

國脉，斯文萬古紀綱天下者，伊誰之力歟？堯舜禹湯文武之跡熄而淳樸衰，天蓋以此誅之啓之也，帝君明道闡教，炳然日星，繼今公侯賢士知崇帝君之祠，則知尊帝君之道之教也，成德從事者，雍然于禮樂之中，熙然于陶鎔之下，則上不負君親，下不負問學，出爲賢卿相，發爲大事業，將項背相望，奚特操紙筆，競辭華，以爲微媚利祿之階哉！詩曰：知我者謂我心憂，不知我者謂我何求。於是蓋亦有所不能已焉。若夫羽儀天朝，錫民純嘏，屢豐年，消疫癘，導和致祥，人才倍出于天下者，輔元開化文昌司祿宏仁帝君望焉。祠之經始于天曆戊辰，落成以至元己卯。樓閣雖未新，承繼之賢，其來

孔多，因事之中，鑿石以記，予既多士夫之請，又感張君夙好之篤，故書梗槩，及主成人名氏，祠建年月遠近之由，俾來者有所覽稽焉。至正元年歲次辛巳夏五月上吉。

勸敬字紙文

士之隸吾籍者，皆自敬重字紙中來，如宋朝王沂公，其父見字紙遺墜，必掇拾以香湯洗燒之，一夕夢宣聖拊其背曰：汝何敬重吾字紙之勤也，恨汝老矣，無可成就，他日當令曾參來汝家受生，顯大門戶。未幾，果生一男，遂命名曾，及狀元第。此事雖遠，可以爲證。予竊怪今世之人，名爲知書，而不能惜書，視釋老之文，非特萬鈞之重，其於吾六經之字，有如鴻毛之輕，或以字紙而泥糊，或以背屏，或以裏褥，或以泥窗，踐踏脚底，或以拭穢。如此之類，不啻蓋覆瓿矣，何釋老之重而吾道之輕耶？是豈知三教本一，而欲強茲分別耳。況吾自有善惡二司，按察施行，以警不敬字紙之類，如平生苦學鷄窗，一旦場屋或以失韻誤字，例

爲有司之黜，終不能一掛名虎榜者，皆神奪其鑒，以示平日不敬字紙之果報也。諸生甘受此報，恬然不知覺，甚至於子孫之不識字，舉家因之而害者，遠則不足以爲戒，姑以近者言之，且瀘州楊百行坐經文，而舉家害癩，昌郡鮮于坤殘《孟子》，而全家滅亡，果報昭昭在人耳目。楊全善亦百行之兄，埋字紙而五世登科，李子才葬字紙而一身顯官，既能顧惜陰報，豈無可不敬畏哉。

戒士子文

聰明正直而依人，寧無所擇，寬厚忠信而好義，是用相仍。故憑有感之精，衷曲示無聲之教化，咨爾有衆，聽予格言。蓋聞富貴在天，得失有命，知之者，安於自然，而罔或控告，昧之者，貪於必得，而有所祈求。或謂精神交而夢寐通，或謂祭祀豐而神祇格，宮殿樓觀，務碧瓦之翬飛，陛戟巖廊，誇朱欄之雕翠，從茲末務，失其本真。不知進退，存亡係彼三班四屬，行藏用捨，考慈五部六臺，既有司存，豈容計取，然不可一拘於前定，天不可再昧於進

修，故修身厲行者，未或降之百祥，反道敗德者，神亦奪其五福，理所著者，人弗知之，是故運數冥符，而反受其殃，災星顯照，而或蒙其吉，造化以之倚伏，神明由是乘除。凡厥儒流，恭行教法，汝等毋欺天遠，毋謂神幽，毋言暗室可欺，毋道明庭可畏，毋凌孤寡，毋侮老成，毋取不義之財，毋淫非己之色，毋厚結他人而親戚歧路，毋義交異姓而兄弟鬩牆，毋恃己長，毋攻人短，毋傲逸樂，毋縱遊畋，毋負才名，毋挾官貴，毋厚仙釋而薄於父母，毋敬鬼神而慢於師資。苟有負於吾言，端不逃於天憲，故平生俊彥者，屢困於場屋，一旦精明者，遽登於鄉書，皆有寅緣，固非造次，世之腹誹心謗者，往往得以藉口，人之面譽背毀者，攸攸姑以欺親，彼司文衡而豈得以私，此權祿籍，而故先有取，濟濟多士，天其或者臨之，巍巍成功，吾則是之，取爾播告中外，咸使聞知。科舉取士，不止一端，要在得人以副衆望，一以陰功孝行爲上，次以處己謙和爲賢，苦學者則酬其

勞，高才者則遂其志，傲忽者則未免黜落，輕薄者姑示勸懲，文章假之以定其去留，神明司之以公其予奪，人不自省，明示訓言，嘗謂惟士無能，苦學爲能，居貧曷富，成名即富，士無分於貴賤，人切在於勤勞，凡大比，先較德業之短長，故有司始定文章之優劣，不可謂前定，而不能力學，豈可以宿緣而自怠操修，名雖曰士，初無士行之寸長，身雖曰儒，徒爲儒服之觀美。不敬天地，不信神明，狎侮老成，輕慢前輩，違逆父母，而逸樂度日，怠忽師長，而放蕩無時，試不遂，則罪有司之不公，榜初張，則謂庸流之濫得，責人者不能於責己，議人者乃所以議天，或恃己之見而遏人之能，或銜己之長而攻人之短，或矜所學而忽略一世，或恃一解而輕視衆人，立身不正，則以曖昧貪饕爲能，用心不剛，則以機巧變詐爲勝，較短論長，而不從公道，奪彼予此，而不恤人言，面譽背毀，而求苟合於人，口是心非，則絕不容於物外，貌雖慈祥，徒巧言而美語，中情多狠暴，好潛賊而陰

謀，不擇乎友，而交不義之朋，不和其室，而淫非己之色，捨己田耘人田，失云多矣，作無益害有益，損孰甚焉。預鄉薦者，自爲志得意滿，不復進修，入省闈者，例曰功成名遂，直可唾取，恃才傲物，挾長欺孤，常交貴結援，而每誇等流，以雙字片文，而蔑無同輩，在市道，則和合貿易以覬其所得，遇州縣，則鬥合爭訟以滿其所欲，不忠不孝，甘心冒法而喜爲非禮，非仁直情，徑行而弗顧，游畋無度，博奕廢時，耽飲而自喪其神，逞威而乃敗於德，致屢困於場屋，安敢望於榮華，況二年初無伏案之功，而一旦遂萌登科之望，稍無成，直歸之命運，纔有力，專務於禱祈，不知天憲之難逃，深恐人心之愈惑，出處語默之際，天必察之，進退予奪之間，神所司者，豈容倖取，不可計求，苟有行業之可書，奚患飛騰之不遂。邇者營業相傳之後，屢有聲名，儒冠世守之家，反被黜落，不知營業之子，安分讀書，無形顏色，每見儒冠之後，自恃名族，多有驕矜，神明公取，專激勵於

輕薄之流，天道左旋，用獎予於淳朴之士。若能自悟，晦迹韜光，望欲有成，勞心苦志，曲盡陰功之事，務存忠孝之心，返乎上古淳朴之風，無流末劫偷薄之俗，自然詩禮傳家，科名復舊，謙和處己，氣象如初，天不負人，人宜力學，凡爲士者，各宜戒之。

老君降生之辰，玉帝御太極之殿修文郎顏公書。

清河內傳

①『寅緣』，當爲『黃緣』之誤。

（曾召南點校）

100 高上大洞文昌司祿

紫陽寶籙

經名：高上大洞文昌司祿紫陽寶籙。撰人不詳，約出於明代。假託文昌帝君降授符圖神咒。三卷。底本出處：《正統道藏》正一部。

高上大洞文昌司祿紫陽寶籙卷上

某貫居住奉道信士某詞稱：本命某年某月某日某時建生，上屬北斗某星君主照，即日虔誠恭詣度師教主天師大真人門下，拜受《高上大洞文昌司祿紫陽寶籙》一部，皈身佩奉，誓以欽崇正教，律己修身，增益才華，開明鑒識，斷除魔障，斥逐邪妖，顯擢科名，進登祿位。受佩之後，不敢輕泄玄文，怨咎道

師，如負盟言，一依文昌上官科法律令。



文昌九天開化品

爾時九天開化主宰澄真正觀寶光天尊，於重光赤奮若之歲、日躔鶉尾

月、望東壁之辰，降于蜀都寶屏山中，和誠應之樓，玄會玉虛之壇，告鸞府侍仙真人劉安勝曰：吾昔奉上帝玉敕，職掌桂籍，興文儒而擢貴品，進賢德而佐明時，故得掌隸天曹，秩專司祿，校錄地府，位司定貴，詮量水府，職在進賢，應三府選舉，吾總隸焉。其選舉之歲，吾同三元三官、五方五帝、三辰五斗、列曜衆星，參統三微，研較氣運，敕天曹定命定貴都司、天府岱嶽地府北酆水府扶桑帝君，集會九天開化文昌大都督府，考定九州分野，合陞選擢魁名品錄、三祿三貴三賢高下，仍較其祖宗父母族屬己身世代歷劫，有無大功陰隲孝行，及有無積孽冤債結惡遺殃，譴罪塚訟，咒詛業根，苦本魔基，并五行命運所得，定方數算，悉皆注定。若世代有大功陰隲孝行，德基豐厚，雖命運衰蹇，以功行勝之，即與添祿加年，陞入貴選，進登祿籍；若功隆德厚，而冤債殃訟未息者，則先令注祿入品，名登賢籍，俟福盛罪滅，方得受祿；若命運合得名秩克貴食祿，而無陰德大功、

忠孝百行者，即當退祿削貴，落籍銷名，以俟建乃立德積善集慶，方與注入貴籍，增祿成名。其或文儒賢士，知命悔過，進德修業，運氣貴而陰功微，業緣縛而冤債累，鬼邪窒其進取，妖魔障其靈鑒者，吾當授以《文昌上宮大洞寶籙》，消諸魔障，啓沃身心。

此文昔祕於元始玉清聖境浩劫天宮金闕玉房雲錦之囊，授之於玉宸大道君，太上老君授受於紫微帝君暨太一元君，次傳於聖祖軒皇，嗣於帝堯、大舜、神禹。禹授於劉月，月授於王經，經授於彭太極，太極授於鄧元，元授於劉誼，誼授於劉洞真，洞真授於王遠，遠授於彭曉，曉授劉希岳，希岳授於蘭公翹，公翹授於彭德直。由是萬聖千真，皆獲受度。宿緣積慶者，求師傳受，必當誠恪投陳，遵依科格，金縉法信，以固約盟，其授籙之師，必經佩持三洞四輔九天金籙之人，方可依科付度，如德秩尚微，功勳未著，不可妄稱師範，輕泄靈文。持受此籙，依按修行，可以解累世冤結，可以止塚訟宿

殃，斷絕惡業地根，摧伏魔基苦本，奪靈鑒之神潛匿，晦文業之鬼遁逃，亂性之妖滅形，障貴之邪挫首。若命運凶衰，定分卑淺，得此祕文，敬而勿怠，精勤香火，存念經訣，上消天災，下禳地禍，增延祿筭，斷絕邪魔，神性清明，文華秀發。若命運未貴，文業未舒，遵奉寶籙，依按修持，惟務濟人，馘毒治病，救及三百六十人者，積成大功，高陞祿秩，注入貴品，進在賢籍，當輔佐明時，得為至貴之臣，祿及子孫，光榮族屬。若能修持經籙中妙行法門，常令身心清淨，神炁精明，年齒既高，當得太陰鍊形，得尸解之道，不墮輪轉，昇入仙都，位為真人。凡清信之士，受吾籙者，吾即奏上玉帝金闕，注錄三元曹府祿貴賢籍，使其身心究竟不昧，應入貴籍，輔佐明時。所有九天較定天曹地府水府三祿三貴三賢科品，宣傳于後：

上元天曹嶽府司祿，分一科三品：
一司 天祿科。
上品紫微天官，中品太微斗官，
下品少微星官。

二司 人祿科。
上品王公卿侯爵，中品方伯監牧爵，
下品百官散秩爵。

三司 幽祿科。
上品嶽府官僚，中品鄴都官僚，
下品扶桑官僚。

中元地府鄴都定貴，分三科三品：

一司 上貴科。

孝行上品，守節中品，陰德下品。

二司 中貴科。

仁慈上品，廉義中品，德行下品。

三司 下貴科。

賢達上品，祖德中品，文學下品。

下元水府扶桑進賢，分三科三品：

一司 上賢科。

至孝上品，大忠中品，慈仁下品。

二司 中賢科。

廉義之賢上品，禮法之賢中品，
智度之賢下品。

三司 下賢科。

篤行之賢上品，才學之賢中品，
分定之賢下品。

已上科品，並以較錄世人，如入科

品者，即與注祿定貴，進在賢籍。吾當遣潢譜仙官，翊贊善功，開明神鑒，仍遣儲佐列神，斷除魔障，授之天章玉文，鎮護身田，兆祥應癘，降中皇真炁，啓沃身心，敕安志益慧之神，安定百關，開聰導明，進其才華，通其靈鑒，一如文昌科法律令。

文昌天潢譜系品

帝君聖誥

金闕上相檢校太師、混元內輔三清上聖大都督府、都統三界陰兵行便宜事、管天地水三界獄事、收五嶽四瀆真形虎符龍券、總諸天星曜、判桂祿嗣籍、上仙英顯元皇真人、司祿職貢舉真君、洞照通真先生、編修飛仙列籍、掌混元造化輪迴六道救苦救難慈尊、玉清內境清淨道真、身見紫雲岩，手持如意杖，統御萬靈普濟諸苦、大仁大孝大聖大慈無上不驕樂天帝、都總混天誠心接物萬天教主、隨願慈應天尊、九天定元保生扶教開化主宰長樂永佑靈應

大天帝君、掌五湖四海總十二河源水府運使、澄真正觀注祿定籍、寶光慈應治世顯道、保安拔罪、更生永命、扶善濟苦、消劫行化純一顯應天尊。

帝君張姓諱亞，上應張翼二宿，生於周初吳會之地，以二月三日聖誕。



混元父母，天地同根。胞胎骨肉，一炁分身。綱維造化，洞照無垠。宣弘大道，濟佑彝倫。靈光下降，百福來臻。斥除邪障，正炁長存。急急一如文昌律令！

顯慶慈佑儲真衍慶天尊，大聖長生壽母元君，
照德積慶慈懿儲祥元君，昭懿冲和洞妙元君，
嗣德文昌衍慶真君，文昌靜應天君，
昌德文昌司祿真君，文昌嗣慶天君，
淑真妙靖文昌萬壽天君，聖宮懿淑四宮夫人，

文昌積慶真人，文昌積慶天君，
文昌襲慶真人，文昌襲慶天君，
靈山大神張忠嗣，蜀北門山神張仲子，

劍山大神張勳，蜀劍山神張孝仲，
金馬山神張烈，趙王劉如意，
文昌紹應侯，文昌昭應公，
文昌承應公，文昌寶靈公，
文昌了喜夫人，文昌妙應夫人，
文昌柔貞公主。

右聖宮曹治八十一仙官，領兵隨錄度。

文昌儲佐列神品



佐神英惠公，顯應協惠夫人，

神嗣濟美公，神嗣濟惠公，

贊福夫人，靖順夫人，

文昌興國大太尉，文昌左右二太尉，

文昌左右二將軍，文昌如意大將軍，

文昌左右二丞相，文昌左右二僕射，

文昌左右二太史，文昌三公九卿，

文昌六曹尚書，文昌御史大夫，

文昌上將真君，文昌次將真君，

文昌貴相真君，文昌司命真君，

文昌司祿真君，文昌司中真君，

文昌司貴真君，文昌司文真君，

文昌定武仙官，文昌定貴仙官，

文昌魁星仙官，文昌解星仙官，

文昌應瑞仙官，文昌降癘仙官，

文昌貢舉仙官，文昌檢陰功仙官，

文昌定予奪仙官，文昌增福祿仙官，

文昌四直功曹，文昌傳奏功曹，

文昌掌桂籍童子，文昌應癘大將軍，

山王明化侯夫人，主八景瑤華院仙官，

鳳凰櫃土地靈應侯。

右儲佐列神，嚴肅威儀，分真降靈，

衛護兆身，一如律令。



劍門山神白圭，西陲飛越山神廉玠，

西域雪山神白輝，劍門山神公元長，

青黎山神吳肩，白龜山神義敏，

大岷山神衛廉，青城山神希夷公，

岷山洞天神彭元，岷山山神何機，

大峨山神曹英，小岷山神虞觀，

峨眉山神李善猷，巫山山神王玄父，

分樟山神張煒，都大總部山神王秀水，

石犀龍洞李若水，灌口太守潭龍神劉成之，

西蜀都城陸章，益州社令神杜其昌，

西蜀劍南社長鄧文，西蜀都社神杜宇，

西蜀西鎮社公章，鳳凰山神獨孤正，

蜀里域神段秀，岷山龍神勾盤恬，

灌口伏龍潭神蹇寵，青衣龍神景伯仁，

越嶲山神蕭福，北門山神張叔和，

西海龍神白龜憫，洞庭龍神景淵，

君山山神唐豐，吳海水神彭暹，

蜀里域神虞奇叔，邛州里域神孫和叔，

蜀檢孝神崔瑄，婆娑巴王神軒安行，

檢孝土地神白致一，漢水邑里土神康潮王，

苴饒邑神公孫長，巴西邑神和來孫，

白馬邑神栢之堅，苴邑神蘇公長，

七曲山神全禮。


右七曲鳳凰諸山佐順龍神四十五部，各領兵度。

文昌天章玉文品

南斗文昌斗章

太極妙化，真文玄機。掌天天文，護地地圖。理水水府，三元共敷。紫庭大告，天地咸敷。如意在心，玉壓同居。此文隱語，三才並居。禮樂既作，混沌已舒。大羅透徹，乘景躡虛。上智有學，訓之下愚。急急一如玉文輪掌律令！

應寶攝妖玉文




此玉文佩眼陸壇立應丁甲日以檀香降刻之

子上冲午，爲之端門。申宮加酉，出入爲尊。辰來求戌，魁罡正元。卯上通寅，天元地輪。丑內尋巳，闔闢兩全。未中得亥，伏逆相存。

右隱訣祕咒，出文昌三炁至真之文，得之者，宜齋心鍊炁，捨妄從真，絕口是心非之無諸邪想，自然增益聰明，文華奮發，越章天印，可以佩受，寶而敬之，辟惡除邪，消諸魔障。



文昌天
心玉文




上天所寶秘之玄都
萬神侍衛三界奉行

文昌上宮，越章玉文。上制天根，中檢星辰。下察地水，通幽徹冥。開仁去鈍，辟斥妖氛。剪却三尸，馘滅九蟲。魑魅潛藏，早滌無迤。受持不怠，白日同昇。

文昌中皇生炁品

中皇九道司命生炁符圖





人生受命，稟質性根不一，或英華文明者，宿緣之慶，頑愚迷鈍者，宿業所致。考功行者，百僅一二，進玄機者，千無二三。如皈心嚮道，參文究玄，當佩生炁符圖，誦豁落真言，自然感召文昌，仙官神吏衛護兆身，增益智慧，詞藻煥爛，進祿成名矣。

子丑生人趨文慕玄，敕天罡八學靈官附身心。
寅生人學文進玄，敕威烈北府真官附身心。
卯生人通文究玄，敕定神養銳位仙伯附身心。
辰生人向學入玄，敕安惠叶文真人附身心。

巳生人習經耽玄，敕仁濟威廣仙郎附身心。
午生人學經博玄，敕寶益定光太史附身心。
未生人篤學明玄，敕太華六行尚書附身心。
申生人進鸞陞玄，敕元命總轄真卿附身心。
酉生人習文趨玄，敕東華繡衣使者附身心。
戌亥生人明經演玄，敕文昌義濟王附身心。


立春前後管乾  立夏前後管離 

立秋前後管巽  立冬前後管坎 

已上通玄究微之士，不可不攷其源。方知稟受，貴賤等差，命分深淺，方寸湛然。功生愧負，則所求無不如意，切宜詳之。

文昌生炁合形總真元命豁落真言
唵哩喇哪，啊息吸吽吽，訶訶魁
啊，嚶咩菩提唵。適洞吒喃，唧虛空
巡，腔辜頂越，轟轟霓霓。閃閃爍爍，
光文華清，定意疾縛，七星竅堯。近都
黃神，摩訶般若，定丁都律，吐納真元
攝。混元真伯，通悟玄機。一如律
令！

文昌定志益慧品



文昌司祿定貴安神益慧神咒

東河之陽，西林之南，有神王華，受命元皇。主鎮文昌，貴司之男，八會振文，九光明儒。太一定策，玉女輔書，龍女十千，文房佐軀。太吏百萬，定心握樞，使我一身，與靈通明。道合乘時，萬章洞輝，謁帝挺文，仰契皇經。使我策宣，坐致昇平，吉日受符，披章行功。八威助膽，龍曜飛空，十聰益慧，豁落除蒙。意寧志顯，萬化疏通，神予之鑒，天佑之文。貴宜乘之，祿宜與增，使我大成，文華益昌。擷藍龍

姬，保宣正陽，一誦玉章，九天開光。萬化洞啓，神明主張，使我神功，高致忠良。

一如律令！


右玉章是名九天開化安神益慧神咒，乃无上浩劫大洞之文，言無韻麗，曲無華宛，深不可測，妙不可言，下世莫能聞，凡濁莫能傳，祕之紫陽玉笈雲錦之囊。昔九龍始祖三元太素道君，於元始天尊前主盟請佩，而傳於上元夫人、雲華夫人，使下教世間，通儒賢士，誠恪佩誦，即得文彩昭明神予之鑒，高登貴選，佐助皇猷，廣振文風，宣揚正化，永為身寶，準教奉行。

高上大洞文昌司祿紫陽寶籙卷上

高上大洞文昌司祿紫陽寶籙卷中

據某貫居住奉道信士某詞稱：本命某年月日時建生，上屬北斗某星君主，即日虔誠恭詣度師教主天師大真人門下，拜受《高上大洞文昌司祿紫陽寶籙》一部，皈身佩奉。誓以崇敬帝真，遵依科戒，進修文業，積習善功，悟太上之玄機，消除魔障，登文昌之貴籍，顯達科名，濟世安人，保身利物。有違科約，以身謝天地水三官，一如玄科律令！

文昌簡閱寶圖品




夫文昌寶圖，乃自混沌初分，太元高上玉皇之炁結而成文，丹霞碧雲自然成章，出於元始天王，同出而異名，闕於上清龍羅玄鸞之臺，安紫陽九光鳳華之闕，文昌皇人玄元道君夫子爲文昌圖闕帝主，命此寶圖生化文儒賢士，輔佐聖統王道，使英俊文物世代克昌，佩受之士即得玄炁降神，文華清秀，才識通明，心光自然無所不至，百千障礙不能壅蔽，當有侍圖金童玉女、

天官神吏等三百六十人隨符護身，子宜敬奉焉。




文昌侍圖金童三百六十人度，
文昌侍圖玉女三百六十人度，
文昌侍圖天官三百六十人度，
文昌侍圖神吏三百六十人度，
文昌三五定命吏三百六十人度，
文昌三五定心吏三百六十人度，
文昌三五定志吏三百六十人度，
文昌三五定意吏三百六十人度，
文昌三五定聰吏三百六十人度，
文昌三五定慧吏三百六十人度，
文昌三五定膽吏三百六十人度，
文昌三五和神吏三百六十人度，
文昌三五合神吏三百六十人度，
文昌三五通達吏三百六十人度，
文昌三五開鑒吏三百六十人度，
文昌三五通識吏三百六十人度，

文昌三五却邪吏三百六十人度，
文昌三五除障吏三百六十人度，
文昌三五生炁吏三百六十人度，
文昌三五文章吏三百六十人度，
文昌三五開性吏三百六十人度，
文昌三五注祿吏三百六十人度，
文昌應癆吉神吏三百六十人度，
文昌佐賢龍女吏三百六十人度，
文昌輔文玉女吏三百六十人度，
文昌輔文水吏玉妃一人度，
文昌黃神玉印太一使者八人度，
文昌越章鑲天玉女八人度，
文昌八景瑤華院印力士一人度，
文昌主劍神王玉女八人度。



右文昌寶圖玉符，給付弟子某撥隸金童玉女仙官神吏，如遇三元日，齋心沐浴，投誠醮祭，以求吉癘，進名科品，一如盟約信受奉行。

文昌司祿玉符品



上元天曹司祿真君一人，
上元天府司祿真君一人，
上元天府司天祿吏八十一人，
上元天府司加天祿吏八十一人，
上元天府司人祿吏八十一人，
上元天府司加人祿吏八十一人，
上元天府司天爵吏八十一人，
上元天府司加天爵吏八十一人，

上元天府司人爵吏八十一人，
上元天府司加人爵吏八十一人，
上元天府司幽祿吏八十一人，
上元天府司加幽祿吏八十一人，
上元天府司幽爵吏八十一人，
上元天府司加幽爵吏八十一人。
右司祿玉符，給付弟子某佩受修持，崇奉文昌司祿真君，誦詠大洞紫陽玉章，自然感召仙官神吏，增益智慧，通才輔文，進登祿位，一如盟言。

文昌定貴金簡品



寶題



始青天開化主宰定貴真君，
太青天開化主宰定貴真君，
始丹天開化主宰定貴真君，
太丹天開化主宰定貴真君，
始素天開化主宰定貴真君，
太素天開化主宰定貴真君，
始玄天開化主宰定貴真君，
太玄天開化主宰定貴真君，
中央大梵天開化主宰定貴真君，



中元地府定上品貴人吏三十六人，
中元地府定中品貴人吏三十六人，

中元地府定下品貴人吏三十六人，
 中元地府定帝聖貴人吏三十六人，
 中元地府定王爵貴人吏三十六人，
 中元地府定公爵貴人吏三十六人，
 中元地府定侯爵貴人吏三十六人，
 中元地府定伯爵貴人吏三十六人，
 中元地府定男爵貴人吏三十六人，
 中元地府定子爵貴人吏三十六人，
 中元地府定郎官貴人吏三十六人，
 中元地府定大夫貴人吏三十六人，
 中元地府定父母封爵吏三十六人，
 中元地府定官爵官吏三十六人，
 中元地府定蔭子貴吏三十六人，
 中元地府定封妻爵吏三十六人，
 中元地府定富貴全籍吏三十六人，
 中元地府定貴族官吏三十六人，
 文昌掌祿籍判官主簿書列定上品貴人一千二百人隨錄度。

右定貴金簡，真君仙吏依科傳授，
 付弟子某敬奉修持，當得書名金簡，注上中元定貴籍中，列字上品，榮身享祿，顯達功名，忠孝君親，流澤後裔，一如盟約奉行。

文昌進賢玉策品




下元水府進上科上品貴人吏從一百二十人度，
 下元水府進上科中品貴人吏從一百二十人度，
 下元水府進上科下品貴人吏從一百二十人度，
 下元水府進中科上品貴人吏從一百二十人度，
 下元水府進中科中品貴人吏從一百二十人度，
 下元水府進中科下品貴人吏從一百二十人度，
 下元水府進下科上品貴人吏從一百二十人度，
 下元水府進下科中品貴人吏從一百二十人度，
 下元水府進下科下品貴人吏從一百二十人度。

二十人度，
 下元水府進下科下品貴人吏從一百二十人度，
 下元水府進賢女神妃從一百二十人度，
 下元水府進賢龍女神妃從一百二十人度。



右進賢玉策，水府官吏龍女神妃衛護，受錄弟子某精勤佩奉，進德立功，上佐皇猷，垂名昭世，一如盟約奉行。

文昌消魔金篆品



護國消魔金篆中功曹神吏
 第一功曹輔興領將一萬人度，
 第二功曹荀明領將一萬人度，
 第三功曹費陟新領將一萬人度，
 第四功曹龐玠領將一萬人度，
 第五功曹魯鏐領將一萬人度，
 第六功曹宋炳領將一萬人度，
 第七功曹高逸領將一萬人度，
 第八功曹趙櫓領將一萬人度，
 第九功曹趙期領將一萬人度，
 第十功曹王石領將一萬人度，




右消魔金篆，功曹仙吏一合下降擁護，弟子某鎮衛心田，開明真性，進貴進祿，克亨克通，以太和真炁止訟消殃，以大洞仙兵摧魔斥惡，解釋冤仇業債，斷絕苦本地根，文德日昌，才名顯達，進登貴籍，輔佐明時，一如文昌科法律令。

文昌元綱演化品


文昌元綱演化品
 文昌元綱演化品
 文昌元綱演化品

紫微上宮文昌太極都督靈章，上可保制劫運，宣化天機，中可以飛鸞演化，濟世安民，下可以保身護命，度厄延年，得悟之者，證聖成真矣。




文昌東壁璇璣品

東壁圖書瓊瑤玉文



五運合景，東壁圖書。先天先地，合璧連珠。正真生炁，運合化車。修文偃武，洞達玄都。少微處士，君子多居。臣今學譜，願入仙衢。澄真正觀，如意寶書。唵嚧嚧嚧嚧嚧，急急一如溥天大

元帥口敕律令！



右東壁圖書瓊瑤玉文，上應九天自然之道，為文昌府玄祕之文，得之者，開明神鑒，進益才華，星宿垂光，降祥生炁，滅諸障礙，消諸不祥，一如大洞文昌科法律令。

文昌宮曹騎衛品



文昌大洞寶籙建節大將軍天騶甲卒

神吏一萬人度，

文昌大洞寶籙監功大將軍天騶甲卒

神吏一萬人度，

文昌大洞寶籙騎衛大將軍天騶甲卒

神吏一萬人度，



九天開化，浩劫文昌。一炁周流，玄造翕張。萬神奉令，赫奕飛揚。玉符金篆，收滅瘟黃。吞魔食鬼，怪孽消亡。威振宇宙，萬劫難當。隨吾敕召，青律有常。毋違盟誓，立見神光。急急一如文昌律令！


治正執正吏百二十人度，
消魔按魔吏百二十人度，
收瘟食瘟吏百二十人度，
收魔食魔吏百二十人度，
收毒食毒吏百二十人度，
收鬼食鬼吏百二十人度，

收神食神吏百二十人度，
 收炁食炁吏百二十人度，
 收邪食邪吏百二十人度，
 收精食精吏百二十人度，
 收妖食妖吏百二十人度，
 收怪食怪吏百二十人度，
 收殍食殍吏百二十人度，
 收蟲食蟲吏百二十人度，
 誅邪破廟吏百二十人度，
 治病神醫吏百二十人度，
 驛馬上章吏百二十人度，
 飛龍騎吏百二十人度，
 右官曹建節監功騎衛大將軍天騶甲
 卒收邪驅瘟神吏，護衛弟子某身有光
 明，心生靈鑒，滅諸邪障，驅卻不祥，
 瘟疫無侵，怪妖削迹，應諸求禱，隨
 願克成，佐治皇風，敷揚正化，一如
 文昌主宰紫陽金格，宣令奉行。
 弟子某即日虔誠恭詣度師教主天師
 大真人門下，拜受太上經錄，皈身崇
 奉，受佩之後，不敢始勤終怠，輕泄
 靈文，如負盟言，一如玄科律令
 高上大洞文昌司祿紫陽寶籙卷中

高上大洞文昌司祿紫陽寶
 籙卷下

據某貫居住奉道信士某詞稱：本
 命某年月日時建生，上屬北斗某星君主
 照，即日虔誠恭詣度師教主天師大真
 人門下，拜受《高上大洞文昌司祿紫陽
 寶籙》一部，皈身佩奉行持，端冀開明
 真性，通悟本心，弗措於學問辨思，勿
 非於視聽言動，進修德業，超益才華，
 名成而贊輔皇猷，祿遂則宣明正化，致
 君於唐虞之上，濟民於成康之時，封及
 祖宗，澤垂後裔，誓勤修奉，永佐昇平，
 如或背盟，一依九天主宰元降律令！

文昌蒼天育神品



應春分四陽之炁

東方青霄主宰文昌大洞紫陽玉章

第一


紫陽開玉笈，元始出金章。洞關

青華府，昭明太一光。蒼晶回七宿，萬
 炁贊文昌。頡頏顯佐命，通濟永無疆。
 此玉章，每旦調聲正炁誦之九過，生
 育元神，名登貴品。

東方蒼天開化主宰青霄育神功曹一
 人、吏六人、大洞天騶甲卒兵萬人度。



文昌陽天輔文品



應立夏六陽之炁

東南方碧霄主宰文昌大洞紫陽玉
 章第二

大洞迴風振，龍威六氣宣。紫陽

敷玉策，定貴下三元。辟斥陰魔障，開


明正性傳。斯文垂寶運，通濟永無愆。

此玉章，每旦平心正炁誦之九過，輔益文學，名進賢科。

東南方陽天開化主宰碧霄輔文功曹一人、吏六人、大洞天騶甲卒兵萬人度。



文昌炎天明真品



應夏至一陰之炁


南方丹霄主宰文昌大洞紫陽玉章

第三


九華敷妙炁，太一輔丹元。開化明天斗，靈光灼至賢。帝心符寶策，神性合龍編。會集中和景，斯文保大全。

此玉章，每旦頓神調炁誦之九過，開明真性，穎悟良能。

南方炎天開化主宰丹霄明真功曹一人、吏六人、大洞天騶甲卒兵萬人度。



文昌朱天通玄品



應立秋三陰之炁


西南方景霄主宰文昌大洞紫陽玉章第四

第四

建輝凝八野，景策輔中皇。丹田舒靈炁，雲華脅智光。欻盧翦魔力，真宰啓天章。文華資大業，通濟永弘昌。此玉章，每旦調神理炁誦之九過，通

徹玄機，神光自生。

西南方朱天開化主宰景霄通玄功曹一人、吏六人、大洞天騶甲卒兵萬人度。



文昌昊天人賢品




應秋分四陰之炁

西方玉霄主宰文昌大洞紫陽玉章第五

第五

紫陽敷太昊，華質自資深。月母生金后，玄天益帝心。太真歌舞翻，牝牡合重陰。文道由昌盛，彤芝茂玉林。此玉章，每旦平心正炁誦之九過，入登賢籍，克悟大道。

西方昊天開化主宰玉霄入賢功曹一人、吏六人、大洞天騶甲卒兵萬人度。



文昌幽天立德品




應立冬六陰之炁

西北方太霄主宰文昌大洞紫陽玉章第六

北號名幽幽，文豪枕太霄。上天開大化，紫極正魁杓。元父生壬好，文昌發洞謠。九龍宣貴籍，妙用益玄寥。此玉章，每旦調神正炁誦之九過，建立德基，才猷超邁。

西北方幽天開化主宰太霄立德功曹一

人、吏六人、大洞天騶甲卒兵萬人。



文昌玄天應貴品




應冬至一陽之炁

北方紫霄主宰文昌大洞紫陽玉章第七


玄一弘元始，靈通大妙神。弘文翊昌運，啓武鎮魔軍。翕合生神秀，英姿與日新。顓陽參大化，通濟輔天人。此玉章，每旦調聲平炁誦之九過，上應貴選，神助文捷。

北方玄天開化主宰紫霄應貴功曹一人、吏六人、大洞天騶甲卒兵萬人度。

人、吏六人、大洞天騶甲卒兵萬人度。



文昌變天進祿品




應立春三陽之炁


東北方琅霄主宰文昌大洞紫陽玉章第八

變羨崑崙頂，三神覆北艷。琅霄專主宰，開化翊成功。大洞陽符質，清生化紫彤。膠修流梵寶，通濟永昌隆。此玉章，每旦平心理炁誦之九過，進擢祿司，揚名濟世。

東北方變天開化主宰琅霄進祿功曹一人、吏六人、大洞天騶甲卒兵萬人度。




文昌鈞天成功品



應四季二陽五陰、二陰五陽之炁

中央神霄主宰文昌大洞紫陽玉章
第九

太極鈞天母，中央鎮斗樞。八元生一炁，九道會中書。應化文華盛，開明帝德餘。斯文新大業，通濟利皇居。此玉章，每日調聲正炁誦之九過，行修功顯，萬願克成。
中央鈞天開化主宰神霄成功功曹一人、吏六人、大洞天騶甲卒兵萬人度。



文昌應癘八圖品

右大洞文昌紫陽玉章九品，每旦平心定志，調聲正炁，稽首恭禮文昌司祿真君几前，各誦九過，自然感徹諸天，當得九霄定貴司祿功曹仙吏天騶甲卒下降，翊衛兆身，滅除障礙，進文達德，顯名著功，輔佐皇風，宣行大化，一如紫陽律令！


虛靖天師曰：此文乃無上天曹文昌司祿真君九天開化主宰，於先劫拜三元太素道君、上元夫人、靈華上宮夫人傳授，此籙號《文昌司祿輔文應癘紫陽寶籙》，昔秘於玉清大有金闕玉房之

中，紫陽雲錦之囊，敕九天儲福尊神侍衛，天騶甲卒護錄司命司祿真君，予奪司都天大丞相予司奪，司定貴成功司九霄功曹官吏等，衛護玄文，明取儒士，以應時選，贊翊皇猷，佐運昇平，歷世寶之。受此文者，不虛其傳，必先形諸癘想，或日見異瑞為徵兆，乃受籙之報也，若得癘應，必登貴品矣。

應貓玉



應鹿白



應鬼大



應虎五斬法



應馬白



應牛黃



應犬黑



應人三擊怒



司祿譜云：已上八圖寢應，或顯見於朕兆間，或示像於寢寢中，皆為奇瑞，必獲貴選。略述十徵，以見先兆。

唐德宗時，姚煒乃崇之後，力學能文，壯志未諧。一日得遇方士賀達，即知章之玄孫也，授以斯錄。未授間，煒寢枕中有白貓，及授錄開閱，果有玉貓應之徵，是年登第，後至侍從。

蜀廣政中，綿州高慶孫，寢乘牛扣角，因與玉局觀道士胡道遠語及此寢，道遠賀曰：君今年必中解科，蓋刀牛者解字也，寢此為瑞。果如其言，遂中高選。

唐昭宗時，士人朱渙者，文學俊秀，受此錄於宗人朱道元，寢斬五虎，次年登第，官至清近。

宋太宗景德中，周良輔受此錄於萊州道士劉若拙，寢逐群鹿，為鹿所踐，斃路中，寢驚，其年登科，官至帥臣。

神宗時，眉州蘇軾，得此錄於鄉東墓頤山處士黃若水，其父洵，寢見書笥中有大鬼頭，驚而覺，其年軾兄弟俱登

科名。

蘇軾之次子迨，一夕寢擊三人立死，以為不祥，語其兄邁，邁賀曰：奉慶三元之選，必吾弟也，果如其言。

洪州黃庶字亞夫，寢黑犬護其足，蓋庶受此錄於齊先生坐下，以為吉兆，當年登第，官至太中大夫、大理寺丞。

晁公武，字子正，上元夜寢擊死同齋三士人，被官吏縛之有司，及至獄，見其兄公愬字子西，已先縛在獄，驚覺而不言。因到利州寶峰遇魯道士，遂出示此錄，覽至應寢圖，有怒擊三人應之徵，遂設醮受此錄，後伯仲果中高第。

龐武太師，未遇時，遊洛西鳳林菴，有道士蒙吉者與之飲，是夕酒酣，宿於菴中，寢為白馬所齧，甚痛，及覺，以語吉。吉曰：公得八圖之應，乃出此錄示之，就以傳授，其年登科，不十五年，官至執政，父子皆為太師。

建炎末，邛州劉浩然，少讀書謀進取，寢司祿真君授以文昌之錄，既覺，錄以記之，遂詣龍虎山拜謁於三十代

天師，求受此錄，天師取以示之，天師曰：此錄非子成名，子當傳之，度及三貴，受訖不能詳其言。紹興中，浩然行三洞法錄，符藥靈顯，能出神拜章，逆知人未來休咎，為當時士貴所稱。隆州虞允文字彬父，聞其名而扣之，浩然謂允文曰：君中年榮貴，必至執政，可以受錄，扶文進業，允文曰：何錄可受？浩然乃以此錄授之。後一年，允文在跨鰲齋中，寢擊三人卒而流汗，及披錄中，見有此徵，次年果策名在三元之魁，後為宰相。

凡賢士名儒受錄之前，先得寢徵，便當拜師求受此錄，則以迎合天意，必獲功名之報。若猶豫生疑，不能信奉，則予奪司之神，伐人之靈鑒，削人壽祿，終無成也。若受錄之後，有此寢徵，皆當成名，寢應於受錄之前為上寢，應於受錄之後者次之。若敬奉此錄，則輔文進業，生九道文昌之炁，使宿昔冤訟自雪，祖宗殃注不胤，神不能奪其鑒，魔不能障其才，猷命運之，凶躔不能加馱，惡煞不能肆其威，定志開

心，有神益慧，科名顯達，祿及子孫。若輕慢靈文，妄示非人，則三官鼓筆，罪報不輕。

高上大洞文昌司祿紫陽寶籙卷下

請籙法詞

高上大洞文昌司祿紫陽寶籙法詞

維某年月日，具鄉貫居住奉道弟子某人本命某年月日時建生，上屬北斗某星君主照，即日虔誠恭詣度師教主天師大真人門下，拜受《高上大洞文昌司祿紫陽寶籙》一部，敬奉修行。伏以玉篆瓊書，實胚胎於太極，金臺桂籍，悉隸屬於文昌。蘊妙凝玄，含精毓秀，故造化生成，默而有應，於陰陽消長，合以無爲，自流形符張翼之精，累弘教翊君臣之道，由是功高金闕，司祿籍於天曹，貴掌瑤圖，示銓衡於人爵，昭垂妙範，統制文綱，黜陟無私，古今有賴。伏念某生逢昭代，際遇真風，稽首投誠，願佩九天之祕典，進文益智，冀通一貫之微言，志早遂於青雲，盟有同於白日，仰希付度，俯謹修崇，某下情無任懇禱之至，謹詞。天師門下據弟子某齋持質信詣道自陳，求受《高上大洞文昌司祿紫陽寶籙》一部，終身敬奉，及請真

師寶諱符圖經訣，依按修行，即日告盟天地，立誓三官，破券分環，依科傳授，給付如後：

籙一部上中下三卷

九天開化品，天潢譜系品，儲佐列神品，天章玉文品，中皇生炁品，定志益慧品，簡閱寶圖品，司祿玉符品，定貴金簡品，進賢玉策品，消魔金篆品，元綱演化品，東壁璇璣品，宮曹騎衛品，蒼天育神品，陽天輔文品，炎天明真品，朱天通玄品，昊天入賢品，幽天立德品，玄天應貴品，變天進祿品，鈞天成功品，應籙八圖品。

儀式

盟真合同環券一封。
正一修真旨要節目。

祖玄真三師寶號

祖師九天開化主宰慈應大帝大慈更生永命天尊。

玄師天府掌水陸都轉運使總桂祿二籍孚澤大帝。

真師大成至聖文宣王文昌皇人九天玄聖道君。

經籍度三師法諱

經師上清三洞經籙南曹真士玉府上卿都天大法主嗣漢四十二代天師張正常。

籍師上清三洞經籙太極執法真宰靈寶領教真人都天大法主嗣漢四十三代天師張字初。

度師上清三洞寶籙靈寶領教玄化真人南曹執法仙宰都天大法主嗣教四十四代天師張字清。

臨壇師法名

監 度 師，

保 舉 師，

證 盟 師，

右伏以文昌祕典，掌九天司祿之銓衡，大洞靈章，闡七曲真仙之治化，雲篆五文而開廓，金書八角以垂芒，昭昭乎帝御所臨，洋洋乎神明如在，修之則貫通至理，悟之則超契玄微。惟以進文業於身，惟以顯功名於世，稱揚莫盡，蘊奧難名。某誠意正心，修身謹行，遵承聖訓，未能寡過而寡尤，皈奉真宗，曷悟常清而常靜。伏願祿登桂籍，

名上藥宮，一念通真，徹明經之旨趣，三元定貴，列上品之科名。恪謹盟言，永為身寶，倘違初志，甘伏憲章。

高上大洞文昌司祿紫陽寶籙法詞

(曾召南點校)

101 太上老君說五斗金章受生經

經名：太上老君說五斗金章受生經。撰人不詳，約出於唐宋間。假託太上老君為五斗星君等宣說五方金章靈符，勸人施財設醮，誦經祈福。一卷。底本出處：《正統道藏》洞神部本文類。

爾時太上老君在太清境上、大赤天中、黃金殿內，召五老帝君及東斗注箒君、南斗上生君、西斗記名君、北斗落死君、中斗總監君、九天生神君、九天注生君、九天注祿君、九天掌籍掌箒君、九天財庫祿庫君、九天消災散禍君、九天聖母九天太一元君、九天監生大神、北斗七元星君、南斗六司星君、本命元辰建生星斗君，各隨本部功曹靈官、金童玉女無量聖衆，一時同會，

稽首禮拜，燒香散花，步虛旋繞，長跪道前，諦聽法言。


太上老君廣宣要妙，告示五方五老一切聖衆曰：吾昔於混沌之中，天地未分，元化體一，布氣十方，成就萬象，生天生地，負陰抱陽，陽氣上升，化生諸天，陰氣下降，化生諸地，陽之餘氣化為男子，陰之餘氣化為女人，陰陽二氣，混合自然，生生化化，乃有人倫。既有人倫，宿命因緣，有善有惡，有長有短，有貴有賤，有富有貧，善惡之報，如影逐形，如響應聲，作善善應，作惡惡成，種蘭得香，種粟得糧，為善降祥，為惡降殃，一切因緣，皆由福業。且人生下土，命係上天，人之生也，頂天履地，有陰有陽，各有五行正氣，各有五斗所管，本命元辰，十二相屬，且甲乙生人東斗注生，丙丁生人南斗注生，戊己生人中斗注生，庚辛生人西斗注生，壬癸生人北斗注生，注生之時，各稟五行真氣，真氣混合，結秀成胎，受胎十月，周回十方，十方生氣。包羅元始，杳杳冥冥，其中有精，恍恍惚惚，其中

有物，視不見我，聽不得聞，離種種邊，名為妙道。妙道在人，不可輕失，失之甚易，保之甚難，多迷真道，多逐邪源，多好姪殺，多好貪嗔，多沉地獄，多失人身。受生之時，五斗星君，九天聖衆，注生注祿，注富注貧，注長注短，注吉注凶，皆由衆生，自作自受。若人在世之日，心崇大道，供養天尊，孝順父母，和同六親，不嫉不妬，不貪不姪，或持齋戒，或作善緣，或受三戒五戒，十戒十二可從戒，十四持身戒，二十四戒，三十六戒，七十二戒，一百八戒，三百大戒；或修上清齋、金錄齋、三元齋、三七齋、庚申齋、甲子齋、本命齋，如是齋戒，若有善男子善女人受持之者，名係天人，世世生生，不失人身，富貴聰明，人中殊勝，五體具足，十相端嚴。且人之生也，皆受五方五老帝君各降真氣，金章靈符，混合自然，化生為人。

吾今宣說東方第一金章靈符真文神咒：


東方九炁，始青天中。青靈始老，

九炁天君。真人按筆，下注人身。木德結秀，會道合真。



此章靈符鎮人肝中，若人肝受病，以朱書燒灰服之，立愈。


南方第二金章靈符真文神咒：
南方三氣，赤靈丹天。丹靈真老，三氣天君。司命司錄，絳闕尊神。火德明秀，會道合真。



此章靈符鎮人心中，若人心受病，以朱書燒灰服之，立愈。


中央第三金章靈符真文神咒：
總監衆靈，十二之天。元靈元老，

十二天君。都錄校籍，主鎮脾神。土德鎮秀，會道合真。



此章靈符鎮人脾中，若人脾受病，以朱書燒灰服之，立愈。


西方第四金章靈符真文神咒：
西方七氣，太白之天。皓靈皇老，七氣天君。記名安魄，主鎮肺神。金德堅秀，會道合真。



此章靈符鎮人肺中，若人肺受病，以朱書燒灰服之，立愈。

北方第五金章靈符真文神咒：
北方五氣，玄中之天。五靈元老，五氣天君。追生落死，主鎮腎神。水

德善秀，會道合真。



此章靈符鎮人腎中，若人腎受病，以朱書燒灰服之，立愈。

爾時老君再說此五方真文神咒，即召五方五斗星君，降此靈符真文神咒，各授五斗星君，即以金書玉篆，各依其方，總得受持，注生世人，以此靈文安鎮五臟，各鎮人身。凡人性命，皆由九天生氣五斗星君本命元辰主掌靈神，若復有人能知根本，但遇三元五臘本命生辰北斗下日，嚴置壇場，隨力章醮，供養五方五老，乃吾化身注生聖衆五斗星君、本命元辰，醮獻錢財，以答衆真，注我生身，得生中國，得遇大道廕佑之恩。當生之時，天曹地府願許本命錢，且甲乙生人，命屬東斗九氣，爲人受生之時，曾許本命銀錢九萬貫文；丙丁生人，命屬南斗三氣，爲人受生之時，曾許本命銀錢三萬貫文；戊

己生人，命屬中斗一十二氣，爲人受生之時，曾許本命銀錢一十二萬貫文；庚辛生人，命屬西斗七氣，爲人受生之時，曾許本命銀錢七萬貫文；壬癸生人，命屬北斗五氣，爲人受生之時，曾許本命銀錢五萬貫文。若有善信男女，種諸善根，善根不斷，世世爲人，當須醮送五本命錢，天曹地府各有明文，十二本命，十二庫神。

子生之人第一庫中，辰生之人第二庫中，申生之人第三庫中，亥生之人第四庫中，卯生之人第五庫中，未生之人第六庫中，寅生之人第七庫中，午生之人第八庫中，戌生之人第九庫中，巳生之人第十庫中，酉生之人第十一庫中，丑生之人第十二庫中。

乃是生人各有財祿命庫，若人本命之日，依此燒醮了足，別無少欠，即得見世安樂，出入通達，吉無不利，所願如心，自有本命星官常垂廕佑，使保天年，過世之時，不失人身，得生富貴文武，星臨財星祿星，五福照曜身命胎宮，安樂長壽，不值惡緣。若有男女生

身果薄，無力章醮，可於本命之日，請正一道士，或一或二，或三或五，或於宮觀，或就家庭，持誦《五斗金章寶經》，或以自願持誦，每誦一遍，折錢一萬貫文，又志心持念托化受生天尊，或千或萬，當來托生人中，三世長爲男子之身，五體全備，十相端嚴，一切恭敬，得遇無上正真之道。

是時五方五老帝君、五斗星君、南斗六司星君、北斗七元星君、九天聖衆、本命星官、元辰星官、功曹靈官、金童玉女、一會神仙，得聞老君說此真經，一時歡喜，禮謝玄元，各願受持。時有始老帝君，出班長跪，而作是偈，稽首禮謝，珍重而退。

稽首真元無上尊，一心信奉不思議。
如斯妙法未曾聞，今日今時盡得之。
能爲黑暗開光明，能爲疾病作良醫。
妙哉神咒五靈符，誓願歸依各受持。

太上老君說五斗金章受生經

（曾召南點校）

102 太上玄靈北斗本命 延生真經

經名：太上玄靈北斗本命延生真經。撰人不詳，約出於北宋初。假託太上老君在蜀郡傳授漢天師張陵，言醮祀北斗七元君除罪祈福之事。一卷。底本出處：《正統道藏》洞神部本文類。

爾時太上老君，以永壽元年正月七日，在泰清境上太極宮中，觀見衆生億劫漂沉，周迴生死，或居人道，生在中華，或生夷狄之中，或生蠻戎之內，或富或貴，或賤或貧，暫假因緣，墮於地獄，爲無定故，罪業牽纏，魂繫陰司，受苦滿足，人道將違，生居畜獸之中，或生禽蟲之屬，轉乖人道，難復人身，如此沉淪，不自知覺，爲先世迷真之故，受此輪迴。乃以哀憫之心，分身教

化，化身下降，至於蜀都，地神湧出扶一玉局，而作高座。於是老君昇玉局坐，授與天師北斗本命經訣，廣宣要法，普濟衆生。

是時老君告天師曰：人身難得，中土難生，假使得生，正法難遇，多迷真道，多入邪宗，多種罪根，多肆巧詐，多恣淫殺，多好群情，多縱貪嗔，多沉地獄，多失人身，如此等緣，衆生不悟，不知正道，迷惑者多。我今哀見此等衆生，故垂法教，爲說良緣，令使知道，知身性命，皆憑道生，了悟此因，長生人道，種子不絕，世世爲人，不生無道之鄉，不斷人之根本，更能心修正道，漸入仙宗，永離輪迴，超昇成道，我故示汝妙法，令度天民歸真知命。可以本命之日，修齋設醮，啓祝北斗三官五帝九府四司，薦福消災，奏章懇願，虔誠獻禮，種種香華，時新五果，隨世威儀，清淨壇宇，法天像地，或於觀宇，或在家庭，隨力建功，請行法事，功德深重，不可具陳，念此大聖北斗七元真君名號，當得罪業消除，災衰洗蕩，福壽

資命，善果臻身，凡有急難，可以焚香誦經，尅期安泰。於是說大聖北斗解厄應驗曰：

- 大聖北斗七元君能解三灾厄，
- 大聖北斗七元君能解四殺厄，
- 大聖北斗七元君能解五行厄，
- 大聖北斗七元君能解六害厄，
- 大聖北斗七元君能解七傷厄，
- 大聖北斗七元君能解八難厄，
- 大聖北斗七元君能解九星厄，
- 大聖北斗七元君能解夫妻厄，
- 大聖北斗七元君能解男女厄，
- 大聖北斗七元君能解產生厄，
- 大聖北斗七元君能解復連厄，
- 大聖北斗七元君能解疫癘厄，
- 大聖北斗七元君能解疾病厄，
- 大聖北斗七元君能解精邪厄，
- 大聖北斗七元君能解虎狼厄，
- 大聖北斗七元君能解劫賊厄，
- 大聖北斗七元君能解枷棒厄，
- 大聖北斗七元君能解橫死厄，
- 大聖北斗七元君能解咒誓厄，

大聖北斗七元君能解天羅厄，
大聖北斗七元君能解地網厄，
大聖北斗七元君能解刀兵厄，
大聖北斗七元君能解水火厄。

於是七元君，大聖善通靈。濟度諸厄難，超出苦衆生。若有急告者，持誦保安寧。盡憑生百福，咸契於五行。三魂得安健，邪魅不能停。五方降真炁，萬福自來并。長生超八難，皆由奉七星。生生身自在，世世保神清。善似光中影，應如谷裏聲。三元神共護，萬聖眼同明。無災亦無障，永保道心寧。

老君曰：北辰垂象，而衆星拱之，爲造化之樞機，作人神之主宰，宣威三界，統御萬靈，判人間善惡之期，司陰府是非之目，五行共稟，七政同科，有迴死注生之功，有消災度厄之力，上至帝王，下及庶人，尊卑雖則殊途，命分俱無差別。凡夫在世迷謬者多，不知身屬北斗，命由天府，有災有患，不知解謝之門，祈福祈生，莫曉歸真之路。致使魂神被繫，禍患來纏。或重病不

痊，或邪妖尅害，連年困篤，累歲連遭，塚訟徵呼，先亡復連，或上天譴責，或下鬼訴誣。若有此危厄，如何救解？急須投告北斗，醮謝真君，及轉真經，認本命真君，方獲安泰，以至康榮。更有深妙，不可盡述。凡見北斗真形，頂禮恭敬。

北斗第一陽明貪狼太星君子生人屬之，
北斗第二陰精巨門元星君丑亥生人屬之，
北斗第三真人祿存真星君寅戌生人屬之，
北斗第四玄冥文曲紐星君卯酉生人屬之，
北斗第五丹元廉貞綱星君辰申生人屬之，
北斗第六北極武曲紀星君巳未生人屬之，
北斗第七天關破軍關星君午生人屬之，
北斗第八洞明外輔星君，
北斗第九隱光內弼星君，
上台虛精開德星君，
中台六淳司空星君，
下台曲生司祿星君。

如是真君名號，不可得聞。凡有見聞能持念者，皆道心深重，宿有善緣，得聞持誦，其功德力莫可稱量。若正信男女，值此真經，智慧性圓，道心

開發，出群迷逕，入希夷門，歸奉真宗，達生榮界，於三元、八節、本命、生辰、北斗下日，嚴置壇場，轉經齋醮，依儀行道，其福無邊，世世生生，不違真性，不入邪見，持經之人，常持誦七元真君所屬尊號，善功圓滿，亦降吉祥。即說北斗咒曰：

北斗九辰，中天大神。上朝金闕，下覆崑崙。調理綱紀，統制乾坤。大魁貪狼，巨門祿存。文曲廉貞，武曲破軍。高上玉皇，紫微帝君。大周天界，細入微塵。何災不滅，何福不臻。元皇正炁，來合我身。天罡所指，晝夜常輪。俗居小人，好道求靈。願見尊儀，永保長生。三台虛精，六淳曲生。生我養我，護我身形。

老君曰：凡人性命五體，悉屬本命星官之所主掌，本命神將、本宿星官常垂蔭祐，主持人命，使保天年。凡俗無知，終身不悟。夫本命真官，每歲六度降在人間，降日爲本命，限期有南陵使者三千人，北斗真君七千神將，本命

真官降駕，衆真悉來擁護，可以消災懺罪，請福延生，隨力章醮，福德增崇。其有本命限期將至，自身不知，不設齋醮，不修香火，此爲輕生迷本，不貴人身，天司奪祿，減筭除年，多致夭喪。迷誤之者，雖遇經訣，懷不信心，毀謗真文，如此之人，身謝之後，淪沒三途，漂沉諸趣，永失人身，深可悲哀，自致斯苦。若本命之日能修齋醮，善達天司，一時於本命限期，開轉真經，廣陳供養，使三生常爲男子身，富貴聰明，人中殊勝，其有生身果薄，雖在人中，貧窮下賤，縱知本命，無力修崇，能酌水獻花，冥心望北極稽首禮拜，念本命真君名號者，亦不虛過本命限期，皆得延生注福，繫係人身，災厄蠲除，獲福無量。天師歡喜，踊躍作禮，讚歎難可得遇無上法橋。

老君重告天師曰：世人罪福善惡，皆屬天司，懺罪消災，莫越修奉，遇本命生辰，告身中元辰，驛馬削落三灾九厄，保見今眷屬安寧。凡有上士於本命生辰持此真文者，外伏魔精，內安

真性，功沾水陸，善及存亡，悔過度恭，漸登妙果，重立玄功，證虛無道，乃得聖智圓通，隱顯莫測，出有入無，逍遙雲際，升入金門，與聖合真，身超三界，永不輪轉，壽量無窮，快樂自在。凡有男女於本命生辰及諸齋日，清淨身心，焚香持此真文，自認北極本命所屬星君，隨心禱祝，善無不應，灾罪消除，致感萬聖千真，俱來衛護。此文所在之處，千真敬禮，萬聖護持，魔鬼潛消，精靈伏匿，世有灾殃，悉皆消滅。是名《北斗本命延生經訣》，乃修真之徑路，得道逍遙，皆因此經，證聖成真，皆因此經，出離生死，皆因此經，保護男女，皆因此經，保命延年，皆得自在，永爲身寶，福壽可稱，保而敬之，非人勿示。

老君說經將畢，龍鶴天仙來迎，還於玉京。是時天師受得妙法，而作是言，誓願流行，以傳善士，若有男女受持讀誦，我當與十戒仙官所在擁護，於是再拜老君，而說贊曰：
家有《北斗經》，本命降真靈。
家有《北斗經》，宅舍得安寧。

家有《北斗經》，父母保長生。
家有《北斗經》，諸厭化爲塵。
家有《北斗經》，萬邪自歸正。
家有《北斗經》，營業得稱情。
家有《北斗經》，闔門自康健。
家有《北斗經》，子孫保榮盛。
家有《北斗經》，五路自通達。
家有《北斗經》，衆惡永消滅。
家有《北斗經》，六畜保興生。
家有《北斗經》，疾病得痊瘥。
家有《北斗經》，疾病得痊瘥。
家有《北斗經》，財物不虛耗。
家有《北斗經》，橫事永不起。
家有《北斗經》，長保亨利貞。
老君曰：善哉！善哉！汝可宣揚正教，福利無邊，普及衆生，永霑勝善。天師稽首禮謝，信受奉行。

太上玄靈北斗本命延生真經

（曾召南點校）

103 太上玄靈北斗本命 長生妙經

經名：太上玄靈北斗本命長生妙經。撰人不詳，約出於北宋初。假託太上老君傳授天師張道陵，勸人禮拜北斗七元君，延生保命。一卷。底本出處：《正統道藏》洞神部本文類。

開經無上妙品靈章

稽首太上尊，歸命禮北辰。仰啓二尊帝，朝現七元君。經始蜀都出，道爲天人根。消灾解危厄，保命守玄真。南陵三千使，北斗七千神。俱來衛法座，同入清淨門。臣今至心誦，道炁自然存。

太上老君在永壽元年正月七日下午降蜀都，授與天師張道陵《北斗延生妙經》，未悉其章，復授長生妙訣。

太上曰：天一生水，生自北方，故紫微之垣，高崇北辰，北辰之宿，列爲七元，首引貪辰，尾明破曜，中立文昌，以爲天地之樞軸，是以北斗司生司殺、養物濟人之都會也。凡諸有情之人，既稟天地之氣，陰陽之令，爲男爲女，可壽可夭，皆出其北斗之政命也。今見衆生無門進修真之路，無誠向禮斗之科，我故哀憫，大闡玄靈，汝當諦聽，廣布流行，使人人皆躋仙阼，不蹈輪迴。天師再拜，喜躍無任。

太上曰：

北斗之尊，衆宿停輪。運天轉地，去穢除氛。春秋冬夏，生物生人。東南西北，立紀立閭。號曰九皇，北極真君。三台華蓋，司人精魂。七元政令，結人元神。故名本命，始出玄文。衆生釋難，道合乾坤。時時朝禮，身命常存。

太上說是玉音，十方諸天心如冰渙，一時歡喜，今日欣遇無上法橋。天師膝行近玉座，而說偈曰：

天地生元氣，靈光聚北辰。紫微

開帝座，玄闕列真君。消釋諸凶厄，生成萬類人。大哉文昌宿，斡運道如春。天師說偈都竟，仙班回部，聖駕復天，稽首玄穹，衆生受度也。

太上玄靈北斗本命長生妙經

讚詠圓滿靈咒

大哉北極，生物無息。樞機運動，乾坤定立。太上垂教，衆生遇植。消灾解難，神目電及。臣今齋沐，上帝可格。克終克始，保家保國。諷誦道言，作是惟一。此經難遇，劫數萬億。既遇之者，請必有得。仁仁元靈，證明功德。

（曾召南點校）

104 太上說南斗六司延壽度人妙經

經名：太上說南斗六司延壽度人妙經。撰人不詳，約出於北宋初。假託太上老君傳授天師張道陵，言醮祀南斗六司延壽消災之事。一卷。底本出處：《正統道藏》洞神部本文類。

太上說南斗六司延壽度人妙經序

三天大法師正一真人張道陵、弟子左玄真人王長、右玄真人趙昇同紀述

太清境太上老君兩度降蜀之臨邛，往大邑至于鶴鳴山，初授與徵士張道陵正一盟威祕籙二十四階品，次授朝拜日月高奔鬱儀結璘之真訣，并三

八謝罪滅除黑簿超度玄祖之文。道陵先於中嶽已獲得黃帝九鼎丹書，後始在鶴鳴山隱居，遂備藥物，乃依其方法，修鍊三年，丹成，未敢服之，乃謂弟子王長曰：神丹成就，若服餌之，當必冲天，便為真人矣。然吾未有大德，宜須為國為家除害興利，利濟民庶，所謂先施勤勞，後可服丹，即輕舉上昇，臣事三境，則吾無愧焉。由是果蒙太上老君親降法駕，荐授真文，修行千日，忽於一時能內顧五藏，外集萬神。

太上復遣清和玉女，教以吐納清和之炁，行三步九跡，交乾履斗，呼召九元，以齊七政，隨罡之所指，立攝伏精邪，因吞餌大還，尋滅除小醜，至是乃與六天鬼魔，戰奪二十四治，改為福庭，名之化宇，降其帥為陰官，置道者令焚修，於是明分晝夜，人鬼殊途。又於陵州仁壽縣，降繫十二天游玉女，化地作鹹泉煎鍊為鹽，因名其地曰陵郡。

道陵道之成也，至第三度，又蒙太上降臨，授以經籍千軸，皆修行之要道，將傳付有道者，令生身受度，使永

劫長存，即與道陵同遊成都。太上駕龍車，道陵乘白鶴，頓下五雲，至太昊玉女修大丹之所，感地踴玉局座，高丈餘，太上登于座中，道陵稽首座下，老君此時為說北斗七元經，削死延生之法，即漢桓帝永壽元年太歲乙未正月七日也，至其月十五日上元之辰，老君又復為道陵說《南斗六司延壽度人妙經》耳。

太上說南斗六司延壽度人妙經

爾時太上老君於永壽元年正月十五日，上元之辰，再降於成都太昊玉女修丹之所，地神復湧玉局寶座，於是老君昇于座中。告道陵曰：夫九天八會之真文，三洞三清之上道，乃元始天尊昔經歷于七億萬劫，天地始終，人倫生死，五運遷變，萬彙興衰，而天尊於是宴居景雲之上，上清之境，修鍊至真，敷敷妙道，愍念蒼生，大慈不捨，吾昔得傳付是經，今當授之於汝，汝宜選奉道之士，謹修行之人。天陽地陰一合而生成，日月兩曜，兩曜行度五緯周天，是謂七政，則七星九元北斗也，每以杓，隨月建分，指節氣二十四氣、二十八舍，應下土七十二候、三十六禽，舍中有斗宿六星，是則號南斗六司，與北斗七政分職，共理三才六合八卦九宮，總轄中外百辟官品，乃紫微、太微兩極都曹也，上係十二分次天真靈神，下統十

二分野地祇主者，四瀆五嶽、九州八

紘、名山大川、城隍社廟，中及人民羣類萬物，無不繫其簿籍掌握。北斗位處坎宮，名同月曜，降神於人，名之爲魄也，主司陰府，宰御水源，將濟生聚，功莫大焉。南斗位處離宮，名同日曜，降神於人，名之爲魂也，主司陽官，宰御火帝，將濟動用，德莫大焉。洎有天地，迄至于今，二司兩極，同共陶鑄萬品，生成萬物，注擬天人之爵秩，增減士庶之祿俸，延促年齡，去留灾福，莫不由其與奪也。所以然者，乃知陽日陰月，南北二司魁斗魁綱，受性水火，稟質陰陽，助天地而育物，體道德而垂光，物得而豐也，非此而孰能乎，人得而生也，非此而孰爲乎。是故天尊愍懃嗟愍，觀爾含靈，一如赤子，開放救護，令保生性，其救護法，使一切善男子善女人，不以高卑，皆應至心常行，恭仰於所見時睹日曜月曜南斗北斗，則鄭重叩頭，請乞祐護，願賜恩福，上言呼稱：至聖至尊真宰真君。矜哀凡冗，宥赦過咎，即再拜，不得懷於輕慢，

反招殃累。


老君曰：爾等男女，能依吾所授奉教而行者，若有所告請，欲消灾度厄，增福延年，保家屬之團圓，祝封疆之寧謐，或免息塚訟，削死注生，皆當上章投詞設醮，求請無不如意也。於是老君爲道陵重宣言曰：

南斗火官除毒害，北斗水神滅凶灾。一切所求皆稱遂，萬般滯悶悉通開。能依經法冥心醮，必當隨願契靈臺。凡在有清常頂禮，禍厄無因輒敢來。


老君曰：神真之妙，凡世難言，凡夫愚昧，貴遠賤近。近者身也，目見日月星斗，耳聞風雷韶雅，鼻嗅蘭麝腥臊，舌了甘辛酸苦，口宣言語音響，至於手執足行，自生及老，皆不可離于水火。今凡夫見之若不見，聞其言如甚聾，殊不知成立生性，實是天地日月星斗與之，假於四大，正茲一氣，生生之生，全繫水火，水火比於道之真體，故不可暫離，可離而獲存者，非物非人。吾今叮嚀與在世男女，說此要道，普令發心求請醮獻，知有神真，信吾教示，

更能於四時月日、八節二十四氣、三元三會、五臘本命，是諸良時吉日，皆可上章拜表，投詞獻款，請乞恩福，謝過懺罪消災，然燈獻果，供養拜請，其福無量。


南斗第一天府司命上將鎮國真君




南斗第二天相司錄上相鎮嶽真君




南斗第三天梁延壽保命真君




南斗第四天同益筭保生真君



南斗第五天樞度厄文昌鍊魂真君



南斗第六天機上生監簿大理真君



右符六道，朱書，男左女右佩帶，令人長命，無諸災害。

道言：六星真君、六星童子、火鈴將軍，凡人轉誦此經，切須至誠，虔心禱祝，無不應驗。唯在精勤，拜表上章，真聖自降，必獲延年長生道性。

老君曰：此六司真君，神性急速，

能傾心求請，無願不從，神真感人心，隨事皆諧偶也。且夫萬行之本，一身之根，在乎道氣保固形命，形命保固，在乎教法，教法存乎科儀之細密，聲發響應，形動影隨，形從心移，發足動步，神靈微妙。

南斗北斗陶魄鑄魂，魂既受鍊，乃遷轉生，人能依吾教法，謝已往之非，補將來之短，洗滌眾災，拜迎百福，唯在嚴潔崇敬，罄志投誠，必獲度世之仙道，與日月之同年。若有深信之士，能修設兩極二斗，同醮一壇，各像斗星，立壇柱，列香燈，鋪排淨茅，供獻果食，可糖餅、油餅、荷蒸乳蒸煎棗湯細茶，不須酒脯。此最爲要道，以斯迎請神真，真聖歡喜降臨，還得賜其福祐。

惟時老君演此妙經既竟，天師道陵及諸弟子再拜禮謝，信受奉行。

太上說南斗六司延壽度人妙經

(曾召南點校)

105 太上說東斗主筭護命妙經

經名：太上說東斗主筭護命妙經。撰人不詳，約出於北宋初。假託太上老君傳授正一天師，言醮祀東斗帝君懺罪延命之事。一卷。底本出處：《正統道藏》洞神部本文類。

老君告正一天師曰：天道冥運，文象玄應，昭而不言，經星常宿中外，官品各有司主，凡一百一十八名，積數七百八十二星，二十八宿，兩曜五星，皆在璇璣，以齊七政，五天大號，靈斗帝君，南北建候，東西均平，光極中央，臨照四方，吾爲汝說玄文洞章，世人受誦，變災爲祥，至士得之，玄景靈光。吾已爲汝說北斗本命之訣，南斗六司之文，度人無量，劫劫長存，吾今復爲

汝說玉靈瑤篇東斗帝君之名，主筭延年，使傳下世，能度三塗五苦八難之厄，能與削死上生，大計之令，總監形魂，玄妙真默，無極無窮。

老君曰：東方之神，以斗爲鄰，長生大聖，韓君丈人，執我之柄，不死之神，輔我之左，長生之君，弼我之右，司馬大神，行我之政，司命司錄，延壽益筭，無量度人，青帝與我護魂，太上與我扶身，巴元醜伯，魔王之真，從我所願，延救天人，急急如律令！

呪曰：

大道著明，寂默玄冥。五斗中運，四時生成。北都萬鬼，遏人年齡。我有洞章，度世長生。供養尊禮，主人精神。玄中有玄，峨峨玉京。急急如律令！

東斗第一蒼靈延生真君，
東斗第二陵光護命真君，
東斗第三關天大衛集福真君，
東斗第四大明和陽保和真君，
東斗第五尾極總監真君。
老君曰：凡人受誦，必須至誠齋

心，東向叩齒，心拜跪坐，閉目存神，如見東方無極之鄉，玄靈帝君、至真大聖、無鞅之衆，羅列周匝，如得監度，有災之日，宜於本命生辰，或月之朔望，月之九日；或家庭觀宇，以時花珍果，焚香靜念，望東斗帝君，醮謝罪業，求益壽年，大靈所與，獲福無量，至人授度，逍遙上清。此經玄奧，深不可詳。

太上說經周竟，於玉局座謂天師曰：玄文祕法，授非其人，殃及九祖，所以賜汝流行正道，救度天人，令得長生。天師再拜頂禮受之，如法奉行，自此傳於世矣。

太上說東斗主筭護命妙經

（曾召南點校）

106 太上說西斗記名護身妙經

經名：太上說西斗記名護身妙經。撰人不詳，約出於北宋初。假託太上老君傳授正一天師，言醮祀西斗帝君禳災之事。一卷。底本出處：《正統道藏》洞神部本文類。

爾時太上老君降蜀都，以永壽二年正月七日，爲正一天師說東斗長生經竟，復於是月十五日，又降蜀都，夜半靈景光照數千里，平地如水，有白玉高臺在空玄之中，老君隱几而坐，詔正一天師而謂曰：吾有《玄元大聖西斗真經》，乃上天所寶，度人無量，五天司會靈斗之君，天人有命，闕一不可。吾又觀見衆生善惡功過增減死生，無不歷關西斗大計之司，校錄世人受度之

名，干屬命數，無失毫分，吾所以屢降授汝靈章，惟此西斗大計帝君，計人善惡，書人功過，吾今爲汝演說，流傳世人，使汝盡得五天之道，天中之文，五元之靈，飛昇自然，普度無窮也。

老君告正一天師曰：玄元無形，窮極杳冥，大象無爲，五斗尊靈，惟西方大帝，主天之柄，威猛號令，降魔至神，典司內外伐戮之事，搜察容隱邪鬼之形，下記世人，有善必錄，有惡必記，名號散殊，生死之限，常有八百千萬億輪轉周回，照見三塗五苦十地九泉之境，凡有去來，必經方會之籍，巨管琅篇，校錄群靈，受度之名，非此不行，太玄有命，西斗帝君，吾見太靈府中，謠歌洞文，天之所寶，祕莫得聞，吾今以汝能遵奉大道，復爲汝說西斗大計之經。若能至誠尊敬，轉相受誦，身得玄籍琅篇，書其功勤，上聞諸天，天部監授，聞奏玄元，玄元之上，隨名度世，名有善惡，行有功過，昭然不隱，記於玄籍，吾今授汝西斗靈音，與世流行，救度幽冥，至真之章，普度無窮。

老君曰：天道常象，西斗記名，無寂無響，玄玄上清，太威真帝，萬億神兵，金鉞巨天，孰敢留停，殺伐斬滅，魔靈妖精，吾左有元榮，右有玄英，招搖豐會，統領魔形，世人有命，干及死生，善惡根本，如纏如縈，飛天神王，照吾光明，符籍之上，毫分叮嚀，我有洞章，至聖元靈，至人得之，時至飛昇，世人奉之，通關元庭，冥運真默，大明朗星。急急如太上律令！

咒曰：

虛明冲寂，以道爲根。上極無上，紫微帝君。真中有靈，玄經正神。萬億神兵，森羅糾紛。照朗威令，總領人身。巨明終始，太皇高真。急急如律令！

西斗第一白標真君，

西斗第二高元真君，

西斗第三典皇靈真君，

西斗第四將巨威真君。

老君曰：凡誦是經，必須齋戒沐浴，寂默正身，西向而立，叩齒數四，至心望拜，先念西斗大聖帝君二十一遍，

然後誦經，凡有請告醮禳災禍，必於本命之日，或每月七日九日十五日，嚴置壇場，高及七尺，低及七寸，方闊九尺，用通帛七尺爲幡，書大聖西斗帝君之字，標于竿首，或羅列珍寶，或則種種香花置于壇上；或在家庭，或在觀宇，於中夜中修設淨醮，迎拜帝君，有所奏請，西望叩頭，密誦真經，無不應驗，長善絕惡，名記諸天，有聞靈音，萬災不干，斯經微妙，無量度人。

太上說經周竟，重告天師曰：西斗玄奧，汝盡得之，傳於下世，勿輕其文，信受奉行，斷死續生，吾於曜靈七萬年，復與於此演說玄極。是時老君垂示畢，寂無遺聲，若有若無，不知所在，天師受之傳於世矣。

太上說西斗記名護身妙經

（曾召南點校）

107 太上說中斗大魁保命妙經

經名：太上說中斗大魁保命妙經。撰人不詳，約出於北宋初。假託太上老君傳授正一天師，言醮祀中斗大聖謝罪延命之事。一卷。底本出處：《正統道藏》洞神部本文類。

爾時泰清境太上老君，於永壽年中，與正一張天師屢慶會於蜀都，以西斗靈文授之，以其能修謹奉行，於是太上老君復現金身，於清虛中升玉局座，敷宣正教，而又垂言，金鉞前戮，巨天後刑，降伏魔魅，孰敢不從，執錄把符，玉女金童，延生保命，乘雲馭風，生身受鍊，度世無窮。

老君是時乃宣咒曰：
惟彼中央，總領四方。提攝萬象，

超卓紀綱。彰善罰惡，琅函玉章。漂落萬鬼，摧折鋒鋌。度世無量，名昭彼蒼。供養尊禮，掃除不祥。志心奉受，昇天翱翔。急急如律令！

中斗第一赫靈度世真君，

中斗第二斡化上聖真君，

中斗第三冲和至德真君。

太上曰：凡人持誦是經，切須齋心虔禮，叩頭閉目，一念存神，人遊塵廓，相見濟度，救世延生，能消除殃業，滌蕩妖氛，劫劫長存，流行無疆。

太上曰：惟有中斗位居五天之中，四方拱衛，尊大無極，主天元炁，統領諸天，祕文洞章，天人所寶，吾今告戒丁寧，用傳下世，濟度羣迷，為世津梁，傳非其人，若生忽慢，天真不許，繼世被殃，吾念汝能洗心澄慮，嚴潔崇奉，孜孜不倦，終始一節，確守素志，可不為汝敷陳叙說此中斗奧章。正一天師乃稽首作禮，諦聽敬受。

老君告正一天師曰：惟彼穹蒼，位處中央，端居靜密，開列混茫，四極輔翼，大赫丕光，七政璇璣，兩曜伏襄，

統攝萬象，提振紀綱，嚴校諸天，無極神鄉，三官九署，十二河源，二十八宿，三十二天，普得擁護，降福無殃，蠲除罪簿，落滅惡根。東斗主筭，西斗記名，北斗落死，南斗上生，中斗大魁，巍然至尊，天人受度，曠劫長存，三塗五苦，八難三迤，承茲正教，升入金門。

老君謂正一天師曰：中斗之炁，生於四斗，成始成終，造化之源，青帝護魂，白帝侍魄，赤帝養炁，黑帝通血，黃帝中主，萬神無越，青天魔王，巴元醜伯，赤天魔王，負天擔石，白天魔王，返山六日，黑天魔王，監醜朗馥，黃天魔王，橫天擔力，五帝大魔，萬神之宗，總領鬼兵，遏除羣兇，旌幢寶仗，嚴駕夔龍，驅雷掣電，周遊太空，金鉞前戮，四極歸真。高尊之像，冲靈帝君，至真大聖，端拱圓列，精神存想，懇禱心願，如得監度，延福延生，但依經法，嚴奉供養，於有災之日，或於本命之日，或於三元八會之辰，鋪設淨壇，以時果名花寶香供養，宣告科儀，清淨身心，啓請真聖，醮謝罪業，真聖歡喜，益筭延

年，無願不從，九祖生天，名籍仙都，逍遙上清。

老君告正一天師曰：五方所秘靈音，吾昔傳於下世，濟度衆生，永離沉淪，爲世之寶，功莫大焉。

老君復告正一天師曰：五斗符相靈文，五斗真君名號，宿有道緣，方得值遇，供養尊禮，威烈靈驗，善惡灾祥，應猶影響，切在專心，無得輕慢，汝宜確守精專，敬之戒之，勿忘宣布。老君付囑訖，乃昇天而去。天師頂禮拜謝，傳之於世，藏之金匱，化度無窮矣。

太上說中斗大魁保命妙經

（曾召南點校）

108 太上說中斗大魁掌 筭伏魔神咒經

經名：太上說中斗大魁掌筭伏魔神咒經。撰人不詳，約出於宋元。假託太上老君說誦經伏魔之事。一卷。底本出處：《正統道藏》洞神部本文類。

老君曰：大道無形，常居杳冥，聖中之聖，靈中之靈，包羅無數，含養衆生，是以有情者稟，識性者通，逆之者死，順之者生，子欲超升上界，不入幽冥，至意齋心，旦暮誦經，誦之百遍，魂魄安寧，誦之千遍，龍神衛形，誦之萬遍，伏滅邪精，所願皆得，所作皆成，降伏惡鬼，束縛妖靈，見我者死，聞我者驚，慢我者滅，敬我者生，誦之萬遍，神通自在，舉身皆輕，所求如意，得駕雲輶，朝拜天地，位列仙官，子孫獲福，門

戶興榮。世俗弟子，若能諦聽，吾不誑汝，但發精誠，若居郊野，或值刀兵，或遇灾橫之中，或陷圍閉之城，或逢虎狼蟲蛇，或遭惡鬼妖精，一切恐怖，但誦吾經，不得高念，勿令出聲，清淨齋心，至意存誠，吾降神兵，立消灾禍，自得福生。一切神名，急呼者應，十萬天師續命，十萬真人注生，十萬金童守魂，十萬玉女衛形，十萬天丁喫鬼，十萬力士吞精，十萬將軍斬妖，十萬金剛縛邪，十萬龍王大怒，雷公掣電交橫，所逢者吞，不問姓名，揚波閉日，山嶽縱橫，風雷浩浩，霹靂轟轟，五帝五嶽，相從六甲，兼使六丁，魔鬼聞之腦裂，妖精無處潛形，虎狼忙走，白刃不驚，誦者志心，不得妄輕，萬遍道備，自赴蓬瀛，大帝之功，五帝曾行，急急如太上玄都律令！

太上說中斗大魁掌筭伏魔神咒經

（曾召南點校）

109 太上玄靈北斗本命

延生經註

經名：太上玄靈北斗本命延生經註。宋道士傅洞真撰。以內修身心為宗旨。三卷。底本出處：《正統道藏》洞神部玉訣類。

太上玄靈北斗本命延生經註序

北斗經者，太上老君之所說，漢天師之所受也。是時老君所宣聖語，天師下聆，而經之所作也，得不上體聖訓，增飾為文，誨其隱訣，明其趣舍，曉其機括者哉。而所行經句，多於四六，有愚者便自臆說云：其文類乎漢唐之作，必杜天師為之耳，若非杜天師，則張天師之所為也。固自以二天師便敢無稽而謗之，且夫二天師也，一則飛

昇，一則解化，皆有絕代之文章為其辭藻，豈鄙言哉。如五經六籍、諸子百家之書，及乎釋氏之典，若非撰述，何從而有？且儒書從古迄今，注釋修撰不已，而未及盡，況道妙之言，隱昧乎渺莽者哉！惟此經人天誦詠，祈福禳災，無不應驗，其諸謗毀，經有明言，命沉六趣，永失人身，深可悲哀，自致斯苦。洞真今所以撰注者，將以驅愚人之黷，塞爾之臆根也，是乃引諸經教，及先師之語詳而釋之，又特以麤言而為證者，蓋曉之於中下耳，上士高明不足觀也。傅洞真謹序。

太上玄靈北斗本命延生經註卷上

傅洞真註

太者至大之名，上者尊崇之稱，極大窮高謂之太上，玄者微妙也，靈者聖化也，北斗者，按《河圖經旁通圖》云：北斗是九天之精魂，九地之靈魄，九星之妙象，九州之威神，本命者，是本命元辰每歲六度降下人間，校定世人罪福，延生經者，是修真之徑路也。玄元始三炁，玄生於地，元生於人，始生於天，人法地，地法天，天法道，道法自然也。人法之於地，故曰玄，人惟萬物之靈，故曰靈，道生一，一生二，二生三，三生九，三炁為天地之尊，九炁為萬物之根，北斗處中天，理九炁，九一之道統於玄一。玄生於地而法於人，故曰北斗本命也。人得其生，自分一炁，從炁而生，出於玄一，既自分炁而生，當明其根本，復守玄一以延其生也。

爾時，

爾時者，指當初說經之時也。

太上老君

天地初分，一炁生元始，二炁生元皇，三炁生老君，老君居下而為化主也。在天為萬天之主，降世為百王之師，在星曰天皇大帝，在教曰太上老君。作太清宮中大聖老君者，非。

以永壽元年正月七日，

永壽乃漢桓帝年號，歲次乙未正月初七日也。

在太清境上太極宮中，

太清境者，即老君所都之地也，其宮名曰三皇洞神太清太極宮。《開天經》云：圓蓋之頂，無上大羅之天，三清之境也。玉清聖境十二聖天，玉清之下上清真境十二真天，上清之下太清仙境十二仙天，太清之下四種民天，民天之下無色界四天，無色界之下色界十八天，色界之下欲界六天，欲界之下，中通太虛，下為人界。三清三境三十六天下生三界萬物，流形八方，以下各生五萬五千

五百五十五億無極世界，此地等天八方，皆三千大千世界，皆稟三清三元。上下三十六天，每四方九州列地，上應天機三十六門，所以三才通炁，天人相感，同稟道生也。太清之境，在玉清上清之下，在三界萬天之上矣。一本作太清宮中者，非。

觀見衆生，

太上常在宮中四盼天下，慈憫衆生。

億劫漂沉，周迴生死，

人生不悟，漂沉苦趣，生死輪迴，雖經億劫無有了期。

或居人道，生在中華，或生夷狄之中，

或生蠻戎之內，

人道者，六道中之一道也，中國四夷八荒內外，並有三業五累者，皆屬於人道。一本作夷域者，非。

或富或貴，或賤或貧，暫假因緣，墮於地獄。

為善為惡，造福造罪，人心不同，報緣各異，陰司紀錄，無有差殊。

為無定故，

定一之法，性相之根本，登真之門戶

也。太古之人，不假修習，而心常定者，蓋淳白不分，大樸不散故也。後世人心僥薄，機倖肆起，淳樸散壞，而罪根漸長，心無所生，則與道隔越矣。太上老君是以西渡闍賓，立般若門，敷演心法，廣論經教，以接羣悟。奈何末世之人，目貴華色，口貪珍味，鼻欣蘭麝，身欲肥輕，意不能止，昏我性根，徒多口誦，心不能持。夫上古之人，甘其食，任其服，樂其俗，而高下不相慕，至於老死不相往來，各無彼此之好，不假修習，道自成矣。今習定之士，皆云不可殫像執相，若有分毫罣礙，便是錯了。是則是矣，不知從何處下手。道書有《內觀經》、《定觀經》、《清淨經》、《消災經》、《坐忘論》，此諸經論最為明語，人猶摸索不定，何況其他散漫之言，焉能取用哉？唯此《北斗延生真經》為性相之根本，大定之便門也。若能依經守用，便見定源，到無想無結無愛處時，即知此經功德不可思議也。

罪業牽纏，魂繫陰司，受苦滿足，人道將違，生居畜獸之中，或生禽蟲之屬，轉乖人道，難復人身。如此沉淪，不自知覺，為先世迷真之故，受此輪迴。

罪業者，十罪，皆從三業而起，身業三：殺生、偷盜、姪慾罪，口業四：妄語、綺言、兩舌、惡罵罪，意業三：貪愛、嗔恚、愚癡罪。牽者牽連也，纏者纏縛也，言人不能諦性相之根本，悟登真之門戶，漂浪愛河，流吹慾海，為諸罪業牽連纏縛，不得解脫。是致陰司繫留，陽魂受諸苦惱，直待滿足之日，將此違背人道不得降生，以致墮落獸畜禽蟲之中，轉見乖戾，不得人道，難復生為人身，如此沉淪埋沒，不自知省覺悟，皆為前生昏迷真性之故，所以受此輪迴果報也。

乃以哀憫之心，分身教化，化身下降。

老君哀憫衆生，化身下降，演說經教，開悟羣迷。《太玄經》曰：九天帝君各排仙仗，諸太清宮中，迎請老君，各赴一天講演中黃九道，儼然端

拱於太極之殿，萬億化身，隨方設教，應機立號，普濟天人，所以朝朝降蹟，代為帝師也。

至於蜀都，地神湧出，

西蜀，其地在成都府。《開天經》曰：無極世界之下又為一界，列九壘三十六土皇君，九壘之下，風澤之烝似風非風，似水非水，識苦性昏，不可分別，擎持地輪，全不傾倒，風澤之上，九壘之中，地神所以居處，天尊地卑，太上下降，地神出而捧足，於禮固宜矣。

扶一玉局，而作高座。於是老君陞玉局坐^①，授與天師真人《北斗本命經訣》。

天師姓張氏，沛豐邑人，留侯子房八世孫也。漢傳本名陵，後入道，添道字，道書皆曰：道陵字漢輔，今避道陵諱，以真人字代之。天師與老君同遊成都，至太昊玉女修大丹之所，感地神湧一玉局座，高丈餘，老君陞於玉局，天師稽首座下。此時老君為說北斗延生削死之法，授與天師。

其地在成都府南門之左一里餘，今有玉局觀并局牀脚四石存焉，天師布治，列屬第二十三治矣。此乃經也，訣者法也，別有玄靈經訣，用法以行此經之事。

廣宣要法，普濟衆生。

太上慈悲廣大，宣明祕要經法，普行濟度衆生，不問賢愚，使人能解悟修行，可見正真之道。

是時，老君告天師曰：人身難得，

《生神章經》云：人之受生於胞胎之中，三元養育，元炁結形，故九月神布，炁滿能聲，聲尚神具，九天稱慶，太一執符，帝君品命，主錄勒籍，司命定筭，五帝監生，聖母衛房，天神地祇三界備守，九天司馬在庭，東向讀九天生神寶章九過，男則萬神唱恭，女則萬神唱奉，男則司命敬諾，女則司命敬順，於是而生。九大司馬不下命章，萬神不唱恭諾，終不生也。夫人得還生於人道，濯形太陽，驚天駭地，貴亦難勝，天真地神三界齊臨，亦不輕也，當生之時，亦不為

陋也，如此人身實難得矣。先賢有喻曰：布芥子於崑崙之頂，持針於下以承之，相遇之者方得人身，墮落之者應當無數，如是可謂難得矣。中土難生，

中土乃中華福地，人天最貴之國，福緣淺薄，中土難生也。

假使得生，正法難遇，多迷真道，多入邪宗，

尹真人云：正人說邪法，邪法悉歸正；邪人說正法，正法亦歸邪。法無邪正，道無二端，人有邪心，互生雜亂，不能自明，正法難遇也。

多種罪根，多肆巧詐，多恣淫殺，多好羣情，多縱貪嗔，多沉地獄，多失人身。

六根不能清淨，諸罪自此而生。巧詐乃綺言兩舌妄語，人多放肆而不務檢束。淫殺乃淫欲殺生，人多恣為而不知節戒，情竇衆多，人皆好之而不能窒塞，貪愛嗔恚，人多縱之而不能收斂，身謝之後，沉淪於地獄之中，受諸苦惱，而不得為人身矣。

如此等緣，衆生不悟，不知正道，迷惑

者多。

如是前項等緣，衆生不能覺悟正道，所以迷惑者甚多也。

我今哀見此等衆生，故垂教法，為說良緣，令使知道，知身性命，皆憑道生，了悟此因，長生人道，種子不絕，世世為人。

老君哀見衆生，故說經訣良緣，令使悟道。《內觀經》曰：自一稟形謂之性，從道受生謂之命，人之性命皆從道而生，知其道而行之者，如春耕種，秋必收成，復有來春，春復下種，復得再生，生生之生，皆由此道也。

不生無道之鄉，

有道之君，撫民如赤子，無道之君，視民如草芥，如夏桀商紂之君，秦皇隋煬之時，晉魏之代，亂世相繼，此時為人，豈為幸哉！生居有道之邦，其惟大善乎！

不斷人之根本。

既悟此道，則世世為人，根本不斷矣。

更能心修正道，漸入仙宗，永離輪迴，

超昇成道。

道在於心，守而不失，當漸次有成也。人之修學，皆從其漸易，所以有漸卦，如老子曰：合抱之木，發於微末，千里之行，始於足下。但患知道而不行，行者無不及也，能修正道，進之以漸，可離輪迴，可成道矣。

我故示汝妙法，令度天民，歸真知命。

老君授天師玄妙之經訣，令覺悟下士，歸其真道，知其元命。

可以本命之日，修齋設醮，啓祝北斗，人之元命謂之小攢會，身中之神皆聚集於元宮，校定罪福，每六甲一周，故經中云：每歲六度降在人間，是日宜修齊醮，啓告斗星，懺罪消災，延生祈福。

三官、

上元賜福天官，中元赦罪地官，下元解厄水官也。七元所統以隸三元，又三命之所歸也。

五帝、

青帝屬木，赤帝屬火，白帝屬金，黑帝屬水，黃帝屬土，人稟五行受形，

五帝無所不關也。

九府、

上元三宮九府，中元三宮九府，下元三宮九府，合九宮二十七府。上元三十六曹，中元下元各四十二曹，計一百二十曹。總統天上天下人物、靈仙鬼神、羣類萬物，悉皆關會斗官，以通內外之職，毫分不差。

四司、

天曹四司者，司命、司錄、司非、司危也，地府四司者，司命、司錄、司功、同殺也。

薦福消災，奏章懇願，

凡所懇之願，具以章詞表狀，以盡其情。事宜實告，辭不以文，可以消除災厄，薦請福祥。

虔誠獻禮，種種香花，時新五果，

四時新成之果，謂之薦新。五者，桃李棗栗杏是也，當虔誠薦獻其禮。

隨世威儀，

世之威儀，進退俯仰、趨伏壇陛、讚拜朝會、慶讚之禮也，獻花酌水、棗湯細茶、世之儀也，高下之所宜，陳

之而不等，上以論王公大人，次以論

大富長者，次以論中庸之家，下以論貧窮之屬，各量己之受用，陳以薦誠而已。且高下有別，如親朋慶會，各以威儀相攝。當是時也，貴之與富，水陸畢陳，中庸之家，亦須粗辦，以

人命人，猶尚如此，將命天真，可輕率乎？初非奢論，存乎威儀者也。

至于金錢雲馬，亦世上之儀也，天師曰：太古無錢，中世始用，燒錢化

馬，亦隨世用矣。天地始判，已有天錢之星，用司其事，時更代變，星辰

應機，與道合同，陰陽通義也，若用河圖古法醮斗，則別有威儀，與世像

不同矣。清淨壇宇，法天像地。

清淨宅舍，以圓法天，以方像地，謂立壇之式，內圓而外方也。

或於觀宇，或在家庭，隨力建功，請行法事，

觀宇家庭皆可醮祭，隨其事力，以建功德，無力者，惟存一心，有力而慳，又非隨力也。

功德深重，不可具陳。

所修功德，實為深重，不可聲述。

念此大聖北斗七元真君名號，當得罪業消除，災衰洗蕩，福壽資命，善果臻身。凡有急難，可以焚香誦經，剋期安泰。

至心稱念北斗聖號，當得罪業隨消，災衰洗滌，福壽助命，善果及身，凡人急難之處，焚香誦念，剋時而應，即獲安寧也。

於是說大聖北斗解厄應驗曰：

修持經訣之人，可解諸厄，應驗如此，所宜禳謝。

大聖北斗七元君，能解三災厄。

三災，星也，臨年最為重災。告斗法，有置三災星於斗口之前供養者，

良由此星操惡於諸厄之首也。其例寅午戌生人至申酉戌年值，此人皇

星，天禍星、地災星，為之三災；申子辰生人至寅卯辰年值，此天蟲星，

天刑星、天孛星，為之三災；巳酉丑生人至亥子丑年值，此地敗星、地亡星、地刑星，為之三災；亥卯未生人

至巳午未年值，此黑惡星、陰謀星、白殺星、為之三災。凡人遇會臨命之時，三年之內必有災厄，預宜解之則獲福也。

大聖北斗七元君，能解四煞厄。

年煞、月煞、日煞、時煞，謂之四煞。遇於寅申、巳亥、辰戌、丑未、子午、卯酉之年月，與人之四柱沖對而全者，皆謂之四煞，若犯之必重災，預宜禳解。

大聖北斗七元君，能解五行厄。

金剋木，木剋土，土剋水，水剋火，火剋金者也，人之五行不順，而互有剋制，則將有其災，預宜解之。

大聖北斗七元君，能解六害厄。

子見未，未見子，丑見午，午見丑，寅見巳，巳見寅，辰見卯，卯見辰，申見亥，亥見申，酉見戌，戌見酉，互換相遇謂之六害。命書云：六害重逢，多見憂而少樂，當禳解之。

大聖北斗七元君，能解七傷厄。

劫煞、災煞、天煞、地煞、歲煞、月煞、亡神，謂之七傷，上配七星之精，人

若逢之，豈無災禍，速宜告解。

大聖北斗七元君，能解八難厄。

人之本命，分為三元，以干為天元，以支為地元，以納音為人元，以三元配五位也。此八事順則為福，逆則為禍，如歲月命分，遇之必凶，事湊來急，宜禳謝以解之。

大聖北斗七元君，能解九星厄。

一羅喉，二土宿，三水星，四金星，五太陽，六火星，七計都，八太陰，九木星，其九星配合，亦當屬斗官所管，行年遇之，論強弱官分或凶或吉，如遇為凶，亦當設告斗官而禳解之。

大聖北斗七元君，能解夫妻厄。

人之匹配陰陽之道，當須勘合而後成之，此古聖之法也，其間鄙俗或傳有天婚者，更不勘合，致使陰陽不利，其禍非一。至如孤辰寡宿，陰煞陽煞，前五後五，煞陽煞陰，煞夫煞妻，絕房孤鸞等神，皆有明例，如犯之重者，至三妻九妻，三夫五夫，或至終身空室者多矣，適有會遇，亦可禳謝。

大聖北斗七元君，能解男女厄。

北厄所致多端，亦由夫妻年命，或祖先墳墓所招，或損陰德，種植不生，如年命墳墓之災，可以解謝而求之，若有失陰德，急宜謝罪斗官，立功植德以種其嗣，非此則不能也。

大聖北斗七元君，能解產生厄。

凡婦人命犯三刑，金煞流血血屍之神可以解之，若抱妬懷冤，急宜告謝斗官，日新其德，以免厄難。

大聖北斗七元君，能解復連厄。

傳尸之病，又曰尸注，流注而不絕，至於滅門，又謂之塚訟徵呼，速宜修善，依法解除矣。

大聖北斗七元君，能解疫癘厄。

瘟黃時炁也，人之不養靈根，恣食辛厭，不義不仁，六屬不和，香火不修，神祇不佑，致使家遭瘟疫，身染毒炁，大小疾病，人口死亡，或其罪大，至于絕門，此厄謂之天行者，令出天府也，傳染一二，則急宜禳告以解之。

大聖北斗七元君，能解疾病厄。

法謂積疾新痼，皆當消散。

大聖北斗七元君，能解精邪厄。

經云：妖邪剋害，以法解除。

大聖北斗七元君，能解虎狼厄。

術云：以子生人遇卯、丑生人遇辰，順行以定之，命犯勿入山林，恐有虎

狼之禍也。又以子生人遇申，丑生

人遇酉，亦順行以定之，名虎狼殺

也。及其七煞金煞，亦有破體之灾，

固當解也，或欲入山，先當用法以禳

之，又自此厄至地網厄，通謂之八難

厄也。

大聖北斗七元君，能解蟲蛇厄。

《抱朴子》云：中州地氣清和，無有

毒蟲，南方地氣不正，氣多迅烈，多

生毒蟲，子將出入山林，當預防以解

之。

大聖北斗七元君，能解劫賊厄。

水陸往來，預宜告解，以防不虞也。

夫劫盜相逢，侵害財物者，是前生今

世偷盜國王財物，所以為報也，此時

恐性命不存，急宜投告北斗，稱其名

號，應時免難矣。

大聖北斗七元君，能解枷棒厄。

《天律》云：久淹囹圄有枷棒之灾，

情負屈抑不能理雪者，牒本屬城隍，

委推勘官吏，令心神通曉，速為子

决，時師行之，皆有明效，況祈禳於

斗官者乎。

大聖北斗七元君，能解橫死厄。

此例千條，難以具悉，但不得其死

者，皆謂之橫死也。疑有此，預須告

解，必獲感應，若故犯陰陽之法，其

可解乎。

大聖北斗七元君，能解咒誓厄。

此厄亦非一條，《天律》曰：諸非品

官鬼神，不得受人咒咀，蓋非得道大

神，無智慧之性，但信誣咒人，辯是

非妄，便執人魂魄，令人顛狂迷亂，

或陰陰不語，或久伏於枕席者，皆由

此也，可以告解之。

大聖北斗七元君，能解天羅厄。

以戌亥為天羅人命運烝二限，遇之

恐有天獄之灾，宜預以解之。

大聖北斗七元君，能解地網厄。

以辰巳為地網人命運烝二限，遇之

恐有郡縣牢獄刑禁之灾，預宜解謝

之。又人三命四柱遇歲君為合者，

謂之晦氣，亦主羅網之灾也。

大聖北斗七元君，能解刀兵厄。

刀兵之厄，厥有劫數，若能志心皈奉

斗真，自然過度劫難矣。

大聖北斗七元君，能解水火厄。

洪水泛溢，劫火洞然，最為慘酷，斗

真護之，則在劫不在數矣。

於是七元君，大聖善通靈，濟度諸厄

難，超出苦衆生。若有急告者，持誦保

安平，盡憑生百福，咸契於五行，

五行者，指人之身，肺屬金，肝屬木，

腎屬水，心屬火，脾屬土，北斗星君

通此玄靈，濟諸厄難，超苦衆生，若

人急告持誦，生百福，合五行，則五

臟安寧也。

三魂得安健，

太玄育魂生炁，內康也。

邪魅不能停^③，

七魄返真，三尸遁跡，水守玄靈，而

邪不干正矣。

《中黃經》云：肝主東方，其色青，肺主西方，其色白，心主南方，其色赤，脾主中央，其色黃，腎主北方，其色黑。今五神混合，五臟安寧，胎息命根，真炁自降，五炁將以朝元，玄靈將有所化，則萬福自來合并矣。《中黃》又曰：羽衣彩霞何所有，皆由五臟生靈翼。此之謂也。

長生超八難，皆由奉七星。

八難者，上尸曰天徒，中尸曰地徒，下尸曰水徒，三徒者，三界之徒役也。又色累曰苦心門，愛累曰苦神門，貪累曰苦形門，華競曰苦精門，身累曰苦魂門，此三尸、五累總曰八難。造業而死者，累其五苦，責役三徒。若有虔奉斗星，道備之人，則超度八難，而上昇九天矣。九天者，非三清之九天，奉北斗而行玄靈經訣，而昇斗中之九天也。斗中九天者，貪狼居靈華天，巨門居神華夫，祿存居玄黃天，文曲居華黃天，廉貞居元皇天，武曲居中黃天，破軍居真皇天，輔星居太常天，弼星居變靈天

也。

生生身自在，世世保神清，人之身所以得其自在者，無拘執之謂也。拘執之者，貪著故也，去執忘貪，則生生身得自在矣。人之心神所以得其清淨者，無穢濁之謂也，穢濁者，繞亂故也，澄而靜之，世世心神清矣，身自在而心神清，則道自然得矣。

善似光中影，應如谷裏聲，

如鑑照形，妍醜自別，似聲應響，善惡無差，譬之於道者，虚心為谷，明心為鏡，心虛則道降，道降則心通，通則明矣。雖然有見，見而不可取，雖然有聽，聽而不可聚，所謂視之不見，聽之不聞，收視返聽於至寂之中，證虛無之道，雖云證道，實無所證，守虛至極，真人降矣，聖道達矣。三元神共護，萬聖眼同明，無災亦無障，永保道心寧。

三界十方千真萬聖，一體同觀護持，受經之士無災厄，無魔障，道心長保其寧固矣。

太上玄靈北斗本命延生經註卷上

①「玉局坐」，《太上玄靈北斗本命延生真經註》作「玉局座」，是。

②以上「大聖北斗七元君，能解刀兵厄……能解水火厄」，與《太上玄靈北斗本命延生真經註》同，《太上玄靈北斗本命延生真經註》作「大聖北斗七元君，能解地獄厄：能解一切厄」。

③此句，與《太上玄靈北斗本命延生真經註》本同，《太上玄靈北斗本命延生真經註》作「邪魅永消停」。

太上玄靈北斗本命延生經 註卷中

傅洞真註

老君曰：北辰垂象，而衆星拱之，

北辰者，北帝也，斗中帝星為之星主，端拱儀像。《論語》云：如北辰居其所，而衆星拱之。一本作北辰在上者，非。

為造化之樞機，

斗極位處帝居，推運四序，總生成之化，正、二、三月，构建寅、卯、辰之位，以生化萬物，四、五、六月，构建巳、午、未之位，以長養萬物，七、八、九月，构建申、酉、戌之位，以成熟萬物，十、十一、十二月，构建亥、子、丑之位，以收藏萬物。斗杓不運，則四時不節，五行不應，則寒暑失度，陰陽不調，則萬物不成，所以為造化之樞機也。

作人神之主宰，宣威三界，統御萬靈。

斗為人神之主，宣布威令，統御萬靈

於三界之內。一本作宣威科戒者，非。判人間善惡之期，

世人有專行善事而多灾禍者，蓋善功未足也，善功既足，則大福至矣；有專行惡事而享福者，蓋其惡未滿也，其惡既盈，則大禍至矣。善惡之事所以各立期限者，太上有好生之德也，為善者俟其大善具足，為惡者俟其改悔善惡之期，斯可明矣。若始務為善，以魔難而後起悔心者，則善功日削，惡簿添名；若始為小惡而不見禍，習以為常者，則罪惡漸增，善簿除名，是以小惡不可不戒，小善不可不為也。過勿憚改，改之在急，改悔之心，宜在限內，設若過期，死將及矣，萬劫千生，雖悔何追。司陰府是非之目。

司者掌也，掌陰府是非之項目，明是辯非，智之端也，君子臨民猶悉斯事，况高真聖哲乎。作勾陰府者，非。

五行共稟，七政同科，

歲星屬木，角、斗、奎、井四宿同科，熒惑屬火，尾、室、觜、翼四宿同科，

太白屬金，亢、牛、婁、鬼四宿同科，

辰星屬水，箕、壁、參、軫四宿同科，鎮星屬土，氏、女、胃、柳四宿同科，內房、虛、昴、星四宿，謂之日宿，乃太陽之舍，配之屬火，心、危、畢、張四宿，謂之月宿，乃太陰之舍，配之屬水。四七之星并五行二曜，謂之七政，皆與北斗同其科目也。惟斗極總炁中天，斡旋運度，臨制四方，以建四序，均五行，而正天經也。以貪狼主天，巨門主地，祿存主火，文曲主水，廉貞主土，武曲主木，破軍主金；又貪狼屬水，巨門左輔屬土，祿存、文曲、廉貞屬木，武曲、破軍屬金，弼星屬火。科曰：九辰為梵炁之宗，七政乃元綱之主，蓋言此也。有迴死注生之功，有消灾度厄之力。斗星所主，延生度厄，保命益算，消灾散禍扶衰，是故有迴死注生消灾度厄之功力也。

上至帝王，下及庶人，尊卑雖則殊途，命分俱無差別。

《旁通圖》云：漢明帝於終南山遇北

斗七真而問曰：朕還屬上真管否？七真曰：子雖為人主，命與庶人一同，帝乃再拜而求長生，遂得玄靈之訣，所謂尊卑雖殊，而命分無別之說明矣。

凡夫在世，近謬者多，不知身屬北斗，命由天府，有灾有患，不知解謝之門，析福祈生，莫曉歸依之路。

夫人處世網之間，未能存真鍊炁，養道修真，未免灾患臨身，雖然學道，而道淺之人，亦不免其灾患。故《靈寶經》曰：末學之夫亦有疾傷。在道者猶且不免，況凡俗之人，以名利役其身心，以酒色搖其精髓，朝暮愴馳，不能少息，厄會之時，灾患必至矣。灾患既至，不知解謝之門，惟專務巫祝，禱祭邪神，而巫祝小人，妄說禍祟，疾病危急，惟命是聽，乃烹宰大牢三牲以為祈禱，或偶得自瘥，便為受神之恩，殆其死亡，則謂鬼不見赦，費耗穀帛，竭其錙囊，貪著邪師，心猶未足，幸而得活，遂復饑寒凍餓而死，或劫剽穿窬，私濫喪

身，陷醜惡之刑，皆由此也。凡諸此者，是不知解謝之門也，知其門者，則始於藥石，藥石未瘳，次禱祖先，祖先未應，次求符法，符法未驗，必然獲罪於上天，必命灾於星數，當求醮祭，自認所屬本命星君，解禳灾數，思愆省罪，祈告斗官，則可以消灾解厄，延生益算矣。若進不以良醫藥石治病為功，退不以祀祖先請法醮告祈禳為意者，是莫曉歸依之路，則灾將重矣，病將危矣，死將至矣，可不痛哉！此皆《抱朴子》明言，非敢妄釋。

致使魂神被繫，

酆都山有豁落北斗七元大將軍鬼官北斗君，以分天曹地府之職，凡生人七年一度，追攝生魂赴北斗陰司，考量其罪福。如七年之內，有善功者，必增延祿壽，名奏天曹，七年之內，如造惡事者，小過減其算數，大罪即使死亡，或罪中涉福，福中涉罪，或罪大福薄，而生數未終，考校未定，則因追呼之次，魂繫陰司，身卧疾

病，見受其苦，受苦滿時，將與人道相違，死入陰司，沉淪惡趣，人身永革矣。追魂之法，子生人起一歲，丑、亥生人起二歲，寅、戌生人起三歲，卯、酉生人起四歲，辰、申生人起五歲，巳、未生人起六歲，午生人起七歲。如子生人起一歲者，至八歲當追魂也，又至十五歲，復至二十二歲也，以七歲為期耳。如起二歲，九歲復一追，十六歲為二追，二十三歲為三追，餘倣此，追魂皆赴本命所屬官曹也。人至追魂之年，多有灾患矣。惟積善之人，或有免追者，亦二限三限必須一追，須用生魂考其功過，為之考炁，三官九府五帝四司同理此事，每遇節歲，皆悉攷定，攷量未正，須復再攷，攷正方定，毫分不差也。追魂之年，則當行道誦經，用消攷炁也。又犯咒誓之厄，或魂神被繫於社廟靈祠，或邪師咒厭亦是矣。

禍患來纏，或重病不痊，或邪妖剋害，連年困篤，累歲迤邐，

禍患者，枷棒厄也，重病者，疾病厄也，邪妖者，精邪厄也，困篤迍遭者，六害厄也。

塚訟徵呼，先亡復連，

塚者，先亡墳墓，徵呼者，因陰司考謫，乃追及生人，復連者，先亡傳尸連累生人。夫塚訟之事非一，而有多端，令人千灾百禍，子孫絕滅，所為不成，皆塚訟之由也，大小塚訟八十一條，以人命有大墓小墓之會，而塚訟興矣。其大略曰：人之九祖七玄生存之日，過犯既多，亡歿之後，被諸考謫，子孫未與，追贖冥漠，得以怨嗟，既處陰司，無由予決，是以天曹勘會謫及幽司，官吏謫及生人，每於三元五臘之日，引出責問，勘會子孫姓名，墳墓所在，結罪定名，徵呼後裔，以致延滅，非細事也。又陰陽安葬非宜，皆屬北斗九星之位，以定天星地曜，來山去水，取穴深淺，明堂大小，四象高卑，五音向背，皆法斗宮，吉則安寧，凶則為訟，至如葬在水源，殯當神廟，墳塋穿敗，棺

槨損傷，塚墓相重，新墳相犯，如此之例，百有餘件，皆為塚訟，以害生人，宜急須投告斗宮，祈求消解。

或上天譴責，或下鬼訴誣。

人之積罪造業，不知改悔，以致上天降罰，下鬼因得乘間，所謂鬼伺灾衰之隙者是也。一本作所誣者，非。

若有此危厄，如何救解？急須投告北斗，醮謝真君，及轉真經，認本命真君，方獲安泰，以至康榮。

凡人有此灾危，急當投告斗宮，認本命星君，看誦是經，虔誠醮謝，可得安泰，以至康榮也。


更有深妙，不可盡述。

經不盡言祕藏內訣，難以具道深妙。凡見北斗真形，頂禮恭敬。

道象無形，應化而有，是謂無象之象，無形之形，無狀之狀，非瞻仰之可求，非逢迎之可取。所謂真形者，委炁而立，順炁而生，虛空之體，自然而然也，以光明為主，色象乃分，所以因形取號，以象立名，可名之名，隨用而出，非常之名為名之耳。


故真形名號存於我心，道雖無心，情可求也，道雖無情，恍惚有焉，外身而存，真形在矣，所當俛首作禮而生恭敬之心。

北斗第一陽明貪狼太星君，子生人屬之。星君姓靈，諱搖天槌，字貪狼，戴芙蓉之冠，執圭，絳衣紫裙，九色青帔，躡鳳文之履，變形如曠野鬼神，面青，披赤髮向上，左手持白棒，右手按前。又真形戴九晨玉冠，青羽飛裳，執斗。《中玄圖》曰：據斗真人，號玉皇九晨君，居太上宮青城玉樓中，又曰樞宮大聖魁星君，又號扶真君露神子，配事于天，所主天元，為天之太尉，主劫會之期，司政糾非，上總九天上真，中監五嶽飛仙，下領後學真人，天地神靈、功過輕重，莫不隸焉。子生人所屬，管太陽真君，室壁奎婁四宿并秦國徐州分野，節候陽明，春生萬物。《遁甲》曰：天英字于然諸，在仙經隱名，隨法立號也，星圍九百二十里，然燈曰身星，明暗以驗之，真符曰延生之符。




北斗第二陰精巨門元星君，丑亥生人屬之。

星君姓育嬰，諱激明光，字巨門，戴五色飛雲之冠，紫衣黃裙，七色錦帔，躡虎文之履，變形如美婦人，披纓絡，戴五色花冠，執通明之扇，以青衣女子侍從。又真形戴玄精玉冠，玄羽飛裳，執五色羽節，曰舉斗真人，號玉皇北上晨君，居中元宮五色玉樓中。又曰璇宮大聖魁星君，又號嬰真君真文子，配事于地，所主地元，為天之上宰，主權祿位，上總天宿，下領萬靈，及學仙之人，真仙之官，莫不隸焉。丑亥生人所屬，管太陰真君，胃昴畢觜四宿及楚國益州分野，節候陰精，秋收萬物，《遁甲》曰：天任字于全，星圍五百五十里，然燈曰命星，明暗以驗之，真符曰度厄之符。




北斗第三真人祿存真星君，寅戌生人屬之。

星君姓歸并，諱處衆踏，字祿存，戴九色寶冠，黃衣青裙，五色絳帔，躡龍文之履，變形如二十歲美丈夫，花貌披草衣，執筆，多正面而立也。又真形戴飛雲寶冠，青羽飛裳，執斗，《中青錄》曰履斗真人，號玉皇玉仙華晨君，居真元宮黃臺玉樓中。又曰璣宮大聖魁星君，又號兆真君衛府子，配事于火，所主日元，為天之司空，主神仙，上總九天高真，中監五嶽靈仙，下領學道之人，真仙之官，莫不隸焉。寅戌生人所屬，管水星真君，參井鬼柳四宿及梁國冀州分野，《遁甲》曰：天柱字子素，星圍七百二十里，然燈曰福星，明暗以驗之，真符曰保命之符。




北斗第四玄冥文曲紐星君，卯酉生人屬之。


星君姓靈樞，諱搖天，字文曲，戴六色盤龍之冠，白衣絳裙，三色黃披，躡龜文之履，變形如婦人，面黑披髮，執文字，騎五色雲龍，回視廉貞星。又真形戴三華寶冠，丹錦飛裳，執玄靈之節，曰步斗真人，號玉皇玄上飛華晨君，居紐幽宮朱臺玉樓中，又曰權宮大聖魁星君，又號盤真君子惠子，配事于木，所主月元，為天之遊擊，主伐逆，上總九天神鬼，中領北帝三宮，下領萬兆，伐逆不臣，誅以兇悖，莫不隸焉。卯酉生人所屬，管火星真君，星張翼軫四宿及吳國荊州分野，《遁甲》曰：天心字子裘，星圍八百里，然燈曰祿星，明暗以驗之，真符曰益筭之符。




北斗第五丹元廉貞綱星君，辰申生人屬之。星君姓上開，諱變，字廉貞，戴五色華冠，青衣白裙，四色絳帔，躡雲文之履，變形獨髻，騎白龍，戴七寶冠，從者四人，各執戟從下。又真形戴七寶飛天之冠，白錦飛裳，執青炁籙籍，曰躡紀真人，號玉皇金綱七晨君，居綱神宮素臺玉樓中，又號衡宮大聖魁星君，又號蘭真君子衛子，配事于土，所主江元，為天之斗君，主命籙籍，中統鬼神簿目，下領學真兆民命籍，諸天諸地莫不總統。辰申生人所屬，管木星真君，角亢氏房四宿，及趙國兗州分野，節候丹元，夏以長養萬物，《遁甲》曰：天禽字子公，星圍七百二十里，然燈曰官職星，明暗以驗之，真符曰消災之符。



北斗第六北極武曲紀星君，巳未生人屬之。星君姓明靈，諱昌上元，字武曲，戴鳳翔之冠，玄衣錦裙，龍文虎帔，躡花文之履，變形象頭人面，仗劍披纓絡。又真形戴飛精華冠，紫錦飛裳，執斗中玉策，曰步罡真人，號玉皇北辰飛華晨君，居紀明宮玄臺玉樓中，又號闔陽宮大聖魁星君，又號定真君大車子，配事于水，所主河元，為天之太常，主陞進，上應元天上真，中統五嶽飛仙，下領學者之身，凡功勤得輪轉階級者，悉總之焉。巳未生人所屬，管土星真君，心尾箕斗四宿及燕國揚州分野，節候北極，冬以收藏萬物，《遁甲》曰：天輔字子卿，星圍七百里，然燈曰壽星，明暗以驗之，真符曰散禍之符。



北斗第七天衝破軍關星君，午生人屬之。星君姓玄樞，諱開天徒，字破軍，戴七星之冠，丹衣錦裙，虎頭文帔，躡獅子文之履，變形猪頭人面，手持歡喜團，又變形披白素衣，口吐赤氣，光明奪日，立斗之頭。又真形戴九雲冠，九色錦裳，執揮神之策，曰乘龍真人，號玉皇總靈九元北蓋晨君，居關會宮九層玉樓中，又曰瑤光宮大聖魁星君，又曰淑真君太賓子，配事于金，所主海元，為天之上帝，主天地之機運，如四時長短，天地否泰，劫會之數，莫不隸焉，午生人所屬，管金星真君、牛女虛危四宿及齊國豫州分野，執天關之柄，推空洞之輪，無時暫息也。《遁甲》曰：天衝字子翹，星圍九百里，然燈曰妻妾星，明暗以驗之，真符曰扶衰之符。



北斗第八洞明外輔星君。

輔星如人間卿相，星君姓精常，諱上開，字正延，戴飛精寶冠，九色鳳衣，執火鈴，變形紫袍腰金幘頭，執笏，又各隨諸國宰輔之服，曰遊行一命真人，號玉皇帝尊元晨君，居帝席宮紫館玉樓中，號左輔星君，乃斗中之外輔，總承衆事，司察天下萬國九州執政大臣罪福功過。《遁甲》曰：天內字天成。然燈曰禳謝衆災，治病服藥，明吉暗凶。

又第八帝席宮，帝化日月水火斗中高皇左夫人，名太乙不啓珠，字落之，茂華紫錦帔，綉羽飛丹裙，又輔弼二星，一隱一現，現者曰輔，輔在武曲星之外傍也。

北斗第九隱光內弼星君。

弼星如人間卿相，星君姓幽空，諱冥陽暉，字幽寥，戴飛天寶冠，手執帝

章，變形緋衣，執圭，出五色之炁，又各隨諸國宰臣之服，曰徘徊三陽真人，號玉皇帝貞元晨君，居上尊宮紫館玉樓中，號右弼星君，乃斗中之內弼，總承衆事，司察天下萬國九州執政大臣罪福功過。《遁甲》曰：天蓬字子禽，然燈曰祈福，應投事務明吉暗凶。○又第九上尊宮帝化金石山河斗中高皇右夫人，名太乙滌，字雲育，玄綠飾帔，翠羽華裙。右九夫人皆頽雲之髻，又隱星曰弼星，弼在巨門星之內傍也。

上台虛精開德星君。

中台六淳司空星君。


下台曲生司祿星君。

上台星君名虛精，面赤色，口吐赤炁，散髮道裝，執碧玉圭，乘黑雲，頂有黃炁。中台星君名六淳，一名六亭，面白色，口吐白炁，徧滿天下，道裝，執白玉圭，乘白雲，頂有白炁。下台星君名曲生，面小，有光芒千百，炁如絲射暗，立青炁中，道服，執青玉圭。三台共有六星，兩兩煌燁，


名曰天階，在天曰三台，有位曰三公，在人曰三魂，列泰階以輔帝宸之席。上台二星，上星主帝王，下星主女后。中台二星，上星主諸侯、三公，下星主卿大夫。下台二星，上星主士人，下星主庶人也。三台受虛無三炁明青黃白之正色，乃調和陰陽之主也。《南斗經》云：南斗陶魂，北斗鑄魄，乃陰陽陶鑄之理也。陰陽冶鍊而生我神，神之降胎方能生就，台者胎也，三而重之，九炁斯得，是以金樓玉室，胞胎九重，人稟質於陰陽，而結魂於三台也。魂陽也，動之以生，魄陰也，靜之以鎮，人之動靜，不失陰陽之和者，形固安矣，有所謂三台生我養我護我者，此也。夫北斗宰御水源，南斗宰御火府，二斗者生成之大用也。南斗正陽之火，藏之於坎，北斗真一之水，藏之於離，二炁升降往來相合，而成既濟，萬物亨泰，道之基也。水一數也，以五乘之，即曰南斗六星，火二數也，以五乘之，即曰北斗七星，各

去其五而有三，三者生之數也，三台在矣。南北之星一十三座，在人之身為一十三事，太上曰：生之徒十有三。死之徒十有三，是道也，知之行之，所以生也，不知不行，所以死也，死生之柄，陰陽之權也。三台之星六座者，三陰三陽也，此言一十三星，而三台不預者，在其中矣，台星有六，而星君有三者，三炁之分，分為六，謂之六炁，復合為三，復合為三^⑤，則六炁均調，三才安泰，三復化六，六復化三，天地長久，無有窮極也。

三台真符



如是真君名號，不可得聞，凡有見聞，能持念者，皆道心深重，宿有善緣，得聞持誦，其功德力莫可稱量。



三十六天星司命宸京保命大天帝君下傳《北斗本命經》曰：昔元始上帝在玉清黃極宮中，演道之際，有一真人名曰寶上，諸天子中最高為第一，出班請問：中天七星，巍巍赫奕，統御羣曜，斡旋炁運，斟酌死生，威靈至重，以何因緣而殊勝第一，起自何劫，始終之化，願詳聞之。上帝曰：大哉汝之問也，在昔龍漢有一國王，其名周御，聖德無邊，時人稟壽八萬四千大劫，王有玉妃明哲慈慧，號曰紫光夫人，於塵劫中已發至願，願生聖子輔佐乾坤，以裨造化，却被三千劫，於此王世。因上春之日，百花榮茂之時，遊戲後苑，至金蓮花溫玉池邊，蛻服澡盥，忽有所感，生蓮花九

苞，應時開發，化生九子。其二長子，是為天皇帝，紫微大帝，其七幼子，是為七星，或善或惡，化導羣情，於玉池中經于七日七夜，結為光明，飛居中極，去地九千萬里，化為九大寶宮，二長帝君，居紫微垣太虛宮中，句陳之位，掌握浮圖，紀綱元化，為衆星之主領也。聖母紫光夫人，尊號北斗九真聖德天后也。如是真君名號，自非寶上啓陳，玉清開演，天皇親降，授與天師，世間無由知見矣。所以見聞而能持誦者，皆道心深重，夙有善緣，更能依經奉行，功德不可思議。

若正信男女，值此真經，智慧性圓，若有信奉之人，遇此真經也，是以先事而知，遇事而燭，此性圓動，如環無端，而不凝滯於物也。

道心開發，道心者，此心純乎天理，開悟發見，超出乎冥迷之路，參透乎玄妙之門。出羣迷徑，入希夷門，皈奉真宗，達生榮界。

歸而求之，則可以奉真宗，真者不假他求，宗者即北斗星君也，達而曉此，則可以生榮界，榮者不生不滅，界者人天境界，皆值遇真經之功緣，於三元、

上元正月十五日，中元七月十五日，下元十月十五日，此三元三官主錄百司，上詣天闕，進呈世人罪福之日，較量淺深，會同斗官，故當行道轉經。

八節、

四立二至二分之日，八景五帝下降，記人善惡之辰也，節炁推動以應命，方有罪則災炁必臨，有功則福炁必集，皆當行道誦經也。

本命、

生年之甲子也，六十日復遇一辰也。生辰、

所生之辰，為身中萬神聚會之日，當行道誦經，以答星辰照臨之恩，父母劬勞之德。

北斗下日、

正月二十五日、二十六日，二月初二

日、初七日、二十三日、二十六日，三月二十六日，四月十七日、二十七日，五月初五日、十三日、二十日，六月初四、初八日，七月初四、二十四日，八月初三、十一、十九、二十七日，九月初三、十八日，十月初十、二十六日，十一月初一、初九、十七、二十五日，十二月二十日。閏月從前月。已上謂北斗下界遊行之日。又庚申甲子日，每月三七日，亦謂北斗下日也。

嚴置壇場，轉經齋醮，依儀行道，其福無邊，世世生生，不違真性，不入邪見。持經之人，常持誦七元真君所屬尊號，善功圓滿，亦降吉祥。

嚴者敬慎整肅之義，置者立也，壇場者，即齋醮中所建之壇陛也，轉誦經文，依儀範藏事行道，其福力廣大，普及一切，茫茫而無畔岸，生生世世嚮真背偽，不失其真性，所謂修行到此，虛室生白，自然吉祥至止矣。

即說北斗咒曰：

北斗七星之咒，本出天心正法，驅邪

治病，無所不用，實斗下靈文之大咒。

北斗九辰，中天大神。

北斗九辰者，七星與尊帝二星也，咒中有九辰名故也，後人改作七星，則不見兩辰矣。註云：在天曰神，在地曰祇，在人曰鬼，惟人處中，修習之者，上可為神仙，下可為靈祇，不能修習者，氣盡而死，名之曰鬼，鬼復化人，惟人者無所不通，無所不化。北斗為中天之尊，為三靈之長，故曰大神也。一本作七星天中者，非。

上朝金闕，

玉京金闕，虛皇上帝之都也，北斗於三清玉帝為臣，故曰上朝。

下覆崑崙。

崑崙山，天中之嶽也，在八海之內，上當天心，形如偃蓋，上廣下狹，三成而上等天之齊萬度之心，黃赤二道交會其上，三光行焉。東曰崑崙，西曰玄圃，北曰閼風，南曰積石，大巖水泉北戶，山之四面各一萬里，上有瓊華之闕，光碧之臺，瑤池翠水，

西王母統衆真居焉。山之絕頂，上有金臺五所，玉樓十二，金城九重。地生金根之樹，瓊柯之林，生素華之實，瓊津玉泉，紫雀翠鸞，碧桃紫柰，百寶裝嚴，莫可紀述。斗極所居之宮，宮各五，有五門，門有四光，爛照九萬里，下統九炁八景，持區各總一天，四炁生育，中為天柱，上通天關，總炁上元三十五分，各為璇璣百大生主，故曰下覆崑崙也。

調理綱紀，

九辰乃皇極之胄，理三五之數，而調大化，化之所出，而有五行五事八政五紀三德，稽疑庶政五福等用，誠合人道而正紀綱，所以堯遵昊天，舜齊七政者矣。

統制乾坤。

範圍天地，包裹乾坤，故曰統制也。大魁貪狼，巨門祿存。文曲廉貞，武曲破軍。

北斗七星君名也，注見真形也。

高上玉皇，

斗中尊星也，見者壽六百歲，在斗魁

內近第一星。

紫微帝君。

斗中帝星也，又號太微帝君，見者壽三百歲，覆斗魁，內近第四星。尊帝二星為萬象之宗師，衆星之攸拱。北斗七真曰：我祖師北極，歷劫以來，勤苦香燈，供養三清，功成德滿，升入紫微，出入有華蓋相隨，星光常七寶燦爛，上徹諸天，下照萬國，每月初三日、二十七日下降，察人善惡也。昔汾陽王郭子儀，曾遇至人得占星之法，云常以每月初三、二十七日靜夜，勿令人知，陰下中庭，瞻視斗中，或見二星，光芒大如車輪者，即尊帝二星也，見之勿語於人，可得長生。子儀以國事未及奉行，而有一女童曰還車姐，入室奉事，於枕中，竊見此語，密而行之，得遂其見，至宋朝猶在內中，今北辰降日乃出於此。

大周天界，細入微塵。

陰陽之炁，大而周天，細而微塵，何所不及也。

何灾不滅，何福不臻。

臻者，至也，集也，凡有灾殃，悉皆消滅，應有福祥，自然駢集，所謂灾障不干，盡憑生百福者是也。

元皇正炁，來合我身。

《服元皇正炁訣》云：青黑黃赤白綠絳碧玄光，從一至於九，服炁冷元黃，日與正炁合，七竅生華芒，九年功行滿，入侍九宸房。法曰：元黃正炁，八卦九宮之正炁，降自九皇，而生萬有也。第一陽明，神人吐青炁之光，第二陰精，神人吐黑炁之光，第三真人，神人吐黃炁之光，第四玄冥，神人吐赤炁之光，第五丹元，神人吐白炁之光，第六北極，神人吐綠炁之光，第七天衝，神人吐絳炁之光，第八輔星，神人吐碧炁之光，第九弼星，神人吐玄炁之光。服炁之法，常以正月四月七月十月四月八月十一月四仲之月，中旬之十九日日之正中，又以三月六月九月十二月四季之月，下旬二十九日之

夜半，一月一日三過行之，平旦日中夜半，各隨孟仲季月用也，一年三十六過，應三百六十度之數，以五為盈，炁有餘也。至行道之日時，清嚴入室，燒香精思，臨目閉氣，叩齒九通，存見九宮星府神君端坐威儀，侍衛森然，密咒曰：北斗元辰中天大神至，魁魍魎魍魎尊帝，急急如律令。但見九炁從星注下，流入口中，隨氣吐納炁而吞之，細細吐故炁，漸漸納新炁，勿令耳聞，九色咽之都畢，叩齒九通，倏然都忘，形神合妙，在坐卧行息動靜之間，皆隨調適，如此依法行之九年，九星神君降授兆訣，長生神仙，上升三天，結友衆真，而與道合真矣。

天罡所指，晝夜常輪。

斗杓在天，運斗杓而不忒，從子至亥，一辰移一位，詩謂終日七襄者是也。註曰：月月常加戌，時時見破軍，欲受正炁，宜朝此方。

俗居小人，

乃奉道第子自卑之稱，如言濁世行

尸、凡間穢質耳，舊本俗字蠹蝕其半，止餘下截，後人妄認其形，湊填作恪字，又作格字，近又隨音而訛為隔字。

好道求靈。

人之好其道，奉玄靈之經訣，以求其妙也。

願見尊儀，永保長生。

儀謂形儀，尊帝之真形也，法曰：願臣早見，見即長生。

三台虛精，六淳曲生，生我養我，護我身形。

已上註見前聖號內。

魁魍魎魍魎尊帝，急急如律令！

已上九星名諱，並註見前聖號內。

凡持經之士，至此則當愈加誠敬，注想尊容，叩齒而密誦之也。

太上玄靈北斗本命延生經註卷中

①「氏」，當為「氏」之誤。

②「近謬」，《太上玄靈北斗本命延生真經註》和《太上玄靈北斗本命延生真經註解》皆作「迷謬」，是。

③「歸依」，與《太上玄靈北斗本命延生真經註解》同，《太上玄靈北斗本命延生真經註》，作「歸真」。

④「樞」，當為「驅」字之誤。

⑤此「復合為三」四字，疑為衍字。

太上玄靈北斗本命延生經 註卷下

傅洞真註

老君曰：凡人性命五體，悉屬本命星官之所主掌。

性者，天命之謂性，命者，化而不易謂之命，五體者，兩手兩足並頭也，本命星官者，謂六十甲子所屬本命星官也。凡天之所賦，人之所受，皆屬本命星官之所主掌，無有差忒。

本命神將，

神將謂本命年月日時，并胎年月日時所臨之辰，謂之胎生，八位神將，陰陽男女逆順運限神將及祿馬二炁神將，本命從官符吏等神也。

本宿星官，

二十八宿星君，本宿星有二等，一曰本命年之宿直星君，假如甲子年，角宿值年，即是角宿天門星君為本宿星官也。又一等禽演以定胎息命星，三位主於三元三限之數，亦曰本

宿星官也。

常垂陰祐，主持人命，使保天年。

天年之限，百二十年，世人能奉北斗延生經法之道者，本命神將，本宿星官，常加庇護，主掌人命，可以全其本年。

凡俗無知，終身不悟。

凡胎濁質，自無知識，終身不悟此理。

夫本命真官，每歲六度降在人間，降日為本命限期，

凡遇本命之日，即為期限，六十日一度，一年六度，真官降在人間，又本命限期者，一百二十年通為二限，六十年為一小限，百二十年名曰大限，限盡即死，若違犯禁忌，伐其命年，則限數促，若積陽功，施陰德，依科禁戒，貴天命者，則其限展限既展矣，命其延矣。

有南陵使者三千人，

陽之所化，三炁成神。

北斗真君七千神將，

陰之所化，七炁成神。

本命真官降駕衆真，悉來擁護，可以消灾懺罪，請福延生，隨力章醮，福德增崇。

凡降駕之日，衆真並至衛護，皆可上章設醮，懺罪消灾，延生請福，隨力建功，增崇福德。

其有本命限期將至，自身不知，不設齋醮，不修香火，此為輕生迷本，不貴人身，天司奪祿，減筭除年，多致夭喪。

若人本命限期將至，不能自知，不設齋醮，不持經訣，不朝斗真，是為輕此生，忘其本，自賤其身，天司必致奪祿減筭，遂多夭死，不能全其本年也。

迷悟之者，雖遇經訣，懷不信心，毀謗真文。如此之人，身謝之後，淪沒三塗，漂沉諸趣，永失人身，深可悲哀，自致斯苦。

人之迷誤，縱遇經訣，心懷不信，甚至毀謗，身沒之後，墮於三塗六趣之中，永不得為人身，所謂天作孽，猶可違，自作孽，不可活，天尊慈憫，雖起哀心，執法有司，故多宥貸。

若本命之日，能修齋醮，善達天司，一世於本命限期，開轉真經，廣陳供養，使三生常為男子身，富貴聰明，人中殊勝。

若人於此生本命之日，依科禁戒，看誦真經，大建齋醮，則三世之生皆作男身，富貴聰明，人中獨異。

其有生身果薄，雖在人中，貧窮下賤，縱知本命，無力修崇，能酌水獻花，冥心望北極，稽首禮拜，念本命真君名號者，亦不虛過本命限期，皆得延生注福，繫係人身，灾厄蠲除，獲福無量。

若人生在貧窮下賤，雖知本命，無力建功，但能酌水獻花，虔心望北極，稽首禮拜，持念北斗本命星君尊號者，亦不虛度本命之辰也，皆得延生注福，繫係人身，灾厄永消，而獲福無量矣。

天師歡喜，踊躍作禮，讚歎難可得遇無上法橋。

天師受得經法，歡喜讚歎，以法橋為喻者，謂法橋之度，無有窮已，實為難可得遇也。

老君重告天師曰：世人罪福善惡，皆屬天司，懺罪消灾，莫越修奉。

世人罪福善惡，皆斗神所掌，若欲懺滌罪愆，消穰厄難，無過修齋設醮，依經修奉也。

遇本命生辰，告身中元辰、

元辰凡有二等，一者以北斗七元建辰為本命星君，即有左右輔弼為元辰也。又陽男陰女衝前一位，謂之元辰，陰男陽女衝後一位，謂之元辰，假如子生男命，貪狼為本命星君，即左輔為元辰星君，子生女命，貪狼為本命星君，即右弼為元辰星君也。如丑亥生男命，以巨門為本命星君，即右弼為元辰星君，女命即左輔為元辰星君也。餘皆倣此。二者以六十甲子為本命星官，玄靈法中，稱曰本命大將軍也，假如甲子生男命，以辛未為元辰星官，女命以己巳為元辰星官，乙丑男命以壬午為元辰星官，女命以甲申為元辰星官也。餘皆倣此。更於五子元中遁取真偽也，凡遇此日，此即為元辰下降

之日，亦宜淨身齋戒，行道誦經。元辰最不可犯，若生遇元辰在命，一世未免其凶殃，此雖天命預定，亦可於元辰下降之日懺謝之，變灾作福。本命星君星官神將符吏，君臣之位，尊卑有別，人皆不知也。

驛馬，

五福驛馬神君，本命之吉神也，申子辰人在寅位，巳酉丑人在亥位，寅午戌人在申位，亥卯未人在巳位，以本旬所生為正位也。

削落三灾九厄，此註見前文保見今眷屬安寧。

《中戒經》云：生民熒熒，各戴一星，人人各有本命星辰，自有灾福，然大槩必隨主炁之者，一國以帝君相輔為主炁，一門以家長為主炁也。主炁有道者，能回易天經，轉灾為福，我命在我不在於天，是道也，能包括天地，把握陰陽，所以大數不能拘，陰陽不能寇也。若未能行道施功，必不能逃於命分矣。年月厄會之時，當期患難，若或輕生迷本，不貴

人身，恣其三業，縱其六根，造業積愆，災來必重，至於延累親族，合門受禍，不為小矣。何謂也？以六親眷屬皆起於本命之元者也。且如生我者為母，養我者為父，同類者為兄弟，我尅者為妻財，我生者為子孫，皆起我命之元也。又如以本命加生月數，至生時為命宮，男女逆順以次分而行之，一十二位，一曰命宮，二曰財帛宮，三曰兄弟宮，四曰田宅宮，五曰子孫宮，六曰奴僕宮，七曰妻妾宮，八曰疾厄宮，九曰遷移宮，十曰官祿宮，十一曰福德宮，十二曰相貌宮。以三元四柱五行支干加而臨之，行來歲位，運限所及，遇災即災，遇福即福，所以當先祝我本命元辰驛馬也。元辰者，我之神也，驛馬者，我之心也，夫人之元辰，外寄於目，內藏於心，目則外視於萬物，心則內馳於萬機，心目所馳，神亦奔競，故謂之元辰驛馬者，馳事而不息者也。人能收心復照，存玄靈於己，則却走馬以糞，內養形神，胎息自

固，然後三尸去體，九蟲消亡，三災九厄何從而至，在時受命，百神和暢，所謂眷屬安寧是也。

凡有上士於本命生辰持此真文者，外伏魔精，內安真性，

修真之人名曰上士，於本命生日持誦是經，則外可以降伏魔精，內可以安神養性，自然得道成真矣。

功霑水陸，

道成之人，功被含靈，飛走沉潛，咸受其澤。

善及存亡，

自身得道，眷屬安寧，九祖七玄，均蒙其惠。

悔過虔恭，漸登妙果。重立玄功，證虛無道，乃得聖智圓通，隱顯莫測，出入無，逍遙雲際，昇入金門，與聖合真，身超三界，永不輪轉，壽量無窮，快樂自在。

人能虔恭悔過，妙果玄功，可登可立，道也者，生化之無窮，流轉之不息。人之生也，從虛無而有，所以神化為炁，炁化為精，是有形也，用之

之道，智者不施於外，而施於自己，則精復化為炁，炁復化為神，鍊神合道，復證虛無之妙也。夫神化無方，謂之聖事，無不知謂之智周萬物，而不知微妙玄通，深不可識，是故隱顯莫測，出有入無，逍遙雲際，昇入金門，形神俱妙，與道合真，同歸三清之大化，無復輪轉，壽量何窮，逍遙無為，元命畢矣。

凡有男女於本命生辰及諸齋日，清淨身心，焚香持此真文，自認北極本命所屬星君，隨心禱祝，善無不應，災罪消除，致感萬聖千真，俱來衛護。

正一真人漢天師語弟子趙昇曰：夫人身有三魂，一魂主命，一魂主財祿，一魂主災衰，又曰一魂居直本屬宿宮，一魂居地府，一魂居形內，七魄常居內而不散也，所謂魂屬陽，動以生也，魄屬陰，靜鎮形也。若本命之日，魂神降體，就尸合同，瞻視形容，衰敗壯健，若三魂循環歸降不絕，則生人安穩，災病不生矣。若於其日清淨身心，不酒不色，著新潔衣

裳，焚香習善，更於其日眠睡少時，即魂與魄合，陰與陽并，道炁內隆，命根堅固。若於其日嗜酒及色，昏亂形體，則魂當歸時，去身三步之遠，取合不能，穢惡冲射，魂復而往，若三度昏亂，魂不合魄者，則陽衰而陰旺，魄靈得其便矣。夫魄者，陰之化也，常欲得魂不歸身，不歸則魄靈與陰鬼交通，陰與陰合，則五鬼旺矣，致使遊魂衆惡，令人耽睡不醒，五體迷亂，灾病俱生，將至於死。凡魂歸而不能合體之時，魂悲而泣，魄靈踊躍，而舞笑而歌曰：歸無我舍，歸無我舍，所以五鬼侵室，而三尸狂蕩矣。三一不守，真宅虛空。《中黃經》曰：可惜玄宮十二樓，那知反作三尸宅。豈不哀哉！夫本命之日，一年六辰，三魂六度歸身制禦陰魄，令邪道不侵，百神交會，魂安魄正，萬炁長存，不經苦惱，身有光明，永保長生，飛仙可蹈，更能於本命始生之日，諸神下降，齋戒之辰，清淨身心，焚香誦經，認北斗本命所屬星

君，隨心虔禱，善念感應，灾罪消除，萬聖千真，俱來衛護，則仙道速成矣。

此經所在之處，千真敬禮，萬聖護持，魔鬼潛消，精靈伏匿，世有灾殃，悉皆消滅。

持經在心，身中真聖敬重護持，則魔無干犯，鬼無妖精，世人之灾殃，皆自消滅。

是名《北斗本命延生經訣》，乃修真之徑路。

此經要自己做工夫，名本命延生之經訣，是修真之道路也。

得道逍遙，皆因此經，證聖成真，皆因此經，出離生死，皆因此經，保護男女，皆因此經。保命延年，皆得自在，永為身寶，福壽可稱，保而敬之，非人勿示。

此是經訣自己工夫處，小則保命延年，增添福壽，大則出離生死，得道逍遙，證聖成真，長為身寶，保之敬之，勿示非人。

老君說經將畢，龍鶴天仙來迎，還於玉京。是時天師受得妙法，而作是言，誓

願流行，以傳善士，若有男女受持讀誦，我當與十戒仙官所在擁護。於是再拜老君，而說贊曰：

老君說經既竟，將還玉京，天師拜謝而說贊語。

家有《北斗經》，

家者，非家舍之家，乃吾身之家也。人之五臟，以心為主，心乃神之舍也，家中有神，謂之家有，夫心之象，內虛而中藏於水，水者天一之炁，北斗之精也，所以人心，上有七孔，以應七星，下有二孔，以應輔弼，及有三毫，以法三台，人之運心於外，則神遊而逝，定心於內，則神安以和，至於得道飛昇，亦存乎心也。所以言家有《北斗經》者，心能修持經法，而無他動，夫天心不動，幹運自然，自然之道豈不大哉。又人之生也，北斗降炁於心中，夫心者神明之府，行藏善惡之事，欲萌其心，斗悉知之，人之妄心可不息乎！

本命降真靈。

本命真靈既降，可以保命延生矣。

家有《北斗經》，宅舍得安寧。

心者神之所舍，形者氣之所宅，人能修持經法，心形自然安寧。

家有《北斗經》，父母保長生。

父謂玄父，母謂玄母，神炁之所生也，心能修持經法，玄父玄母自保長生。

家有《北斗經》，諸厭化爲塵。

胎穢蕩除，血尸消滅，人能修持經法，身心自然清淨。

家有《北斗經》，萬邪自歸正。

喜怒哀懼愛惡欲七者，情之邪也，風寒暑濕饑飽勞逸八者，氣之邪也，心能修持經法，情邪悉去，而道炁長存，自然歸于正真矣。

家有《北斗經》，營業得稱情。

真炁灌鍊，生生不窮，心能修持經法，自有生生不窮之妙，道德得以稱情矣。

家有《北斗經》，闔門自康健。

百關骨節，浹洽真元，陽丹九戶，閉塞死氣，此是心能修持經法，百關自然康健。

家有《北斗經》，子孫保榮盛。

子孫皆起於本命之元，且如生我者為母，養我者為父，同類者為兄弟，我剋者為妻，妻生他者為子孫，皆起我命之元也，心能修持經法，子孫自保榮盛。

家有《北斗經》，五路自通達。

心能修持經法，五臟經絡真炁，自然流通暢達。

家有《北斗經》，衆惡永消滅。

衆惡者羣魔也，修真之士，當先屏退羣魔，心能修持經法，則魔障不干，衆惡消滅矣。

家有《北斗經》，六畜保興生。

三陰三陽，化育於六脉中，化為青龍白虎朱雀玄武勾陳滕蛇之用，心能修持經法，六畜自保生全。

家有《北斗經》，疾病得痊瘥。

心能修持經法，真炁填溢三官，疾病何由而生。

家有《北斗經》，財物不虛耗。

精血充補，化而為氣，氣之利用，澄而為神，心能修持經法，身寶何由虛

耗。

家有《北斗經》，橫事永不起。

內境不出，外境不入，人能修持經法，身心長無雜想，橫事何由起。

家有《北斗經》，長保亨利貞。

綿綿若存，凝神太一，此是心能修持經法，常保四時之吉也。

老君曰：善哉善哉！汝可宣揚正教，

福利無邊，普及衆生，永霑勝善。

老君以天師所贊為善，申言善哉善哉者，謂至善也，就戒天師宣布闡揚此經訣法，福利無窮，徧及未悟之士，未來之衆，俾長受於利益也。

天師稽首禮謝，信受奉行。

天師叩頭禮謝，信而受之，奉而行之。

北斗長生聰明神咒

北斗九星，玉真仙靈。貪狼巨門，保臣長生。祿存文曲，使臣聰明。廉貞武曲，衛臣安寧。破軍輔弼，護臣身形。常居吉慶，永處福齡。注上生籍，勾落死名。神清氣爽，洞達九冥。禦邪攝鬼，羣妖摧傾。學道修真，所願遂成。

九皇覆護，飛昇紫庭。臣下情無任虔禱之至。

此咒或謂上古仙賢朝斗燒香之祝語也，每燒香朝斗之際，以此咒祝之，乃是再三虔禱之意也。舊本咒後有急急如太上律令一句，若是太上所宣以敕斗極者，則不應咒中稱臣字，既已稱臣，又云急急如律令，恐不合理，今改作臣無任虔禱之至為是，若以此咒祝之，更不須別祝願矣，若是婦人禱祝，當改臣字稱作妾字。

太上玄靈北斗本命延生經註卷下

- ①『隱顯』，《太上玄靈北斗本命延生真經注》作『隱顯』，是。
②『騰蛇』，當為『騰蛇』之誤。

(曾召南點校)

110 太上玄靈北斗本命 延生真經註

經名：太上玄靈北斗本命延生真經註。元人徐道齡撰，書成于元統二年（1334）。以齋戒內練法術注解經文。五卷。底本出處：《正統道藏》洞神部玉訣類。

北斗經題辭

題辭一章，乃梓潼帝君之所作也，其文備述北斗之玄玄中天之妙妙也，凡諸同志欲誦《北斗經》，先念題辭，則知一經之始末也，不可忽之。

北斗題辭者，所以題號北斗之經、真玄之要、訣法之首也。北，位也，斗者，萬象之尊尚也。此經北斗之所化也，故太上賦以北斗，其厄難則各自有名，北斗，大聖也，居乎中天而統三界也，晝夜常輪，無有休息，運度死生，故

曰玄矣。斗用柄轉，為柄所用，而乃罡星符所令，其斗也，玄元始炁也，或曰：北斗即北極北辰之象，故北倚於坎，動靜而行，亘於中也，三台之覆，能生養護分，令成道北斗，生有元靈，難量其德，萬象慈母三清之教，任於紫光之妃，化生備陰陽之道，通五行，尤長於延生，永壽之始，魔道縱橫，用邪爭強，以侵真妙，當此之際，孰能為謀以為上法，玄玄大範將為隳廢。

老君頓起，故飛來於蜀，欲度衆生，以宣真妙，至道非一，北斗本命祈禱灾福生養之訣，昭著幽微，靡所不載，時值正月初七日，而有地神於是玉局衆扶，周天大世得道真聖分班侍焉，思濟斯民，天師契合太上之心，越班而請乎玄靈之事。

天尊凭几可其說，北斗世莫知，司天樞之紀錄，治地軸之動靜，建歲運，扇春風雍熙之和，了歲時，成三臘之窮冬，自立世而無終焉，是故垂道言以度後人。

太上有云：我欲托之斯言，不如

載之真訣之深切著明也，於是斗真並集，所與高第弟子天師張道陵之屬，補疑釋問，遂自撰其本命之言，成經一卷，包羅天地，揆叙萬類，仁義道德，性命禍福，粲然靡所不備。帝王公侯遵之，則可以致長生契天道，卿大夫士奉之，則可尊君父保身命，志士上智者持之，則可以成仙道駕飛雲，有緣人之修道，二炁之正焉，可謂玄而靈之，延而生之，覆世大聖之太玄者也。太上自蜀闡化，然後道正經訣各得其所，乃分章有訣，遂消厄得延生，北斗後自垂光，體三清之道而著作焉，此真常湛寂而明者也，千百歲之遙，傳布太上所言以為靈寶，靈寶者萬真之總會，六合之綱領也，北斗之經則而象之。漢天師傳斗於老君，老君授以本命妙行尊問大道，元始對以度人，漢明帝遇斗於終南，斗真將玄靈而自授，唐太宗受道於羊角，元始曰，汝為天子，安能何道不行哉。旨意合同若此者衆，又有道德千言蘊奧妙，故說斗經為徑，其文不可弘深，不與靈篇相似，是以北斗本真後

世依倣而訛傳者也。北斗不得靈者，大道閉塞，妙法無聞，真途迷惑，耳耳流來，北斗玄靈暗矣。其經號爲本命，故篇籍幸不泯滅，聖朝求賢禮士，開延道德，是以清炁結聚，修鍊之士，明法注經，授訣度人，皆有其類，故有古浙至士，雖掌五刑之科，肯與斯經通義，特列北斗之明事謂之注文，辭理長於引喻，意不疏遠，而道已獨至，其言曰：說詩者不以文害辭，不以辭害志，以意逆志爲得之矣。斯經殆欲使後人徑知其妙，故解其文，不但作於爲己也，前賢解者，往往拾取而說之，其說甚多，世聖不同，蜀都以來千百餘載，傳之者亦已衆多。道齡徐卿，至真無僞有自來矣，侍父素菴崇道習儒，弱冠之際，遺志於經，取長收要，本有數家，飛騰吏詮之內，十有餘年，心欲功補，何勤能焉，幸息肩弛檐^①於吳會之間，潛心溫故知新，以盡瑣見，全其所願，遂其所志，釋奧明玄，庶補萬一。余司文昌之星，會英聚靈，靡所不知，歷代傳之於翰墨，至今得明於教者，惟北斗

之訣，後學之士釋而辯之者，又自詳矣。道齡存志北斗闕遠微妙，開誦明見，更書朝禮之科，於是乃述己所聞，證以經傳，綉諸靈符，具載本經，章別其旨，分爲上下，凡二十四厄，總而言之，不出乎本命者，以啓後人，可以釋疑破惑，余亦字字訂其是非，後之奉者，盡其修養，皆得長生，不負玄陽徐道齡之用心，共樂無上之逍遙，不亦可乎。

誦北斗經訣

凡誦經或朝禮，先凝神叩齒，端坐調息，閉目靜思泥丸宮中有九宮九星，各處一宮，而坐七人，如真形之狀，二人輔弼之服。訖存天上北斗星光，燦然如見，即以舌拄上腭，成金橋一道，五臟出五色炁五條，乘橋而上，橫亘斗中，即呼四直使者，從橋而入斗中，通告某事，次見擎羊陀羅二使者，如玉女狀，青衣仗劍，一人執曼陀羅花，一人執楊枝，自斗中度橋而下，入我身中九宮之內，復出一室之中，檢校都畢，復入斗中良久，

但見斗中九皇，如己形中九人之服，乘雲炁自橋而下，入泥丸九宮之室，與我對坐，倏然合爲九人，杳冥之際，復合爲一人，自泥丸宮中，乘雲下入黃庭之內，訖，次端坐持誦。

淨口神咒

出納之門，上下有神。吉凶之戶，炁津常存。吾今朝禮，一念存真。會集萬聖，叩之必聞。急急如太上律令勅！

淨心神咒

天玄天玄，真一自然。去邪歸正，惟思靜專。一身之主，萬法之先。定而不可測，動而那可言。臣今表裏靜，引我拜帝前。急急如太上元降律令！

淨身神咒

靈寶祖炁，安慰黃闕。白帝清魂，赤帝定魄。黑帝生炁，青帝養血。黃帝中主，萬神敢越。前有朱雀，後有玄武。左有青龍，右有白虎。侍吾之身，元神鼓舞。各按方位，同朝斗府。急急如太上老君律令！

勅水神咒

存想北方黑炁，吸入水中，誦開天地祕章灑之。

太一之精，洞玄之靈。能生萬物，能滌羣情。吾今灑蕩，天地澄清。急急如太上律令勅！

開天地祕章

洞虛玄元，晃朗無邊。八方正炁，混合自然。靈寶司命，普化九天。豁落答那，洞罡神仙。斬絕惡鬼，掃蕩妖煙。中山玄咒，元始靈篇。吾誦神集，天地回旋。三元五嶽，八海朝元。魔王束首，真聖衛軒。凶穢消散，道德成全。急急如太上老君律令勅！

北極靈章

北極璇璣，中天魁罡。絡緯天地，運轉陰陽。德出萬聖，位列九皇。掃除惡穢，普降吉祥。喉舌之使，陀羅擎羊。雷門十二，開指生光。生物覆世，振作紀綱。吾總樞柄，永鎮坎方。龜蛇合體，龍虎成行。神劍一下，斬絕魔王。急急如北極玄天玉虛上相仁威上帝律令！

安神寶章

杳杳冥冥，混合無形。玄元始炁，天地人靈。道非常道，名無定名。空洞凝結，真妙化生。既分五正，始屬七星。臣今蕩滌，內外澄清。功德圓滿，魂魄自寧。急急如天皇大聖老君律令勅！

北斗玄玄妙品靈章

北斗七真，朝共二尊。隨時運建，應炁常存。天皇大帝，紫微玄辰。光明燭世，大若車輪。閉人死戶，開人生門。二炁之化，五行之君。上朝元始，下覆崑崙。自子至午，十二元辰。請必免罪，誦可蒙恩。天罡掌握，輔弼絲綸。三官聽命，五帝衛真。庚申甲子，本命生辰。隨力章醮，福自臻身。三千大將，二萬靈神。作惡滅筭，造善益津。能清七魄，能制三魂。朗誦玄咒，掃蕩妖氛。急急如紫微大帝律令！

北極尊帝靈章

北斗九君，乃天地根。扶危解難，有方便門。十二時屬，三元炁存。斡

旋造化，成就天人。罡神指處，鬼宿停輪。吽鉢苛叱，光徧乾坤。漸樂和叱，掃除妖氛。今夕日凝結，拘魄束魂。內外清淨，表裏更新。三尸安位，九靈守真。以合大聖，混沌自分。凡有祈請，一一遂聞。

急急如太上元老天主律令勅！

開經無上妙品靈章

稽首太上尊，歸命禮北斗。仰啓二尊帝，朝現七元君。經始蜀都出，道爲天人根。消災解危厄，保命守玄真。南陵三千使，北斗七千神。俱來衛法座，同入清淨門。臣今志心誦，道炁自然存。

太上玄靈北斗本命延生真經註卷之一

玄陽子徐道齡集註

乾陽子徐道玄校正

太上者，極大為太，最高為上，乃太極無上也，惟三清，人君之父，得以稱之。玄靈者，乃天地之玄炁，七政之精靈，北斗之慧光，世人之性命也。人稟清靈之炁結成此身，遂生魂魄血氣也。北斗者，天地之大德大化，真炁正道結為玄象，運乎中天，建四時，均五行，生殺萬物，統治天地，察錄善惡，無一物不係其所管也。本命者，天一生水，蓋自北斗生也。斗在北，旺於水，司生司殺，養物濟人之都會也。人稟天地之炁，為男為女，可壽可夭，皆出乎北斗之政令也。人能認本命神不越修，奉念本命號使不虛過，則得厄解災消，而獲福無量矣。延生者，乃北斗期世人脩身向道，使保天年，人能禮斗

朝真，即得延生之道也。故天不動，則不能長履，斗不動，而豈能常輪，人不延，焉得長生也。真者，即真妙之義，不可測之玄玄也。經者，經也，若經久傳訛，似有縱緯而經縷不堪，紋理參錯則成瑕玼也。又經者，徑也，徑不通直，如入道修真之人迷其要路也。又經者，絡也，若人經絡失度則生疾也，經若不明，則不得真玄也。

爾時太上老君，

爾時者，謂當太上說經之時也。老君乃天地之本始，造化之祖宗也。歷代應現，未有誕生之迹，將欲和光同塵而立世教，乃先命玄妙玉女即無上元君為天水尹氏之女，名益壽，適仙人李靈飛，靈飛本臯陶之後，感其父李慶賓白日飛昇之事，精修大道，亦百餘歲，當老君未誕而昇天，殷朝十八世王陽甲踐祚之十七年庚申歲，寄胎在孕，鍊真八十一年，至二十二王武丁之九年庚辰歲二月十五日卯時，降生于亳，今太清宮舊宅

存焉。周武王時為柱下史，昭王癸丑年過函谷關，授尹喜真人道德五千言，計二百七十四年，至甲寅四月二十八日，老君白日昇天。期尹喜真人千日外會於蜀青羊肆中，至丁巳年之蜀，再遇老君，乃從仙駕周遊九天，隨方設教，孔聖師之，至赧王時，計九百九十六年已。魏明帝贊曰：為周柱史，經九百年，唐太學博士吳揚昊贊云：老君變通，靈應難測。既生商日，又仕周時，計其始終，乃歷千載，後降成都授此經訣，乃漢桓帝永壽元年乙未正月初七日。又自唐太宗時，以仁愛之道說經於羊角山。宋政和年間，降于茅山玉晨觀，授梁光映《加句天童護命經》，之後至今，靈驗之事不可枚舉。○老君生時，九龍吐水，化為九井，灌洗身形，生而鬚髮皓白，有七十二相，八十一好，行步蓮華，乃至九，左手指天，右手指地，曰：天上天下，唯我獨尊，我當闡揚無上道法，普及一切衆生。時有自然天衣掛

體，九日之中，身長九尺，感天神贊十號之名，號曰太上老、圓神智、天上尊、帝王師、大丈夫、大仙尊、天父、無為上人、大慈仁者、元始天尊。今者略述太上紀號，同志皈依，各獲福報也。

以永壽元年正月七日，

太上哀憫衆生，屢降成都，授與天師靜應真君延生經訣、五斗符相靈文，五斗真君名字。永壽元年正月七日，授此《北斗玄靈本命真經》，十五日，授《南斗六司延壽度人妙經》及靈寶妙道《五斗真經》，至永壽二年正月初七日，說《東斗長生護命真經》，十五日，復說《西斗大計護身經》。又以天師真人其能修謹奉行，老君復現全身於清虛中，昇玉局座，宣說《中斗保命延生玄真妙經》。先北而後南，次東而復西者，蓋北斗位處坎宮，宰御水源，水屬於北，以北為天，天一生水，故先授此經。南斗位處離宮，宰御火帝，火屬於南，以南為地，地二生火，故《南斗真經》次

二授之。其東斗、西斗、中斗五斗經文，皆依造化次序言之，故有其時也。

在太清境上太極宮中，

經云：无上大羅之天，三清之境也。玉清聖境十二聖天，元始天尊所治，玉清之下，上清真境十二真天，玉宸道君所治，上清之下，太清仙境十二仙天，太上老君所治。若在人身，則上丹田泥丸府，上應玉清宮，中丹田絳宮府，上應上清宮，下丹田交會府，上應太極宮。太清境上正老君所治之宮，名曰三皇洞神太極太極宮也。

觀見衆生億劫漂沉，周迴生死。

太上應化，徧滿天下，分身之處，皆是太清太極宮也，太上常以慈憫之心觀察衆生，衆音終猶中也，天居上，地居下，人居其中，乃中方中土之生人也。又作去聲者，多也，字義兩說也。數至十萬為一億。劫者，結也，亦云時也，人之一生，必備三千六百劫塵勞，乃命分配定之結數也，為世

人肆行不道，恣縱姪殺，夭喪其身，不能全其本年，未能輪迴生死，前結未盡，又有一生塵結，積結億萬不能解釋，正所謂行善事結良緣，行惡事結鬼道，若結惡多了，則漂流苦海之中，沉溺生死之內，無有休息，永為下鬼矣。人能一日行一善事，著一善功，活一物命，是解了三塵結，即歷過三劫也。若人日行一善，則一年解了三百六十結，又能在世活人生命，濟人利物，精修大道，悟性歸真，則百千萬億結塵勞一時盡滅，謂如百年暗室，若慧燈一照，滿室光明，梵語劫波，此云時也。不論時之長短延促，多時少時，通而言之謂劫也，又謂霎時也。如《玉樞經》云：往昔劫中也，天尊何嘗入劫耶，即是往昔此時興此濟人之念也。又劫者，歇也，蟄也，如龜龍蟲蛇之屬，伺雷收聲則隱歇其形，雷鳴則出其形，乃為一劫之名，其牛馬羊犬鷄豚禽畜之類，亦各有劫，但受諸苦而已。故聖人立教於身，三業中戒殺為上，

《孟子》云：見其生不忍見其死，聞其聲不忍食其肉是也。三界之中亦皆有劫，陽炁結為天，為男，陰炁結為地，為女，善人取惡妻，聖賢生不肖，乃煩惱結也，善人遭賊，吉人逢害，乃生死結也。入道之士，若以道齡之言為心，念念以善功方便解之，則無此結也，佛經有云：解百生冤結。若不解之，世世相遇，可不勉諸。

或居人道，生在^②中華，或生夷狄之中。或在^③蠻戎之內，或富或貴，或賤或貧。

中華者，即中國也，東南曰揚州，正南曰荊州，河南曰豫州，正東曰青州，河東曰兗州，正西曰雍州，東北曰幽州，河內曰冀州，正北曰并州，此禹貢別中國之九州也。九州之外，東曰夷，西曰戎，南曰蠻，北曰狄。經云：人有五常十善之心，孝弟忠良之行，報生人道，在中華之國，富貴者，因布施三寶，惠貧拔苦，拯難救危中來；貧賤者，因慳貪不捨，取非義財物中來；邊夷下賤者，

從殺生邪淫、不信因緣中來。此太上天眼觀見衆生所作罪福，隨業而受報也。

暫假因緣，墮於地獄。

人生在世，稟於富貴貧賤之中，蓋處之不以其道，富者不義不仁不慈不施，貴者不公不法不忠不勇，貧者不安分，賤者不伏下，所以萬事萬理，顛覆錯亂，遂至蓄害生、禍患作，墮於煩惱也。釋藏偈云：福德力故今多順，今多順兮放逸生，放逸終無持戒心，以是因緣入地獄，正謂此也。

為無定故，

夫定者，乃入道之要路，延生之捷徑也，定者，正也，身若不正，豈能入道，心若不正，豈能延生。延字之義亦從正。從之又定者，靜也，向也，止也，決也，水定則不流，地定則不陷，心定則萬慮息，身定則萬事止，性定則炁靈，神定則炁清。而定非靜不能成也，蓋世人無靜向止決之力量，則行義不能達其道，修真不能造其真，是以心心不定，業業相隨，

又豈能延生，而明玄靈之本命耶？《玉樞經》云：能知止則泰定安，《大學》云：知止而後有定。此知止是知有這箇道理，須是得其知止方是，如知為人子必孝，知為臣必忠，能得是身親為忠孝之道，見得此事，合當如此，則志有定向，心有止決，乃是大力量之人。如《孟子》云：富貴不能淫，貧賤不能移，威武不能屈是也。若心不定，至於事親之際為私欲所汨，不能盡其孝，事君之際為利祿所汨，不能盡其忠也。今人有親不孝，居官者不法，處富貴者沽名，有子者更娶，是不知止，不安分，不守靜，不予決，乃心無定，故蓄必及其身矣。人能知止安分，守靜決定，則不求生而自得延生，未入道已達其道矣，何蓄患之及焉。上智之士若下靜定工夫，心無簣止，久久成功，小則延壽筭入仙真，大則朝玉帝禮三清也。

罪業牽纏，魂繫陰司，受苦滿足，人道將違，生居畜獸之中，或生禽蟲之屬，

轉乖人道，難復人身。

道釋二教戒十惡業，殺盜邪淫、貪嗔愚癡、妄言綺語、惡口兩舌，皆訓人為善也。此十惡業，即姦盜詐偽，在於法律禁斷非輕，人有一犯，枷禁牢獄，手足杻械，拷箠刺斷，警跡錄徒，是與禽獸何異哉。此章言人先世作業，惡籍滿盈，斗府三官檢覈文移，獄繫神魂，拷掠報對，若楚受足，今得再生，又作諸惡，乃將違人道也，後世即生畜獸之中禽蟲之屬，是轉乖人道、難復人身也。

如此沉淪，不自知覺，為先世迷真之故，受此輪迴。

知覺者，曉悟也，真者，正也，直也，化也，聖也，靈通而妙明也。天無真，萬物不春，地無真，草木不根，人無真，不能御神。成真者，遇水不溺，遇火不焚，出三界，化十方，役萬神，合一炁，非真焉能得耶？非真何能成耶？所以北斗稱真君，玄帝稱真武，諸得道者皆稱真人，吾夫子明德之論，非真如何得知止定靜也，真

之一字豈易言哉。太上哀憫世人生於中夏蠻夷，富貴貧賤，乃受天命，於斯止向，假此因緣為心無定，故罪惡相聯，將違人道，此章欲令衆生省悟修真也，不自知覺者，因迷真道，不入仙宗，故不知所命之命，夫命者定令也，如天賦與富貴貧賤，處之以道，即如天命而然者，樂天者也，少有所賦非其命者，即是迷真違命也，既違命迷真，則沉淪而不自知覺也，凡奉真持訣之士，能於知覺上尋出無可知覺，方是得延生之訣也。太上演教，經旨幽微，一句一字皆是訣法，下學之士，豈易窺測者哉。若以文字近俗而鄙之，徒憎謗訕罪根難滅也，謂如不自知覺，當太上授經之時，緣何不言，自不知覺，其自不二字，與不自二字，大有懸絕，亦與前後經旨不相干也，蓋不字在上者，乃不自去理會本來所命貴賤壽夭之因緣也，不字在下自不知覺者，却是不知所覺也，不自知覺，乃知其所覺之覺而不自悟也明矣。誦經同志之

士，當味其經旨，熟究深思，庶不負太上垂教立言之聖意也。

乃以哀憫之心，分身教化，化身下降，太上至神至聖，大智大慈，雖高居三境之中，宴處九重之內，而哀憫衆生之心無時少息也。太上化身降於蜀都，授此經訣，饒益衆生度脫輪迴之苦也。

至於蜀都，

蜀都者，即今之成都府也。漢明帝問僧摩騰曰：法王在世，何故化不及此？對曰：迦毗羅衛國，乃三千大千世界之中心，三界諸佛皆於彼土，凡有願行者悉生于彼，受佛正化，咸得悟道，餘處衆生無緣感佛，佛不往也，佛雖不往，光明及處，或五百年，或一千年，或千年外，皆有聖人傳佛聲教而教化之。何故太上降於蜀都，餘方不往，蜀乃坤維福地，天師正一真君彼時於鶴鳴山修煉九鼎丹成，又能宣揚教化，故降于彼以授經訣也。

地神湧出，扶一玉局，而作高座。

玉者，天地日月之精華，陰陽水火之結秀也，潤而溫，寶而貴，萬載之不可朽滅也。局乃曲脚之玉寶座也，如普化天尊所座七寶層臺，即珍寶嚴飾七級龍鳳之座也。太上哀憫衆生，降世說經，三界萬靈，孰不奉迎，宜乎地神扶擁玉局以待衛也，說經已竟，玉局復沉地中，今玉局化洞乃成都之遺跡也。

於是老君昇玉局座，授與天師真人《北斗本命經訣》，廣宣要法，普濟衆生。

漢《傳》：天師諱道陵，字漢輔，沛豐邑人，留侯子房八世嫡孫名大順之長子也。子房陰功隱行，流芳後葉，天師母初夢天神自北斗魁星中降，至地長丈餘，衣繡衣，以薔薇香授之，既覺，衣服居室皆有異香，經月不散，感而有孕，於光武建武十年甲午正月望日，生於吳地天目山。時黃雲覆空，紫炁盈庭，空中光明如日，經月，復聞昔日之香，浹日方散。年及冠，身長九尺二寸，厖眉廣額，綠睛朱頂，隆鼻方頭，目有三角，伏

犀貫腦玉枕峰，起手垂過膝，美鬚髯，龍踞虎步，望之儼然，雖親友見之肅如也。七歲，讀《道德》二篇十許徧，而達其旨，於天文地理河洛圖律之書，皆極其妙，通習墳典，廣覽無遺，從學者千餘人。天目山南三十里，西北八十里，皆有講誦之堂，臨安神仙觀，餘杭通仙觀即其地也。後起賢良方正直言極諫科，中之，身雖仕，而志鍊形輕舉，久之退隱北邙山，三年，有白虎銜符置座傍，朝廷就徵為博士，稱疾不起。和帝即位，以三品印綬駟馬車等徵為太傅，後封冀縣侯，三詔不就，時永元四年壬辰歲也。遂自河洛，歷江淮名山，徧禮洞府，泝流入蜀，及諸洞室，遇神人告教，獲丹書祕訣。遂於鶴鳴山，修鍊九鼎丹成，未敢服，謂弟子王長曰：冲天之士當功及生靈，佐國安家，興利除害，然後輕舉，臣事三境則無愧焉，苟利一身，功不及民，非大道弘濟之旨也。至順帝時漢安元年壬午歲正月十五日午時，感金闕

後聖玄元道君即老君下降，以正一盟威法錄、三五斬邪之劍、都功版券職錄以授之，遂服丹戰鬼，置立治庭。而後太上復以三洞衆經九百三十卷、符籙丹竈祕訣七十二卷、并冠服等以賜之，至桓帝永壽元年，屢授此經并五方五斗真經，至永壽二年，夫人雍氏同時白日昇天，位為太玄都正一真人、三天扶教輔元大法天師也。太上所授經訣即法也，經中字字皆是要法，奉道之士，悟得一字一句一法一訣，得離迷途，直趨道岸。道陵二字乃天師之名，誦經至此，雖臨文不諱，然起敬之誠，當以真人二字代誦之。

是時，老君告天師曰：人身難得，中土難生，假使得生，正法難遇。

按《四十二章經》，佛言：人離惡道，得為人難，既得為人，生中國難，既處中國，遇道者難。又云：世間得人身者，如指爪上土，失人身者，如大地之上太清境。《黃庭經》云：人以精為母，以氣為主，五臟各有精，

精中生氣，五臟各有氣，氣中生神，神能生壽，長生保命，鍊精為丹，養氣為神，真仙上聖，修真養氣，自然然而，內真外應，有作必成，自凡入聖。男子之生，先生右腎，以外精而內血，陰為裏也；女子之生，先生左腎，以外血而內精，陽為裏也。腎生脾，脾生肝，肝生肺，肺生心，心生小腸，小腸生大腸，大腸生膽，膽生腎，腎生膀胱，膀胱生三元，三元生三焦，三焦生八脉，八脉生十二經，十二經生十五絡，十五絡生一百八十纏絡，一百八十纏絡生一百八十纏絡，一百八十纏絡生三萬六千絲絡，三萬六千絲絡生三百六十五骨，三百六十五骨生八萬四千毛竅，三百日，胎完氣足，靈光入體，與母生離而為人也。人身難得，信有之矣。聖人應運，二萬年為一劫，二千年為一小劫，降世賢人五百年然後一問世，老君大聖人，應運衆生得遇演說正經，實難可得見矣，得遇之人，不生信向，痛可惜哉。夫天地之間人

為貴，人最靈，上界為聖為真，亦人能也，下界為鬼為畜，亦人化也，蓋善善登上界，惡惡降下世，所以陰陽二炁，得天之命令，方得為男為女，有若針芥之難投，聖凡之難遇也哉。道齡受先師之祕旨，太上曾以三十二字真玄之竅，訓度祖天師張真君，云：人身難得，真妙難逢，忽然輪迴，去無所從，學道之士，誠以守中，自然湛寂，與天地同，此乃祖師得道之徑路也。今道齡不敢固蔽，併註此章，願與同志共為進道之萬一云耳。

多迷真道，多入邪宗，多種罪根，多肆巧詐，多恣姪殺，多好羣情，多縱貪嗔，多沉地獄，多失人身。

夫人若失真道，即入邪宗也，罪根者，指下文十惡業也，巧詐者，乃口業也，姪殺者，身業也，情愛貪嗔者，乃心業也。罪根既植，諸惡熾然而生，墮於地獄，失却人身也。此章言多字之意者，乃訓下愚，非為上智之士言之也。

如此等緣，衆生不悟，不知正道，迷惑者多。

已上諸多業報因緣，乃太上明開大道，彰施法網，以示衆生，不可觸入犯之，以墮地獄，失却人身，而人自不省悟。衣冠足以備禮御寒，蔬食堪可充饑，養素道德以富潤其身，詩書以增廣其志，祿仕可展其學，藝業可贍其身，而却不守其分，不知其止，不收放心，不求真道，恣情縱慾，迷惑妄想，膠膠擾擾，念念馳驟，步步投於惡業網中，是誰之過歟？

我今哀見此等衆生，故垂法教，為說良緣，令使知道，知身性命，皆憑道生，了悟此因，長生人道，種子不絕，世世為人，不生無道之鄉，不斷人之根本。

道由路也，乃日用之間，人倫事物所當行之理，衆人之所共由者。以教門言之，道在太極之先，超乎天地形器之外，是未有天地萬物之初，已有此道。剖判之後，在天為日月星斗、風雨雷霆，在人為仁義道德，在地為草木山河，在序為春夏秋冬，在時為

冷暖晦晴，在教則存誠鍊性，在法為功賞罪刑，故太上曰，大道無形，生育天地，大道無情，運行日月，大道無名，長養萬物，吾不知其名，強名曰道。佛氏亦以未有天地之先，為吾真體，先儒推原來歷，謂由太虛有天之名，由炁化有道之名，天之所賦曰命，命即令也，人之所受曰性，性即理也，天無言如何命，只是大化流行，炁到這物便生這物，如分付命令一般，性是仁義禮智，性之與命，未嘗偏塞，但人稟受，却有清濁長短昏明厚薄之不齊，故有富貴貧賤壽夭賢愚也。若人稟氣至清至粹，則為聰明神聖人也，若清粹而高明，則為富貴壽考之聖人也，若高厚悠長，則為聰明智慧忠正賢良節義之士也，若稟氣薄惡而短者，則為悖逆兇暴邪佞詭譎狠毒愚癡貧賤之人也。此善惡雖因人之所稟，亦由炁之所生也。太上憫念世人，故傳經訣以垂正教，喻世法以說良緣，善巧方便，調攝衆生，使其知道，知身悟性悟

命，自獲真種，既獲真種，則長生人道，世世生生若不棄背，則不斷人之根本也。此經，太上豈特專為汲引下士之設，若上智之士，於此肯為究竟，念念在斗，息息存真，則列仙有日矣。

更能心修正道，漸入仙宗，永離輪迴，超昇成道。

太上大慈大悲，至仁至聖，教化羣生，諄切至再，始憐衆生稟受天命因無定故，乖違人道不覺沉淪，遂宣要法，言人迷真道而不悟，種罪根而不知，故令知道知身，悟性悟命，皆憑道生，不斷真種。此章又慮世人不

能出三界也，謂道既能知，更當修習，時時不捨，拳拳服膺，漸入初乘，積習既久，守而不失，用功用力，至於徹悟休歇之場，入仙宗，離輪迴，成正道也。

我故示汝妙法，令度天民，歸真知命。可以本命之日，修齋設醮，示汝者，謂天師也，妙法者，即指下文於本命修齋設醮也，天民者，謂世

人，乃天所生之人民，命天師廣垂濟度也。如伊尹曰：予天民之先覺者也，予將以此道覺此民是也。雖然令其歸真知命，却無下手之處，於此可見矣。太上慈悲方便，開發衆生，以六十日內令認取本命之一日，清心齋戒，制魄拘魂，隨力醮獻，投詞拜表，禮號誦經，俾初真之士不煩不簡，不厭不疏，易於入道，使其漸漸修習，行之既久，於日日時時皆是本命，如此勤求不怠，珍重護持，其功德力不可稱量也。修齋設醮者，道以齋為先，經云：雖有惡人，齋戒沐浴則可以事上帝。學道之士，雖修齋而不持身口意業之十戒，是空守節食，於事無益，反招愆也。設醮者，召也，即召三界真靈也。又曰：詔欲人人啓寸心之誠，拱伺帝之詔也。又曰：照乃然燈照人，我之性也，此乃醮之意也。齋法有三：一者設供齋，修齋是也，可以積德延年；二者節食齋，又名祭祀齋，謂不飲酒，不茹葷，可以和神保壽，中士

所行也；三者心齋，謂疏灌其心，除嗜慾也，澡雪精神，去穢累也，剖擊其志，絕思慮也。夫無思無慮則專道，無嗜無慾則樂道，無穢無累則合道也。心齋為上，節食次之，設供齋為下。《北斗七戒序》云：太上曰，人身難得，中土難生，假使得生，正法難遇，三者既備，幸莫大焉。且夫天無私親，常與善人，苟能遠惡以從善，捨妄以歸真者，道豈遠乎哉。然而道雖無方，學則有序，修真之要，齋戒為先。戒有七條：第一戒者，不得捨諸正念，妄起非想，因以成趣，與道相違，常當存神炁海，入彼妙門。第二戒者，不得顯露馳騁，泄慢靈文，常宜慎密，晝夜護持，七年有功，許傳後學。第三戒者，不得臨弔喪孝，履諸厭穢，致引外觸，干犯正真，常須澡潔，內外清虛。第四戒者，不得食諸臭敗，三厭五辛，招集尸穢，濁亂三官，常咽津液，蕩滌靈源。第五戒者，不得面北便溺，裸露三光，冒觸神明，致招殃咎，雖居幽

室，亦當迴避。第六戒者，不得酒食醉飽，作樂無厭，昏亂神炁，閉塞靈關，常須節約，以適其宜。第七戒者，不得交游非類，妄習異端，執心不一，自無指歸，常依正教，不生疑惑。以上七真之戒，正是《北斗經》中之事，實為玄功之初基，登真之要路，各當遵奉，毋替初心，倘如戒言，則七戒仙官無不擁護，留恩降福矣。

啓祝北斗，

北斗居天之中，為天之樞紐，幹運四時，凡天地日月、五星列曜、六甲二十八宿、諸仙衆真，上自天子，下及黎庶，壽祿貧富，生死禍福，幽冥之事，無不屬於北斗之總統也。人若誠心啓祝，叩之必應。

三官五帝，九府四司，

按《玉樞經》云：天官解天厄，地官解地厄，水官解水厄，五帝解五方厄。東方青帝主木，管肝護魂，西方白帝主金，管肺侍魄，南方赤帝主火，管心理氣，北方黑帝主水，通血，中央黃帝主土，脾主中官，主領五

臟，人配五行受形，三官五帝無所不關也。九府者，上元三官九府，中元三官九府，下元三官九府，合二十七府，上元三十六曹，中元下元各四十二曹，計一百二十曹，總領天上天下，人物靈仙鬼神、羣類萬物，悉皆關會斗官，以通內外之職。四司者，天曹四司，則司命司錄司非司危，地府四司，則司命司錄司功司殺，與三官五帝九府同檢察人間之罪福也。太上垂教，度脫此有相之外緣，使人知懼，改惡向善也。若人以無為而內照之，則諸神司皆備於我之身矣。人形與天地相應，頭圓居上象天，足方居下象地，北極為天之中央，却在北，故人之百會穴在頂，心却向後，日月往來只在天之南，人之兩眼皆在南也，北斗運轉四時，旋行衆曜，人心具衆理，應萬事，握化萬二千精元神，千二百形影神，流轉血氣，通運百關，衆神共護於心也。三官者，三魂也，又即人身之三元，天地水三穴也。五帝，五臟也。九府者，九竅

也。四司者，四肢也。人能降制九竅，攝養三魂，調順五臟，保運四肢，不著邪境，自戒俗情，斷絕人我，屏去是非，漸入真道，豈不快哉。

薦福消災，奏章懇願。

世人於本命之日，祈恩請福，延壽消災，懇禱之情，具於詞章，奏狀啓祝於北斗并諸司聖真者，乃太上布法橋於迷津，援衆生於大道。人能知悟，此身得遇良緣到於彼岸，如犯罪人久禁囹圄之中，幸遇曠蕩之恩，當省躬責己，改過知非，洗濯其心以去惡，沐浴其身，勿染宿污，則因其已新者而日日新之，又日新之，無有間斷，則可為善人矣。若恃有再生之路，可延之門，舊惡不悛，新惡復造，是知法令以故違憲條，棄性命而就死地，淪沒迷途，墮沉惡趣，失却人身，悔之晚矣。

虔誠獻禮，種種香花，時新五果，隨世威儀，清淨壇宇，法天像地，或於觀宇，或在家庭，隨力建功，請行法事，功德深重，不可具陳。念此大聖北斗七元

真君名號，當得罪業消除，災衰洗蕩，福壽資命，善果臻身。凡有急難，可以焚香誦經，尅期安泰。

虔誠獻禮者，即祭神之義也。君子之祭，七日戒，三日齋，必見其祭者誠之至也，有其誠則有其神，無其誠則無其神，可不虔懇也哉。威儀者，內起恭敬悚懼誠恐之心，外見仰瞻稽頓俯伏跪拜之節，皆得其儀也，臨蒞其民，尚容止可觀，進退可度，況朝真禮聖而無威儀，是不敬也。隨力建功者，乃高下陳設而不拘也，上至王公大人、尊宿長者、德行偉人，建齋設醮，下及中庸貧病甘節苦行之士，蠻夷賤隸之屬，獻花酌水，各盡己力，陳以薦誠，惟務精潔，却不可居奢用儉，處富用貧，慳恪輕率，穢觸嗔怒，殃禍立至矣。念此七元真君名號，或禮本命真君，須是滌除萬慮，清淨身心，塵念不萌，然後誦之，口念不如此心念，忽尔一見本心，方是不負太上老君垂教之意，當得尅期安泰，而善果臻身也。

太上玄靈北斗本命延生真經註卷之一

①「弛擔」，疑為「弛擔」之誤。

②「生在」，《太上玄靈北斗本命延生真經註解》（下簡稱《真經註解》）作「或在」，《太上玄靈北斗本命延生經註》（以下簡稱《經註》）亦作「生在」。

③「或在」，《真經註解》和《經註》皆作「或生」。

太上玄靈北斗本命延生真經註卷之二

玄陽子徐道齡集註
乾陽子徐道玄校正

於是說大聖北斗解厄應驗曰：

大聖北斗七元君，能解三灾厄。

三灾者，乃星名也，按《玉樞經》云：

世人欲免三灾九横之厄，即於静夜稽首北辰。又按告斗之法，亦有置三灾星於斗口之前供養者，良由此星操惡於諸惡之首也，人命遇之，能依法醮禳，無不獲應矣。又三灾者，雷噴為天灾，火焚為地灾，覆溺為水灾，此初學之士不得真道，在於桔園之中，厄運交會，未免有此灾厄，今者幸遇禳解。此二十四厄靈符，若能持誦斗經，禮拜斗懺，認本命星君，焚化靈符，則可免也，上智之士更能修鍊成真，出乎天命氣數之外，豈有此灾並諸厄難也。

大聖北斗七元君，能解四殺厄。

殺者，即殺伐也，蓋正人稟正炁，惡人會惡殺也。又四殺者，四時不正之炁也，春感之為痢，冬感之為嗽，故曰四秋感之為痢，冬感之為嗽，故曰四殺。陰陽中之四殺者，丑未辰戌居不正之方也。又四殺與三殺七殺，皆土家之惡神殺也，若人犯之，撓害非輕，若能依法祈禱解禳，則百無禁忌也。

大聖北斗七元君，能解五行厄。

五行者，即五臟也，一經受病，則一身不安也。《玉樞經》云：五行奇蹇，九曜嶽嶽誦玉經，天尊命本人家司命六神，上請北斗解一切厄，若有此灾，依法保之禳之。

大聖北斗七元君，能解六害厄。

六害者，即身之六賊，謂眼耳鼻舌身意也，若不禁制，則有害也。《玉樞經》云：三刑六害，隔角交加，若能預防，朝真禮斗，則可以解禳也。

大聖北斗七元君，能解七傷厄。

七傷者，人之七情，謂喜怒哀樂愛惡慾也，一有過度，則傷身也，又名七

殺也，解之慎之，則無傷害也。

大聖北斗七元君，能解八難厄。

難者，難也，即世人之身難逃之惡疾也，謂癱疾、癩癩、風癆、蠱癩，此八者，若非先曾延奉斗真，今不能全備其體離其難也，又八難者，乃八景之異名也。經云：昊天諭三界真仙聖衆曰，汝當戒八漏，方可脫八難，若能脫八難，方可入三清。八漏者，目淚肝之漏，不息壽不齡；鼻涕肺之漏，損則病必成；口唾脾之漏，去多勞本形；外汗心之漏，不收死不停；睡涎腦之漏，不閉神不靈；小腸漏於腎，不祕絕不生；夜夢鬼與交，神漏太分明；姪慾不度節，身漏無可憑。如是八般漏，乃為八難行。若人奉北斗，七情不妄驚，情既不為害，八難厄亦輕。上智之士依而行之，則能超脫也，其有世人覺疾之作，急當絕慾減膳，志誠齋戒，告斗誦經，佩服靈符，則可消禳也。

大聖北斗七元君，能解九星厄。

九竅不制，則起姪慾縱貪嗔之心也，

又即九曜欹欹是也，若能精修寶鍊，奉斗朝真，則何災不滅也。

大聖北斗七元君，能解夫妻厄。

經曰：父母生之，續莫大焉，男女居室，人之大倫也，世人夫婦失於婚合，有犯神殺，致生災厄。北斗乃玉樞所司，凡有此厄難，至誠齋戒，誦經禮懺，告斗焚符以消穢之，則夫婦和睦，子孫昌泰也。今人有妻有子，或起姪洙之心，或覬隨奩之產，三妻五妾，別籍異居，爭財妬色，蠱媚魔誚，使夫婦參商，父子狼虎，至於遭刑，蕩產殞命，喪身者，有之，此自作孽也，欲禱之於神，而神豈受不臣之請也。

大聖北斗七元君，能解男女厄。

子灾嗣絕，所致多端，但以幼吾之幼以及人之幼，更能立功種德，則斗真不待禱而令解其灾，不伺求而默賜其子，納寵倖妾，非徒無益，而又害之。

大聖北斗七元君，能解產生厄。

婦人不擅專房之寵，不懷妬忌之心，

即無產生之厄，子孫亦衆多也。若能改過，首謝斗官，朝禮寶懺，佩帶符篆，持念所屬本命真君名號，能解厄難也。

大聖北斗七元君，能解復連厄。

按《玉格》云：諸一切人雖有智能，事多齟齬，或成或敗，徒有虛名，疾病不瘥，婚姻失時，亦無嗣續，或生男女，不能長養，而卒萬事不能從心者，謂犯復連也。皆是先亡不得超脫，久久無人濟拔，雖百千年，終不能受生，宜解之鍊度生界，見在生人，自然榮達，作事遂意。道齡訓《玉樞經》，勞瘵乃尸疰之所致也，尸疰變狀不一，有傳尸、殄殍、肺痿、骨蒸、復連五種，皆由虛損得之，病源從腎起，傳之於心，則驚悸少氣，夢見先亡，故本經云：先亡復連是也。或問：先亡不得超脫，復連六親，人何能知？曰：若犯此厄，則感此病也，既罹此厄，急宜寡慾清心，餌藥吞符，祈告斗真，超度祖玄，俾亡者獲生善境，存者厄解灾消也。

大聖北斗七元君，能解疫癘厄。

按《消灾經》云：若太白火星入於南斗，則於國於家及分野處作諸障難者，念此陀羅尼加持，其灾即除，移於不順王命悖逆人身上受者，佛豈移灾，乃為逆之人自招致耳。疫毒流行，患病闔門亡歿者，蓋人居常不孝不忠，不仁不義，不敬天地，不懼神明，不禮三光，不重五穀，不修香火，不貴其身，恣意烹宰，厭穢腥羶，惡類相漸，惡業相似，惡氣相合所致也。若能修改，自無此厄，倘有傳染，則齋戒禮斗，佩奉靈符，即得解穢也。

大聖北斗七元君，能解疾病厄。

沉痾痼疾，宿有冤愆，暴病卒患，因無攝養，急須醮謝真君，加之法藥相助，必得扶衰解厄也。

大聖北斗七元君，能解精邪厄。

邪妖尅害，蓋心懷不正之感，招精魅繳纏，乃忘失奉真之故也。若能依法禮斗朝真，爇示靈符，更尋天罡之所在，能感正炁以摧之。

大聖北斗七元君，能解虎狼厄。

陸逢虎狼蛇虺，舟迎蛟蜃魚龍，此乃動之厄理之常也。若人先能皈命玉樞，投誠斗府，持念經號，佩帶靈章，預為防之，豈遇是厄？設或遭遇，急投符於水火之中，則其應如響。

大聖北斗七元君，能解蟲蛇厄。

鳥鼠送妖，蛇蟲嫁孽，蓋人日常治家，不理殺盜邪淫，觸犯禁忌，干瀆神聰，遂致六神不居，蛇怪乘間而入，當持斗號，懺謝過愆，肅清家舍，焚示靈符，自感真炁以遣穰之。

大聖北斗七元君，能解劫賊厄。

此乃慢藏不謹之自招，積垛負債之所致，人能預伸告解，慎防不虞，即得免也。

大聖北斗七元君，能解枷棒厄。

若人妄遭摭拾非罪干連，或罹過悞之愆，或被虛誣之執，陷在縲絏之中，備受枷棒之苦，情雖負抑，獄案文成，官府避罪以稱疑，家屬訴冤而無理，當至心齋戒，剖露衷情，具章啓奏，祈告斗官，坐禁者亦齋心默

禱，內外合誠，必能感格，使之陰報陽應，審理平反，則解其厄也，故犯法禁其可解乎。

大聖北斗七元君，能解橫死厄。

非正命者，皆名橫死，若知有此厄難，當建善功，積陰德，悔過省躬，懇告斗府，佩帶靈符，必有起死回生之驗也。若覆壓於巖墻之下，刑戮於桎梏之中，是自取其橫死，非天為也，禱之無益。

大聖北斗七元君，能解咒誓厄。

盟詛咒誓，蠱媚魔禱，事有多端，有希求愛媚者，離間親情者，有辜恩負義者，設誓違盟者，有析財不均者，受抑無伸者，有欲令死者，使其疾苦者，有信巫覡，妄執人魂，令其顛倒迷亂者，或陰沉不語，久伏於枕席之間者，皆人身心不正，或事處於過不及之偏之所致也。若能退思於曩端，推究損己責躬，改已往之衍非，修未來之善果，更誦大聖之名號，佩焚上帝之靈符，即可解穰也。

大聖北斗七元君，能解天羅厄。

天羅者，乃天理也，地網者，乃人事也，若為人，上不犯國法，下不逆人倫，則四方上下皆得通行也，永無羅障網罟之厄。人若起是念，必罹此厄，違是道，必遭此刑，但能不越五常，明立三綱，更誠心澄慮以朝斗真，則永得延生而入仙道也。

大聖北斗七元君，能解地網厄。

此章上文併註已明，未竟其說，又地網天羅者，即憲綱條格也。世人不思富貴貧賤，乃命分已定，却不安分，不知止，違天命，悖氣數，作非法，以犯國法，棄性命，以喪身命，其地網天羅之厄，豈能逃也。人能安分懷刑，保身守道，更能禮斗朝真，則自無此厄也。

大聖北斗七元君，能解地獄厄。

此經功霑水陸，善及存亡，若人宿有冤業，身謝之後，執對冥府陰司，孝子順孫欲追九玄，與之告斗禮懺，赦其罪尤，則生歸善人之道也。

大聖北斗七元君，能解一切厄。

太上垂教，演說妙經，使人延生保

命，度厄消災，此諸厄難，舉其大槩耳。《玉樞經》有云：北斗解一切厄。世人但有厄難，虔誠朝禮，修設齋醮，禮懺誦經，焚符持號，則無不響應也。

於是七元君，大聖善通靈，

此篇乃入道修真之徑路，延生禮斗之樞要，解厄消災之訣法，回生起死之關鍵也。太上列此於諸厄之後者，欲人依法修持，則無諸厄障，自然昇真證道也。此言初真學道之士，及善男信女，若發誠心，於此七元君降臨之日，依科行訣，誦經焚符，奏章上表，則七元君之威力神通、大聖妙化善明萬靈之靈也。

濟度諸厄難，超出苦衆生，

世人若欲消災謝罪，解厄釋難，告斗虔恭，無不遂願，以拔衆生沈溺之苦趣也。

若有急告者，持誦保安平，

若人家或病或難，或產或災，或求嗣續，或保延生，急宜誠思定慮，認本命星君之號，持是訣，誦是經，焚是

符，則得家道清靜，而患難尅期安泰也。

盡憑生百福，咸契於五行，

《斗真七戒》云：不得交游非類，妄習異端，執心不一，自無指歸，常依正教，不生疑惑，人能盡心竭誠，依憑經訣，證道修真，斗司當與其百福，所為所作，皆默合於五行造化也。

三魂得安健，邪魅永消停，五方降真炁，萬福自來并。

三魂安健，九靈屏跡，我之五臟自生真炁，真炁既生，永保利貞，則萬福自然合我之體也。

長生超八難，皆由奉七星，生生身自在，世世保神清，

既得萬福來合我身，則八難自然超脫，如此則長生之道備矣，本自七星之玄靈敬奉而得致也。若能依前安置三魂，調理五臟，收三尸，拘九靈，離八難，則是奉北斗之功驗矣。必使其人生生不入桎梏，得以自在與道逍遙，則世世神清也。

善似光中影，應如谷裏聲，

既得生生自在，世世神清，則元靈生慧光，能燭萬物曲直之影，是以有諸內必應乎外也。

三元神共護，萬聖眼同明，

學道之士，若能修持到此地位，則天官侍我魂，地官侍我魄，水官侍我神，如此飛昇金闕，遊宴玉京，則萬神萬目自然瞻禮而敬仰我也。

無災亦無障，永保道心寧。

此篇包括經中旨要，盡於此矣，若能精修斗訣，深造斗經，則又豈有災障，而永保奉道之心安寧也。

老君曰：北辰垂象，而衆星共之。

志書載，北辰者，北帝也，一名北極，亦號太辰，故辰極為天心，以正萬物，北極為天樞，以居其中，不動為炁之主，故衆星環繞而歸嚮之。或言北辰垂象一句，北之一字，恐是此字，指北斗而言，庶與上下章旨貫通也。道齡謂北斗為萬象之尊，魁罡運轉，晝夜常輪，則衆星皆隨斗柄而行。曰北辰者，即北斗也，北斗七星

在太微之北微垣，北極之前，魁四星為璇璣，杓三星為玉衡，所謂璇璣玉衡以齊七政也。吾夫子言政，喻如北辰為政以德者，即北斗幹運，陰陽出，內生死、建四時，統萬靈，豈非政耶？此夫子至聖之論也。謹按別本

《延生經》云：太上曰：天一生水，生自北方，故紫微之垣，高崇北辰，北辰之宿，列為七元，首引貪辰，尾明破曜，中立文曲，以為天地之樞紐也。又三台星，世為北斗之華蓋，《玉樞經》云：北辰之上，上有三台，其星並纏，形如雙目，疊為三級，以覆斗魁，是則皆與本經曰北辰即北斗，又明矣。雖然，尚期待真人至士，更與發明而加訂證之。

為造化之樞機，作人神之主宰，宣威三界，統御萬靈。

在天為北辰，在人曰性真，北辰皆統眾星，令三界而運造化，正二三月斗柄用昏建寅卯辰之位，以生萬物，四五六月建巳午未，而長養萬物，七八九月建申酉戌，以成熟萬物，十月十

一十二月建亥子丑之位，而收藏萬物。斗杓不運，則四時不節，五行不應，寒暑失度，陰陽不調，生物不成矣。所以為造化之樞機也，性真能宰萬靈，分善惡辯是非也。

判人間善惡之期，

世人以專行善事，而多災禍者，蓋善功未足，善功既足，其福至矣。《金剛經》云：受持讀誦此經，若為人輕賤，是人先世罪業應墮惡道，以今世人輕賤故，先世罪業即為消滅是也。有專行惡事而享福者，乃惡未滿，其惡盈時，大禍至矣。故太上曰：惡不積不足以滅身，蓋善惡之事各有期限者，太上好生之德也，為善者伺其大善具足，為惡者伺其改悔善惡之期，斯可明矣。今人始務為善，或持齋而不戒，或禮斗而生嗔，不依經旨而行持，不求玄竅而進道，誦經一過二過，便願福壽兼全，僅持號百聲千聲，急欲資財茂盛，倘有事物之違心，或是艱難之阻障，不能順受，怨道咎師，盟神誣佛，是謗法之罪人

也。若為惡之人，禍患在於隱微之間而未見，即能悔過遷善、向道歸真，則百千萬惡即為消滅，謂如積歲堅冰，若慧日一照，渙然而釋，是以小惡不可不戒，小善不可不為，過勿憚改，改之在速，改過向善，宜在限內，設若過期，禍將及矣。《孟子》曰：如知非義，斯速已矣，何待來年。

司陰府是非之目，

北斗聖功豈能盡述，然以此章言之，下司神靈枉直功過，鬼官邪正懈怠，苦爽幽魂之昇滯，四生六道之轉輪，悉總屬於綱領也。

五行共稟，七政同科，

歲里屬木，角斗奎井四宿同科，熒惑屬火，尾室觜翼四宿同科，太白屬金，亢牛婁鬼四宿同科，辰星屬水，箕壁參軫四宿同科，鎮星屬土，氏女胃柳四宿同科，外有房虛星昂四宿為之日宿，乃太陽之舍配之，屬火，心危畢張四宿為之月宿，乃太陰之舍配之，屬水，四七之星配五行二

曜，亦謂之七政。北斗者，天之體也，五行二曜者，天之用也，故一體一用係乎動靜，一動一靜係乎陰陽，一陰一陽係乎天地，一天一地係乎水火，一水一火曰造而化之也。造化之機，璇璣是也，所以北斗總動靜，體用陰陽水火、天地造化也，然七政之用，與北斗雖同科目，原夫斗之為義大矣哉。斗字從十從二，斗總中天，斡旋運度，建四時以制八方，均五行以齊七政，為斗之用，皆合十二數也。在三清，生九炁，九炁生昊天紫微北極，成十二位也，在北斗，七明二隱合三台，亦十二位也，在人身，有五臟七竅，在陰陽，有十二支，在人身，有十二相屬，在周天，有十二雷門，一年有十二月，一日有十二時，以此推之，信乎天上地下，無一物不係其斗之總統也。同學至人，能日日朝真，時時禮斗，自感斗真降真炁於身，以延其生也。有回死注生之功，有消灾度厄之力，太上垂慈說此經訣，本以消灾度厄

而回死注生者，雖天命不可改移，亦由人之修積，故死可回而厄可解，天定能勝人，人定亦能勝天。道齡伏睹《太上洞玄靈寶朝天謝雷經》中，所載太上宣揚一事，則知回死之功在人修積。龍漢九年，東平之郡義保之村，有一人姓趙，其性擁腫樸也，忽因所幹步入州城，路逢卜士云：彼火色三日之內必受雷嗔，是人歸家略不少露，至第三日，果大風雷雨，黑暗乾坤，是人曰：天來誅我，我當走野，免致驚懼雙親以嚇弟兄，於是執傘速至東郊外伺誅。此一時地雷知念飛稟，即差天雷司猛吏辛判官，化作一俗人察此一事，飛至傘下共之同戴，是人曰：天欲誅我，我來待死，汝速避，勿在此久留，要傘將去。辛判官飛上天雷上奏上帝，帝感如此，加與三紀壽，千日官祿，緣其三事善，釋三世之罪，一知雷嗔不說，是敬天也，二走野待死者，是愛親也，三與合傘人言，汝速避，又與之傘者，乃利人也，因此三事，遂

得榮昌，子孫綿遠，回死注生之功，豈非人之修積也耶。上至帝王，下及庶人，尊卑雖則殊途，命分俱無差別。

天地乃一炁，人物無兩途，昔漢明帝於終南山遇七元真君，素衣垂髮，帝稽首問曰：未審是何仙聖？真君曰：吾是北斗七元真君，下遊人間，察錄善惡。帝叩頭再拜云：仙者掌握何事？真人曰：吾上管諸天星宿，下管五嶽四瀆、三百六十名山、三十六洞府地仙，河源水族盡屬吾之所管，并下元生人年命長短，衣食官爵疾病，刀兵刑獄，分野興廢，並是吾之僉註。帝曰：如朕還屬上真管否？真君曰：子雖為人主，命與庶人一同。帝拜曰：凡目不識上真，乃再啓曰：朕欲求長生之道可修否？真君曰：子要求至道，脫死昇天，子須堅勤，何慮不得。帝曰：朕幸遇上真，願賜傳授，朕修事不虧，兼綵繪真像，畢生供養。真君曰：子至告於吾，不可不傳，緣子宿

是上仙墜為人君，吾今所宣是玄真祕術，子須密行，不可漏泄，須發大願，恭天順人，慈和心性，淫慾懈怠，殺害妄想，切在戒之，欲得道通聖，但依二時交乾步斗，吞符誦咒，存想醮拜，功滿之日，自然昇仙矣。帝曰：朕當依法奉戒。真君曰：子當諦聽，修身鍊形，常至子後午前，存身為枯樹，以左手中指中節上緊掐定，後想空身為一團真炁，畢，却想真炁為一真人，青龍從肝出左，白虎從肺出右，朱雀從心出頂，玄武從腎出足，四神侍衛從。乃步斗，凡步斗，春夏從魁星起，秋冬從罡星起，皆先從左足，欲步斗時，先以兩手中指中節緊掐，口中默念魁魁魁魁魁魁，然後起左脚，存斗蓋於頭，以魁星在前，罡星在後。仍存金光照人，即叩左邊齒七通，咒曰：上方世界八千人，下方治地四將軍。三五吏兵除惡鬼，四六童子護我身。六甲直符祛厭魅，六丁玉女守吾身。左有青龍右白虎，上有朱雀下玄武。

前有功曹後主簿，却除妖魅并魔蠱。一切厭穢不得住，須臾不去舉天斧。急急如太上老君如律令！然後叩右邊齒七通，咒曰：太寧九宮，太乙守房。百神參位，魂魄和同。長生久視，塞滅邪兇，急急如太上老君律令！真君曰：此咒是太上金口所宣，子當持此二咒，神將靈童玉女自然隨子身守護驅使也，瘟瘴傳尸、刑獄刀兵，永不近身。帝曰：上真到何日降下人間，所食何物，願賜一言，朕當供養。真君曰：正月二十五、二十六，二月初二、初七、二十三、二十六，三月二十六，四月十七、二十七，五月初五、十三、二十，六月初四、初八，七月初四、二十四，八月初二、十一、十九、二十七，九月初三、十八，十月初十、二十六，十一月初一、初九、十七、二十五，十二月二十日，及每月初三、二十七日，庚申，甲子，吾下遊世間。當以新熟果餅、名華香藥、細酒棗湯供養。凡欲供養，先以舌拄上齶，存舌為度仙橋一

道，存五臟中出五色氣，為五條五色祥雲，乘起其橋直至吾斗中，默呼直年直月直日直時使者，從橋上去吾斗中云：弟子某有某事請告於吾。若見斗中一人如玉女托羊頭者，名曰擎羊使者，次見一人左手執劍，右手托華盤者，名曰陀羅使者，此二人先來檢校所有供養，不精專及穢觸，皆此二人奏報。若有異香紫雲入室者，是吾七真及左輔右弼下降也，子須於迴靜室中供養，不得嗔怒，常須歡喜，勿令女人孝子僧尼等見，如見觸於吾，禍殃立至，若能修行專志，一有災厄之時，但焚香告吾，災禍自免，不得妄為。今道齡得此真玄之迹，不敢自祕而獨善其身，故載此章，惟願上智之士依法修持，必獲感通，以遂昇真證道也。凡夫在世，迷謬者多，不知身屬北斗，命由天府，有災有患，不知解謝之門，延福延生，莫曉皈真^③之路。斗為天地之準繩，斗乃陰陽之陶冶，生物生人，運水運火，故成四季，令

萬靈振十方冠三界，自三清昊天玉樞之尊，復有如北斗功德之大也耶？！人人頂戴北斗，而不知身屬於斗，却不精勤朝禮而修奉，世人未免乎災患不臨身也。縱然學道而道淺，未學之人猶不免，況在俗之人，名利役其心而不知止，酒色搖其精而不知戒，厄會之時災患必生，災患至矣，尚不覺悟而皈真解謝，惟信巫覡之妄，烹宰羶腥以為祈禱，或偶得痊瘥便為受神之福，如其死亡則謂神不保庇也，間有服藥多害物命者。嗚呼，爾欲求生，彼亦惜命，安可忍乎！凡諸此者，皆是不知解謝之門也，知其門者，則始於眴視服藥，未愈，禱之祖先，祖先未應，次求法助，未驗，必獲罪於天命災於星數矣，必當以善功解之。豈不聞春秋宋景公熒惑守心度主宋國災，子韋曰：禍當君可移於臣，公曰：相所以治國家也，曰：可移於百姓，曰：百姓死，寡人將誰君？曰：可移於歲，曰：歲若饑，人饑必死。子韋曰：

君有至德之言，三天必三賞君矣。是夕熒惑乃退三舍。信乎人之有災患，可不以善功解謝之？人能興一念之善，行一善行，則感鬼神動天地矣。人有災於星數，當求醮謝，自認本命所屬星君，解穰災咎，更能三省其身，思愆悔過，至心歸身歸神歸命，懇告斗宮，則可以災患消除，延生益筭矣。此乃解謝歸真之門路，若不以良醫藥餌治病為功，又不以告斗祀先為忱者，則災將重矣，病將危矣，死將至矣。

致使魂神被繫，禍患來纏，或重病不痊，或邪妖尅害，連年困篤，累歲屯遭，塚訟徵呼，先亡復連，或上天譴責，或下鬼訴誣。若有此危厄，如何救解？急須投告北斗，醮謝真君，及轉真經，認本命真君，方獲安泰，以致康榮。更有深妙，不可盡述。

凡愚之輩，迷謬之人，貪慾是務，惟利是圖，蠹公營私，損人益己，信巫覡以禱祭淫祀，啖官吏以吞併善良，恣慘酷以拷捶奴婢，逞顏色以嫉妬

糟糠，不有天地，豈懼神明。如此不能覺悟，沉淪又作諸業，轉生迷謬，至於惡積禍盈，時移事退，病患來侵，妖邪踵至，人欲既盡，天理昭回，自於心上幻出許多危厄也。太上慈悲，大開解謝之門，直指歸真之路，若能悔愆首過，不蹈前非，投詞具奏，醮謝真君，禮認本命，又能修真向道，即康榮也，更有深妙不可盡述者，太上略示下文北斗真形名號靈符也。

太上玄靈北斗本命延生真經註卷之二

①「大聖北斗七元君，能解地獄厄……能解一切厄」，《真經註解》和《經註》皆作「大聖七元君，能解刀兵厄……能解水火厄」。

②此句，前二參校本皆作「而衆星拱之」。

③「皈真」，前二校本皆作「歸依」或「皈依」。

太上玄靈北斗本命延生真經註卷之三

玄陽子徐道齡集註
乾陽子徐道玄校正

凡見北斗真形，頂禮恭敬。

奉真之心，常如整巾戴帽，斯須不可離也，朝真之誠，當如面君事貴，絲毫不敢怠慢，則能感格於真靈矣。

北斗第一陽明貪狼太星君，子生人屬之。

經云：凡人之生，皆是天炁，正北位居中一炁生水，萬物皆因水而生，故北斗居中天而旋回四方，主一切人民生死禍福。北斗：第一貪狼星，為東斗，主算，第二巨門星，為西斗，記名，第三輔第一，第四輔第二，第六武曲星正居本位，為北斗，落死，第五廉貞星，為南斗，上生，第七破軍星，正居中位，為中斗大魁，總監衆靈。凡一切萬物，生死皆屬北斗。洞明星外輔周迴隱光，內弼指十二辰，濟生則總曰璇璣玉衡，度死則總

曰豁落。若有衆生遇其疾厄，隨方禳謝禱醮，善無不應。星君名魁字貪狼，又名天樞，又曰正星，主陽德七陰，名扶真君，《北帝神呪經》曰：名格字露神子，又名天英字子然，居太上宮青城玉樓中，配事于天，主天元并身，子生人屬之，管太陽真君室壁奎婁四宿，節候陽明，春生萬物，所屬秦地徐州分野，為天之太尉，司政主^①，非總^②九天上真，中監五嶽飛仙，下領後學真人，天地神靈功過輕重，莫不隸焉。漢帝於終南山遇七元真君，素衣垂髮，帝問上聖真號，七聖曰：吾真號貪狼星，名玉華靈皇夫人，居靈華天，又按《九真帝君九陰混合縱景萬化隱天訣》云：北斗第一星中名太一宮，帝變隱逃光宮，中有帝君內妃，名太一法垣字幸正扶，著黃錦披，丹青飛裙，頽雲髻，又星君姓上靈諱搖天槌，戴九色芙蓉之冠，絳衣紫裙，九色青帔，躡鳳文之履，變形如鬼神，披髮向上，赤色面青，左手持白棒，右手按前。又

真形戴九晨玉冠，青羽飛裳，執斗中玄圖，曰據斗真人，號玉皇九宸君，又曰樞宮大聖魁星君，然燈曰身星，明暗以驗吉凶。真符曰延生之符，諸在仙經，隱名隨法立號也，星圍九百二十里。

北斗第二陰精巨門元星君，丑亥生人屬之。星君名彪字巨門，又名璇，又曰法星，主陰刑，又名嬰真君，又名正字貞文子，又名天任字子全，居中元宮五色玉樓之中，配事于地，主地元并命，丑亥生人屬之，管太陰星君胃昴畢觜四宿，節候陰精，秋成萬物，所屬楚地益州分野，為天之主宰，主祿位，上總天宿，下領萬靈，及學仙之人，諸以學道及兆民俗命，莫不隸焉。又真君素衣垂髮，名安上神華夫人，居神華天，又第二中元宮，帝保胎化形內嬪，名太一三食字羅朱嬰，赤錦披，綠羽飛裙。又姓育嬰諱激明光，戴五色飛雲之冠，紫衣黃裳，七色錦帔，躡虎文之履，變形如美婦人，披纓絡，戴五色華冠，執通

明之扇，以青衣女子侍從。又真形戴玄精玉冠，玄羽飛裳，執五色羽節，曰舉斗真人，號玉皇北上宸君，又曰璇宮大聖魁星君，然燈曰命星，真符曰度厄之符，星圍五百五十里。

北斗第三真人祿存真星君，寅戌生人屬之。

星君名魁字祿存，又名璣，又曰令星，主中禍，又名兆真君，又名機字衛府子，又名天柱字子素，居真元宮黃臺玉樓之中，配事于火，主日元并福，寅戌生人屬之，管水星真君參鬼井柳四宿，節候真人，所屬梁地冀州分野，為天之司空，主神仙，上總九天高真，中監五嶽靈仙，下領學道之人，真仙之官莫不隸焉。又真君素衣垂髮，名靈精玄黃夫人，居玄皇天，又第三星真元宮，六遁七隱上元丹母，名太一虛夷字仲雙兆，青錦披，綉羽華飛裙。又姓歸并諱處衆踏，戴七色寶冠，黃衣青裙，五色絳帔，躡龍文之履，變形如二十歲美丈夫，花貌，披草衣，執筆，多正面而立，又真形戴飛雲寶冠，青羽飛裳，

執斗中青籙，曰履斗真人，號玉皇主仙華宸君，又曰璣宮大聖魁星君。然燈曰福星，真符曰保命之符，星圍七百二十餘里。

北斗第四玄冥文曲紐星君，卯酉生人屬之。

星君名魁字文曲，又名權，又曰伐星，主天理，伐無道，又名盤真君，又名光字子惠子，又名天心字子裘，居紐幽宮朱臺玉樓中，配事于木，主月元并祿，卯酉生人屬之，管火星真君張星冀軫四宿，節候玄冥，所屬吳地荊州分野，為天之遊擊，主伐逆，上總九天鬼神，中領北帝三官，下監萬兆，伐逆不臣，諸以凶悖莫不隸焉。又真君素衣垂髮。名上靈神妃華皇夫人，居華皇天。又第四紐幽宮，帝匿景藏光中元內妃，名太一七烈字橫單盤，紫錦披，黃華羽裙，又星君姓靈樞諱搖天柱，戴六色盤龍之冠，白衣絳裙，三色黃帔，躡龜文之履，變形披髮，執文字，騎五色雲龍，如婦人面，回視廉貞星，又真形戴三華寶冠，丹錦飛裳，執玄靈之節，曰步

斗真人，號玉皇玄上飛華宸君，又權官大聖魁星君，然燈曰祿星，真符曰益筭之符，星圍八百里。

北斗第五丹元廉貞綱星君，辰申生人屬之。

星君名魁字廉貞，又名衡，又名殺字子衡子，或云不附子，又名天禽字子公，居綱神宮素臺玉樓之中，配事于土，主江元并官職，辰申生人屬之，管木星真君角亢氏房四宿，節候丹元夏，以長養萬物，所屬趙地兗州分野，為天之斗君，主命祿籍，中統鬼神簿目，下領學真兆民命籍，諸天諸地，莫不總統。又真君素衣垂髮，名靈妃元皇夫人，居元皇天，又第五綱神宮，變體易景斗中大女，名太一鬱昌字壽丘蘭，朱錦披，紫青飛裙，又真星姓上開諱變五道，戴五色華冠，青衣白裙，四色絳帔，躡雲文之履，變形獨髻騎白龍，戴七寶冠，從者四人，各執戟從下。又真形戴七寶飛天之冠，白錦飛裳，執青炁籙籍，曰躡紀真人，號玉皇金剛七晨

君，又號衡宮大聖魁星君，然燈曰官職，真符曰消災，星圍七百二十里。

北斗第六北極武曲紀星君，已未生人屬之。星君名魁字武曲，又名闔陽，又曰危星，主天倉五穀，又名定真君，又名衛字大車子，又名天輔字子卿，居紀明宮玄臺玉樓之中，配事于水，主河元并壽，已未生人屬之，管土星真君心尾斗箕四宿，節候北極三冬，以收藏萬物，所屬燕地揚州分野，為天之太常，主升進，上總九天上真，中統五嶽飛仙，下領學者之身，凡功勤得輪轉階級者，悉總之焉。又真君素衣垂髮，名北上金蓋中皇夫人，又第六紀明宮，帝隱迹散衆斗中中女，名太一炁精字抱定陵，青錦披，青繡飛裙。又星君姓明靈諱昌上元，戴翔鳳之冠，玄衣錦裙，龍文虎帔，躡花紋之履，又變形象頭人面，仗劍披纓絡，又真形戴飛精華冠，紫錦飛裳，執斗中玉冊，曰步罡真人，號玉皇北辰飛華宸君，又號闔陽宮大聖魁星君。然燈曰壽星，真符曰散禍之符，

星圍七百里。

北斗第七天衝破軍關星君，午生人屬之。

星君名魁，字破軍，又名瑤光，又曰部星，亦曰應星，主兵，又名淑真君，又名行字太賓子，又名天衝字子翹，又二名字，一曰天蓬字子禽，二曰天內字天成，乃隱曜名也。破軍星君關會宮九色玉樓之中，配事于金，主海元并妻妾，午生人屬之，管金星真君牛女虛危四宿，節候天關，所屬齊地豫州分野，為天之上帝，主天地機運，四時長短，天地否泰，劫會之數，莫不隸焉。又真君素衣垂髮，名玄上真皇夫人，居真皇天，又第七關會宮，帝分景萬形斗中少女，名太一郁墨字天凡叔，丹錦披，青華明羽裙，又姓玄樞諱開天徒，戴七星之冠，丹衣錦裙，虎頭文帔，躡獅子文之履，變現豬頭人面，手持歡喜糰，變形披白素衣，口吐赤炁，光明奪日，立斗柄之頭。又真形戴九雲之冠，九色錦裳，執揮神之策，曰乘龍真人，號玉皇總靈九元北蓋晨君，又曰瑤天

官大聖魁星君，然燈曰主妻妾，真符曰扶衰之符，星圍九百里。

北斗第八洞明外輔星君。

星君乃天之玉帝之星，上總九天，下領九地五嶽四瀆之仙官，居帝席宮內紫炁玉樓之中，姓精常，諱上開字正延，戴飛精寶冠，九色鳳衣，手執火鈴，變形紫袍腰金帶幘頭執笏，又隨諸國宰輔之服，曰遊行三命真人，號玉皇帝尊元晨君，又號帝太常皇夫人，居太常天，又第八帝席宮，帝化日月水火斗中高皇左夫人，名太一石啓珠，字落落茂華，紫錦帔，繡羽飛丹裙，所屬燕地并州分野，乃斗中外輔，總承衆事，司察天下萬國九州執政大臣罪福功過。然燈禳謝衆灾治病服藥，以明吉凶也。此輔星倚乎闔陽，所以佐斗成功丞相之象也。

北斗第九隱光內弼星君。

星君乃天之大帝之星，主變化無方仙真功過，居上尊宮內紫館玉樓之中，姓幽空諱冥陽暉，字幽寥，戴飛

天寶冠，手執帝章，變形緋衣，執圭，出五色之炁，又各隨諸國宰臣之服，曰徘徊三陽真人，號玉皇帝真元晨君，又號變靈上皇夫人，居變靈天。又第九上尊官，帝化金石山河斗中高皇右夫人，名太一滌夷條，字雲育，玄綠錦披，繡羽華裙，又皆頽雲髻，乃斗中內弼，總承衆事，主察天下萬國九州執政大臣罪福功過，然燈祈福應投事務，明吉暗凶以驗之。

上台虛精開德星君。

中台六淳司空星君。

下台曲生司祿星君。

三台有六星，兩兩而起其勢，橫亘北斗第二魁星之前，一曰天柱，乃三公之位，在天曰三台，在人曰三公，西近文昌二星，曰上台，為司命，主壽；次二星曰中台，為司中，主宗室，東二星曰下台，為司錄，主兵。又曰：上台司命為太尉，中台司中為司徒，下台司錄為司空。一曰：泰階上台上星護助天子，下星為女后，中台上星為諸侯，下星為卿大

夫，下台上星為士，下星主庶人，所以和陰陽而理萬物也。按《玉樞經》云：若人欲免三灾九橫之厄，即於靜夜稽首北辰，北辰之上，上有三台，其星並躔，形如雙目，疊為三級，以覆斗魁，是名天階，若人見之，生前無刑囚之憂，身後不淪沒之苦，天階者，乃太上昇降之道也。上台星君號通妙玄道天尊，生生主者，中台星君號仁化昭德延福天尊，養養大神，下台星君號靈源妙有空洞天尊，護護天翁，虛精六淳曲生者，乃星君之內諱也。人能知星君名號，而誠心頂禮恭敬者，則衆惡消除，諸善備至，凡於靜房端坐，思三台覆頭，次思兩腎氣從胸出，與三台相連，久久思畢，啄齒二七徧，以鼻微微出氣，閉口滿嚙而畢，乃咒曰：天靈節榮，願保長生，太玄三台，守其真形，五臟神君，各保安寧。復叩齒默禮而退。即得魔障永除，百事如意。上台星君面色赤，口吐赤炁，道裝，執碧玉圭，乘黑雲，頂有黃炁。中台星

君面色白，口吐白炁，徧滿天下，道裝，執白玉圭，乘白雲，頂有白炁。下台星君面小，而光芒千百，炁如絲射暗，立青炁中，道服，執青玉圭。三台受虛無三炁明青黃白之正色，乃調和陰陽之主，即人之三魂也。人非魂不生，非魂不養，非魂不護，故言生養護矣。凡人之身，有魂則生，生必養，養必護矣。若生養了不護，則夭折也，延生之訣，正在此三字上，修真之士，既知三魂生養護我，當悟我身既得其生，必自調養，既能調養，必要愛護，若不愛護，於禁忌之日不貴身命，則三魂離矣，此身喪矣。如是真君名號，不可得聞，凡有見聞，能持念者，皆道心深重，宿有善緣，得聞持誦，其功德力莫可稱量。切謂今年所食之粟，乃去年所種之苗，今得遇經之慶幸，乃宿生奉斗之善因。凡人得生聖世，見聞妙經，持念名號，朝禮真形，其功德不可思議，果報亦不可思議也。

若正信男女，值此真經，智慧性圓，道心開發，出羣迷徑，入希夷門，歸奉真宗，達生榮界。

人稟忠正誠信之資，則具智慧圓明之性，正，則出羣迷之徑，信可入希夷之門，了悟真宗，開弘大道，豈不超達於長生之榮界也哉。

於三元八節，本命生辰，北斗下日，嚴置壇場，轉經齋醮，依儀行道，其福無邊，世世生生，不違真性，不入邪見。

三元者，乃三官主錄百司、上詣天闕，進呈世人罪福之辰也。八節者，即立春、春分、立夏、夏至、立秋、秋分、立冬、冬至，此八日也，乃五帝下降錄人罪惡之辰也。生年為本命，生日為生辰，身中萬神聚會之日，北斗下日者，昔漢明帝遇七真，曰：吾居七元宮謂之北極，皆有華蓋相隨，帝居於中，其星皆生七寶，光華燦爛，號為北極帝君，常月初三、二十七日降下人間，受人之醮祭，察人之善惡。此夜可於中庭立几筵，精膳酒脯，求度脫災厄延命益算、及治邪考

鬼滅精之法。當此夜欲卧時，先存華蓋九星在頭，左北斗，右北斗，上北斗，下北斗，三台覆其中，於卧室東面，存二十八宿真官，如嬰兒之狀，著錦裙紫紗帔，執青簡，口吐玉光之炁，入我口中，皆為真炁，匝滿身中，得此道後，乃為降靈之師，萬鬼自怖也。奉道之士，得聞真君名號，能持念者，即能於降監之辰，嚴置壇場，轉經齋醮也。世世生生者，即宿有善緣，道心深重，今又能依儀行道，其功德力莫可量也。不違真性，歸奉真宗，不入邪見，即出羣迷之徑也，此太上慈悲，諄切至再，垂教世人，奉斗朝真，返邪歸正，離俗昇真之道也。

持經之人，當誦七元真君所屬尊號，善功圓滿，亦降吉祥。

學道之士，設醮朝真，誦經持號，修習既久，念念不忘，常雖堅持不退，與斗真不相遠離，自然感格，錫之福壽而降吉祥也。

即說北斗咒曰：

北斗之說，前章備載。咒者，祝也，又讚揚斗真之聖德也。奉道之士，傾心敬誦，存七元之相，則禱無不應也。此後前篇梵語神咒，太上以此明示三界魔王之隱韻，使朝真之士不為魔王阻路，而得上徹斗司也。焚語神咒曰：唵响嘛哪吸吸哪、囉嚩哪唎哪、吐唎哪噉哪噉哪、唵吽吽俱祇帝賒蘇吒、阿若密吒烏都吒、俱者吒波賴帝吒、耶微若吒、俱囉帝吒、耆摩吒薩婆訶。

北斗九辰，

北斗者，乃天地之元靈，神人之本命也，九者，乾道也，陽體也，生生而不少息也，辰者，乃衆星之宗主，萬象之都會也，是以斗居北方，二隱七顯，合為九位，即人身中之九竅也。中天大神。

中者，不高不下之謂也，又曰中者，衆也。天者，無為無極之謂也。大者，至尊至尚也。神者，靈也，明也，正直而不曲也。又曰神者，伸也，上天下地以正道也。故北斗九辰居中

天之內，為衆天萬象尊尚靈明正大之真神也，即世人心居中，而元神為一身之主會也。

上朝金闕

上朝者，謁見也，瞻仰也。金闕者，乃三清之化炁，玉帝之真境也。故九辰乃三清玉帝之腹心，人能時時而朝禮之，以盡報本之道也，如人能以心神時時昇入泥丸，則真靈不散而得長生也。

下覆崑崙

崑崙者，載世之地名，生萬物之化炁也，故九辰日夜覆蓋者，乃生生不絕之恩也，如人身能將心火降於腎水，則成真有功，而丹不日自成矣。

調理綱紀

調者，調也，又曰提掇也。理者，整束也。綱者，金木水火土五行是也。紀者，周天二十八宿也。如九辰位居中天，德侔三境，所以提掇整束五行二十八宿，不使紊亂經緯，而乾坤得位，日月順度，神人得獲安逸也，如人能調理五臟，整束四大，則百病

不生而得真道也，《難經》云：智者能調五臟和是也。

統制乾坤

統者通也，又曰總也。制者治也，又曰御也。乾者天也，又曰陽道也，神道也，人道也。坤者地也，陰道也，鬼道也，邪道也，又天動而地靜是也。故九辰能通治天地之道，陰陽之炁，鬼神之機，人邪之生滅，如人能收拾水火以養心腎，則延生之道明矣成矣。

大魁貪狼，巨門祿存。文曲廉貞，武曲破軍。

大魁者，最長之首也，貪狼、巨門、祿存、文曲、廉貞、武曲、破軍者，乃七元七星真君之名字也。

高上玉皇

高者，上無以加也。上者，尊之又貴。玉者，至寶也，水火不能為疾也。皇者，至大之稱，乃三界千真萬聖之主帝也。故九辰體乎高上之大玉皇之尊也明矣，如人朝真奉斗，念念不息，水火得攝鍊，神炁結胎，則

可與高上玉皇為臣為使矣。

紫微帝君

紫微帝君者，乃北斗之主宰，衆星之君父也，所以引紫微為九辰三台之首也，如人能居仕版不欺公妬法，念念忠君，則自然天與相之，永無厄難也。

大周天界

此七元真君動靜之機，誠不可測，各司下世賢愚之人本命，大而能周徧上天下界，無一物不係北斗七元之所出內也，如人能將七情收斂，則萬善自生也，若心一向道，則可大周其天，而得逍遙快樂也。

細入微塵

北斗七君神通莫測，真妙難窺，大可周徧上天下界，小能潛入細微之塵，皆可度人成真也。世人莫以善小不為，雖幽微塵土之中，斗真亦能照察也，經云：君子慎獨者是也。

何灾不滅，何福不臻

斗真既大周天界，細入微塵，惡必罰之，善必賞之，則何灾不能滅耶？灾

既消散，其福必鍾也。世人若能幽獨之中，昭著之內，心心奉斗，念念守神，則灾不干，福自來也。

元皇正炁，來合我身。

元者大也，萬善之長也，皇者尊也，正者不偏不倚之謂也，炁者天地之元靈，陰陽之妙化。蓋北斗九辰，乃元皇正大之炁結而成也，人能以斗為心，以斗為神，則與元辰本命打為一團，則元皇正炁來合我身，何患不能長生久視矣。

天罡所指，晝夜常輪。

天罡者，乃天之正炁，萬神之宗分，天地非天罡不明上下，運斗真非天罡不能通明令，萬神非天罡不能玄妙也，天罡之功大矣哉。罡字之義，從四從正者，乃四聖治四方，謂天蓬居東，天猷居西，翊聖居南，佑聖居北，中乃大聖妙運天罡尊君主之也。故天罡守中天，以生為德，以動為功，得東西南北之正炁，故曰天罡也。天罡守中主土，北斗屬水，土以制之，故能運北斗生萬物也，非獨運

北斗，其月月一建即指一方，故五斗皆從天罡所用也。天罡一日之中，每一時辰斡旋斗柄，臨一方位，時時運轉無有停息者，乃生生不窮之理也。按《玉樞經》云：雷城十二門，並隨天罡之所指，罡星指丑，其身未，所指者吉，所在者凶。何故有此吉凶，乃天罡之體用，即陰陽之炁也，天罡正炁能生能殺，若指向之處即是生方，故有生炁，取之可以治病，補虛安神旺炁，卻禍消灾，延生度厄也。所在之處則有殺炁，用之可以斬鬼驅邪，夷凶禁暴，馘毒制魔，故所指者吉，所在者凶，天罡之德，信不輕也，天罡之功，信不小也。

俗居小人，好道求靈。

俗居者，乃塵土世俗之居也，小人者，至渺小微賤之稱也。此句乃起奉咒之士恭敬自謙之辭也，人能得遇是經訣，必當竭力盡心敬其道，而得玄靈本命之延生矣。

願見尊儀，永保長生。

既能好其道而得玄靈之訣，則自然

見其真形尊儀，而得長生久視之道也。三台虛精，六淳曲生。生我養我，護我身形。

三台者，乃中天之大化，北斗之華蓋也，真君之名號服相，並註前篇，一曰天城，一曰天階，一曰天相也，即太虛之玄精，神人之真炁也，此三台即人之肺神、三魂之總關也。人能常誦是咒，則得七魄清，三魂安，真炁降下，生我養我護我，而得長生神仙也。又曰：魂神為陽，生我身也，魄神為陰，養我精也，魂魄不離其身，陰陽生化其精，則北斗九辰與三台至聖，千真萬靈常來衛護於我之身形也。如此行之奉之，則灾厄從何而生也，學者可不以道齡之淺見薄聞，以為真文大道，庶幾有補於將來也。

魁魍魎魍魎尊帝，急急如律令。

此北斗九辰之內諱也。若人持誦至此，則當著想尊容，愈加敬禮，而叩齒密誦，慎勿朗宣，禍福響應，可不

畏歟！急急如律令者，漢時公檄文移結語亦皆如是也，如當今部符云：符到奉行之義，天師漢人，故承用之教門，遂得祖述也。

太上玄靈北斗本命延生真經註卷之三

①「司政主」，據下文意當作「主司政」。

②「非總」，據下文意，當作「上總」。

③據前後文，疑此處脫「居」字。

太上玄靈北斗本命延生真經註卷之四

玄陽子徐道齡集註

乾陽子徐道玄校正

老君曰：凡人性命五體，悉屬本命星官之所主掌，本命神將、本宿星官，常垂蔭佑，主持人命，使保天年。

本命星官者，如子生人屬第一貪狼星君是也，本命神將者，如甲子丙子之神也，本宿星官者，陽則虛宿、陰則女宿也。太上初令世人知其性命皆憑道生，既了悟此因，即令歸真修奉延生解謝之門。此章明人之五體悉屬本命星官主掌，五體者，即五臟也，人若五臟安和，則萬邪不侵，百病不入，永保長生，本宿星官蔭佑其命，知身則五體安和，知道則長生久視，和性則道心開發，知命則使保天年也。

凡俗無知，終身不悟。夫本命真官，每歲六度降在人間，降日為本命限期，有

南陵使者三千人，北斗真君七千神將，本命真官降駕衆真，悉來擁護。可以消災懺罪，請福延生，隨力章醮，福德增崇。

人生六十年為一大限之期，全其本年是也，乃平生一周換甲之期，六十年為一小限，即每年六度是也，其日，本命真君因所屬生人降在人間，即於我身察錄其罪福。南陵使者，乃破軍星君之使也，故其中陰陽混合，南斗關北辰，北辰隱南斗也。《靈寶經》云：北斗落死，南斗上生者，分其門而說也。故此經北斗二字皆總之也，其無知不悟之凡愚，造惡業，違犯禁戒，伐其天年，則限數短促即死矣，學道上智之士，積功布德，精修善業，遵奉禁戒，展其天年，限次延遠，福德增崇，則得長生久視矣。

其有本命限期將至，自身不知，不設齋醮，不修香火，此為輕生迷本，不貴人身，天司奪祿，減筭除年，多致夭喪。迷悞之者，雖遇經訣，懷不信心，毀謗

真文。如此之人，身謝之後，淪沒三塗，漂沈諸趣，永失人身，深可悲哀，自致斯苦。

天上清下濁，造化一陽一陰，一日有晝有夜，一年之內，春生夏長，秋殺冬成。星有隱顯，月有盈虧，如列宿翼象二十二星，虛壁止二星，井宿三十三度，鬼宿止四度，天象尚有不齊，人稟天地星斗陰陽五行造化而生，故有富貴貧賤壽夭賢愚之異。而人不悟賦分已定，惟務妄想貪求，於有限光陰造無窮罪業，一度本命加臨，一次死期將至，不謝天地生成之德，不感星真蔭庇之恩，既不貴重自身，乃是輕生迷本，必致夭喪其身。迷悞之人，得聞此經，心生狂亂，狐疑不信，或見持誦，不能思齊，反生誹謗，身死之後，沉淪鬼趣，受辛報苦，劫盡纔於地獄受果報之罪，經中有見人持經，偏眼邪視，惡言謗讟，不生敬仰，或初雖信受，後復慢易，種種罪報，不忍註釋。學道之士，豈侮聖人之言，侮經則鬼祟來

侵，奉經則神聖皆迎，既無功補於玄教，焉敢謗毀其真文，《靈寶經》云：天司記人功過，毫分毋失，可不慎歟，可不戒歟！

若本命之日，能修齋醮，善達天司，一世於本命限期，開轉此經，廣陳供養，使三生常為男子身，富貴聰明，人中殊勝。

太上慈悲，方便設教，故開示次序之法門，使漸達生榮之境界，歸奉真宗，福報如是，先令持號，則罪業消除，次命告斗，醮謝轉經，及認本命真君，方獲安泰，此見世一生之善也。又持念真君名號，宿有善緣，言過去先世道心深重之故，此二生也，今能修齋設醮，善達天司，使三生常為男子身，富貴聰明，人中殊勝，言未來之福報也。《玉皇本行經》云：智慧聰明轉女成男，乃三十種內之上妙功德也。又《四十二章經》云：人離惡道得為人難，既得為人去女為男難，世人修奉，得於三生常為男子身，聰明富貴，此有住相之福報

也。若能離有相之境，昇無為之鄉，入希夷之門，證虛無之道，方可為人中殊勝之男子矣。

其有生身果薄，雖在人中，貧窮下賤，縱知本命，無力修崇，能酌水獻花，冥心望北極，稽首禮拜，念本命真君名號者，亦不虛過本命限期，皆得延生註福，繫係人身，災厄蠲除，獲福無量。天師歡喜，踴躍作禮，讚歎難可得遇無上法橋。

按《金剛經》云：若人滿無量阿僧祇世界七寶持用布施，若有善男子善女人發菩薩心者，持於此經，乃至四句偈等，受持讀誦，為人演說，其福勝彼謂七寶有竭四句無窮，若持於此經，本心悟達，則勝前以七寶布施之功德也。富貴者廣設齋醮，貧窮者酌水獻花，同一是念，福報等也，奉道之士修齋設醮，希求福利，得福雖多，而於識心見性，了無所得，惟成有漏之因，如但以七寶持用布施也。若人知性知命，知道知身，於本命之辰，禮斗朝真，獻花酌水，不虛

本命限期，不希福報，自感聖真延生註福，無為功德勝前以七寶布施有為之福德也。天師感激欣戴，不知手舞足蹈，讚嘆得遇此無上之大法橋也。

老君重告天師曰：世人罪福善惡，皆屬天司，懺罪消災，莫越修奉，遇本命生辰，告身中元辰驛馬，削落三災九厄，保見今眷屬安寧。

太上垂教，立言隱奧玄微，世莫可測，此經乃哀憫衆生，故宣要法，以度羣迷，叮嚀告誡，曲盡人情，使人易解易悟，發信向知歸之心，學道之士既能依經修奉，當求聖意於經旨之外，則登妙果入仙宗也，謂如元辰驛馬如何削落災厄，保眷屬安寧。夫元辰者，乃我身之神也，驛馬者，我之意神也，人之元神，外寄於目，內藏於心，目則外視於萬物，內則心馳於萬機，心目所馳，神亦奔競，人能收心內照，馬不令馳，保養形神，胎息自固，則三尸去體，九蠱消亡，災厄從何而至？故能保我之六脉安

和，而百神調暢也。

凡有上士於本命生辰持此真文者，外伏魔精，內安真性，功霑水陸，善及存亡，悔過虔恭，漸登妙果，重立玄功，證虛無道，乃得聖智圓通，隱顯莫測，出有入無，逍遙雲際，昇入金門，與聖合真，身超三界，永不輪轉，壽量無窮，快樂自在。

夫人之生，有此身者有此神也，身安則神健，神健則氣清，氣清則與道能合也。悔過虔恭者，懺罪也，漸登妙果重立玄功者，告元辰驛馬削去災厄，使形神清靜，自然延生也。證虛無道者，以太虛無上之道為證也。聖智圓通者，則慧光通明，不致三尸九蠱之所害也。隱顯莫測者，言人能登妙果，證大道智圓通，則萬神拱護，千真保迎，烝結真玄，神成妙道，則出入金門之中，隱顯人不可測也。《道藏》云：金門者，非金闕金庭之名也，金闕者，乃三清玉帝之居處也。金庭者，即上聖高真之所居也。此金門者，在昊天之下，三萬九千三

百五十劫烝之下凝合變化為金門也。凡初學精修得道之士，天年終而不入輪迴之道，而飛上金門，受諸逍遙快樂自在也。此章乃經中之玄竅，玄靈之祕要也，凡諸同志肯以上帝之心為心，道齡之言為言，則自然獲福無邊，成真在此章也。

凡有男女於本命生辰及諸齋日，清淨身心，焚香持此真文，自認北極本命所屬星君，隨心禱祝，善無不應，災罪消除，致感萬聖千真，俱來衛護。此文所在之處，千真敬禮，萬聖護持，魔鬼潛消，精靈伏匿，世有災殃，悉皆消滅。

夫人身三魂，屬陽，動以生也，七魄，屬陰，靜以鎮也，魂日居人體，故曰陽，主動，魄夜居人身，故曰陰，主靜。三魂於本命生辰及諸齋日歸身，制御陰魄，令邪道不侵，百神交會，魂安魄正，陰與陽并，不經苦惱，身有光明。人能清淨身心，焚香誦經，啓祝北斗及本命所屬星君，則災罪消除，道速成矣。此經所在之處，千真萬聖與七戒仙官敬遵天師誓

願，護持之際，自有祥烟繞庭，慶雲
摩軒，則何災不滅，何福不臻也。

是名《北斗本命延生經訣》，乃修真之
徑路，得道逍遙皆因此經，證聖成真皆
因此經，出離生死皆因此經，保護男女
皆因此經，保命延年皆得自在，永為身
寶，福壽可稱，保而敬之，非人勿示。

此經廣大無量，功德無邊，凡俗下士
豈易量哉。諸大經典皆不切於《北
斗經》也，謂如《靈寶》，只言度人，却
不曾說教人如何延生以入正道，此
經令人知命皆憑道生，即是教人惜
其本身，知其本命，知本命則自延
生，延生則非道不可延，既能延，則
可受天真地聖之濟度也。無本豈能
度，無根豈有果，此乃本命延生之徑
路，修真入道之玄門也。蓋《靈寶》
者是其用也，《北斗經》者是其體也。
學道之士所當敬戴。太上已授前章
經訣，又名此經，是名《北斗本命延
生經訣》，蓋慮薄德之人輕慢而不珍
惜，故又戒之。夫人自修真道，證聖
成真，出離生死，則保我之心腎完

矣，心腎既完，延年自在，至於入金
門抱玄靈之寶，受逍遙之樂，獲自然
之福，享無窮之壽，倘非延生之訣，
何能至此境界耶？此經非太上恠惜
而不令普及，若示之於不敬不信之
人，必生漏慢，又從而謗之，却是輕
泄之罪也。

老君說經將畢，龍鶴天仙來迎，還於玉
京。是時天師受得妙法，而作是言，誓
願流行，以傳善士，若有男女受持讀
誦，我當與七戒^①，仙官所在擁護。於
是再拜老君，而說讚曰：
家有《北斗經》，本命降真靈。

北斗居天之中，為天之樞紐，天地之
權衡也。天無斗不生，無斗不成，無
斗不明，無斗不行，斗為量度之玄器
也。在人家豈可無之，日用之間無
斗不平，無斗不行，無斗不明，無斗
不成。在人之一身，非斗不生，非斗
不養，非斗不護，非斗不覆。人之心
上有七孔，以應七星，下有二竅，以
應輔弼，又有三毫，以法三台，所以
北斗在天居天之中，在人居人之心，

心即北斗，北斗即心，如即心是佛、
即佛是心是也。為何經中不言心，
却說家有《北斗經》，蓋始因太上觀
見衆生無門可進修真之路，無誠以
向禮斗之科，是故特垂哀憫，大闡玄
靈，授與天師經訣，廣布流行，普使
世人皆躋仙阼，不蹈輪迴。天師靜
應真君上體聖意，下利生靈為心，故
借喻人間一十五種利益之事以讚美
之。家即身也，乃心之家舍也，如人
家安奉《斗經》，供養真形，修崇嚴
潔，千真敬禮，萬聖護持，若人心於
十二時中，行住坐卧之間，念念不輟
於北斗，禮誦焚符，必感本命玄靈降
真炁於我身，以保長生也。此與後
章皆有靈符，計一十五道，併開經
後，依法書篆，佩帶焚爇，則無不感
應也。

家有《北斗經》，宅舍得安寧。
心者神之舍，形者炁之宅也。人能
常存北斗於身心之中，則得身心清
靜，而外使家宅安寧也。
家有《北斗經》，父母保長生。

本命元辰削落灾厄，保我延生，我若不越修奉，可保父母之長生也。

家有《北斗經》，諸厭化爲塵。

身心清淨，思真念道，何厭穢之不塵化也。

家有《北斗經》，萬邪自歸正。

經云：坎居下位，離列上君，主僕安分，其道常存。心即君主也，心正則萬邪皆正矣。

家有《北斗經》，營業得稱情。

朝奉真君，則身中業障消除，而營謀自然稱其情意也。

家有《北斗經》，闔門自康健。

諸竅不漏，浹洽真元，則一身自然康健也。

家有《北斗經》，子孫保榮盛。

長生種子之不絕，必當培養，令其榮盛也。

家有《北斗經》，五路自通達。

五臟流通，無有滯礙。

家有《北斗經》，衆惡永消滅。

真性一悟，萬罪消除。

家有《北斗經》，六畜保興生。

六根安寂，自然興生。

家有《北斗經》，疾病得痊癒。

精神不乏，則百病痊愈也。

家有《北斗經》，財物不虛耗。

財寶乃一身之正炁，若不被外邪所耗，則本元堅固也。

家有《北斗經》，橫事永不起。

人身喻如屋宇堅完，牆壁牢固，何患驟雨狂風之傾摧也。

家有《北斗經》，長保亨利貞。

長保玄靈，則永獲亨利貞也。

老君曰：善哉善哉，汝可宣揚正教，福利無邊，普及衆生，永霑勝善。天師稽首禮謝，信受奉行。

老君說經都畢，天師讚歎已終，萬聖歡欣得福利，普霑於羣品，諸天慶幸，喜法教化及於十方，延生有路，朝聖得門，太上使人人不入輪迴，天師闡世世流行妙道。今道齡不揣其學，擅釋玄文，却非杜撰之辭，實乃真全之本。道齡非為己祈求以要譽，欲使人請禱，必得玄功也，凡諸同志固當奉之敬之，自得長生安泰

也。

太上玄靈北斗本命延生真經註卷之四

咒曰

咒者，即咒祝之義也。以心通天，以神合炁，形聲相應，則感格真靈矣。

天靈節榮，願保長生。

天者，無為之大也，靈者，無所不靈也，天靈者，言人最貴最靈也。人頭頂之一穴，百神朝聚之所，關節流通，真炁榮盛，百病不生，則長生可冀也。

太玄之一，守其真形。

太玄之一者，乃北方玄天坎宮正一之炁，大道之子也，為兩曜之根本，乃萬物之祖宗也。《道德經》云：天得一以清，地得一以寧，人得一以靈，即此玄一也。昔黃帝同三一之道，皇人曰：子能知一萬事畢。一者身之帝也，守一則太一帝君在庭，在則三萬六千神莫不皆在也。守一之法，暮夜，正偃向上，兩手撫心上，祝曰：天靈節榮，願保長生，太玄之一，守其真形，五臟神君，各保安寧，

急急如律令！男誦七徧，女誦一十四徧，畢，思白炁如車輪大，周其身，赤炁在外，便卧。使人五臟安寧，小則延年却惡，大則成仙昇舉也。

五臟神君，各保安寧。

按《內景經》云：心神丹元字守靈，肺神皓華字虛成，肝神龍煙字含明，腎神玄明字玉嬰，脾神長生字魂庭，皆在心內運天經，晝夜存之自長生。謂五臟之神，存之於我，各保安寧矣。

急急如律令！

急急者，疾速不停之義也，如者，似也，律令者，乃太上之勅萬神遵奉其身神，奉行律令而得安且寧矣。修真之士，若能急急依太上之令，奉行璇璣玄一之道者，則神能舉形，飛昇可待也。

北斗長生聰明神咒

北斗九真，玉真仙靈。貪狼巨門，保臣長存。祿存文曲，使臣聰明。廉貞武曲，衛臣安寧。破軍輔弼，護臣身形。常居吉慶，永處福齡。註上生籍，

除落死名。神清氣爽，洞達九冥。禦邪攝鬼，羣妖摧傾。學道修真，所願遂成。九皇覆護，飛昇紫庭。弟子臣某，下情無任。瞻望恩光，激切屏營至禱之至。

讚詠圓滿神咒

大哉北極，生物無息。樞機運動，乾坤定立。太上垂教，衆生遇植。消灾解難，神目電及。臣今齋沐，上帝可格。克始克終，保家保國。諷誦真文，作是惟一。此經難遇，劫數萬億。既遇之者，請必有得。仁仁玄靈，證明功德。

圓滿祝願靈章

向來誦持經典已在周圓，香雲騰舞於三天，丹悃表宣於七曜，金童傳信，玉女通誠，再伸十願之儀，俯罄一心之禱，伏願天真駐駕，樞府停輪，俯賜慈悲，容臣祝願。

一願皇圖永固，衍萬壽之無疆，大道高明，闡七元之有慶。

二願君敷仁愛，臣盡忠貞，八荒霑熙皞之風，四海樂昇平之治。

三願時和歲稔，物阜民安，父兄施慈愛之心，子弟盡敬恭之道。

四願三塗五苦六道四生，悉沾太上之恩，均證人天之樂。

五願臣等先亡七祖，俱超快樂之鄉，見在雙親，均享壽康之福。

六願臣等前傳師友同學門人，魂神無被繫之牽，氣數有飛昇之步。

七願臣等修真有分，進道無魔，生闡道德之風，世世奉玄元之教。

八願侍經神吏，護戒仙官，假茲監衛之功勳，悉遂進陞於品秩。

九願侍香金童，傳言玉女，齋此腹心之丹悃，達乎喉舌之真司。

十願城隍社令、司命土神，隨所守護於靈文，常使導迎於景福，臣誠惶誠恐，稽首頓首再拜，志心稱念：

三清三境天尊、七元覆護天尊、金真演教天尊，功德無量，不可思議。

①「七戒」，前一校本皆作「十戒」。

②「同」，當爲「問」之誤。

太上玄靈北斗本命延生真經註卷之五

玄陽子徐道齡集註

乾陽子徐道玄校正

梓潼帝君奏請靈章表藁


臣誠惶誠恐，稽首頓首，俯伏再拜昊天至尊金闕玉皇上帝御前：臣聞天垂萬象，由五斗而共北辰，教闡三清，應千靈而朝上帝，璇璣乃陰陽之綱紀，玄靈為性命之根宗。經垂千五百年，失倫錯序，道開萬二億劫，隱竅藏玄。非金聲無以叩金聲，不玉旨焉能明玉旨。道齡徐氏有夙緣，累世之修靈寶，玄機無纖芥微塵之漏，蜀都演教，缺要訣而秘靈符，吳郡傳經，開法門而指真路。前日進道齡之釋義，今朝蒙上帝之宣恩，乞頒鳳篆與龍文，願降雲章同月牘。普使人人受誦，世世流傳，臣不勝悚懼，瞻天望聖，激切屏營之至。

某年 月 日藁

玄靈符法


符者，律令也，可以召萬神、攘眾惡也。凡誦經朝斗之士，齋沐澄潔，整衣端坐，先叩齒九通，以聚九炁。然後存天罡所指之方，收炁來吹於紙上，禳灾取白炁，祈福取紅炁，斬鬼驅邪取黑炁。如此書了，起身步丁字，立定，手掐斗文，口誦北斗九辰之咒，即焚之，當加誠敬。若有褻瀆，則禍不免也。各項真符，具載于後。

發爐符 黃紙朱書，掐乾文




右符作用：先叩齒凝神，存東方天門開，如日初出之狀，鼻引口吸，吹在紙上。書畢，口誦密咒云：九靈九靈，合吾真形，水火得位，內外洞明，急如天律元亨利貞。

復爐符




右符，存想尊帝二星，北斗七星，金光朗耀，吸來吹紙上，竅內書玄元始三字，塗九轉火筆出向上。


北極尊星寶章




北極帝星寶章




貪狼星君寶章




巨門星君寶章




祿存星君寶章




文曲星君寶章




廉貞星君寶章




武曲星君寶章




破軍星君寶章




左輔星君寶章




右弼星君寶章




上台星君寶章




中台星君寶章




下台星君寶章




天罡星君寶章




二使者靈章




本命降真靈章




安寧宅舍章




保父母長生章




化厭為塵章




萬邪歸正章




榮業稱情章




闔門康健章




保子孫榮盛章




五路通達章




消滅衆惡章




興生六畜章




疾病得痊章




財物不耗章




橫事不起章




長保亨利貞章




解三灾厄章




解四殺厄章




解五行厄章




解六害厄章




解七傷厄章




解八難厄章




解九星厄章




解夫妻厄章




解男女厄章




解產生厄章




解復連厄章




解疫癘厄章




解疾病厄章




解精邪厄章




解虎狼厄章




解蟲蛇厄章




解劫賊厄章




解枷棒厄章




解橫死厄章




解咒誓厄章




解天羅厄章




解地網厄章



解地獄厄章



解一切厄章



後序

道可名，道非名，常行是道；名可道，名非道，常用是名。昔永壽元年正月七日，太上道祖老君降蜀都，授天師張真人《北斗本命經訣》，蓋哀憫大地衆生迷惑真途，沈溺苦海，不自知覺，永無輪轉，故垂无上之法橋，濟度存亡，無物不被其澤，而其好生之心，乾乾不息，則聖德玄功，豈易言哉。道齡甫自弱冠留志斯經，但聞一善言，見一善行，必書之於簡冊，及取諸先賢先覺解蘊釋奧之文，未嘗去手，日就月將，玩味不怠，始知我太上以是經是訣垂之於世，特不虛設也。洪惟北斗九皇天尊，乃天地之樞機，人物之陶冶，司性命，判生死，運陰陽，建歲時，分晝夜，立寒暑，明貴賤，化賢愚，主禍福，振紀綱，開解謝之門，指延修之徑，上至帝王，下及士庶，皆由七星之主宰，三台之生養也。或云此經

文辭淺近，旨意乖訛，殊不知太上故以日用常行之事，道之名之，啓發愚蒙，盡歸正道，其上智之士，當易境而行之，則自然長生也何疑。道齡吏遷吳中，幸獲考滿，暇日靜慮洗心，截長補短，別義綴章，少明太上授受之餘意，非敢爲訓詁之師也，遂援筆臨文，似有神助，不逾月而集成。噫！道不遠人，人能弘道，此之謂歟。道齡俚語鄙辭，不足以宣揚聖化之萬一，謹取前賢之訓以爲之釋，其有不與經旨相符，脉絡失經之處，余以日用常行之道，切於己身者證而解之，如宅舍得安寧，註之曰修身正心，六畜保興生，註之曰屏六賊淨六根，似不失本命之事實、延生之要訣也。夫道可名，名可道，如針芥之相投，註幸備刊已就，必聖真而是相，雖文理不精，識見不廣，則不敢索怪搜奇，以眩高人之耳目也。道齡愚誠以斯經力上析聖朝，一人有慶，萬壽無疆，宮闈福千歲之秋，臣宰輔三台之化，下冀歲時豐稔，民物

安榮，沉迷超碧落之天，人我樂玄靈之道，凡諸同志勿以人廢言，當以命爲重，謹序。

元統二年九月九日，玄陽子徐道齡齋沐焚香再拜謹題。

太上玄靈北斗本命延生真經註卷之五

（曾召南點校）

111 太上玄靈北斗本命 延生真經註解

經名：太上玄靈北斗本命延生真經註解。原題崆峒山玄元真人註解，疑係宋元間道士撰。假託李白、蘇軾作序。注文以心性修煉為主旨。三卷。底本出處：《正統道藏》洞神部玉訣類。

北斗延生經註解序

原夫太素未分，無光無象，混黃成化，有始有終，則昇清而滯穢，輔善而貶兇，置百二十曹局，列於冥府，造三十六部經，祕於瓊宮，度天人之有道，啓含識之不蒙，余歎曰，莫非三界十方，天地人倫，斯爲以而道之紀也。今竊見聖世，幸逢豐年，得遇皇朝，將道德而安家邦，效勳華而育黎庶，而況天

下晏然，太玄彰耀，今即啓有道之心者，扶風氏等志奉日新，慕真歲久，禱天祐而制凶魔，求師訓而傳道要，遂得遇崆峒山玄元真人，明龍漢之玄文，演赤明之妙奧，教符十洞三乘，化列萬機一義，註解《北斗延生經》一卷，上則有飛神金闕，中則有保國寧家，次則有延齡益壽，普度有情之品，同登無礙之門，於是謹作斯文，用題經首。李白謹序。

太上玄靈北斗本命延生真 經註解卷上

崆峒山玄元真人註解并頌

太者，至極也，上者，崇高也。玄者，幽遠也，靈者，神用也，北斗者，運行之機要也，本命者，元來之性也，延生者，長存不壞也，真經者，進通真妙之徑路也。○大衆大聖天真垂訓，誘化世人，窮通有漏，究竟無爲，內使沖和外合機要，變化飛昇，遊宴玉京矣，奈何世人迷惑真道，恣縱貪癡，三業齊生，六情並起。三業者，貪嗔癡也，六情者，眼耳鼻舌身意是也。既起三業，六情則生障礙，既有障礙，則生煩惱，既有煩惱，種種纏縛，轉乖真趣，意馬顛狂，心猿奔竄，散失靈源，敗壞真炁，罪積丘山，善無塵露，南辰減筭，北斗除年，死入酆都，受諸痛苦，劍樹刀山，鑊湯爐炭，拷掠無停，悲號莫息，眷屬空啼，親姻謾泣，直饒品貴封侯，任使富豪敵國，贏得獨受恓惶，到此盡皆何

益，爭知辯其濁而曉其清，抱其真而歸其一。

頌曰：

太上真詮度世迷，破邪歸正戒貪癡。暫時緣假情非樂，元舊家鄉景最奇。幾縷曉煙橫遠嶺，一彎斜月照寒池。欲知本命延生理，悟取玄元造化機。爾時太上老君，以永壽元年正月七日，在太清境上太極宮中，

爾時者，即此時也，太上老君者，乃天地之祖，萬法之宗，聖德巍巍莫可測也。以永壽元年正月七日者，杳冥之中，劫壞長存，本無期數，強以曆名。在太清境上太極宮中者，逍遙之界，自在之鄉，玉殿巍峨，瓊樓森聳，金碧燦爛，霞彩流輝。於是我太上老君居其所而萬神衛之，但世人只知太上老君在碧落之上，不知只在人身中矣，故云自己三清，何勞外覓。

頌曰：

大道幽微莫可窮，就中深隱妙玄功。豈須雲外求真覺，但向身中覓祖風。

識得舊時來者路，從他花木任成叢。修之不取如斯理，掬水招蟾到底空。

觀見衆生億劫漂沉，周回生死。

且夫衆生本與天地齊功，聖賢同體，悟則為聖人，迷則是凡夫。○大衆悟者，悟真常之妙用，奪天地之變通，保真養性，鍊魄澄神，空其心而意寧，絕其慾而神清，萬物不著一心，無漏行滿功成，自在無為，逍遙於物外矣。迷者，為迷其真覺之性也，仗父母動靜之和炁，托陰陽造化之精源，投胎假像，氣滿形全，十月數足，乃生化為人矣。既又得箇四大五蘊，假合幻化色身，纔曉東西，漸分南北，又早眼觀邪色，耳聽邪聲，舌了邪味，鼻聞邪馨，意貪迷欲，心起愛憎，用則是非，動生曲味，種諸惡根，受報三塗，億劫漂沉，輪迴生死矣。於是太上老君開大神通，眼放大神通光明，觀見衆生流浪生死，無有盡期，故以發哀愍心，廣垂真教，為度世之舟航，使衆生悟無相之相，認無形之形，庶得長生自在，永息於

輪迴矣。

頌曰：

本來容貌豈迴輪，只為貪癡入夢頻。幸是壺天含混沌，忍教心地起根塵。有無之內尋虛假，空色其中覓的真。歸去故鄉風景好，野花啼鳥綠楊春。或居人道，或在中華，或生夷狄之中，或生蠻戎之內，或富或貴，或賤或貧，暫假因緣，墮於地獄。

蓋以為衆生量其緣業，隨果受生，或生於中國，或生於蠻夷，或居富豪長者之家，或在貧窮下賤之戶，暫得為人，多有從其所欲，不自覺知，縱情作過，恣意為非，三尸儘自般調，六賊任從唆狡。○大衆貪財好色，口是心非，嫉能妬賢，欺天罔地，不忠不孝，不實不信，損於賢良，害於溫善，犯天地禁戒，違真聖科條，探巢破卵，殺害衆生，造諸罪愆，無時自省，化身中三萬六千神，變作八萬四千塵勞業，火焚身禍無由免，四大五蘊盡逐地水火風而散，唯有悠悠窮魂為在日暫假因緣，貪迷不省，墮於無

間之獄，而豈不知哀哉乎。但人生堂堂六尺之軀，空凭洗漱，羅綾結束華裝，愛護其體，誰是肯保真養命、鍊性存神底，故我天尊垂其經法，引導衆生，速令頓解，悟入無為之妙矣。

頌曰：

春日壺天景最長，雨晴煙暖麗風光。
可憐新燕來華屋，却笑遊蜂逐暗香。
綽綽芳葩明小圃，絲絲嫩柳拂橫塘。
堪嗟無限韶華景，蝶戲蜂遊弄翅狂。
為無定故，罪業牽纏，魂繫陰司，受苦滿足，人道將違，生居畜獸之中，或生禽蟲之屬，轉乖人道，難復人身。如此沉淪，不自知覺，為先世迷真之故，受此輪迴。

且夫天堂地獄，皆在人之所行矣。故曰善惡無門，惟人自召。若人在世，能積其善者，則天地覆載，日月照臨，鬼神欽禮，真聖護門，既然得真聖護佑，後則福慶臻身，禍殃遠體，乃為智人，列名於玉清矣。○大衆但世人不省萬物之中唯人最貴，如

何是唯人最貴？能奪天地之機，解測陰陽之理，通幽究玄，導達真理，得道昇仙，唯人可達矣。但人生不知自身中有如此之聖，只恁無端狂妄，所作放蕩六欲七情，恣縱十惡五逆，不敬三光，辱於九祖，以日累月，罪積如山，魂繫陰司，受諸痛苦，豈分晝夜，萬死千生，無由出離，直待受苦滿足，暫得超生，却墮於餓鬼，傍生駝騾象馬禽蟲之屬，如此沉淪，永失於人身矣。嗚呼！為迷無益狂非事，故棄真如別掛皮。

頌曰：

只為無端智太愚，致令魂識繫鄴都。
陰官攝問空悲噎，獄卒凌持謾嘆吁。
縱得暫時離地府，將違舊徑別形軀。
傷嗟打在傍生裏，再望人身萬劫無。
乃以哀憫之心，分身教化，化身下降，至於蜀都，地神湧出，扶一玉局，而作高座。

即是太上為歎衆生漂沉六趣，受報三塗，分身教化，化身下降至於蜀都，其時日月不轉，星辰停輪，天地

肅清，河海晏然，於是地神湧出，扶一玉局，而作高座。○大衆此義何為也？蓋因非有罪之聖賢，無無罪之凡夫，闡大威神之力，使衆生不種罪根，悟其大道，為大道无形无名，无以卓望，難為言說，故立此諭法，故太極真人頌曰：大道雖無心，可以有情求是也，乃以哀憫之心，分身教化，化身下降者，但衆生能發哀憫之心便是也。○大衆如何可說太上却又衆生是也，國雖有律，犯而禍及於身，人所無愆，刑乃豈繫於體，但能省非改過，不造罪愆，則萬禍不侵，豈不然乎哉。故《度人經》云：爾不樂仙道，三界那得過，其欲轉五道，我當復奈何是也。至於蜀都者，若論世說，蜀都昔是帝王所居之地也，乃山河之宗祖，寔宇宙之紀綱，幹運於天下，變化於魚龍，昔為都時是也。若論道說蜀都，乃是身心也，故《九老集真論》云：太平風月皇都景，諸國來朝賀聖恩是也。心比著帝王，身諭著蜀都，心若正兮，百骸

暢悅，萬神和榮，心若邪兮，三尸奪命，六賊欺公，禍罹厥體，則流浪於輪迴矣。地神湧出者，是心地發意也，扶一玉局者，乃天真之寶位也。但能發心建意，不造邪見，不種罪咎，參求大道之門，頓悟無為之性，不迷六欲之愆，得證十華之位，逍遙物外，與道合真矣。

頌曰：

莫閉青宵路不通，幻身須信轉頭空。
休言取次達玄理，不辨真誠謾設功。
慷慨撞開生死戶，英雄跳出繫囚籠。
逍遙物外無為客，日月擒來掌握中。
於是老君昇玉局坐^②，授與天師《北斗本命經訣》，廣宣要法，普濟衆生。

是時太上老君昇玉局而坐，演三乘教法，說北斗本命延生之妙理，授與天師，開化羣品，咸令悟道者也。○大衆且夫衆生恣縱七情，有罪愆而有地獄，貪迷五欲，無妙果而無天堂，自不知覺於三毒十惡之中，沉溺愛河，流浪生死。是故太上說此真經，化導世人，不生邪見，於朝暮之間，無

論他非，常搜己過，剴銳戒言，自當懺悔，用法水而洗滌塵勞，磨寶鑑而照明這箇，清淨身心，體合道用，元神居於丹闕，慧光照於玉山，四大俱安，百骸自理，內外虛明，上下寂照，陰陽交媾，往來無窮，混成一炁，鍊就大丹，變化飛昇，玄玄莫測也。凡質既然合道用，聖功休慮不能成。

頌曰：

鍊就丹砂體自然，圓通象外見壺天。
利名總是他家事，道德都為我計緣。
風定雨晴波漾碧，煙消雲散月華娟。
靜中觀見莊嚴境，物物頭頭玄更玄。
是時，老君告天師曰：人身難得，中土難生，假使得生，正法難遇。

竊以想死生輪迴之中，於胎卵濕化之內，或是深山，或於荒野，或居草木，或在江河，猪狗牛馬，驢騾業畜，毒蟲猛獸，虎豹豺狼，蝦蟇魚鼈水族諸類，鳥獸飛禽，種種形變六畜羣毛，一切傍生之類，浩浩無邊，豈知於數矣，若人比及於禽獸，則萬中無喻其一焉。○大衆等閑壞了汝不錯

矣，縱得箇人身，生於化外邊夷，亦是有愆，故居彼地，汝等曾聞北海之外，有一國名曰婆耶，其國中，人夏居於山，冬隱於穴，寂寥衰草，連天瀟灑，黃風捲地，寒披毛葉遮身，饑食禽蟲充腹，仁義既無，道德何知，恣意縱情，為非作過，難進於仙階，易沉於鬼趣矣。今既得居三教流行之國，五常治政之邦，中土生為人者，豈不是積德而至於此也，縱得人身亦於中土，多又執於邪見，不遇正法，強說聰明，自誇己勝，詐曉玄門，謬通經法，展轉沉迷，不能見於道矣。不識正真三教理，又來塵世一遭休。

頌曰：

六道輪迴事可吁，且於方寸用工夫。
耍猿縱後千般有，劣馬降時半件無。
俗景混成秋夜月，根塵分付碧瓊壺。
家鄉咫尺風光好，拂袖呵呵進坦途。
多迷真道，多入邪宗，多種罪根，多諸巧詐，多恣淫殺，多好羣情，多縱貪嗔，多沉地獄，多失人身。如此等緣，衆生

不悟，不知正道，迷惑者多。

皆為衆生善根淺漏，智識昏濁，不肯忠於君，不肯孝於親，貧不守其分，富不施其恩，不求於善利，不濟於困乏，墮慢於三光，拋擲於五穀，但只區區向苦海之中貪財好色，兀兀在牢籠之內競氣爭名，不信罪福，慳貪嫉妬，殺害羣毛，烹炮犬豕，斷他生命，自塞膿身，倚勢豪強，欺凌卑下，啖嚼葷腥，口出穢語，談說是非，動生兩見，遇齋醮者起破壞之心，見修真者發不信之意，種種無端，昏迷智識，多沉地獄，多失人身，不見正道，唯入邪宗矣。○大衆如何得見正道？不著聲香味觸法，不起慳貪殺盜淫，發大智慧清淨身心，內觀於六根四大五臟百神，憑何便動這形骸，仗甚後教他語話，一息不來，後四大撒然休。

頌曰：

分明身內隱玄微，休起慳貪著境迷。
大道悟時真有趣，世情省後只堪悲。
莫因濁濫耽諸惡，且好清心變五衰。

神性俱無塵垢染，廓開天地顯靈基。
我今哀見此等衆生，故垂教法，為說良緣，令使知道，知身性命，皆憑道生。

且以聖人垂科，千方萬便，隨機設教，立法度人，咸令衆生悟其大道，知天地萬物皆憑道生矣。且夫大道從不有中而有，於不無中而無，信乎難言哉。乃天地無形之時，於清濁未判之際，杳杳冥冥，昏昏默默，聽之而無聲，視之而無形，恍恍惚惚之中而有五太，五太劫終，結凝一炁，化為混沌，又經九萬之劫，其中漸生玄黃，於是元皇中理精養炁足，激開混沌，二炁潛分，三才始立，清炁凝而上浮為天，濁炁結而下沉為地，布日月星辰，置山河海嶽，寒暑推移，陰陽昇降，產生萬物，莫離大道也。故《清靜經》云：大道無名，生育天地，大道無形，長養萬物是也。然而天地乃道之子，日月乃道之孫，天地非精炁而不成，日月非精炁而不明，草木乏精炁而致死，人形竭精炁而不存。故人不遠於道，道不離於人，

乃人身抱道，與天地同體，凡欲修真，可秉天之用，乃道則成矣。《陰符經》云：觀天之道，執天之行，盡矣。凡學道之人，但能觀天之用，執天之行，善矣，好鍊陰魄而變作陽神，改凡軀而換為仙體。

頌曰：

會得從來萬法緣，含光寂照動幽玄。
五行混出壺中景，七返烹成象外天。
默默金烏飛絳闕，綿綿玉兔翫輝蟾。
誰知這箇真消息，不遇奇人未可傳。
了悟此因，長生人道，種子不絕，世世為人，不生無道之鄉，不斷人之根本。
如能發其上善之心，戒諸惡根，絕除人我，填平愛欲之坑，頓脫繫囚之索，祛迴有漏之心，覺悟無為之性，忻忻然乎哉。○大衆悟其大道，將來獲何妙果？不經苦惱，不入地獄，百福潛臻，千災蠲去，所望遂成，自然衣祿，延永遐齡，安居樂國。故《清靜經》云：上士悟之昇為天官，中士悟之南宮列仙，下士修之在世長年是也。但衆生種於惡者，則不生其

福，造其善者，則不起其殃，且如發大高見，頓開悟解，思真念聖，滌穢清心，獲无上之利益，別人豈得你底受用，好種於善功否，故積善有善果，行惡有惡報。又《生神章經》

云：善惡功過，毫分無失是也。於前生今世過去未來見在三世，胎卵濕化，四生六道，富貴貧窮，賢愚下賤，餓鬼傍生、駝驢象馬，地獄天堂，皆在人之所積。故儒書云：積善之家必有餘慶，積不善之家必有餘殃是也。思之好洗心向善，念罪福因緣，善惡報對，如影隨形，似谷應聲，嗟哉，莫曲心邪見，害他利己，讒妬賢良，冤讎結累，好混世和光同塵，順義量力，建功隨緣，辨道常行方便，濟物施恩，自然天以蓋之，地以載之，日月以照之，鬼神以敬之，永

不生無道之鄉，終不斷人之根本，咄！好憑智慧擒龍手，搗碎從來混沌心。

頌曰：

誰能頓覺慕^③玄微，慕到玄微得妙機。

方信菊開征雁亂，須知柳暗舞蜂稀。落花流水虛華夢，野鳥孤雲實可依。這箇幽棲宜早悟，青山門外慶雲飛。更能心修正道，漸入仙宗，永離輪迴，超昇成道。

但衆生常懷克己，所作均平，孝至於親，忠至於君，敬於天地三光，遵於古今賢聖，溫良謹行，恭讓義謙，更能洗心，向六欲之中鍊性，出五濁之外，灰心養智，隱跡韜光，外滌其塵，內保其神，捉金晶於玉泉，戰龍虎於丹鼎，神水灌黃芽而百關俱通，羊車載靈元而諸神盡悅，清淨其形，保愛其神。如能若此者，自無分別，自無愛憎，自無繫縛，自無取捨，自無去來，自無染著，自無煩惱，六欲不生，三毒消滅，永離輪迴，超昇成於道矣。○大衆思之本來無為，湛然虛寂，却煩惱障礙，從何而生？皆自六欲七情而起，悟來為十善行，迷來變十惡業，省則有智慧圓融，逍遙無礙，迷則煩惱顛倒，妄想愚癡，沉溺愛河，流浪生死，向六道內任波吒，

墮三途中獨受苦。嗟乎！好心修正道，漸入仙宗，鍊性保神，益智靜心，虛寂內外，洞照玄明，功行得就，五老啓迎，不分神形，合道飛昇，是乃永離輪迴，超昇成道，能如此者，玄哉玄也。

頌曰：

回心祛己出塵籠，反樸歸真悟正宗。山色秀因昨夜雨，花英落為曉來風。神光照處玄無極，慧化通時妙有功。法眼閃開真境界，一輪皓月正當空。我故示汝妙法，令度天民，歸真知命。且夫太上憫見衆生造諸惡業，罪結艷都，報對循環，冤讎反覆，展轉迷途，流浪生死，而乃垂其妙法，故示天民，令使知性知命，歸真悟道矣。○大衆性者何也？命者何也？從道受生謂之命，掌握大道謂之性。是知人命有限，本性無生，故老君曰：有生必有死，無死亦無生是也。且如人生，大限三萬六千日，世間能幾七十春？皆是起其諸惡，知識昏亂於苦海迷津之內，遑遑而輪轉無停，

向四生六道之中，汲汲而競沉苦趣，是因此之故，而頻頻改頭換面，思之從來，真如之性，自於無始已來，幾曾有生有死，為是衆生迷惑，失其本真，昧其本性，隨業力以昇騰，量緣果而生滅，如此，後怎生得出於生死，悟其真性歸於道矣。但內觀其心，外閉其門，戒其慾，淨其身，邪可以正，止可以行，愛存於氣，保養於神，綿綿終日，若亡若存，道功無虧，飛昇玉清，豈不為幸矣。念太上萬法千方，種種闡化，立經教，留科法，為明黑暗之寶珠，作開天門之鎖鑰，乃度世之舟航，寔登真之梯凳，點化世人，咸皆歸真見道矣。思量聖人苦苦演化，欲度衆生，怎忍負於聖德矣。好！回光返照真空境，笑！鬼哭神號不住停。

頌曰：

嗟哉六道路崎嶇，爭似回心悟太虛。
決破箇中無內有，始知身內有中無。
澄澄皓月臨江水，湛湛玄珠晃玉壺。
但汝欲求超世事，直須宜下實工夫。

可以本命之日，修齋設醮，啓祝北斗、三官五帝、九府四司，薦福消災，奏章懇願。

凡世人能於本命之日，肅嚴淨宇，露布香燈，廣陳法事，志心投告，進表達詞，啓祝北斗本命諸神，請福祈恩，變災為慶，以濟世人矣。乃太上憫衆生漂流苦海，沉溺迷津，生復生今三途出沒，死更死今六道奔波，特以垂示經文，引歸正路，若能於甲子本命及諸齋辰穀旦，澄心潔己，誓盟九清，省於前非，戒於後過，啓祝自己身中本命元神，庶得消愆散禍，去否迎祥。如何啓祝自己本命元神？但只向自己本心齋戒，改過遷善便是也。齋醮者，齋是戒心，醮是誠意，洗滌身心，自能悔過，方可獲福矣。故有頌云：自家心病自家醫是也。如何是自己身中元神？蓋天有北斗，人身亦有，天有三官五帝，人身亦有，九府四司，人身皆然。蓋人身亦有北斗者，乃心也，斗能運轉四時，旋行衆曜，心能斡旋萬化，總領

百神，故曰北斗者心也。三官者，乃是三魂也，五帝者，即五臟之神也，九府者，九竅也，四司者，四肢也。若能攝養三魂，調和五臟，降伏九竅，保運四肢不著塵境，斷絕俗情，明了玄微，清虛知識，洞照無礙，飛行物外，到這門庭，請福祈恩，豈不妙哉者也。故聖人立此有相之外緣，引證無為之內照，咄！這般消息君還曉，點破青霄萬象閑。

頌曰：

回心返照滅塵緣，悟得元來見自然。
三界空花飛世境，九清丹桂隱幽玄。
道心還若波中月，法性應如火內蓮。
劫壞洞觀無一物，青山依舊聳遙天。
虔誠獻禮，種種香花，時新五果，隨世威儀，清淨壇宇，法天像地。或於觀宇，或在家庭，隨力建功，請行法事，功德深重，不可具陳。念此大聖北斗七元真君名號，當得罪業消除，災衰洗蕩，福壽資命，善果臻身。
夫冰炭不可以同爐，賢愚豈可而並居，冰炭不同爐，因本性兩異，賢愚

不並居，為見覩各殊，冰不自知而凍結，炭不自知而炎成，賢不言而智清，愚不言而智濁，賢者常懷義禮，唯恐傷於彼，愚者每行不仁，猶恨損其身，哀哉愚輩乎！故《尚書》云：吉人為善，惟日不足，凶人為不善，亦惟日不足是也。夫在世衆生愚癡，不省種種為愆，豈知善惡皆天官記錄，分毫無失矣，是知行及三千，超汝為仙，若罪盈八百，命應促滅，向酆都獨受於辛酸，累子孫定招於困薦^①，嗚呼，於是我太上為嘆十洲三島，路上寂寂，六道四生，途中冗冗，故以經說因緣，科垂報對，俾賢者進於善，使愚者戒其惡。是以方便隨機，教化愚昧，立此科格，定其禁戒，凡有惑心，欲求悔過，令衆生清淨壇場，肅嚴法席，羅列香花，陳獻時果，請行法事，隨力建功，乃得功德重深，而不可陳述也。是知大道於虛死中而有，且以本性於不死中而死，孰能指說哉。故《生天得道經》云：杳杳冥冥清靜道，昏昏默默

太虛蹤，體性湛然無所住，色心都寂一真宗是也。故知非邪不顯其正，無假豈辨於真，說此妙法，點化衆生，知其善惡因緣，不可縱意為非，不可恣情作過，方漸入於妙門，庶得悟其道用，物外玄微豈出於方寸者也。咄！只因不識元初相，縮住真空直至今。

頌曰：

絕除情慾乃修真，肯辦修真自出塵。
名利是非宜與恨，松風皓月可為鄰。
直須打破幻中影，却保從來身外身。
借問世間學道者，休因色相起疏親。
凡有急難，可以焚香誦經，尅期安泰。
於是說大聖北斗解厄應驗曰：
大聖北斗七元君，能解三灾厄。

頌曰：

六緣味觸與聲香，化出三灾患禍長。
空笑蜃樓生海角，却迷雁字遠穹蒼。
不知物假因何物，須信良由可自量。
剛向野溪雲影裏，盤桓無語立斜陽。
大聖北斗七元君，能解四煞厄。

頌曰：

六塵多為不能除，四煞相刑起患虞。
既是怪邪降未得，自然魅鬼鬥欺誣。
狂風斷送庭前菊，驟雨摧殘江畔蘆。
空恨這般瀟灑事，劫終劫始現還無。
大聖北斗七元君，能解五行厄。

頌曰：

須識元初舊主公，神形高出五行中。
鬱羅本豈白雲鎖，苑藪何曾綠水通。
萬法謾然唯古月，千言應是只宗風。
有為有相多端異，不昧觀空方見空。
大聖北斗七元君，能解六害厄。

頌曰：

七元大聖智通幽，六害緣何敢出頭。
風掃暮雲山不動，月沉寒浪水湍流。
空因實相知真相，塵睹貪憂覺幻憂。
但肯日時生鑑戒，自然光滿四神州。
大聖北斗七元君，能解七傷厄。

頌曰：

寶臺玉府道含真，七賊駭尋鬥損因。
風樹只堪驚好夢，月溪實可恣閑行。
鍊丹不在金和玉，保性休迷濁共清。
但要心頭諸漏息，自然火內碧蓮生。
大聖北斗七元君，能解八難厄。

頌曰：
頑性皆因逐世囂，幻生八難受煎熬。
不知形體來憑限，須信年光去莫逃。
忍起一心迷愛慾，却甘百禍苦籠牢。
罪成懺悔何堪倚，寶鑑頻磨無半毫。
大聖北斗七元君，能解九星厄。

頌曰：
否泰交官豈解憂，九星那肯降愆尤。
都緣一點靈明暗，放縱羣魔競出頭。
別了故園無意戀，却迷幻樂苦貪求。
問君不脫纏身索，神性何時得自由。
大聖北斗七元君，能解夫妻厄。

頌曰：
配合誰知隱大羅，鍊時當要束羣魔。
陰陽暫得歸元路，神性應須出愛河。
翠嶺夜觀山月秀，碧溪曉覺海風和。
堪嗟未悟狂徒子，不顧真空濫者多。
大聖北斗七元君，能解男女厄。

頌曰：
靈明元本不差殊，相貌隨因則異途。
水漫雲寒波自凍，日昇煙煖凍還無。
寂然幸是常清靜，智性須教惹患虞。
只恁失其真妙理，閻浮往復廢工夫。

大聖北斗七元君，能解產生厄。
頌曰：
識因迷復昧塵埃，諸漏情開道不諧。
幼去老回衰幻相，出重還入假形骸。
輪迴削盡莊嚴境，濁穢遮交寶鏡臺。
今勸世間真上士，好修無去亦無來。
大聖北斗七元君，能解復連厄。

頌曰：
神性無為無繫囚，復連非累自何由。
物華不識元同異，真理埋蒙使未周。
八苦競來生障礙，十纏并湊起驚憂。
也知似恁何方晚，祛已迴頭一例休。
大聖北斗七元君，能解疫癘厄。

頌曰：
炎涼風雪去還來，斷送殘軀結衆災。
攝養不知調暢理，貪癡甘分損形骸。
六賊偷耗圓光少，五鬼津般疫禍催。
除是自真開大聖，扶危脫患拯輪迴。
大聖北斗七元君，能解疾病厄。

頌曰：
凡夫欲要出塵泥，自病休教用彼醫。
心地不能除執見，口談真教濟何為。
鏡前未到元無跡，月下雲生本亦輝。

中道兩邊都不立，笑歸岩畔指寒溪。
大聖北斗七元君，能解精邪厄。
頌曰：
頑心不肯滅諸緣，塵界精邪鬥見前。
真靜道玄增日減，癡貪俗樂轉時憐。
形容漸次衰華室，神水偷那損玉田。
爭似省知煙月事，保存正炁壯童年。
大聖北斗七元君，能解虎狼厄。

頌曰：
玄元妙道太幽微，樸散虛无誰得知。
歷劫未常生與滅，迴黃應是醒還迷。
秋天幸有無雲月，曲岸安詳恐污泥。
伏虎擒龍端的處，也須真箇在男兒。
大聖北斗七元君，能解蟲蛇厄。

頌曰：
莫令元識換重更，性定諸塵自不生。
猿馬得於煙嶺寐，蟲蛇儘縱迅雷驚。
春芳谷中鶯吟日，幽浦溪頭燕弄晴。
對景自家承當得，萬山風月轉分明。
大聖北斗七元君，能解劫賊厄。

頌曰：
有誰預可制凶危，雲外玄玄乃得披。
先地先天通正理，劫初劫壞自無期。

廓明內外圓融事，覺照仙凡造化機。
一戰卒然妖怪盡，耗賊蹤跡眇無知。
大聖北斗七元君，能解枷棒厄。

頌曰：

縛住頑心不亂為，三千刑憲自亡威。
頓開妙覺金枷脫，大啓玄風玉杵摧。
曉岸洞明仙隱隱，寒潭朗照月依依。
教君會得高天理，苦樂元來只在伊。
大聖北斗七元君，能解橫死厄。

頌曰：

真覺圓融保混成，玄華上下廓然清。
寶珠萬古光何暗，玉洞千開道本明。
為縱六根迷不悟，情開諸漏死還生。
欲求高出輪迴徑，方寸靈明莫用輕。
大聖北斗七元君，能解咒誓厄。

頌曰：

滯網浮生不鍊修，苦迷幻化恣貪求。
逍遙元相塵籠閉，無礙真靈慾柩囚。
惱至誓盟心樂道，事消還有道心休。
驅驅碌碌迴輪走，問汝何時是徹頭。
大聖北斗七元君，能解天羅厄。

頌曰：

無為真理去無蹤，皆是心迷路不通。

亘古只因貪世欲，迄今縮住昧玄空。
鶯吟那解楊梢綠，蝶舞寧知花蕊紅。
天殺天生恩害事，好求幽奧破昏蒙。
大聖北斗七元君，能解地網厄。

頌曰：

須知世慾患身多，好躍高情越網羅。
貪愛遂心平地少，癡慳恣意轉成魔。
坑深求出應勞力，未墜之時莫剝那。
雲水煙濤從汗漫，小舟輕泛過迷河。
大聖北斗七元君，能解刀兵厄。

頌曰：

世上刀兵有幾般，是非叢裏謾相干。
語言讒毀如鋒刃，心地含容便覺寬。
一念改修祈度劫，坦然燈火也成寒。
中天自有璇璣主，幹運扶持總不難。
大聖北斗七元君，能解水火厄^⑤。

頌曰：

慾海滔滔浩接天，炎炎業火解燒原。
虛明湛寂清無浪，柔順寬容冷不煙。
色相兩空心自靜，是非無染任隨緣。
水升火降成真道，高架津梁濟大川。
於是七元君，大聖善通靈。濟度諸厄
難，超出苦衆生。若有急告者，拚誦保

安乎^⑥。盡憑生百福，咸契於五行。三
魂得安健，邪魅不能停^⑦。五方降真
炁，萬福自來并。長生超八難，皆由奉
七星。生生身自在，世世保神清。善
似光中影，應如谷裏聲。三元神共護，
萬聖眼同明。無災亦無障，永保道心
寧。

頌曰：

降伏邪魔心自寧，七元大聖善通靈。
常令性似無雲月，勿要情如有浪萍。
外滌煩襟除點污，內磨玄鑑破昏冥。
自然八難三災滅，影響皆由奉七星。
太上玄靈北斗本命延生真經註解卷上

①『或在』，《太上玄靈北斗本命延生真經註》（下簡稱《真經註》）和《太上玄靈北斗本命延生經註》（下簡稱《經註》）皆作『生在』。

②『玉局坐』，《真經註》作『玉局座』，是。

③『募』，據下文，當作『慕』。

④『困薦』，疑爲『困篤』之誤。

⑤『大聖北斗七元君，能解刀兵厄……能解水火厄』，與《經註》本同，《真經註》本作『大聖北斗七元君，能解地獄厄……能解一切厄』。

⑥此句，前引二校本皆作「持誦保安平」，是。
⑦此句，與《經註》本同，《真經註》本作「邪魅永消停」。

太上玄靈北斗本命延生真經註解卷中

崆峒山玄元真人註解并頌

老君曰：北辰垂象，而衆星拱之，爲造化之樞機，作人神之主宰。

夫北辰垂象於蒼空昭昭矣，衆曜拱朝於帝座輝輝然，是以斗魁轉處，萬象旋行，默藏其用，孰能知之？但世間學道之人，往往盡登山涉水謾尋真，而累歲無停，訪友求師自不悟，而元神怎住？唯只廣記歌詞，多談詩頌，到底來落箇何事，終不爲實矣，便若習大道，捉溪雲，悟希夷，扶身影，豈能得成矣，何以觀天地而表大道於目前，辯星斗而悟玄空於世外。○大衆如何是觀天地、表大道、辯星斗、悟玄空？是乃天地各秉清濁，日月運行，陰陽升降，遷變四時，殺生萬物，道合自然而然，故謂觀天地表大道矣。乃北斗高懸碧落，運度隨時，經纏應物，總領羣星，韜潛

萬彙，造化妙玄，是爲辯斗星悟玄空矣。是以聖德貫於天上地下，造化萬物，若斗不轉，而萬類不能成矣，豈不思惟浩浩然，若衆生能行此法，而道功萬無一失矣，行道之功，的然成得矣。曾聞之北極玄神號曰真武，昔於龍漢劫間，誓盟北斗以爲師範，後武當山道功成就，白日飛昇矣，爲世人不悟此法，自真君行而得道之後，更不復有繼踵者也。咄！廓然別箇真幽理，不在雲山深處尋。

頌曰：

造化元來在目前，道非海外隱幽玄。
悟時物物都爲用，迷則頭頭總是愆。
風緊水深應有浪，雨餘山遠不無煙。
桂輪高掛晴空碧，處處圓明現自然。
宣威三界，統御萬靈，判人間善惡之期，司陰府是非之目。

且夫道乃性之要，性乃道之機，凡欲學道，先須見性，是以性靜，天之道也，情動，物之感也。但衆生本來之性，因愛物而動，情爲迷邪而失正，皆不能行於大道，慎於諸惡，亦不能

寂寥度日，淡薄隨緣，志若寒灰，性如朽木，但被世間人我利名，是非榮辱，六慾七情、貪嗔癡怒，不顧罪根，廣施狡猾，縱害彼執以為能，但欺心取之為益，豈思若愛河中沉在深波，向死生內輪迴受苦。○大衆爭及執一而不亂於心，抱一而不離於道，如何得守於道，是以大道視之無形，聽之無聲，非可以為有，四時順此，萬物稟生，未可以為無。故《消災經》云：無無有無，有有無有是也，寔乃非有非無，至剛至大，細入微塵，大包天地，且陰陽因而則寒暑，日月因而則運行，人以因而則靈，體以因而則動，是乃天地萬化皆不出於大道矣。若此一著如何下手？但觀陰陽之機要，察造化之變通，自然體合大道之理也。又孔子云：觀其所由，察其所安，義同一也。若衆生不著邪見，不造愆非，精白一心，皈依斗極，則無不感應矣。北斗為喉舌之司，斡旋萬化，宰制羣靈，斗中有司非、司危、司罰、司過之神，以掌考

罰，有延壽、益筭、解厄、上生之神，以錄功勳，倘一念改修則延生注福，而神默佑之矣，乃得自在無為，逍遙三界，變化玉清，飛騰金闕，大妙玄玄，豈不樂哉。咄！好以捨愛欲而悟法門，戒貪嗔而登大道。

頌曰：

世間皆有利名叢，昧了元來舊祖宗。謾恁行緣多露布，却將妙用轉疏慵。澄澄綠水迷高漢，渺渺白雲障遠峰。夜靜只聞漁叟笛，蓼花相映不知蹤。五行共稟，七政同科，有回死注生之功，有消災度厄之力，上至帝王，下及庶人，尊卑雖則殊途，命分俱無差別。乃天地萬化皆為之一化也，是以萬物之源，皆非道而莫能生也，且天地星宿，日月風雲，雷電雨露，河海淵源，丘陵山嶽，草木芳花，田禾稼穡，五行七政，陰陽遷變，寒暑往來，人身品類，一切情物，皆憑虛無自然、沖和太一之炁，並得以生成矣。○大衆但世人皆不思內真，唯著外境，忘真失道，貪愛縱情，豈想無百歲之光

陰，作千年之體調，嗚呼，迷惑者也。嘆世間之人，皆飾其室以為身之宅，不知身以為神之室，屋之傾頽，身乃無所隱，身之有漏，神以無所居。又云：休迷幻化境，耗失本來真，且好寡慾絕念，鍊性澄心，每憂善之不及，常恐過而有從，念道思真，不生諸惡，採和炁於丹田，立仙階於紫府，是乃有迴生換死之功，有消災度厄之力，戰出苦輪，逍遙物外矣。咄！寒空月色無高下，障礙除時處處明。

頌曰：

道本無形無論言，休於空裏辨因緣。柳陰貪翫鷓鴣語，蓼岸那知白鷺潛。荻葦幾多花落浦，波光千里浪迷天。晚來不睹魚舟過，空對斜陽度老年。凡夫在世，迷謬者多，不知身屬北斗，命由天府，有災有患，不知解謝之門，祈福祈生，莫曉皈依之路。竊以立二儀覆載，默運於玄機，化三才混成，大開於妙用。是以太極分判，化清濁炁而為天地之形，大道變

生，積陰陽精而作日月之象，萬象森羅，羣情命物，吹噓而不宰而宰，橐籥而無為而為，其道自然備矣。且以人身四肢百骸，所以動者心也，乃知天地稟道而成，則有生而有死，人身因心而運，則有吉而有凶，在乎智人所行則可鑑，善惡之召也。夫心

者神也，神者性也，性定則神安，神安則心運，使心運沖和，正一之炁道合自然而已，豈不為樂哉。○大眾且夫大道未成天地之象時，上下虛寂，內外寥廓，孰可見而取之，誰可得而言之。且如人性未入於色身之日，逍遙物外，自在無為，何事得而縈之，何患得而損之。皆是累劫至劫，從迷至迷，宛轉輪迴，流浪生死，死則入於地獄，生則撞向胞胎，得於誕免之後，漸知世事，早逐邪非，失其真理，不思只為迷惑，把本來無礙之性受在肉體之內，有萬種禍患損惱其性，尚猶不省，問汝塵世有何榮樂乎。但凡世衆生，不知性合天地，命同斗辰，皆往往見善不從，為非競

入，遇虧盈之數，不知攝養之方，有延壽之科，豈曉皈投之徑。吁哉，咄！幸然有箇昇仙路，爭奈貪迷逐浪流。

頌曰：

好憑智慧奮雄豪，反復清波出怒濤。常遣業根生善念，莫教仙徑足荆蒿。澄湖雲散天涯遠，秀谷蟾升海角高。獨對寒江無限景，儘從雲惹衲來袍。致使魂神被繫，禍患來纏，或重病不痊，或邪妖尅害，連年困篤，累歲屯遭，塚訟徵呼，先亡復連。

且夫天輔善而罰不仁，故垂禍福之報，人畏禍而喜迎福，當行仁善之因，故天勸善兮必以用福，人好福兮當以戒非，但世人不知天理，但好福而不能行於善，空畏禍而不能慎於非，如此之者，欲望安居享福，則未之有也。但安居享福者，皆是曾施仁立善、慎過戒非故，然如是，乃以禍福因緣，善惡報對，無欺心害彼者久榮，唯溫性克己者長慶，分明公案，只在目前，爭奈頑心不能決斷，

如何只在目前，且如在世者勤求而則富，儉用而則豐，不能勤求而儉用，安得豐足乎，好福而積善，畏禍而戒非，不能積善而戒非，何致安居哉。但凡夫衆生豈思善惡報對，賞鑑分明，但嫉妬慳貪，迷真喪道，只顧眼前，一時欺心狡倖，不思他日萬種禍患臨身，致使魂神被繫，禍患來纏，病不愈而邪氣侵，運不通而橫事起，生今煩惱，死則波吒，何如滅心業而除身業，悟體空而觀性空。

頌曰：

元來無物得稱名，只為貪迷改變頻。逐樂不知為患本，貪生那信作愆因。且須解放心頭鎖，洗去從前性上塵。好向冰淵宜緩步，失兮何日出沉淪。或上天譴責，或下鬼訴誣，若有此危厄，如何救解？急須投告北斗，醮謝真君，及轉真經，認本命真君，方獲安泰，以致康榮，更有深妙，不可盡述。竊以天道無私，所親者惟善，禍福有報，所感者在心，是以為善者福自近之，作惡者禍不遠之。夫九清大羅

及三塗苦獄，本自一心發為兩事，是知天道不負於衆生，乃衆生有違於天道，故禍福如形影之相逐，實報對似循環而反覆。○大衆豈想賞罰如此分明，因甚全然癡呆不省，但只欺心狡倖，每求自己之榮，抱恨懷讎，常妬他人之樂，那信欲求自己福，先當福與人，害他求利己，暗中損自身，如有不信，略問一言：狡倖過人過得於天否？若罪盈過滿，致令上天之怒責，下鬼之欺誣，此時痛苦，悔之何濟也。嘆有此危厄如何救解？但悚思之事急宜迴首，戒貪嗔而起方便之心，填坑壑而發平等之意，修齋謝過，精思念真，認自己本命真君，方獲安泰，自得康榮，如何得見自己本命真君，咄！休縱羣魔盜心鏡，常教心鏡攝羣魔。

頌曰：

莫教這箇著羣魔，戰退三尸出網羅。
苦海浪深宜上岸，愛河風緊早登坡。
但能把住真空性，任是從他境界多。
柳綠桃紅俱幻化，只堪低首笑呵呵。

凡見北斗真形，頂禮恭敬。


且夫道本無形，故育物而即有物，雖有像，然抱道而本無，是以有假而有真，無真而無假，乃道藏萬物之中，悟則只於目下，人執一方之外，迷來何處搜尋，凡欲學道，如何行而見之，但善者當從，凡惡者宜退，累行積功，道合天理，然後感遇明師，引入無為之法門，得見玄玄之道矣。是以善惡由於心也，玄理出於師也，智須自我，道因師指，雖還明師^②，自智淺而不知深理，然雖智善，不假師而豈達玄微。○大衆但欲學道，先當從善退惡，常以戒非，旦暮不離於道矣，時刻不亂於智矣。如此行之，道無不備矣。又乃凡夫衆生多失真道，何為也？因萬物外誘，使五欲內荒，逐樂貪生，迷真失道。故太上曰：勿著外景，使心不亂，只緣眼前之幻景，致令身後之禍殃，寧不慎之乎。見假者起真心，遇真者去假意，謂如凡見北斗真形，頂禮恭敬者何也？北斗者，乃天之樞紐也，真形

者，乃亘古不易之真像也。頂禮恭敬者，乃人之精誠敬奉也。夫道不在遠求，物物是道，迷不能覺悟，頭頭是迷。乃聖人化衆生，認物中之真，則大道於掌握而矣^③。故說法言，使凡夫不生邪見，不造愆非，演假顯真，以度於未悟者也。善惡之由皆心也，但可行時，斟酌而行，當止處，三思而止，依此進程，實為玄妙，不亦宜乎。咄！心業除時三業滅，意魔起處百魔生。


頌曰：

壺中法相本寂寂，只為從隨意下賊。
出沒閻浮去與來，漂沉苦海曲還直。
爭及頻悟故鄉景，劫外雲山玄最極。
欲識其間端的意，夜深江畔一聲笛。
北斗第一陽明貪狼太星君，子生人屬之。







北斗第二陰精巨門元星君，丑亥生人屬之。




北斗第三真人祿存真星君，寅戌生人屬之。




北斗第四玄冥文曲紐星君，卯酉生人屬之。




北斗第五丹元廉貞綱星君，辰申生人屬之。



北斗第六北極武曲紀星君，巳未生人屬之。



北斗第七天衝破軍關星君，午生人屬之。



北斗第八洞明外輔星君。



北斗第九隱光內弼星君。



頌曰：

誰知九竅表天罡，運幹靈臺變化機。
忘意見生應降福，輕心落死自成非。
默施丹闕通神德，高布玄山炳聖威。
迴首碧空雲散處，寶珠燦燦顯光輝。
上台虛精開德星君。



中台六淳司空星君。



下台曲生司祿星君。



頌曰：

攝養須當要絕塵，絕塵方可煉神形。

曲江雲靜月應白，幽谷煙消山自青。
丹竈虎眠風颯颯，玉池龍戲水泠泠。
三台聖法適將扣，六鬼奔逃無處停。
如是真君名號，不可得聞，凡有見聞，
能持念者，皆道心深重，宿有善緣，得
聞持誦，其功德力莫可稱量。

且夫至聖道無親，潤及於一切衆生，
智有等變異於萬端，本來面目元沒
差殊，善惡之因為行雨露，浩浩四
生，遑遑六道，難昇九清天，易沉五
夜地，皆為衆生貪愛愚癡，故然如是
也。且以浮生在世，貪迷俗境，不顧
真空，以狡倖取為能，以欺心務為
智，以財利用為榮，以聲色樂為樂，
遂致失其真道，永劫輪迴，但只舌如
三寸剛刀，尋尋損物，意若十面埋
伏，念念贏人，豈想天地鑑人，如影
隨形，善惡之報，禍福以迎。○大衆又
寧嘆人生幻體，壽年七十，其間夜消
大半，得一萬日，其內憂患中分待有
多少時光，忍造愆業？乃以人身大
小腸為江海，兩目為日月，五臟為五
嶽，頂圓像天，足方像地，天地秉道

而生，人身因道而長，既人身與天地
同體，為何天地長存，人身不固？皆
是天地抱道而寧，人身敗道而動，天
地抱道而寧，則陰陽交媾，自然上下
往來綿綿，道合真一，故然得長存
矣。且以人身敗道而動，則損壞元
陽，敗虧道用，喜怒貪嗔不守自真，
深迷外境，陽魂消滅，陰魄崢嶸，不
識抱道之理，四大百關，羣魔競毀，
安同天地之至堅固也。故上智衆生
得聞如是，能開悟解持誦皈依者，道
心深重，宿有善緣，得遇我太上玄門
真教，脫免輪迴，證登仙品，永絕六
道之恓惶，超赴十洲之快樂，出乎玄
玄矣。咄！得遇玄門還不悟，輪迴
往復幾時休。

頌曰：

玄門應是少知音，豈在雲濤深處尋。
但得轉迴芳柳徑，自然現出碧煙岑。
行觀嶺畔山花放，卧聽山前野鳥吟。
此箇幽棲非遠路，悟來端的不離心。
若正信男女，值此真經，智慧性圓，道
心開發，出羣迷徑，入希夷門，歸奉真

宗，達生榮界。

且夫或行於至道之門，或涉於不善之徑，所在乎心智也，心省非而愆自滅，智悟真兮道自生，智不悟真空，心執迷狂徑，玄門真道何由得見哉！當從於善而戒其非，守於靜而離其動也，靜內日月，別有三山，動中境界，不無六道，靜為仙子出身之由，動乃凡夫入夢之本，出乎智人矣。且乃舉一措或是或非，一思一念或邪或正，是非可鑑，邪正可辯矣，於是非邪正之間，好安詳下手。

○大衆誰可去曲邪而蕩蕩乎，孰能飲道德而陶陶矣，智者混俗世而慎非為，愚者遇道真而不正信，儻若有正信善智之人，值此真經，智慧性圓，道心開發，出羣迷徑，入希夷門，歸奉真宗，達生榮界矣。又乃智慧性圓者，智者，目視萬物，身在諸塵，性不生亂，心不有著，乃為智也。慧者，二儀道用，三昧真空，無幽不燭，無化不通，是為慧也。性者，劫終劫始，常在常存之神也。圓者，圓融覺

照、無礙洞觀之真也，道心開發、頓悟真道也，自然出羣迷之徑，入希夷之門，歸奉真一之宗，得達長生榮樂之界也。所謂塵性不除，三災並起，道心開發，六慾皆消。

頌曰：

法鏡融融隱寶臺，因循休待染塵埃。
頓開妙道真清靜，撒脫迷途化樂哀。
省得有為緣有用，從教無去亦無來。
道中消息如還悟，妙相神威越九垓。
於三元八節、本命生辰，北斗下日，嚴置壇場，轉經齋醮，依儀行道，其福無邊，世世生生，不違真性，不入邪見。

夫鐵鑛雖頑，因鍛鍊而為器，人心雖欲，親道德而戒非，鑛不鍊而終不成器，人不修而終不成真。是故憑匠師而方覺悟，因道德而始知空。道乃萬物之首，德為百行之源，故道德之玄玄利周於一切，凡夫衆生豈知其日用乎！然道之無形，但戒欲而可見，雖德之有鑑，非積善而不成，慕道者不見其性，何以為真，立德者不修其行，何以為仁。凡修道修德

者，當以清真守靜，實腹虚心，退己讓人，恭尊克下，若不取其則，學道修真者，終有廢矣。且以未成道之日，凡夫幻化色身性命之由，為是善惡不等，禍福差殊，皆屬天曹地府主宰，官僚掌握性命，有過而責罰，有善而賞福，既嘆如是，好於八節三元生辰本命，嚴肅清場，轉經齋醮，思真念道，謝過祈恩，其罪必除，其福必降，不違真性，不入邪見，使保天年，得道長存也。若溺邪見則迷真，迷真則敗道，敗道則罪生，罪生則形喪。嗚呼！因寸心之狂亂墜入迷河，信六賊之般調撞於業網，何似鍊金丹之一粒，脫幻化於四生，則得逍遙物外，與道合真，自在玄玄，無障無礙。

頌曰：

體中別有太微神，神內圓融號杳冥。
視聽不知何相貌，通玄長是合靈真。
依依桂月懸明鑑，鬱鬱松山倚翠屏。
山月高低俱不礙，洞然無物兩忘形。
持經之人，常持誦七元真君所屬尊號，

善功圓滿，亦降吉祥。

解曰：別有威嚴界，無礙無為原自在，塵情纖芥不留心，坐感萬神相護愛。○大衆玄門消息事，且好著心知，修真須務本，本立道無虧，不知道在本，焉得達瑤池。故君子務本，本立而道生，欲求道玄，且固基本。本固求真易，求真喪本難，本真俱有妙，方得到家山。且夫無為則賴於有為，故知基本有，相則辯於無，相要識當頭，識得當頭破，方開耳目聰，元來真妙化，只在本身中。須知擊石有火，坑地即淵，思福當善，斷因滅緣，解渴必水，敵寒則綿，進真成道，慎過無愆。但人能精進持誦，念道思真，善功不退，行滿功成，吉祥集降，神沐逍遙，永享太玄矣。咄！勝景謾誇三島有，滿懷風月更儵然。

頌曰：

重樓華館湧靈泉，中有丹皇號自然。混有鬱羅開大有，沖虛金鼎運真玄。陽神保鎮三明地，陰魄降擒六洞天。

莫向枕邊迷幻夢，恐孤寒月滿漁船。即說北斗咒曰：

北斗九辰，中天大神。上朝金闕，下覆崑崙。調理綱紀，統制乾坤。大魁貪狼，巨門祿存。文曲廉貞，武曲破軍。高上玉皇，紫微帝君。大周天界，細入微塵。何災不滅，何福不臻。元皇正炁，來合我身。天罡所指，晝夜常輪。俗居小人，好道求靈。願見尊儀，永保長生。三台虛精，六淳曲生。生我養我，護我身形。魁魁魁魁魁魁尊帝，急急如律令敕！

頌曰：

玄牝樞機列化神，薦登真理沐洪恩。祥煙塞斷迴遑路，新月開通樂逸門。正炁攝生安禹稷，靈源保育運崑崙。七元不昧流光照，萬聖來前衛我尊。老君曰：凡人性命五體，悉屬本命星官之所主掌，本命神將，本宿星官，常垂蔭佑，主持人命，使保天年。凡俗無知，終身不悟。夫本命真官，每歲六度降在人間，降日爲本命限期，有南陵使者三千人，北斗真君七千神將，本命真

官降駕衆真，悉來擁護。

且夫道育天地之根，炁補五行之用，物盜天地之靈以成茂，人盜萬物之精以求安，故三才五行，人倫命物，皆非道不生，故非道不立，一切萬物，皆不出於大道者矣。故以道含萬彙，人悟一心，萬彙播經，非出於道，一心變用，莫實於真，凡欲學道歸真，修身保性者，當務於真實，故天實可運於日月，故地實可載於含靈，人實於諸世中，自然大道之真可成就無漏也。故真心實行，道則無虛以成真，若頑心不戒，聖功何以達玄門，一切行業當要實功，我玄極之大道用而有真。奈浮世迷人，看之若假。嗚呼！但淺根薄行之衆生，豈信玄門別有幽極之妙理，唯只樂情慾為歡，競浮財而作富見，言邪慾爭競欲聞，聞說真空如起讎，妬謗玄門若泥沙，貪非為忘性命，玄真妙理，隔萬重之煙水，苦海迷津，何時得越於道岸哉！以此為凡夫無知，自身不悟，故我太上啓無為之金口，吐濟

物之玄珠，指三天之有路，塞九夜之無門，利益羣生，恩沾衆品，誘上善成天真，引中下歸正道，教演三乘，經垂萬化，蓋為衆生種性不同，根器各異，說上乘化上根，有中下之人，必不能達於此理，為縛心鍊性，默默無言，綿綿用道，進無形之理，慕無像之真，非上根無由達理。故說中

乘下乘用外緣而引見內真，說有相而辯於無漏矣。且如本命真官，每歲六度降在人間者，謂六十甲子所屬生年之日，即為本命，每年有六次逢值，即是本命下日也。其日有當生本宿星官、本命神將下降世間，觀察善惡，兼有南陵三千使者，北斗七千神將，俱來擁護，此日即宜齋戒禮誦，懺悔祈禳，皈敬衆真，欽崇本命，當得灾咎消除，命年遐永矣。或謂南陵使者三千人者，乃離火之象，丹陽之宮三陽為三魂，動則神靈生而主於心也，心能禁制形神，使不亂也。北斗七千神將者，坎水之形，黑陰之府，七精開七竅，通則光明徹而

主於腎也，腎能慎固精氣，使不壞也。此乃人身中本真所在之處，因真元在谷，則得三尸七魄六欲九蟲悉皆順道，而有萬神衆真盡來擁護，此乃道之實也。咄！會得太玄消息意，泰山變作玉京山。

頌曰：

愛河岸闊浪迷天，且好抽身上法船。
制得耍猿眠卉徑，任教意馬走芳田。
達開玄理頭頭道，悟到幽機處處禪。
月夜獨吟高舉棹，家鄉掩映古峰前。
可以消灾懺罪，請福延生，隨力章醮，福德增崇。其有本命限期將至，自身不知，不設齋醮，不修香火，此為輕生迷本，不貴人身，天司奪祿，減筭除年，多致夭喪。迷誤之者，雖遇經訣，懷不信心，毀謗真文。如此之人，身謝之後，淪沒三塗，漂沉諸趣，永失人身，深可悲哀，自致斯苦。

竊惟求煙而近木，救渴而近泉，戒非而近善，惡愚而近賢。夫木性非炎，鑽之則火出，人心逐慾，戒之則道生，非賢勿辯愚，非泉勿釋渴，非正

勿知邪，非真勿知假，以假顯真，以邪知正。且如玉臺懸寶鑑，輝輝其中，豈汝有形骸，秉大道玄玄於中何爾無，夫寶鑑本真，內現者虛假形骸，元假中隱者乃真，當以心鏡拂拭絕纖塵，性合道兮周沙界，大道無物不包，含性則無心而不亂，萬物已知為假，一心獨照為真，若取物用之，樂道無由，若離物言之，登天沒路，是乃引目海涯，忽觀桂月，閑遊山徑，頓覺松風，因惡而可從善，為假而可知真，因凡則知聖，因苗則知根。且以凡夫在世衆生，不以假物指真，如何辯有像，不以法相傳空，如何識無形，故以聖人垂化，用於未悟者也。故太上曰：知者不言，言者不知是也。若有我等一切凡夫衆生，悟斯大道，知本命限期，持此玄經進步仙階，能精修不退者，自然福德增崇。若不進玄功，輕生棄命之徒，當自性入別骸，心攢萬若灰，河明報何時，徹鐵域拘囚，甚日休爭如。好憑一智登天路，莫順三尸作

地囚。

頌曰：

隨力修真則見真，苦修多作始初勤。當須要辦真實行，方入無為自在門。業海省無千里岸，蓬山迷有萬重雲。漁燈照處寒江靜，鷗鷺驚飛失舊群。若本命之日，能修齋醮，善達天司，一世於本命限期，開轉真經，廣陳供養，使三生常為男子身，富貴聰明，人中殊勝。

蓋聞情起乎物，識起乎心，欲情起則三山作羅艷，情欲滅則九夜為玄府，大抵羣魔衆苦緣甚而來？八難十纏為何而至？欲物乃羣魔衆苦之根，亂性乃八難十纏之首，欲乃本無根，目乃欲之首，魔則本無礙，心是魔之因，故五音令人耳聾，五色令人目盲。《陰符經》云：警者善聽，聾者善視，絕利一源，用師十倍，三反晝夜，用師萬倍是也。蓋萬緣千行，皆出於一心也。又云：柳綠桃紅，乃眼前之幻化，風清月白，是劫外之生涯。若寂照太微，則神生丹闕，如昏

迷世慾，則魄墜寒池，諸塵諸漏，萬種萬端，只要於假內認元初這箇，於無中覓實有容儀，則可以行大道也。

○大衆乃以目前境界，浩浩多端，俗態迷因，般般無盡，七情六欲，五鬼三尸，化邪慾誑爾入迷河，用俗樂唆君歸業海，種種禍臨，何如奈忍，但當降其心，而羣魔自伏，戒其慾，而衆苦消除，心滅則萬法皆滅，情生則衆苦自生，入道玄門，幽關夜府，路本一條，剛行兩徑，神靈射九夜開光，魄散昧三山閉黑，天堂之樂，地獄之囚，為非之果，作善之由，皆隨靈臺而變化，從智性而出現者也。若有衆生能知本命之理，清淨齋戒，滅於塵漏，其善功超達天司，獲相貌端嚴，位登真人，得越苦海，皆因降心伏魔，從善戒惡，可登仙界逍遙，不致幽牢拘鎖。若有持經辦道之士，遵依太上之文，不犯聖真之禁，得道成仙，乃蒙恩先聖，將何以報之，故《證道歌》云：粉骨碎身未足酬，一念了然超億劫是也。只要慕

道了然，心滌無垢，便為不負天地之理也。咄！鑿開石壁無遮障，萬象森羅掌內觀。

頌曰：

玄靈大愍濟牢籠，廣化三乘悟太空。目下自知宜取用，雲中他說莫尋蹤。桃溪柳岸君家事，桂月松風我祖宗。堪笑幾多學道者，却貪塵景走西東。其有生身果薄，雖在人中，貧窮下賤，縱知本命，無力修崇，能酌水獻花，冥心望北極，稽首禮拜，念本命真君名號者，亦不虛過本命限期，皆得延生注福，繫係人身，災厄蠲除，獲福無量。天師歡喜，踊躍作禮，讚歎難可得遇無上法橋。

夫水性至平，浪因風起，人心本靜，動自物生。物不著兮情不生，心常虛兮欲自滅。愛欲起於心，形神喪於物，漫漫業海不歸岸，而一任漂流，黯黯羅艷競涉路，而從教險峻，直待失時方覺悟，日中扶影謾惆悵。○大衆貪愛狂迷癡慳悒，惜愚人本悟，此乃喪性命之因，迷真玄之本，

俗樂貪迷非君之益，道心開發乃我之榮，雲霞幽洞閑日月之光，麗閣華堂昭星霜之變，物外離塵境界別有逍遙，世間虛華俗樂豈無患害。凡修真鍊性者，當要十二時中、一百刻內，行坐施為，清淨身心，常立方便，自然累功積行，善達三天，登真得道矣。故太上有曰：進善若偷是，故於塵世之中和光順時，隨緣立善，若言善不行善，則證道無門，見非能戒非，則登真有路。凡欲修真學仙之人，當建真實之行也。且如世間貧賤高下，然各有等差，大道真空，則實無分別，有肅智清心而進道，有陳幡列像以祈恩，善立各門，恩成一路，世情有富貧之間，天心無高下之分，但能起一念進道為善之心，外則天真地神祐之，內則元命形神樂之，自然災厄蠲除，獲福無量。是時天師得受是經，不勝欣喜。天師者，秉道輔正曰天之師，迷真逐邪曰地之鬼，故悟真大道之人，正可謂得遇無上法橋矣。咄！一神秉正無邪諂，

三界逍遙總在渠。

頌曰：

柳岸分明橫法橋，迷來恰似路迢迢。
煙飛江浦山光淡，日照幽村野色消。
幸是本來無著相，強教今日話忉忉。
不知迴首人間幾，月白風清我獨招。

太上玄靈北斗本命延生真經註解卷中

①「皈依」，同《經注》本，《真經注》本作「歸真」。

②「雖還明師」，當作「雖遇明師」。

③「而矣」，疑當作「中矣」。

太上玄靈北斗本命延生真經註解卷下

崆峒山玄元真人註解並頌

老君重告天師曰：世人罪福善惡皆屬天司，懺罪消災，莫越修奉，遇本命生辰，告身中元辰驛馬，削落三灾九厄，保見今眷屬安寧。

原夫天地無象，道隱於混黃，日月未形，炁含於太朴，一炁足而黃中理，大朴散而物始生，三才布化於羣靈，六運吹噓於橐籥，寒暑遷變，律呂和彰，上散日月之晶，布其星辰，下凝清濁之滓，列其丘嶽，產育萬物，滋長群生，人盜萬物致寧，物耗人兮致道，春茂則秋衰，有生而有滅，若不形而不像，亦無死以無終。○大眾眼睫不遠於目，視見弗然，大道只在於心，修之豈識，雲宮梵闕，寶苑鸞林，將有相而識於無相，仗化緣而知於空緣，因有為則至於無為，為有相而得於無相，靈臺不昧道應明，塵積昏

朦神必暗，靈竭精潰，形病身亡，三魂渺漠空於陰路，太悠悠，百節形骸謾向荒坵，寂黯黯，饒敵一國之富，此日那榮，空傳六印之名，於期何濟，世之迷愛慾而多失元辰，縱貪婪而廣沉驛馬，目視桃紅柳綠，不知空

色之由，意隨蝶舞花飛，豈別因緣之分，於海波闊遠處旋渦中，宛轉甚時休，在山石深厚地雲穴內，亂竄何日止。但世人惡濕而居下，畏死而貪生，不知生者死之根，過者禍之首，自當畏濕而居高，貪生而脫死，恐禍而慎過，防患而戒非，自然逍遙為陸地之仙也。且夫衆生作非犯禁，累成過咎，何法得免，何計得禳？在乎悔省前非，永絕後過，精思太玄，恭敬奉自己身中元辰驛馬，可得削落三灾九厄，保見今眷屬安寧。如何是告身中元辰驛馬？蓋元者始初也，辰者真象也，驛者宅谷也，馬者頑獸也，欲請福，當禱祈，參求本來元初，同大道，合天地，運日月，齊山嶽，通幽達玄，無為無礙，這箇元辰，

悔過遷善，便可消灾度厄矣。能縛自身宅谷中意馬，心猿得住，自然萬灾不干，群邪稽首，則得逍遙三界，乃證玄玄者矣。咄！自身驛馬擒降住，方得元辰落九灾。

頌曰：

莫繫元神五蘊山，就中虛幻事多難。迷雲常惹靈臺伴，愛浪頻潮丹闕間。九厄漸生猿馬旺，三灾轉起鬼邪頑。誰知照見真消息，風月依依兩不干。凡有上士於本命生辰持此真文者，外伏魔精，內安真性，功霑水陸，善及存亡，悔過虔恭，漸登妙果，重立玄功，證虛無道，乃得聖智圓通，隱顯莫測，出入無，逍遙雲際，昇入金門，與聖合真，身超三界，永不輪轉，壽量無窮，快樂自在。

且夫善惡之各異，皆出自於所為，禍福之兩途，乃實因於所措，大抵幻魔縱則愆必積，心業滅，則罪亦亡，雖知善惡禍福，如影逐形，莫可逃之。且世間凡夫衆生，不知何以至親，何以至大，雖知惟道至大，惟命至親。

今乃知道大命親，何以求之？何以護之？須知樞之自輪，綱之自紀，一心攝正，萬法無邪，親者不能敬，焉能敬其疏，內者不能悅，焉能悅於外，則敬親廣兮疏必善之，則悅內加兮外必推之，是故可正於一身，自然弗令而順之者也。○大衆何如龍吟虎嘯，昇沉於丹鼎之中，鬼哭神號，奔竄於黃宮之外，可得證虛无之道，壽量無期，快樂自在，逍遙三界，昇入金門，與聖合真矣。咄！身到曲溪煙月岸，楚峰山色轉分明。

頌曰：

玉虛臺畔舊圓融，無礙無為萬古同。只為情迷生滅內，拘縻真覺去來中。皆因執有還著有，縱得依空又落空。空有可於方寸鑿，自然展轉顯神通。凡有男女於本命生辰及諸齋日，清淨身心，焚香持此真文，自認北極本命所屬星君，隨心禱祝，善無不應，灾罪消除，致感萬聖千真，俱來衛護。此文所在之處，千真敬禮，萬聖護持，魔鬼潛消，精靈伏匿，世有灾殃，悉皆消滅。

且夫大道難稱，玄功罔測，霈洪恩則敷於萬物，布妙化則徧於八紘，有品咸亨，無物不載，然而道無不載，廣施有用之恩，物遂生成，大啓無為之化。又曰：有用之空非有用，無為

即色豈無為，用為要識其中理，方脫輪迴興嘆悲，而知天地蓋載其恩彌焉，日月照燭其恩亦然，大道化身，其孰固憐，不知身之以國，命之以君，靈之以本，氣之以臣，縱妄想而迷五色，隨貪愛而滯六塵。須知君愛敬國之昌，靈氣沖和身不亡，臣子忠君君愛臣，家邦從此轉興榮，蠻夷縱有多兇勇，自是無由敢戰征，大底以和成晏，以正攝邪，一念頓息，萬緣俱忘，若起一念之因，應受三塗之報，則有過去未來見在，捨身報身受身，迷不知涉於深淵，貪不知步於峻嶺，兀兀如癡，昏昏若夢，起無明業火，毀焚樓閣之嚴缺，有漏迷津，散蕩真元之理，是以衆生斯之廣矣。凡有男女於本命生辰及諸齋日，清淨身心，焚真實香，持念真文，自認

北極所屬星君，隨心禱祝，善無不應，災罪消除，鬼魔伏匿，願我含生同離業果者矣。咄！七真拔苦尋無地，一念忘時別有天。

頌曰：

萬疊雲山聳翠華，分明歸路本無差。爭知只恁他鄉好，不顧終非自己家。去執乃為真懺悔，忘貪便是大丹砂。降心得入幽微徑，笑看溪風送落花。

是名《北斗本命延生經訣》，乃修真之徑路，得道逍遙皆因此經，證聖成真皆因此經，出離生死皆因此經，保護男女皆因此經，保命延年皆得自在，永為身寶，福壽可稱，保而敬之，非人勿示。

凡修道者，皆憑於保真練性之理也，乃知昧性者禍有多焉，悟真者福無少矣。善惡施為，皆惟然於心也，禍福可鑑，皆惟然於智也。蓋凡夫在世，動念施為，行藏舉止，禍福善惡，互相交錯其間，分別者在乎智也，故以有善即進而從之，遇不善當退而戒之，退不善可立於功，戒為非勿失於德，可見於玄門矣。空言退惡，不

立其實功，謾說進善，弗行其實德，希夷之門，性相之理，何由達於此也。乃以聖人垂經，譬如日月之光輝，能破黑暗，視現萬物，明照諸方，使一切衆生未知者知，未見者見，其功皆為天之德也。我太上說此經教亦同日月，咸使凡夫知登真入道之途，脫苦海輪迴之路，其功皆為於聖之德也，乃以衆生之性，亦與日月之同，洞照太虛，纖塵不染，飛空無礙，乃不知立功修德之理，障礙雲生，煩惱業起，昧却靈明，涉於幽暗，貪呆不顧前坑之險，逐樂寧思後患之憂。

頌曰：

○大衆爭如立功修德，其福不可稱量，可濟度苦魂，可永延遐算，出離生死，得道逍遙，即可證聖成真，上登三清之境矣。咄！延生經訣修真路，體用皆因此一經。

玉壺壺內隱玄玄，欲識須當縛要猿。功行切宜都總備，聖真方得兩皆全。劫終不壞飛仙島，物外猶存豈梵園。悟到從來幽妙理，玄微極處只無言。

老君說經將畢，龍鶴天仙來迎，還於玉京。是時天師受得妙法，而作是言，誓願流行，以傳善士，若有男女受持讀誦，我當與十戒仙官所在擁護。

原夫天無私，而勸於善也，斯有道，則福無形也，人惑欲，而從其用也，斯有數，則福臻中也。若以所得其中，則福祉之來也不可禦，又奚慮其釁極也，若人所以失其中，則釁極之至也不可逃，又奚望其福祉也。蓋以善惡因由，如行車之轉輻，如谷聲之應逐，還報然而何以免之？君不見芳英滿檻，難逃九月之霜，金玉盈堂，怎免百年之限，人身幻體，終於浮世豈長存，罪戾增崇，定是冥途繫永久，何如開神光射破八門關，掃氛氣高昇三界府。奈何衆生情迷諸漏，性積多愆，於濃濃浪裏走無停，向靄靄雲中迷不省，可嘆三尸六鬼得勝喜容容，却嘆四大百神勢虧愁慘慘，雲宮仙府去無門，曠野荒坵應有分，將玄真浩散逐悲風，把靈魄飄悠涉鬼路，平生冤業見前來，空悔問

君何去住。故太上曰：上德不德，下德執德，執著之者，不名道德。夫執著邪見，遇啓正觀，可敵羣魔，握權天地，指勅萬神，役祛三界之樞機也。且以囂塵廣厚，迷障昂高，未能飛步於青雲，何引凡軀於碧落，如何向五苦八難之中，到三島十洲之外，但於方寸之間馘邪魔，奔遠於寰區之外，晏忠良弼輔於朝幄之中，自然神昇超世，道合自然而然，出入往來，無縈無礙，自在逍遙矣。是乃太上垂濟物度迷之法，普徧萬方，周流三界，於是令天師傳授衆生，咸離苦業，俱入道真，持授歸依，通玄究妙，洞觀無礙，超入法門，自得十大仙官，翊衛修真抱一之身矣。咄！一心摧斬諸魔鬼，衆苦翻為十善神。

頌曰：

衆流分派育羣生，雪月輝光雨霽晴。
千浦浪渾千月暗，一溪波靜一輪明。
元同真處異何異，只為迷來成不成。
却笑落花飛片片，野禽由自弄多情。
於是再拜老君，而說贊曰：

家有《北斗經》，本命降真靈。

頌曰：

瓊文奧旨甚叮嚀，為恐衆生落夜肩。
故說太玄妙理，指開頑識識空形。
祥風灌透黃華館，慧月光輝丹界亭。
運取聖功非內外，神明應是降真靈。
家有《北斗經》，宅舍得安寧。

頌曰：

誰能頓解悟真經，遣去凡情護我形。
鍊性保神精養血，固根離愛氣和靈。
泥丸運得開明月，液海應擒照鑒星。
六識若降無患惡，自然宅舍得安寧。
家有《北斗經》，父母保長生。

頌曰：

勤修妙相體圓明，方寸休教染垢塵。
默默施為仙行業，綿綿進用道功程。
十華定舉標金格，五老須從註玉名。
皆自一身持戒善，慶敷九祖保長生。
家有《北斗經》，諸厭化為塵。

頌曰：

但能常靜暨常清，天地咸寧萬法明。
神谷長存開玉藥，刀圭乃得產金晶。
寶壺騰瑞龍蛇戲，壽鼎飛光鬼魅驚。

若取聖功頻煅鍊，自然諸厭化為塵。
家有《北斗經》，萬邪自歸正。

頌曰：

心猿縛住入玄幃，妙相莊嚴自此威。
斡轉玄關塞地穴，驅回妙範奪天機。
慧鋒誅斬妖魔盡，法印宣威魍魎稀。
蕩蕩滿懷風與月，萬邪稽首自歸依。
家有《北斗經》，營業得稱情。

頌曰：

方寸修持坦坦平，塵緣都沒半毫縈。
三尸計攝歸玄理，六賊機圖滅怪孽。
現出曲溪山月朗，透開春色谷風清。
不知這箇生涯事，誰肯經營得稱情。
家有《北斗經》，闔門自康健。

頌曰：

不在驅驅度遠關，道迷雲外得應難。
神光只照無為路，法眼休觀有礙山。
朱閣玉樓真造化，清風明月樂條間。
幽菴活計人能會，從却菴疏主亦安。
家有《北斗經》，子孫保榮盛。

頌曰：

空洞靈臺瑞靄清，汪洋和氣徧區紘。
雲巒砢砢神風冷，煙舍蕭蕭皓月明。

野叟笛吹無事韻，牧童歌唱太平聲。
自從認得山家樂，姹女嬰兒展轉榮。
家有《北斗經》，五路自通達。

頌曰：

綱紀經綸事業興，忠心匡國輔高明。
未容讒佞食君祿，常許功勳作帝卿。
宇宙既能施正化，江山應是肅然清。
同瞻聖主巍巍德，載路通亨賀太平。
家有《北斗經》，衆惡永消滅。

頌曰：

誰肯調馴猿馬情，免教奔竄誤前程。
對他桃李舒晴日，收拾生涯隱故京。
好是雨餘山色淨，只愁雲暗月華明。
若能但把俗情滅，衆惡何由得自生。
家有《北斗經》，六畜保興生。

頌曰：

識得浮華事可驚，便宜迴首捨凡情。
任從目下般般冗，不運心時灑灑清。
活計勿虧應有盛，功名休怠不無成。
也知別更求何利，六畜寧來主自榮。
家有《北斗經》，疾病得痊瘥。

頌曰：

一念休教業所牽，百關調暢保延年。

勿令真氣時時損，常使靈源日日添。
龍虎不能停戰鬥，坎離豈運自團圓。
不須草木奪神理，定是災除樂泰然。
家有《北斗經》，財物不虛耗。

頌曰：

這顆玄珠無價酌，衆生皆有不能收。
本如明月澄江水，元若清風動素秋。
且好牢藏先準備，莫教散失後成憂。
金門玉戶宜常閉，免使狂猿起意偷。
家有《北斗經》，橫事永不起。

頌曰：

迴光返照滅塵心，莫負玄門振法音。
只在目前分造化，休迷雲外別搜尋。
寒巖月朗山猿唳，谷樹花芳野鳥吟。
若肯的然行此道，非灾何為得能侵。
家有《北斗經》，長保亨利貞。

頌曰：

莫將無漏等閑輕，好慕真空進妙程。
常托赤松為取用，每從蒼昊變虧盈。
分開羃羃陰雲翳，現出輝輝皓月明。
打當塵囂無半點，忻哉長保利亨貞。
老君曰：善哉善哉，汝可宣揚正教，福
利無邊，普及衆生，永霑勝善。

解曰：碧天秋霽夜無雲，月影輝輝落水濱。爭奈怒風來太惡，沸波搖散玉華輪。切謂猿心顛耍，宜調伏於玉洞之間，馬意劣頑，可繫縻於玄

山之下，野外多春草，山前足異芳，馬猿還不繫，逐景定奔狂，境界來時無準備，柳煙深處定迷蹤，柳塘花塢春明麗，牽引時人翫景遊，信步不思歸去晚，急迴斜日過江樓。謂浮生幻化，那堪日月如梭，榮辱虛華，更嘆韶光似水，忍造愆非，魂沉寒夜，不知省悟，魄墮幽陰，切以金鐘高架木不扣兮，終日無音，寶月空懸雲不蔽兮，通宵自朗，譬若心不動兮性常定，外不入兮內常安，內安則萬法皆明，性定則羣魔自伏，何幽不燭，何化不行。奈爾凡夫昏朦真性，縱情縱慾，轉輪六道之中，何德何修，甘墮九泉之下，月館松溪，無戀意囚牢，火宅競鑽頭，只於苦海貪榮辱，辜負真元逐浪流，被諸塵漏，緣覺聲聞，逐景沉迷，量因生滅，迷誤不省，競著羣情，自沉苦趣失人身，何日再

重登道岸。深蒙太上重演真詮，普濟衆生，永霑勝善。咄！太上善哉真法語，衆生普福利無邊。

頌曰：

圓融妙相本莊嚴，大需玄恩無背偏。萬物俱蒙真造化，羣靈咸隱太幽玄。龍蛇有寶非奇特，天地無恩實可憐。識破用中無用理，剖開混沌見機權。

天師稽首禮謝，信受奉行。

註曰：道徧十方，澤沾萬彙，化育含靈，混成衆類，細入塵沙，大包天地，日月之綱，陰陽之緯，用之則輝，背之則昧，隱顯隨機，變通量器，智者乃符，非人勿示，輕則匪臻，敬之必至，故立玄門，識真辯偽，普使超昇，咸辭溺墜，功就行成，神飛仙位，願我衆生，皆逢正義，慎之慎之，無二無二。

頌曰：

千經萬論破癡迷，更不迴頭待甚時。業海自今宜出浪，罪山從此好平持。心間未及於人計，意下先除潤己私。道德兩全功行備，煙霞獨步樂無為。

太上玄靈北斗本命延生真經註解卷下

①「貪呆」之「呆」，疑誤。

②「直靈」，疑爲「真靈」之誤。

後序

蓋聞昊天皇皇，至高至邈，無梯可以倚其上，無路可以達其中。大道默默，至幽至玄，無計可以度其元，無方可以測其理，於是以善爲昇天之徑，以經爲入道之門，善則通於雲衢，經則露其隱奧，則非善乃天之無路，則非經乃道之無門。是故立經度死，垂教開生，而況厥恩莫大乎經也，其福莫大乎善也。夫聖人垂經，則有恩而無，凡夫奉善，則無福而有，因心以作，所由生也，若得遇玄文，空披視已，不戒不奉，匪究匪窮，何異有患求醫，唯誦驗而不餌於藥，恐刑開律，但解科而罔戒於非，思之矣然，而覽之豈可獲其濟也。凡有得遇，可戒奉之，庶乎俾寒獄之冰消，使火山之焰息，可得蓬宮閬苑注籍得道之名，幽府羅酆落部拘囚之目，咸拯識靈，同登道岸，余行微性慙，不愧聾言，謬作嘆文，標其經闕。眉山蘇軾序。

（曾召南點校）

112 太上北斗二十八

章經

經名：太上北斗二十八章經。
撰人不詳，約出於宋代。假託北
斗七元星君於終南山為漢明帝
說經二十八章，言禮誦七元星
君，保命消災之事。一卷。底本
出處：《正統道藏》洞神部本文
類。

昔漢明帝遊終南山，見一女人，身著素衣，披髮跣足，端然坐石不起。帝曰：朕為天下兆民之主，卿是何人，見朕失儀？女子答曰：吾是昊天玉皇帝車之臣，北極七元掌籍之星，君是何人，教吾施禮？帝龍顏失色，稽首拜謝：朕為兆民之主，不遇真仙，今幸得遇，稽首再拜，得睹真聖慈采，夙生有緣，即非今日之因。伏願元君慈憫，傳

付真訣，將治身命國家，群臣各各信受，伏願元君不惜大淵之寶，重舉雷音，朕將宣布天下，流遍山河，萬民同朕遭遇洪範。稽首再拜，起身進步，以目觀之，見雲霧布頂，身足霞采，瑞氣騰空五尺，七聖居住其上，二官在後。

元君曰：吾非一聖，乃七人也。二星官者，是斗中注人間善惡星官，名號左輔右弼之星。帝曰：七星何名？元君曰：一名貪狼，二名巨門，三名祿存，四名文曲，五名廉貞，六名武曲，七名破軍也。

禮念七真聖號

志心皈命禮，消災解厄洗罪延生大悲大願大聖大慈中天北斗七元星君，中天北斗中列聖高真，延生保命度厄消災扶衰散禍益筭七官君，啓經教主前聖漢明帝君，天京本命元辰，伏望洪慈俯垂鑒誦。

貪狼星君章第一

是時大道元君語聖明曰：今若求吾真道，治身治命治國治家，心行平等，以直中行道，天地鑒之，日月憫之，

星辰佐護，鬼神遠退，直臣輔帝，民無煩惱，四海八表歌樂來朝，萬姓無爭，身命增長，延齡益筭，百關調暢，使帝命永固，道炁自然。

巨門星君章第二

元君語聖明曰：今若有求吾道法治身，於一日十二時中，不失真道，使汝身命壽筭增延。元君曰：若守於道，我命在我不在於天；若失於道，諸星不佑，百禍競起，壽命不長，諸災自然。

祿存星君章第三

元君語聖明曰：今求吾道，去其財色，除却人我貪嗔，尊上念下，當以智信為本，禮義為先，戒伐生命，休貪娛樂。帝曰：朕求道法治家治身，他人亦耳，使民無惱，不聽非言，使君臣不亂，身昌道合，萬民自然。

文曲星君章第四

元君語聖明曰：今求吾之真道，即非小緣，歷劫曾從上天，今日方遇吾眾星君，善哉善哉。萬民後代，善利無窮，世間豐歉苦樂，即非天曹注也，自

是人心自造，非干天地所注，子戒之邪淫，不可亂色，即可陰陽正配，使道光輝，天地自然。

廉貞星君章第五

元君語聖明曰：人求吾真道，終日十二時中，使左青龍、右白虎各依方位，使龍吟雲起，虎嘯風生，舌柱上腭，叩齒四十九通，兩手摩靈，然後使赤牛耕地九疇，應前朱雀、後玄武、六丁六甲在吾左右，天丁力士從吾前後，獨乘白龍黃炁透入頂門，使顏不老，髮不霜凋，齒落再生，上朝金闕，下覆崑崙，使命增延，君臣不亂，萬民無爭，道炁光輝，天地自然。

武曲星君章第六

元君語聖明曰：夫處世爲人民之主，志求吾法，賜汝天機之德，益汝身命，使家國和平，人民無爭，壽命增延，於十二時中，少喜、少懼、少樂、多苦，又於人身四大骨血配之五行，金木水火土五行順，萬物生，道炁和。金木相逆，水火相剋，人爲之不順，使身命不昌，道炁不和，家宅不寧，災近民矣，天

地不救，亦知爲人不順，百禍自然。

破軍星君章第七

元君語聖明曰：夫求上聖之法，亦非難，亦非易，只在人之方寸。破軍問帝曰：還會否？帝曰：難可得遇，未便會解真仙之說。

元君曰：圓者方，方者圓，人身四大，有玄妙真法，汝於十二時中，左手握右手，右手握左手，吐氣九轉，大用火，小用水，小用火，大用水，使人身體安健，百禍不生，增筭益祿，世世生生，福壽相承，家國清泰，道炁自然。

大道北元統章第八

大道北斗元君普告人天大衆曰：積萬善之因，積萬惡之苦，造惡之人，常被物使也，流浪生死，沉淪苦海。若夫行道，常爲萬物之主，不逐四時凋謝，吾使萬物皆空，不將萬物圍遶著物者，爲之貪嗔，如雲霧駛月，舟移岸隨，玩物傷人之致，明知二法是物外之心，不著物也，君臣自樂，萬民無苦，使國土清靜，鬼神恭敬，果木茂盛，五穀成熟，日月佐之，星辰佑之，道炁光輝，乾

坤自然。

北元統章第九

帝問元君曰：上仙管籍，日夜周遊，管之何事，有多少曹局，朕見日夜光明，星行旬分羅列星宿，未知其道，伏願元君祥雲久駐，鶴步停飛，神光存照，朕若明上仙之道，不忘今日得遇高真，勅賜天下宮觀永爲宗廟，編集道錄。

北元統章第十

元君曰：吾上管諸天列仙，中管五嶽四瀆鬼神，下管地府幽靈酆都獄卒，三界之中，胎卵濕化，盡屬吾管，一日一夜，萬死萬生，貧窮下賤，上下賢愚，鬼神劫數，長短增延，劫殺死傷，獄卒囚徒，龍神行雨，五穀成敗，寡病四民，山河水陸，皆過北元案中二千六百曹君，一日一夜無差，天地無私，善惡自然。

北元統章第十一

帝又問元君曰：三界之中，蠢動物類，盡是元君管局，朕爲人民之主，還屬上仙管否？元君曰：諸天列仙，

天羅星帥，吾籍管之，何況於汝乎！況昔當元天，主北方天蓬主帥，於座逆想人間異幻，一念纔生，降下爲人之主，今忘夙念，與聖合真，得遇吾衆體道之源，忽然清靜，道炁自然復元本想，若將來天福具足，功滿德就，再遇天蓬，仍位天主。

北元統章第十二

帝曰：朕得元君容顏喜悅，暢哉，今日羣臣眷屬，盡遇上仙，真詮本末，謹奉教言，十二時中修之萬行，再復道源，恐有人民如何方法增壽滅罪，長福消災？大道北辰元君曰：吾有神力，吾有神咒，凡有人民危難，病苦、恐怖、冤家，私求其便者，而又或是鴟鳴百怪，魍魎魑魅，倘值孤魂滯魄，及軍陣中亡，投河繫頸傷死，或是田地咒咀，或是天符行病，瘟疫侵凌，或是生產，母子不分，或是城隍社廟，鬼神不正，師巫厭禱，妄行逆法，作諸不祥，又或天地劫數，五穀不熟，或求名利，或求男女之人，香湯沐浴，於庚申甲子，并每月北斗下降之日，面向北方焚香，志

誠書吾名字，魁魍魎魑魍魎星，諸魔自滅，百禍自消，皆得吉利，乾元亨利貞，吉祥和平，諸鬼若不從者，頭破七分，勅唵吽斬發，急急如律令！

北元統章第十三

元君曰：一切衆生，若有危難病苦，四路閉塞，無門所出，男女眷屬，父母親朋，或親友故舊，或天符時氣，各請清齋沐浴，散髮跣足，於夜半子時，面向北方，或在中庭，書章七封，表奏天曹，念吾名字，於表章上寫吾名字：魁魍魎魑魍魎星，吾在天曹，每一星君有三千六百星官，三萬六千神君，四直功曹，速爲上奏金闕門下，諸灾厄難，纏綿困苦，悉皆退散，邪鬼磨滅，若不信者，頭破七段。

北元統章第十四

元君曰：或魍魎魑魍魎死魂不散，日夜悲啼驚恐，作其灾禍，害人身命，採其血肉，驚怖童男童女，百種苦惱，作亂生人，於家清齋沐浴，書吾名字：

魁魍魎魑魍魎星，吾勅諸魔自滅，百禍自消，皆得乾元亨利貞吉祥，萬事和平，諸鬼若不信者，頭破七分，勅唵吽斬發，急急如律令！

北元統章第十五

元君曰：或有冤家咒咀，埋名禁字，茆木作形，巫師逆法，作諸不祥，怪夢顛倒，或因田地財帛不明，朋友不足，恩愛成害，或因牢獄荼毒，害民官吏抑塞，自此之情，無由解脫，至誠發心，念吾名字：魁魍魎魑魍魎星，當時道炁付身，諸難消散，吾勅天蓬主帥、四目老翁、八萬天兵力士，身長三十六丈，搖鈴勅力，唵吽斬發，急急如律令！

北元統章第十六

元君曰：或是國內不寧，四方萬耗競起，或天地劫數，天龍行雨，地不成熟，五穀饑饉，五劫亂世，君王鬥戰，賊發火起水漂之難，五路障閉，君臣民俗等衆各發志誠，清齋沐浴，具朱章七封，各奏本情，於表章上書吾名字：魁魍魎魑魍魎星，於夜半子時，朝吾三

三之拜，四直使者速爲上奏金闕門下，諸星判斷，吾勅差北方天蓬真武大聖、四目老翁、八萬天兵力士，身長三十六丈，搖鈴勅力，唵吽斬發，急急如律令！

北元統章第十七

元君曰：若有住落鄉村曠野之處，或是州縣城郭坊巷，被天符行病，五瘟徒衆行其毒病七十二疫氣，此是吾七元簿籍功曹太歲、直年直月直日直時，方位州縣行病，各有分數，或是朝病暮死，上下不分死符恐怖，無門奏謝，若有清淨道侶，或是信心男女，各各志誠焚香，面北朝禮三三之拜，念吾名號魁魑魍魎魍魎星，四直功曹奏上金闕門下，吾勅差天蓬帥、使四目老翁、八萬天兵力士，直到下方，收吾五瘟天符簿書，速令家家乾元亨利貞和平，門門利益，道炁自然，搖鈴勅力，唵吽斬發，急急如律令！

北元統章第十八

元君曰：若有信心道衆，或是凡民，若無後嗣子孫，每遇庚申甲子斗真

下降本命之日，焚香清齋，念吾真經，及吾名號：魁魑魍魎魍魎星，十二時中，香燈不絕，時花茶果，供養不絕，或七七四十九日，或一百日，便有降祥乾道之喜，吾在天曹掌籍，詳其分等，注生智慧之男，壽命百歲，無災無障，清淨道德，佐助人皇，又或當隸坤道，降生有相之女，福德殊勝，此乃神力自在，勅乾元亨利貞，急急如律令！

北元統章第十九

元君曰：或是父母兄弟妻眷男女等人，遭枷落獄，赴法傷亡，或因財色鬥殺，久沉苦趣，無由超生，或遭生產，子母不分，死傷無托，久在幽冥，孤魂不散，未遇超生，沉於鬼趣，無有出期，全藉信心男女眷屬，於其庚申甲子下降之日，夜半子時，志誠焚香，念吾名號：魁魑魍魎魍魎星，陳說披分本情，面向北方，禮吾三三之拜，吾請金闕門下奏章直事、四目老翁，告示注生功曹，注死元辰，隨其分數，逐業超生，搖鈴勅力，唵吽斬發，急急如律令！

北元統章第二十

元君曰：或是軍民戰陣，各負死力，冤牽相撞，不能解脫，可以清淨齋心，去其酒肉五辛，披髮跣足，面向北方，念吾名號：魁魑魍魎魍魎星，吾在天曹勅下天蓬帥，使玄武上將軍真武大聖、四目老翁、天兵力士八萬四千，身長三十六丈，搖鈴勅力，唵吽斬發，急急如律令！

北元統章第二十一

元君曰：或有商人行船過渡，其江灘之波，難負累財帛，或在海中，不遇風帆，日月不分，邪精蛟蜃，妖怪鬼神，作起障難，速書吾名字：魁魑魍魎魍魎星及符，放在水中，吾勅下天兵力士、當界地分水神地神、河伯水官、城隍廟社諸神，得力扶持，脫離苦難諸魔，不信者頭破七分，勅疾速安，勅疾速寧，勅力唵吽斬發，急急如律令！

太上救水難真符



帝勅靈靈，中天七真。神符誥命，人船安寧。急急如北極大帝律令！

北元統章第二十二

元君曰：或是信心清淨男女，久事齋戒，念吾名字：魁魎魍魎魍魎星，行吾大法，看吾真經，朝拜七七四十九日，併良宵，或一世及累劫行正法，積陰隲，當生上界，天曹簿管，過其坊村社廟，不得頂禮，諸神不安，亦不敢受，令其鬼神，遠去千里，入地千尺，不信者，頭破七分，勅疾速唵吽斬發，急急如律令！

北元統章第二十三

元君啓告帝曰：凡人朝元拜法，洗蕩身心，消滅宿業，一切妄想顛倒，息心不善，見下愚之輩，如掌上之珠，見清高之人，如眼中之砂，或使心行一切不善，或有三世冤親，或自心不善，妻眷男女死亡，或是自己衣食不充，不遇貴人接引，或是家國不寧，或爲庶民，或爲他人，或爲名利，或是埋墳，起造修方，或是自己，或爲妻眷，或爲國行兵，或爲父母惡病，或是水火之災，

及惡人淫亂，或被上官責罰，一切諸惡不祥，各各志誠清齋行道，香湯沐浴，素衣冠裳，朱履，木簡一尺二寸，楠木爲案，朱砂塗之，長二尺四寸，高七寸七分香爐，登之高處，面向北方，志誠望吾宮中，直至夜半，念吾名號，朝禮三三之拜，七月一日至七日七夜，虔心志誠，布列香燈，稽首。

第一朝元三拜，起身執簡，伸白情意，臣啓北斗元君諸天星宿，昭鑒乾坤，使一切鬼神天龍等衆，普及人民各身道炁長存，天地萬物自然。

第二朝元三拜，臣啓北斗元君：

臣昔年父母死亡，恐墮冥塗，地獄辛苦，久沉鬼趣，罪掠冥曹，未能超生，無由報答天地之恩，父母所生恩愛，朋友師長教誨。又云：父母見在堂上，臣伏願元君上官真炁慧眼遙觀，賜臣一報，見存獲福，過去超生，長親道教，永離苦趣。

第三朝元三拜，臣啓北斗元君，臣值下界凡身凡夫，命係上官，真仙管籍，四時衣食不足，財帛穀米常生虛

耗，所作不成，恐臣夙生罪業，累至今日，無門告謝，今生幸遇真仙典教，一依科法朝拜，伏願元君賜臣百福千祥，萬事乾元亨，萬物利貞，臣稽首再拜。

北元統章第二十四

元君再語帝曰：九月九夜夜半子時，朝元拜法，付常皈依吾法及傳教世間，化治天下人民等衆，開度餓鬼、畜生、胎卵、濕化等，及囚徒地獄，一切苦難，係九月九夜注籍罪福，此是北斗帝車高真定其簿書，注人衣食、福祿、貧富、貴賤、奴婢、雜使等類，皆從此月定錄注籍，善惡無差，吾說此經教法，生靈鬼神萬民四生餓鬼等衆，天下人間國王大臣軍庶一切等類，若依吾法朝拜九夜，吾在元宮端詳注選南方列仙，隨願所生，定其分毫；若求道法，天道聞之，便應所求；若求衣食官爵，便得百福千祿，自身道炁長存，萬物自然。

九月一日夜半子時，朝拜北斗第一宮中貪狼星君，文章案內管三百六十星官、三百六十司、三千六百曹官，身披青衣，頭戴青冠，腳踏朱履，手執

青簡，又有三千六百童子，身著青衣，手執青旛，持華蓋以應東方甲乙之木，侍右。

貪狼星君，判斷陽冥。臣啓北斗貪狼星君，善注人間生死，平等善事，國君萬壽，朝臣盡忠，人事通和，免使徒配誅斬，各各善生善終，不味道心，清炁長存，萬物自然，其人便得三千六百九十分數功德，罪障漸漸消除，急急如律令！

九月二日夜半子時，朝拜北斗第二宮巨門星君，善注人間長壽，案內管三百六十星官、三百六十司、三千六百曹官，頭戴黃冠，身披黃衣，腳踏朱履，手執黃簡，又有三千六百童子，身著黃衣，手執黃旛，以應中央戊己之土，侍右。

巨門星君，判斷陽冥。臣啓北斗巨門星君，善注人間平等善事，君王萬壽，賢臣佐國，人事通和，免其徒配誅斬，各各善生善終，不味道心，清炁長存，萬物自然，其人當得五千一百七十功德，罪障消滅，急急如律令！

九月初三日夜半子時，朝禮北斗第三宮祿存星君，注人間孤寡跛躄四民，案內管三百六十星官、三百六十司、三千六百曹官，頭戴黑冠，身披黑衣，手執黑簡，腳踏朱履，又有三千六百童子，身著黑衣，手執黑旛，以應北方壬癸之水，侍右。

祿存星君，判斷陽冥。臣啓北斗祿存星君，善注人間生死平等，免見囚徒死亡，孤寡貧窮絕滅，不味道心，清炁長存，萬物自然，其人當得五千一百功德，罪障消除，急急如律令！

九月初四日夜半子時，朝拜北斗第四宮文曲星君，注人間成敗，案內管三百六十星官、三百六十司、三千六百曹官，頭戴黑冠，身披黑衣，手執黑簡，腳踏朱履，又有三千六百童子，身著黑衣，手執黑旛，以應北方壬癸之水，侍右。

文曲星君，判斷陽冥。臣啓北斗文曲星君，善注人間生死，餘事平等，免見淫亂成敗，囚徒死亡絕滅，不味道心，清炁長存，萬物自然，其人當得三

千三百功德，罪障消滅，急急如律令！九月初五日夜半子時，朝拜北斗第五宮廉貞星君，功曹掌事火星，案內管三百六十星官、三百六十司、三千六百曹官，身披緋衣，頭戴紅冠，手執朱簡，腳踏朱履，又有三千六百童子，身著緋衣，手執紅旛，以應南方丙丁之火，侍右。

廉貞星君，判斷陽冥，注人間風火之事。臣啓北斗廉貞星君，善注人間生死之難，免見囚徒，消解火殃，保安郡邑，使家無祲現，人得安康，次願神明護門，公私兩利，更乞常逢好事，不味道心，清炁長存，萬物自然，其人當得三千三百功德，一切罪咎悉皆消滅，急急如律令！

九月初六日夜半子時，朝拜北斗第六宮武曲星君，注人間金銀五穀財帛，案內管三百六十星官、三百六十司、三千六百曹官，身披白衣，頭戴素冠，手執白簡，腳踏朱履，各執文簿，又有三千六百童子，身著白衣，手執白旛，以應西方庚辛之金，侍右。

武曲星君，判斷陽冥，臣啓北斗武曲星君，善注人間財帛，善利他人，莫生毒害，免見囚徒死亡交雜，上望斗真賜福，本命降祥，衣祿增崇，元辰共護，仍乞神芘，不昧道心，清炁長存，萬物自然，其人當得二千四百功德，罪障消滅，急急如律令！

九月初七日夜半子時，朝拜北斗第七宮破軍星君，注籍人間傷暴誅斬囚徒，案內管三百六十星官、三百六十司、三千六百曹官，身披白衣，頭戴素冠，手執白簡，腳踏朱履，又有三千六百童子，身著白衣，手執白旛，以應西方庚辛之金，及天上地下人間五行造化生旺所屬星宮舍次之分，流布禎祥，侍右。

破軍星君，璇璣玉衡，斗樞之府，判斷陽冥。臣總伸奏啓北斗破軍星君，天罡大聖法王天君、內垣帝座尊星君、外垣台輔壽祿君、延生保命君、度厄消災君、扶衰散禍君、益筭冲和君、七元將軍、九宮天后，先乞赦臣夙生今世千愆萬罪，次乞開度祖禰先亡冤親

滯爽，願臣不經苦惱，與善因緣，萬災不干，精靈伏匿，所求者得，所向者亨。再惟破軍宮下善注人間傷暴，囚徒牢獄死亡衆厄不侵，仍乞天芘，不昧道心，清炁長存，萬物自然，坐賈行商，公私萬吉，後昆昌熾，元亨利貞，其人當得三千八百功德，急急如律令！

九月初八日夜半子時，朝拜北斗第八宮左輔星君，判斷陽冥，注籍人間奴僕，案內管三百六十星官、三百六十曹官，各執文簿，掌天下僕馬命宮生死分數，臣啓北斗左輔星君，善注人間奴僕之事，免見囚徒死亡，願不失人身，清炁自然，萬事和合。

九月初九日夜半子時，朝拜北斗第九宮右弼星君，判斷陽冥，注籍人間奴婢，案內管三百六十星官，三百六十曹官，各執文簿，掌天下婢使命宮生死分數，臣啓北斗右弼星君，善注人間婢使命宮，免見囚徒牢獄，生死不失人身，清炁長存，萬物自然，萬事和合。

右奉上帝命降吾勅牒，起天符都天元帥授事真君，十二年分行病鬼王，

東方甲乙木精五瘟鬼衆，南方丙丁火精五瘟鬼衆，西方庚辛金精五瘟鬼衆，北方壬癸水精五瘟鬼衆，中央戊己土精五瘟鬼衆，天下雜使行病鬼神，二十四炁神王，七十二候鬼王，盡洞淵三昧所掌行病鬼神等衆，或五行金木水火土之候，金木相剋，人民受誅斬徒配，水火相剋，人民受暴死、虎狼所傷，水土相剋，人民受黃病瘟死，以火燒之，吾勅此鬼，使逐年逐月下降各分州縣，隨方逐家道觀僧寺，察錄罪福，不行善法，使天雷霹除，以火燒之，以水溺之。或是仕宦，或是富豪，不積寸善，常行惡毒，不明賢良，或是官吏、獄卒里首人等，增加王法，將惡凌善，叫天不聞，官長不明，不行其善者，吾勅四目老翁，搖鈴斬發吒統領五瘟徒衆，往來下方，若不信吾法，輕慢笑辱者，磨滅死絕。

元君再語帝曰：此之九月九日九夜，遇夜半子時，若人至此月此日，自身合家清齋行道，清潔素裳冠履，百和名香砂素表章，奏拜三三之次，各隨願所陳披宣，吾在七元宮中端目視之，天

宮金闕門下，有左右年直月直日直時直天一真官、天官直事，獲時與此人合奏何事，披露何言，疾速判斷善惡，定其分數，生人增加壽筭，福祿自然，子子孫孫，代代相承，亡者生天，出離苦趣，受生善道，若求名利，隨其高下，若雪冤讎，送冥府泰山府判，送速報司對照，天地無私，若有一王朝斗蓋之，一

國四方寧靜，八表來朝，五穀成熟，果木茂盛，萬民無爭，乾坤祐之，星辰恭敬，若有清靜道心朝斗蓋之，坊境無諸魔難，此人虔誠積功，朝拜一二年、二九之年，九玄七祖超生善國，見存獲福，若有不信吾法者，頭破七分，絕其命根。

北斗付囑章第二十五

上士忘形，求道之真，道之玄妙，主握天下，隨機而化，以應精龜拆形視物，言其吉凶，天降甘雨，普濟萬物，利世濟人，不言而至，天地包育萬物，故云上士求道也。中士求道，貪其名利，外學也，委其火宅，貪其娛樂，被物所轉，終身之苦，禍及子孫，飲食著衣太

過，天地費工，三司配下，致使貧窮，累世受苦，生生世世，死入冥塗，無有出期，故云中士求道也。下士求道，將道爲門，貪財貪色，口談今古，心知昧行，貴求衣食，味道之源，流浪生死，沉淪苦海，三司配下冥曹，墮作牛馬之身，轉轉生生，死入輪迴，永不遇其正道，善業不聞，故云下士求道也。

北斗付囑章第二十六

大道北斗元君重告帝曰：吾在天宮逐季逐月下降之日，統領諸天列仙及四目老翁、十二時辰四直使者，同到下方，檢點王臣州縣官僚士庶、僧尼道俗，及諸山林社廟鬼神、河伯水官、天地山川、江河淮濟、木樹精靈、山巖石穴、橋梁古木，年深成精，作諸魍魎怪魅，及諸般蛟蜃，食生人血，害生人命，及人住宅塚墳，並修方起造，坐宮作向，有犯天星地宿，并一切人民心行一切善念。大道之意，行於平等，救護貧苦，給濟衣食，一切病患，給以湯藥，推問當界神王社令、住宅土地、司命竈君、七十二禁忌之神，住宅人口，善男

信女，老幼尊卑，童奴童婢，或外人寄居，發心朝元，恭敬吾斗之法，其人當受衣食無窮，壽命延長，不見刀兵惡事，及一切患苦，賜增一萬一千八百功德，常得善星擁護，其住宅當界一切龍神，亦受三萬二千功德，八萬八千祿位，超出鬼趣，得生上界天邑天宮，受人天快樂，轉於星官真君之位。凡修方注祿，坐宮作向，大獲安寧，隨心所應，天神護祐。又有國王大臣文武官班見聞北斗付囑之法，心生恭敬，遙空望斗朝元，乞保家國安寧之賜。又有生民合家眷愛，齊心信受，沐浴身心，虔誠朝元，便得天曹注福，地府落名，南斗注生，元辰共護，天地水府三官大帝，三府群真同舉，具奏北極大帝積功等數，奏上三天，吾北府斗樞當差四目老翁，領下三千六百案局，具錄進奏昊天金闕玉皇大天帝，吾親奏受平等注生真君之位，共治下界生民，除諸惡毒之氣，見存眷愛，萬靈護祐，子子孫孫，除災降福，真實不虛。或有生民不行善道，秤尺升斗不平，心行暗毒，廣造

惡業，謀害善良，百靈落籍，滅除福祿壽命，善籍注罪，送入地獄，永失人身，流浪生死，難遇超生，若出入中，六根不具足，及受諸苦惱，精神暗昧，衣不蓋形，食不充口，或受囚獄困苦連綿之危難。

元君復告帝曰：一切生民，心念行善，善果之報；心念行惡，惡緣之報。大道之語，真實不虛。若不信者，吾使逆法治之，勅差天中五雷使者滅隨霹靂絕，勅差五瘟大憲行化惡病絕，勅差南方炎帝烈火星衆焚蕩絕。吾於每年逐季逐月下降，巡轉分野，國郡州縣鎮場管界王神、社廟住宅龍神司命，較量一切善惡，四日老翁檢點城隍土主里域靈祇，及九州社令、十洲社官、司命錄籍諸神，逐月逐時抄錄人間善惡，具奏天曹，禍福無私。又有正月二十五、二十六日，二月初三、初七日，三月念三、念六日，此三月係春季，行天雷天火燒之，五瘟時氣病之死絕，若學道求真，心無二行，吾當注福延命。四月十七、二十七日，五月初五、十三、二

十日，六月初四、初八日，此係夏季，分龍行雨，隨行抄錄善惡輕重，積善者十倍全收，積惡者減尅四分。七月初四、二十四日，八月十一、十九、二十七日，九月初三、十八日，此係秋季，收掠人間五穀，分數善惡等分，注簿抄攢，增減禍福，分毫無私。十月初十、二十六日，十一月初一、初九、十七、二十五日，十二月二十日，此係冬季，檢校四天下人民善惡陰陽，而又十二月三十日夜半子時，舊年太歲交換新年太歲點對方位，三煞十二禁忌，若有志心，不拘高下貴賤，陰間鬼神道、畜生道、或地獄道，或女人欲轉男子身，或在床枕久病，或被惡人道路劫掠，或被冤人執賴，或被官灾橫禍，或被鄰里謀執，或被獄囚日久，無門得放，或遭五瘟行病，或被巫師咒詛，或兄弟不和，或夫妻不順，或爲名利牽纏，或無男女，或在惡道之中、不仁之所，或被蛟蜃之難，或修方有悞年月日時，坐宮作向有犯凶星惡煞，或行兵入陣一切不明之事，至斗真下降之日，清齋志誠，焚香

朝拜，面向北方，一心恭敬，分申情款，吾管案分仙曹靈官，度量善惡等分輕重，除灾降福，如業力重者，陰罪降之，恐墜人身，若善力高者，吾當注一萬五千八百善利，道業清靜，功德完成，吾斗府真仙部衆面奏昊天金闕玉皇上帝，乞降勅旨符命頒行，天蓬大聖主帥真武佑聖，帥將及四日老翁神通眷屬部衆，各化法身三十六丈，無時奉勅救護生民，不敢違令。吾說此經，開濟存亡兩道，令死者冤者各遂超升，令生者善者同增福壽，若學仙道，早得仙名，此是誦經朝元禮斗大感應者也。若有鬼神不信、違吾語者，頭破分裂，應滅魔族，吾勅力斬發，急急如律令！

北斗付囑章第二十七

元君復告帝曰：若於來世，當證高真上仙之位，天蓬大帥，吾勅賜摩頂聖明，合受一萬八千善利，清靜道行上妙功德，廣揚吾法，治教人間生民利益，皆由聖明大種福田。

元君讚經曰：

家有北斗經，家國自安寧。

家有北斗經，壽命自然長。
家有北斗經，亡者得超生。
家有北斗經，官災不能成。
家有北斗經，五穀自成熟。
家有北斗經，百怪不能侵。
家有北斗經，更夜自然安。

北斗付囑章第二十八

元君曰：吾今一一賜與護持，凡此實語，過勝金玉。昊天玉皇上帝之法，祥瑞章句，光如日月，明如星斗，吾今賜與，將治人間，願凡夫人各歸善道，願箇箇返本朝元。又語帝曰：善護人民，永為天地山河教法作主，通世流布，不昧其功，前章一一乃為分別，更無虛也。吾眾今奉上帝勅宣，來詔吾眾，更不久住，各返仙都，凡此經典，不得輕慢，須潔淨焚香至誠，身披道服素裳，一心看禮，如對吾面而宣。是時帝聞語已，稽首再拜奉辭，聖駕還返仙宮，大漢明皇聖主，當時勅下省部，直送郡邑名山福地道觀抄錄，傳授人天，信受奉行。

太上北斗二十八章經

①「文章」，據下文，疑此二字為衍文。

②「入」，疑當作「人」。

（曾召南點校）

113 北斗七元金玄羽章

經名：北斗七元金玄羽章。撰人不詳，約出於宋代。內載北斗七元星君玄章，據稱乃漢明帝於終南山遇北斗七真所授。附錄符咒、誦經訣、二使者說等。一卷。底本出處：《正統道藏》洞神部玉訣類。

貪狼星君玄章第一

北斗延生，回真四靈。流輝下映，朗達玄冥。七元紀籍，名列紫瓊。保身續壽，永亨利貞。耳目開爽，魂魄長寧。攝養精炁，與神同明。延生自然，上昇玉清。

巨門星君玄章第二

北斗保命，玄靈散陳。丹田通暢，運合仙真。七元定籍，名列紫文。護身註壽，福慶維新。辟除妖惡，善瑞日臻。

去來無礙，與神同輪。保命自然，上昇玉宸。

祿存星君玄章第三

北斗度厄，高仙上靈。流輝徧照，內外肅清。七元錄籍，名列紫庭。扶身延壽，祿位長亨。臟腑開朗，動止咸寧。光運合景，與神同榮。度厄自然，上昇玉京。

文曲星君玄章第四

北斗消災，玄黃開陽。仙靈影現，明徹十方。七元掌籍，名列紫房。衛身益壽，長啓福祥。明真降祐，滌蕩凶殃。華精炁結，與神同鄉。消災自然，上昇玉堂。

廉貞星君玄章第五

北斗扶衰，真宗降靈。流霞散光，仙仗交盈。七元典籍，名列紫營。固身養壽，慶合連并。高玄接引，優游五明。駕景飛翔，與神同齡。扶衰自然，上昇玉庭。

武曲星君玄章第六

北斗散禍，玄映禦空。威靈備守，妖邪絕蹤。七元注籍，名列紫彤。榮身增

壽，享福無窮。仙官扶衛，步躡雲中。正真降集，與神同聰。散禍自然，上昇玉宮。


破軍星君玄章第七

北斗益筭，明霞散敷。流光普雨，真炁長扶。七元度籍，名列紫書。治身添壽，常處歡娛。飛仙蹈舞，遊宴玄都。徹視表裏，與神同居。益筭自然，上昇玉輿。


右羽章，昔漢明帝於終南山，親遇北斗七真之所授也。

金玄羽章真符


貪狼星，子生人屬此星，泰山松柏樹下生，急性食粟，有厄，帶此符并粟七粒。




巨門星，丑亥生人屬此星，泰山松樹下生，食黍子，有厄，帶此符并黍子七粒。




祿存星，寅戌生人屬此星，泰山柏樹下生，食稻，有厄，帶此符并稻七粒。




文曲星，卯酉生人屬此星，泰山柏樹下生，食小麥，有厄，帶此符并小麥七粒。




廉貞星，辰申生人屬此星，泰山松樹下生，食麻子，有厄，帶此符并麻子七粒。



武曲星，巳未生人屬此星，泰山桑樹下生，食大豆，有厄，帶此符并大豆七粒。



破軍星，午生人屬此星，泰山松樹下生，食小豆，有厄，帶此符并小豆七粒。



咒曰

咒者祝也，以心通天，用神合炁，形聲相應，咒而祝之，法立而有，不疑乃中。

天靈節榮，願保長生。

天靈在圓蓋之下，崑崙之上，謂之天谷神穴，神穴者，百關之總會也，人有三十九關，三百六十骨節，能守太玄之一者，則關節流通，真炁榮也。人之病者，關節凝滯，真炁衰也。而真炁流通，則病安從生？病既不生，長生可冀也。神農、黃帝曰：百病不愈，焉得長生，此之謂也。夫百節之衆，惟舉天靈一穴者，乃百神朝宗之所，得一而萬事畢矣。莊子謂之見獨，黃帝謂之呼吸精炁，獨立守神，太上謂之寂兮寥兮，獨立而不改，周行而不怠。獨者一之稱也，所

謂守一以資神，依神而守一者也。太玄之一，守其真形。

太玄之一者，玄靈之寶，此經之訣也。夫守玄一者，可以與天地相畢，壽命無窮，陸辟惡獸，水辟蛟龍，不畏魍魎、挾毒之蟲，鬼不敢進，刃不敢中，能守之者，出行萬里，入軍旅，涉大川，不須擇日時起土，移徙入新屋舍，皆不須按星曆，而不避太歲太陰將軍、月建月耗之神、年命之忌，終不復置殃咎也。若在一切厄難凶惡之處，守一勿怠，衆惡遠屏，不敢為害也。若忽偶忘守一而為百鬼所害，或卧而魘者，出中庭視見輔星，握固守一，鬼即去矣。若天陰雨者，但止室內，向北存思見之而矣。真人曰：守玄一之法，與真一同功，乃先賢保命之道，皆得良驗，其道當須告天盟地而後傳之。今注守玄一之道，先當百日潔齋，乃可候而求之，亦不過三四日可見矣，見而守之，時無暫息，則長生矣。《老子》曰：知其白，守其黑。又曰：歸根曰靜，靜

曰復命是也。夫玄一者，是我元命真人也，但坐而守之，守之極靜，於至靜之中，圓光之內，忽見我之真形者，是玄一，得之守之，則不復去矣。《黃庭經》云：玄元上一魂魄鍊，一之為物頗卒見，須得至真乃顧盼，至忌死氣諸穢賤。其餘應驗，如前十二之利益矣。

五藏神君，各保安寧。

《內景》曰：心神丹元字守靈，肺神皓華字虛成，肝神龍煙字含明，腎神玄明字玉嬰，脾神長在字魂庭，皆在心內運天經，晝夜存之自長生。三元五藏之神，存之於我，各保安寧矣。

急急如律令！

律令者，太上之敕，天神地祇無不遵奉，敕其身神，奉其律令而安且寧也。修真之士，若能急急依太上之令，奉行璇璣玄一停輪之道者，則神能舉形，飛昇可待矣。

誦經解厄訣

先凝神叩齒，端息正坐。良久，閉目靜思泥丸宮中有九宮九星，各處一

宮而坐七人，如人間道士之狀，衣褐披髮，二人輔弼之服。訖，復存天上北斗，星光燦然如見，即以舌拄上腭，成仙橋一道，五藏出五色之炁五條，乘橋而上，橫亘斗中，即呼四直使者從橋而入斗中，通告某事；次見擎羊使者、陀羅使者二人，如玉女之狀，青衣執劍，一人捧花盤，一人捧羊頭，從斗中而下，度橋而過，入我身中九宮之內，復出一室之中，檢校都畢，復入斗中。良久，但見斗中九皇九人，如已形中九人之服，乘雲氣自橋而下，入泥丸九宮之室，與我九人各相對坐，倏然形聚合為九人，杳冥之際，復合為一人，自泥丸宮中乘雲而下，入黃庭之內，端坐而誦北斗九辰天中大神之咒七徧，然後誦經求解某厄，或運式以行持任意畢，復誦北斗長生聰明神咒七徧而畢，則倏然忘形，良久而退，則宗師臨壇口訣極有良驗。

二使者說

《飛步捉神法》曰：北斗乃天一貴人也，行法之士，當變形為所屬貴人，

役二使者以治事。夫陀羅者，陀者大也，羅者都也，斗中都大之官也。擎羊者，擎者掌也，羊者善也，斗中掌善之官也。巳丑為天一所坐之正位，於內則陀羅使者以總諸事，巳未為天一所出之正位，在外則擎羊使者以總諸事也。執花擎羊以像而立形耳。有曰：擎羊非擎羊也，擎楊柳耳，祭斗以柳眼代茶，其神必降，此自是祭法中好樂之物，非使者之喻也，大抵丑未為天一貴人出入之位，二使者掌之，則曰大吉小吉者可矣。使者形容不定，或仙衣如玉女之形，或通天之冠如直使之狀，或青赤之面髮直冲冠若力士之服，或繡袍玉帶若內侍之官，然執羊花仗劍不易者矣。此二使者，上通於天，下通於地，中通於人，三才六合之內，有事隸於斗宮者，無不總會焉。大法有參斗入神，元綱流演，九晨飛步，迴元隱遁，變化飛昇之法，皆須二使者引導而後行之，其職大矣，又有無知之者，曰桃花殺，羊刃殺也，罪莫大焉。

（曾召南點校）

114 北斗七元金玄羽章

無符咒本

經名：北斗七元金玄羽章。撰人不詳，約出於宋代。內載歌頌北斗七元及輔弼二星玄章。較另一版本多出輔弼二章，但無符咒注訣。一卷。底本出處：《正統道藏》洞神部贊頌類。

東斗註筭真君，南斗註生真君，西斗註名真君，北斗註死真君，中斗太微真君，明德好生真君，洞明萬福真君，舍光延壽真君，柔德益筭真君，保元註生真君，天德註善真君。
貪狼星官玄章第一
北斗延生，回真四靈。流輝下映，朗達玄冥。七元紀籍，名列紫瓊。保身續壽，永亨利貞。耳目開爽，魂魄長

寧。攝養精氣，與神同明。延生自然，上昇玉清。

巨門星官玄章第二

北斗保命，玄靈散陳。丹田通暢，運合仙真。七元定籍，名列紫文。護身註壽，福慶維新。辟除妖惡，善瑞日臻。去來無礙，與神同輪。保命自然，上昇玉宸。

祿存星官玄章第三

北斗度厄，高仙上靈。流輝徧照，內外肅清。七元錄籍，名列紫庭。扶身延壽，祿位長亨。臟腑開朗，動止咸寧。光運合景，與神同榮。度厄自然，上昇玉京。

文曲星官玄章第四

北斗消災，玄黃開陽。仙靈影現，明徹十方。七元掌籍，名列紫房。衛身益壽，長啓福祥。明真降祐，滌蕩凶殃。華精氣結，與神同鄉。消災自然，上昇玉堂。

廉貞星官玄章第五

北斗扶衰，真宗降靈。流霞散光，仙仗交盈。七元典籍，名列紫營。固

身養壽，慶合連并。高玄接引，優游五明。駕景飛翔，與神同齡。扶衰自然，上昇玉庭。

武曲星官玄章第六

北斗散禍，玄映禦空。靈威備守，妖邪絕蹤。七元註籍，名列紫彤。榮身增壽，享福無窮。仙官扶衛，步躡雲中。正真降集，與神同聰。散禍自然，上昇玉宮。

破軍星官玄章第七

北斗益筭，明霞散敷。流光普匝，真炁長扶。七元度籍，名列紫書。治身添壽，恒處歡娛。飛仙蹈舞，遊宴玄都。徹視表裏，與神同居。益筭自然，上昇玉輿。

左輔星官玄章

乾坤交泰，三命接靈。上步天宿，飛行九星。左把隱書，右執羽經。拜謁尊帝，受道之名。得越華蓋，騰翔紫庭。今日行道，萬慶交并。受福巍巍，永享長生。身變羽毛，飛昇上清。

右弼星官玄章

道合三微，玄臺舉真。出常入空，

逃形天關。浮翔八極，駕景紫煙。飛
步九炁，變化億千。遨遊北蓋，嘯吟勾
陳。所求如願，所啓如言。長鎮天地，
華晨保年。

北斗七元金玄羽章

(王卡點校)

115 太上玄靈斗姆大聖 元君本命延生心經

經名：太上玄靈斗姆大聖元君
本命延生心經。撰人不詳，約出
於宋元。勸修練大丹者尊奉斗
母元君。一卷。底本出處：《正
統道藏》洞神部本文類。

老君曰：斗姆上靈光圓大天寶月中有騫樹，色瑩瑠璃，玉兔長生，鑄鍊大藥。凡天地氣運休否，日月星辰錯行，雨暘晦明不時，風寒暑濕不節，亢旱水火，疫癘凶災，至如刀兵蟲蝗，妖精鬼怪，疾病傷生，爭訟橫撓，種種不祥，悉皆乖氣所致。斗姆降以大藥，普垂醫治之功，燮理五行，升降二炁，解滯去窒，破暗除邪，愆期者應期，失度者得度，安全胎育，治療病痾，潤益根莖，陽回氣候，生成人物，鍊度鬼神，散

襪百結，資補八陽，輔正全真，召和延祚，潛施藥力，職重天醫，生諸天衆月之明，爲北斗衆星之母，斗爲之魄，水爲之精，主生人身光，凝性水，衆水一月，衆月一光，有情無情，均稟靈光，道炁一一資其生養護衛，恩深德重，皆莫能知，是以人心面有七竅，內應乎心，魄有七真，受魄於斗。斗母尊號曰：九靈太妙白玉龜臺夜光金精祖母元君，又曰：中天梵炁斗母元君，紫光明哲慈惠太素元后金真聖德天尊，又化號大圓滿月光王，又曰東華慈救皇君天醫大聖，應號不一，主治中天寶閣，祖劫在玄明真淨天修行玄靈妙道，勤奉元始至尊，慧香氤氳，智燈朗曜，每發至願，願生聖子，補裨造化，統制乾坤，願力堅固，終始如一。因沐浴於九曲華池中，湧出白玉龜臺神獬寶座，斗母登于寶座之上，怡養神真，修鍊精魄，冲然攝炁，炁入玄玄，運合靈風，紫虛蔚勃，果證玄靈妙道，放無極微妙光明，洞徹華池，化生金蓮九苞，經人間七晝夜，其華池中光明愈熾愈盛，其時

一時上騰九華天中，化成九所大寶樓閣，寶樓閣之中，混凝九真梵炁，自然成章，文曰魑魍魍魍魍魍魍，前有天罡，光敷祕字，文曰魑魍，芒角料然。是九章生神，應現九皇道體。一曰天皇，二曰紫微，三曰貪狼，四曰巨門，五曰祿存，六曰文曲，七曰廉貞，八曰武曲，九曰破軍。天皇、紫微尊帝二星居斗口娑羅上宮，真光大如車輪，得見之者，身得長生，位證真仙，永不輪轉。二星分作餘暉，爲左輔、右弼，爲擎羊、陀羅，神化無方，總領玄黃正炁。七元星君幹運陰陽造化，功沾三界，德潤羣生，其功德力不可思議。夫修鍊九還七返大丹者，持此頓悟玄關，靈光現前，三十九節自然生榮，了證太玄三一之道，知守本來具足之理，堅固真身，更能精修大定，乃至形神俱妙，與道合真，飛昇玉京，逍遙自在。至此，則劫劫生生，玄祖宗親，皆得解脫，同受玄恩，濟度存亡，此爲深妙，皈心持奉，靜處璇璣，內景無漏於六根，外景不淪於萬有，湛然清靜，道在目前，頂禮真形。

恭敬咒曰：

玄靈節榮，永保長生。太玄三一，
守其真形。五臟神君，各得安寧。

魁魍魎魍魎魍魎，急急如律令！

太上玄靈斗姆大聖元君本命延生心經

（曾召南點校）

116 先天斗母奏告玄科

經名：先天斗母奏告玄科。撰人不詳，約出於宋元之際。係神霄派禮拜先天斗母之科儀。一卷。底本出處：《萬歷續道藏》。

舉，步虛，師剔九鳳罡，飛訣于水盂，焚九鳳符。

臣聞鯨波入聖，能除五濁之塵，鳳篆超凡，可降九清之炁，離火初焚，坤輿已肅，以今焚香告召九鳳破穢大將軍、五方五帝五龍君、天德月德君、生炁旺炁方大力威神、洞罡太玄吏兵華池文浴夫人、滄水繡衣使者、盪兇院解穢局一行官將吏兵，并請各各持符仗劍，降佈真炁入吾水中，防今蕩穢，務俾千邪屏跡，萬怪滅蹤，動天地，感鬼神，藉此蠲潔之力，鼓雷霆，潤風雨，建茲清靜之場，注想一專，威靈多變，經

章秘咒，謹用宣揚。

衆誦淨天地咒，梵淨壇符，師密咒化壇。

謹敕壇存八卦，內藏璇璣，二十八宿，分佈四維，先塞鬼路，次留人門，上開天門，下閉地戶，兇惡滅跡，道炁昇佈，一如元降律令。焚信香符切以玉爐靈風聚煙，式表欽崇之敬，寶字飛雲結篆，能通奏告之誠，心地工夫，性淵造化，以今謹奉真符，投入香火爐中，明道德無爲，合陰陽不測，存者神，過者化，纔瞻一縷之飛，赫厥聲濯厥靈，已沐萬神之集，天風散影，星火遙聞，謹按真詮，用楊秘咒。

師三禮上香，衆誦香咒。

玉華散彩，九炁凝烟。香雲密羅，徑冲九天。侍香金童，傳言玉女。爲臣通奏，上聞帝前。所祈所願，咸賜如言。

法師三禮，長跪啓師，焚符。

伏以維壯，有斗當嚴，奏告之誠，主善爲師，全賴提撕之力，無師不度，惟道是從，門下奏受。

具職嗣派弟子某，謹焚信香，虔誠上

奏道經師寶、元始萬神、無上至真、三界元尊、昊天金闕玉皇上帝、主法梵炁天皇天父天帝法主、梵炁天皇天母、天帝斗父、龍漢天君、紫微中天北極大帝、勾陳星宮天皇大帝、承天效法后土皇地祇、神霄真王長生大帝、東極青華大帝、九天應元雷聲普化天尊、九天雷祖大帝、斗母紫光天后、摩利支天大聖圓明道母天尊、上清紫微碧玉宮太一太天帝、六天洞淵大帝、六波天主帝君、九天可韓司丈人真君、九天採訪使真君、諸天天帝、主法高真、十極十華真宰、瓊章寶藏經籙神仙、上清十一大曜星君、南斗六司延壽星君、北斗九皇解厄星君、東西中三斗星君、普天星象萬象群真、天罡大聖奎光星君，道光主照某當生本命星君、斗中神仙諸靈官衆、三元三品三官大帝、北極天蓬天猷翊聖真君、北極佑聖真君玄天大帝、祖師泰玄上相正一真君、太極左宮仙翁、真淨明道師真君、華蓋祖師三仙真君、上清三茅司命真君、祖師火師汪真君、

宣封靈惠王真君、祖師虛靖張真君、祖師西番教化真人、祖師阿迦利真人、祖師鐵牛聖者、祖師一行禪師、祖師翰林學士普光真人、祖師紫清明道白真人、宗師懶牛先生、宗師降魔女仙師、宗師元受宣教清遠大法師、宗師應光大法師、惠光大法師、西蜀上官真人、太極超雷上相萬真人、果州威惠鍾真人、冲靖至德照應都錄劉真人、藥珠鐵山石真人、神霄散吏月鼎莫真人、經籍度師三真人、清微靈寶道德正一承流襲慶歷代度人仙衆，伏想鸞車鶴駕，翩翩款駐於壇場，鳳餅龍團，翼翼薦陳於几席，師馭光臨，淨茶進獻。

舉散花，師三禮，上香，再跪。

具職嗣派玄玄孫臣某頓首再拜上告：伏願飄裾淩斗柄，遠從中天弭節而來，瀾茗表凡誠，庸盡弟子事師之敬，暫安師席，默贊教科。伏念臣某質並樗材，派宗梵府，升鉛降汞，罔知脩煉之方，遡紫凌清，莫究奏陳之旨，賴師造之密加汲引，故教科之可罄宣揚，既奉來詞，敢稽敷露，臣謹奏，爲入意向

來情悃，恭對披宣，臣誓堅利濟，事屬好生，詳此心誠，不容拒抑，謹爲拜貢斗母心章，上聞大梵天宮，具箋斗府牒劄，合屬依法奏告，情悃已露，諒達高明，伏願浩浩垂慈，循循善誘，相求相應，就有道而正焉，所禱所祈，遂至誠而感也，專祈師旨，下諭師垣，承符命以宣揚，俾忱詞而昭格，拱希恩貺，敢昧謝言，暫駐壇場，主盟奏告，俟法事之云周，秉愚誠而奉送，臣頓首再拜謹言。

舉：開明旨要天尊。

三禮，金光咒，師變神，步罡，召將。

天地廣大，故愛物而不遺，日月高明，宜容光而必照，雲關雖遠，天耳遙聞，以今雷霆都司，焚香關召三界符使、四直功曹、直壇土地祇應等神，聞今關召火速到壇，有事指揮。疾，密咒存至杳杳冥冥，天地同生，散則成炁，聚則成形，聞呼則至，遇召即臨，有違吾命，如逆上清，急急如律令！

適伸召請，想已到壇，仰煩爲吾齋

香，上召九天運令陽神欵火律令鄧天君、九天掌令陰雷都督猛吏辛天君、九天行令罡神飛捷報應使者張神君、玉音大梵雷王，鳴令宣化億萬雷神、本壇官將一切吏兵，聞今關召，疾速到壇，伏請嚴肅威儀，整齊隊仗，承此潔壇符命，翊衛壇場，即化現於威光，普掃除於氛穢，祇迎斗真而降鑒，俾令詞悃以潛通，昭示吉凶，顯揚道化，各慎爾儀，毋曠厥職，大彰報應，准令奉行。

化結壇符，衆唵咒：

玉壇巍巍，高聳太微。金甲鐵騎，百億萬圍。掃除妖氛，剿滅邪非。

肅清雲路，下降天墀。急急如律令！

告二梵符

伏願心馳象外之天，敬迓九天而降駕，引睇斗中之聖，湏憑使者以驅車，以今頒告真符，上請斗中玉梵尊天嘍囉王、妙梵尊天嘍囉王、大梵天宮直符林使者、擎羊楊使者、陀羅耿使者、斗中通事舍人、斗中延生保命扶衰度厄消灾散禍益筭七元神將、九天飛捷

報應使者張神君、斗下翻解冤結顯使者地司太歲殷元師、斗中解二十四厄靈官、七元真燈掌課命神吏、八門警策報應大神、斗府玄曹列職官衆、法籙中仙靈官吏、本壇將佐神兵、本屬城隍廟社之神、家居香火司命土地等神、三界符者、四值功曹、臨壇效職祇應等神，仰望隨符顯化，准敕通靈，下降法壇，通傳誠悃。

舉：隨機赴感天尊。師密念：

唵喇哆 吒唵吽 唵唧嚙嚙嚙

適頒元降真符，上請玉梵尊天嘍囉王、妙梵尊天咖嘍王、大梵天宮直符林使者、斗中擎羊楊使者、陀羅耿使者、斗中通事舍人、九天飛捷報應使者張神君、斗府玄曹列職官衆，既沐威神而下降，願聽凡悃以告陳，以今奉爲祈禳，某皈投壇下，奏告斗真，仰冀洪慈，曲垂妙濟，願爲掃蕩雲衢，變現真境，通傳情悃，上達斗宮，乞賜恩光，俯垂降鑒，寶鼎香焚，高接徘徊之雲蓋，銀缸花結，交輝燦爛之星垣，化暗昧而作光明，蠲氛穢而爲清淨，臣謹告行燃燈

真符，法像星罡，顯明休咎，伏願翦鬱百千重之梵炁，飛來五色之祥雲，熒煌三五點之祥光，移下一天之星斗，道炁隨咒而下降，真光合符以周流，庶俾行持，立彰昭報，暫停仙珮，特賜鑒觀，臣謹虔恭告行如法。

告星坦符。衆念咒：

七元下降，准臣告聞，燈光明暗，

知吉知凶，威神之力，萬願從心，

與道合真，

舉：闡揚妙化天尊。存想在祕旨

內。

法衆念變燈咒：

上帝有敕，點發斗燈。七星來降，照護群生。左輔右弼，顯現威靈。天蓬元帥，統領天兵。天雷使者，六甲六丁。玄武大聖，三台尊星。攝病除禍，回死作生。天降威力，誅斬妖精。收魂附體，七魄安寧。斗燈一照，身宅光明。急急如律令！

舉：燈光普照天尊

伏願燈光星彩，交輝珠璧之光，擎

羊陀羅，特進瑤堦之步，通事舍人，前驅梵府之車，臣謹告行元降通靈秘篆，速詣斗口，一誠實貫於元皇，上聞帝前，正炁流通於原命，默副皈依之懇，來醫急難之災，雲路肅清，仙仗交馳於空際，天衢平垣，霓裳下降於人間，臣敢不恭焚寶篆，注想瑤壇，願賜恩光，曲垂降駕。

師三禮上香。

具位臣某再拜，三露心香，至恭虔誠上奏九天雷祖大帝、大梵先天乾元巨光斗母紫光金尊聖德天后、圓明道母天尊、太羅天上太虛宮中天星主、照萬法祖師北極紫微太皇大帝、勾陳星宮天皇大帝、玉斗左宮高上玉皇尊星大帝、大靈八景元君、玉斗右宮北極元卿大帝，七元上道元君、紫極天英貪狼太星君、紫極天任巨門元星君、紫極天柱祿存貞星君、紫極天心文昌紐星君、紫極天禽廉貞綱星君、紫極天輔武曲紀星君、紫極天冲破軍關星君、紫極天内洞明外輔星君、紫極天蓬隱元右弼星君、九皇夫人妃嬪母女仙眷天罡

大聖、萬真節度星君、上清十一大曜星君、上清主照某當生本命星君、大小二運二限祿馬二庫星君、胎生八位神將、旁臨正照一切星宰、斗中千真萬聖列曜群真，恭望道慈，俯垂降鑒，臣聞祖炁妙分，毓生民而立極，坤元孕質，萬聖母以支天，屬統御於光躔，賴包涵於萬彙，几茲折懇，全仗感孚，以今某投匍禳度事，臣職惟演教，志在濟人，既領來詞，理宜敷奏，伏念臣凡愚濁質，體未洞真，省躬每缺於薰脩，至理未窺於竅妙，全資道力，汲引愚蒙，恭惟九天雷祖、大梵先天乾元巨光斗母、紫光金尊聖德天后、圓明道母天尊，浩劫法身，金蓮瑞相，化形三界，總持二帝之垣，子育群生，宰制七元之位，光耀前遊於日月，威芒下制於雷霆，凡稟陰陽，均霑化育，今爲某身嬰疾患，心慕真宗，祈降福以消災，特建壇而闡事，仰承錫鑄，獲遂揄揚，茲領詞忱，理難抑拒，誓勤利濟，恪爲奏禳，伏願仙女侍香，徑達無爲清虛之境，真靈下盼，暫離天宮梵府而來，臣誠惶誠恐，稽首頓首再拜，

恭迎聖駕之至，謹言。

法衆念金光咒，焚紫光雲篆，師存想祕旨內。

兩手握斗訣，迎左斗訣，禮梵音：

哪唵囉咄哪，哆囉啞哪，摩唎吱唎唎，嚩唵囉，嚩囉阿目祈薩嚩徒瑟誓，盤陀盤陀娑訶。

迎右訣

唵唎吽唵唎吽唎吽唵唵唎唵唍吽吽娑訶。

迎左訣

唵吽吽唵唵阿囉迦嚩唵，摩囉迦摩西，蘇屠摩西，吱嚩囉摩西，摩訶支婆羅摩西，摩利支啞摩西，唵怛唵哪啞摩西，嚩謨粹都帝急急奉

元始上帝毘盧遮那大聖主救。

迎右訣

唵吽吽唵唵，吽唵唵，唵吽吽唵，迎左訣

唵吽吽唵，喃唵唵，嚩唵唵律令娑訶，迎右訣

唵哪囉唵唵嚩嚩娑婆訶，兩手交合念八佛母咒

你辣嗎都摩西，巴打曷刺都摩西，嗎嘎唵唵辣都摩西，唵唵辣都摩西，唵唵唵哪都摩西，嚩唵哪都摩西，唵唵哪都摩西，唵嗎哩嗟娑訶

順 左手斗印一炁七遍

訶娑咤嗟哩嗎唵。

逆 右手斗印一炁七遍。

師存想完 却：禮 迎請禮誥如法

嗣教玄玄孫臣某志心皈命禮：

天上修羅交戰日，人間劫火洞然時，四頭應化顯神通，八臂垂雄施道力，常遊日月二天前，獨立刀兵三界內，威光赫奕，妙相圓融，接能衆生超離諸苦，太虛有盡，本願無窮，大悲大願大聖大慈九天雷祖大帝，日宮太陽帝君，月府太陰皇君，聖惠先天斗母紫光金尊，聖德巨光天后，摩利支天大聖圓明道母天尊。

臣某等志心皈命禮：

西天竺國、大智光中，真空妙相法王師、無上玄元天母主，金光燦處，日月潛輝，寶杵旋時，鬼神失色，顯靈踪於塵世，衛聖駕於閻浮，衆生有難，若稱名大士，尋聲來救苦，大悲大願大聖大慈聖德巨光天后、救一切難摩利支天大聖圓明道母天尊。

禮誥完。

臣恭望大慈大悲，超生死不相干之地，至靈至聖，了鬼神窺不破之機，伏願神通加護我，千灾萬禍悉消除，臣干冒威嚴，下情無任不勝，瞻天望聖，急切，祈懇俯俟恩命之至，再拜謹言，適伸拜請，諒沐光臨，伏以斗極分輝，地神擁座，珠聯璧合，照齊州九點之煙，日擊道存，進陽羨先春之草，恭祈頓首，奉獻香茶。

散花

嗣教玄玄孫臣某再拜，上啓虛無妙道十極高真、梵炁龍漢天君、紫光金尊聖德天后、摩利支天大帝、斗府星垣列曜群真、本命元辰照臨真宰、玉梵尊天嘍囉王、妙梵尊天伽嘍王、大梵天宮直

符林使者、祖師宗師經籍度三師列位真人、雷神天將一切威靈，燈筵降鑒與會衆真，恭望天慈洞垂昭鑒。臣聞一炁肇開，萬靈布列，天高地厚，合陰陽鑄之功。日照月臨，分晝夜運行之妙，仰惟斗極實宰天功，同七政而共五行，樞機造化，統萬靈而威三界，綱紀乾坤，拜首玉階，酒行初獻。

散花

嗣教玄玄孫臣某，上啓虛無妙道十極高真、梵炁龍漢天君、紫光金尊聖德天后、摩利支天大聖圓明道母天尊、斗府星垣列曜群真，本命元辰照臨真宰、玉梵尊天嘍囉王、妙梵尊天嘍囉王、大梵天宮直符林使者、祖師宗師經籍度三師真人、雷神天將一切威靈、燈筵降鑒與會群真，恭望天慈洞垂照鑒。臣聞道演玄微，本一炁先天之妙，星輝紫極，見七元北斗之宮，昭昭神室之靈明，洞洞泉極之淵邃，銀缸煥彩，玉篆騰煙，薦蘊藻酌潢汙，惟欲精於誠意，冠祥雲披日月，願常見於尊儀，爰奉芳樽，酒行亞獻。

散花

嗣教玄玄孫臣某，重誠上啓虛無妙道十極高真、斗父龍漢天君、斗母摩利支天大帝圓明道母天尊，北斗九皇大道君、周天星宿本命元辰、玉妙二梵天王、斗中通事舍人、大梵天宮林使者、祖師師真、雷神官將、燈筵啓格與會群真，恭望道慈俯垂昭鑒。臣聞大道無形，妙集虛而應物，凡民有欲，輒敷枉以陳情，遙瞻黃道之輝，密運洪鈞之化，伏願至真垂憫，上帝弘恩，何灾不滅，何福不臻，終始永依於道蔭，所向者成，所爲者合，行藏均賴於靈休，爰竭一誠，酒陳三獻。

散花

具位嗣教玄玄孫臣某，重誠上啓九天雷祖、大梵先天乾元巨光斗母、紫光金尊聖德天后、圓明道母天尊、仗此真香，普同供養。臣聞至靈至聖，了鬼神窺不破之機，大聖大慈，超生死不相干之路，威靈赫奕，妙相圓融，昔在周御國中，發弘誓願，澡盥温玉池內，化現金蓮，是生九子，統領群倫，飛居中極

之尊，用作衆生之生，解冤釋對，如九日照耀于冰山，度厄扶衰，使七元運轉於濬極，獨立刀兵劫界，常遊日月天前，接引衆生，超離諸苦。又聞紫微尊星，衆星環拱，元是樞機之首，實爲喉舌之司，既在照臨，敢忘欽奉，伏念某妙

分一炁，獲在人倫，予貌肖形，舉藉鉤鎔之造，時易日屢，乖違香火之勤，動有百愆，居無片善，庸展鱗朝之禮，仰干鴻庇之私，輒陳自懺之辭，滿望維新之祉，香焚寶木，燈燦瑤花，致三肅以祈恩，叩北辰而拜首，俯陳丹悃，仰企清光，恭願宸衷軫念，聖旨宣傳，除罪簿，滅惡根，誕告於日宮月府，落死名，

上生籍，照冲於斗極仙曹，固福根而永滅禍根，實命脉而長延壽脉，祿無冲破，馬不空亡，如合璧，如連珠，輝映於身躬，限位曰鈎魂曰鑄魄，^②堅於火宅樊籠，四時運而喜氣常臻，七政^③而陰陽不忒，木敷榮而金削厄，火息焰而水流恩，土厚栽培，氣興善瑞，天首絕刑冲之害，神首回凶怒之威，福壽康寧，無復毛頭生怪狀，化育長養，常蒙

本命降真靈，臣素乏材疏，叨行科法，祈受籙傳符之日，當分環破券之時，誓勤濟物以利人，爰許飛章而上奏，凡民有欲，天意必從，所有元降心章，謹當宣讀。

宣章。

俯伏。

按如章奏，已具告陳，大道無私，必垂省覽，但臣未明休咎，所當布占投符，願恩命之速頒，副凡民之皈向，吉凶晦吝，福禍憂疑，指定四方，分明報應。

起身步罡召將，

起五色祥雲符，

遣章符。

伏以九重金闕，居巍巍大梵之天，一意丹誠，罄翼翼小心之信，謹遵教典，進拜符章，已奏對於玉階，當貢焚於雲驛，以今上請玉梵尊天嘍囉王、妙梵尊天伽嚩王、九天罡神飛捷報應使者張使者、斗中擎羊陀羅二使者、斗中通事舍人、三界功曹符使、詞居香火司命土地等神、本壇官將祇應等神，聞今

上請，速現威靈，壇有牒文，合行宣讀。

宣費章牒

開天符

適伸符牒，已對敷宣，諒沐雷威，

必垂昭鑒，然則罡風灑炁，非凡體以能通，斗府雷司，有威神而可達，速請乘雲駕霧，跨景凌空，火鈴一擲，而光照入^①荒，雷光一飛，而升騰三界，徑詣丹天之闕，直趨紫極之垣，啓典奏之仙鄉，通金尊之御座，凡誠得達，敕旨煥頒，元降符章，速操上進，當職欽承帝命，掌握印符，專雷霆號令之權，司斗府奏禳之事，令下疾如星火，法佈迅若風煙，三界不許稽延，一時明彰報應。

發遣完。

向來奏告功德，上祈星真，轉斗移星，同賴善功，一切信禮，伏願天清地寧，萬法咸祈於調理，世安國泰，群生總賴於周旋，矧在微軀，伏蒙大造非橫出於莫測，見暝日消，福慶無不其宜，如川方至，或傾危殆，全仗扶持，向來奏告功德，上翼斗真證無上道，一切信禮。

先天斗母奏告玄科

- ① 据前後文此脱字當爲「伽」。
- ② 此字不明，暫以□代之。
- ③ 「入」，當爲「八」之誤。

(曾召南點校)

117 玉清無上靈寶自然 北斗本生真經

三十六天大司命宸京
保命大天帝君下傳

經名：玉清無上靈寶自然北斗本生真經。撰人不詳，約出於宋元。假託元始上帝為寶上真人說玉清紫光夫人本生故事，勸人設醮持誦《九光真經》，祈求智慧福壽。一卷。底本出處：《正統道藏》洞真部本文類。

洪惟大道，浩浩赤明，元始開圖，化導群有，現大光明，照百千界，於玉清皇極宮中，放種種光明，所謂金藏雲光，玉藏雲光，珠藏雲光，海藏雲光，香藏雲光，花藏雲光，火藏雲光，五行之光，周徧天下，下及人寰，上則萬二千年，下則八千萬國，莫不承我元始之

力，一時雲集，聽說无上至真妙道。元始上帝太極真尊撫明雲几，下觀大衆，發大梵音，如大天鼓震響十方，天上天下，一時皆謂元始上帝與我獨語，莫不歡喜，誠服聽受。元始上帝乃敷奧義，大發至真之淵淪，披迷雲之日月，其時龍音雷吼，駭聽動心。

道曰：一心玄微，廣包萬景之多，一心所受，表裏洞然，本无留礙，生死去來，如影如夢，緣何倒置，認此為真，淪沒妄波，不能出離。方說是法，時有真人，從座而起，虔恭百拜，仰瞻威容，告真尊曰：臣名寶上，諸天子中，最為第一，今有微願，望賜開弘，臣所願也。中天七星，巍巍赫奕，統御羣曜，斡旋烝運，斟酌死生，威力至重，以何因緣，殊勝第一，起自何劫，始終之化，願詳聞之。真尊歎曰：大哉，汝之問也，在昔龍漢，有一國王，其名周御，聖德无边，時人稟受八萬四千大劫，王有玉妃，明哲慈慧，號曰紫光夫人，誓塵劫中，已發至願，願生聖子，輔佐乾坤，以裨造化。後三千劫，於此王出世，因上

春日，百花榮茂之時，遊戲後苑，至金蓮花温玉池邊，脫服澡盥，忽有所感，蓮花九包，應時開發，化生九子，其二長子，是為天皇帝，紫微大帝，其七幼子，是為貪狼、巨門、祿存、文曲、廉貞、武曲、破軍之星，或善或惡，化導群情，於玉池中，經于七日七夜，結為光明，飛居中極，去地九千萬里，化為九大寶宮，二長帝君居紫微垣太虛宮中，勾陳之位，掌握符圖，紀綱元化，為衆星之主領也。昔大願注此剛強世界七千萬劫，方還玉清，紫光夫人亦號北斗九真聖德天后，道身玄天大聖真后，應現上天南嶽，是名慶華紫光赤帝之尊。若有信心男女，能於上春日一心齋戒，肅爾神明，設九光醮，迎請紫光聖母并七元君，虔恭奉獻，縱有多劫十惡重罪，冤家苦報，如九日輪照於冰山，應時消釋，上至國王大臣，下及民庶，能奉之者，感獲景貺，福壽增延，无量天真俱來擁衛，見世圓滿，子孫昌盛，命終之後，超生大梵真天。世上之士，若能常誦《九光真經》，設九光醮，持紫光

名，智慧福壽，如彼甘泉，隨汲隨發，受用無盡，此功德藏世間第一，汝當傳布，助我道風。寶上真人既聞金口所宣，與諸天衆，莫大歡躍，感謝鴻恩，各起心念，我等當供養真尊，真尊之恩，如父如母，難以報稱，於是各運神通，就玄空中散百千萬種光明，寶藏无量光明，寶香无量光明，寶雲無量光明，寶雨无量光明，天樂不鼓自鳴，並合節奏，无量大寶光明宮殿旋空而下，至真尊前，而爲貢獻，无鞅真聖萬口一辭，讚揚真梵，口稱偈曰：

巍巍元始尊，神通居第一。世間無與比，如日照萬天。智慧廣方便，而能化有生。我等以萬身，身身俱萬舌。以讚真尊道，窮劫不能盡。仁哉紫光天，善能變現身。男形或女形，應機而接物。歸命北極母，無盡功德海。永爲盲者目，照耀於今古。功德與元始，通爲内外化。陶鎔大法器，普成无量真。

寶上真人與諸天衆說是偈畢，一切天神敬禮真尊，奉辭而退。

玉清無上靈寶自然北斗本生真經

(曾召南點校)

118 玉清元始玄黃九光

真經

經名：玉清元始玄黃九光真經。
撰人不詳，約出於宋元。假託元始天尊等仙真上帝說誦經念咒，煉形凝神之法。一卷。底本出處：《正統道藏》洞真部本文類。

大羅高天，玄黃玉文，盤結萬炁，金玉璀璨，侍香金童，傳言玉女，飛雲成蓋，散香成樓，中有神君，與我爲儔，元始保命，太上司喉，青衣姹女，純陽玉童，共鍊正炁，歸于道宗，層層峨峨，玉京宸闕，杳靄大梵，超越衆天，非無非有，真體自然，降神流世，爲人精魂，陽魂護精，陰魄育血，精血純全，至陽內備，乘彼凡質，復歸無物，浩浩真體，大合太空，空中有象，真體玄融，抱一守真，真體不變，既來不隨，倏去無戀，

無中有體，體法真空，真無妙理，與道符同，聖行純備，功德圓熟，出沒自我，化俗成真，所化緣盡，復歸高清，高天上，上無復色，以神爲體，以空爲宅，神我遍空，如波涵月，道合無爲，求真問宅，三界大魔，瞻仰稽首，非魔所測，當盡不惑，九天真聖，諷誦此文，誦經得福，助真超神，至神無我，至道無名，巍巍大道，萬法真宗，九陽天真，六陰幽鬼，福業不同，聞我妙咒，兩耳皆通，我今稽首，萬劫道祖，元始天尊，太上道君，太上老君，五官黃老，三玄丈人，飛天神王，妙行真人，左右真人，太乙真君，十方天尊，諸天上帝，一切苦惱，及所希求，保身養命，洞徹明幽，聞誦一過，同力扶衛，玉童玉女，記過書名，名登仙籍，所向皆成。

元臺真人直奏天官曰：此經乃玉經中髓，天上衆真有職務者，以大經統計二百六十餘卷，難可常誦，撮其要妙，三百餘字，而常誦之。以子心希大道，仰慕瓊文，發我心絨，開新爾志，使汝誦之，精血內凝，形神和合，邪魔隱

避，二炁交清，自然神聞玉書，歡和戀殼，久而神炁相合，凝神爲體，聚精爲質，神非可見之神，精非有形之精，真所謂神中之神，精中之精，凡有所執，非我所云，勤而行之，寶而奉之，家藏一紀，或至二紀，俟當天運，擇有道焉。

元始保命天君太上左臺神侯真君降曰：復有秘咒直奏不言，以我玉經未敢擅行，昔元始天尊嘗居始青天內，說大梵真音，普度萬靈，神咒曰：

唵元始生天，唵元始生地，唵元始生人，三才備位，萬物紛紜，人不保生，化爲陰神，神炁不全，流爲下鬼，唵下鬼聞我玉音，鬼形即滅，舍彼鬼形，生我天宅，唵人道聞我玉音，頓捨人業，長生神仙，與天地同壽，與日月合明，一身被福，七祖蒙榮，既度七祖身劫玉清，唵天道聞我玉音，天福頓增，宿業永盡，不墜下天，常居玉清，急急一如元始上帝嚴勅，二教合一唵，急急一如清淨法身毗盧遮那大聖主勅。此咒名曰混元劫一普度萬靈神咒，萬神之祖，一炁之宗，唵爲世界種真之炁，咒而保

命，無所不辟，無所不成，生天生地，化育群品，爲福惠基，解厄延壽，解脫先業，福蔭見存，形神俱妙，一炁俱清，漸入無爲之境，性無累德，與道合明，萬神歸仰，群魔束形，勤誦此經，無不度也。

玉清元始玄黃九光真經

(曾召南點校)

119 玉清胎元內養真經

玉清寶神元臺真君下傳

經名：玉清胎元內養真經。撰人不詳，約出於宋元。假託元始上帝為太上老君說煉形凝神，保養胎元精氣之法。一卷。底本出處：《正統道藏》洞真部本文類。

爾時太上老君因朝元始上帝，告太上曰：精虛則炎上，氣虛則下走，陰陽各行於水火，金木不成於夫婦，是致下上之人，真氣日衰，陰邪日戾，殘其本壽，精神不全，淪為下鬼。我當授汝胎元妙道，以外玄牝合內玄牝，以外真神補內真氣，聚集天之萬寶，養我胎元精，使神生於胎，氣戀於神，心君潛御，氣息調勻，萬神敬禮，群魔束形。汝當教其兆民，先學定心，心定氣住，

氣住神全，神全形固，綿綿若存而不息，用之不窮而見功，谷神不死，合我真宗。我愍世人外為酒色之所賊，內為思慮之所縈，惟貪名利，消落精神，戀著粉屍，巧笑蛾眉，逐外亡本，崩我靈基，使坎離之壞散，致魂魄之流離，兒女成列，形骸漸衰，為一棺之聚土，失天地之真機，良可悲乎！汝勸世人先持小戒，以至大戒，先學息心，漸入無為，因定生明，因明悟道，上品之人，以籠易細，成光明身，居清淨天，壽命无量。中等之人，延年住世，補復胎元，不致夭傷。下品之人，遠離情慾，淡薄利名，歸向真風，順行聖教。汝當以我妙語，分千萬形，周流教化，漸漸接引，捨邪歸正，去濁留清，證无上道。

是時太上老君恭奉聖訓，即與紫光天母，各化其形為塵沙衆，分身世界，普度有情，未久之間，上界萬二千天，於蓮華中化生无量天人，各各乘空詣玉清境，面對真尊，而說頌曰：

无上神父，開大方便。戒敕太上，紫光天母。化形下方，廣度我輩。並

因戒定，咸得上生。獲意生身，證无上道。我等變化，百千萬身。身具萬舌，讚揚玄德。百千萬劫，亦未能盡。巍巍功德，不可窮詰。我等信受，將何補報。誓發大願，於未來劫，復度有情。惟此一心，是名報德。

无量天人說是妙頌，各以天華寶香散虛空中，而為貢奉，遙望真尊，百禮而退。

玉清胎元內養真經

（曾召南點校）

120 玉清無上內景真經

大羅真天元天大聖
后紫光天母下傳

經名：玉清無上內景真經。撰入不詳，約出於宋元。言元始真尊化生天地五方精氣及內煉臟氣，返老還嬰之法。一卷。底本出處：《正統道藏》洞真部本文類。

爾時元始至真大聖化生開天，以其大神通力，大智慧力，結造世界，配合陰陽，主張造化。先於大梵真天玄空之中，化諸外象，以表內景，而分九氣，爲東方木精之色，結化九氣丈人而君主之，在人爲肝爲魂。次分七氣，爲西方金精之色，結化七氣丈人而君主之，在人爲肺爲魄。次分三氣爲南方火精之色，結化三氣丈人而君主之，在

人爲心爲神。次分五氣爲北方坎精之色，結化五氣丈人而君主之，在人爲腎爲精。四方餘氣水火金木分布中央爲黃庭之色，結化一氣丈人而君主之，在人爲脾爲思。五臟含識，共具十真，十真之英，能成九轉，聚爲丹藥，散爲甘露，周旋上下，煉養百骸，沐浴留清，消陰鑄陽，復我太初，保我大全，出于崑崙，入于太淵，引其龍變，經於虎城，四氣和合，成我至真，衰殘易盛，耄耄還嬰，朽容再鮮，白髮重青，韻如鍾發，身如羽輕，盡更凡骨，飛昇上清。世之學士，立戒持定，而生智明，以其三力，永保億年，履輕清之氣，運定變化以超仙也。左右一玄無極真宰，以我此道廣布天人，使其捨離無常之業，而入真一之妙，非老非死，湛寂常存。

元始真尊於其七竅放大光明，照无量土，萬二千天百億人界，各以自力散香雨華，而爲貢奉，莫不欣悅，咸悟本心。爾時玉清化宮於空玄中，忽見寶月光明，照映內外十虛，寶月之中，包含紫炁之內，有一嬰兒，坐寶華臺，

口放金光，發大玉音，而說偈曰：

一心生正定，萬象自然陳。逐方分五氣，五氣孕一靈。一靈通變化，結煉本來真。本真非有相，非有亦非無。兆能通此理，方悟攝塵珠。

玄空之中，月光之內，玉嬰演教，天上天下，一時皆聞。莫不慧海湛然，業山摧毀，反觀內照，永契道真。仰望聖光，拜禮而去，敬信奉持。

玉清無上內景真經

（曾召南點校）

121 太上內丹守一真

定經

南嶽七金寶山慶華紫光天母傳

經名：太上內丹守一真定經。
撰人不詳，約出於宋元。與《玉清無上內景真經》等同時。一卷。底本出處：《正統道藏》洞神部本文類。

仰聞大道，混沌始分，分立天地，日月經緯，交合元氣，陰陽之精。道法生成，保命養形。世人茫昧，貪慾天生。今傳聖義，兆當敬行。

元始上帝告諸新學衆真曰：我有妙道，久秘發言。夫動二以爲陰，靜一以爲陽。二則有變，一則守常。知常悟明，抱一爽靈。兆欲久視，當服金晶。定神御氣，真息綿綿。綿綿存之，玄中之玄。中田流火，陰魄上迎，坎離

交固，變化自然。惟定爲本，是名靈根。光明赫奕，自照乾坤。綠腸丹髓，萬世長存。陰去陽純，白日超昇。

於是玉宸大道君曰：此爲一身之寶，萬氣之母。兆得其母，六子生焉。兆當精思其義，守其真定，自然形神俱妙，與道爲一，與天爲徒，道莫大焉。是時新學諸真聞是妙道，退居靜室，專一靜思，反其太初，成至真道。

太上內丹守一真定經

（丁培仁點校）

122 元始八威龍文經

經名：元始八威龍文經。撰人不詳。一卷。底本出處：《正統道藏》洞真部本文類。

第一

不得而名道之初，可得而形道之餘，知初者合元始之祖，知餘者契陰陽之樞，混而一之可與天地符。

第二

混沌之初，中含太虛，玄玄之不可測，妙妙之何以元，肇判之已餘，恍惚有真中之居。

第三

谷虛神之存，出入于生死之門，修之煉之可不勤，保之慎之以固根。

第四

玄牝之合和其炁交，其神以成其子身，安得就疏而棄親，得不捨妄而從

真。知造化之津可以化吾之民，天降地升，環之以日月，發之以雷霆，誰測機緘之運行，不言可以利羣生，斯其用以公天下之情。

第五

恍恍惚惚，火中生神，杳杳冥冥，水中生精，火炎於上，七返生神，水流就下，六居生精，神會精以通天地之靈。

第六

聞交響者損其虛，視美色者奪其精，知者逆之，以神不順于情，可以守而不更，全汝形，抱汝生，毋使爾思慮營營。思慮營營，則忘汝形，勞汝生，可不慎于真，以存其誠。陽動陰靜，上下應而成萬物之靈，靜不動而何以生，動不靜而何以寧，剛柔相兼，不為而成。

第七

虛而不實，所以火生，靜而不動，所以水清，知此道者，性定可以通吾之神，心寧可以使吾炁之流行，大哉言之，明人之守身不若守神，以神會炁，

以炁合真，是謂至人，猶子母不離其親。

第八

以始合終，以萬物會一，夫聚散之妙，可以通天地之虛實，火不以焚，水不以溺。

元始八威龍文經

(曾召南點校)

123 靈寶五經提綱

經名：靈寶五經提綱。撰人不詳，約出於宋代。一卷。底本出處：《正統道藏》洞玄部威儀類。

敷座 法事

大聖聞經，悟道天尊。

太上微言在五經，五經垂世若丹青。丁寧試爲重宣演，解脫亡靈出夜扃。

伏以經天緯地之謂道，道出分三，垂世立教之謂經，經傳有五式，宣妙義，祈度亡靈，謹運真香，志心上啓太上無極大道虛無自然元始天尊、玉晨道君、靈寶天尊、太上老君道德天尊、昊天至尊金闕玉皇上帝、東極青玄慈父太一救苦天尊、大慈十方救苦天尊、九天生神上帝、五方五老上帝、三十六部尊經玄中大法師、三元三官大帝、九幽拔度真宰、五嶽十地陽曹陰掾、主宰

真靈三界內外應感神祇，咸望慈悲，俯垂洞鑑。蓋開趨正道而出迷途，必資惠炬，度苦海而登彼岸，須藉法橋，故天尊以方便心爲衆生立權實教，出五經之旨趣，爲萬有之筌蹄，歷歷玄文，巍巍大範，格言妙訓，必志於道，據於德者，始能究其淵源，奧義奇辭，非出乎口入乎耳者所可窺其髣髴者也，以今奉爲某求度亡，故某謹集見前清衆敷座，諷誦：

《洞玄靈寶九天生神章經》、

《太上老君說常清靜妙經》、

《高上玉皇心印妙經》、

《太上洞玄救苦拔罪妙經》、

《太上生天得道真經》。

特用回薦亡靈，超真解脫，當願亡者某出羣迷徑，入希夷門，玉章生神，四象五行之和合，妙經救苦，三尸六賊之消亡，空五蘊以爲得道之階，淨六根以證生天之實，忘心忘形忘物，識真常得性之機，鍊神鍊氣鍊精，明混合迴風之道，嘉與有情之衆，同歸無相之門，法衆虔誠，同聲讚詠。

諷《生神章經》

仰惟《九天生神章經》，乃三洞飛玄之炁，結空成梵，自然成文，所以能開天地、生人物者也。大抵人之生也，皆受九天之炁，以爲胞胎魂魄，至於五臟六腑、七竅八景、三萬六千神，莫不由其融結而後得生，一有壅闕，則生生之理不具，蓋有孕重而隨殯者矣。夫九天之炁，順而委之，則結凡胎而爲人，逆而修之，則結聖胎而爲仙。聖凡雖異，其爲道則一而已矣。又天秉陽，九，陽數也，純陽者仙，純陰者鬼，真人以陽消陰，則昇天而爲仙，衆人以陰消陽，則入地而爲鬼。既爲鬼則受拷擿都，魂神蕩散，非藉神章以攝其遊爽，則無由自拔於長夜，而返陽明之域。是故鍊度家最重斯文者，蓋以此也。亡者某既聞靈音，所當耽咀洞慧，凝神而守真宅，鍊胎而返本初，自然魂魄和柔，九天之炁混合玄牝，而胎仙之道成，胎仙之道成，則馳騁龍駕，白日登晨，是謂與九炁合德也，可不勉乎，可不勉乎！用廣發揮，請吟一頌：

九天妙炁自虛來，空洞凝和結聖胎。身外有身能造化，超凌三界出輪迴。

衆和：難逢難遇《生神經》。

諷《清靜經》

仰惟《太上老君說常清靜妙經》，蓋高上老子西遊閩風時，爲西王母演說，乃大道心法也。嘗試論之，天地萬物所宗者，一道也，經書萬卷，所明者一心也。道有太常，心有真妄，修道必修於大道，論心先論於真心。大道漠然無形，而能運化羣有，真心寂然不動，而能建立萬法，非心無以見道之全體，非道無以見心之妙用，道外無心，心外無道。是故古之修道者，先修其心。何以修心？曰清靜而已矣。何以致清靜？曰虛而已矣。人能使方寸之地虛，則一塵不染，一物不留，寂然湛然，常清常靜，一神獨運，妙應無窮，可以超出生死之外，是謂得道也。方寸之地苟不能虛，則百路千岐，勞勞役役於其外，七情六慾，繆繆擾擾於其中，與接爲構，日與心鬥，方且流浪生死之不暇，豈清靜之能致、道之能得耶！亡

故某苟能於此有所悟，澄慮以求其清，遣慾以求其靜，忘形忘物以求其虛，積成久之，自然一點靈光通天徹地，所謂形神俱妙，與道合真，游行三界，昇入金門，左玄仙公豈欺我哉！用廣發揮，更吟一頌：

真心清靜道爲宗，譬彼中天寶月同。

淨掃迷雲無點翳，一輪光滿太虛空。

衆和：難逢難遇《清靜經》。

諷《心印經》

恭惟《玉皇心印妙經》，蓋上帝金口演說，實金丹大道之準的也。嘗謂三萬六千種道，獨大道爲正宗，三千六百旁門，獨金丹爲正統。金丹之書，浩若煙海，求其簡要著明，未有若此經者。名以心印，不亦宜乎。大抵人身至寶，不過有三，神也，氣也，精也，修鍊者以此爲丹基，故以上藥目之，丹書所稱紅鉛黑錫、水銀朱砂、金精木液、甲庚龍虎、坎離烏兔、嬰兒姘女、黃婆土釜，其名不可槩舉，皆是物也。若得回風混合之道，採之取之，交之結之，以火鍊之，又從而溫養之，始於百日立

基，中於十月成胎，終於一紀功備，脫胎神化，一得永得，而金丹之道備矣。此上藥者，非惟人身有之，天地萬物莫不皆有之也，惟智人者，能以我之神，合天地萬物之神，以我之炁，合天地萬物之炁，以我之精，合天地萬物之精，故能隱顯自然，與太虛同其壽量，是爲得道也。大哉此藥，其妙道之至寶乎！亡故某既淪太陰，所謂上藥，今不存矣，然倘能取天地萬物之神，爲我之神，取天地萬物之精，爲我之精，將見迴骸起死，白骨成人，則上藥散而復聚，至寶失而復得，豈不樂哉！用廣發揮，更吟一頌：

上藥身中神炁精，人人具足靡虧盈。

能知混合迴風道，金鼎黃芽日日生。

衆和：難逢難遇《心印經》。

諷《救苦經》

仰惟《太上洞玄靈寶救苦拔罪妙經》，本於青霄隱書，蓋鍊度之祕文也。經中綱領有四，其要在於主光明而已。一曰委炁立。蓋元始以一炁分判天

地，運化陰陽，爲萬物之本，周子所謂太極動而生陽，靜而生陰，陽變陰合，而生水火木金土者也。二曰順炁生。蓋天地既判，陰陽既立，則人受其中和之炁以生，周子所謂二五之精，妙合而凝，乾道成男，坤道成女，萬物化生者此也。三曰成萬法。蓋人道既立，必有聖賢者出於其間，陳綱紀，立制度，爲之正德，利用厚生而後人道不窮焉。子思子所謂修道之謂教，亦此意也。四曰主光明。蓋此光明，乃性體也，主云者，奉之如君也，人能奉此光明，常爲一身之主，動靜語默皆聽命焉，自然靈臺之間，軒豁洞達，物莫能蔽，而道體全矣。《中庸》所謂尊德性，《大學》所謂在明明德，《莊子》所謂真君，皆指此也。夫此光明，人人具有，不爲堯存，不爲桀亡，不爲顏增，不爲跖減，操之則賢，捨之則愚，得之則昇天堂，失之則沈地獄，凡地獄中燒煮屠割，苦毒萬狀，皆因失此光明也。是故天尊每救罪魂，必先假以神慧，使之返照心源，自識宿命，方其悔悟之時，罪者立

赦，囚者立出，衆苦消釋，身心泰然，譬如旅人，中途亡其資，饑寒流離，困踣道路，一旦得寶，則百用立具，憂苦盡除矣。我天尊救苦之恩，亦如是也。亡故某於此光明，倘知樂處，精加鍊養，一朝成功，空洞之中自生別體，可以超度三界難，徑上元始天，尚何有地獄之苦哉！用廣發揮，更吟一頌：

種種無明是苦根，苦根除盡善根存。
但憑慧劍威神力，跳出輪迴五苦門。

衆和：難逢難遇《救苦經》。

諷《生天得道經》

仰惟《太上生天得道真經》，乃元始天尊爲一切天人顯示修行之捷徑也。夫傳道妙者，始於有言，終於無言，修天福者，始於有爲，終於無爲。若此經者，頓漸之門雙啓，始終之理畢陳，實得道之筌蹄，昇天之梯級也。推尋經意，用力工夫凡有六節。入道之初，先持齋戒，以堅信心，一也。廣建福田，精修妙行，而不染著衆緣，二也。常持正念，使內想不出，外想不入，以除煩惱業障，三也。保養真炁，使一身

之中，太和充溢，內外光明，四也。減節飲食，以養真元，遣鬼尸而絕嗜慾，五也。淨六根，空五蘊，以造虛妙，六也。信能行此六者，則心凝形釋，骨肉都融，可以遊行太虛，縱觀萬化，然後見道體之全真，心之妙始於有爲，而終於無爲，至此而自然默識也。亡故某苟能從事於斯，積學之功，日填一日，異時與羣仙携手於五城十二樓間，逍遙自在，方悔遇此經之晚也。用廣發揮，更吟一頌：

道以無心度有情，一切方便顯修真。
若歸聖智圓通地，便是生天得道人。

衆和：難逢難遇《生天經》。

收經 回向

臣等仰惟三清上帝、金闕衆尊、經筵所啓三界真靈，咸望洪慈，俯垂洞鑑，向來諷誦太上五經功德，總用資薦亡者某魂，開發道性，拔度苦根，當願聞《九天生神章經》，則知稟生受命之源，而修返本還元之妙。聞《清靜經》，則頓悟性宗，而空諸相。聞《心印經》，則自修命學，而鍊內丹。聞《救苦經》則

主此一點光明，不沈地獄。聞《生天得道經》，則爲之雙修福慧，徑陟天堂，逍遙妙有之庭，遊宴鴻濛之域，一真不昧，萬劫長存。始焉因經以指迷，至此忘言而得意，譬若乘舟度苦海，到彼岸則舟無所施，持炬照迷途，歸正道則炬將安用。是謂經功之極致，亦爲法會之大成。法衆虔誠，聞經讚詠。

舉三聞經

聞經已後，當願衆生起心回向，常常信禮。聞經已後，當願衆生心開悟解，受持轉誦。聞經已後，當願衆生普上法橋，無有障礙。

靈寶五經提綱

（曾召南點校）

『十五』國家重點圖書出版規劃項目

主 編 張繼禹

本冊主編 李 剛

華夏出版社

中華道藏

第六冊

目錄

001 太上老君說常清靜妙經	一	020 太上昇玄消災護命妙經頌(司馬承禎)	九七
002 太上老君說常清靜經註(杜光庭)	二	021 太上昇玄消災護命妙經註(李道純)	一〇〇
003 太上老君說常清靜經註(無名氏)	一五	022 太上昇玄說消災護命妙經註(王玠)	一〇三
004 太上老君說常清靜經註(侯善淵)	三八	023 元始天尊說生天得道經	一〇八
005 太上老君說常清靜經頌註(劉通微)	四七	024 生天經頌解(王吉昌)	一〇九
006 太上老君說常清靜經註(李道純)	五一	025 元始天尊說得道了身經	一一一
007 太上老君說常清靜經註(王元暉)	五四	026 元始天尊說太古經註(長笏子)	一一三
008 太上老君說常清靜妙經纂圖解註(王玠)	六六	027 太上赤文洞古經註(長笏子)	一一七
009 太上老君清靜心經	七七	028 無上赤文洞古真經注(李道純)	一二〇
010 太上老君內觀經	七九	029 老子說罪福大報應經(敦煌本)	一二二
011 太上老君說了心經	八二	030 老子玄通經(敦煌本)	一二五
012 太上玄都妙本清靜身心經	八三	031 老子十方像名經(敦煌本)	一二七
013 太上靈寶洗浴身心經(敦煌本)	八六	032 老子像名經	一三三
014 太上靈寶智慧觀身經	八八	033 太上說轉輪五道宿命因緣經	一五〇
015 太上洞玄靈寶觀妙經	八九	034 太上清靜元洞真文玉字妙經	一五三
016 洞玄靈寶定觀經註(冷虛子)	九〇	035 太上老君說報父母恩重經	一五五
017 太上洞玄靈寶天尊說大通經	九四	036 太上真一報父母恩重經	一五八
018 太上升玄消災護命妙經	九五	037 太上老君說益筭神符妙經	一五九
019 太上升玄消災護命妙經	九六	038 太上老君說長生益筭妙經	一六一
		039 太上老君說上七滅罪集福妙經	一六四
		040 太上老君說消災經	一六六
		041 太上老君說解釋呪詛經	一六八
		042 太上老君說安宅八陽經	一六九

043 太上老君說補謝八陽經	一七〇	066 太上元始天尊說大雨龍王經	二一八
044 太上老君玄妙枕中內德神咒經	一七一	067 太上長生延壽集福德經	二一九
045 太上老君說救生真經	一七二	068 三光注齡資福延壽妙經	二二〇
046 太上說十煉生神救護經	一七三	069 太上神呪延壽妙經	二二一
047 太上太清天童護命妙經	一七四	070 太上道君說解冤拔度妙經	二二二
048 太上太清天童護命妙經註	一七六	071 太上說通真高皇解冤經	二二三
049 太上泰清皇老帝君運雷天童隱梵仙經	一七九	072 太上洞神天公消魔護國經	二二四
050 太上九真妙戒金籙度命拔罪妙經	一八一	073 太上洞神五星諸宿日月混常經	二三二
051 太上說九幽拔罪心印妙經	一八五	074 太上洞神三元妙本福壽真經	二三五
052 元始天王歡樂經	一八六	075 太上虛皇保生神呪經	二三九
053 太上洞真五星秘授經	一九二	076 太上七星神呪經	二四〇
054 元始天尊說十一曜大消灾神呪經	一九四	077 太上金華天尊救劫護命妙經	二四一
055 太上說六甲直符保胎護命妙經	一九六	078 太上玉華洞章拔亡度世昇仙妙經	二四二
056 太上元始天尊說金光明經	一九九	079 元始天尊說三官寶號經	二四七
057 元始天尊說甘露昇天神呪妙經	二〇〇	080 太上三元賜福赦罪解厄消灾延生保命妙經	二四八
058 元始說功德法食往生經	二〇一	081 元始天尊說東嶽化身濟生度死拔罪解冤保命 玄範誥咒妙經	二五二
059 太上元始天尊證果真經	二〇二	082 碧霞元君護國庇民普濟保生妙經	二五七
060 太上元始天尊說續命妙經	二〇三	083 太上老君說天妃救苦靈驗經	二六〇
061 元始天尊濟度血湖真經	二〇四	084 太上老君說城隍感應消灾集福妙經	二六三
062 元始天尊說酆都滅罪經	二〇九	085 太上天聖朗靈上將護國妙經	二六五
063 太上說酆都拔苦愈樂妙經	二一〇	086 元始天尊說藥王救八十一難經	二六六
064 太上九天延祥滌厄四聖妙經	二一一	087 大惠靜慈妙樂天尊說福德五聖經	二六九
065 太上護國祈雨消魔經	二一六		

088	高上玉皇本行集經	二七二
089	高上玉皇本行集經(張良校釋本)	二八六
090	高上玉皇本行經髓	三二三
091	高上玉皇心印經	三二六
092	高上玉皇本行經集註	三二七
093	太上無極總真文昌大洞仙經	四三七
094	玉清無極總真文昌大洞仙經注	四五四
095	大洞經吉祥神咒法	五六九
096	元始天尊說梓潼帝君應驗經	五七一
097	元始天尊說梓潼帝君本願經	五七三
098	梓潼帝君化書	五七七
099	清河內傳	六一二
100	高上大洞文昌司祿紫陽寶籙	六一九
101	太上老君說五斗金章受生經	六三七
102	太上玄靈北斗本命延生真經	六四〇
103	太上玄靈北斗本命長生妙經	六四三
104	太上說南斗六司延壽度人妙經	六四四
105	太上說東斗主筭護命妙經	六四七
106	太上說西斗記名護身妙經	六四八
107	太上說中斗大魁保命妙經	六五〇
108	太上說中斗大魁掌筭伏魔神咒經	六五二
109	太上玄靈北斗本命延生經註(傅洞真)	六五三
110	太上玄靈北斗本命延生真經註(徐道齡)	六七七

111	太上玄靈北斗本命延生真經註解(玄元真人)	七一六
112	太上北斗二十八章經	七四三
113	北斗七元金玄羽章	七五三
114	北斗七元金玄羽章(無符咒本)	七五六
115	太上玄靈斗姆大聖元君本命延生心經	七五八
116	先天斗母奏告玄科	七六〇
117	玉清無上靈寶自然北斗本生真經	七六七
118	玉清元始玄黃九光真經	七六九
119	玉清胎元內養真經	七七一
120	玉清無上內景真經	七七二
121	太上內丹守一真定經	七七三
122	元始八威龍文經	七七四
123	靈寶五經提綱	七七五